


El Nuevo Testamento:
Cuicateco de Teutila



New Testament in Cuicatec, Teutila (MX:cut:Cuicatec,
Teutila)

El Nuevo Testamento: Cuicateco de Teutila

New Testament in Cuicatec, Teutila (MX:cut:Cuicatec, Teutila)

copyright © 1972 Wycliffe Bible Translators, Inc.

Language: Cuicatec, Teutila

Translation by: Wycliffe Bible Translators, Inc.

Cuicateco, Teutila [cut], Mexico

Copyright Information

© 1972, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Teutila

© 1972, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022
6bd8292c-2070-5c2d-8b8b-378bf0f66afe

Contents

SAN MATEO	1
SAN MARCOS	67
SAN LUCAS	108
SAN JUAN	174
HECHOS	227
ROMANOS	289
1 CORINTIOS	316
2 CORINTIOS	344
GALATAS	361
EFESIOS	371
FILIPENSES	380
COLOSENSES	387
1 TESALONICENSES	393
2 TESALONICENSES	398
1 TIMOTEO	401
2 TIMOTEO	409
TITO	414
FILEMON	417
HEBREOS	419
SANTIAGO	439
1 PEDRO	446
2 PEDRO	454
1 JUAN	459
2 JUAN	466
3 JUAN	467
JUDAS	468
APOCALIPSIS	471

NDUDO NDAH YAHN DIHVO VO JESUCRISTO CHE DIRUN SAN MATEO

Ihyan ndico che ndata yahn Dihvo vo Jesucristo

¹ Tuhca cochi ndata yahn Dihvo vo Jesucristo. Ihyan ndico yahn ye ne, David man, Abraham man.

² Daya Abraham ne, Isaac. Daya Isaac ne, Jacob. Daya Jacob ne, Judá nduco dihno se.

³ Daya Judá nduco Tamar ne, Fares man, Zara man. Daya Fares ne, Esrom. Daya Esrom ne, Aram.

⁴ Daya Aram ne, Aminadab. Daya Aminadab ne, Naasón. Daya Naasón ne, Salmón.

⁵ Daya Salmón nduco Rahab ne, Booz. Daya Booz nduco Rut ne, Obed. Daya Obed ne, Isaí.

⁶ Daya Isaí ne, rey David. Daya rey David nduco ndahta yahn Urías ne, Salomón.

⁷ Daya Salomón ne, Roboam. Daya Roboam ne, Abías. Daya Abías ne, Asa.

⁸ Daya Asa ne, Josafat. Daya Josafat ne, Joram. Daya Joram ne, Uzías.

⁹ Daya Uzías ne, Jotam. Daya Jotam ne, Acáz. Daya Acáz ne, Ezequías.

¹⁰ Daya Ezequías ne, Manasés. Daya Manasés ne, Amón. Daya Amón ne, Josías.

¹¹ Daya Josías ne, Jeconías nduco dihno se. Tahn min che din sandado yahn Babilonia preso ihyan nación yahn Israel, quenda se ihyan.

¹² Cuahn che chenan ihyan chahn nación yahn Babilonia, chihndeyan Salatiel, daya Jeconías. Daya Salatiel ne, Zorobabel.

¹³ Daya Zorobabel ne, Abiud. Daya Abiud ne, Eliaquim. Daya Eliaquim ne, Azor.

¹⁴ Daya Azor ne, Sadoc. Daya Sadoc ne, Aquim. Daya Aquim ne, Eliud.

¹⁵ Daya Eliud ne, Eleazar. Daya Eleazar ne, Matán. Daya Matán ne, Jacob.

¹⁶ Daya Jacob ne, José, ihyan min che chihnevaco nduco María, chaco Dihvo vo Jesucristo. Dihvo vo ne, a ihyan min che a va cade che dechuh Dendiohs, ndedevahn ye ihyan iyehense.

¹⁷ Ri ndichecun ihyan ndico che cochi rihco ndata ye nde cuahn che quenán Abraham iyehense nde nda ro che quenán David. Me nde ro che quenán David ne, te ndichecun ihyan ndico nde nda ro che chahtenan ihyan nación yahn Israel preso nación yahn Babilonia. Me nde ro min ne, te ndichecun ihyan ndico nde nda ro che chihndeyan Dihvo vo Jesucristo, ihyan min che a va cade che dechuh Dendiohs, ndedevahn ye ihyan iyehense.

Nduhca che chihndeyan Dihvo vo Jesucristo

¹⁸ Tuhca chi che chihndeyan Dihvo vo Jesucristo: Chaco ye, María ne, a va ndudo yahn ye che cahnevaco ye nduco José. Numanahn che metah cahnevaco ye ne, nduco vederihquentiyon yahn Vaco Ndah yahn Dendiohs ndaca daya ye.

¹⁹ Nducote ndah ihyan José ne, cuahn che checadino ye che quenun daya María ne, hua nahn ye che cora vedecuihno yahn ihyan min. Chemin che chihco dama ino ye che decuihno ye ndudo yahn ye nduco vih, tin deman no ye, cava che hua cadino ihyan.

²⁰ Ate ndihchero ye vān yahnde yahn ye āma ángel yahn Dihvo vo Dendiohs, ne rāhn ángel me ri ye ihyan:

—José, ndāta yahn David, hua dehve rahque, co cahnevaque nduco María. Hua ndeh ndedecadine, te che quenun dāya ye ne, a nduco vederihquentiyon yahn Vaco Ndah yahn Dendiohs.

²¹ Cuahn che cuhndeyān decuah me ne, cuaconehn che duche JESUS, te a ihyan min che ndedevahn ye ihyan yahn ye, cāva che hua conda ihyan chahn, din nunde yahn ye.

²² Tihcā chi nducuah chemin cāva che conahn che chihquentiyon Dihvo vo Dendiohs, dirun ihyan profeta tuhcā:

²³ Āma ndahta ntuhco ne, conun dāya ye.

Cuahn che cuhndeyān ne, conan che duche Emanuel. Che tihcā duche ne, conahn che Dendiohs nduco ye uvo.

²⁴ Cuahn che ntuche José ne, dinahn ye nduhcā che chihquentiyon ángel me ihyan, ne chihnevāco ye nduco María.

²⁵ Ate metah conan cuma ye ihyan nde chuh ro che chihndeyān decuah me. Cuahn che chihndeyān decuah me ne, JESUS chaconahn ye che duche.

2

Chahn ihyan devano nevahnecon ye Dihvo vo Jesucristo

¹ Chihndeyān Dihvo vo Jesucristo yān Belén, estādo yahn Judea, cuahn che quenān rey Herodes rihquentiyon ye estādo min. Tāhn min ne, o ino ihyan devano che chīca ye yāhn yahn cuāhn nān che riquendāh yāhn ne, ndā ye yān Jerusalén,

² ne tumerune ye:

—¿Ti quenān rey yahn ihyan nāción yahn Israel che a chihndeyān ye ne? A devano nuhn che a va ye, te a ndihchero nuhn iyon che rihco ro che a chihndeyān ye. Chemin che cochī nuhn ndeva nuhn yavenān ye.

³ Cuahn che checadino rey Herodes che tihcā ne, āma ndeh ndedecadino se. Namin nducoyāca ihyan yān Jerusalén āma ndeh ndedecadino ye.

⁴ Tuhme chihquentiyon rey me che ndo dāma chidocuyān ndinān mān, sāhn devano ley che dirun Moisés mān, ne tumerune se ti va cāde che cuhndeyān ihyan che dechuh Dendiohs, ndedevahn ye ihyan iyehñse.

⁵ Ndahconan ihyan chahn, ne rāhn ye ri ye sāhn:

—Yān Belén, estādo yahn Judea, va cāde che cuhndeyān ye, te dirun ihyan profeta tuhcā:

⁶ Yān Belén, estādo yahn Judea ne, co cuande vān yān rahte yahn estādo min, te min va che cuhndeyān ihyan ndinān

che din ye cudādo ihyan yahn Dendiohs, ihyan nāción yahn Israel.

⁷ Chihno min ne, cuāhn ndeh cah rey me ihyan devano chahn, ne tumerune se ihyan deh ro niyon che chihnde ro iyon me.

⁸ Tuhme chihquentiyon se ihyan chahn, ne rāhn se:

—Cuahn nchuhñ yān Belén, tumerune ndah ne ti quenān decuah me, ne cuahn che a ntāca ne ne, checu ne ndudo yāhn cāva che namin cāhn ndevā yavenān.

⁹ Chihno chihcovān ihyan chahn che rāhn rey me ne, quendi ye cuahn ye. Tuhme iyon me ne, quendāhñān cuahn nde ndā cuāco nān che quendite decuah me, ne min quendihco.

¹⁰ Cuahn che ndihchero ihyan chahn che quendihco iyon me min ne, ama chi yeno ye.

¹¹ Chenda ye chete vah, ne cuahn che ndihchero ye lihn me nduco chaco Mariá ne, chehntihya ye ndeva ye yavenan. Tuhme nahne ye yave nan che chenun tume yahn ye, ne tendah ye diyahnguan man, cuhn man, nundedan che duche mirra man, cah ye co yahn lihn me.

¹² Chihno min ne, cah Dendiohs che checadino ihyan chahn van yahnde yahn ye che metah ndaconan ye nan quenun Herodes, ne chemin che chahconan ye yune, conahn ye yan vaco ye.

Chano José, quenda ye Mariá nduco lihn me, cuahn ye nación yahn Egipto

¹³ Cuahn che a conahn ihyan devano chahn ne, ndihchero José van yahnde yahn ye ama ángel yahn Dihvo vo Dendiohs, ne rahn ángel me ri ye ihyan:

—Cuiquenda sahn dihn nduco chaco se, ne codin vi, cuehn cuahn nación yahn Egipto. Min conen nde ro che cahcantiyón che ndaconen, te Herodes ne, nuhn se sahn dihn me cava che cahno se sahn.

¹⁴ Ndetahno quenda José sahn dihn me nduco chaco se chete rahn, cuahn ye cuahn nación yahn Egipto.

¹⁵ Min chahtenan ye nde nda ro che chih Herodes. Tihca chi cava che conahn ndudo che cah Dendiohs, dirun ihyan profeta tuhca: “Nde nación yahn Egipto quenda Dayá.”

Dechuh Herodes sandado, chahn se chihno se checahya

¹⁶ Cuahn che tumacadino Herodes che chahcotahn ihyan devano chahn yahn se ne, ama chi tan se, ne dechuh se sandado yan Belén man, yan che nino min man, che chihno se nducoyaca decuah cahh, nde checahya che a ri o nduyo, te a tih va ro che ndihchero ihyan devano chahn iyon me.

¹⁷ Nduco tihca chinahn ndudo che dirun ihyan profeta Jeremías tuhca:

¹⁸ Ama rah ran ihyan man,

ama raco ye man,

anduhneca ndete che man Raquel raco ye cava daya ye.

Hua ndaca ye vedechahtino, te a chihno chihno se daya ye.

¹⁹ Cuahn che a chih Herodes ne, min nación yahn Egipto ndihchero José van yahnde yahn ye, ama ángel yahn Dihvo vo Dendiohs, ne rahn ángel me ri ye ihyan:

²⁰ —Cuendiquenda sahn dihn me nduco chaco se, ne conahn nación yahn Israel, te a chih sahn che nahn cahno se sahn.

²¹ Tuhme ndiquenda José sahn dihn me nduco chaco se, ne ndaconan ye nación yahn Israel.

²² Ate checadino José che Arquelao rihquentiyon se menun chida se estado yahn Judea, ne hua chihquino ye quenan ye estado min. Tuhme cah Dendiohs che checadino ye van yahnde yahn ye, ne cuahn ye estado yahn Galilea.

²³ Min quenan ye ama yan che duche Nazaret. Tihca chi cava che conahn nduhca che dirun ihyan profeta yahn Dihvo vo Jesucristo tuhca: “Nazareno cahma ihyan yahn ye.”

3

Juan Bautista ne, rahndudo ye yahn nan che metah duhva

¹ Tahn min ne, nda Juan Bautista estado yahn Judea, yahn nan che metah duhva. Min cahndudo ye

² ne rahn ye:

—Cuento ino nchuhn nunde yahn ne, te Dendiohs, ihyan min che va ye vahchetero ne, a nun cuahn cahcantiyon ye.

³ A yahn Juan che dirun ihyan profeta Isaias tuhca: Cuahndudo ama ihyan yahn nan che metah duhva, ne cahma ye tuhca: “Cuihcoyan nchuhn chedave yahn ne cava che nevahnecon ne Dihvo vo.”

⁴ Tino yahn Juan ne, ndiya nduco yudo yahn camello, ne quenan chete ye ama ima. Reh ye ama nan yahcadahn man, rih ye nedih yahn che va van chano man.

⁵ Ihyan yan Jerusalen man, ihyan che vate ye tama te o yan estado yahn Judea man, chihito ico Jordan man ne, rahn ye rihnevan ye che rahndudo Juan.

⁶ Rentuma ino ye nunde yahn ye, ne rehdenune Juan ihyan, min ico Jordan.

⁷ Ama yahn sahn fariseo man, sahn saduceo man, renda se cava che cuehdenune Juan sahn. Ate rihya ye sahn:

Nchuhn ne, nduhchan cu tan tihchan ne. ¿Duh te cuande nchuhn che din nun ino ne cava che ndevahn ne yahn castigo yahn Dendiohs che va che co ne?

⁸ Cuahtenan nchuhn nduhca che rahtenan ihyan che rento ino ye nunde yahn ye numacuahn chedave yahn ye.

⁹ Hua ndere ndonan man ne nchuhn che ndata yahn Abraham nchuhn, te ndete che nahn Dendiohs che ndere co yahn ndata yahn ihyan min ne, nde tu che tuhchan co din ye che ndaconda ihyan che co cuande ye nan ndata yahn ye.

¹⁰ Man ne, anduhneca ndete che a va yan cu tin cava che cata dihyoduto yahn. Nducuahn yahn che hua cochihve ndute yahn ne, cata, conun vacoyahn. Atihnocá co nduco nchuhn che hua cochihve che redin ne, te va che co ne castigo.

¹¹ U ne, rehdenune nchuhn cava che co ro che a nto ino ne nunde yahn ne. Ate a nun cochi tama ihyan che tahque yudo vederihquentiyon quenan cuma ye che co u, che nde hua rignonun chihve cava che co mozo yahn ye. Ihyan min ne, din ye che conun Vaco Ndah yahn Dendiohs ihyan man, din ye castigo ihyan nunde man.

¹² Nduhca che retive yato ihyan trigo, rih ndah ye, ne renedin dama ye dache yama yahn, rihquiyahn ye ne, tihca a nun techecade ihyan min yahn nducoyaca ihyan. Ihyan che ndah ihyan ye nan Dendiohs ne, quenda ye ihyan vahchetero, ne ihyan che duhtuno ihyan ye ne, dechuh ye ihyan van ruchiyahn che hua nda ro che ntoh.

Chedenune Dihvo vo Jesucristo

¹³ Tahn min ne, chica Dihvo vo Jesucristo estado yahn Galilea, nda ye ico Jordan nan quenan Juan cava che cuehdenune ye ihyan.

¹⁴ Ate rahn Juan ri ye ihyan:

—U che rendotenán ndih cava che cuehdenune ne u, ¿taca che u cuehdenune ndih?

¹⁵ Ndahconan Dihvo vo, ne rahn ye ri ye ihyan:

—Nahn che cuehdenune u, te redin yahn che dinahn vo nducuahn vederihquentiyon yahn Dendiohs.

Tuhme chehdenune Juan ihyan.

¹⁶ Chihno chedenune Dihvo vo ne, ndiquenda ye van nune. Ura min ndihchero ye Vaco Ndah yahn Dendiohs che chica vahchetero. Deca ro icui deca ro, ne chia, quenun ihyan.

¹⁷ Tuhme chenun ama ndudo che chica vahchetero che rahn tuhca:

—Sahnguh che Dayá. Yahnó sahn. Ama yenó che va se.

4

Chundah ne, tumarande se Dihvo vo Jesucristo

¹ Chihno min ne, din Vaco Ndah yahn Dendiohs che cuahn Dihvo vo ama cuan, yahn nan che metah duhva, cava che tumarande chundah ihyan.

² Min quenan ye chete che o raco ro, ne hua cheh ye. Chihno min ne, chi cuico ye.

³ Tuhme chahn nda chundah, ne rahn se ri se ihyan:

—Ndete che Daya Dendiohs ndih ne, codin ne che tu che tuhchan ne, ndaconda pan.

⁴ Ate ndahconan Dihvo vo, ne rahn ye ri ye sahn:

—A ndirun nan Ndudo yahn Dendiohs tuhca: “Ndiyu deman pan che rendotenan ihyan, te namin rendotenan ye ndudo yahn Dendiohs.”

⁵ Chihno min ne, quenda se ihyan nde tin yaco yahn yan Jerusalen.

⁶ Rahn se ri se ihyan:

—Ndete che Daya Dendiohs ndih ne, cava ne muhn, co ne nde ndiyahn, te a ndirun nan Ndudo yahn Dendiohs tuhca:

Caħcantiyon Dendiohs angel yahn ye che din ye cudado ndih, cava che hua dehva co yahn ne.

⁷ Ndahconan Dihvo vo, ne rahn ye ri ye sahn:

—Namin ndirun nan Ndudo yahn Dendiohs tuhca: “Hua tumerende Dihve Dendiohs.”

⁸ Chihno min ne, quenda chundah me ihyan ama tin ico yaco, ne nahma se ihyan nducuahñ vederihquentiyon che va iyehñse.

⁹ Rahn se ri se ihyan:

—Ndete che cahntihya ne nan, ndeva ne yavenan ne, té nducuahñ vederihquentiyon che tahchan ndih.

¹⁰ Ate ndahconan ye, ne rahn ye ri ye sahn:

—Cuavi nan, chundah, te a ndirun nan Ndudo yahn Dendiohs tuhca: “Cuende va yavenan Dihve Dendiohs. A ihyan min no codinehn yahn ye.”

¹¹ Tuhme chihcoman chundah me ihyan, ne nda angel chinduco ye ihyan.

Canan Dihvo vo Jesucristo ntiyon yahn ye

¹² Cuahn che checadino Dihvo vo che quenun Juan vacoyahn ne, conahn ye estado yahn Galilea.

¹³ Ate hua quenan ye yan Nazaret. Tahque ndah ye ne, cuahn ye quenan ye yan Capernaum, yahn yahn Zabulon man, Neftali man.

¹⁴ Tihca chi cava che conahn nduhca che dirun ihyan profeta Isaías tuhca:

¹⁵ Yahn yahn Zabulon man, Neftali man, chihto yune che rahn nan vine man, tama lado yahn ico Jordán man, estado yahn Galilea, yan vaco ihyan tama naciòn man,

¹⁶ min ne, anduhñeca ndete che man nan che vate ihyan.

Ate nda ro che anduhñeca ndete che condihco dave nan ye.

Ihyan che vate ye min ne, caħnda yahn ye anduhñeca ndete che a vate ye tah vederih.

Ate nda ro che anduhñeca ndete che co dave yahn ye.

¹⁷ A nde taħn min canan Dihvo vo rahndudo ye, ne rahn ye:

—Cuento ino nchuhn nunde yahn ne, te Dendiohs, ihyan min che va ye vahchetero, a nun cuahn caħcantiyon ye.

Dihvo vo Jesucristo ne, yahve ye cun ihyan che retah yahca cava che conduco ye ihyan

18 Ama yune ne, quechica Dihvo vo chihto vine yahn Galilea. Ndiherero ye o ihyan retah yahca, Simón Pedro man, dihno ye Andrés man. Ura min ne, rentihyon ihyan chahn yana chete vine me cava che cotah ye yahca.

19 Tuhme rahñ ye ri ye ihyan chahn:

—Cuhn vo conduco nchuhn u, ne ndotenan che din dama ne yahca ne, cacuahñ nchuhn cava che din dama ne ihyan, conduco ye u.

20 Ndetahño chihcomañ ihyan chahn yana yahn ye, ne cuahn ye nduco Dihvo vo.

21 Tah cuahn cana nan me ne, ndiherero ye o daya Zebedeo, Jacobo man, Juan man. Chenun ye chete barco nduco chida ye, rentahyon nan ye yana yahn ye. Namin yahve Dihvo vo ihyan,

22 ne ndetahño chihcomañ ye chida ye man, barco me man, cuahn ye nduco Dihvo vo.

Dihvo vo Jesucristo ne, chicuahn ye ama yahn ihyan

23 Chihno min ne, quechica Dihvo vo numacuahn yan yahn Galilea, ricuahn ye nduh cuañ yaco yahn ihyan nación yahn Israel. Rahndudo ye nduhca che rihquentiyon Dendiohs ihyan yahn ye, ne redin ye che rendoyahn ihyan cah.

24 Nde numachahte nación yahn Siria chetuhn ndudo yahn vederihno che redin ye, ne ama chengu ihyan ihyan cah yahn ye, ihyan che rih dihca ye man, ihyan che ndi cheche ye man, ne din Dihvo vo che ndoyahn ye. Namin ihyan che chenun vaco chihnga ihyan ne, ndetendah Dihvo vo vaco chihnga chahn.

25 Ama yahn ihyan chinduco ye ihyan, ihyan estado yahn Galilea man, ihyan estado yahn Judea man, ihyan yan Decápolis man, ihyan yan Jerusalén man, ihyan che vate ye tama lado lco Jordán man.

5

Dihvo vo Jesucristo ne, cahndudo ye ama tingüete

1 Cuahn che ndiherero Dihvo vo che ama yahn ihyan chenun ye min ne, cocha ye ama tingüete, chihnde ye. Tuhme ndo dama ihyan che ritahno ye ihyan nan ye,

2 ne chicuahn ye ihyan chahn tuhca:

3 —Ihyan che ri ndache ye yahn che chendihco ye nunde ne, ndah ro yahn ye, te cuahtenan ye vahchetero nan che rihquentiyon Dendiohs.

4 Ihyan che ran ye ne, ndah ro yahn ye, te necah Dendiohs vedechahtino ihyan.

5 Ihyan che necun ye ne, ndah ro yahn ye, te cuahtenan ye iyehñse nduhca che necah Dendiohs ndudo yahn ye.

6 Ihyan che ama nahn ye che runecade cuahtenan ye ne, ndah ro yahn ye, te conan Dendiohs ihyan cava che conahn nduco ye.

7 Ihyan che renan vahino ye ihyan chenahn ne, ndah ro yahn ye, te conan vahino Dendiohs ihyan.

8 Ihyan che hua chendihco ye nunde ne, ndah ro yahn ye, te ndeva Dendiohs ihyan.

9 Ihyan che riyahve ye ihyan cava che ndo yan ye nduco vih ne, ndah ro yahn ye, te nedin daya Dendiohs ihyan.

10 Ihyan che redin tan ihyan nduco ye yahn che runecade vatechica ye ne, ndah ro yahn ye, te rihquentiyon Dendiohs ihyan.

11 'Ndah ro yahn nchuhn cuahn che cahma tan ihyan nduco ne man, din tan ye nduco ne man, ndere cahma nunde ye yahn ne man, yahn che ritahno ne u.

12 Cuahn che tihca cuahno co ne ne, co yeno ne, te ndeva Dendiohs nchuhn, cuahtenan ne vahchetero. A devano ne te a tihca chahno chi ihyan profeta che chahte ye a rahn me, din tan ihyan nduco ye.

Ejemplo yahn ima

13 'Ima ne, ama richihve, ate ndete che necan, che metah chihn dihne ne, ametah cochihve. Va che cahtera ihyan, condinun condinahno ye. Chemin che nahn che din nchuhn cudado vederihquentiyon che chenana cuma ne.

Ejemplo yahn yahn

14 'Nduhca che richihve yahn che ri ro dave nan ihyan muhn iyehne ne, tihca richihve nchuhn cava nducoyaca ihyan, te a devano ne vederihquentiyon yahn Dendiohs. Yan ne, rihco ihyan ama tin ico, te nahn ye che ndah co ro.

15 'Namin cuahn che nahn yahn ihyan ama yahn ne, rihco ye nan che yaco cava che co ro dave nan ihyan che chenun ye chete vah. Hua rihco ndeh ye man ama cajon.

16 'Namin nchuhn ne, nahn che runecade cuahtechica ne cava che cua cuande nducoyaca ihyan, ne ndeva ye yavenan Chida ne che va ye vahchetero.

Dihvo vo Jesucristo ne, cah cuande ye yahn ley che dirun Moisés

17 'Cuadevano nchuhn che nda ndiyu cava che cuahcotahn yahn ley che dirun Moisés man, ndudo che dirun ihyan profeta man, te cava che cah cuandé ihyan deh conahn.

18 'Cuaco rahn ri nchuhn te numanahn che metah cuihno vahchetero man, iyehne man ne, hua condanan nde ama ndudo nan ley min. Nde nducuahn che hua nduh rignonun chihve che rahco ihyan ne, va che conahn.

19 'Chemin che adecoduhno ihyan che cahnevi ye ama nan vederihquentiyon yahn, andahre hua nduh rignonun chihve che rahco ye, ne tihca cacuahn ye ihyan chenahn ne, ihyan min ne, hua nduh rignonun chihve ye vahchetero nan che rihquentiyon Dendiohs. Ate ihyan che dinahn ye nducuahn, ne tihca cacuahn ye ihyan chenahn ne, ama rignonun chihve ye vahchetero nan che rihquentiyon Dendiohs.

20 'Rahn ri nchuhn te ndete che hua nde tahque runecade cuahtechica ne che co sahn fariseo man, sahn devano ley che dirun Moisés man ne, nde hua co cuahtenan ne vahchetero nan che rihquentiyon Dendiohs.

Dihvo vo Jesucristo ne, chicuahn ye che hua nahn che co tan ihyan

21 'Nchuhn ne, a devano ne te ihyan ndico yahn ne chicuahn ye tuhca: "Hua cahne ihyan, te adecoduhno ihyan che cahno ye vih ne, va che co ye castigo."

22 'Ate u ne, rahn ri nchuhn te adecoduhno ihyan che co tan ye nduco ihyan chenahn ne, va che co ye castigo. Adecoduhno ihyan che cahva ye nduco ihyan chenahn ne, va che ndo dama ihyan ndinan, din ye castigo ihyan. Adecoduhno ihyan che cahma ye co ye tama ca ihyan che nahn dave yahn ne, cahnda yahn ye, te nduco nunde min ne, codin che conun ye van ruchiyahn.

23 'Chemin che rahn ri nchuhn te andahre a nda ne nan ta nduco vedino che cah ne Dendiohs, ate ndete che ura min nta tin ne che va nunde yahn ne nan ihyan ne,

²⁴ cuihco ndah ne vedino me chihto nan ta, ne dinoca cahñ ne ndaca ne che nchahco nunde ihyan min, cuenedin ndah ne ndudo nduco ye. Tuhme co cah ne vedino yahn ne.

²⁵ Me ndete che va ihyan che nahn caça nunde ye yahn nchuhn ne, codin nun ino ne cuenedin ndah ne ndudo nduco ye numanahn che metah caça nunde ye yahn ne, te ndete che hua ne, cahco ye nchuhn tah intiyahn. Intiyahn ne, cahcantiyon ye policia che tihyon se nchuhn vacoyahn,

²⁶ ne cuaco rahn ri nchuhn te min cuahtenun ne nde cuihno nedihve ne nducuahn.

Dihvo vo Jesucristo ne, chicuahn ye che hua ndere cuahtenan ihyan nduco ndahta che hua nihnevaco nduco ye

²⁷ Nchuhn ne, a devano ne te ihyan ndico yahn ne chicuahn ye tuhca: "Hua ndere conen nduco ndahta che hua nihnevaco ndoque."

²⁸ Ate u ne, rahn ri nchuhn te adecoduhno ihyan che ndihchero ye ama ndahta, ne ndedecadino ye che nahn conan ye nduco te ne, nduco chemin a quendihco ye nunde nduco te nan Dendiohs, te anduhneca ndete che a quenan ye nduco te.

²⁹ Ndete che cava ama ndutinan nchuhn adeche denda ne, cuahtendihco ne nunde ne, hua tumacah ne yahn. Codin ne cuande anduhneca ndete che a tico ne chacondah ne, te tahque ndah che conda ama ndutinan ne yodemin ca che cuahtenun ne van ruchiyahn.

³⁰ Ndete che cava ama tah nchuhn adeche denda ne, cuahtendihco ne nunde ne, hua tumacah ne yahn. Codin ne cuande anduhneca ndete che a chihca ne chacondah ne, te tahque ndah che conda ama tah ne yodemin ca che cuahtenun ne van ruchiyahn.

Dihvo vo Jesucristo ne, chicuahn ye che hua ndahca che tehche ihyan ndahtayahn ye

³¹ Nchuhn ne, a devano ne te chicuahn ihyan ndico yahn ne tuhca: "Adecoduhno ihyan che nahn tehche ye ndahta yahn ye ne, va che dirun ye ama caça, cah ye tahñ nan che cahco ro ye che a ntehche ye tahñ."

³² Ate u ne, rahn ri nchuhn te co tehche ihyan ndahta yahn ye atenan ndete che conan te nduco tama chahn, te ndete che ndere tehche ye tahñ ne, cuahn che cuhnde te nduco tama se ne, a man ye quendihco ye nunde. Namin adecoduhno ihyan che cahnevaco ye nduco ama ndahta che ntehche inchahn te tahñ ne, condihco ye nunde.

Dihvo vo Jesucristo ne, chicuahn ye che hua ntihton yan ihyan Dendiohs cuahn che cah ye ndudo yahn ye

³³ Nchuhn ne, a devano ne te chicuahn ihyan ndico yahn ne tuhca: "Hua ndere cah ndudo yehn Dihve Dendiohs, te va che dinehn nducuahn ndudo yehn che cah."

³⁴ Ate u ne, rahn ri nchuhn te hua cah ne ndudo yahn ne, ntihton yan ne Dendiohs. Namin hua ntihton yan ne vahchetero, te min quenan ye rihquentiyon ye.

³⁵ Nde hua ntihton yan ne muhn iyehñse, te quenan ye numachahte. Nde hua ntihton yan ne Jerusalén, te yan yahn ye.

³⁶ Nde hua ntihton yan ne tin ne, te nde ama yudo tin ne ne, metah vederihquentiyon yahn ne che cahcantiyon ne che ndacorun color yahn.

³⁷ Cuahn che cah ne ndudo yahn ne ne, hua ntihton yan ne nde ama nan dehtenduh. Ama no ndudo cahna ne, a tihca, a o hua tihca, te che rentihdenan ca ne ndudo cava che cotahno ihyan ne, chundah rihquentiyon se chemin.

Dihvo vo Jesucristo ne, chicuahn ye che hua ndahconan ihyan yahn vih nduco vedetan

³⁸ Nchuhn ne, a devano ne te chicuahn ihyan ndico yahn ne tuhca: "Adecodohn nunde che din ihyan ne, a nunde menun yahn ye."

³⁹ Ate u ne, rahn ri nchuhn te hua dama co ne nduco ihyan che din tan ye nduco ne. Ndete che va ihyan che cuahn ye ama lado vaconan ne ne, ndotenan che dama co ne nduco ye ne, cuahnecon ne che cuahn ye tama lado.

⁴⁰ Ndete che va ihyan che caça nunde ye yahn ne, nahn cahnevi cahteca ne ne, cah ne nde cahteca tu yahn ne ihyan.

⁴¹ Ndete che tahn nun sandado nchuhn yune, cahcantiyon se che quende-hde ne chede yahn se nduhneva che rihquentiyan ley ne, nde chuhnan ca cuiquendehe ne yahn se.

⁴² Adecoduhno ihyan che caça ye dehtenduh yahn nchuhn, a nahn yahn ye, o nahn tumanan no ye ne, cah ne ihyan.

Dihvo vo Jesucristo ne, chicuahn ye che din yahino ihyan ihyan che tan ye nduco ye

⁴³ Nchuhn ne, a devano ne te chicuahn ihyan ndico yahn ne tuhca: "Codin yahine ihyan che yahino ye di, ne codin tan nduco ihyan che redin tan ye ndoque."

⁴⁴ Ate u ne, rahn ri nchuhn: Codin yahino ne ihyan che rendihche tan ye nchuhn man, cuica ne Dendiohs che din ye che ndah nduco ihyan che rahva ye yahn ye man, ihyan che rihya ye nchuhn man, ihyan che redin tan ye nduco ne man.

⁴⁵ Ndete che tihca din nchuhn ne, dama ri ne nduco Chida ne che va ye vahchetero, te ihyan min ne, redin ye che rendihco dave yahn yahn man, redin ye che ran co man, cava che ndah yahn ihyan che ndah ihyan ye man, ihyan che duhtuno ihyan ye man.

⁴⁶ Ndete che atenan ihyan che yahino ye nchuhn din yahino ne ne, zdehra cochihve yahn ne?, te nde sahn rica tume cade iyo tihca redin se.

⁴⁷ Namin ndete che atenan combiero yahn ne necah ne Dendiohs ihyan ne, zdehra cochihve yahn ne?, te nde ihyan che hua devano ye che va Dendiohs tihca redin ye.

⁴⁸ Nchuhn ne, nahn che runecade ne nduhca che runecade Chida ne che va ye vahchetero.

6

Dihvo vo Jesucristo ne, chicuahn ye nduhca che redin yahn che din ihyan vedevahino

¹ Cuihco nchuhn cudado che hua din ne dehtenduh che ndah atenan cava che ndihchero ihyan, te ndete che cava che ndeva ihyan yavenan ne che tihca din ne ne, nde hua cochihve yahn ne nan Chida ne che va ye vahchetero.

² Chemin che cuahn che din ne vedevahino ne, co din ne cuande che hua cadino nde ama ihyan. Hua dama co ne nduco sahn che o nan o chende se che redin se vedevahino nan nducoyaca ihyan, chete yaco man, cuahn yune man. Sahn chahn ne, tihca redin se cava che ndonan ihyan sahn, ate cuaco rahn ri nchuhn te nde hua cochihve yahn se nan Dendiohs che tihca redin se.

3-4 Ndaconan ráhn rí nchuhn te cuahn che din ne vedevahino ne, co din ne cuande che hua cadino nde ama ihyan, ça va che Chida ne che rendihche ye nducuahn che redin ne ne, ndahco menun ye yahn ne.

Dihvo vo Jesucristo ne, chicuahn ye ihyan nduhca che covah ye

5 Nchuhn ne, cuahn che covah ne ne, hua din ne nduhca che redin sahn che o nan o chende se che renan ino se rahtendi se revah se chete yaco man, cuahn yune man, nan che co ndihchero nducoyaca ihyan sahn. Cuaco ráhn rí nchuhn te nde hua cochihve yahn se nan Dendiohs che tihca redin se.

6 Cuahn che covah nchuhn ne, codin ne cuande che hua van yahn ihyan. Tahque ndah che deman ne covah ne chete vah nan che deman Chida ne cahnevan ye. Cuedevano ne te rendihchero ye nchuhn, ne ndahco menun ye yahn ne.

7 Cuahn che covah nchuhn ne, hua din ne nduhca che redin ihyan che hua devano ye che va Dendiohs. Ama ndeh revah ye nan dehtenduh che redin ye dendiohs yahn ye, te rahco ye te nduco che ama ndeh revah ye ne, cahnevan dendiohs yahn ye.

8 Hua dama co ne nduco ye nan che revah ne, te Chida ne ne, nde ura che ametah ça ca ne ihyan ne, a devano ye nducuahn dehtenduh che rendotenan ne.

9 Chemin che covah nchuhn tuhca:

Chida nuhn che va ne vahchetero,

Rica nuhn ndih che din ne che ndeva nducoyaca ihyan yavenan ne, co devano ye che metah nde ama nunde nan ne.

10 Rica nuhn ndih che cuanan cahcantiyon ne nuhn.

Nahn nuhn che dinahn ihyan iyehanse vederihquentiyon yahn ne nduhca che redinahn angel che vate ye vahchetero.

11 Cuete ne che cheh nuhn man ro cuh.

12 Cuenchahco ne nunde yahn nuhn nduhca che renchahco man nuhn yahn ihyan che redin tan ye nduco nuhn.

13 Cuendevahn ne nuhn tah chundah, hua cuahnevan ne che tumarande se nuhn.

Tihca, te a ndih che rihquentiyon ne cuahn dama. Ama yudo vederihquentiyon quenana cuma ne. Tihca co.

14 Cuedevano nchuhn te ndete che nchahco ne yahn ihyan che redin tan ye nduco ne ne, namin Chida ne che va ye vahchetero nchahco ye nunde yahn ne.

15 Ate ndete hua nchahco ne yahn ihyan ne, namin Chida ne che va ye vahchetero ne, hua nchahco ye yahn ne.

Dihvo vo Jesucristo ne, chicuahn ye ihyan nduhca che cuahte ye yahte

16 Nchuhn ne, cuahn che cuahte ne yahte ne, hua din ne nduhca che redin sahn che o nan o chende se. Sahn chahn ne, ndih ran vaconan se ça va che cadino ihyan che vate se yahte. Cuaco ráhn rí nchuhn te nde hua cochihve yahn se nan Dendiohs che tihca redin se.

17 Cuahn che cuahte nchuhn yahte ne, cuahco nan ne man, cuih ne ça ca tin ne man,

18 ça va che nde hua cadino ihyan che vate ne yahte. Chida ne a devano ye, te rendihchero ye nchuhn, ne ndahco menun ye yahn ne.

Ejemplo yahn vedecuihca

19 Hua cuahcoran nchuhn ça va vedecuihca che a chemin no din dama ne. Hua regu, te rine iteduhn man, reh dache man, renda sahn duco, riquenda se man.

²⁰ Tahque ndah ne, codin nun ino ne cava che cuahtenan ne vahchetero, te chemin ne, anduhneca ama vedecuihca che hua redetoh iteduhn man, hua reh dache man, hua riquenda sahn duco man.

²¹ Nahn che tihca din nchuhn. A devano ne te nan che va vedecuihca ne, a huan chemin no che rendedecadino ihyan.

Ejemplo yahn ndutinan ihyan

²²⁻²³ 'Nduhtinan nchuhn ne, nduhca ama yahn che richihve yahn ne che ri ro nan ne. Ndete che ndah ndutinan ne ne, ndah ro nan ne. Ate ndete che hua ne, anduhneca ndete che man nan che vate ne. Atihnoqa vederendecadino yahn ne, te ndete che cochihve ne, conahn ndah ne vederihquentiyon yahn Dendiohs. Ate ndete che cuahcotahn ne vederihquentiyon yahn ye ne, hua cochihve vederendecadino yahn ne, ne anduhneca ndete che ama man nan che vate ne.

Dihvo vo Jesucristo ne, chicuahn ye che a Dendiohs va che din yahino ihyan ndiyu vedecuihca

²⁴ 'Nde ama ihyan ne, hua co cuahtenan cuma ye o dihve ye damandahn, te din yahino ye ama, ne cahcoman ye tama, o dinahn ye yahn ama, ne cuahcotahn ye yahn tama. Atihnoqa nchuhn, te hua co din yahino ne Dendiohs ndete che yahino ne vedecuihca.

Dendiohs ne, redin ye cudado ihyan yahn ye

²⁵ 'Rahn ri nchuhn: Hua cuahcoran ne deh cheh ne man, deh cuh ne man, ti ndaca ne tino che cuahtenun ne man. A Dendiohs che deco ye nchuhn iyehanse, ne te ye che cheh ne man, tino che cuahtenun ne man.

²⁶ Cua cuande nchuhn. Yahda ne, andahre hua rendotenan che din te nduhca che redin ihyan che rino ye ndata man, rentumanan ye ndute ndata man, rih ndah ye man, ate Chida ne che va ye vahchetero ne, redin ye che rendaca te che reh te. Cudevano ne te tahque redin ye cudado nchuhn che co ite chahn.

²⁷ 'Nde ama nchuhn, andahre ama ndedecadino ne, ate hua co din man ne che cuihta ne man metro.

²⁸ 'Nde hua redin yahn che ndedecadino nchuhn ti ngua ne tino che cuahtenun ne. Cua cuande ne. Nanda ne, hua rendotenan che din nduhca che redin ihyan che redin ye ntiyon man, riya ye tino man,

²⁹ ne rahn ri nchuhn te nde rey Salomon andahre ama chahte vederihquentiyon quenan cuma ye, ate tahque ndah chan ro nanda che co tino che quenun ye.

³⁰ Nchuhn che ndeh rendedecadino ne cava ne, nducote redin Dendiohs che ama ndah chan ro nanda andahre ama o ro ra regu, cudevano ne te tahque redin ye cudado nchuhn.

³¹ Chemin che hua nahn che ama ndedecadino ne deh cheh ne man, deh cuh ne man, ti ngua ne tino yahn ne man.

³² Ihyan che nde hua devano che va Dendiohs ne, ama rendedecadino ye yahn dehtenduh chemin chan. Ate nchuhn ne, va Chida ne vahchetero che redin ye cudado nchuhn, ne a devano ye yahn dehtenduh che rendotenan ne.

³³ Menan vihca cuahnecon ne che cahcantiyon ye nchuhn man, runecade cuahtehca ne nduhca che nahn ye man, ne te ye nducuahn dehtenduh chemin chan che rendotenan ne.

³⁴ Chemin che hua ndedecadino nchuhn taqa cuahno co ne caviyan deman, te queri ama ro ne, va vederahn yahn ne, ne hua redin yahn che cuahcoran ne taqa cuahno co ne.

7

Dihvo vo Jesucristo ne, chicuahn ye che hua ndahchenan ihyan vih

¹ Hua ndahchenan nchuhn ihyan çāva che hua din Dendiohs castigo nchuhn.

² Nduhça che ndahchenan ne ihyan ne, tihçā cua cuande Dendiohs nchuhn, din ye castigo nchuhn.

³ Ndete che ndahchenan ne ama ihyan yahn dehtenduh che hua ndahça redin ye, ate nde hua retumacadino ne che va dehtenduh che tahque chihnga redin man ne ne, anduhnecā ndete che ama vihto quenun ndutinan ne nde hua retumacadino ne yahn, ate rendahchenan ne ihyan che quenun ama yaça ndutinan ye.

⁴ Ndete che yahve ne ama ihyan che hua ndahça redin ye cuahn che nde tahque chihnga redin man ne ne, anduhnecā ndete che cahma ne co ne ihyan che tendah ne yaça che quenun ndutinan ye cuahn che quenun ama vihto ndutinan man ne.

⁵ Ndete che tihçā din nchuhn ne, o nan o chende ne. Nahn che dinoca cahcoman ne dehtenduh che tahque chihnga redin ne, tuhme conan yahn ne che yahve ne ihyan che cahcoman ye dehtenduh che hua ndahça redin ye.

Ejemplo yahn yahna man, cuche man

⁶ Nde hua redin yahn che ndere yahve nchuhn ihyan che cheche chedave yahn ye çāva che nevahnecon ye ndudo ndah yahn Dendiohs, te denan co tan ye nduco ne man, duche rino ye ndudo me man. Ndete che ndere yahve ne ihyan chemin chan ne, anduhnecā ndete che cah ne dehtenduh che ndah yahna, ne denan co tan te, cua te nchuhn man, anduhnecā ndete che cahnetave ne tu diyahn nan cuche, ne condinun condinahn te man.

Ejemplo nduhça che covah ihyan, çaça ye Dendiohs dehtenduh che nahn ye

⁷⁻⁸ 'Cuica nchuhn dehtenduh che nahn ne Dendiohs, ne te ye nchuhn. Tihçā, te anduhnecā che redin man ne. Cuahn che rica ne dehtenduh combiero yahn ne ne, rete ye. Cuahn che renuhn ne dehtenduh ne, rendaça ne. Cuahn che riyahve ne chende vaco ihyan ne, renahne ye.

⁹ Nde ama nchuhn ne, hua rahcotahn ne yahn daya ne cuahn che rica che cheh. Ndete che rica pan ne, hua rihquino ne recah ne tu.

¹⁰ Ndete che rica yute yahca ne, hua recah ne ama cu.

¹¹ Nchuhn ne, andahre duhtuno ihyan ne ne, recah ne dehtenduh che ndah daya ne. Rahn ri nchuhn te Chida ne che va ye vahchetero ne, nde tahque nun te ye dehtenduh che ndah cuahn che çaça ne ihyan.

¹² 'Codin nchuhn che ndah nduco ihyan nduhça che nahn ne che din ye nduco ne, te tihçā rihquentiyon nan ley che dirun Moisés man, libro che dirun ihyan profeta man.

Ejemplo yahn chendevah che tuhco

¹³⁻¹⁴ 'Andahre ama vahche cuahn nchuhn, ate codin ne fuerza cahcoman ne vedeyeno yahn man ne, codinahn ne vederihquentiyon yahn Dendiohs, çaça che co tuno ne vahchetero. Rahn ri nchuhn te neve ra ihyan che tuno ye min, ne anduhnecā ndete che ama tuhco chendevah nan che conda ye man, ama vahche yune nan che chuh ye man. Me ihyan che riquendi ye vedeyeno yahn man ye ne, ama yahn ye. Ihyan chahn ne, anduhnecā ndete che ama chahte chendevah nan che renda ye man, ama ndahça yune nan che rechuh ye man, ate cuahn che cuhnde cade yahn ye ne, co ye castigo, cuahtenun ye van ruchiyahn.

Dihvo vo Jesucristo ne, chicuahn ye t̄achan ihyan s̄ahn che redin c̄a che Dendiohs dechuh ye s̄ahn

¹⁵ R̄ahn rí nchuhn che cahco ne cud̄ado yahn s̄ahn che redin c̄a se che Dendiohs dechuh ye s̄ahn. S̄ahn chahn ne, redin c̄a se che ama necun se, ate ama duhtuno ihyan se.

¹⁶ Nchuhn ne, cahco ne cud̄ado nducuahn che redin se, ne tumacadino ne duh ihyan se. A devano nchuhn te ndiyu nan yahn yan che ri uva, nde huane nan chano yan che ri higo.

¹⁷⁻¹⁸ Yahn ndata che ndah ne, ndah ndute yahn, ne yahn che hua ndah ne, hua ndah ndute yahn.

¹⁹⁻²⁰ Atihnoca s̄ahn chahn, te nan ntiyon yahn se ne, tumacadino nchuhn ndete che numa cuaco vatechica se o rihnc̄eh se. Nducuahn yahn che hua ndah ndute yahn ne, rihca ihyan, rihquiyahn ye. Atihnoca s̄ahn chahn, te va che co se castigo, cuahtenun se van ruchiyahn.

Rahn Dihvo vo Jesucristo te hua nducoyaca ihyan co cuahtenan ye vahchetero

²¹ Hua nducoyaca ihyan che rahn ye yahn che Dihve ye u, cuahtenan ye vahchetero, te atenan ihyan che dinahn ye vederihquentiyon yahn Chidá, ihyan min che va ye vahchetero.

²² Cuahn che c̄uhnde cade yahn nducoyaca ihyan ne, ama yahn ihyan cahma ye yahn: “Dihve nuhn, nuhn ne, din nuhn ntiyon yahn ne, ntiyon yan nuhn ndih, ne nduco chemin ndetend̄ah nuhn vaco chihnga man, din nuhn ama ndeh nan vederihno man.”

²³ Ate cahma c̄o s̄ahn chahn: “Ndiyu ihyan yahn nchuhn. Cuahn ne ama l̄ado. Nchuhn ne, duhtuno ihyan ne.”

Ejemplo yahn name yahn vah

²⁴ Adecoduhno ihyan che rihcovan ye ndudo che tuhchan che ricuahn, ne dinahn ye ne, ihyan min ne, nduhca ama ihyan che vivo ye che chihno ye vaco ye, chihco ye name yahn nan yava.

²⁵ Chihno min ne, ama chi yudo, chan co nahn man, chihta ico man, chano yune man. Chuh nune nan nti vah me, ate hua dehva chi yahn, te chiche nti nan yava.

²⁶ Me adecoduhno ihyan che rihnevan ye ndudo che tuhchan che ricuahn, ne hua dinahn ye ne, ihyan min ne, nduhca ama ihyan tundo che chihno ye vaco ye man yahndute.

²⁷ Chihno min ne, ama chi yudo, chan co nahn man, chano yune man, chihta ico man. Chuh nune nan nti vah me, ne quenda.

²⁸ Cuahn che chihno chicuahn Dihvo vo ne, ama chahn ino ihyan,

²⁹ te numacuahn vederihquentiyon yahn Dendiohs chicuahn ye, ndlyu nduhca che ricuahn s̄ahn devano ley che dlr̄un Moisés.

8

Dihvo vo Jesucristo ne, din ye che ndoyahn ama s̄ahn che ndi se cah che rech̄a yute

¹ Cuahn che ndaconan Dihvo vo che chahn ye tingüete me ne, ama yahn ihyan nduco ye.

² Ura min nda ama s̄ahn che ndi se cah che rech̄a yute, chehntihya se nan ye, ne rahn se ri se ihyan:

—Dihvé, ndete che nahn ne ne, co din ne che ndoyahn.

³ Tuhme nahn tah ye s̄ahn, ne rahn ye:

—Taca hua. Nahn. Man ne, a ndoyehn.

Ndetahno che rahn ye tihca ne, ndoyahn se.

⁴ Tuhme rahn ye ri ye sahn:

—Culhque cudado. Hua cahme nduco nde ama ihyan taca chi che ndoyehn. Tahque ndah ne, cuehn nan chidocuyan, ndihchero ye di, ne cah vedino nduhca che chihquentiyon Moisés cava che co devano nducoyaca ihyan che a ndoyehn.

Dihvo vo Jesucristo ne, din ye che ndoyahn sahn decachya yahn ama capitán

⁵ Cuahn che chenda Dihvo vo yan Capernaum ne, ama capitán yahn Roma, chica se favor ihyan,

⁶ ne rahn se:

—Dihvé, sahn decachya yahn ne, ndi cheche se, ametah cocha se.

⁷ Rahn Dihvo vo ri ye sahn:

—Cuhn vo ndoque, din che ndoyahn se.

⁸ Ate rahn sahn capitán me ri se ihyan:

—Dihvé, hua denduh ne ndih cava no u, te u ne, ndiyu ihyan che redin yahn che cahn ne ndevaco. Nduco ama ndudo che cahma ne ne, ndoyahn sahn decachya yahn.

⁹ Tihca, te namin u ne, va ihyan che nte ye vederihquentiyon quenan cumá, ne vate sandado yahn. Cuahn che rihquentiyón ama se che cahn se ne, rahn se. Cuahn che rihquentiyón tama che chi se ne, rechi se. Adecodeno che rihquentiyón sahn decachya yahn ne, redinahn se.

¹⁰ Ama cuahn ino Dihvo vo che tihca rahn se, ne rahn ye nduco ihyan che nduco ye:

—Cuaco rahn rí nchuhn te nde van ihyan nación yahn Israel ne, hua ndaca nde ama ihyan che ama ritahno ye nduhca sahguh.

¹¹ Rahn rí nchuhn te ama yahn ihyan numachahte iyehense conduco ye Abraham man, Isaac man, Jacob man, cuahtenan ye nduco vih vahchetero nan che rihquentiyon Dendiohs.

¹² Ate ihyan che tahque redin yahn che cuahtenan ye vahchetero nan che rihquentiyon Dendiohs ne, ndotenan che cuahtenan ye min ne, dechuh Dendiohs ihyan cuahn chevah nan che man, ne min cuahtenun ye, cuaco ye man, cheh dihyon ye man.

¹³ Tuhme rahn ye ri ye capitán me:

—Conahn ndevaque, ne nduhca che chitehne ne, tihca conahn ndoque.

Me sahn decachya me ne, a ura min no ndoyahn se.

Dihvo vo Jesucristo ne, din ye che ndoyahn indahn Pedro

¹⁴ Ama yune ne, chahn Dihvo vo Jesucristo ndevaco Pedro, ne indahn Pedro ne, quendite ye, ndi ye cah ihno.

¹⁵ Nahn tah ye tah ihyan min, ne ndoyahn ye, chavi cah ihno me. Tuhme necuan ye, ne cah ye, cheh ihyan chahn.

Dihvo vo Jesucristo ne, din ye che ndoyahn ama yahn ihyan cah

¹⁶ Ro min, cuahn che chi dah ne, ama yahn ihyan nda ye nan Dihvo vo, nda ye ihyan cah man, ihyan che chenun vaco chihnga ihyan man. Dihvo vo ne, nduco ama ndudo no ndetendah ye vaco chihnga chahn. Namin din ye che ndoyahn ihyan cah chahn.

¹⁷ Tihca chi cava che conahn nduhca che dirun ihyan profeta Isaías tuhca: “Man ye cahnevi ye cah yahn ihyan.”

Sahn che nahn conduco se Dihvo vo Jesucristo

18 Cuahn che ndihchero Dihvo vo che ama yahn ihyan nduco ye ne, chihquentiyon ye ihyan apóstol yahn ye che cuahtenun ye chete ama barco, chuh ye nduco vih tama lado viche yahn vine yahn Galilea.

19 Ura min ama sahn devano ley che dirun Moisés chahn nda se nan Dihvo vo, ne rahn se ri se ihyan:

—Ihyan Ricuahn, nahn conducó ndih adecotino che cahn ne.

20 Ndahconan ye, ne rahn ye ri ye sahn:

—Yuhne ne, va ive vaco te, ne yahda ne, va nan che rahte te, ate u che rinducó nducoyaca ihyan ne, metah nde nan che condité.

21 Tuhme tama sahn che rinduco se ihyan ne, rahn se ri se ihyan:

—Dihvé, cuahnecon ne che conán nan chidá nde nda ro che coh ye. Cuhché ihyan, tuhme conducó ndih.

22 Ate ndahconan Dihvo vo yahn se:

—Di ne, nahn che condoque u. Hua ndedecadine cava chemin. Ihyan che anduhneca ndete che a ndih ye nan Dendiohs ne, ihyan chahn co cuhche ye tenahn yahn ye.

Dihvo vo Jesucristo ne, chihco dihn ye yuhne tan

23 Chihno min ne, chenda Dihvo vo chete barco me nduco ihyan apóstol yahn ye, cuahn ye nduco vih.

24 Ura min canan rano yuhne tan, ama rendedecuan nune nan vine me nde a renda chete barco me. Me Dihvo vo ne, quiyado ye.

25 Tuhme ndedetuhche ihyan apóstol chahn ihyan, ne rahn ye:

—Dihve nuhn, ¡cuendevahn ne nuhn!, te cuehchenun nuhn van nune.

26 Ndahconan Dihvo vo:

—¿Dehco che ama vah nchuhn? ¿Taca che hua numa ino ne ritahno ne?

Tuhme necuan ye, chihco dihn ye yuhne me man, vine me man, ne nuhnde dihn.

27 Nduco neve se van ihyan chahn, ne rahn se:

—¿Duhra ihyan cuh che nde yuhne man, nde vine man, redinahn che rihquentiyon ye?

O sahn yan Gadara che chenun vaco chihnga sahn

28 Cuahn che nda Dihvo vo tama lado viche yahn vine me, yahn yahn yan Gadara ne, nda o sahn che chenun vaco chihnga sahn, che chica se van yayan nan che chenun tenahn. Ama redin tan se che nde ama ihyan hua rihquino ye chuh ye yune nino nan che chenun se.

29 Ama yudo nan se rahn se:

—Jesús, Daya Dendiohs, ¿dehco che renun mendaahn ne yune yahn nuhn? ¿Taca che cochi ne din ne che chuhrihn nuhn?, te ametah nda ro yahn.

30 Nino min ne, redin ihyan cudado ama yahn cuhe.

31 Vaco chihnga chahn ne, chica favor Dihvo vo, ne rahn ri ihyan:

—Ndete che ndetenda ne nuhn ne, cuahnecon ne che condá nuhn cuhe sih.

32 Rahn Dihvo vo ri ye vaco chihnga chahn:

—Cuahn nchuhn.

Tuhme ndiquenda vaco chihnga chahn sahn, ne chenda cuhe chahn. Nducoyaca cuhe chahn ne, cochahn te rano te nan ndava, cheranun te chete vine me, chihno chih te.

33 Sahn che redin cudado cuhe chahn ne, ama dihya se chi, ne conahn se rano se cuahn viyan me. Nda se min ne, neco se ihyan nduhca che chihno chih cuhe chahn man, deh chi yahn sahn che chenun vaco chihnga chahn man.

34 Tuhme chahn nducoyaca ihyan yan nan che quenun Dihvo vo, ne chica ye favor ihyan che ndaca ye min, nahn ye.

9

Dihvo vo Jesucristo ne, din ye che ndoyahn ama sahn che ndi cheche se

1 Chihno me min ne, chenda Dihvo vo chete barco, tuche ye vine me, nta ye yan vaco ye.

2 Min nda ihyan nan ye, nda ye ama sahn che ndi cheche se quendite se nan yundo. Cuahn che ndihche Dihvo vo nduhca che ritahno ihyan chahn ne, rahn ye ri ye sahn che ndi cheche me:

—Daya, hua dehve rahque, a ndaque vederenchahco cava nunde yehn.

3 Min chenun van ama o sahn devano ley che dirun Moisés, ne rendecadino se: “Sahn tih ne, ducherino se Dendiohs che tihca rahn se.”

4 Ndetahn checadino Dihvo vo che tihca rendecadino sahn chahn, ne rahn ye ri ye sahn:

—¿Dehco che chihnga rendecadino nchuhn?

5 Ndete che cahma có sahnghu: “A nchahco nunde yehn” ne, nde hua co devano ne ndete che va vederihquentiyon yahn, o hua. Ate ndete che cahma có sahn: “Cuenecuen, ne cuique” ne, co devano ne.

6 Chemin che cava che cadino ne che u che rinduco nducoyaca ihyan ne, quenun cumá vederihquentiyon che nchahco nunde yahn ihyan ne, condihche ne.

Tuhme rahn ye nduco sahn che ndi cheche me:

—Cuenecuen, cotah yundo yehn, conahn ndevaue.

7 Ndetahn necuan sahn min, ne conahn se ndevaco se.

8 Nducoyaca ihyan che chenun ye min ne, dihya ye chi, ne ndeva ye yavenan Dendiohs yahn che necah ye vederihquentiyon min Dihvo vo cava che ndah yahn ihyan iyehne.

Dihvo vo Jesucristo ne, yahve ye Mateo che conduco ye ihyan

9 Cuahn che chica Dihvo vo min, cuahn ye ne, ndihchero ye ama ihyan che duche ye Mateo. Ihyan min ne, quenun ye ntiyon che rica ye tume cade iyo, ne rahn ye ri ye ihyan:

—Cuhn vo, condoque u.

Tuhme necuan Mateo, cuahn ye chinduco ye ihyan.

10 Ama yune ne, reh Dihvo vo nduco ihyan apostol yahn ye. Namin nduco ama yahn sahn rica tume cade iyo man, yahn ca sahn nunde man, vate se reh se nduco ye.

11 Ndhichero ama o sahn fariseo, ne rahn se ri se ihyan apostol chahn:

—¿Dehco che tihca redin Ihyan Ricuahn yahn nchuhn che reh ye dama nduco sahn rica tume cade iyo man, sahn nunde chenhah man?

12-13 Chihnevan Dihvo vo che tihca rahn se, ne rahn ye ri ye sahn:

—Ihyan cah che rendotenan ye sahn doctor, ndiyu ihyan che hua cah ye. Atihnoqa u, te nda cava che conan ihyan nunde, nto ino ye nunde yahn ye, ndiyu cava ihyan metah nunde yahn ye che rahco ye. Che va che din nchuhn ne, cuahn ne dinahn ne vederihquentiyon yahn Dendiohs che tuhca: “Tahque nahn che cuahtenan cuma nchuhn vedevahino che co che chahno ne ite, co te vedino nan.”

Tumerune ihyan Dihvo vo Jesucristo yahn yahte

14 Ura min ne, nda ama o ihyan che rinduco ye Juan Bautista, ne rahn ye ri ye Dihvo vo:

—Nuhn nduco sahn fariseo cuahn dama rahte nuhn yahte. ¿Dehco che ihyan che rinduco ye ndih hua rahte ye yahte ne?

¹⁵ Ndahconan Dihvo vo yahn ye:

—Ihyan che rinduco ye sahn rihnevaco ne, hua rahteran ye. Ate ndete che quenda ihyan sahn ne, cuahteran ye. Atihnoça ihyan che rinduco ye u, te man ro cuh ne, metah deh cuande che cuahte ye yahte. Ate cuahn che nda ro che quenda sahn nunde u ne, tuhme che cuaco, cuahte ye yahte.

Ejemplo yahn tino ndico nduco ima ndico

¹⁶ Hua redin yahn che ndahchetahn vo costumbre ndico nduco vederihquentiyon ra. Nde ama ihyan hua renecahn nan ye ama ndi tino ra nan tino ndico, te ndete che tihça din ye ne, ndeva doh tino ra me, ne nde tahque co chahte nan nte yahn tino ndico me.

¹⁷ Namin nde ama ihyan hua rih ye vino ra chete ima ndico, te ndete che tihça din ye ne, condan ima ndico me, cora vino me, ne conda nduh che o. Chemin che va che cuh ihyan vino ra chete ima ra cava che hua dehva co yahn.

Tahn daya Jairo man, tahn ndahta che nahn tah te tino yahn Dihvo vo Jesucristo man

¹⁸ Numanahn che rente ca Dihvo vo nduco ihyan chahn ne, nda ama sahn ndinan. Chehntihya se nan ye, ne rahn se ri se ihyan:

—Tahn dayá ne, a chih te cade menan lihn. Cuhn vo nduco ne, nahn tah ne tahn, ne ndaconan conan te.

¹⁹ Tuhme necuan ndi Dihvo vo, ne cuahn ye nduco se nduco ihyan apóstol yahn ye.

²⁰ Ura min nda ama tahn ndahta che a ri ndichio nduyo che cah te, rendora te yun ro ro. Chahn nda te cuahn vedame Dihvo vo, ne nahn tah te tino yahn ye.

²¹ Tihça din te, te ndedecadino te: “Mare tino yahn ye nahn tãh, ne ndoyahn.”

²² Ndaconan ye ndihchero ye tahn, ne rahn ye:

—Dayá, hua dehve rahque. Nducote chitehne ne, a ndoyehn.

A ura min no ndoyahn te.

²³ Cuahn che nda Dihvo vo vaco sahn ndinan me ne, ndihchero ye che a chenan sahn retive ndo ran man, ama ndito ihyan rah ran ye man.

²⁴ Rahn ye ri ye ihyan chahn:

—Conahn nchuhn, te tahn dihn ne, hua dehve ndih te, quiyado te.

Ate chihyon nan ihyan chahn ihyan.

²⁵ Chihquentiyon ye che ndiquendah vah ihyan chahn, tuhme chenda ye nan che quendite tahn dihn me. Chetah ye tah te, ne necuan te.

²⁶ Nducoyaca ihyan che vate ye numachahte yahn min ne, checadino ye yahn vederihno min.

Dihvo vo Jesucristo ne, din ye che chi ro nan o sahn nan ve

²⁷ Cuahn che conahn Dihvo vo ne, cuahn o sahn nan ve cuahn vedame ye rah se:

—Daya David, jconan vahino ne nuhn!

²⁸ Cuahn che ntã ye, ndonda ye chete vah ne, chenda vah sahn nan ve chahn, chahn nda se nan ye, ne tumerune ye sahn:

—¿A ritahno nchuhn che co din che co ro nan ne ne?

Ndahconan se yahn ye:

—Dihve nuhn, ritahno nuhn che co din ne che co ro nan nuhn.

²⁹ Tuhme nahn tah ye ndutinã se, ne rahn ye ri ye sahn:

—Conahn nduco nchuhn nduhca che ritahno ne.

³⁰ A ndetahno chi ro nan sahn chahn. Tuhme ama cah ye cudado sahn, ne rahn ye ri ye sahn:

—Condi nchuhn cahma ne nduco nde ama ihyan taca chi che chi ro nan ne.

³¹ Ate cade ndaca se min, canan nte se nduco ihyan, ne chetuhn ndudo yahn vederihno min van ihyan che vate ye numachahte yahn min.

Dihvo vo Jesucristo ne, din ye che ndiquendah cahñ ama sahn lihme

³² Cade ndiquendah sahn chahn vah ne, nda ama o ihyan, nda ye ama sahn lihme che quenun ama vaco chihnga sahn.

³³ Ndetendah Dihvo vo vaco chihnga me, ne ndetahno ndiquendah cahñ se, canan rente se. Ama cuahn ino ihyan, ne rahn ye:

—Nde meahn ametah conahn vederihno che tuhchan muhn nación yahn Israel.

³⁴ Ate sahn fariseo ne, rahn se:

—Ihyan tih ne, quenan cuma ye vederihquentiyon yahn chundah, ne nduco chemin rendetendah ye vaco chihnga.

Dihvo vo Jesucristo ne, renan vahino ye ihyan

³⁵ Chihno min ne, quechica Dihvo vo nduh cuan yan rahte man, yan cahya man, ricuahn ye chete yaco yahn ihyan nación yahn Israel. Rahndudo ye ndudo yahn vederihquentiyon yahn Dendiohs, ne redin ye che rendoyahn nducoyaca ihyan cah.

³⁶ Nduh cuan nan che quechica ye ne, ama yahn ihyan. Ama quenan vahino ye ihyan, te ametah duh che cacuahn vederihquentiyon yahn Dendiohs ihyan. Nduhca itecuche che metah ihyan che din ye cudado ite, tihchan ihyan chahn.

³⁷ Tuhme rahn Dihvo vo ri ye ihyan apóstol yahn ye:

—Cuaco rahn ri nchuhn te ama yahn ihyan che nahn cahnevan ye ndudo yahn Dendiohs, ate ihyan che rahndudo ye ne, ama doh ri ye. Anduhneca ndete che ama va ndufe ndata ate ihyan che redin ye ntiyon ne, ama doh ri ye.

³⁸ Chemin che cuica nchuhn Dendiohs cava che dechuh ye ihyan che cuahndudo ye ndudo yahn ye, cahnevan ihyan chahn.

10

Cah Dihvo vo Jesucristo ntiyon che din ihyan apóstol yahn ye

¹ Chihno min ne, nedin dama Dihvo vo nduh che ndichio ihyan apóstol yahn ye, ne cah ye vederihquentiyon ihyan cava che ndetendah ye vaco chihnga man, din ye che ndoyahn ihyan cah, adecodehno cah che ndi ye man.

² Van ihyan chahn ne, nduco ama ihyan che duche ye Simón Pedro, ihyan min che tahque menan vihca van nducoyaca ye. Namin nduco Andrés, dihno Simón man, Jacobo nduco dihno ye, Juan, che daya Zebedeo man,

³ Felipe man, Bartolomé man, Tomás man, Mateo, ihyan min che rica ye tume cade iyo ro menan man, Jacobo, daya Alfeo man, Lebeo, che namin duche ye Tadeo man,

⁴ tama Simón, ihyan min che chinduco ye partido yahn sahn cananista ro menan man, Judas Iscariote, ihyan min che necah ye Dihvo vo adive man.

Dechuh Dihvo vo Jesucristo ihyan apóstol yahn ye che cuahndudo ye

⁵ Dechuh Dihvo vo ihyan che ndichio chahn, chihquentiyon ye ihyan tuhca:

—Hua cuahndudo nchuhn van ihyan tãma naci3n, nde huane van ihyan naci3n yahn Samaria.

⁶ Tahque ndah ne, cuahndudo ne van ihyan naci3n yahn Israel, ihyan chahn che a ndihcomãn ye Dendiohs. Ihyan chahn ne, anduhneca itecuche che a chinda te.

⁷ Cuahndudo nchuhn te Dendiohs, ihyan min che va ye vahchetero ne, a nun cahcantiyon ye ihyan.

⁸ Codin nchuhn che ndoyahn ihyan che ndi ye cah che rechã yute man, ihyan che ndi ye adecodehno cah man, condedetuhche ne ihyan che a ndih ye man, cuendetendah ne vaco chihnga man. Nchuhn ne, dendaca ne vederihquentiyon cuh, ne hua cua ne chihve yahn ihyan che conan ne.

⁹ Hua quenda nchuhn tume,

¹⁰ nde hua quenda ne dino man, ndãco man, indãhco man, atenan tino che chenun no ne. Tihca, te ihyan redin ntiyon ne, redin yahn che nan ntiyon che redin ye quendãh nducuahn che rendotenan ye.

¹¹ Cuahn che ndã nchuhn ama yan ne, cuenuhn ne ama ihyan che ndah ihyan ye, ne cuahntenan ne ndevaco ye nde ro che ndaca ne yan min.

¹² Cuahn che condã nchuhn ne, cahma ne co ne ihyan che vaco min: “Dendiohs din yahino ye nchuhn.”

¹³ Ndete che rihnevahn che conahn nduco ihyan nduhca che cahma ne, conahn, ate ndete che hua ne, hua.

¹⁴ Me ndete che ihyan che vaco min, o ihyan yan min, hua nevahnecon ye nchuhn, nde hua cahcovan ye che cahma ne ne, condaca ne min, condãhde ne yune yahn che chenãn cah ne cãva che tumacadino ye che hua ndãhca din ye.

¹⁵ Cuãco rãhn rí nchuhn te ndã ro che cuhnde cade yahn nducoyaca ihyan ne, tahque chuhrihn ihyan yan min che co ihyan che chahte ye yan Sodoma man, yan Gomorra man.

Dihvo vo Jesucristo ne, chicuahn ye che va che chuhrihn ihyan yahn ye

¹⁶ Cuedevano nchuhn te dechuh nchuhn van ihyan che ama duhtuno ye. Anduhneca ndete che van lobo dechuh itecuche. Nahn che rino nan nchuhn man, necun ne man.

¹⁷ Cuihco nchuhn cudãdo, te cãca nunde ihyan yahn ne nan intiyahn man, cuahn ye nchuhn chete yãco man.

¹⁸ Quenda ye nchuhn nan gobernador man, nan rey man, cãca nunde ye yahn ne yahn che ritahno ne u. Min cah ne ndudo yahn ne nduhca che ritahno ne u, ne nduco tihca cadino ihyan chahn man, ihyan naci3n chenãhn man, yahn vederihquentiyon yãhn.

¹⁹ Cuahn che conahn ne, hua ndedecadino ne tãca cahmanan ne nchuhn, te ndã ura min ne, te Dendiohs ndudo che cahma ne.

²⁰ Tihca, te ndiyu nchuhn che ndedecadino ne deh che va che cahma ne, te Chida ne Dendiohs ne, te vaco ye ndudo che cahma ne.

²¹ Ndã ro min ne, ama cuahte cahnda ihyan nduco vih. Nahn ye ne, cãca ye che cahno se dihno ye, nahñ ye ne, cãca ye che cahno se indihthe yahn ye, nahñ ye ne, cãca ye che cahno se daya ye.

²² Nducoyaca ihyan co tan ye nduco nchuhn yahn che ritahno ne u. Ate adecoduhno ihyan che quendãh ye vedechahtino nde cuihno vedeyah min ne, ndevahn ye.

²³ Cuahn che din tan ihyan nduco nchuhn ama yan ne, cuahn ne tãma yan. Cuãco rãhn rí nchuhn te u che rinducó nducoyaca ihyan ne, ndaconan

chí cuahn che nde metah conan cuahtechica ne nducuahñ yāñ yahn ihyāñ naciōñ yahn Israel.

²⁴⁻²⁵ Ihyāñ che rahn ne, hua chenāñ ino ye che tahque ndāhca cuahño ye che co ihyāñ ricuahñ yahn ye. Tahque ndah ne, rihco dāma ino ye che cuahño ye nduhca che a rahnō ihyāñ ricuahñ yahn ye. Namin ihyāñ redin ntiyon ne, hua chenāñ ino ye che tahque ndāhca cuahño ye che co patrōñ yahn ye. Tahque ndah ne, rihco dāma ino ye che cuahño ye nduhca che rahnō patrōñ yahn ye. U che rihquentiyōñ nchuhn, nducote rendāhchenāñ ihyāñ u, rahn ye te quenāñ cumā vederihquentiyōñ yahn chundāñ, tahque ca nchuhn, nde tahque ndāhchenāñ ye nchuhn.

Ihyāñ ne, va che din vah ye Dendiohs

²⁶ Nducote a devāñ nchuhn te tihca va che cuahño co ne ne, hua din vah ne ihyāñ. Cuedevāñ ne te nducuahñ che ri cuahñ ndeh ne, va che cadino ihyāñ.

²⁷ Nducuahñ che rāñ nduco nchuhn cuahñ demāñ vo ne, cuahndudo ne, cah ne che cadino ihyāñ.

²⁸ Hua din vah ne ihyāñ che nahn cahño ye nchuhn, te cuihño min ne, ametah dehva che co din ye. Tahque ndah ne, codin vah ne Dendiohs, te ihyāñ min ne, co dechuh ye nchuhn vāñ ruchiyāñ, co ne castigo cuahñ dāma.

²⁹ Ihyāñ ne, rino ye yāhda cahya anduhneca ndete che nde hua rigonun chihve te, te ra ye ama centāvo nō ñāñ che o te. Ate nde āma yāhda liññ ne, hua coh te ndete che Chida nchuhn che va ye vahchetero hua cuahnecun ye.

³⁰ Me nchuhn ne, tahque nda cuande ye nchuhn. Nde yudo tin ne nedin cuande ye.

³¹ Chemin che hua cua ne cudādo. Tahque rigonun chihve ne che co yāhda cahya.

Nahn che hua co cuihñāñ ihyāñ cāva Dihvo vo Jesucristo

³² Nducoyāca ihyāñ che numā ino ye ritahño ye u ñāñ ihyāñ iyehñse ne, numacuahñ vedeyeno ndevā ihyāñ ñāñ Chidā che va ye vahchetero.

³³ Ate ihyāñ che cuācondāñ vedāme ye u ne, cuācondāñ vedāmē ihyāñ ñāñ Chidā che va ye vahchetero.

Ihyāñ che ritahño ye Dihvo vo Jesucristo ne, va che co tñ ihyāñ nduco ye

³⁴⁻³⁵ Hua ndedecadino nchuhn che māñ che ndā ne, hua cuahte cahnda ihyāñ, te ihyāñ che ritahño ye u ne, cuahte cahnda ihyāñ nduco ye. Ihyāñ ne, cuahte cahnda ye nduco chida ye māñ, tññ cahya ne, cuahte cahnda te nduco chaco te māñ, tññ decuno ihyāñ ne, cuahte cahnda te nduco indāññ te māñ.

³⁶ Tihca va che cuahte cahnda ihyāñ vāñ ihyāñ yahn ye.

³⁷ Ihyāñ che hua rihco dāma ino ye cotahño ye u, yahn che hua nahn ye che co tññ indihñte yahn ye nduco ye ne, ihyāñ chahn ne, nde hua redin yahn che din cuandē ihyāñ vāñ ihyāñ yāññ. Namin ihyāñ che hua rihco dāma ino ye cotahño ye u, yahn che hua nahn ye che co tññ dāya ye nduco ye ne, nde hua redin yahn che din cuandē ihyāñ vāñ ihyāñ yāññ.

³⁸ Adecoduhño ihyāñ che rihco dāma ino ye cotahño ye u andāhre nde va che conāñ yāñ ye ñāñ cruz, atenāñ ihyāñ min redin yahn che din cuandē ihyāñ vāñ ihyāñ yāññ.

³⁹ Ihyāñ che cuācondāñ vedāme ye u, che nahn ndedevāñ māñ ye ihyāñ ne, conda ye, ne ihyāñ che hua cuācondāñ vedāme ye u ne, andāhre cahño se ihyāñ, ate cuahtenāñ ye vahchetero.

Ihyan che cuahtenan ye vahchetero

⁴⁰ Ihyan che renevahnecon ye nchuhn ne, a u renevahnecon ye, ne ihyan che renevahnecon ye u ne, a Ihyan che dechuh ye u renevahnecon ye.

⁴¹ Ihyan che renevahnecon ye ama ihyan che rahndudo ye ndudo yahn Dendiohs yahn che redin ye ntiyon min ne, ndeva Dendiohs ama tama ye. A namin no tun ihyan che renevahnecon ye ama ihyan che ndah ihyan ye ne, ndeva Dendiohs ama tama ye nduco vih.

⁴² Ihyan che ritahno ye u ne, hua nduh rigonun chihve ye che lado yahn ihyan, ate adecoduhno ihyan che cah ye andahre ama vaso nune, cuh ihyan chahn ne, ndahco menun Dendiohs yahn ye.

11

Dechuh Juān Bautista o ihyan te nahn cadino ye yahn Dihvo vo Jesucristo

¹ Cuahn che chihno cah cuande Dihvo vo nduh che ndichio ihyan apóstol yahn ye ne, chica ye min cuahn ye, cacuahn ye man, cuahndudo ye man, nduh cuān yan che nino min.

² Tahn min ne, quenun Juān Bautista vacoyahn, ne cuahn che checadino ye yahn dehtenduh che redin Dihvo vo ne, dechuh ye o ihyan che rinduco ye ihyan nan Dihvo vo,

³ tumerune ye:

—¿A ndih ihyan che a va cade chi ye ndedevahn ye ihyan iyehñse, o comān va che chi ihyan min ne?

⁴ Ndahconan ye, ne rahn ye ri ye ihyan chahn:

—Cuahn nchuhn cuengo ne Juān nducuahn che rendihchero ne man, rihnevan ne man.

⁵ Cah ne che cadino ye nduhca che redin che ri ro nan ihyan che ve man ye man, redin che rica ihyan che neneva doh cah ye man, redin che rendoyahn ihyan che ndi ye cah che rechā yute man, redin che ihyan che chato ye rihnevan man, redin che rentuche ihyan che a ndih ye man, rahndudó ndudo ndah yahn Dendiohs, rihnevan ihyan che ri ndache ye yahn nunde yahn ye man.

⁶ Rahn rí nchuhn te ama ndah ro yahn ihyan che riquendi ye numa ino ye ritahno ye u.

⁷ Cuahn che a conahn ihyan chahn ne, canan rente Dihvo vo nduco ihyan che chenun ye min yahn Juān, ne rahn ye:

—¿Duh che chahn nchuhn chendihchero ne min yahn ne nan che metah duhva ne? A devano ne te ndiyu ama ihyan che ran do ye, che anduhneca ama nduco che a muhn a min reduehte yuhne.

⁸ ¿Duh chahn nchuhn chendihchero ne ne? A devano ne te ndiyu ama ihyan che ama ninevaca tino ndah, te ihyan chemin chan ne, ndevaco rey chenun ye.

⁹ A devano nchuhn te chahn ne, chendihchero ne ama ihyan profeta. Cuāco rahn rí nchuhn te ihyan min che tahque chahte vederihquentiyon quenan cuma ye van ihyan profeta.

¹⁰ A yahn ihyan min che rahn Dendiohs, ndirun nan Ndudo yahn ye tuhca: Dechuh ama se numanahn che metah cahn, cahcoyan se chedave yahn ihyan cava che a vate yan ye cuahn che nda.

¹¹ Cuāco rahn rí nchuhn te van nducoyaca ihyan che chahte ye iyehñse nde a rahn me nde meniyon ne, Juan Bautista che tahque chahte vederihquentiyon quenan cuma ye. Ate van ihyan che renevahnecon ye vederihquentiyon che ndahco cade Dendiohs ne, nde ihyan che tahque doh

vederihquentiyon quenan cuma ye ne, tahque chahte vederihquentiyon yahn ye che co vederihquentiyon che quenan cuma Juan.

¹² Nde ro che canan Juan ntiyon yahn ye nde meniyon ne, ama redin nun ino ihyan cava che tuno ye vahchetero nan che rihquentiyon Dendiohs.

¹³ Moisés man, nducoyaca ihyan profeta, nde nan che canan, nde nda Juan Bautista man, dirun ye yahn vederihquentiyon ra che ndahco cade Dendiohs.

¹⁴ Cuedevano nchuhn te che ndirun nan Ndudo yahn Dendiohs che ndaconan chi tun Elias ne, a Juan Bautista nda ye, dinahn vederihquentiyon min, andahre hua nahn cotahno ne.

¹⁵ Nducoyaca nchuhn ne, cuihcovan ndah ne che tihca rahn.

¹⁶⁻¹⁷ Nchuhn che vate ne man ro cuh ne, nduhchan sahn chaha che reduche se ndihve, tihchan ne. Sahn chahn ne, rahn se ri se combiero yahn se: "Tive nuhn curetive, ate hua cah yeno nchuhn, ndeh ne. Chita ran nuhn, ate hua chaco ne."

¹⁸ Nduhchan sahn chahn, tihchan ne, te nda Juan Bautista, ne ama vah nan cheh nan chih ye, ne rahn nchuhn te quenun vaco chihnga ihyan.

¹⁹ A namin no tun cuahn che nda u che rinduco nducoyaca ihyan. Reh man, rih man, dama nduco ihyan che rahte vihco ye, ne rahn ihyan: "Sahn tih ne, ama reh se man, ama rih se man, rinduco se sahn rica tume cade iyo man, sahn nunde chenh man." Rendahchenan ihyan ntiyon che redin nuhn, ate hua dehve din yahn, te ihyan che renahn ye ne, a devano ye che vededevano yahn Dendiohs ne, chemin che tahque ndah.

Ihyan yan che hua nahn nto ino ye nunde yahn ye

²⁰ Chihno min ne, nte Dihvo vo yahn ihyan yan nan che tahque din ye vederihno, te ihyan chahn ne, hua nahn nto ino ye nunde yahn ye. Rahn ye:

²¹ —Nchuhn ihyan yan Corazin man, ihyan yan Betsaida man, jama vedin nchuhn!, te ndete che ihyan yan Tiro man, ihyan yan Sidon man, ndihchero ye vederihno che ndihchero nchuhn ne, a metah ro nto ino ye nunde yahn ye, chahtenun ye tino ndere, chahteran ye van iya.

²² Rahn ri nchuhn te nda ro che cuhnde cade yahn nducoyaca ihyan ne, nde tahque chahte castigo co nchuhn che co ihyan chahn.

²³ Me nchuhn ihyan yan Capernaum ne, ama redin yade ne anduhneca ndete che nde vahchetero tuno ne che rahco ne, ate va che chahn ne van ruchiyahn, te ndete che yan Sodoma din vederihno nduhca che din yan vaco ne ne, chitahno ihyan chahn, ne vate ca ye nde meniyon.

²⁴ Rahn ri nchuhn te ro che cuhnde cade yahn nducoyaca ihyan ne, tahque chahte castigo co nchuhn che co ihyan chahn.

Rahn Dihvo vo Jesucristo: "Cochi nchuhn, ne din che nuhndeman chedave yahn ne"

²⁵ Tuhme covah Dihvo vo, ne rahn ye:

—Chida man, ndih che rihquentiyon ne vahchetero man, iyehse man, rendeva yavenan ne, te a ihyan che necun ye cah ne che cadino ye vededevano yahn ne, ndiyu ihyan che ama devano ye che rahco ye.

²⁶ Tihca Chida, te tihca nahn man ne.

²⁷ Tuhme rahn Dihvo vo ri ye ihyan che chenun ye min:

—Chida ne, ndahco ye vederihquentiyon tah che cahcantiyon nducuahn dehtenduh. Nde ama ihyan hua rendihche ye u, te atenan Chida che rendihche ye u. Namin nde ama ihyan hua rendihche ye Chida, te atenan u, nduco ihyan che man ricuahn ihyan taca ye, che rendihche nuhn ihyan.

²⁸ Nducoyaca nchuhn che rechuhrihn ne, hua va man chedave yahn ne, cochahtino ne u, ne din che cuahteman chedave yahn ne.

²⁹ Codinahn ne vederihquentiyon yahn, ne cuiquendi ne yune yahn, te u ne, necun. Tuhme cuahteman chedave yahn ne.

³⁰ Tihca din nchuhn, te hua vahche cava ne che dinahn ne vederihquentiyon yahn.

12

Ihyan apóstol ne, tuhn ye ama o indo trigo ro che rahtetuhno ihyan

¹ Chihno ama o ro min, ama ro che rahtetuhno ihyan ne, chuh Dihvo vo nan va chendata yahn ihyan, ne ihyan apóstol ne, chi cuico ye, ne tuhn ye indo trigo, cheh ye ndute yahn.

² Ndihchero ama o sahn fariseo, ne rahn se ri se Dihvo vo:

—Condihche ne ihyan apóstol yahn ne. Hua ndahca che tihca redin ye man ro cuh, te man ne, ro che rahtetuhno ihyan.

³ Ate ndahconan Dihvo vo, ne rahn ye ri ye sahn:

—A ndihchenan nchuhn nan Ndudo yahn Dendiohs nduhca che din David ro min cuahn che chi cuico ye nduco combiero yahn ye.

⁴ Chenda ihyan chahn chete yaco, cheh ye pan che ndi vedino nan Dendiohs andahre pan chemin chan ne, atenan chidocuyan co cheh ye.

⁵ Namin a devano nchuhn nduhca che rihquentiyon ley che dirun Moisés. Hua dehve nunde che redin chidocuyan ntiyon chete yaco ro che rahtetuhno ihyan.

⁶ Nducote va vederihquentiyon che din chidocuyan ntiyon chete yaco ro che rahtetuhno ihyan ne, cuedevano ne te hua dehve nunde che tihca redin ihyan apóstol yahn ro che rahtetuhno ihyan, te vederihquentiyon che quenan cuma ne, tahque chahte che co vederihquentiyon min.

⁷ Nchuhn ne, nde hua renahn ne ndudo yahn Dendiohs che ndirun tuhca: “Tahque nahn che cuahtenan cuma nchuhn vedevahino che co che cahno ne ite, co te vedino nan.” Ndete che renahn nchuhn ndudo min ne, nde hua ndere cahma nunde ne yahn ye.

⁸ Cuedevano ne te u che rinduco nducoyaca ihyan ne, rihquentiyon nde nducuyahn che redin ihyan ro che rahtetuhno ye.

Dihvo vo Jesucristo ne, din che ndoyahn ama sahn che ndi cuma tah se

⁹ Chuh Dihvo vo min, ne chenda ye chete ama yaco yahn ihyan naci6n yahn Israel.

¹⁰ Min quenun ama sahn che ndi cuma ama tah se. Namin min chenun ama o sahn fariseo, ne nducote nahn caca nunde se yahn Dihvo vo ne, tumerune se ihyan:

—¿A rihquentiyon nan Ndudo yahn Dendiohs che co din vo che ndoyahn ihyan ro che rahtetuhno vo ne?

¹¹ Ndahconan Dihvo vo, ne rahn ye ri ye sahn:

—Ndete che va itecuche yahn nchuhn ne condahnun te chete veh ico ro che rahtetuhno ihyan ne, ndetahno cahne ne ndetandah ne ite.

¹² Nducote tahque rignonun chihve ama ihyan che co itecuche ne, chemin che co conan vo ihyan andahre ro che rahtetuhno vo.

¹³ Tuhme rahn ye ri ye sahn min:

—Cuachondihque tah.

Chachondihco tah se, ne ndo ndah nduhca tah se che tama me.

¹⁴ Ndetahno quendah vah sahn fariseo chahn rentuhno se nduco vih taca cahno se Dihvo vo.

Nduhca che ndirun yahn Dihvo vo Jesucristo nan Ndudo yahn Dendiohs

¹⁵ Checadino Dihvo vo che tihca rentuhno se, ne chica ye min, cuahn ye. Ama yahn ihyan cuahn ye nduco ye, ne din ye che ndoyahn nducoyaca ihyan che cah ye.

¹⁶ Chihquentiyon Dihvo vo che hua cahma ihyan chahn che a ihyan min che a va cade che dechuh Dendiohs, ndedevahn ye ihyan iyehense.

¹⁷ Tihca din ye cava che conahn ndudo che rahn Dendiohs yahn ye, dirun ihyan profeta Isaías tuhca:

¹⁸ Sahnguh che redin se ntiyon yahn, a man tendahnun sahn.

Ama yahino sahn, ama yeno cava se.

Din che conun Vacó sahn,

ne cuahndudo se van ihyan naci6n chenahn nduhca che va che techecade yahn ye.

¹⁹ Hua cuhma chende se nduco ihyan, nde huane cuah nun se nan ye, cahya se ihyan.

Hua cochica se yune viyan cuahndudo se.

²⁰ Hua cah ndache nduh se ihyan che ndache ri ye yahn nunde yahn ye.

Tahque ndah se ne, necah se vedechahtino ihyan.

Tihca quendi se nde conan cahcantiyon se numachahte iyehense,

²¹ ne ihyan naci6n chenahn ne, cochahtino ye sahn.

Sahn fariseo ne, rahn se te Dihvo vo Jesucristo ne, quenan cuma ye vederihquentiyon yahn chundah

²² Chihno min ne, nda ihyan nan Dihvo vo, nda ye ama sahn che quenun vaco chihnga sahn. Sahn min ne, nde ve se nde lihme se. Ndetendah Dihvo vo vaco chihnga me, ne chi ro nan se man, chi cah se man.

²³ Chahn ino nducoyaca ihyan, ne rahn ye:

—¿A din ndete che ihyan cuh che daya David ne?

²⁴ Ate chihnevan ama o sahn fariseo, ne rahn se:

—Ihyan tih ne, quenan cuma ye vederihquentiyon yahn chundah, ne nduco chemin rendetendah ye vaco chihnga.

²⁵ A checadino Dihvo vo che tihca rahn se, ne rahn ye ri ye sahn:

—Ndete ihyan che vate ye rihquentiyon ye cuahtecuhma ye van man ye nduco vih ne, hua co quendi ye cahcantiyon ye. Ndete intiyahn yan cuahtecuhma ye van man ye nduco vih ne, hua co quendi ye cahcantiyon ye. Ndete ihyan che chenun ye ama vah cuahtecuhma ye va van man ye nduco vih ne, hua co quendi ye cuahtenun dama ye.

²⁶ A namin no tun chundah. Ndete che ndetendah se vaco chihnga yahn se ne, anduhneca ndete che cuhma se nduco ihyan yahn se, ne hua co quendi vederihquentiyon yahn se.

²⁷ Nchuhn ne, rahn ne che nduco vederihquentiyon yahn chundah che rendetendah vaco chihnga, ate sahn che rinduco se nchuhn ne, nducote rendetenan se duh che conan sahn cava che ndetendah se vaco chihnga ne, co cahma se co se nchuhn che hua cuaco che rahn ne.

²⁸ Cuedevano nchuhn te a nduco vederihquentiyon yahn Vaco Ndah yahn Dendiohs rendetendah vaco chihnga. Nduco chemin ne, a ndero ndi che a rihquentiyon Dendiohs van nchuhn.

²⁹ Ama sahn dito ne, atenan ndete che dechiche ihyan sahn co condá ye chete vaco se, duco ye yahn se. U ne, anduhneca ndete che tihca din nduco chundah, ndahco ndiyá vederihquentiyon yahn se.

³⁰ Ihyan che hua rinduco ye u ne, anduhneca ndete che tãn ye nducó. Ntiyon che redín ne, anduhneca ndete che rene din dá má ndute ndata, ne ihyan che hua rinduco ye u ne, anduhneca ndete che rihtera ye.

³¹ Nducote rãhn nchuhn yãhn che quenan cumá vederihquentiyon yahn chundah ne, chemin che ráhn rí nchuhn che va vederenchahco çava ihyan adecodehno nunde yahn ye man, che chihnga çahma ye man, ate ihyan che renda hchenan ye Vaco Ndah yahn Dendiohs ne, metah vederenchahco çava ye.

³² Adecoduhno ihyan che ndahchenan ye u che rinducó nducoyaca ihyan ne, va vederenchahco çava ye, ate ihyan che ndahchenan ye Vaco Ndah yahn Dendiohs ne, hua ndaca ye vederenchahco.

Ejemplo yahn yãhn ndata

³³ Yahn ndata ne, a nan ndute yahn rihnde ro ndete che ndah o hua ndah. Yahn ndata che ndah ndute yahn ne, yahn ndah, ne yahn ndata che chihnga ndute yahn ne, hua ndah. Cua cuande nchuhn yahn ejemplo cuh, te hua redin yahn che ndahchenan ne vederihquentiyon che quenan cumá cuahn che a ro nan ne che ntiyon cochihve redín.

³⁴⁻³⁵ ¡Ama duhtuno ihyan nchuhn! A ndero ndi nan ndudo yahn ne. Ihyan che ndah ihyan ye ne, runecade nan ndudo yahn ye, ne ihyan che duhtuno ihyan ye ne, chihnga ndudo yahn ye.

³⁶ Ráhn rí nchuhn te çava nducuahn ndudo chihnga che rãhn ihyan ne, va che din Dendiohs castigo ihyan.

³⁷ Ihyan che runecade ndudo yahn ye ne, hua co ye castigo, ne ihyan che chihnga ndudo yahn ye ne, co ye castigo.

Sãhn fariseo ne, chica se che din Dihvo vo Jesucristo ama vederihno, ndihchero se

³⁸ Tuhme rãhn ama o sãhn fariseo man, sãhn devano ley che dirun Moisés man:

—Ihyan Ricuahn, nahn nuhn che din ne ama vederihno ndihchero nuhn çava che co devano nuhn che Dendiohs dechuh ye ndih.

³⁹ Ndahconan Dihvo vo, ne rãhn ye ri ye sãhn:

—Ihyan che vate ye man ro cuh ne, ama duhtuno ihyan ye man, rahcotahn ye yahn Dendiohs man. Nahn ndihchero ye vederihno, ate atenan ama vederihno nduhca che chinahn nduco ihyan profeta Jonás ndaca ndihchero ye.

⁴⁰ Ama ite ndico che quenun te van nuniyahn ne, ca tuhn te ihyan min, ne quenun ye chete te ino ro ino yan. Atihnoca u che rinducó nducoyaca ihyan va che conún man yahn ino ro ino yan.

⁴¹ Ráhn rí nchuhn te cuahn che nda ro che techecade Dendiohs yahn nducoyaca ihyan ne, necuan ihyan yan Nínive, ndahco ndiya ye nchuhn, te ihyan chahn ne, nto ino ye nunde yahn ye cuahn che cahndudo ihyan profeta Jonás ndudo yahn Dendiohs, ate nchuhn ne, nde hua rihcovan ne ndudo yahn andahre tahque chahte vederihquentiyon quenan cumá che co ihyan min.

⁴² Namin tahn reina che va te cuahn yahn ndiya ne, ndahco ndiya te nchuhn nda ro min, te tahn min ne, ama yahn chica te, chihnevan te vedevano yahn Salomón, ate nchuhn ne, nde hua rihcovan ne ndudo yahn andahre tahque chahte vederihquentiyon quenan cumá che co ihyan min.

Nduhca che redin vaco chihnga

⁴³ Cuahn che rendiquendaḥ vaco chihnga ama ihyan ne, rechica yaḥn nan che metah duhva, renuhn nan che conan taḥn. Ate cuahn che hua rendaḥa ne,

⁴⁴ rendaconan, conun ihyan nan che a ndiquendaḥ, te ihyan min ne, a nduhca ama vah che va man, nde tuno ntache man, necuco man.

⁴⁵ Tuhme rahñ regua te ndache combiero yaḥn che tahque duhtuno ca che co man, ne rahtenun ihyan min, redin che tahque chuhrihn ye che co ro menaḥ. Tihca cuahno co ihyan che duhtuno ihyan ye che vate ye man ro cuh.

Nda chaco Dihvo vo Jesucristo nduco dihno ye, rinuhn ye ihyan

⁴⁶ Numanahn che rente ca Dihvo vo nduco ihyan chahn ne, nda chaco ye nduco dihno ye, rinuhn ye ihyan. Chahtendi ye cuahn chevah, nahn nte ye nduco ye.

⁴⁷ Rahñ ihyan ri ye Dihvo vo:

—Nda chaco ne nduco dihno ne, vatendi ye cuahn chevah, nahn nte ye nduco ne.

⁴⁸ Ate ndahconan Dihvo vo, ne rahñ ye ri ye ihyan che rahñ ye nduco ye:

—Taca hua. Ihyan caḥ che chacó man, ihyan sih che dihnó man.

⁴⁹ Tuhme nahma Dihvo vo ihyan che rinduco ye ihyan, ne rahñ ye:

—Namin ihyan chuhn ne, anduhneca chacó man, anduhneca dihnó man,

⁵⁰ te nducoyaḥa ihyan che redinahn ye vederihquentiyon yaḥn Chidá che va ye vahchetero ne, ihyan chahn ne, anduhneca chacó man, anduhneca cahvé man, anduhneca dihnó man.

13

Ejemplo yaḥn ihyan che retuhdo ye ndute ndata

¹ Ro min ne, quendaḥ vah Dihvo vo cuahn ye chihto vine, ne min chihnde ye.

² Ama yaḥn ihyan chi dama ye nan ye, nde quenana cuma che chihnde ye chete ama barco che va nan vine.

³ Chicuaḥn Dihvo vo ama ndeh nan dehtenduh ihyan chahn nduco ejemplo. Canaḥ ye tuhca:

—Ama yune ne, cuahn ama ihyan retuhdo ye ndute ndata.

⁴ Cuahn che tuhdo ye ne, chera neve ndute chihto yune, ne nda yaḥda cheh te.

⁵ Te neve ndute ne, chera van roh, ne nducote hua yano yaḥn min ne, ndetaḥno quendaḥ.

⁶ Ate cuahn che chi ihno ne, chihno tih, yaḥn che hua yano nda dihyoduto.

⁷ Te neve ndute ne, chera van chano yan. Ate cuahn che quendaḥ ne, chendiḥ, ne chenun man.

⁸ Te neve ndute ne, chera nan che deman yaḥn, ne ama ndah chi yaḥn; nahñ ne, chi ama ciento yaḥn, nahñ ne, chi ino raco yaḥn, ne nahñ ne, chi ndico ndiche yaḥn.

⁹ Nducoyaḥa nchuhn ne, condecadino ndah ne cava che tumacadino ne deh conahn.

Deh cuande che deman nduco ejemplo chicuaḥn Dihvo vo Jesucristo ihyan

¹⁰ Tuhme chahn nda ihyan apóstol nan Dihvo vo, ne tumerune ye ihyan:

—Dihve nuhn, ¿deh cuande che nduco ejemplo rente ne nduco ihyan ne?

¹¹ Ndahconan ye, ne rahñ ye ri ye ihyan chahn:

—Nduhca che rihquentiyon Dendiohs ne, nde hua devano ihyan, ate nchuhn ne, din Dendiohs che cadino ne yaḥn.

¹² Tihça te, ihyan che chenahn ye ne, din Dendiohs che conahn ndah ye, ne ihyan che hua ndah chenahn ye ne, nde conan ye tah che chenahn ye.

¹³ Chemin che nduco ejemplo rahndudó, rihnevan ye, çava che cahnevan no ye ate hua conahn ye.

¹⁴ Tihça rinahn nduco ye nduhça che dirun ihyan profeta Isaias tuhça:

Ihyan sih ne, rihnevan ye ate hua renahn ye man, rendihchero ye ate anduhneça ndete che hua ri ro nan ye man,

¹⁵ te ama cheche ndaçonda chedave yahn ye, ndi i ye,

anduhneça ndete che hua rihnevan ye man,

anduhneça ndete che hua ro nan ye man,

anduhneça ndete che hua retumacadino ye man.

Tihça ri yahn ye, te a va che hua necahco ye u,

ne hua nchahcó çava ye.

¹⁶ Me nchuhn ne, ama ndah ro yahn ne, te renahn ne vederihquentiyon yahn Dendiohs.

¹⁷ Cuaço rahn ri nchuhn te nde a rahn me ne, ama yahn ihyan profeta man, ihyan che runcade ye man ne, ama chenan ino ye che ndihchero ye che rendihchero nchuhn man, che cahnevan ye che rihnevan ne man, ate hua chinahn nduco ye.

Reçah cuande Dihvo Jesucristo yahn ejemplo yahn ihyan che retuhdo ye ndute ndata me

¹⁸ Cuihcovan nchuhn. Tuhça conahn ejemplo yahn ihyan che retuhdo ye ndute ndata me.

¹⁹ Ndute ndata che chera chihto yune me ne, nduhça ihyan che rihnevan ye ndudo yahn vederihquentiyon yahn Dendiohs, ne hua renun ino ye, te ndetaño che rihnevan ye ne, renda chundah, redin se che rinan ye.

²⁰ Ndute che chera van roh me ne, nduhça ihyan che rihnevan ye ndudo, ne numacuahn vedeyeno renevahnevan ye.

²¹ Ate ihyan chahn ne, nduhça chendata che metah cotah yano dihyoduto ne, tihchan ye, te cuahn che rechuhrihn ye o redin tan ihyan nduco ye yahn che renevahnevan ye ndudo me ne, ndetaño rihcoman ye.

²² Ndute che chera van chano yan me ne, nduhça ihyan che rihnevan ye ndudo me, ate ama rendedecadino ye çava ntiyon yahn ye man, rihncheh man ye ihyan che ama nahn yahn ye vedecuihca man, ne chemin che hua ri redin ndudo me che ndah nduco ye.

²³ Me ndute che chera nan che deman yahn me ne, nduhça ihyan che rihnevan ye ndudo me, ne renahn ye. Ihyan chahn ne, nduhça chendata che chi ama ciento yahn man, chi ino raco yahn man, chi ndico ndiche yahn man ne, tihchan ye, te reçah yune ye che redin ndudo me che ndah nduco ye.

Ejemplo yahn chano yan van trigo

²⁴ Chihno min ne, nte Dihvo vo tama ejemplo, chihnevan ihyan chahn. Rahn ye:

—Çahmá có nchuhn nduhça vederihquentiyon yahn Dendiohs. Ama ihyan ne, tuhdo ye trigo nan yahn yahn ye,

²⁵ ate chete rahn, ura che vateyado ihyan ne, chahn ama sahn che hua ri rendihche se ihyan, ne tuhdo se ndute yahn chano yan van trigo me.

²⁶ Cuahn che a chendudo cuiyon yama trigo me ne, chihnde ro chano yan me van.

²⁷ Tuhme chahn sahn redin ntiyon, chengo se dihve se: “Dihve nuhn, uvo ne, trigo tuhdo vo min. ¿Taçá che ama quendañ chano yan ne?”

²⁸ Ndahconan ye, ne rahn ye ri ye sahn: “Ama sahn che hua ri rendihche se u ne, chahn se tuhdo se ndute chano yan.” Tuhme tumerune se ihyan: “¿A nahn ne che tico nuhn chano yan me ne?”

²⁹ Ndahconan ye, ne rahn ye ri ye sahn: “Hua tico ne chano yan me, te denan nde nduco trigo tico ne.

³⁰ Tahque ndah cahcoman vo che cuihta dama nduco vih nde nda ro che co cuma trigo me. Tuhme dechuh ihyan che tico ye chano yan me, din ticua ye, cuih ye vacoyahn. Cuihno min ne, din dama ye trigo me, cuih ndah ye.”

Ejemplo yahn ndute yahn mostaza

³¹ Namin nte Dihvo vo ejemplo cuh:

—Vederihquentiyon yahn Dendiohs ne, nduhca ama ndute mostaza che chihche ihyan nan yahn yahn ye.

³² Ndute mostaza ne, andahre chemin che tahque cahya van nducuahn ndute, ate cuahn che rihta ne, ri rahte yahn yahn che nde yahda redin ndahque te van dune.

Ejemplo yahn ya yahn pan

³³ Nte Dihvo vo tama ejemplo:

—Vederihquentiyon yahn Dendiohs ne, nduhca tahsihn ya che chihchetahn ama ndahta van ndeh yache pan, ne quendih van nducuahn.

Dihvo vo Jesucristo ne, deman nduco ejemplo chicuahne

³⁴ Nducuahn ndudo che cahndudo Dihvo vo, chihnevan ihyan ne, deman nduco ejemplo,

³⁵ cava che conahn nduhca che dirun ihyan profeta, tuhca:

Cuahndudó deman ejemplo.

Cacuahn ihyan yahn dehtenduh che nde hua devano ihyan numacuahn ro nde ro che chihnde iyehhse.

Dihvo vo Jesucristo ne, cah cuande ye deh conahn ejemplo yahn chano yan van trigo me

³⁶ Chihno min ne, ndedechuh Dihvo vo nducoyaca ihyan, ne ndonda ye vah nduco ihyan apostol yahn ye. Tuhme rahn ihyan chahn ri ye ihyan:

—Te cuande ne nuhn deh conahn ejemplo yahn chano yan me.

³⁷ Ndahconan Dihvo vo, ne cah cuande ye ihyan chahn:

—Ihyan che retuhdo ndute ndata me ne, u che rinducó nducoyaca ihyan.

³⁸ Yahn me ne, iyehhse. Ndute ndata me ne, ihyan che renevahnecon ye vederihquentiyon yahn Dendiohs. Chano yan me ne, ihyan che rihquentiyon chundah.

³⁹ Sahn che tuhdo ndute yahn chano yan me ne, chundah. Ro che ndo dama trigo me ne, a ro che cuhnde cade yahn nducoyaca ihyan. Ihyan che nedin dama ye trigo me ne, ángel.

⁴⁰ Nduhca che ndo dama chano yan me, conun vacoyahn me ne, tuhca cuahno co ihyan che duhtuno ihyan ye cuahn che cuhnde cade yahn nducoyaca ihyan.

⁴¹ Nda ro min ne, u che rinducó nducoyaca ihyan ne, dechuh ángel yahn numachahte nan che rihquentiyón, nedin dama ye nducoyaca ihyan nunde, menan vihca ihyan che rethiyon yune ye ihyan chenahn che rahtendihco ye nunde.

⁴² Cuih ángel chahn ihyan nunde chahn van ruchiyahn. Min cuaco ye man, cheh dihyon ye man.

⁴³ Me ihyan che redinahn ye vederihquentiyon yahn Dendiohs, ihyan min che Chida ye ne, quendah yavenan ye, cuahtenan ye vahchetero nan che rihquentiyon ihyan min. Nducoyaca nchuhn, condecadino ndah ne yahn che renté nduco ne.

Ejemplo yahn vedecuihca che quenun ndeh

⁴⁴ Vederihquentiyon yahn Dendiohs ne, nduhca ama vedecuihca che quenun ndeh man yahn. Ama se ne, ntaca se vedecuihca me, ne a min no ndaconan tihyon ndeh se. Ama chi yeno se, ne chahn se ndihcue se nducuahn dehtenduh yahn se, ne ca se yahn nan che quenun vedecuihca me.

Ejemplo yahn tu diyahn che ama yahn chihve

⁴⁵⁻⁴⁶ Vederihquentiyon yahn Dendiohs ne, nduhca ama tu diyahn che ama ndahca man, che ama yahn chihve man. Ndihero ama se che ra se tu chemin chan, ne chahn se ndihcue se nducuahn dehtenduh yahn se, ne ca se tu me.

Ejemplo yahn yana che retah yahca

⁴⁷ Vederihquentiyon yahn Dendiohs ne, nduhca ama yana che retah yahca che tihyon ihyan chete nuniyahn, ne chetah ye nducoyaca nan yahca.

⁴⁸ Cuaahn che a chito yana me ne, ndetendah ye cuaahn chihto nuniyahn. Min tendahnun ye yahca che ndah te, chih ye ite chete cuahte, ne chihtera ye ite che hua cochihve te.

⁴⁹ Tihca va che co ro che techecade Dendiohs yahn nducoyaca ihyan. Cuahtechica angel din vi ye ihyan che duhtuno ihyan ye van ihyan che ndah ye,

⁵⁰ ne cuih ye ihyan che duhtuno ihyan chahn van ruchiyahn. Min cuaco man, cheh dihyon ye man.

Ejemplo yahn vedecuihca

⁵¹ Tuhme tumerune Dihvo vo ihyan chahn:

—¿A renahn nchuhn nducuahn che renté ne?

Ndahconan ihyan chahn, ne rahn ye:

—Taca hua, Dihve nuhn, renahn nuhn.

⁵² Tuhme rahn Dihvo vo ri ye ihyan:

—Nducoyaca ihyan che retuno ye vederihquentiyon yahn Dendiohs ne, ri ye nduhca ihyan cuihca che retendah ye dehtenduh che ra man, dehtenduh che ndico man, van vedecuihca yahn ye, te ihyan chahn ne, ama ndeh nan vededevano chenán cuma ye.

Nta Dihvo vo Jesucristo yan Nazaret

⁵³ Cuaahn che a chihno cahndudo Dihvo vo ejemplo chemin chan ne, chica ye min.

⁵⁴ Nta ye yan nan che chihta ye, ne chahn ye chete yaco chicuahn ye. Ama chahn ino ihyan yan min, ne rahn ye:

—¿Ti chehua sahn tih vededevano che ricuahn se? ¿Taca che ri redin se vederihno?

⁵⁵ Sahn tih che daya vihcheyahn me. Chaco se ne, María. Dihno se ne, Jacobo man, José man, Simón man, Judas man.

⁵⁶ Namin tahn cahve se ne, muhn vate te. ¿Tira chehua se che tihca ricuahn se?

⁵⁷ Ihyan chahn ne, hua nevahnecon ye Dihvo vo. Chemin che rahn Dihvo vo ri ye ihyan:

—Ihyan profeta ne, atenan yan vāco ihyan che renevahneceun ye ihyan, te ihyan yan vāco ye mān, ihyan ndevāco ye mān ne, rendāhchenan ye ihyan.

⁵⁸ Dihvo vo ne, atenan āma o vederihno din ye min yahn che hua chitahno ihyan chahn ihyan.

14

Nduhca che chih Juān Bautista

¹ Tahn min ne, Herodes gobernador yahn Galilea ne, checadino se yahn Dihvo vo Jesucristo,

² ne rahn se ri se sahn che rīnan se sahn nan che rihquentiyon se:

—Ihyan che redin ye vederihno ne, Juān Bautista. A ntuche ye van tenahn, ne chemin che quenān cuma ye vederihquentiyon che redin ye vederihno.

³ Tihca rahn se, te sahn min din se preso Juān, chihquentiyon se sandado che dechiche se cadena ihyan, tihyon se ihyan vācoyahn. Tihca din se, te tihca nahn Herodias tahn ndahta yahn dihno se Felipe.

⁴ Juān ne, a rahn ye ri ye Herodes:

—Hua redin yahn che conan come tahn tih nduhca ndahta yehn.

⁵ Nahn caḥno Herodes Juān, ate vah se ihyan yan, te nducoyaça ye ritahno ye che Dendiohs dechuh ye ihyan.

⁶ Ate ro che vihco duche Herodes ne, ndeh tahn daya Herodias nan ihyan che vate ye min, ne āma quenān ino Herodes.

⁷ Numacuahn vedeyudo caḥ se ndudo yahn se tahn che adecodehno che caça te ne, caḥ se tahn.

⁸ Nducote a nchinun chaco te tahn ne, rahn te ri te sahn:

—Te ne tin Juān Bautista u chete āma cuh.

⁹ Āma chi ran Herodes che tihca rahn te, ate nducote a caḥ se ndudo yahn se tahn nan nducoyaça ihyan che vate min ne, dinahn se.

¹⁰ Chihquentiyon se sandado che chahn se chete vācoyahn, chihca yan se dādo Juān.

¹¹ Ndaconan se, nda se tin Juān chete āma cuh. Caḥ se tahn, ne necaḥ te chaco te.

¹² Tuhme ndā ihyan che rīnduco ye Juān, ne quenda ye ihyan chihche ye ihyan. Chihno min ne, chahn ye chengo ye Dihvo vo.

Caḥ Dihvo vo Jesucristo, cheh uhn mil ihyan

¹³ Cuahn che checadino Dihvo vo che chihno se Juān ne, chica ye min, quenun ye chete āma barco cuahn ye āma cuān, yahn nan che metah duhva. Āte checadino ihyan che cuahn ye, ne chica ye viyan, rica caḥ ye, cuahn ye quendi ye ihyan.

¹⁴ Cuahn che ndiquendāh Dihvo vo chete barco me ne, ndihchero ye che āma yahn ihyan ndi dāma ye. Quenān vahino ye ihyan chahn, ne din ye che ndoyahn ihyan caḥ che nduco ye min.

¹⁵ Cuahn che a chi chino ne, chahn ndā ihyan apóstol nan Dihvo vo, ne rahn ye ri ye ihyan:

—Muhn ne, yahn nan che metah duhva. Avāne ne, a chino cuahn. Cuendechuh ne ihyan sih caça che caḥn ye ti tenduh yan, cua ye che cheh ye.

¹⁶ Rahn Dihvo vo ri ye ihyan chahn:

—Metah deh cuande che ndedechuh ihyan. Caḥ nchuhn cheh ye.

¹⁷ Ate rahn ihyan chahn ri ye ihyan:

—Atenan uhn ra pan nduco o yahca va yahn nuhn.

¹⁸ Rahn ye ri ye ihyan chahn:

—Cuahn nchuhn ngua ne.

¹⁹ Tuhme chihquentiyon Dihvo vo che cuahte nducoyaca ihyan nan yune. Chetah ye nduh che uhn pan me nduco o yahca me quetuhma ye. Chenihyon nan ye nan ro, necah ye nundihve cuahn Dendiohs, ne ndeh ye pan me, cah ye ihyan apóstol chahn cava che cuih ye van nducoyaca ihyan.

²⁰ Cheh nducoyaca ihyan chahn nde nan che chito ihyan. Chihno min ne, nedin dama ihyan apóstol chahn che ngava, ne decuto ye ndichio cuahte.

²¹ Ihyan che cheh ye ne, ri ye uhn mil che deman ihyan chahn, avane ihyan ndahta man, chechaha man.

Chica Dihvo vo Jesucristo nan nune vine

²² Chihno min ne, chihquentiyon Dihvo vo ihyan apóstol che cuahtenun ye chete barco me, tuche ye tama lado viche yahn vine me numanahn che ndedechuh ye ihyan chahn.

²³ Cuahn che chihno ndedechuh ye ihyan chahn ne, cocha ye ama tingüete deman ye cava che covah ye. Cuahn che a chi rahn me ne, quenan ca ye min deman ye.

²⁴ Numanahn min ne, a nde mahn vine me cuahn ihyan apóstol chahn nduco barco me. Ama rechi yuhne cuahn nan cuahn barco me, ne ama rahn nune vine me.

²⁵ Cuahn che a nino co dave ne, nda nino Dihvo vo cuahn nan cuahn barco me, rica ye nan nune.

²⁶ Cuahn che ndihchero ihyan apóstol chahn ihyan che rica ye nan nune me ne, ama dihya ye chi nde tuno cah vah ye, ne rahn ye:

—iNga ama vaco chihnga, cochi tan!

²⁷ Ate yahve Dihvo vo ihyan chahn, ne rahn ye:

—Hua vah nchuhn, te a u che cochi.

²⁸ Tuhme rahn Pedro ri ye ihyan:

—Dihvé, ndete che ndih ne, cuahnecun ne che cacá nan nune, chí nan ne.

²⁹ Ndahconan Dihvo vo, ne rahn ye:

—Cochi.

Tuhme cuahn Pedro, rica ye nan nune cuahn nan che cochi Dihvo vo.

³⁰ Ate nducote ama ri yudo nan vine me ne, chenda vedevah ihyan. Ndetahno canan rehchenun ye van nune, ne cah ye:

—Dihvé, ¡cuendedevaln ne u!

³¹ Chetah Dihvo vo tah ye, ne rahn ye ri ye ihyan:

—Di ne, hua numa ine ritehne. ¿Dehco che ndeh rendedecadine?

³² Cuahn che chenda ye chete barco me nduco vih ne, chehuan yuhne me.

³³ Tuhme ihyan che chenun ye chete barco me ne, chehntihya ye nan Dihvo vo ne rahn ye:

—Cuaco niyon te ndih che Daya Dendiohs.

Dihvo vo Jesucristo ne, din ye che ndoyahn ihyan cah yan Genesaret

³⁴ Cuahn che a tuche ihyan chahn vine me ne, nda ye yan Genesaret.

³⁵ Ndetahno nchanan ihyan yan min Dihvo vo, chacotuhn ye ndudo numacuahn yahn min. Ama chengu ihyan ihyan cah yahn ye nan Dihvo vo.

³⁶ Chica ihyan chahn favor ihyan che cuahnecun ye che nahn tah ihyan cah chahn mare tino yahn ye, ne nducoyaca ye che nahn tah ye ne, ndoyahn ye.

¹ Chihno min ne, ama o sahn fariseo man, sahn devano ley che dirun Moisés che chica se yan Jerusalén man, chahn nda se nan Dihvo vo, ne rahn se ri se ihyan:

² —Hua ndahca che rahcotahn ihyan apóstol yahn ne vederihquentiyon yahn ihyan ndico, te reh ye nde hua renano ye tah ye nduhca che chihco cade ihyan chahn.

³ Ndahconan Dihvo vo, ne rahn ye ri ye sahn chahn:

—Me nchuhn ne, hua ndahca che rahcotahn ne vederihquentiyon yahn Dendiohs, riquendi ne costumbre yahn man ne.

⁴ Dendiohs ne, rihquentiyon ye tuhca: “Codin yahine chide man, cheque ye man.” Namin rihquentiyon ye: “Ihyan che cahva ye yahn indihite yahn ye ne, va che cahno ihyan yan ihyan.”

⁵ Ate nchuhn ne, rethyon yune ne ihyan che cahma ye co ye indihite yahn ye: “Hua co conán nchuhn, te nducuahne che va yahn ne, a cah ndudo yahn che co vedino nan Dendiohs.”

⁶ Nduco tihca ne, rethyon yune ne ihyan che cuacondah vedame ye indihite yahn ye. Rendahco ndiya nchuhn vederihquentiyon yahn Dendiohs, ricuahn ne costumbre yahn man ne.

⁷ ¡O nan o chende nchuhn! Redinahn niyon ne nduhca che rahn Dendiohs, dirun ihyan profeta Isaías tuhca:

⁸ Ihyan sih ne, dendudo no che rendeva ye yavenán, ate nde tah hua ritahno ye u.

⁹ Nde tah hua richihve che rendeva ye yavenán, te ricuahn ye vederihquentiyon yahn man ye, redin ca ye che vederihquentiyon yahn.

¹⁰ Tuhme cah Dihvo vo nducoyaca ihyan chahn nan ye, ne rahn ye:

—Cuihcovan nchuhn man, conahn tin ne man, che cahma.

¹¹ Che chendihco ihyan nunde ne, ndiyu cava dehtenduh che reh ye, te cava ndudo chihnga che rente ye.

¹² Tuhme chahn nda ihyan apóstol, ne rahn ye ri ye ihyan:

—¿A tumacadino ne che chi yudo yahn sahn fariseo sih yahn ndudo che tihca rahn ne ne?

¹³ Ndahconan ye, ne rahn ye ri ye ihyan chahn:

—Nducuahne vederihquentiyon che ndiyu man Chidá che va ye vahchetero chihco cade ye ne, va che cuihno anduhneca ama yahn che retico ihyan nde dihyoduto.

¹⁴ Din ca man se, te sahn sih ne, anduhneca sahn nan ve che quendanan se sahn nan ve chenahn, cora nun nducoyaca se chete ive yahn.

¹⁵ Rahn Pedro ri ye Dihvo vo:

—Te cuande ne nuhn deh conahn che nte ne yahn che chendihco ihyan nunde.

¹⁶ Ndahconan Dihvo vo, ne rahn ye:

—¿Taca che namin nduco nchuhn hua renahn ne?

¹⁷ ¿A hua devano ne te nducuahne che reh ihyan ne, vacochendereh yahn ye renun? Chemin ne, rechuh cuahn chete ye, ne rendiquendah.

¹⁸ Ate ndudo chihnga che rente ihyan ne, rente ye yahn che chihnga rendecadino ye, ne nduco chemin chendihco ye nunde.

¹⁹ Tihca, te nan vederendedecadino yahn ihyan reconan che chihnga rendecadino ye man, che rihno ye vih man, che rahtenan ye nduco ndahca che hua nihnevaco nduco ye man, che reduco ye man, che rihnech ye man, ndere ricueh dame ye nunde ihyan man.

²⁰ Nunde chemin chan redin che rinda ihyan. Ate che cheh ihyan andahre hua reñano ye tãh ne, ndiyu nunde chemin.

Nduhca che chitahno ama tãhn tãma naci3n

²¹ Chica Dihvo vo min, ne cuahn ye yãhn yahn yãn Tiro nduco yãn Sidon,

²² ne ama tãhn ndata yahn ihyan cananea, che va te yãhn min ne, cuahn te cuãhn ñan cuahn ye, ca rica te ca rãhn te numa dito te:

—Dihvé, Daya David, conan vahino ne u. Tãhn dayá ne, quenun ama vaco chihngã tãhn, ne ama rechuhrihn te.

²³ Ate hua tumecãh ye yahn te. Tuhme rãhn ihyan ap3stol ri ye ihyan:

—Cotumacãh ne tãhn, te ama rah te cochi te cuãhn vedãmo vo.

²⁴ Tuhme ndahconan Dihvo vo, ne rãhn ye:

—Dendiohs ne, dechuh ye u çava che conán ihyan naci3n yahn Israel che a ndinda ye, din nune yahn ye.

²⁵ Ate tãhn min ne, chahn ndã te, chehntihya te ñan ye, ne rãhn te ri te ihyan:

—Dihvé, ¡cuinan ne u!

²⁶ Rãhn ye ri ye tãhn:

—Hua redin yahn che conán di, te anduhneçã ndete che cahneví pãn che va che cheh ihyan naci3n yãhn, çãh yãhna.

²⁷ Ndahconan te, ne rãhn te:

—Dihvé, cuaçã che rãhn ne. Ate yãhna ne, namin reh te, te rendevãhn te ðache che ra mãn mesa yahn dihve te. Nducote tihçã ne, ricá favor ndih che conan ne tah u.

²⁸ Tuhme rãhn ye ri ye tãhn:

—Daya, ¡ama numa ine ritehne! Conahn ndoque nduhca che rique.

A ura min no ndiquendañ vaco chihngã me tãhn ðaya te.

Dihvo vo Jesucristo ne, din ye che ndoyahn ama yãhn ihyan cah

²⁹ Ndãca Dihvo vo min ne, ntã ye chihto vine yahn Galilea. Tuhme cocha ye ama tingüete, ne min chihnde ye.

³⁰ Ama yãhn ihyan chi ðama ye ñan ye. Nda ihyan chahn ama yãhn ihyan cah, ihyan che cueh çãh ye man, ihyan che neneva doh tãh ye mãn, ihyan che ve ñan ye mãn, ihyan che lihme ye mãn, yãhn ca ihyan che ndí ye tãma te o ñan cah mãn, ne din Dihvo vo che ndoyahn nducoyãca ye.

³¹ Ama chahn ino ihyan che ndihchero che ndoyahn nducoyãca ihyan cah chahn, ne ndeva ye yavenãñ Dendiohs, ihyan min che nda cuande ye ihyan naci3n yahn Israel.

Çãh Dihvo vo Jesucristo, cheh cun mil ihyan

³² Chihno min ne, cah Dihvo vo ihyan ap3stol yahn ye, ne rãhn ye ri ye ihyan:

—Ama renan vahino ihyan sih, te a ino ro che chenãn ye nduco vo, ne metah dehva che cheh ye. Hua nahn ndedechúh ihyan che diya chete ye, te denãñ cotãh cuno ihyan cuãhn yune.

³³ Rãhn ihyan ap3stol chahn ri ye ihyan:

—Ate muhn yãhn ñan che metah ðuhva. ¿Ti ngua vo che çãh vo cheh ihyan sih?, te ama yãhn ye.

³⁴ Tumerune ye ihyan chahn:

—¿Tãva pãn va yahn nchuhn ne?

Ndahconan ihyan chahn:

—Va ndache pãn yahn nuhn mãn, ama o yãhca çãhya mãn.

³⁵ Tuhme chihquentiyon Dihvo vo che chahte nducoyãca ihyan ndiyãhn.

³⁶ Chetah ye nduh che ndache pan chahn nduco yahca chahn, quetuhma ye, ne necah ye nundihve cuahn Dendiohs. Tuhme ndeh ye, cah ye ihyan apóstol chahn çava che cuih ye van ihyan.

³⁷ Cheh nducoyaça ihyan chahn nde nan che chito ihyan. Chihno min ne, nedin dama ye cheyahn che ngava, ne decuto ye ndache cuahte.

³⁸ Ihyan che cheh ye ne, ri ye cun mil che deman ihyan çahn, avane ihyan ndahta man, cheçahya man.

³⁹ Chihno min ne, ndedechuh Dihvo vo ihyan chahn, ne quenun ye chete ama barco, cuahn ye cuahn yahn yahn van Magdala.

16

Sahn fariseo nduco sahn saduceo ne, rica se ama vederihno ndihchero se

¹ Ama o sahn fariseo nduco sahn saduceo ne, chahn se chendihchero se Dihvo vo. Sahn chahn ne, returamande se ihyan, ne chica se che din ye ama vederihno, ndihchero se, çava che co devano se che Dendiohs dechuh ye ihyan.

² Ndahconan ye, ne rahn ye ri ye sahn:

—Cuahn che a ri çhino ne, ndete che cuah nan ro ne, rahn nchuhn te ndahca din ro.

³ Me vateyan ne, ndete che cuah nan ro man, man man ne, rahn ne te cuan co. Nchuhn ne, jo nan o chende ne! Ama ndah nda cuande ne taça ri nan ro, ate hua retumacardino ne yahn vederihno che redin Dendiohs man ro cuh.

⁴ Ihyan che vate ye man ro cuh ne, ama duhtuno ihyan ye, nde hua retumacah ye Dendiohs. Rica ye vederihno ndihchero ye, ate atenan ama vederihno nduhca vederihno che din Dendiohs nduco ihyan profeta Jonás ndaca ndihchero ye.

Chihno rahn ye chemin ne, chihcoman ye sahn chahn, ne chica ye min.

Vededeivano yahn sahn fariseo ne, nduhca ya yahn pan

⁵ Cuahn che tuche ihyan chahn vine me ne, ntã tin ihyan apóstol chahn che hua nda ye pan.

⁶ Ura min rahn Dihvo vo nduco ye:

—Cuihco nchuhn cudado. Hua tumacah ne yahn ya yahn sahn fariseo man, sahn saduceo man.

⁷ Tuhme ndedecardino ihyan chahn, ne rahn van man ye nduco vih:

—Tihca rahn ye ri ye uvo yahn che hua quenda vo pan.

⁸ Checardino Dihvo vo che hua chenahn ihyan chahn che rahn ye. Deyahn che hua nda ye pan ndedecardino ye. Chemin che rahn ye ri ye ihyan chahn:

—¿Dehco che rendedecardino nchuhn che hua nda ne pan? ¿Taça che hua numa ino ne ritahno ne?

⁹ ¿Taça che hua renahn ne, nde hua rahtenun ino ne vederihno che rendihchero ne? Cuahn che cah, cheh uhn mil ihyan nduco uhn pan me ne, ¿taça che hua chahtenun ino ne che nde cade cuahte che ngava nedin dama ne?

¹⁰ A namin no tun cuahn che cah, cheh cun mil ihyan nduco ndache pan me ne, ¿taça che hua chahtenun ino ne che nde cade cuahte che ngava nedin dama ne?

¹¹ ¿Taça che hua chenahn nchuhn che ndiyu yahn pan che rahn nduco ne? Rahn nduco ne che cahco ne cudado yahn ya yahn sahn fariseo man, sahn saduceo man.

¹² Tuhme chenahn ihyan chahn che a yahn ndudo che ricuahn sahn chahn che tihca rahn ye.

Rahn Pedro te Dihvo vo Jesucristo ne, a ihyan min che va çade che chi ye ndedevahn ye ihyan iyehñse

13 Cuahn che nda Dihvo vo yahn yahn yan Cesarea de Filipo ne, tumerune ye ihyan apóstol yahn ye:

—U che rinducó nducoyaca ihyan, ¿deh rahn ihyan yáhn ne?

14 Ndahconan ihyan chahn:

—Nahn ihyan ne, rahn ye te ndih che Juan Bautista. Nahn tun ye ne, rahn ye te ndih che Elías. Nahn tun ye ne, rahn ye te ndih che Jeremías o tama cha ihyan profeta che chahte ye a rahn me.

15 Tuhme tumerune ye ihyan chahn:

—Me nchuhn ne, ¿deh rahn ne yáhn ne?

16 Ndahconan Simón Pedro, ne rahn ye ri ye ihyan:

—Ndih ne, a ihyan che va çade che chi ye ndedevahn ye ihyan iyehñse, a ndih che Daya Dendiohs, ihyan min che va ye vahchetero.

17 Rahn Dihvo vo ri ye ihyan:

—Ndah ro yehn, Simón, daya Jonás, te a man Chidá che va ye vahchetero te ye checadine, ndiyu ihyan iyehñse.

18 Rahn rí di te redin yahn che doche Pedro, te che tihça doche ne, conahn che ama ndudo redin. Cuahto min quendi ihyan yáhn, ne nde vederihquentiyon yahn chundah hua co ndahco ndiya ihyan.

19 U ne, té vederihquentiyon di çava che conan van ihyan che rihquentiyon Dendiohs. Cha che çah yone che din ye man, cha che çahca tan che hua din ye man ne, Dendiohs ne, çah dito ye ndudo yehn.

20 Tuhme rahn Dihvo vo nduco ihyan apóstol chahn che hua çahma ye nduco nde ama ihyan che a man ye che va çade che chi ye ndedevahn ye ihyan iyehñse.

Rahn Dihvo vo Jesucristo te va che çahno se ihyan

21 Nde tañn min canan Dihvo vo çah ye che checadino ihyan apóstol yahn ye te va che çahn ye yan Jerusalén, ne min ama chuhrin ye. Ndo dama intiyahn man, chidocuyan ndinan man, sahn devano ley che dirun Moisés man, din tan se nduco ye, nde çahno se ihyan. Ate cuihno ino ro ne, ntuche ye.

22 Tuhme quenda Pedro ihyan ama lado, ne canan riyahve ye ihyan, ne rahn ye:

—Dihvé, hua ndahça che çahco mendahn ne ndih çava che tihça cuahno co ne.

23 Ndaconan Dihvo vo ndihchenun ye nan Pedro. Chihya ye ihyan, ne rahn ye:

—Di chundah, cuehn vane, te redin vahche yáhn. Di ne, hua devene cha che rihquentiyon Dendiohs. Atenan che rihquentiyon ihyan iyehñse devene.

24 Tuhme rahn Dihvo vo ri ye ihyan apóstol chahn:

—Adecoduhno ihyan che nahn co cuande ye van ihyan yáhn ne, va che çahcoman ye vedeyeno man ye. Andahre va che conan yah ye nan ama cruz, ate va che çahco mendahn ihyan, conduco ye u.

25 Tihça, te ihyan che hua nahn çahco mendahn ye ihyan çava che conduco ye u ne, va che conda ye, ne ihyan che çahco mendahn ye ihyan ne, andahre din tan ihyan nduco ye, çahno ye ihyan, ate ndevahn ye, cuahtenan ye vahchetero.

26 Hua cochihve yahn ihyan andahre nedin dama ye nducuahñ vedecuihca che va iyehñse ndete che chemin din che denda ye, ne hua co cuahtenan

ye vahchetero. Ndete che tihcā ne, metah deh nduco nedihve ye cava che ndevahn ye.

²⁷ Va che conahn chemin, te u che rinducó nducoyaca ihyan ne, va che chí numacuahn vederihquentiyon yahn Chidá nduco ángel yáhn, ne techecadé yahn nducoyaca ihyan, ndahco menún yahn queri ama ye tunoca che nedin ye, ndahtenan ye iyehñse.

²⁸ Cuāco ráhn rí nchuhn te ama o ihyan che chenun ye muhn ne, vate ca ye iyehñse ndā ro min, ne ndihchero ye u che rinducó nducoyaca ihyan cuahn che ndā numacuahn vederihquentiyon yáhn.

17

Dihvo vo Jesucristo ne, ndo diyáhn ye

¹ Chihno an ro min ne, quenda Dihvo vo Pedro man, Jacobo nduco dihno ye Juan man, ne cuahn ye nduco ihyan chahn ama tingüete yaco,

² ne min ndo diyáhn ye nan ihyan chahn. Yavenan ye man, tino yahn ye man ne, ama diyáhn ro nduhca nan yáhn.

³ Ura min ndihchero ihyan apóstol chahn Moisés nduco Elías che rente ye nduco Dihvo vo.

⁴ Tuhme ráhn Pedro ri ye Dihvo vo:

—Dihve nuhn, ama ndahca che cuahtenan vo muhn. Ndete che nahn ne ne, dendah nuhn ino vache vah; ama nan che conun ne, tama nan che conun Moisés, ne tama nan che conun Elías.

⁵ Numanahn che ráhn ca Pedro ne, quendihco ama man tuno diyáhn ro nan che chenun ihyan chahn, ne van man me ne, chenun ama ndudo che ráhn tuhca:

—Sahnguh che Dayá. Yahinó sahn. Ama yenó cava se. Che cahma se ne, chemin che codinahn nchuhn.

⁶ Cuahn che chihnevan ihyan apóstol chahn ndudo me ne, ama dihya ye chi, ne chahtetave ndih ye ndiyáhn.

⁷ Tuhme chahn ndā Dihvo vo nan ihyan chahn, nahn tah ye ihyan, ne ráhn ye ri ye ihyan:

—Cuenecuan nchuhn. Hua dihya ne co.

⁸ Cuahn che ndo nihyon nan ye ne, ametah ndihchero ye ihyan che o chahn, a deman Dihvo vo.

⁹ Ura che cuenchahn ye cuete me ne, chihquentiyon Dihvo vo ihyan chahn, ne ráhn ye:

—Hua cahma nchuhn nduco nde ama ihyan yahn vederihno che ndihchero ne, nde ro che u che rinducó nducoyaca ihyan ntuché van tenáhn.

¹⁰ Tuhme tumerune ihyan apóstol chahn Dihvo vo, ne ráhn ye:

—¿Deh cuande che ráhn sahn devano ley che dirun Moisés che dinoca Elías va che chí ye ne?

¹¹ Ndahconan ye, ne ráhn ye ri ye ihyan chahn:

—Cuāco che va che chí Elías, ndahco cade ye nducuahn.

¹² Ate ráhn rí nchuhn te a ndā Elías, ne ihyan ne, hua nevahñecun ye ihyan. Tahque ndah ye ne, din tan ye nduco ye. Namin u che rinducó nducoyaca ihyan ne, va che chuhríhn, din tan ihyan nducó.

¹³ Tuhme tumacadino ihyan apóstol chahn che rente ye yahn Juan Bautista anduhñecā ndete che a ihyan min che Elías.

Din Dihvo vo Jesucristo che ndoyahn qma sahn dihn che ndi se cahrih dihca

¹⁴ Cuahn che ntā ihyan chahn nan che chenun ihyan chenáhn ne, chahn ndā ama se, chehntihya se nan Dihvo vo, ne ráhn se ri se ihyan:

15 —Dihvé, conan vahino ne sahn dayá, te ndi se cah rih dihca, ne ama rechuhrihn se. Ama ndeh yune cuahn che rinuhn yahn se ne, rendañnun se vacoyahn man, van nune man.

16 A checú sahn nan ihyan apóstol yahn ne, ate hua chi din ye che ndoyahn se.

17 Tuhme rahn Dihvo vo:

—Nchuhn che vate ne man ro cuh ne, duhtuno ihyan nchuhn man, hua ritahno ne man. Nchuhn ne, a hua nda ro che co ne ihyan. ¿A cuahn dama quendañ vedechahtino nduco ne, che rahco ne? Checú ne sahn muhn.

18 Sahn dihn me ne, quenun ama vaco chihnga sahn. Cuahn che nda se nan ye ne, chihquentiyon ye che ndiquendañ vaco chihnga me, ne ndetañno ndoyahn se.

19 Ura che a deman ye ne, tumerune ihyan apóstol chahn Dihvo vo:

—¿Dehra cuande che hua chi ndetendañ nuhn vaco chihnga me ne?

20 Ndahconan ye, ne rahn ye ri ye ihyan chahn:

—Nchuhn ne, nde hua ritahno ne, te cuaco rahn rí nchuhn te ndete che ritahno ne mare tahsihn ne, cahcantiyon ne ama ico che caça nan che va, ne cuhnde tama cuahn, ne dinahn. Ndete che ritahno ne ne, adecodehno che caça ne ne, conahn nduco ne.

21 Rahn rí nchuhn te cava che ndetendañ vo vaco chihnga chemin chan ne, va che covah vo man, cuahto vo yahte man.

Rahn Dihvo vo Jesucristo tama yune che va che cahno se ihyan

22 Numanahn che quechica Dihvo vo nduco ihyan apóstol yahn ye estado yahn Galilea ne, rahn ye ri ye ihyan chahn:

—U che rinducó nducoyaca ihyan ne, va che necah ihyan u tah sahn nunde,

23 ne cahno se u. Ate cuihno ino ro ne, ntuché van tenahn.

Ama chi ndache ihyan chahn yahn che tihca rahn ye.

Dihvo vo Jesucristo ne, nedihve ye cade iyo yahn yaco

24 Cuahn che nda ihyan chahn van Capernaum ne, chahn sahn che rica se tume cade iyo yahn yaco, tumerune se Pedro:

—¿A hua renedihve ihyan ricuahn yahn nchuhn tume cade iyo yahn yaco ne?

25 Ndahconan Pedro, ne rahn ye ri ye sahn:

—Taca hua, renedihve ye.

Ndonda Pedro chete vah ne, menan vihca tumerune Dihvo vo ihyan:

—Deh rahn Simón, ihyan che rihquentiyon ye ne, ¿duh rica ye tume cade iyo ne? ¿A ihyan nación yahn ye o ihyan tama nación ne?

26 Ndahconan Pedro, ne rahn ye ri ye ihyan:

—Rica ye ihyan tama nación.

Rahn Dihvo vo ri ye ihyan:

—Tuhme ne, ihyan nación yahn ye ametah va che nedihve ye.

27 Ate cava che hua din vo che co tan nde ama ihyan ne, cuehn nan vine, ne cotihyen cu ra yahca. Ite che cua te ne, cuentah chende te, ne min ntaque ama tume. Nduco chemin cuenedihve cade iyo yahn man, yehn man.

18

Duh che tahque conan

1 Chihno min ne, ndo dama ihyan apóstol chahn nan Dihvo vo, ne tumerune ye ihyan:

—¿Duh che tahque conan van ihyan che rihquentiyon Dendiohs ne?

² Tuhme cah Dihvo ama lihn, chihno ye mendahn,

³ ne rahn ye ri ye ihyan chahn:

—Cuaco rahn ri nchuhn te ndete che hua nto ino ne nunde yahn ne, co ne nduhca checahya che tuhchan che necun ne, hua co cuahtenan ne vahchetero nan che rihquentiyon Dendiohs.

⁴ Cuedevano ne te adecoduhno ihyan che necun ye nduhca lihn cuh ne, ihyan min che tahque conan ye van ihyan che rihquentiyon Dendiohs.

⁵ Namin cuedevano ne te adecoduhno ihyan che nevahnecon ye ama ihyan yahn che necun ye nduhca lihn cuh ne, a u nevahnecon ye.

Cahnda yahn ihyan che rahtendihco ye nunde

⁶ Adecoduhno ihyan che tihyon yune ye ihyan yahn che cuahtendihco ye nunde ne, ama chahte castigo va che co ye. Tahque ndahca cava ye ndete che caca yaho ihyan ama tu yudo chahte dando ye, ne cuacondahnun ye ihyan van nuniyahn, yudomin ca che tihyon yune ye ihyan yahn che cuahtendihco ye nunde.

⁷ ¡Chevah ihyan ihyense!, te a cade no che va che cuahtendihco ye nunde. Ate ¡tahque vedin ihyan che tihyon yune ye ihyan che cuahtendihco ye nunde!

⁸ Ndete che renda yahn ne che cuahtendihco ne nunde, ne va che dinahn ne nduco tah ne o nduco cah ne ne, tahque ndah che din ne cuande anduhneca ndete che a chihca ne, chacondah ne, te tahque ndahca yahn ne ndete che co cuahtenan ne vahchetero andahre yuhche ne, yudomin ca che ndah tah ne, ndah cah ne, cuahtenan ne van ruchiyahn cuahn dama.

⁹ Ndete che cava ndutinan ne renda yahn ne che cuahtendihco ne nunde ne, tahque ndah che din ne cuande anduhneca ndete che a tico ne, chacondah ne, te tahque ndah yahn ne ndete che co cuahtenan ne vahchetero andahre hua ro nan ne, yudomin ca che ndah ndutinan ne, cuahtenan ne van ruchiyahn.

Ejemplo yahn itecuche che chinda te

¹⁰ Cuihco nchuhn cudado che hua ndahchenan ne nde ama ihyan che necun ye nduhca checahya che tuhchan, te angel yahn ne, cuahn dama chenah ye nan Chida che va ye vahchetero.

¹¹ Tihca, te u che rinduco nducoyaca ihyan ne, nda ndedevahn ihyan che a ndinda ye, nedin nunde yahn ye.

¹² Rahn ri nchuhn te ama ihyan che va ama ciento itecuche yahn ye ne, ndete che conda ama te van chano ne, cahcoman ye ite che chenahn chahn van chano nan che redin ye cudado ite, ne cah ye quenuhn ye ite che chinda me.

¹³ Cuahn che ntaca ye ite ne, cuaco rahn ri nchuhn te nde tahque co yeno ye cava ite min che co cava ite che chenahn chahn.

¹⁴ Tihca Chida nchuhn che va ye vahchetero, te hua nahn ye che conda nde ama ihyan che necun ye nduhca checahya che tuhchan.

Nduhca che va che nchahco ihyan yahn vih

¹⁵ Ndete che ama ihyan che namin ritahno ye din tan ye nduco ama cha nchuhn ne, coyahve ne ihyan cuahn deman ne nduco vih. Ndete che nto ino ye nunde yahn ye ne, a ndedevahn ne ihyan yahn castigo che va che co ye.

¹⁶ Ate ndete che hua tumacah ye che cahma ne ne, conuhn ne ama o testigo cava che nduco ihyan chahn yahve ne ihyan.

¹⁷ Ate ndete che nde nduco tihca hua tumacah ye ne, cahma ne nduco ihyan ndiyaco cava che van nducoyaca ne yahve ne ihyan. Ate ndete che

hua tumacah ye ne, co din ne cuande anduhneca ndete che nde hua devano ye che va Dendiohs.

¹⁸ Cuaco rahn ri nchuhn te nducuahn che nte cade ne ne, cah dito Dendiohs ndudo yahn ne.

¹⁹ Namin rahn ri nchuhn te ndete che co dama ndudo ama o ne, caca ne deh che nahn ne Chida che va ye vahchetero ne, te ye nchuhn.

²⁰ Te ye nchuhn, te nan che ndo dama o ino ihyan ndeva ye yavenan ne, min quenun van ye.

²¹ Tuhme chahn nda Pedro, ne rahn ye ri ye Dihvo vo:

—Dihvé, za ndeh yune va che nchahco yahn ihyan che quendi ye din tan ye nduco ne? ¿A nde ndache yune ne?

²² Ndahconan Dihvo vo, ne rahn ye ri ye ihyan:

—Ndiyu atenan ndache yune, te a nduh va ndeh yune che din tan ye ne, a tih va ndeh yune va che nchehque yahn ye.

Ejemplo yahn ama sahn che metah vederenchahco nan se

²³ Vederihquentiyon yahn Dendiohs ne, nduhca ama rey che tendah cuande ye yahn sahn che redin ntiyon nduco ye.

²⁴ Cuahn che canan tendah cuande ye ne, nda ama se tendah cuande ye yahn se, ne quendihco ndeh se yahn ye, tenduh ndiche mil tume diyahnguan.

²⁵ Nducote metah deh nduco che nedihve se ne, chihquentiyon ye sahn decahya yahn ye che ndihcue se sahn man, ndihcue se ndahata yahn se man, daya se man, nducuahn dehtenduh yahn se man, cava che ndutonun tah che quendihco se yahn ye.

²⁶ Tuhme chehntihya se nan rey me, ne rahn se: “Dihvé, codin chahtino ne yahn, ne nedihvé yahn ne.”

²⁷ Quenan vahino ye sahn, ne numacuahn vedeyeno tehche ino ye nducuan che quendihco se.

²⁸ Ate ura che conahn se ntaca se ama combiero yahn se che quendihco ye ino cun cade yahn se. Dihno se dando ye, ne rahn se ri se ihyan: “Cuenedihve che quendihque yahn.”

²⁹ Chehntihya ye nan se, ne rahn ye: “Codin chahtine yahn, ne nedihvé yehn.”

³⁰ Ate hua cahnecon se. Tahque ndah se ne, chahn se chica nunde se yahn ye, ne quenun ye vacoyahn nde chihno nedihve ye yahn se.

³¹ Ndihero combiero yahn se che tihca din se, ne ama chi tan ye, chahn ye chengo ye rey me.

³² Tuhme tahve rey me che chehua sahn, ne chihya ye sahn: “Di ne, ama duhtuno ihyan di. U ne, nchahco yehn yahn nducuahn che quendihque yahn, te chique favor u.

³³ ¿Taca che hua tihca quenan vahine combiero yehn nduhca che quenan vahino di?”

³⁴ Numacuahn vedetan chihquentiyon ye che conun se vacoyahn nde chihno nedihve se che quendihco se.

³⁵ Quendi Dihvo vo, ne rahn ye ri ye ihyan chahn:

—Namin nchuhn, ndete che hua nchahco ne yahn vih numacuahn che-dave yahn ne ne, cuahno ne nduhca che chahno sahn min, te Chida che va ye vahchetero ne, hua nchahco ye yahn ne.

19

Dihvo vo Jesucristo ne, chicuahn ye nduhca che rihquentiyon Dendiohs che hua tehche ihyan ndahta yahn ye

¹ Cuahn che chihno nte Dihvo vo ne, chica ye min estado yahn Galilea, cuahn ye estado yahn Judea, tama lado viche ico Jordán,

² ne ama yahn ihyan cuahn ye nduco ye. Cuahn che nda ye min ne, din ye che ndoyahn ihyan cah.

³ Tuhme nda ama o sahn fariseo che nahn tumarande se ihyan, ne tumerune se:

—¿A co tehche ihyan ndahta yahn ye cava adecodehno ne?

⁴ Ndahconan Dihvo vo, ne rahn ye ri ye sahn:

—A devano nchuhn nduhca che a ndirun nan Ndudo yahn Dendiohs tuhca: “Cuahn che dendah Dendiohs iyehense ne, dendah ye ihyan chahn man, ihyan ndahta man.”

⁵ Namin ndirun tuhca: “Ihyan chahn ne, cahcoman ye indihnte yahn ye, ne cahnevaco ye, conan cuma ye ndahta yahn ye. Ihyan chahn ne, din yahn ye vih anduhneca ndete che ama no ye.”

⁶ Nducote tihca ne, ametah din ye cuande che o ye, te anduhneca ndete che ama no ye. Nducote a man Dendiohs nahn ye che cuahtenan cuma ihyan chahn vih ne, hua redin yahn che tehche ye vih.

⁷ Rahn sahn chahn ri se ihyan:

—Ndete che tihca ne, ¿deh cuande che cah yune Moisés che tehche ihyan ndahta yahn ye, dirun ye ama caca cah ye tahn?

⁸ Rahn Dihvo vo ri ye sahn:

—Yahn che cheche chedave yahn ihyan ne, chemin che cah yune Moisés che tehche ye ndahta yahn ye. Ate Dendiohs ne, hua tihca chihco cade ye cuahn che dendah ye iyehense.

⁹ U ne, rahn ri nchuhn te ihyan che ndere tehche ye ndahta yahn ye ndiyu yahn nunde che quenat te nduco tama chahn, ne cahnevaco ye nduco tama te ne, redin duche yahn ye che nihnevaco ye. Namin sahn che cahnevaco se nduco tahn che ntehche inchahn te tahn ne, condihco se nunde.

¹⁰ Tuhme rahn ihyan apóstol ri ye Dihvo vo:

—Ndete che tihca va cade yahn ihyan chahn ne, tahque ndah ye che nde hua cahnevaco ye.

¹¹ Rahn Dihvo vo ri ye ihyan chahn:

—Hua nducoyaca ihyan co dinahn ye yahn chemin, te atenan ihyan che necah Dendiohs vederihquentiyon ihyan che co dinahn ye.

¹² Vate chahn che hua numa ye, te a tihchan ye nde rahteyan ye. Namin vate ye che hua numa ye yahn che ihyan redin yoh ye ihyan. Namin vate ye che hua rahtenan cuma ye ndahta cava che hua co vahche yahn ye nan ntiyon yahn Dendiohs. Ihyan che retumacadino che co dinahn ye che cuahteman ye ne, ndahca che dinahn ye.

Dihvo vo Jesucristo ne, nahn tah ye chechaha, covah ye cava

¹³ Chihno min ne, nda ihyan, nda ye chechaha yahn ye cava che nahn tah Dihvo vo, ne covah ye cava. Ate ihyan apóstol ne, rahva ye nduco ihyan chahn.

¹⁴ Tuhme rahn Dihvo vo ri ye ihyan:

—Hua cahca tan nchuhn che chi chechaha sih nan, te a ndi cuande van ihyan che necun ye che cuahtenan ye vahchetero nan che rihquentiyon Dendiohs.

15 Chihno rahn ye chemin ne, nahn tah ye checahya chahn, covah ye cava. Tuhme chica ye min, cuahn ye.

Ama sahn cuihca ne, nte se nduco Dihvo vo Jesucristo

16 Ura min nda ama sahn yuno nan Dihvo vo, ne rahn se:

—Ihyan Ricuahn Ndah, ¿deh ndah che din cava che conan vahchetero ne?

17 Ndahconan ye, ne rahn ye ri ye sahn:

—Nde hua redin yahn che cahme, Ihyan Ricuahn Ndah, te atenan Dendiohs ne, ihyan min che ndah ye. Cava che conen vahchetero ne, codinehn vederihquentiyon yahn ye.

18 Tumerune se ihyan:

—¿Cha vederihquentiyon me ne?

Ndahconan Dihvo vo, ne rahn ye ri ye sahn:

—Vederihquentiyon che tuhca: “Hua cahne ihyan man, hua din duche yehn che nihnevaque man, hua doque man, hua ndere cahma nonde yahn ihyan man,

19 cuende va yavenan chide man, cheque man, codin yahine nducoyaca ihyan nduhca che yahino man di man.”

20 Rahn se ri se ihyan:

—Nducuahñ vederihquentiyon che tihca ne, redinahñ nde ro che lihn ca u. ¿A va ca che dinahn ne?

21 Rahn Dihvo vo ri ye sahn:

—Che cuahtenan ihyan vahchetero ne, tahque rigonun chihve che co vedecuihca. Cava che hua co vahche yehn che tone min ne, cuendihcue dehtenduh yehn che va, ne cuinen ihyan chevah. Tuhme cochi condoque u.

22 Nducote ama cuihca se ne, hua quenan ino se che tihca rahn Dihvo vo nduco se, ne ama chi ran se conahn se.

23 Tuhme rahn Dihvo vo nduco ihyan apóstol:

—Cuaco rahn ri nchuhn te ama vahche cava ihyan cuihca che conda ye vahchetero nan che rihquentiyon Dendiohs.

24 Ndaconan rahn ri nchuhn te nde ama ihyan cuihca ne, hua co conda ye vahchetero nan che rihquentiyon Dendiohs.

25 Che rahn ye chemin ne, ama cuahn ino ihyan apóstol chahn, ne rahn ye van man ye nduco vih:

—Ndete che tihca ne, nde ama ihyan hua co ndevahn ye.

26 Chaconan Dihvo vo ndihchero ye ihyan chahn, ne rahn ye:

—Che tin deman ihyan ne, hua conda ye vahchetero. Atenan Dendiohs co din ye che min tuno ihyan, te Dendiohs ne, ri redin ye nducuahñ.

27 Tuhme rahn Pedro ri ye ihyan:

—Dihve nuhn, me nuhn che chihcoman nuhn nducuahñ, chinduco nuhn ndih ne, ¿deh co nduco nuhn ne?

28 Rahn Dihvo vo ri ye ihyan chahn:

—Cuaco rahn ri nchuhn te cuahn che a nuhnde cade nducuahñ, ne u che rinduco nducoyaca ihyan cuhndé nan che rihquentiyon numacuahn vedeyudo ne, namin nchuhn che rinduco ne u ne, cuahte ne techecade ne yahn nduh che ndichio ndata yahn ihyan nación yahn Israel.

29 Namin adecoduhno ihyan che va che cahcoman ye dehtenduh yahn ye man, ihyan yahn ye man, cava che co conduco ye u ne, nuhnde menun ama ciento yahn queri ama che cahcoman ye, a vaco ye, a dihno ye, a cahve ye, a chida ye, a chaco ye, a ndahta yahn ye, a daya ye, a yahn yahn ye, ate nunde menun ama ciento yahn queri ama che cahcoman ye. Avane ne, conan ye vahchetero numacuahn ro.

³⁰ Nda ro min ne, ndiyu yahn che a rahn chitahno ihyan che tahque quenda yavenan ye, nde huane yahn che cade chitahno ye che hua nduh quenda yavenan ye.

20

Ejemplo yahn sahn redin ntiyon

¹ Vederihquentiyon yahn Dendiohs ne, nduhca ama patron che chahn ye ama vatiyan chenuhn ye mozo cava che tuhn se uva yahn ye.

² Ndaça ye neve se, ne nte cade ye nduco se che din se ntiyon cade ro, ne dechuh ye sahn nan ntiyon yahn ye.

³ Chahn tun ye tenduh nan rahco nun vatiyan, ne ntaça ye te neve se che vatechica se cuahn ndihve, metah ntiyon din se.

⁴ Rahn ye ri ye sahn: "Cuahn nchuhn codin ne ntiyon yahn, conduco ne sahn chenahn che a chenah se min, ne nedihve nchuhn nduhva che redin yahn." "A," rahn se, ne cuahn se.

⁵ Chahn tun ye tenduh nan mahn yahn. Ntaça ye te neve se, dechuh ye sahn nan ntiyon me. Chahn tun ye tenduh nan rahco ino. Ntaça ye te neve se, ne namin dechuh ye sahn.

⁶ Ndaconan chahn tun ye tenduh nan rahco uhn, ne ntaça ye te neve se, ne rahn ye ri ye sahn: "¿Dehco che hua din nchuhn ntiyon man ro ne?"

⁷ Ndahconan se, ne rahn se ri se ihyan: "Hua din nuhn ntiyon, te hua ndaça ntiyon din nuhn." Rahn ye ri ye sahn: "Cuahn nchuhn din ne ntiyon yahn tuhme, ne nedihve nchuhn nduhca che redin yahn." "A," rahn se, ne cuahn se.

⁸ Chi chino me ne, rahn ye ri ye mandador yahn ye: "Cuenedin dame sahn mozo sih, ne cuenedihve yahn se, cuanan nduco sahn che nda adive cuahn."

⁹ Cuahn che chenda sahn che a nde nan rahco uhn a chino canan din se ntiyon ne, ndonda tah se chihve yahn se yahn numa ro.

¹⁰ Nde nan chihnonan yahn ne, chenda sahn che din se ntiyon numa ro, ne ndedecadino se che tahque ndahva nedihve ye sahn, ate a dama no nedihve ye sahn.

¹¹ Cuahn che ndihchero se che a dama no nevihve sahn nduco sahn chenahn chahn ne, rahn nunde se nduco patron yahn se,

¹² ne rahn se ri se ihyan: "Sahn sih che atenan ama ura no din se ntiyon ne, ¿deh cuande che dama nedihve ne sahn nduco nuhn che chahtenun nuhn van yan numa ro, din nuhn ntiyon?"

¹³ Ndahconan ye, ne rahn ye ri ye sahn: "A devano che redin. A numa nedihve yahn nchuhn nduhca che a nte cade vo.

¹⁴ A nedihve yahn nchuhn. Tahque ndah ne ne, conahn ne. A man va vedeyeno che tihdenan, nedihve yahn sahn chuhn. U ne, codin nduhca che nahn nduco tume yahn.

¹⁵ Nchuhn ne, hua cuande yahn ne che quenah cumá vedevahino nduco se."

¹⁶ Atihnoça no tun ro che cuhnde cade yahn nducoyaca ihyan, te ndiyu che a rahn chitahno ihyan che tahque quenda yavenan ye, nde huane che a cade chitahno ye che hua nduh quenda yavenan ye. Tihca, te van nducoyaca ihyan che nahn Dendiohs che cotahno ye ne, atenan neve ra ye che tendahnun Dendiohs ihyan cava che ndevahn ye.

Ndaconan rahn Dihvo vo Jesuscristo che va che cahnno se ihyan

¹⁷ Cuahn che a quenun yune Dihvo vo cuahn ye yan Jerusalen ne, quenda ye nduh che ndichio ihyan apostol devavih, ne rahn ye ri ye ihyan:

18 —A devano nchuhn, che man ne, chenun yune vo, cuhn vo yan Jerusalén. U che rinducó nducoyaca ihyan ne, necah ihyan u tah chidocuyan ndinan man, sahn devano ley che dirun Moisés man, ne cuih nunde se yahn cava che cahno ihyan u.

19 Necah se u tah sahn tama nación cava che din duche yahn se u man, cuahn se u man, nahn yah se u man. Ate cuihno ino ro ne, ntuché van tenahn.

Chaco Jacobo man, Juan man ne, chica ye che conan daya ye

20 Chihno min ne, chahn nda ndahta yahn Zebedeo nduco nduh che o daya ye, Jacobo man, Juan man. Chehntihya ye nan Dihvo vo, ne chica ye favor ihyan.

21 Tumerune Dihvo vo ihyan:

—¿Deh nehn ne?

Rahn ihyan ndahta me:

—Ríca ndih che cuahnecon ne che cuahte nduh che o dayá dama nduco ne cuahn che a va ne nan rihquentiyon ne. Ama se ne, cuhnde se lado tah cuaco ne, ne tama se ne, cuhnde se lado tah cuéh ne.

22 Ate rahn Dihvo vo ri ye ihyan chahn:

—Nchuhn ne, nde hua renahn ne deh che rica ne. ¿A cocha ne chuhrihn ne nduhca che va che ama chuhrihn ne?

Ndahconan ihyan chahn, ne rahn ye:

—Taca hua. Cocha nuhn.

23 Rahn Dihvo vo ri ye ihyan chahn:

—Cuaco te va che chuhrihn nchuhn nduhca che va che ama chuhrihn, ate che cuahte ne chihto nan ne, ndiyu u che cahcantiyón, te a Chidá che cahcantiyon ye, ne a man ye devano ye cha ihyan che cuahte ye chihto nan.

24 Chihnevan ihyan apóstol chenahn chahn, ne chi tan ye nduco ihyan che o chahn.

25 Tuhme cah Dihvo vo nducoyaca ye, ne rahn ye ri ye ihyan:

—Nchuhn ne, a devano ne te ihyan ndinan yahn queri ama nación ne, ama yudo rihquentiyon ye, ne sahn che rinan se ihyan ne, rendinun rendinahn se ihyan yahn ye.

26-27 Ate van nchuhn ne, hua co tihca, te adecochano ne che nahn conan ne ne, va che co ne nduhca ama mozo, conan ne vih.

28 U che rinducó nducoyaca ihyan ne, cuiquendi ne yune yahn, te u ne, ndá, ndiyu cava che conan ihyan u, ate cava che conan man ihyan, ne cahco mendahn u cava che ndedevahn ama yahn ihyan.

Din Dihvo vo Jesucristo che chi ro nan o sahn nan ve

29 Cuahn che chica Dihvo vo yan Jericó nduco ihyan apóstol yahn ye ne, ama yahn ihyan nduco ye ihyan.

30 Chihto yune vate o sahn nan ve, ne cuahn che chihnevan se che a nda nino Dihvo vo ne, riyahve se ihyan numa dito se:

—Dihve nuhn, Daya David, jconan vahino ne nuhn!

31 Rahva ihyan nduco se cava che cuahtedihn chende se, ate nde tahque yudo nan se rahn se:

—Dihve nuhn, Daya David, jconan vahino ne nuhn!

32 Tuhme chan ndi Dihvo vo. Cah ye sahn, ne tumerune ye sahn:

—¿Deh nahn nchuhn che din cava ne ne?

33 Ndahconan se, ne rahn se ri se ihyan:

—Dihve nuhn, nahn nuhn ne che din ne che co ro nan nuhn.

34 Quenan vahino ye sahn, ne nahn tah ye ndutinan se. Ndetahn chi ro nan nduh che o se, ne cuahn se chinduco se ihyan.

21

Nda Dihvo vo Jesucristo yan Jerusalén

¹ Cuahn che a nda nino ihyan chahn yan Jerusalén ne, nda ye chihto ama yan lihn che duche Betfagé, nino cuete Olivo. Min tahve Dihvo vo o ihyan apóstol yahn ye,

² ne rahn ye ri ye ihyan:

—Cuahn nchuhn viyan, ne min ntaca ne ama burro che quenan chiche te, nduco te daya te. Cuentahte ne ite, ne cuiquenda ne ite.

³ Ndete che va duh ihyan che cahma ye deh din ne burro tih, rentahte ne ite ne, cahma ne co ne ihyan: “Dihve nuhn nahn ye ite, ne ndetahno ndedechuh ye ite.”

⁴ Tihca chi cava che conahn nduhca che dirun ihyan profeta tuhca:

⁵ Cahma nchuhn co ne ihyan che vate ye yan Jerusalén:

“Con dihchero nchuhn che cochi Rey yahn ne.

Ama necun ye, ne quendudo ye ama burro lihn.”

⁶ Dinahn ihyan apóstol chahn che chihquentiyon Dihvo vo.

⁷ Chehua ye burro me nduco daya te, ne tihde ye tino yahn ye dame te. Cocha Dihvo vo ite, ne quendi ye cuahn ye.

⁸ Ama yahn ihyan nduco ye, ne nahn ye ne, rentave ye tino yahn man, nahn ye ne, rentave ye yata cue man, rendedecuco ye numa yune cuahn nan che cuahn Dihvo vo.

⁹ Nducoyaca ihyan che ndahn nan ye man, ihyan che chenun ive ye man ne, ama yeno ye, ne rah ye tuhca:

—¡Ndeva vo yavenan ihyan cuh che quenan cuma ye vederihquentiyon che quenan cuma ihyan ndico yahn ye David! ¡Dechuh Dihvo vo Dendiohs ihyan! ¡Ndeva vo yavenan Dendiohs!

¹⁰ Cuahn che chenda Dihvo vo yan Jerusalén ne, canan nducoyaca ihyan ndo dama ye. Ama vari ye, ne nahn ye tumerune ye:

—¿Duh ihyan tih che nda ye ne?

¹¹ Nahn ye ne, ndahconan:

—Ihyan cuh che profeta Jesucristo che chica ye yan Nazaret, estado yahn Galilea.

Dihvo vo Jesucristo ndetendah vah ye sahn che chenun se chete yaco rendihcue se

¹² Chenda Dihvo vo chete yaco, ne ndetendah vah ye nducoyaca sahn che chenun se min rendihcue se man, ra se man. Chi muhn chi min ye mesa yahn sahn che rendahcorun se tume man, silla yahn sahn che rendihcue se icui man,

¹³ ne rahn ye ri ye sahn:

—Nan ndudo yahn Dendiohs ne, ndirun tuhca: “Yaco yahn ne, cava che cuahtenun ihyan covah ye”, ate nchuhn ne, nedin ne anduhneca vah nan che rendo dama sahn duco.

¹⁴ Chihno min ne, chahn nda ama o sahn nan ve man, sahn che cueh cah man, nan Dihvo vo min chete yaco, ne din ye che ndoyahn se.

¹⁵ Nducoyaca checahya che chenun min ne, ama yeno, ne rah tuhca:

—¡Ndeva vo yavenan ihyan cuh che quenan cuma ye vederihquentiyon nduhca che quenan cuma David!

Chidocuyan ndinan nduco sahn devano ley che dirun Moisés ne, ama chi tan se che din Dihvo vo vederihno man, che rah checahya chahn rendeva yavenan ye man,

¹⁶ ne rahn se ri se ihyan:

—¿Taca che recah yune ne che tihca rendeva checahya sih yavenan ne?
Ndahconan Dihvo vo, ne rahn ye ri ye sahn:

—Recah yune, te a tihca va che conahn. A devano nchuhn te a ndirun nan Ndudo yahn Dendiohs tuhca: “Chihco cade ne che checahya man, decuah man ne, ndeva yavenan ne nduhca che redin yahn.”

¹⁷ Chihcoman ye sahn chahn, ne chica ye min. Cuahn ye yan Betania, ne min quenan ye vino min.

Dihvo vo Jesucristo ne, din dine ye ama yahn higo

¹⁸ Chi dave tama ro me, ura che quenun yune Dihvo vo che cuahn tun ye yan Jerusalen ne, chi cuico ye.

¹⁹ Ndihero ye ama yahn higo chihto yune, ne chahn ye ndihero ye ndete che chenandute yahn. Ate metah nde ama ndute yahn, deman yata chenandute. Tuhme din dine ye yahn me, ne rahn ye:

—Ametah ndaconan co ndute yehn.

A ura min no tih yahn me.

²⁰ Cuahn che ndihero ihyan apostol chahn che tih yahn me ne, ama cuahn ino ye, ne tumerune ye Dihvo vo:

—¿Taca che ndetahno tih yahn higo cah ne?

²¹ Ndahconan ye, ne rahn ye ri ye ihyan chahn:

—Cuaco rahn ri nchuhn te ndete che ritahno ne man, hua rihco yahn ino ne man ne, nde vederihno che tahque rahte co din ne. Co cahcantiyon ne ico tih che cahndahno van nuniyahn, ne dinahn.

²² Ndete che ritahno ne ne, nducuahn che caça ne Dendiohs ne, conahn nduco ne.

Vederihquentiyon che quenan cuma Dihvo vo Jesucristo

²³ Ura che nda Dihvo vo ne, chenda ye chete yaco, ne canan ricuahn ye. Numanahn min ne, chahn nda chidocuyan ndinan nduco sahn intiyahn, ne tumerune se ihyan:

—¿Duh te vederihquentiyon ndih che din ne dehtenduh che tihchan ne?

²⁴ Ndahconan Dihvo vo, ne rahn ye ri ye sahn:

—Namin va ama nan che tumerune nchuhn. Dinoca ndahconan ne chemin, tuhme co nchuhn duh te vederihquentiyon che tihca redin:

²⁵ ¿Duh dechuh Juan che chehdenune ye, a Dendiohs o ihyan iyehne ne?

Ate canan rentuhno se van man se nduco vih:

—Ndete che cahmo vo che Dendiohs dechuh ye Juan ne, cahma ye co ye uvo: “¿Me dehco che hua chitahno nchuhn che cahndudo ye tuhme?”

²⁶ Me ndete che cahmo vo che ihyan iyehne dechuh ye ihyan ne, co tan ihyan yan nduco vo, te nducoyaca ye ritahno ye che Ndudo yahn Dendiohs cahndudo ye.

²⁷ Tahque ndah se ne, rahn se ri se Dihvo vo:

—Hua devano nuhn.

Tuhme rahn ye ri sahn:

—Namin u ne, hua co nchuhn duh te vederihquentiyon che tihca redin.

Ejemplo yahn sahn cahya che rahcotahn

²⁸ Quendi Dihvo vo, ne rahn ye ri ye sahn ndinan chahn:

—Nte ama ejemplo, cahnevan nchuhn. Ama ihyan ne, vate o daya ye, ne rahn ye ri ye ama se: “Man ro ne, cuehn ton uva yuhn vo.”

²⁹ Ndahconan se, ne rahn se: “Hua cahñ.” Ate adiva ne, nto ino se che tihca rahn se, ne cuahn se din se ntiyon che chihquentiyon chida se.

³⁰ Numanahn min ne, rahn ye nduco sahn che tama me che cahñ se din se ntiyon min. Sahn min ne, rahn se ri se ihyan: “Taca hua, chidá, cahñ.” Ate hua dinahn se.

³¹ ¿Cha sahn chahn dinahn se che chihquentiyon chida se ne?

Ndahconan sahn ndinan chahn, ne rahn se:

—Sahn che yahve ye menan me.

Tuhme rahn Dihvo vo ri ye sahn:

—Cuaco rahn ri nchuhn te nduhca sahn che hua dinahn me ne, tihchan nchuhn, te rahcotahn ne yahn vederihquentiyon yahn Dendiohs. Vederihquentiyon yahn ye ne, tahque nun dinahn sahn rica tume cade iyo man, tahn ndere vatechica man, che co nchuhn.

³² Juan Bautista ne, chicuahn ye ihyan nduhca che runecade cuahtechica ye, ne nevahnecon sahn chahn man, tahn chahn man, ate nchuhn ne, chahcotahn ne, nde hua nto ino ne andahre ndihchero ne che nevahnecon ihyan nunde chahn.

Ejemplo yahn sahn redin ntiyon che duhtuno ihyan se

³³ Cuihnevan nchuhn tama ejemplo: Ama ihyan ne, chihche ye dihyo uva nan yahn yahn ye, ne din ye chahn yahn man, dendah ye ama tanque nan che cuhno ye nune yahn uva me man, chahto ye ama chete nan che din ye cudado ntiyon min man. Cuahn che chihno chihco tahn ye nducuahn ne, ndahco ye chendata me tah ama o sahn che din se ntiyon nduco. Tuhme chica ye min, cuahn ye.

³⁴ Cuahn che a nda ro che a rine uva ne, dechuh ye sahn decahya yahn ye cava che necahn man sahn chahn uva me nduco ye.

³⁵ Ate sahn redin ntiyon chahn ne, tumangan se sahn decahya chahn yahn ye, ne ama se ne, chahn se sahn, ne tama se ne, chihno se sahn, ne tama se ne, cah se tu sahn.

³⁶ Ndaconan dechuh ye tahque yahn sahn decahya yahn ye, ne a namin no tun din tan sahn redin ntiyon chahn nduco se anduhneca che din se menan.

³⁷ Nan chihnonan yahn ne, dechuh ye sahn daya ye, te rahco ye te nevahnecon sahn chahn sahn.

³⁸ Ate cuahn che ndihchero sahn chahn daya ye ne, ntuhno se nduco vih, ne rahn se: “Sahn tih che cuhnde tah se ntiyon cuh. Cahno vo sahn, ne cahnevi vo yahn se.”

³⁹ Tumangan sahn chahn sahn, quenda se sahn cuahn chihto, ne chihno se sahn.

⁴⁰ Tuhme rahn Dihvo vo ri ye sahn ndinan chahn:

—Cuahn che nda dihve chendata me ne, ¿deh din ye nduco sahn redin ntiyon chahn ne?

⁴¹ Ndahconan sahn chahn, ne rahn se ri se ihyan:

—Numacuahn vedetan decuihno ye sahn chahn, ne cah ye chendata me tama te o sahn redin ntiyon che necahn man se ndute ndata me nduco ye nda ro yahn.

⁴² Namin rahn Dihvo vo ri ye sahn ndinan chahn:

—A devano nchuhn nduhca che a ndirun nan Ndudo yahn Dendiohs tuhca:

Tu che hua quenan ino sahn vihcherahto ne, chemin che tahque chichihve.

Chemin ne, a man Dendiohs chihco cade ye, ne ama ndahca che tihca din ye.

⁴³ Nducote racondah vedame nchuhn u ne, a rendo dama ne nduco sahn vihcherahto chahn. Chemin che cahnevi Dendiohs vederihquentiyon yahn ye che va tah ne, ne ndahco ye tah ihyan che dinahn ye.

⁴⁴ Che racondah vedame ihyan u ne, anduhneca ndete che condah ndudo ye nan yava, ndaca yah ye, ne ihyan che din castigo ihyan ne, anduhneca ndete che condah ndudo ama yava ihyan, cuihno ndeh ye.

⁴⁵ Chidocuyan ndinan chahn man, sahn fariseo chahn man ne, chenahn se che a yahn se che nte Dihvo vo ejemplo me.

⁴⁶ Chemin che nahn tumangan se ihyan, ate hua chihquino se. Vah se ihyan yan, te nducoyaca ye ritahno ye che Dendiohs dechuh ye ihyan.

22

Ejemplo yahn che rihnevaco daya rey

¹ Quendi Dihvo vo, ne nte ye tama ejemplo, chihnevan sahn chahn:

² —Vederihquentiyon yahn Dendiohs ne, a nahn nduhca ama rey che din ye vihco decahnevaco daya ye.

³ Dechuh ye sahn decahya yahn ye ngua se ihyan che a ndiyahve ye che conduco ye nan vihco me, ate hua chahn ihyan chahn.

⁴ Ndaconan dechuh ye tama te o sahn decahya yahn ye, ne rahn ye nduco se: “Cahma nchuhn co ne ihyan chahn che a chihno itenine, ne a va yan che cheh ye. Din nun ino ye chi ye.”

⁵ Ate a namin no tun hua tumacah ihyan chahn. Ama ye ne, cuahn ye nan yahn yahn ye, tama ye ne, cuahn ye nan ntiyon yahn ye,

⁶ ne ihyan chenahn ne, tumangan ye sahn decahya chahn, chahn ye sahn, nde chihno ye sahn.

⁷ Tuhme ama chi tan rey me, ne dechuh ye sandado yahn ye chihno se ihyan chahn, chihquiyahn se yan vaco ye.

⁸ Chihno min ne, rahn ye nduco sahn decahya yahn ye: “A va yan nducuahñ cava che cuanan vihco. Ate ihyan chahn ne, ama duhtuno ihyan ye, nde hua rihnevahn che chi ye.

⁹ Tahque ndah ne, cuahn nchuhn cuahn yune viyan, muhn min nan che ri dama ihyan, ne coyahve ne nducoyaca ihyan che ntaca ne cava che chi ye conduco ye.”

¹⁰ Dinahn sahn decahya chahn, ne quenda se quendihconahn nducoyaca ihyan che ntaca se, hua tumacah se tachan ihyan ye. Nduco tihca ne, ama yahn ihyan chito vah ye.

¹¹ Tuhme chenda rey me chete vah me, ne ndihchero ye ama sahn che nduco se min. Hua quenun se tino nduhca che rahtenun ihyan che rahn ye nan rihnevaco ihyan,

¹² ne rahn ye ri ye sahn: “Amigo, itaca che chenda muhn?, te hua quenon tino che redin yahn che conon.” Sahn min ne, nde nan che cahma se metah.

¹³ Tuhme chihquentiyon rey me sahn che rinan se nan vihco me: “Cuiquiyahno nchuhn nde tah nde cah sahn tih, cuetendah vah ne sahn, cuacondahnun ne sahn nan che man. Min cuaco se man, cheh dihyon se man.”

¹⁴ Tuhme rahn Dihvo vo ri ye sahn ndinan chahn:

—Tihca, te ama yahn ihyan riyahve Dendiohs che cuatenan ye vahchetero, ate ama doh ihyan che co cuatenan ye min.

Tumerune sahn fariseo yahn cade iyo

¹⁵ Tuhme conahn sahn fariseo chahn, ne ntuho se nduco vih cava che nuhn ino se taca co caca nunde se yahn Dihvo vo.

¹⁶ Dechuh se ama o combiero yahn se nduco tama te o sahn partido yahn Herodes, ne rahn se ri se Dihvo vo:

—Ihyan Ricuahn, ndih ne, ndudo cuāco che rente ne man, ricuahn ne numa cuāco vederihquentiyon yahn Dendiohs man, nde hua rendahchenan ne ihyan, te dama no rendihche ne nducoyāca ye.

¹⁷ Deh rahn ne: ¿A redin yahn che nedihvo vo cade iyo che rica emperador yahn Roma o hua ne?

¹⁸ Dihvo vo ne, a devano ye che retumarande sahn chahn ihyan, ne rahn ye ri ye sahn:

—Nchuhn ne, o nan o chende ne. ¿Dehco che retumarande ne u?

¹⁹ Cuete ne ama tume che renehive nduco ne cade iyo, ndihcheró.

Nahme se ama tume chemin chan ihyan.

²⁰ Ndhichero ye tume me, ne tumerune ye sahn:

—¿Duh ihyan che quenān yavenān ye man, che duche ye man, nan tume cuh ne?

²¹ Ndahconan se, ne rahn se:

—Emperador yahn Roma.

Tuhme rahn Dihvo vo ri ye sahn:

—Cha che rihquentiyon emperador ne, condinahn nchuhn, ne cha che rihquentiyon Dendiohs ne, namin codinahn ne.

²² Ama cuahn ino se che tihca rahn ye, ne conahn se nduco vih.

Tumerune sahn saduceo yahn che ntuche tenahn

²³ A ro min no chahn ama o sahn saduceo chendihchero se Dihvo vo. Sahn chahn ne, hua ritahno se che va che ntuche tenahn, ne chemin che rahn se ri se ihyan:

²⁴ Ihyan Ricuahn, Moisés ne, dirun ye te ndete che coh inchahn ama ndahta che hua ndaca daya ye ne, va che cahnevāco dihno tenahn me nduco tahn min cava che cahco ndata se menun dihno se.

²⁵ Ama yune ne, chahte ndache sahn yan vāco nuhn che dihno se vih. Chihnevāco sahn menān me, ne cuahn che chih se ne, hua ndaca se nde ama daya se nduco ndahta yahn se. Chemin che chihnevāco tama dihno se nduco tahn min.

²⁶ Ate namin chih se, ne hua ndaca daya se nduco te. Atihnoça nde chenan chih nduh che ndache se che chahtenan cuma se tahn min. Nde ama se hua ndaca daya se nduco te.

²⁷ Nde nan chihnonan yahn ne, namin chih tahn min.

²⁸ Nducote nduh che ndache sahn chahn chahtenan cuma se tahn min ne, nda ro che ntuche tenahn ne, ¿cha se che inchahn te ne?

²⁹ Ndahconan Dihvo vo, ne rahn ye ri ye sahn:

—Nchuhn ne, hua ritahno ne che va che ntuche tenahn, te hua renahn ne Ndudo yahn Dendiohs, nde huane vederihquentiyon yahn ye.

³⁰ Nda ro che ntuche tenahn ne, ametah cuahtenan cuma ihyan vih, nde huane ihyan ndahta, nde huane ihyan chahn. Ro min ne, ndo ye nduhca ángel che vate ye vahchetero.

³¹ Me yahn che va che ntuche tenahn ne, a ndero ndi che nde hua renahn nchuhn Ndudo yahn Dendiohs che ndirun, nan che rahn ye tuhca:

³² “U che Dendiohs yahn Abraham man, yahn Isaac man, yahn Jacob man.” Che tihca rahn ye ne, a ndero ndi che a ihyan min che Dendiohs yahn nducoyāca ihyan, ihyan che vate ca ye man, ihyan che a ndih ye man, te nan ihyan min ne, chenduche nducoyāca ihyan.

³³ Nducoyāca ihyan che chihnevan ye che tihca rahn Dihvo vo ne, ama cuahn ino ye yahn vededevano yahn ye.

Vederihquentiyon yahn Dendiohs che tahque menān vihca

³⁴ Checadino sahn fariseo chahn che ndahco ndiya Dihvo vo sahn saduceo chahn, ne ndo dama se, nan ye.

³⁵ Van sahn chahn quenun ama sahn devano ley che dirun Moisés, ne cava che tumarande se Dihvo vo ne, tumerune se ihyan:

³⁶ —Ihyan Ricuahn, ¿cha vederihquentiyon nan ley yahn Dendiohs che tahque menan vihca ne?

³⁷ Ndahconan ye, ne rahn ye ri ye sahn:

—“Codin yahine Dihve Dendiohs numacuahn chedave yehn man, numa ine man, numacuahn vederendecadino yehn man.”

³⁸ Vederihquentiyon min che menan vihca.

³⁹ Namin va tama vederihquentiyon yahn ye, che a nahn dama che tuhca: “Codin yahine nducoyaca ihyan nduhca che yahino man di.”

⁴⁰ Nan nduh che o vederihquentiyon che tuhchan ne, rendo dama nducuah che dirun Moisés man, ihyan profeta man.

Ihyan che a va cade che chi ye ndedevahn ye ihyan iyehse ne, ¿duh che Chidaye?

⁴¹ Numanahn che ndi dama ca sahn fariseo chahn ne,

⁴² tumerune Dihvo vo sahn:

—Ihyan che va cade che chi ye ndedevahn ye ihyan iyehse ne, ¿deh rahn nchuhn yahn ye ne? ¿Duh daya ihyan min ne?

Ndahconan se, ne rahn se:

—Ihyan min ne, daya David.

⁴³ Tuhme rahn ye ri ye sahn:

—Ndete che atenān daya David ihyan min ne, ¿taca che din Vaco Ndah yahn Dendiohs che nevahnecon David ihyan nduhca Dihve ye?, dirun ye tuhca:

⁴⁴ Rahn Dihvo vo Dendiohs ri ye Dihve:

“Cuihnde chihto nan, lado tah cuaco, numanahn che ndahco ndiyā ihyan che hua ri rendihche di cava che nevahnecon ye di.”

⁴⁵ Nducote man David dirun ye che ihyan min che Dihve ye ne, hua cuaco che atenān daya ye ihyan.

⁴⁶ Nde ama sahn chahn hua ntaquino se deh che ndahconan se yahn ye, ne nde ro min ametah chihquino se tumerune ca se dehtenduh ihyan.

23

Dihvo vo Jesucristo ne, ndevih ye nunde yahn sahn fariseo vacoan se

¹ Tuhme rahn Dihvo vo nduco ihyan che chenun ye min man, ihyan apóstol yahn ye man, tuhca:

² —Sahn fariseo man, sahn devano ley che dirun Moisés man ne, ntaḥ se ntiyon che ricuahn se ley min.

³ Cuenevahnecon nchuhn che ricuahn se, ate hua quendi ne yune yahn se, te sahn chahn ne, a vih ricuahn se, ne a vih redin se.

⁴ Ama ndeh nan rihquentiyon se che dinahn ihyan, ate man se ne, nde tah hua redinahn se.

⁵ Nducuah che redin se ne, atenān cava che cuihnde ro vederihquentiyon che chenān cuma se. Tahque rahno cinta che chenān chata se man, reche se man, tahque rahno tino che chenun se man, che co ihyan chēān.

⁶ Renan ino se rahte se nan silla che rahte ihyan ndinān nan vihco man, chete yaço man.

7 Namin renan ino se che numacuahn vedeneacun necah ihyan Dendiohs sahn van ihyan man, cahma ye ihyan ricuahn yahn se man.

8 'Ate nchuhn ne, hua cahma ne ihyan ricuahn yahn vih, te nducoyaca ne ne, dihno ne vih, ne va ama no Ihyan Ricuahn yahn ne, ihyan min che va cade che ndedevahn ye ihyan iyeahnse.

9 Hua cahma ne chida ne yahn ihyan iyeahnse, te va ama no Chida ne, ihyan min che va ye vahchetero.

10 Namin hua cahma nchuhn ihyan ndinan yahn vih, te va ama no Ihyan ndinan yahn ne, ihyan min che va cade che ndedevahn ye ihyan iyeahnse.

11 Ihyan che conan ye van nchuhn ne, co ye nduhca decahya yahn ne.

12 Tihca, te ihyan che rendahco ndiya ye ihyan chenhahn, nahn conan ye ne, nuhnde ndiya ye, ne ihyan che ndahco ndiya man ye ihyan ne, conan ye.

13 'Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te redin vahche ne yahn ihyan che nahn nevahnecun ye vederihquentiyon yahn Dendiohs. Hua renevahnecun man ne, nde hua retihyon yune ne ihyan che nevahnecun ye.

14 'Nchuhn sahn fariseo man, sahn devano ley che dirun che Moisés man, jo nan o chende ne! ¡Chevah nchuhn!, te rehnevi ne dehtenduh yahn ndahta vah, ne cava che hua cuhnde ro vede idihya yahn ne ne, ama rahn revah ne redin ca ne. Nducote tihca redin ne ne, tahque chahte castigo va che co ne che co ihyan chenhahn.

15 'Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te ama nahn ne che co yahn ihyan che cotahno ye dama nduco ne. Ate cuahn che renda ne ama ye ne, retihyon yune ne ihyan che ama duhtuno ihyan ndacondā ye, che nde tahque redin yahn che co ye castigo van ruchiyahn che co man ne.

16 'Nchuhn ne, anduhneca sahn nan ve che nahn quendanan se sahn nan ve nduco se. ¡Chevah nchuhn!, te ricuahn ne ihyan: "Ndete che cah ne ndudo yahn ne che ntihyon yan ne yaco ne, andahre hua dinahn ne dehve din yahn. Ate ndete cah ne ndudo yahn ne che ntihyon yan ne diyahnguan che va chete yaco ne, chemin che cuaco, quenan cuma che dinahn ne."

17 ¡Tundo nchuhn! ¡Hua renahn ne! Tahque rignonun chihve yaco, te min ri vihco diyahnguan che va chete.

18 Namin ricuahn ne: "Ndete che cah ne ndudo yahn ne che ntihyon yan ne nan ta ne, andahre hua dinahn ne dehve din yahn. Ate ndete che cah ne ndudo yahn ne che ntihyon yan ne vedino che va nan ta ne, chemin che cuaco, quenan cuma che dinahn ne."

19 ¡Tundo nchuhn! ¡Hua renahn ne! Tahque rignonun chihve nan ta, te min ri vihco vedino che va menan.

20 Tihca, te cuahn che recah ihyan ndudo yahn ye che rentihyon yan ye nan ta ne, nde nduco nducuahn che va menan ne, rentihyon yan ye.

21 Namin cuahn che recah ye ndudo yahn ye che rentihyon yan ye yaco ne, nde Dendiohs rentihyon yan ye, te a yaco yahn ye chemin.

22 Namin cuahn che recah ye ndudo yahn ye che rentihyon yan ye vahchetero ne, nde Dendiohs rentihyon yan ye, te a ihyan min che rihquentiyon min.

23 Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te renehve ne riya yahn ive man, yahn anis man, yahn camino man, ate vederihquentiyon yahn Dendiohs che tahque menan vihca ne, hua retumacah ne yahn, te hua runecade vatechica ne man, hua chenan cuma ne vedevahino man, hua ritahno ne man. Che nahn

ne, che quendihconahn dinahn ne vederihquentiyon yahn Dendiohs, hua cahcoman ne nde ama.

²⁴ Nchuhn ne, anduhneca sahn nan ve che nahn quendanan se sahn nan ve nduco se. Ama rededecadino ne yahn dehtenduh che nde hua nduh rigonun chihve, ate che tahque rigonun chihve ne, nde hua retumacah ne yahn.

²⁵ Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te nchuhn ne, anduhneca vaso man, cuh man, che dave cuahn vedame, ate cuahn chete ne, ndito dehtenduh che chihnga. Tihchan nchuhn, te nan ihyan ne, redin ca ne che ndah ihyan ne, ate che cuaco ne, reduco ne man, redin idihya ne man.

²⁶ Nchuhn sahn fariseo che hua renahn ne, che rahco ne che retihyon yune ne ihyan che quendi ye yune yahn Dendiohs, dinoca cuento ino ne nunde yahn ne, cuihcoman ne dehtenduh che chihnga redin ne, tuhme che cuaco dave yavenan ne.

²⁷ Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te redin ca ne che ama ndah ihyan ne, ate ama duhtuno ihyan ne.

²⁸ Tihchan nchuhn, te andahre rahco ihyan che ama ndah ihyan ne, ate o nan o chende ne man, ama duhtuno ihyan ne man.

²⁹ Nchuhn sahn fariseo man, sahn devano ley che dirun Moisés man, jo nan o chende ne! ¡Chevah nchuhn!, te rahto ne yayan yahn ihyan profeta man, rededecuco ne yayan yahn ihyan che runecade chahtenan ye iyehns man,

³⁰ ne ndere rahn ne nduco vih: “Ndete che uvo che a vato vo ro che chihno ihyan ndico yuhn vo ihyan profeta chahn ne, hua dama chi vo nduco ye.”

³¹ Nduco ndudo che tihca rahn ne ne, rihco ro ne che dama ne nduco ihyan chahn che chihno ye ihyan profeta.

³² ¡Cuiquendi ne yune yahn ihyan ndico yahn ne cava che din numa ne ntiyon che canan ye!

³³ Nchuhn ne, nduhca cu tan tihchan ne. Nde hua co ndevahn ne yahn castigo che va che co ne van ruchiyahn.

³⁴ Chemin che va ca che dechuh ihyan che cuahndudo ye Ndudo yahn Dendiohs man, ihyan devano man, ihyan ricuahn man. Ate nchuhn ne, cahno ne ama o ye, ne tama te o ye ne, conahn yah ye ihyan. Tama te o ye ne, cuahn ne ihyan chete yaco man, quendah ne ihyan nduh yan nduh yan man.

³⁵ Nduco tihca cuehdame nchuhn yun yahn nducoyaca tenahn che nde hua chendihco ye nunde che chihno ihyan ndico yahn ne nde a rahn me, canan nduco yun yahn Abel nde yun yahn Zacarías, daya Berequías, che chihno ne mendahn yahn yaco nduco nan ta.

³⁶ Rahn cuaco ri nchuhn te nducuahn nunde min ne, ndehdame nducoyaca nchuhn che vate ne man ro kuh.

Dihvo vo Jesucristo ne, chaco che quenan vahino ye ihyan yan Jerusalén

³⁷ Nchuhn ihyan yan Jerusalén che rihno ne ihyan profeta man, rechah ne tu ihyan che redечuh Dendiohs rahndudo ye ye ndudo yahn ye van ne man, ama ndeh yune nda che nahn nedin damá nchuhn, din cudado nchuhn nduhca che redin chaco tuh cudado daya te man reche te, ate hua nevahnecun ne.

³⁸ Cuedevano nchuhn te yan vaco ne ne, cuhndeman.

³⁹ Rahn ri nchuhn te ametah ndaconan ndihchero ne u nde nda ro che cahma ne tuhca: “Ndeva vo yavenan ihyan kuh che dechuh Dihvo vo Dendiohs ihyan.”

24

Rahn Dihvo vo Jesucristo te ndora yaco yahn yan Jerusalén

¹ Ndiquendah Dihvo vo chete yaco che a nahn ye. Ura min ndo dama ihyan apóstol yahn ye, ne nahme ye yaco me ihyan, rente ye nduhca che ama ndahca ndahto.

² Tuhme rahn Dihvo vo ri ye ihyan chahn:

—Cuencahco nchuhn che ndihchero ne chete che tihchan tih. Cuaco rahn ri nchuhn te nda ro che cuihno ndora, metah nuhnde nde o tu che ndahto vih.

Nduhca che va che co cuahn che nda nino ro che nto iyehanse

³ Chihno min ne, cuahn Dihvo vo nduco ihyan apóstol cuete Olivo. Cuahn che a chenun ye min ne, chahn ihyan apóstol chahn nan va Dihvo vo, ne rahn ye ri ye ihyan deva vih:

—Nahn nuhn che te cuande ne nuhn, ticuahn conahn che rahn ne me. ¿Deh vederihno co ro cuahn che ndaconan chi tun ne man, cuahn che nto iyehanse man ne?

⁴ Ndahconan Dihvo vo, ne rahn ye ri ye ihyan chahn:

—Cuihco nchuhn cudado cava che nde ama ihyan hua cahnceh ye nchuhn,

⁵ te va che nda ama yahn se din ca se che chenah cuma se vederihquentiyon yahn, ne cahma se che a man se ihyan che a va cade che chi ye ndedevahn ye ihyan iyehanse. Ama yahn ihyan cahnceh se ihyan.

⁶ Ro min ne, cahnevan ne che a muhn a min va canda man, che cuanan canda man, ate hua cua ne cudado, te a tihca va che co. Cuedevano ne te andahre ama cahnda ro min, ate condah ca che nto iyehanse.

⁷ Ihyan ama nación ne, cuhma ye nduco ihyan tama nación man, a muhn a min cuhnde cuico man, cuhnde cah man, nuhn yahn man.

⁸ Nducuahn vedeyah chemin chan ne, cade nan che cuanan che chuhrihn ihyan.

⁹ Nda ro min ne, caça nunde ihyan yahn nchuhn, din tan ye nduco ne, nde cahno ye nchuhn. Nducoyaca ihyan iyehanse ndihche tan ye nchuhn yahn che ritahno ne u.

¹⁰ Cuahn che tihca co ne, ama yahn ihyan cahcoman ye che ritahno ye, ne ndihche tan ye vih man, caça nunde ye yahn vih man.

¹¹ A muhn a min quendah ama yahn sahn che din ca se che Dendiohs dechuh ye sahn, ne cahnceh se ama yahn ihyan.

¹² Ama duhtuno ndacondah ihyan che nde ihyan che ndah ihyan ye ametah cuahtenan cuma ye vedeyahino nduco vih.

¹³ Ate ihyan che quendi ye cotahno ye nde cuihno nducuahn vedeyah min ne, ihyan chahn che ndevahn ye.

¹⁴ Me ndudo ndah yahn vederihquentiyon yahn Dendiohs ne, cuahndudo ihyan numachahte iyehanse, nde conan cadino nducoyaca ihyan yahn nducuahn nación, tuhme che nto iyehanse.

¹⁵ Ihyan profeta Daniel ne, dirun yahn ama nan che ama chihnga che redetohnan. Condedecadino ndah ne yahn. Cuahn che ndihchero ne che a nti chemin chete yaco cuahn nan ta ne,

¹⁶ nducoyaca ihyan che vate ye estado yahn Judea ne, tahque ndah che ndetahno cano ye cuahn ico yahn.

¹⁷ Ihyan che chenun ye tin vah yuto yahn ye ro min ne, tahque ndah che hua condah ye condah ye chete vah cava che cotah ye dehtenduh yahn ye.

18 Me ihyan che chenan ye viyata ne, tahque ndah che a nde min no cano ye, hua tihyon ye ura nahñ ye viyan cava tino yahn ye.

19 Chevah ndah̄ta che adeche cuacoyahn te ro min man, tahn che retave te decuah man!

20 Covah nchuhn cuica ne Dendiohs che hua ro iche co venecuino min, nde huane ro che rahte tuhno ihyan,

21 te ro min che cuahno ihyan venecuino che hua nahno ihyan nde ro che canan iyehñse, nde metah ndaconan cuahno ye adiva.

22 Ndete Dendiohs din ye che rahn cuhnde venecuino min ne, nde ama ihyan hua ndevahn ye. Ate hua cuahñecun ye che rahn cuhnde cava che co ndevahn ihyan yahn ye che a tendahnun ye.

23 Nda ro min ne, ndete che cahma ihyan co ye nchuhn: “Condihe nchuhn, muhn quenun ihyan min che a va cade che chi ye ndedevahn ye ihyan iyehñse,” o “Condihe ne, min quenun ye” ne, hua cotahno ne,

24 te ama yahn se cahnecheh se ihyan, din ca se che a sahn chahn che a va cade che ndedevahn se ihyan iyehñse man, che Dendiohs dechuh ye sahn man. Van vederihñcheh yahn se ne, din se vederihno, cahñcheh se nde ihyan che a tendahnun Dendiohs ndete che co.

25 A menañ vihca rete cuandé nchuhn cava che a devano ne.

26 Chemin che ndete che cahma ihyan co ye nchuhn: “Min yahn nan che metah duhva quenun ye” ne, hua cañ ne. O ndete che cahma ye: “Condihe ne, muhn chete vah quenun ye” ne, hua cotahno ne.

27 A devano ne te cuahn che riya cuah ne, hua renun ndeh, te rahn dave yahn numachahte, ne rendihchero nducoyaca ihyan. A tihnocá co cuahn che, u che rinducó nducoyaca ihyan, ndaconan chí, te cadino nde cahya nde cune ihyan.

28 Ro min ne, hua chuh ya nde ama ihyan nunde, te nducoyaca ye va che co ye castigo.

29 Cuahn che a conan chuh vedeyah chemin chan ne, co man nan yahn man, nan iyo man, a cora iyon man, ne nducuahñ che nihnde cade nan ro ne, nuhn.

30 Tuhme cuhnde ro vederihno nan ro, cahco ro che u che rinducó nducoyaca ihyan ne, a ndá. Cuaco nducoyaca ihyan iyehñse, ne ndihchero ye u che ndá van man numacuahn vederihquentiyon chahte yahn.

31 Tuhme ama yudo cuah trompeta, ne tahvé ángel yahn che nedin dama ye ihyan yahn che a tendahnun che vate ye numachahte iyehñse.

32 Cua cuande nchuhn nduhca che ri nduco yahn higo. A devano ne te cuahn che reñcañno yan ne, a cochi nino ro ihno.

33 Atihnocá cuahn che a rendihchero nchuhn che a rinahn dehtenduh che tuhchan che rahn rí nchuhn ne, cuedevano ne te a ndá nino ro che nto iyehñse.

34 Cuaco rahn rí nchuhn te ihyan che vate ye man ro cuh ne, vate ca ye cuahn che a conañ nducuahñ dehtenduh chemin chan.

35 Iyehñse man, nan ro man ne, va che cuihno, ate ndudo yahn ne, hua ndá ro che cuihno, te va che conañ.

36 Me yahn che conañ chemin ne, hua duh devano deh ro man, deh ura man, nde ángel che chenan ye vahchetero man, nde Daya Dendiohs man, hua devano ye. Atenañ Dendiohs Chida che devano ye.

37 Anduhñeca che chahno ihyan ro che quenun Noé iyehñse ne, tihca cuahno ihyan ro che, u che rinducó nducoyaca ihyan, ndaconan chí tún.

38-39 Ihyan chahn ne, vate ye vedeyeno yahn man ye, reh ye man, rih ye man, rihnevaco ye man, redcañnevaco ye daya ye man. A cudado min vate

ye nde nda ro che chenda Noé chete arca. Nde hua tumacadino ye cuahn a canan chan conahn, chito nune iyehense, ne chihno chih nducoyaca ye. A chemin no tun ro che, u che rinducó nducoyaca ihyan, ndaconan chi tún, te ihyan nunde ne, nde tah hua ndedecadino ye yahn.

⁴⁰ Nda ro min ne, andahre dama redin o ihyan ntiyon chenah ye viyata, ate ama ye ne, quenda ángel ihyan, ne tama ye ne, cahcoman ye ihyan.

⁴¹ A namin no tun, andahre dama chenun o ihyan ndahta, rengu ye, ate ama ye ne, quenda ángel ihyan, ne tama ye ne, cahcoman ye ihyan.

⁴² Cuahteyan nchuhn, te u che Dihve ne ne, hua devano ne deh ura ndá.

⁴³ Cua cuande nchuhn ejemplo cuh: Ndete che ama patrón devano ye deh ura nda sahn duco ne, cuhndeyan ye, ne hua cuahnecon ye che duco se yahn ye.

⁴⁴ Atihnocá nchuhn, nahn che cuahteyan ne, te u che rinducó nducoyaca ihyan ne, denan ndá ura che nde hua vate ne cudado.

Ejemplo yahn sahn decayha che chichahtino patrón yahn se sahn

⁴⁵ Cuihnevan nchuhn ejemplo cuh: Chihnde sahn decayha che ndahca vederendecadino yahn se man, redinahn se man. Ama yune ne, chihco patrón yahn se ntiyon tah se che din se cudado mozo yahn ye, cahca cheh se sahn nduhca che redin yahn, ne chica ye min, cuahn ye.

⁴⁶ Ama ndah ro yahn sahn min ndete che redinahn se nde nda ro che ndaconan dihve se.

⁴⁷ Cuaco rahn ri nchuhn te ndete che tihca ne, ndahco dihve se vederihquentiyan tah se che din se cudado nducuahn che va yahn ye.

⁴⁸ Ate ndete che ndedecadino se che hua nun ndaconan dihve se,

⁴⁹ ne cuanan din tan se nduco mozo yahn ye man, cheh se man, cuh se man, nduco sahngeh man ne,

⁵⁰ denan nta patrón yahn se ura che nde tah hua va se cudado.

⁵¹ Tuhme din ye castigo sahn, cuahno se nduhca che rahno sahn che o nan o chende se, co se castigo yah van ruchiyahn. Min cuaco se man, cheh dihyon se man.

25

Ejemplo yahn ndiche tahn cayha che chinduco te nan vihco rihnevaco ihyan

¹ Nda ro min ne, ihyan che rihquentiyan Dendiohs ihyan ne, cuahno ye nduhca che chahno chi ndiche tahn cayha che chetah te candil yahn te, ne chahn te nan vihco rihnevaco ihyan.

² Uhn tahn chahn ne, vivo te, ne te uhn te ne, hua cudado te.

³ Tahn che hua cudado chahn ne, hua quenda te aceite devavih cava che tuno yahn te.

⁴ Me tahn che vivo chahn ne, decuto te candil yahn te, nde quenda ca te aceite devavih.

⁵ Nducote ama rendah sahn rihnevaco me ne, nda yahnde nan te, ne chahteyado te.

⁶ Tenduh nan mahñ yan me ne, yahve ihyan tahn, ne rahn ye: “A cochi sahn rihnevaco. Cuahteyan nchuhn cava che conduco ne sahn.”

⁷ Necuan nduh che ndiche tahn chahn, canan rendahco yan te candil yahn te.

⁸ Tuhme rahn tahn che hua cudado chahn ri te combiero yahn te: “Te nchuhn tah aceite yahn ne nuhn, te a rentoh candil yahn nuhn.”

⁹ Ndahconan tahn che vivo chahn, ne rahn te: “Hua co te nuhn nchuhn, te ndete che te nuhn ne, hua tuno nde cava man nuhn. Tahque ndah nchuhn ne, cuahn ne cua ne nan che rendihcue ye.”

¹⁰ Ate numanahn che cuahn tahn che hua cudado chahn ca te aceite ne, nda sahn rihnevaco me, chenda se vah. Tahn che vateyan chahn ne, namin chenda te, ne ndude chendevah.

¹¹ Chihno min ne, nta tahn chenahn chahn, ne canan riyahve te: “Dihve nuhn, conahne ne chendevah condā nuhn.”

¹² Ate ndahconan sahn rihnevaco me, ne rahn se ri se tahn: “Cuaco rahn te nde hua rendihché duh nchuhn.”

¹³ Chihno nte Dihvo vo ejemplo me ne, rahn ye:

—Cua cuande nchuhn ejemplo me, ne cuahteyan ne, te u che rinducó nducoyaca ihyan ne, hua devano ne deh ro man, deh ura man, che ndaconan chí.

Ejemplo yahn tume renan daya

¹⁴ Ihyan che rihquentiyon Dendiohs ihyan ne, anduhneca sahn decahya yahn ama patrón. Cuahn che va che cahn patrón yahn se yahn yahn ne, nedin dama ye sahn, ne chihco ye tume tah queri ama se cava che din se ntiyon nduco.

¹⁵ Ama se ne, chihco ye uhn mil tah se, tama se ne, chihco ye o mil tah se, tama se ne, chihco ye ama mil tah se. Tunoca co din queri ama se ntiyon ne, a tihva tume chihco ye tah se, tuhme cuahn ye.

¹⁶ Sahn che chihnde tah uhn mil me ne, din se ntiyon nduco, ne ndaca se te uhn mil nan ntiyon che din se.

¹⁷ Namin sahn che chihnde tah o mil me ne, din se ntiyon nduco, ne ndaca se te o mil nan ntiyon che din se.

¹⁸ Ate sahn che chihnde tah ama mil ne, tihyon ndeh se tume me man yahn.

¹⁹ Chi rahn me ne, nta patrón yahn sahn chahn, ne ndetendah cuande ye nduco se.

²⁰ Menan vihca nda sahn che chihnde tah uhn mil me, ne rahn se ri se ihyan: “Dihvé, uhn mil te ne u, ne din ntiyon nduco, ndaca te uhn mil nan ntiyon che din. Condo tah ne che uhn mil me yahn ne nduco uhn mil che quendudonan yahn.”

²¹ Rahn patrón yahn se ri ye sahn: “Ndahca din. Di ne, redinehn ndudo yehn. Tah ra tume té di, ne ndahca din ntiyon nduco. Man ne, tahque ndeh ca cahco tah. Conen nan, ne cuahte vo vedeyeno.”

²² Chihno min ne, nda sahn che chihnde tah o mil me, ne rahn se ri se ihyan: “Dihvé, o mil te ne u, ne din ntiyon nduco, ndaca te o mil nan ntiyon che din. Condo tah ne che o mil me yahn ne nduco te o mil che quendudonan yahn.”

²³ Rahn patrón yahn se ri ye sahn: “Ndahca din. Di ne, redinehn ndudo yehn. Tah ra tume té di, ne ndahca din ntiyon nduco. Man ne, tahque ndeh ca cahco tah. Conen nan, ne cuahte vo vedeyeno.”

²⁴ Chihno min ne, nda sahn che chihnde tah ama mil me, ne rahn se ri se ihyan: “Dihvé, a rendihché ndih che ama cheche chedave yahn ne, ne rene din ndeh ne daya tume yahn ne rendaca ne.

²⁵ Chemin che hua chihquinó din ntiyon nduco tume yahn ne, ne tahque ndah tihyón man yahn. Man ne, nga yahn ne.”

²⁶ Ndahconan ye, ne rahn ye ri ye sahn: “Di ne, duhtuno ihyan di man, dahnde man. A devene che cheche chedave yahn, che rene din ndéh daya tume yahn rendaca.”

²⁷ ¿Dehco che hua chehn chihque nan banco, ne man che ndaconán ne, ndonda tah nduco daya?”

²⁸ Tuhme rahn ye ri ye ama o sahn decahya yahn ye: “Cuehnevi nchuhn tume che nda sahn tih, ne coçah ne sahn che va tah ndiche mil.

²⁹ Tihca, te ihyan che va yahn ye ne, ndonda tah ca ye nde ngava yahn ye, ate ihyan che tah ra yahn ye ne, nde cuavi tahsihn che va yahn ye.

³⁰ Man ne, coçah ne sahn tih che hua cochihve se, ne cuih nun ne sahn cuahn chevah nan man. Atihnoça cuahno nducoyaca ihyan che duhtuno ihyan ye, te va che co ye castigo yah van ruchiyahn. Min cuaco ye man, cheh dihyon ye man.”

Ro che cuhnde çade yahn ihyan iyehmse

³¹ 'Cuahn che u che rinducó nducoyaca ihyan ndaconan chí numacuahn vederihquentiyon yáhn nduco nducoyaca ángel yáhn ne, techecaçdé numacuahn vedeyudo.

³² Tuhme ihyan yahn nducuahn nación ne, ndo dama ye nan, ne çahco víh ama tama ye, nduhça che rihco víh ihyan itecuche van chivato.

³³ Ihyan che ndah ihyan ye ne, çahco víh ihyan lado tah cuaco, ne ihyan che duhtuno ihyan ye ne, çahco víh ihyan lado tah cuéh.

³⁴ Çahmá có ihyan che vate ndi ye lado tah cuaco: “Nchuhn che redin Chidá che ndah nduco ne ne, cochí ne, cuahtenan ne vahchetero nan che rihquentiyon ye. Min ne, a ndihcoyan ye çava ne nde ro che dendah ye iyehmse.

³⁵ Rinevahn che cuahtenan nchuhn min, te cuahn che chí cuicó ne, te ne che chéh man, cuahn che chí yacá ne, te ne nune chíh man, cuahn che quechicá yan vaço ne ne, nevahneçun ne u ndevaço ne man,

³⁶ cuahn che chí cuah tino yáhn ne, te ne tino quenún man, cuahn che chí cah man, cuahn che quenún vaçoyahn man ne, chahn ne chendihchero ne u man.”

³⁷ Tuhme ndahconan ihyan chahn, ne çahma ye co ye u: “Dihve nuhn, co ndiyu nuhn che chinan nuhn ndih cuahn che rendotenan ne che rahn ne. Hua te nuhn cheh ne man, hua te nuhn nune chíh ne man,

³⁸ hua nevahneçun nuhn ndih ndevaço nuhn man, hua te nuhn tino quenun ne man,

³⁹ hua chahn nuhn chendihchero nuhn ndih man.”

⁴⁰ Ndahconán, ne çahmá có ihyan: “Cuaco rahn rí nchuhn te che chinan ne ihyan che ritahno ye u, andahre hua nduh rignonun chíhve ye che rahco ihyan ne, anduhneça ndete che a man chinan ne.”

⁴¹ 'Me ihyan che vatendi ye lado tah cuéh ne, çahmá có ihyan: “Nchuhn che a ndinda ne ne, cuavi ne nan, cuahn ne van ruchiyahn che a va yan çava chundah nduco ángel yahn se. Min cuahtenan ne cuahn dama.

⁴² Hua co ndevá nchuhn, te hua chahtenan cuma ne vedevahino. Chí cuicó, ne hua te ne chéh man, chí yacá, ne hua te ne nune chíh man,

⁴³ quechicá yan vaço ne, ne hua nevahneçun ne u ndevaço ne man, chí cuah tino yáhn, ne hua te ne tino quenún man. Chí cah man, quenún vaçoyahn man, ne hua chahn ne chendihchero ne u.”

⁴⁴ Tuhme çahma ihyan chahn co ye u: “Dihve nuhn, çitcuahn chí cuico ne man, chí yacá ne man, quechica ne yan vaço nuhn man, chí cuah tino yahn ne man, chí cah ne man, quenun ne vaçoyahn man, ne hua chinan nuhn ndih ne?”

⁴⁵ Ndahconán, ne çahmá có ihyan chahn: “Cuaco rahn rí nchuhn te nducote chacondah vedame ne ihyan che ritahno ye u, ndedecadino ne che

nde hua rignonun chihve ye ne, anduhnecá ndete che a u chacondah vedame ne.”

⁴⁶ Tuhme dechúh ihyan chahn cuahtenun ye van ruchiyahn, co ye castigo, ne ihyan yáhn ne, ndevá ihyan, ne cuahtenan ye vahchetero numacuahn ro.

26

Ntuhno se nduhcá che din se preso Dihvo vo Jesucristo

¹ Cuahn che a chihno nte Dihvo vo nducuahndehnduh che tuhchan ne, rahn ye ri ye ihyan apóstol yahn ye:

² —Nchuhn ne, a devano ne te cuihno o ro man ne, a vihco ro yudo. U che rinducó nducoyaca ihyan ne, va che din se preso u, nahn yah se u.

³ Tuhme chidocuyan ndinan man, sahn ndinan yahn ihyan nación yahn Israel man, sahn devano ley che dirun Moisés man ne, ndo dama se chevah vaco Caifás, chidocuyan che tahque ndinan.

⁴ Min ntuhno se deh vedemayon din se cava che co din se preso Dihvo vo, cahno se ihyan.

⁵ Nte cade se che cuahtenan rino se nde chuh vihco cahno se ihyan, te che mendahn vihco ne, necuan ihyan yan numacuahn vedetan.

Ama tahn ndahta ne, chacotahme te nunedan tin Dihvo vo Jesucristo

⁶ Ama ro min ne, quenan Dihvo vo yan Betania, vaco Simón, ihyan min che chi ye cah che rechá yute ro menan.

⁷ Ura che va ye nan mesa reh ye ne, nda ama tahn ndahta, nda te ama frasco che ndindah nduco ama nan tu che duce alabastro. Frasco me ne, ndito ama nan nunedan che ama yahn chihve. Chahn nda te nan va Dihvo vo, ne chacotahme te nunedan me tin ye.

⁸⁻⁹ Ndihchero ihyan apóstol chahn, ne chi yudo yahn ye, ne rahn ye:

—Hua ndahca che redin tahn tih che ndere retoh te nunedan tih, te ama yahn chihve. Tahque ndahca din te ndete che ndihcue te, cava che ndaca tume conan te ihyan chevah.

¹⁰ Chihnevan Dihvo vo, ne rahn ye ri ye ihyan chahn:

—¿Dehco che yudo ri yahn nchuhn che tihca din tahnguh?, te ndahca che tihca din te cava.

¹¹ Ihyan chevah ne, cuahn dama chenun ye van nchuhn, ne conan ne ihyan adecodehno ura che nahn ne, ate u ne, hua cuahn dama conan nduco ne.

¹² Che chacotahme te nunedan u ne, chihcoyan te u cava che cuhche ihyan u.

¹³ Cuaco rahn ri nchuhn te adecotino che cuahndudo ihyan ndudo ndah yahn Dendiohs numachahte iyehse ne, ntihton yan ye nduhca che din te cava che cadino ihyan.

Judas ne, ndihcue ndeh se Dihvo vo Jesucristo

¹⁴ Chihno min ne, Judas Iscariote, ama cha sahn che namin nduco se ndi cuande se van nduh che ndihchio ihyan apóstol chahn ne, chahn se nan chidocuyan ndinan chahn,

¹⁵ ne rahn se ri se sahn:

—¿Tava nedihve nchuhn u cava che nté Jesucristo tah ne?

Tuhme cah sahn ndinan chahn ndico ndiche tume diyahngua sahn.

¹⁶ Nde ura min canan rinuhn ino se ama ura che ndahca cava che necah se Dihvo vo tah sahn chahn.

Cheh vino Dihvo vo Jesucristo nduco ihyan apóstol yahn ye

17 Cuahn che a cade ama ro canan vihco ro yudo me, ro che reh ihyan pan che hua nduco ya yahn ne, tumerune ihyan apóstol chahn Dihvo vo:

—¿Ti nahn ne che cahcoyan nuhn cava che cheh vino ne che cuande yahn vihco ro yudo ne?

18 Ndahconan Dihvo vo, ne rahn ye ri ye ihyan chahn:

—Cuahn nchuhn viyan, vaco ama ihyan, ne cahma ne co ne ihyan tuhca: “Rahn Ihyan Ricuahn yuhn vo te a nda nino ura che cahno se ihyan, ne vaco ne chihco cade ye che cheh vino ye nduco ihyan apóstol yahn ye man vihco ro yudo.”

19 Dinahn ihyan apóstol chahn nduhca che rahn Dihvo vo, ne chihcoyan ye che cheh vino ye nduco vih che cuande yahn ro yudo.

20 Cuahn che chi vino me ne, chihnde Dihvo vo nan mesa cheh vino ye nduco nduh che ndichio ihyan apóstol yahn ye.

21 Numanahn che reh ye ne, rahn Dihvo vo ri ye ihyan chahn:

—Cuaco rahn ri nchuhn te ama cha ne ndihcue ndeh ne u.

22 Tuhme ama chi ndache ihyan chahn, ne canan ca ama ca ama ye rahn ye ri ye Dihvo vo:

—Dihvé, ate co ndiyu u che tihca din.

23 Ndahconan Dihvo vo, ne rahn ye ri ye ihyan:

—Ama cha nchuhn che reh ne dama nducó chete ama cuh ne, ndihcue ndeh ne u.

24 U che rinducó nducoyaca ihyan ne, va che conahn nducó nducuahn che a ndirun nan Ndudo yahn Dendiohs. Ate jchevah sahn che ndihcue ndeh se u! Tahque ndah ro yahn se ndete che nde hua chihndeyan se.

25 Tuhme Judas, sahn min che ndihcue ndeh se ihyan ne, rahn se ri se ihyan:

—Ihyan Ricuahn, ndiyu u che tihca din.

Ndahconan Dihvo vo, ne rahn ye ri ye sahn:

—Taca hua, di.

26 Numanahn che reh ye ne, chetah Dihvo vo pan, ne necah ye nundihve cuahn Dendiohs. Tuhme ndeh ye, cah ye ihyan chahn, ne rahn ye ri ye ihyan:

—Pan cuh ne, yute yahn, coheh nchuhn.

27 Chihno min ne, chetah ye ama vaso vino, ne necah ye nundihve cuahn Dendiohs. Tuhme cah ye ihyan chahn, ne rahn ye:

—Cuih nducoyaca nchuhn.

28 Chu ne, yun yahn che dito yahn vederihquentiyon ra che ndahco cade Dendiohs. Cora yun yahn, ne nduco chemin ama yahn ihyan ndaca ye vederenchahco cava nunde yahn ye.

29 Rahn ri nchuhn te ametah ndaconan cuh vino yahn uva nde nda ro che nedin ra Chidá nducuahn dehtenduh. Tuhme ndaconan cuh vo nduco nchuhn nan che rihquentiyon ye.

Rahn Dihvo vo Jesucristo te va che cahma Pedro che hua rendihche ye ihyan

30 Chihno chita ye himno che a va ndi rita ye ne, cuahn ye cuahn cuete Olivo.

31 Tuhme rahn Dihvo vo ri ye ihyan chahn:

—Man vino ne, cahcoman nducoyaca nchuhn u. Conahn Ndudo yahn Dendiohs che ndirun tuhca: “Cuahnecun che cahno se ihyan che redin ye cudado itecuche, ne cuihno cano te.”

32 Ate cuahn che a ntuché van tenahn ne, cahno estado yahn Galilea tahque menan ca che co nchuhn.

33 Tuhme rahn Pedro ri ye Dihvo vo:

—Andahre nducoyaca ihyan sih cahcoman ye ndih, ate u ne, hua cahcoman ndih.

³⁴ Rahn Dihvo vo ri ye ihyan:

—Cuaco rahn ri di te man vino cuh, numanahn che metah cuah tuh ne, cahme ino yune che hua rendihche u.

³⁵ Rahn Pedro ri ye Dihvo vo:

—Andahre quenan cuma che coh dama nduco ne, ate hua cahma che hua rendihche ndih.

—Atihnoça rahn nducoyaca ihyan apóstol chahn.

Covah Dihvo vo Jesucristo cuete Getsemani

³⁶ Cuahn che nda Dihvo vo ama cuan nan che duche Getsemani ne, rahn ye ri ye ihyan apóstol yahn ye:

—Cuahte nchuhn muhn numanahn che cahñ tan çana, covah.

³⁷ Tume quenda ye Pedro nduco nduh che o daya Zebedeo, ne cuahn ye çana nan me. Nda ye min ne, canan ama chi ndache ye,

³⁸ ne rahn ye ri ye ihyan chahn:

—Ama ndache ri anduhneça ndete che a coh che ri ndaché. Cuahtenan nchuhn muhn, ne cuahtenduche ne, conduco ne u.

³⁹ Tuhme cuahn Dihvo vo tah cuahn çana nan me, quendih ye ndiyahn, covah ye, ne rahn ye:

—Chida man, ndete che co ne, cuahneçun ne che hua chuhrin nduhça che a va çade. Ate co din ne nduhça che nahn man ne, ndiyu nduhça che nahn.

⁴⁰ Tuhme ndaconan ye nan che vate ihyan apóstol yahn ye. Ntaça ye ihyan chahn che vateyado ye, ne rahn ye ri ye Pedro:

—¿A nde mare ama ura, hua chicha nchuhn chahtenduche ne, conduco ne u ne?

⁴¹ Cuahtenduche ne, covah ne çava che hua dinahn ne yahn chundah cuahn che tumarande se nchuhn. Cuaco te a chihco dama ino ne che cocha ne che tumarande se nchuhn, ate anduhneça ndete che ndi i ne, ne hua richa ne.

⁴² Ndaconan cuahn Dihvo vo, covah ye nan che chi o yune, ne rahn ye:

—Chida man, ndete che hua co che cahnevi ne che va che chuhrin ne, co nduhça che nahn man ne.

⁴³ Ndaconan tun ye, ne ntaça ye ihyan chahn che vateyado ye, te anduhneça ndete che nda vih ndutinan ye che ama nahn cuahteyado ye.

⁴⁴ Chihcoman ye ihyan chahn ne, cuahn tun ye covah ye nan che chi ino yune, ne a chemin no covah ye tama yune.

⁴⁵ Tuhme ndaconan ye nan che chenun ihyan chahn, ne rahn ye ri ye ihyan:

—Man che cuaco ne, cuahteyado nchuhn. U che rinducó nducoyaca ihyan ne, a nda ura che neça se u tah sahn nunde.

⁴⁶ Cueneçuan nchuhn, cuhn vo. Quendi yuno vo sahn che ndihcue ndeh se u, te a cochi nino se.

Quenda se preso Dihvo vo Jesucristo

⁴⁷ Nde metah cuihno çahma Dihvo vo cuahn che a nda Judas Iscariote, sahn min che namin nduco se ndi cuande se van nduh che ndichio ihyan apóstol chahn. Nduco se ama yahn se, sahn che nda espada man, sahn che nda yahn man. Sahn chahn che dechuh chidocuyan ndinan man, intiyahn man.

⁴⁸ Judas, sahn min che ndihcue ndeh se Dihvo vo ne, a nente çade se nduco sahn chahn tuhça:

—Ihyan che tenan ihyan ne, a ihyan min. Co din nchuhn preso ihyan.

49 Ndetahno chahn nda se nan Dihvo vo, ne rahn se ri se ihyan:

—Necuma ndih, Ihyan Ricuahn yahn.

Tuhme tenan se ihyan.

50 Rahn Dihvo vo ri ye sahn:

—Amigo yahn, codin nome ntiyon che cochi.

Tuhme tumangan sahn chahn Dihvo vo, din se preso ihyan.

51 Ama cha ihyan apóstol che nduco Dihvo vo ne, ndetendah ye espada yahn ye, ne chahn ye sahn decahya yahn chidocuyan ndinan, chacondah ye revan se.

52 Tuhme rahn Dihvo vo ri ye ihyan min:

—Cuentihyon ndah espada yehn. A devene te duh ihyan che cahno ye nduco espada ne, nduco espada va che coh ye.

53 Cuedevene te co cacá Chidá, ne ndetahno dechuh ye ama yahn ángel, ndedevahn ye u.

54 Ate hua dín tihca, te a ndirun nan Ndudo yahn ye che a tihca va che conahn.

55 Chihno min ne, rahn Dihvo vo ri ye sahn che din se preso ihyan:

—Ro ro quenún che chete yaco van nchuhn chicuáhn, ¿dehco che hua min din ne preso u? ¿Taca che muhn cochi ne, nda ne espada man, yahn man, din ne preso u, anduhneca ndete che sahn duco u?

56 Ate tihca va che cuahnó cava che conahn Ndudo yahn Dendiohs che dirun ihyan profeta.

Me ihyan apóstol chahn ne, chihcoman ye Dihvo vo, chihno chano ye.

Quenda se Dihvo vo Jesucristo nan intiyahn

57 Sahn che din se preso Dihvo vo ne, quenda se ihyan nan Caifás, chidocuyan che tahque ndinan. Min nto dama intiyahn man, sahn devano ley che dirun Moisés man.

58 Pedro ne, quendi ye Dihvo vo diyahn diyahn nde nda ye chevah vaco chidocuyan che tahque ndinan, ne min chihnde ye dama nduco sahn policía chahn, te nahn cadino ye deh co nduco Dihvo vo.

59 Chidocuyan ndinan man, sahn intiyahn man ne, rinuhn ino se ama nunde che ndere cacueh dame se Dihvo vo cava che co cahno se ihyan.

60 Ate nde ama nunde hua chi chicueh dame se ihyan, andahre ama yahn se ndere chica nunde se yahn ye. Chihno min ne, nda te o se che ndere chica nunde se yahn ye,

61 ne rahn se:

—Ihyan tih ne, rahn ye te co ndahtera ye yaco, ne chete che ino ro ne, nahno ye.

62 Tuhme necuan ndi chidocuyan che tahque ndinan me, ne rahn ri ye Dihvo vo:

—¿Dehco che hua rendahconen yahn sahn sih che tihca rica nunde se yehn?

63 Ate Dihvo vo ne, nde ama hua rahn ye. Tuhme rahn chidocuyan ndinan me ri ye ihyan:

—Numacuahn vederihquentiyon yahn Dendiohs che va ye vahchetero ne, ricá di che cahma cuaque co nuhn ndete che di che Daya Dendiohs, ihyan min che a va cade che chi ye ndedevahn ye ihyan iyehne.

64 Ndahconan Dihvo vo, ne rahn ye ri ye ihyan:

—A u, nduhca che rahn ne. Namin cuedevano nchuhn che u che rinducó nducoyaca ihyan ne, ndihchero ne u che vá lado tah cuaco Dendiohs, ihyan

min che ama yudo vederihquentiyon quenan cuma ye. Namin ndihchero ne che chí van man.

⁶⁵ Ndetahno chihngun chidocuyan ndinan me cahteca ye, te rahco ye che ducherino Dihvo vo Dendiohs che tihca ndahconan ye. Tuhme rahn ye:

—¿Deha din vo testigo ne? ¡Ducherino se Dendiohs! A man nchuhn chihnevan ne nduhca che rahn se.

⁶⁶ Man ne, ¿deh rahn nchuhn ne?

Ndahconan sahn intiyaahn chahn, ne rahn se:

—Sahn tih ne, quendiho se nunde, ne quenan cuma che coh se.

⁶⁷ Tuhme cahnun dan se vaconan ye, ne chahn se ihyan. Nahn se ne, chahn se vaconan ye,

⁶⁸ ne rahn se ri se ihyan:

—Di che rahn che Dendiohs dechuh ye di, ndedevehn ihyan iyehmse, cahme duh chahn di.

Rahn Pedro che hua rendihche ye Dihvo vo Jesucristo

⁶⁹ Numanahn min ne, va Pedro cuahn chevah me. Chahn nda ama tahn decayha yahn chidocuyan ndinan me nan ye, ne rahn te ri te ihyan:

—Namin di ne, chindoque Jesús yahn estado yahn Galilea.

⁷⁰ Ate rahn Pedro ri ye tahn nan nducoyaca ihyan:

—Nde hua devano deh yahn che tihca rahn.

⁷¹ Tah cuahn adive ne, cuahn ye cuahn nino chendevah. Ndihchero tama te ihyan, ne rahn te ri te sahn che chenun se min:

—Namin sahn tih ne, chinduco se Jesús yahn yan Nazaret.

⁷² Ndahconan Pedro tama yune, ne rahn ye:

—Nde muhn nde nan Dendiohs, hua rendihché duh ihyan che rahn nchuhn.

⁷³ Namenan me ne, chahn nda sahn che chenun se min nan ye, ne rahn se ri se ihyan:

—Cuaco niyon che chindoque ihyan cah, te a ndero ndi nde nan ndudo yehn.

⁷⁴ Ndaconan ntihyon yan ye Dendiohs, nde rahva ye, ne rahn ye:

—Hua rendihché duh ihyan cah che rahn nchuhn.

A ura min no cah ama tuh.

⁷⁵ Necahco Pedro ndudo che rahn Dihvo vo ri ye ihyan tuhca: “Numanahn che metah cuah tuh ne, cahme ino yune che hua rendihche u.” Tuhme ndiquendah ye, ne ama chaco ye.

27

Necah se Dihvo vo Jesucristo tah Pilato

¹ Chi dave tama ro me ne, nducoyaca chidocuyan ndinan chahn man, sahn intiyaahn man ne, ntuhno se nduco vih cava che cahno se Dihvo vo.

² Dechiche se ihyan, ne quenda se ihyan, necah se ihyan tah gobernador Pilato.

Nduhca che chih Judas

³ Cuahn che checadino Judas che a va che cahno sahn chahn Dihvo vo ne, ndo yah se, ne chahn se necah se nduh che ndico ndiche tume diyahngua me tah chidocuyan ndinan chahn man, sahn intiyaahn man, ne rahn se ri se sahn:

⁴ —U ne, quendiho nunde nan Dendiohs, te ndahco tah nchuhn ama ihyan che nde ama nunde hua quendiho ye cava che cahno ne ihyan.

Ndahconan sahn chahn, ne rahn se ri se Judas:

—Tañ condihche taça din. Nuhn ne, hua cuande yahn nuhn chemin.

⁵ Tuhme a min chete yaço ndunan Judas tume me sahn chahn, ne chahn se tihyon se ihyo dando se, chihno man se sahn.

⁶ Nedin dama chidocuyan ndinan chahn tume me, ne rahn se nduco vih:

—Nduhça che rihquentiyon ley ne, hua co nedin damo vo tume cuh nduco tume vedino, te chu ne, tume yahn yun.

⁷ Ndetahno nte çade se nduco vih, ne ca se ama ndi yahn nduco tume min cava che ndaça nan che cuehche ihyan nación chenahn. Ro menan me ne, duche yahn min Yahn yahn Sahn che Redendah Chite Yahn,

⁸ ate nde ro min ne, nuhnde duche Yahn yahn Yun.

⁹⁻¹⁰ Tihça chinahn Ndudo yahn Dendiohs che dirun ihyan profeta Jeremías tuhça: “Nduhça che chihco çade Dihvo vo Dendiohs ne, ndico ndiche tume diyahngua chihco ihyan nación yahn Israel che rigonun chihve ihyan min. Toh ihyan chahn tume me, ca ye yahn che duche Yahn yahn Sahn che Redendah Chite Yahn.”

Chihnde çade yahn Dihvo vo Jesucristo nan Pilato

¹¹ Cuahn che a nti Dihvo vo nan gobernador ne, tumerune se ihyan:

—¿A ndih che Rey yahn ihyan nación yahn Israel ne?

Ndahconan Dihvo vo, ne rahn ye ri ye sahn:

—U, a nduhça che rahn.

¹² Chidocuyan ndinan chahn man, sahn intiyahn man ne, canan ama rica nunde se yahn Dihvo vo, ate nde ama hua ndahconan ye.

¹³ Tuhme rahn Pilato ri se ihyan:

—¿Dehco che hua rendahconan ne che rica nunde sahn sih yahn ne ne?

¹⁴ A namin no tun nde ama ndudo hua ndahconan ye yahn se, ne ama chahn ino se.

Chihco dama ino Pilato che conan yah Dihvo vo Jesucristo

¹⁵ Va ama costumbre che nduyo nduyo che renda vihco ro yudo ne, va che ntahte gobernador ama preso, adecochoano sahn che çaca ihyan yan.

¹⁶ Tañ min ne, va ama sahn preso che ama duhtuno ihyan se, duche se Barrabás.

¹⁷⁻¹⁸ Ura min ne, ama ndo dama ihyan yan, ne nducote tumacadino Pilato che redin ve chidocuyan ndinan chahn yahn Dihvo vo, rica nunde se yahn ye ne, chemin che tumerune se:

—¿Cha preso nahn nchuhn che ntahte, a Jesús che rahn ne che Cristo ye o Barrabás ne?

¹⁹ Numanahn min ne, dechuh ndahta yahn se ndudo, rahn te tuhça: “Ihyan tih ne, nde ama nunde hua quendihco ye. Condi din tan nduco ye, te icuino ne, ama chihnga chihno che va che conahn ama venecuino ndete che din tan nduco ye.”

²⁰ Me chidocuyan ndinan chahn man, sahn intiyahn man ne, chicha yahn se chinun se ihyan yan che çaca ye Pilato che ntahte se Barrabás man, che çahcantiyon se che coh Dihvo vo man.

²¹ Ndaconan tumerune Pilato ihyan chahn, ne rahn se:

—Tuhme ne, ¿cha preso nahn nchuhn che ntahte ne?

Ndahconan ihyan yan chahn, ne rahn ye:

—Cuentahte ne Barrabás.

²² Tuhme tumerune se ihyan chahn:

—Me Jesús che rahn nchuhn che Cristo ye, ¿deh din nduco ye ne?

Ndahconan nducoyaça ihyan chahn, ne rahn ye:

—Cuihquentiyon ne che conan yah ye.

23 Raĥn Pilato ri se iĥyan chahn:

—¿Taca che conan yah ye?, te hua quendihco ye nde ama nunde.

Ate nde tahque dito cah iĥyan chahn:

—Cuihquentiyon ne che conan yah ye.

24 Ndiĥchero Pilato te hua rendo ndudo iĥyan chahn. Tahque ndah nde tahque vari chende ca ye, ne tahve se che chehua nune. Nano se tah se nan nducoyaca ye, cahco ro se che hua nahn cuehdame se nunde min, ne raĥn se:

—Iĥyan cuh ne, hua quendihco ye nde ama nunde. U ne, hua nahn che conan yah ye, ate co nduhca che nahn nchuhn.

25 Raĥn nducoyaca iĥyan chahn:

—Cuihquentiyon ne che conan yah ye. Nuhn nduco daya nuhn cuehdame nuhn iĥyan.

26 Tuhme ntahte Pilato Barrabás nduhca che nahn iĥyan chahn, ne chihquentiyon se sandado yahn se che chahn se Dihvo vo. Chihno min ne, tahve se sahn che quenda se iĥyan, cuaconahn yah se iĥyan.

27 Quenda sandado chahn Dihvo vo chete palacio, ne nedin dama se nducoyaca combiero yahn se nan ye.

28 Chehnevi se tino menan yahn ye, ne tiĥyon se ama tino cuah iĥyan.

29 Denda se ama corona yan, tiĥyon se tin ye, ne cah se ama nducodi quetuhma ye tah cuaco ye. Chihno min ne, chehntiĥya se nan ye redin duche yahn se iĥyan, ne raĥn se ri se iĥyan:

—Rendeva nuhn yavenan ne, Rey yahn iĥyan naci3n yahn Israel.

30 Recaĥnan dan se iĥyan man, retah se nduco me raĥn se tin ye man.

31 Chihno che din duche yahn se iĥyan tiĥca ne, chehnevi se tino cuah me, ndaconuhn se tino yahn man ye iĥyan. Tuhme quenda se iĥyan nan che nahn yah se iĥyan.

Chaconahn yah se Dihvo vo Jesucristo

32 Cuahn che a chenun yune se ne, tahn nun se ama iĥyan yan Cirene che duche ye Sim3n, ne chihquentiyon se iĥyan che quenda ye cruz nan che conan yah Dihvo vo.

33 Nda se ama cuete che duche G3lgota, che conahn Cuete Ine Tin Tenahn.

34 Min cah se vino che ndiĥchetahn nduco dah ite, cuh Dihvo vo, ate dechihn ye, ne hua chih ye.

35 Cuahn che a chihno nahn yah sandado chahn Dihvo vo ne, tendah se suerte yahn se cha sahn quendaĥ yahn se che co yahn se tino yahn ye. Tiĥca chinahn Ndudo yahn Dendioĥs che dirun iĥyan profeta tuhca: “Tendah se suerte yahn se cha sahn quendaĥ yahn se che co yahn se tino yahn.”

36 Chihno min ne, chahtenan se cudado iĥyan.

37 Tin cruz ne, chaconahn letra nan che ndirun nunde yahn ye tuhca: “Iĥyan cuh che Jes3s, Rey yahn iĥyan naci3n yahn Israel.”

38 Namin chenan yah o sahn duco chihto nan ye, ama se lado tah cuaco ye, ne tama se lado tah cueh ye.

39 Iĥyan che rechuh ye min ne, redin duche yahn ye iĥyan, rahco tin ye, ne raĥn ye:

40 —Di che raĥn che ndahtere yaco, ne nahne chete ino ro, cuenedevahn man di. Ndete che Daya Dendioĥs di ne, cuenchehn nan cruz tiĥ.

41 Chidocuyan ndinan man, sahn intiyahn man, sahn fariseo man, sahn devano ley che dirun Mois3s man ne, namin ndahchenan se Dihvo vo, ne raĥn se van man se nduco vih:

42 —Ndedevahn se t̄ama ca ihyan, ate mañ se ne, hua ri rendedevahn se sahn. Ndete che cūaço che Rey yahn ihyan nación yahn Israel sahn ne, nchahn se nañ cruz çāva che cotahno vo sahn.

43 Rahn se te ndichahtino se Dendiohs mañ, che Daya ye sahn mañ. Mañ ne, ndihchero vo ndete che cūaço che yahino ye sahn, ndedevahn ye sahn.

44 Nde sahn duco che chenah yāh se dāma nduco ye ne, ndāhchenan se ihyan.

Chih Dihvo vo Jesucristo

45 Ro min ne, chi man numachahte iyehñse, canañ nde inguiyāhn, ne quendi nde nañ rahco ino a chino.

46 Ura min ama dito cah Dihvo vo, ne rañh ye:

—Elí, Elí, ¿lama sabactani? —che conahn tuhca: Dendiohs yáhn, Dendiohs yáhn, ¿dehco che chihcomañ ne u ne?

47 Nañh sahn che chenun se min ne, chihnevan se che tihca rañh ye, ne rañh se:

—Rah se ihyan profeta Elías.

48 Ndetahno chahn ama se, rano se, chehua se ama nañ che deca cuche deca, ne decañda se nduco vino che a nchuhnan yahn. Dechiche se tin ama nduco, cah se che tihve Dihvo vo.

49 Ate sahn chenhahn chahn ne, rañh se:

—Cuihcoman sahn. Ndiychero vo ndete che chi Elías ndedevahn ye sahn.

50 Ura min ne, ama dito cah Dihvo vo t̄ama yune, ne chih ye.

51 Ndetahno chendan tino che quendiho chete yaço. Chica nde yaço, chiya nde ndiyāhn, ndo o ndi. Namin ama nuhn yāhn mañ, ndah yāva mañ,

52 nane yayan mañ, ne ntuche ama yāhn tenāhn che chitahno ye Dendiohs cuahn che chahtenan ye iyehñse.

53 Ihyan chahn ne, nde ro che ntuche Dihvo vo, chihnde ro ye yañ Jerusalén, yañ yahn Dendiohs, ne ama yāhn ihyan ndihchero ye ihyan.

54 Me sahn capitān nduco sandaño yahn se che chenah se cudado Dihvo vo ne, ama dihya se chi che nuhn yāhn mañ, che chinahn vederihno chenhahn mañ, ne rañh se:

—Cūaço niyon te a ihyan cuh che Daya Dendiohs.

55 Ama yāhn ihyan ndahta vatendi ye ama lādo rendihche ye Dihvo vo. Ihyan chahn che chinan ye ihyan nañ ntiyon yahn ye, ne chinduco ye ihyan cuahn che chica ye estaño yahn Galilea.

56 Vañ ihyan chahn ne, nduco María yahn yañ Magdala mañ, María, ihyan ndahta yahn Zebedeo, ihyan min che chaco Jacobo nduco José mañ.

Chehche Dihvo vo Jesucristo

57 Cuahn che a chi chino ne, nda ama ihyan cuihca yahn yañ Arimatea, che duche ye José. Ihyan min ne, namin ritahno Dihvo vo.

58 Chahn ye nañ Pilato, chica ye permiso çāva che cuhche ye Dihvo vo. Tuhme chihquentiyon Pilato sandaño yahn se che necah se Dihvo vo ihyan.

59 Chahn ye, ndedevah ye Dihvo vo, chacotuhma ye ihyan nduco ama tino cua,

60 ne chacondihte ye ihyan chete ama yayan ra che ndihquentiyon ye che ndindah nañ yāva çāva mañ ye. Chihno min ne, necahde ye chende yayan me nduco ama tu chahno, ne conañ ye.

61 Min chihto yayan me, va María yahn yañ Magdala nduco María che t̄ama me.

Chahtenan sandaño cudado nañ yayan yahn Dihvo vo Jesucristo

⁶² Tama ro me, a ro che rahtetuhno ihyan ne, chahn chidocuyan ndinan nduco sahn fariseo nan Pilato,

⁶³ ne rahn se ri se sahn:

—Ihyan ndinan yahn nuhn, necahco nuhn nduhca che rahn sahn rihcheh min te cuino ino ro che coh se ne, ntuche se van tenahn.

⁶⁴ Chemin che cochi nuhn ndihchero nuhn ndih che co cudado yayan yahn se nde cuihno ino ro. Ndete che hua ne, denan cahn sahn apóstol yahn se, ndetendah se sahn chete rahn quenda se sahn, ne cahma se che ntuche se van tenahn, nde tahque cahnceh se ihyan che co ro menan.

⁶⁵ Rahn Pilato ri se sahn:

—Nga sandado chenun se min. Cuiquenda nchuhn sahn, cuahtenan se cudado yayan me nduhca che nahn ne.

⁶⁶ Tuhme chahn sahn chahn, chaconahn se sello chende yayan me, ne chaconahn se sandado chahn, din se cudado.

28

Ntuche Dihvo vo Jesucristo van tenahn

¹ Tama ro me, ro che ndeva ndate ne, cuahn Maria yahn yan Magdala nduco Maria che tama me vatiyan dahca nan yayan me.

² Adenan chiya ama ángel yahn Dihvo vo Dendiohs, chehnevi ye tu che ndi chendevah yahn yayan me, ne chihnde ye menan. Numanahn min ne, ama dito nuhn yahn.

³ Angel me ne, ama diyahn ro ye, ne tino yahn ye ne, ama cua nduhca che ro ihve.

⁴ Ndhichero sandado chahn ángel me, ne ama dihya se chi, nde tuno ndoh se che vah se. Van canedihya min ne, nde chih yute se man, nde chi i se man.

⁵ Rahn ángel me ri ye ihyan ndahta chahn:

—Hua dihya nchuhn co. A devano che nda ne ndihchero ne Dihvo vo Jesucristo, ihyan min che quenun yah ye.

⁶ Metah ye muhn, te a ntuche ye van tenahn nduhca che a rahn ye ro menan. Cochi ne ndihchero ne chete yayan nan che quendite ye. Metah ye min.

⁷ Tuhme cuahn ne tenun tenun no cahma ne co ne ihyan apóstol yahn ye che a ntuche ye van tenahn, ne cahn ye estado yahn Galilea tahque menan ca che co nchuhn. Min ndihchero ne ihyan. A chemin no che va che có nchuhn.

⁸ Ihyan ndahta chahn ne, quenun ca canedihya ihyan, te ama dihya ye chi. Tuhme conahn ye rano ye, ama yeno ye, quengo ye ndudo yahn ihyan apóstol.

⁹ Ura min chihnde ro Dihvo vo nan ihyan chahn, ne necah ye Dendiohs ihyan. Tuhme chahn nda ihyan chahn nan ye, ne chehntihya ye chahtemahn ye cah ye, ndeva ye yavenan ye.

¹⁰ Rahn Dihvo vo ri ye ihyan chahn:

—Hua dehve rahco nchuhn. Cuahn ne co ne ihyan apóstol yahn che cahn estado yahn Galilea, ne min ndihchero ye u.

Chinun chidocuyan ndinan sandado

¹¹ Numanahn che cuahn ihyan ndahta chahn ne, chenahn ama o sandado che chenun se cudado yayan me, chengo se chidocuyan ndinan chahn nducuaahn che chi.

¹² Chidocuyan ndinan chahn ne, ntuhno se nduco sahn intiyahn, ne ama ndeh tume cah se sandado chahn, ne rahn se ri se sahn:

¹³ —Nchuhn ne, cahma ne te chete rahn numanahn che vateyado ne ne, nda apóstol yahn sahn min, ndetendah se sahn, quenda se sahn.

¹⁴ Me ndete che cadino gobernador ne, cahmanan nuhn nchuhn, ne hua dehva co yahn ne.

¹⁵ Chetah sandado chahn tume me, ne chacotuhn se ndudo nduhca che cah cuande chidocuyan chahn sahn, ne chihnde ndudo me van ihyan nación yahn Israel nde man ro cuh.

Cah Dihvo vo Jesucristo vederihquentiyon ihyan apóstol yahn ye

¹⁶ Me ihyan apóstol chahn ne, cuahn ye estado yahn Galilea, tingüete nan che a rahn Dihvo vo nduco ye ro menan me.

¹⁷ Min ndihchero ye Dihvo vo, ne ndeva ye yavenan ye. Ate ama o ye ne, rahco ye te ndiyu ihyan min.

¹⁸ Tuhme chahn nda Dihvo vo nan ihyan chahn, ne rahn ri ye ihyan:

—U ne, nducote ndahco Dendiohs nducuahn vederihquentiyon che va vahchetero man, iyehse man, tãh ne,

¹⁹ chemin che rihquentiyón nchuhn che cahñ ne nducuahn nación, cacuahn ne ihyan cava che cotahno ye u. Cuedenune ne ihyan numacuahn vederihquentiyon yahn Dendiohs Chida man, Dendiohs Daya man, Vaco ndah yahn Dendiohs man.

²⁰ Namin cuicuahn ne ihyan che dinahn ye nducuahn che a chihquentiyón nchuhn. Cuedevano ne te hua cahcomán nchuhn, te conducó nchuhn ro ro, nde ro che nto iyehse. Tihca co.

NDUDO NDAH YAHN DIHVO VO JESUCRISTO CHE DIRUN SAN MARCOS

Juān Bautista ne, chihcoyañ ye ihyan cava che nevahneacun ye Dihvo vo Jesucristo

¹ Tuhca canan ndudo ndah yahn Dihvo vo Jesucristo, Daya Dendiohs:

² Ihyan profeta Isaías dirun ye tuhca:

Rahn Dendiohs ri ye Daya ye: “Dechúh ama sahn che cuahndudo se ndudo yahn numanahn che metah cahn, cava che cahcoyañ se ihyan che nevahneacun ye di.

³ Sahn min ne, conan se yahn nan che metah duhva, ne ndo dama ihyan, cahnevan ye ndudo yahn se. Cahma se tuhca: Cuihcoyañ nchuhn chedave yahn ne, te a cochi Dihvo vo.”

⁴ Ndudo min ne, chinahn cuahn che canan Juān Bautista rahndudo ye min yahn nan che metah duhva. Rahn ye ri ye ihyan che rahn ye rihnevan ye: —Cuento ino nchuhn nunde yahn ne, cuedenune ne cava che nchahco Dendiohs yahn ne.

⁵ Ihyan yan Jerusalén man, ihyan yan chenahn estado yahn Judea man, ama yahn ye rahn ye rihnevan ye che rahndudo Juān. Rentuma ino ihyan chahn nunde yahn ye, ne rehdenune Juān ihyan ico Jordán.

⁶ Juān ne, quenun ye ama tino che ndindah nduco yudo yahn ite che duche te camello, ne quenan chete ye ama ima. Reh ye yahcadañ, ne rih ye nedih yahn che va van chano.

⁷ Rahndudo ye tuhca:

—Caviyan deman ne, nda ama ihyan che tahque yudo vederihquentiyon quenan cuma ye che co u. U ne, nde hua rigonun chihvé nan ihyan min cava che conán ihyan nan ntiyon yahn ye.

⁸ U ne, atenan rehdenuné nchuhn, ate ihyan min ne, din ye che conun Vaco Ndah yahn Dendiohs nchuhn.

Chedenune Dihvo vo Jesucristo

⁹ Tahn min ne, chica Dihvo vo yan Nazaret, estado yahn Galilea, nda ye nan che quenun Juān, ne chehdenune Juān ihyan ico Jordán.

¹⁰ Cuahn che a ndiquendañ Dihvo vo van nune ne, ndihchero ye che ndondañ vahchetero, ne nduhca che ro ama icui ne, tihca chi ro Vaco Ndah yahn Dendiohs, chiya, quenun ihyan.

¹¹ Chihnevan ye ama ndudo che chica vahchetero che rahn:

—Di che Daya. Yahinó di. Ama yenó ndoque.

Chundah ne, tumarande se Dihvo vo Jesucristo

¹² Chihno min ne, din Vaco Ndah yahn Dendiohs che cuahn Dihvo vo yahn nan che metah duhva.

¹³ Min quenun ye chete che o raco ro, ne chundah, sahn min che duche se Satanás ne, retumarande se ihyan. Quenun Dihvo vo nan che vate ite chano, ne nda ángel, chinduco ye ihyan.

Dihvo vo Jesucristo ne, canan redin ye ntiyon yahn ye

¹⁴ Adiva che chaconuhn sandado Juān Bautista vacoyahn ne, conahn Dihvo vo estado yahn Galilea, ne min rahndudo ye ndudo ndah yahn vederihquentiyon yahn Dendiohs.

¹⁵ Rahn ye:

—A tuno ro. Man ne, a nun cahcantiyon Dendiohs chedave yahn ihyan. Cuento ino nchuhn nunde yahn ne. Cuitahno ne ndudo ndah yahn ye.

Dihvo vo Jesucristo ne, yahve ye cun sahn retah yahca cava che conduco se ihyan

¹⁶ Ama ro che quechica Dihvo vo cuahn chihto vine yahn Galilea ne, ndihchero ye Simón nduco dihno se, Andrés. Sahn chahn ne, sahn retah yahca, ne ura min ne, rih se yana yahn se chete vine me.

¹⁷ Tuhme rahn ye ri ye sahn:

—Cuhn vo nduco nchuhn. Cuinduco ne u, ne nduhca che redin ne ntiyon retah ne yahca ne, tihca cacuáhn nchuhn ntiyon che cuacotuhn ne ndudo yáhn, cava che cotahno ihyan u, conduco ye u.

¹⁸ Ndetahno chihcoman sahn chahn yana yahn se, ne cuahn se chinduco se Dihvo vo.

¹⁹ Tah cuahn cana nan min ne, ntaca ye o daya Zebedeo, Jacobo nduco Juan. Chenun se chete barco, rentahyon nan se yana yahn se.

²⁰ Yahve ye sahn, ne chihcoman se chida se Zebedeo chete barco me nduco mozo yahn ye, ne cuahn se chinduco se ihyan.

Ama sahn che quenun vaco chihnga sahn

²¹ Adive ne, nda Dihvo vo yan Capernaum nduco sahn chahn. Ndate ndate, ro che rahtetuhno ihyan ne, rahn Dihvo vo yaco yahn ihyan nación yahn Israel, ricuahn ye.

²² Rahn ino nducoyaca ihyan che rihnevan ye che ricuahn Dihvo vo, te tumacadino ye che quenun cuma ye vederihquentiyon che tahque chahte che co che quenun cuma sahn devano ley che dirun Moisés.

²³ Min chete yaco me ne, quenun ama sahn che quenun vaco chihnga sahn. Cah se:

²⁴ —Ndih, Jesús yahn yan Nazaret, ¿dehco che recahdenun ne yune yahn nuhn? ¿Taca che cochi ne decuihno ne nuhn? A devano duh ndih. Ndih ne, ihyan ndah che a va cade che dechuh Dendiohs cava che ndedevahn ye ihyan iehhse.

²⁵ Dihvo vo ne, chihco yudo ye yahn vaco chihnga me, ne rahn ye:

—¡Cuihnde dihn chende! ¡Cuendiquendah sahn tih!

²⁶ Tuhme din vaco chihnga me che ama rendoh sahn min. Ama cah, ne ndiquendah sahn.

²⁷ Rahn ino nducoyaca ihyan che chenun ye min, ne tumerune vih ye:

—¿Deh che ri ne? ¿Deh conahn ndudo ra che ricuahn ihyan tih ne? ¡Ama chahte vederihquentiyon quenun cuma ye! ¡Rihquentiyon ye nde vaco chihnga che chenun ihyan che ndiquendah, ne redinahn yahn ye!

²⁸ Nduco tihca ne, ndudo yahn vederihno che redin Dihvo vo ne, ama nun chetuhn numachahte estado yahn Galilea.

Din Dihvo vo Jesucristo che ndoyahn indahn Simón

²⁹ Cuahn che ndiquendah Dihvo vo chete yaco me ne, cuahn ye nduco Jacobo man, Juan man, ndevaco Simón nduco Andrés.

³⁰ Indahn Simón ne, quendite ye, netah cah ihno ihyan. Ihyan ndevaco ye ne, rahn ye ri ye Dihvo vo che cah ye.

³¹ Tuhme chahn nda Dihvo vo, ne chetah ye tah ihyan min, ndedecuan ye ihyan. Ndetahno chavi ihno me yahn ye, ne cah ye, cheh ihyan chahn.

Din Dihvo vo Jesucristo che ndoyahn ama yahn ihyan cah

³² Cuahn che a chi chino me, ura che a chehche yahn ne, ihyan viyan ne, quenda ye ama yahn ihyan cah man, ihyan che chenun vaco chihnga ihyan man, nan Dihvo vo.

³³ A nahn nducoyaca ihyan yan ne, ndo dama ye chendevah.

³⁴ Din Dihvo vo che ndoyahn ihyan cah chahn, che ama ndeh nan cah ndi ye, ne ndetendah ye vaco chihnga che chenun ihyan. Ate hua cah yune ye che cahma duh ihyan ye, te a devano che Daya Dendiohs ihyan.

Dihvo vo Jesucristo ne, quechica ye estado yahn Galilea, rahndudo ye

³⁵ Ama vatiyan dahca, ura che metah co dave ndah ne, necuan Dihvo vo, cuahn ye cuahn chihto yan, ne min covah ye.

³⁶ Tah cuahn adive ne, cuahn Simón nduco combiero yahn ye, quenuhn ye ihyan.

³⁷ Cuahn che ntaca ye ihyan ne, rahn ye ri ye ihyan:

—Ama yahn ihyan nahn ndihchero ye ndih.

³⁸ Ate rahn Dihvo vo ri ye ihyan chahn:

—Cuhn vo nduco nchuhn tama te o yan che nino cava che cuahndudó min, te cava chemin che cochí.

³⁹ Tuhme cuahn Dihvo vo nduco ihyan chahn numachahte estado yahn Galilea. Rahndudo ye chete yaco yahn ihyan nación yahn Israel, ne rendetendah ye vaco chihnga che chenun ihyan.

Din Dihvo vo Jesucristo che ndoyahn ama sahn che ndi se cah che rechayute

⁴⁰ Ama yune ne, ama sahn che ndi se cah che rechayute ne, cuahn nda se nan Dihvo vo. Chehntihya se nan ye, ne rahn se:

—Ndete che nahn ne ne, co din ne che ndoyahn.

⁴¹ Dihvo vo ne, quenah vahino ye sahn. Nahn tah ye sahn, ne rahn ye:

—Taca hua. Conán di. Man ne, a ntoyehn.

⁴² Ndetahno chavi cah che rechayute se me, ne ndoyahn se.

⁴³ Tuhme ndedechuh ye sahn cuahn ndevaco se. Ama cah ye cudado sahn, ne rahn ye:

⁴⁴ —Condihche. Condiccate cahme nduco nde ama ihyan taca chi che ndoyehn. Tahque ndah ne, cuehn nan chidocuyan, ndihche ye di, ne cah vedino che ndihquentiyon Moisés, cava che codevano nducoyaca ihyan che a ntoyehn.

⁴⁵ Sahn min ne, conahn se, ate hua dinahn se. Canan rente se nduhca che chahno se chi, ne ama chetuhn ndudo me, nde ametah chi chenda Dihvo vo nde ama yan ura che co nchanan ihyan viyan ihyan. Tahque ndah ye ne, quechica ye ama lado, yahn nan che metah duhva. Ate atanoca nduh, min rahn ihyan yahn nducuahn yan rendihchero ye ihyan.

2

Din Dihvo vo Jesucristo che ndoyahn ama sahn che ndi cheche se

¹ Chihno neve ro ne, chenda tun Dihvo vo yan Capernaum, ne ihyan yan min ne, checadino ye che quenun ye ama cuan vah.

² Ndetahno ndo dama ama yahn ye nde nan che cuahtendi ye chendevah ametah. Rahndudo Dihvo vo Ndudo yahn Dendiohs, rihnevan ihyan chahn.

³ Ura min ne, nda cun ihyan, nda ye ama sahn che ndi cheche se.

⁴ Ate nducote ama yahn ihyan chenun ye min ne, hua chi chuh ye chendevah, chenda ye nduco se nan Dihvo vo. Tuhme nda ye sahn tin vah, ne min ntihne ye ama ndi ima vah cuahn nan che quenun Dihvo vo. Cuahn

che ndahcondah ye ama ive nan ima vah ne, ndedevah ye yundo nan che quendite combiero yahn ye, nda se nan Dihvo vo.

⁵ Cuahn che ndihchero Dihvo vo nduhca che ritahno ihyan chahn ne, rahn ye ri ye sahn:

—Dayá, a nchahcó nunde yehn.

⁶ Min vate ama o sahn devano ley che dirun Moisés, ne rendedecadino se:

⁷ “¿Dehra cuande che tihca rahn sahn tih?, te reducherino se Dendiohs che tihca rahn se. Ametah nde ama ihyan iyehense che co nchahco ye nunde, atenan Dendiohs.”

⁸ Ndetahno checadino Dihvo vo che tihca rendedecadino sahn chahn, ne rahn ye ri ye sahn:

—¿Dehco che tihca rendedecadino nchuhn?

⁹ Co rahnco ne che tahque ndah che cahmá có sahn che necuan se, cotaḥ se yundo yahn se, ne caça se, che co che cahmá che a nchahcó nunde yahn se.

¹⁰ Man ne, cava che cadino nchuhn te, u che rinducó nducoyaca ihyan, va vederihquentiyon yahn cava che nchahcó nunde yahn ihyan muhn iyehense cuh ne, condihche ne.

Tuhme rahn ye ri ye sahn che ndi cheche me:

¹¹ —Rahn ri di, cuenecuen, cotaḥ yundo yehn, ne conahn ndevaque.

¹² Ndetahno necuan se, chetaḥ se yundo yahn se, ne conahn se. Chuh se mendahn yahn nducoyaca ihyan che chenun ye min, ne ama rahn ino ye. Rende va ye yavenan Dendiohs numacuahn vedeyeno, ne rahn ye:

—Nde ama yune hua ndihchero vo vederihno che tuhca.

Dihvo vo Jesucristo ne, yahve ye Levi che conduco se ihyan

¹³ Cuahn tun Dihvo vo cuahn chihto vine yahn Galilea, ne ama yahn ihyan rahn ye rendo dama ye nan ye. Min ricuahn Dihvo vo ihyan chahn.

¹⁴ Cuahn nan che chuh Dihvo vo ne, ndihchero ye Leví, daya Alfeo. Va se nan mesa nan che rica se tume cade iyo. Rahn ye ri ye sahn:

—Cuhn vo, condoque u.

Ndetahno necuan se, chinduco se ihyan.

¹⁵ Ama yune cuahn che va Dihvo vo chete vaco Leví ne, reh ye nan mesa nduco ihyan che rahn nduco ye. Ama yahn sahn nunde, chenun van sahn rica tume cade iyo man, vate se nduco ye, te ama yahn ri se che chinduco se ihyan.

¹⁶ Sahn devano ley che dirun Moisés man, sahn fariseo man ne, ndihchero se che reh Dihvo vo, rih ye dama nduco nducoyaca sahn nunde chahn, ne rahn se ri se ihyan che rahn nduco ye:

—Hua ndahca che reh sahn ricuahn yahn nchuhn, rih se dama nduco sahn rica tume cade iyo man, sahn nunde chenahn man.

¹⁷ Cuahn che chihnevan Dihvo vo che tihca rahn sahn chahn ne, rahn ye ri ye sahn:

—Ihyan che hua cah ye ne, hua rendotenan ye sahn doctor. Ate ihyan che cah ye ne, rendotenan ye sahn. Atihnoca u, te nda, conan ihyan nunde cava che nto ino ye nunde yahn ye, ndiyu cava ihyan che metah nunde yahn ye che rahnco ye.

Rahn Dihvo vo Jesucristo deh cuande che hua rahte ihyan apóstol yahn ye yahte

¹⁸ Ama yune ne, sahn fariseo man, sahn che rahn nduco Juan Bautista man ne, rahte se yahte. Ro min ne, cuahn ama o ihyan, ne rahn ye ri ye Dihvo vo:

—¿Dehco che hua rahte sahn che rahn nduco ne yahte?, te sahn fariseo man, sahn che rahn nduco Juan Bautista man ne, rahte se yahte.

19-20 Ndahconan Dihvo vo, ne rañn ye ri ye ihyan chahn:

—A devano nchuhn te ihyan che nduco ye sahn rihnevaco ne, hua rahte ye yahte. Ate ndete che denan nda sahn che tan se nduco se, nda se sahn ne, tuhme cuahte ye yahte. Atihnoça ihyan che rinduco ye u, te numanahn che nducó ihyan ne, metah deh cuande che cuahte ye yahte. Ate cuahn che nda sahn che hua ri rendihche se u, nda se u ne, tuhme che cuaco, cuahte ye yahte.

21 Ndete che nedin dama nchuhn ndudo ra che ricuáhn nduco costumbre ndico yahn ne ne, anduhneca ndete che neçahnán ne ama ndi tino ra nan ama tino ndico. Ndete che tihça din ne ne, cuahn che ndeva doh tino ra me ne, nde tahque ndeh tino ndico me.

22 Namin anduhneca ndete che cuih ne vino ra chete ima ndico, te din vino me che condan ima ndico me, ne conda nde vino me man, nde ima me man. Chemin che vino ra ne, tuhme che cuih ihyan chete ima ra.

Ihyan apóstol ne, tico ye indo trigo, cheh ye ro che rahtetuhno ihyan

23 Ama ro che rahtetuhno ihyan ne, chuh Dihvo vo nan va chendata. Nducote chi cuico ihyan apóstol yahn ye ne, tico ye ama o indo trico, reh ye ndute yahn.

24 Ndihero ama o sahn fariseo che tihça din ye, ne rañn se ri se Dihvo vo: —Condihe ne. ¿Deh cuande che tihça redin sahn che rañn se nduco ne?, te man ne, ro che rahtetuno ihyan, ne a ndihquentiyon Dendiohs che hua din vo ntiyon ro cuh.

25-26 Rañn Dihvo vo ri ye sahn chahn:

—Anduhneca ndete che hua rendihchenan nchuhn nan Ndudo yahn Dendiohs nduhça che din David ro che quenán Abiatar chidocuyan che tahque ndinan. Chi cuico ye, ne ametah che cheh ye. Chemin che chenda ye chete yaco, ne cheh ye pan che va min. Namin cah ye, cheh combiero yahn ye. Pan chemin chan ne, a ndi vedino nan Dendiohs, ne a nihnde cade che hua có cheh nde ama ihyan, atenan chidocuyan. Ate nde nduco nduh ne, hua quendihco ye nunde.

27 Quendi Dihvo vo, ne rañn ye nduco sahn chahn:

—Chihco Dendiohs ro che cuahtetuhno ihyan çava che ndah yahn ihyan, ndiyu çava che ndere ndeva ye ro min.

28 Cudevano nchuhn te a u che rinducó nducoyaca ihyan che rihquentiyón nde nducuahn che redin ihyan ro che rahtetuhno ye.

3

Din Dihvo vo Jesucristo che ndoyahn ama sahn che ndi cuma tah se

1 Tama ro che rahtetuhno ihyan ne, chenda Dihvo vo chete yaco, ne min quenun ama sahn che ndi cuma tah se.

2 Namin min chenun ama o sahn fariseo, nahn ndihchero se ndete che din Dihvo vo che ndoyahn sahn min ro che rahtetuhno ihyan, çava che çaca nunde se yahn ye che rahcotahn ye yahn ley che dirun Moisés.

3 Rañn Dihvo vo ri ye sahn che ndi cuma tah me:

—Cuenequen. Cuandi mendahn.

4 Tuhme tumerune ye sahn chahn:

—¿A ndahça che ndah din vo ro che rahtetuhno ihyan, o din vo che hua ndah ne? ¿A conan vo ihyan, o çahcoman vo ihyan che coh ye ne?

Ate hua ntaquino se deh che ndahconan se yahn ye.

5 Chi tan Dihvo vo, ne chaconan ye ndihchero ye sahn chahn. Ama chi ran ye yahn che cheche chedave yahn se. Tuhme rañn ye ri ye sahn min:

—Cuacondihque tah.

Chacondihco tah se, ne ndetahno ndoyahn se.

⁶ A ura min no ndiquendah sahn fariseo chahn chete yaco me, ne ndo dama se nduco sahn che chinduco se Herodes, ntuhno se nduco vih taça din se che cahno se Dihvo vo.

Din Dihvo vo Jesucristo che ndoyahn ama yahn ihyan chihto vine yahn Galilea

⁷ Adiva ne, cuahn Dihvo vo nduco ihyan apóstol yahn ye chihto vine yahn Galilea, ne ama yahn ihyan che vate ye estado yahn Galilea cuahn ye dama nduco ye.

⁸ Namin ihyan che vate ye estado yahn Judea man, ihyan che vate ye yan Jerusalén man, ihyan che vate ye yahn yahn Idumea man, ihyan che vate ye tama lado ico Jordán man, ihyan che vate ye nino yan Tiro man, yan Sidón man ne, ama yahn ye checadino ye yahn vederihno che redin Dihvo vo, ne rahn ye rendihchero ye ihyan.

⁹ Nducote ama chidama ihyan ne, rahn Dihvo vo ri ye ihyan apóstol yahn ye che cahcoyan ye ama barco nan che conun ye, te ama ndito cahche ihyan nan ye.

¹⁰ A nedin Dihvo vo che ndoyahn ama yahn ihyan chahn, ne chemin che nducoyaca ihyan cah che chenun ye min ne, nde tuno regunda vih ye che nahn nahn tah ye ihyan cava che ndoyahn ye.

¹¹ Namin nduco ihyan che chenun vaco chihnga ihyan, ne rahn nda ye nan Dihvo vo, rendave ye ndiyahn, ne rahn ye ri ye ihyan numa dito ye:

—Ndih che Daya Dendiohs.

¹² Ate Dihvo vo ne, ama chihco yudo ye yahn vaco chihnga chahn che hua cahma duh ihyan ye.

Dihvo vo Jesucristo ne, tendahnun ye ndichio ihyan apóstol yahn ye

¹³ Chihno min ne, cocha Dihvo vo ama tingüete. Min yahve ye ihyan che nahn ye, ne nda ihyan chahn nan ye.

¹⁴ Van ihyan chahn tendahnun ye ndichio ihyan che conduco ye ihyan man, che dechuh ye ihyan, cuahndudo ye ndudo yahn ye man.

¹⁵ Namin cah ye vederihquentiyon, cuahtenan cuma ihyan chahn cava che ndetendah ye vaco chihnga che chenun ihyan man, cava che din ye che ndoyahn ihyan cah man.

¹⁶ Van nducoyaca ihyan che tendahnun ye ne, nduco ama ihyan che duche ye Simón. Chaconahn Dihvo vo che duche ihyan min Pedro.

¹⁷ Tama ye ne, duche ye Jacobo, daya Zebedeo. Tama ye ne, duche ye Juan, dihno Jacobo. Ihyan che o chahn ne, chaconahn Dihvo vo che duche ye Boanerges, che nahn cahma Ihyan che doh ino ye.

¹⁸ Tama te o ye ne, duche ye Andrés man, Felipe man, Bartolomé man, Mateo man, Tomás man, Jacobo, che daya Alfeo man, Tadeo man, tama Simón, ihyan min che chinduco ye partido yahn Cananeo ro menan me man.

¹⁹ Van ihyan chahn ne, namin nduco ama se che duche se Judas Iscariote. A sahn min che ndihcue ndeh se Dihvo vo adiva.

Ihyan yahn Dihvo vo Jesucristo ne, ndedecadino ye yahn ye che metah va cuaco dave yahn ye

Chihno min ne, conahn Dihvo vo nduco ihyan apóstol che ndichio chahn.

²⁰ Cuahn che a nta ye ne, ndaconan ndo dama ama yahn ihyan, che nde hua rinun yahn ye che cheh ye.

²¹ Cuahn che checadino ihyan yahn ye che nde metah rinun yahn che cheh ye ne, cuahn ye quengua ye ihyan, te rahco ye te ametah va cuaco dave yahn ye.

Sahn devano ley che dirun Moisés ne, rahñ se te quenun vaco chihnga Dihvo vo Jesucristo

²² Ama o sahn devano ley che dirun Moisés, che chica se yan Jerusalén ne, rahñ se yahn Dihvo vo:

—Ihyan tih ne, quenan cuma ye vederihquentiyon yahn chundah, sahn min che ndinan se yahn vaco chihnga. Chemin che ri rendetendah ye vaco chihnga che chenun ihyan.

²³ Tuhme yahve Dihvo vo sahn chahn, ne rahñ ye ri ye sahn:

—A devano nchuhn che ndiyu chundah che rendetendah se vaco chihnga.

²⁴ Ihyan che vate ye rihquentiyon ye ne, ndete che cuahtecuhma ye van man ye nduco vih ne, hua co quendi ye cahcantiyon ye.

²⁵ A namin no tun ihyan che chenun ye ama vah ne, ndete che cuahtecuhma ye van man ye nduco vih ne, hua co quendi ye cuahtenun ye min nduco vih.

²⁶ A namin no tun chundah ne, ndete che cuhma se nduco vaco chihnga che rihquentiyon se ne, cuihno vederihquentiyon yahn se.

²⁷ Namin cah Dihvo vo ama ejemplo sahn chahn, rahñ ye:

—Ama sahn duco che conda se chete vaco ihyan che detino ye ne, atenan che dechiche se ihyan, tuhme co duco se yahn ye.

Tihca rahñ ye te anduhneca ndete che a dechiche ye chundah, ndahco ndiya ye vederihquentiyon yahn se.

²⁸ Quendi Dihvo vo rahñ ye:

—Cuaco rahñ ri nchuhn te nducuahn nunde che rahtendihco ihyan, nde nducuahn che chihnga rahñ ye ne, co nchahco Dendiohs yahn ye.

²⁹ Ate ihyan che ducherino ye Vaco Ndah yahn Dendiohs ne, ametah nchahco cuahno Dendiohs yahn ye.

³⁰ Tihca rahñ Dihvo vo, te sahn chahn ne, rahñ se te quenun vaco chihnga ihyan.

Nda chaco Dihvo vo Jesucristo nduco dihno ye

³¹ Chihno min ne, nda chaco Dihvo vo nduco dihno ye. Chahtendi ye cuahn chevah, ne dechuh ye che cah ihyan.

³² Ihyan che vate ye chihto nan Dihvo vo ne, rahñ ye ri ye ihyan:

—Chaco ne nduco dihno ne, vatendi ye cuahn chevah, rinuhn ye ndih.

³³ Rahñ Dihvo vo ri ye ihyan chahn:

—Cuaco te ihyan min che chacó man, ihyan chahn che dihno man.

³⁴ Tuhme chaconan ye rendihchero ye ihyan che vate ye cuahn chihto nan ye, ne rahñ ye:

—Nducoyaca ihyan che chenun ye muhn ne, rihno ihyan anduhneca ndete che chacó man, anduhneca ndete che dihno man,

³⁵ te adecoduhno ihyan che runecade cochica ye nduhca che nahn Chida ne, rihno ihyan anduhneca ndete che dihno man, anduhneca ndete che cahvé man, anduhneca ndete che chacó man.

4

Ejemplo yahn ama ihyan che retuhdo ye trigo

¹ Tama yune cuahn che ricuahn Dihvo vo chihto vine yahn Galilea ne, ama yahn ihyan chidama ye chihto nan ye. Nducote ama chito ihyan ne, chemin

che chenda Dihvo vo chete ama barco che va min, cuahn ye ino cun metro cuahn chihto, ne quendi ye ricuahn ye. Nducoyaca ihyan che chidama ye ne, vatendi ye ndiyahn chihto vine me, rihnevan ye.

² Dihvo vo ne, ama ndeh nan dehtenduh chicuahn ye ihyan chahn nduco ejemplo. Tuhca rahn ye ri ye ihyan chahn:

³ —Cuihcovan nchuhn. Cuahn ama ihyan, retuhdo ye ndute ndata.

⁴ Cuahn che retuhdo ye ne, chera neve ndute chihto yune, ne nda yahda, cheh te.

⁵ Chera te neve ndute nan che tah ra yahn chenun van tu. Chemin ne, nun quenda, te hua ndeh yahn chendih.

⁶ Ate cuahn che quenda yahn ne, yuche yan, ne nducote metah cotah yano dihyoduto ne, chihno tih.

⁷ Te neve ndute ne, chera van chano yan. Chendih chano yan me, ne hua chi yahn.

⁸ Ate ndute che chera nan yahn ndah ne, ama ndah chi. Ama o duto ne, chi ndico ndiche ndute yahn. Tama te o ne, chi ino raco yahn. Tama te o ne, chi ama ciento yahn.

⁹ Tuhme rahn Dihvo vo ri ye ihyan chahn:

—Nducoyaca nchuhn, condedecadino ndah ne cava che conahn ne ejemplo min.

Dihvo vo Jesucristo ne, cah cuande ye deh cuande che deman nduco ejemplo ricuahn ye

¹⁰ Adiva cuahn che a nahn nducoyaca ihyan chihno conahn ye ne, quenah Dihvo vo nduco nduh che ndichio ihyan apostol yahn ye man, nduco te neve ihyan man. Chica ihyan chahn che cah cuande ye ihyan yahn ejemplo min.

¹¹ Rahn Dihvo vo ri ye ihyan:

—Cade te Dendiohs che co devano nchuhn yahn vederihquentiyon yahn ye. Ate ihyan che hua rinduco ye u ne, ricuahn ihyan deman nduco ejemplo,

¹² cava che ndihchero no ye, ate anduhneca ndete che hua ronah ye man, cahnevano no ye, ate hua conahn ye man. Nduco tihca ne, hua nto ino ye nunde yahn ye, ne hua nchahco Dendiohs yahn ye.

Recah cuande Dihvo vo Jesucristo deh conahn ejemplo yahn ihyan che retuhdo ye ndute ndata me

¹³ Tuhme rahn Dihvo vo ri ye ihyan chahn:

—Nducote hua chenahn nchuhn ejemplo min ne, ctaca co conahn ne ejemplo chenahn che va che nete?

¹⁴ Ihyan che retuhdo ye ndute ndata me ne, nduhca ihyan che rahndudo ye Ndudo yahn Dendiohs, rihnevan ama yahn ihyan.

¹⁵ Ama o ihyan chahn ne, ndetahno renda chundah, ne redin se che rinah ye ndudo che a chihnevan ye.

¹⁶ Ndute ndata che chera van tu me ne, nduhca ndudo me che rihnevan tama te o ihyan che renevahnecun ye numacuahn vedeyeno.

¹⁷ Ate nduhca ama chendata che hua rengu, che metah cotah yano dihyoduto ne, tihchan ihyan chahn, te hua riquendi ye. Cuahn che rechuhrihn ye, o ndere redin ihyan nduco ye cava ndudo me ne, ndetahno rihcoman ye.

¹⁸ A namin no tun ndute che chera van chano yan me ne, nduhca ndudo me che rihnevan tama te o ihyan.

¹⁹ Ama rendedecadino ihyan chahn yahn ntiyon yahn ye ro ro man, rihncheh man ye ihyan cava vedecuihca che va iyehse cuh man, nahn co yahn ye ama ndeh nan dehtenduh che va man. Chemin che hua ri redin ndudo me che ndah nduco ye.

²⁰ Ate ndute che chera nan yahn ndah me ne, nduhca ndudo me che rihnevan tama te o ihyan. Nduhca ama chendata che ri ndico ndiche ndute yahn, nduhca tama che ri ino raco yahn, nduhca tama che ri ama ciento yahn ne, tihca redin ndudo me che ndah nduco ihyan chahn.

Ejemplo yahn candil

²¹ Namin nte Dihvo vo tama ejemplo. Rahn ye ri ye ihyan:

—Nde ama ihyan hua renahn yahn ye candil cava che tihyon ye man cajon, o man yundo. Renahn yahn ye cava che cahco ye nan che co ro dave numacuahn chete vah.

²² A tihnocá nducuahn ndudo che chenun ndeh che lado yahn ihyan, te andahre hua renahn ye meniyon, ate nda ro che va che conahn ye.

²³ Nducoyaca nchuhn, condecadino ndah ne deh conahn ejemplo cuh.

²⁴ Quendi Dihvo vo rente ye nduco ihyan chahn, ne rahn ye:

—Cuihco nchuhn cudado, te nahn che nduco cudado cahnevan ne Ndudo yahn Dendiohs. Ihyan che cahnevan ye nduco cudado ne, ndah conahn ye, nde tahque ndeh ca vededevano cah Dendiohs che conahn ye.

²⁵ Tihca, te ihyan che devano ye vededevano yahn Dendiohs ne, nde tahque ndeh ca cah Dendiohs che codevano ye. Ate ihyan che hua devano ye ne, nde conan ye dehtenduh che rihnevan ye.

Ejemplo yahn chendata che rihta

²⁶ Quendi Dihvo vo rente ye nduco ihyan chahn, ne rahn ye:

—Nduhca ndute ndata che rino ama ihyan ne, tihca vederihquentiyon yahn Dendiohs.

²⁷ Ihyan min ne, riyado ye vino, ne ro ne, renecuan ye. Andahre hua devano ye taca va chendata yahn ye, ate chemin ne, riquendah, ne rihta.

²⁸ Yahn me ne, redin che ri yahn. Menan ne, riquendah yata yahn, ne adive ne, riquendah yama yahn. Tuhme ri ndute yahn.

²⁹ Cuahn che a cuma ne, ndetahn cahca ihyan, te a nda ro yahn.

Ejemplo yahn ndute ndata che duche mostaza

³⁰ Tuhme rahn Dihvo vo ri ye ihyan chahn:

—Nté tama ejemplo cava che codevano nchuhn taca vederihquentiyon yahn Dendiohs.

³¹ Nduhca ndute ndata che duche mostaza che rino ihyan ne, tihca vederihquentiyon yahn Dendiohs. Chemin ne, tahque cahya che co tama nan ndute ndata che va iyehense.

³² Ate adive che rehche ne, rihta nde tahque ri chahte che co tama nan chendata. Ama rihta nde ri redin yahda ndaque te van dune.

Nduhca che rente Dihvo vo Jesucristo ejemplo

³³ Nduco ndeh nan ejemplo nduhca ejemplo chahn ne, ricuahn Dihvo vo Ndudo yahn Dendiohs ihyan chahn nduhneva che co conahn ye.

³⁴ Deman nduco ejemplo ricuahn ye. Ate cuahn che a deman ye nduco ihyan apóstol yahn ye ne, recah cuande ye ihyan chahn nducuahn.

Dihvo vo Jesucristo ne, chihco dihn ye yuhne tan

³⁵ Ro min cuahn che chi man ne, rahn Dihvo vo ri ye ihyan apóstol yahn ye:

—Cuhn vo nduco nchuhn viche lado cah.

³⁶ Tuhme chihcoman ihyan chahn nducoyaca ihyan che chenun ye min, ne chahtenun ye chete barco nan che quenun Dihvo vo, cuahn ye nduco vih. Namin cuahn tama te o barco nduco ye.

³⁷ Ura min canan ama rano yuhne, ne ndedecuan nune vine me. Chenda nune chete barco me, nde a rito.

³⁸ Dihvo vo ne, quenun ye cuahn cah barco me, quiyado ye, queta ye ama almada. Ndedetuhche ihyan chahn ihyan, ne rahn ye ri ye ihyan:

—Ihyan Ricuahn, ¿a hua cuande yahn ne che ndere coh vo muhn?

³⁹ Tuhme necuan Dihvo vo, chihco dihn ye yuhne me, ne rahn ye ri ye vine me:

—Cuihnde dihn. Ngüen.

Ndetahno chehuan yuhne me, ne ama quendite dihn vine me.

⁴⁰ Rahn Dihvo vo ri ye ihyan chahn:

—¿Dehco che redihya nchuhn ri? ¿A hua ritahno ne?

⁴¹ Tuhme ama rahn ino ihyan chahn, ne rahn ye ri ye vih:

—¿Duhra ihyan cuh che nde yuhne, nde vine, redinah che rihquentiyon ye?

5

Ndetendah Dihvo vo Jesucristo ama yahn vaco chihnga che chenun ama sahn yan Gadara

¹ Nda Dihvo vo nduco ihyan apóstol yahn ye tama lado viche vine me, yahn yahn yan Gadara.

² Cuahn che ndiquenda ye chete barco me ne, nda ama sahn che chenun vaco chihnga sahn, chica se nan yayan.

³ Min nan yayan che vaco se. Nde ama ihyan hua co dechiche ye sahn, nde huane nduco cadena.

⁴ Ama ndeh yune redechiche ihyan tah se man, cah se man, ate rihno rendeh se cadena. Nde ama ihyan hua richa ye cahco dihn ye sahn.

⁵ Nde ro nde rahn rechica se van chano man, nan yayan man, rah se man, renun yah man se sahn nduco tu man.

⁶ Ate ro min cuahn che nda Dihvo vo ne, chinan se ihyan, ne cuahn se rano se chehntihya se nan ye.

⁷ Numa dito se cah se:

—Jesús, Daya Dendiohs che ama yudo ye, ¿dehco che recahdenun ne yune yahn? Nde muhn nde nan Dendiohs, cahma có ndih che hua din ne che chuhrihn.

⁸ Tihca rahn se, te Dihvo vo ne, a chihco yudo ye vaco chihnga chahn, ne rahn ye:

—Vaco chihnga, ¡cuendiquenda nchuhn! ¡Cuihcoman ne sahn tih!

⁹ Tumerune ye sahn:

—¿Deh doche ne?

Ndahconan se yahn ye:

—Legión duché, te ama yahn ri nuhn.

¹⁰ Tuhme ama rica se che hua dechuh ye vaco chihnga chahn ama lado.

¹¹ Min nino van chano ne, chenan ama yahn cuche reh te.

¹² Ama rica vaco chihnga chahn ihyan:

—Cuede chuh ne nuhn cava che conda nuhn cuche sih.

¹³ Cah yune Dihvo vo, ne ndiquenda vaco chihnga chahn sahn min, ne chenda cuche chahn. Tuhme nduh che o mil cuche chahn ne, cochahn te rano te, cheranun te chete vine me, ne chih nducoyaca te.

¹⁴ Sahn che redin se cudado cuche chahn ne, dihya se chi, ne chano se. Cuahn se, ngu se ndudo yahn ihyan che vate ye viyan man, rancho man.

¹⁵ Tuhme cuahn ihyan chahn ndihchero ye deh che chi. Cuahn che nda ye nan Dihvo vo ne, ndihchero ye sahn che chenun vaco chihnga sahn ro

menan me. Min va se, a ntonun se tino yahn se. A va cuāco dave yahn se, ne dihya ye chi.

¹⁶ Tuhme ihyan che ndihchero ye deh che chi ne, necah cuande ye ihyan che ndā chahn, deh che chi yahn sahn min man, deh che chi yahn cuche chahn man.

¹⁷ Tuhme canan ihyan chahn rica ye Dihvo vo che ndāca ye yan min, nahn ye.

¹⁸ Cuahn che chenda Dihvo vo chete barco me che nahn ye ne, rica sahn min ihyan che cah yune ye che conduco se ihyan.

¹⁹ Ate hua cah yune ye, ne rahn ye ri ye sahn:

—Conahn cuahn ndevaque nan che chenān ihyan yehn. Cahme co ihyan yahn vederihno chahte che din Dihve Dendiohs ndoque man, nduhca che quenan vahino ye di man.

²⁰ Tuhme conahn se yan vaco se nino yan Decápolis. Ama rente se yahn vederihno chahte che din Dihvo vo nduco se, ne ama chahn ino nducoyaca ihyan.

Rica Jairo che din Dihvo vo Jesucristo che ndoyahn tahn dihn daya se

²¹ Cuahn che ntā Dihvo vo laḍo cuh yahn vine me ne, ndo dama ama yahn ihyan nan ye.

²² Ura min ne, nda ama sahn ndinan yahn yaco che duche se Jairo. Cuahn che ndihchero se Dihvo vo ne, cuahn se chehtihya se nan ye.

²³ Chica se favor ihyan, ne rahn se:

—Tahn dihn dayá, ama tahn ndi te, adeche coh te. Cuhn vo nduco ne, nahn tah ne tahn cava che ndoyahn te.

²⁴ Tuhme cuahn Dihvo vo nduco se, ne ama yahn ihyan nduco ye ihyan, nde tuno chi chiche cuahn ye.

²⁵ Min van ihyan chahn ne, nduco ama ndahta che cah te. Rendora te yun ro ro. A ri ndichio nduyo che quenan cah min tahn.

²⁶ Ama dico sahn doctor tahn, ate ndere rechuhrihn te, te hua ndoyahn te. Chihno toh te nducuahn yahn te che va, ate nde tahque ri dito cah yahn te.

²⁷ A chihnevan tahn min che rente ihyan yahn vederihno che redin Dihvo vo, ne din te fuerza che ndā te van ihyan. Chahn ndā te cuahn vedame Dihvo vo, ne nahn tah te tino yahn ye.

²⁸ Tihca din te, te rahco te: “Ndete che co cade nahn tahn a mare tino yahn ye ne, ndoyahn.”

²⁹ Ndetahno chehuan cah yahn te, ne checadino te che a ndoyahn te.

³⁰ Tuhme checadino Dihvo vo che chinahn ama vederihno, ne ndaconan ye tumerune ye:

—¿Duh nahn tah tino yahn ne?

³¹ Rahn ihyan apóstol yahn ye ri ye ihyan:

—A rendihchero ne te ama ndito cahche ihyan nan ne. ¿Dehco che tumerune ne: “Duh nahn tah tino yahn ne?”

³² Ate raconan muhn raconan min Dihvo vo, rendihchero ye cuahn chihto nan ye duh che nahn tah tino yahn ye.

³³ Tahn min ne, nde tuno rendoh te che vah te. Chahn ndā te, chehtihya te nan ye, ne necah cuande te ihyan nducuahn che chahn te chi.

³⁴ Rahn ye ri ye tahn:

—Dayá, nducote chitehne ne, a ndoyehn. A co nahn ndevaque ndete che nehn. Hua dehve rahque, te a ndoyehn.

Dihvo vo Jesucristo ne, ndedetuhche ye tahn daya Jairo

³⁵ Nde metah cuihno cahma Dihvo vo cuahn che nda ama o ihyan ndevaco Jairo, ne rahn ye ri ye sahn:

—A chih tahn daya ne. Ametah deh cuande che denduh ne Ihyan Ricuahn cava che cahñ ye.

³⁶ Chihnevan Dihvo vo che rahn ihyan chahn, ate hua tumacah ye. Rahn ye ri ye Jairo:

—Hua te co ran. Cuitehne che co conán di.

³⁷ Tuhme quendi ye cuahn ye nduco Jairo, ne atenan Pedro man, Jacobo man, Juan che dihno Jacobo man, cahñecun ye che cuahn ye nduco ye.

³⁸ Cuahn che nda Dihvo vo vaco Jairo ne, ndihchero ye che ama yahn ihyan chenun ye min, raco ye man, rah ran ye man.

³⁹ Tuhme chenda ye chete vah, ne rahn ye ri ye ihyan chahn:

—¿Dehco che ama rah ran nchuhn man, raco ne man?, te tahn dihn tih ne, dehve ndih te, te quiyado te.

⁴⁰ Ate chihyon nan ihyan chahn ihyan. Tuhme ndetendah vah Dihvo vo nducoyaca ye, ne cuahn ye nduco chida tahn dihn me man, chaco te man, ihyan che nduco ye man, chenda ye nduco vih nan che quendite te.

⁴¹ Chetah ye tah te, ne rahn ye devaco yahn ye:

—Talita cumi —che nahn cahma: Tahn dihn, cuenecuen.

⁴² Tahn dihn me ne, a ri te ndichio nduyo. Ndetahno necuan te, canan rica te, ne ama cuahn ino ihyan chahn.

⁴³ Ama chihco yudo Dihvo vo che hua duhva cahma che ndedetuhche ye tahn, ne rahn ye ri ye indihnte yahn te che cah ye, cheh te.

6

Dihvo vo Jesucristo ne, nta ye yan vaco ye Nazaret

¹ Chica Dihvo vo yan Capernaum, ne conahn ye yan vaco ye Nazaret nduco ihyan apóstol yahn ye.

² Ama ro che rahtetuhno ihyan ne, chenda ye chete vaco, chicuahn ye. Ama yahn ihyan chihnevan ye che ricuahn ye, ne ama rahn ino ye. Rahn ye van man ye nduco vih:

³ —Ihyan tih che vicheyahn me. María che chaco ye. Jacobo man, José man, Judas man, Simón man, a sahn chahn che dihno ye. Muhn yan vaco vo vate tahn cahve ye.

Nducote a rendihche ihyan Dihvo vo che min chihta ye ne, chemin che hua nevahñecun ye ihyan.

⁴ Tuhme rahn Dihvo vo ri ye ihyan chahn:

—Numachahte va vedeyahino nduco ihyan profeta. Ate ihyan yan vaco ye man, ihyan yahn ye man ne, hua yahino ye ihyan.

⁵ Nducote cheche chedave yahn ihyan yan chahn ne, ama o no vederihno din Dihvo vo yan min. Nahn tah ye ama o ihyan cah, din ye che ndoyahn ye.

⁶ Rahn ino Dihvo vo yahn che hua chitahno ihyan yan vaco ye ihyan. Chihno min ne, cuahn ye nduh yan nduh yan che nino, quendi ye ricuahn ye.

Dihvo vo Jesucristo ne, dechuh ye ihyan apóstol yahn ye che cahñ ye cuahn-dudo ye

⁷ Dihvo vo Jesucristo ne, cah ye nduh che ndichio apóstol chahn nan ye. Dechuh ye ihyan cade o cade o ye queri ama yan. Din ye che cuahtenan cuma ihyan chahn vederihquentiyon, cava che cuahn che tahn nun ye ihyan che chenun vaco chihnga ihyan ne, ndetendah ye vaco chahn.

8-9 Chihqumentiyon ye che quenda ihyan chahn indahco yahn ye man, che tihyon cah ye ndaco yahn ye man, che conun ye ama no cahteca ye man. Ate dehtenduh chenahn ne, hua co quenda ye, nde huane dino man, nde huane pan man, nde huane tume man.

10 Namin rahn Dihvo vo ri ye ihyan chahn:

—Adecotino vaco ihyan nan che nevahnecon ye nchuhn ne, min cuahtenan ne nde tuno ro che ndaca ne yan.

11 Ihyan yan che hua ntumanecun ye nchuhn man, che hua cahcovan ye che cuahndudo ne man ne, condaca ne yan vaco ye, ne condahde ne yaca che chenah cah ne, cava che tihca nahme ne ihyan che hua ndahca redin ye. Cuaco rahn ri nchuhn te cuahn che a nda ro che techecade Dendiohs nunde yahn nducoyaca ihyan ne, tahque chuhrihn ihyan chahn che co ihyan yan Sodoma man, ihyan yan Gomorra man.

12 Tuhme cuahn ihyan chahn rahndudo ye che nahn che nto ino ihyan nunde yahn ye.

13 Namin retendah ye ama yahn vaco chihnga che chenun ihyan, ne racotahme ye aceite ama yahn ihyan cah, redin ye che rendoyahn ye.

Nduhca che chih Juan Bautista

14 Ro min ne, ama rente ihyan yahn vederihno che redin Dihvo vo, ne checadino rey Herodes. Tuhme rahn rey me:

—A ntuche Juan Bautista van tenahn. A ihyan min che redin ye vederihno che tihchan.

15 Nahñ ihyan ne, rahn ye te ihyan profeta Elias che quechica ye. Nahñ tun ihyan ne, rahn ye:

—Ihyan cah ne, ama ihyan profeta nduhca ihyan profeta che chahte ye a rahn me.

16 Ate hua chitahno Herodes che rente ihyan chahn, ne rahn se:

—Ihyan cah ne, Juan Bautista ihyan. A ihyan cah che chihqumentiyón sandado che chihca yan se dando ye. Man ne, a ntuche ye van tenahn.

17 Tihca rahn rey me, te a man se chihqumentiyon se sandado che din se preso Juan, chaconuhn se ihyan vacoyahn, dechiche se ihyan nduco cadena. Tihca chahno chi Juan, te tihca nahñ Herodías, tahn ndahca yahn Felipe, sahn min che dihno rey me. Rey me ne, ndere quenan se nduco te.

18 A rahn Juan ri ye rey me:

—Hua ndahca redin ne che quenan ne nduco ndahca yahn dihno ne.

19 Nducote tihca rahn Juan ri ye rey me ne, chemin che ama nahn cahno Herodías ihyan. Ate hua chi chihno te ihyan ura min.

20 Herodes ne, renevahnecon se Juan, te a devano se te ihyan min ne, ihyan ndah ye, ndiyu ihyan nunde ye. Chemin che hua rahnecon se che cahno te ihyan. Cuahn che rihnevan rey me che rente Juan ne, andahre hua ndah renahn se, ate rihnevan se numacuahn vedeyeno.

21 Ate nda ama ro che ndahca chahno Herodías chi. Din rey me vihcoduche se, ne recañ se reh nducoyaca intiayahn yahn se man, ihyan ndinan yahn sandado yahn se man, ihyan nahñ che vate ye estado yahn Galilea man.

22 Ura che a vate vihco ye ne, chenda tahn daya Herodías, ndeh te, ne rey me nduco ihyan che vate ye reh ye nduco vih ne, ama cah yeno ihyan. Tuhme rahn rey me ri se tahn:

—Cuique adecodehno che nehn, ne té di.

23 Cah se ndudo yahn se tahn, ne rahn se:

—Adecodeno che nehn, andahre mahñ va nan che rihqumentiyón, té di.

24 Ndiquendah te, ne cuahn te cacarune te chaco te, ne rahn te:

—¿Deh cacá?

Ndahconan chaco te:

—Cuique tin Juan Bautista.

²⁵ Ndetahno chenda tun te nan che quenun rey me, ne rahn te ri te sahn:

—Man ne, nahn che te ne u meniyon tin Juan Bautista chete ama cuh.

²⁶ Tuhme ama chi ran rey me. Ate nducote a cah se ndudo yahn se tahn nan nducoyaca ihyan che vate ye min nduco se ne, chemin che dinahn se ndudo yahn se.

²⁷ A ura min no chihquentiyon se ama sandado che chahn se ngua se tin Juan.

²⁸ Chahn sandado me vacoyahn, chihca yan se dando Juan. Quenda se tin ye chete ama cuh, ne cah se tahn. Tahn min ne, quenda te cah te chaco te.

²⁹ Cuahn che checadino ihyan che chinduco ye Juan te a chih ye ne, chahn ye chengua ye ihyan, ne chihche ye ihyan.

Cah Dihvo vo Jesucristo, cheh uhn mil ihyan

³⁰ Adivo ne, ndaconan ihyan apóstol chahn, ndo dama ye nduco Dihvo vo, ne necah cuande ye ihyan nducuahn che din ye man, nducuahn che chicuahn ye man.

³¹ Tuhme rahn Dihvo vo ri ye ihyan chahn:

—Cuhn vo nduco nchuhn ama cuan nan che deman, cuahtetuhno vo tah.

Tihca rahn ye, te ama yahn ihyan, ihyan che renda ye man, ihyan che renahn ye man, ne nde che cheh ye hua rinun yahn ye.

³² Tuhme quenun Dihvo vo chete ama barco nduco ihyan apóstol chahn, ne cuahn ye ama cuan nan che metah duhva.

³³ Ate ama yahn ihyan ndihchero ye che cuahn ye, ne nchanan ye ihyan. Tuhme chica ihyan chahn yan vaco ye, ne rica cah ye, cuahn ye cuahn nan che cuahn Dihvo vo, nde tahque nun nda ye min.

³⁴ Cuahn che ndiquendah Dihvo vo chete barco me ne, ama yahn ihyan ndidama ye. Quenan vahino ye ihyan chahn, te nduhca itecuche che metah duh che redin cudado ite ne, tihchan ye. Tuhme canan Dihvo vo, chicuahn ye ihyan ama ndeh nan dehtenduh.

³⁵ Cuahn che a chi chino me ne, nda ihyan apóstol chahn nan Dihvo vo, ne rahn ye ri ye ihyan:

—Muhn ne, yahn nan che metah duhva, ne man ne, a chi chino.

³⁶ Cuedechuh ne ihyan sih cuahn yan che nino, cava che cua ye che cheh ye, te muhn ne, metah deh che cheh ye.

³⁷ Rahn Dihvo vo ri ye ihyan:

—Nchuhn cocah ne, cheh ihyan sih.

—Tumerune ihyan chahn ihyan:

—Nahn o ciento tume denario che cua nuhn pan, cheh ihyan sih. ¿A nahn ne che tihca din nuhn ne?

³⁸ Tuhme rahn Dihvo vo ri ye ihyan chahn:

—¿Tava pan va yahn nchuhn? Cuahn ne quendihchero ne.

Cuahn che ndihchero ihyan chahn ne, rahn ye ri ye ihyan:

—Va uhn pan nduco o yahca.

³⁹ Dechuh Dihvo vo ihyan apóstol chahn che cahma ye nduco nducoyaca ihyan che cuahte ye nan yune cue, codama ye ama ama cuan nduco vih.

⁴⁰ Tihca dinahn ye, ne ama o cuan ne, chahte ama ciento ye, ne tama te o cuan ne, chahte o raco ndiche ye.

⁴¹ Tuhme chetah Dihvo vo nduh che uhn pan chahn nduco o yahca chahn. Cha vaco nan ye nan ro, ne cah ye nundihve cuahn Dendiohs. Tuhme ndeh ye pan chahn, ne cah ye ihyan apóstol, cava che cah ye, cheh nducoyaca

ihyan chahn. Namin yahca chahn ne, ndeh Dihvo vo, ne cheh nducoyaca ye.

⁴² Cheh ndah nducoyaca ihyan chahn nde nan che chito ihyan.

⁴³ Adiva ne, nedin dama ihyan apóstol chahn nducuahn pan che ngava, ne chi ndichio cuahte. Namin nedin dama ye che ngava yahn yahca chahn.

⁴⁴ Van nducoyaca ihyan che cheh ye ne, nduco uhn mil ihyan chahn.

Dihvo vo Jesucristo ne, rica ye nan nune vine

⁴⁵ Ndetahno dechuh Dihvo vo Jesucristo ihyan apóstol che conda ye chete barco me, chuh ye tama lado viche cah, cuahn nan yan Betsaida. Tuhme ndedechuh ye nducoyaca ihyan chenahn chahn.

⁴⁶ Cuahn che ndedechuh ye ihyan chahn ne, cuahn ye ama tingüete cava che covah ye.

⁴⁷ Cuahn che chi man me ne, a nde mendañh vine me cuahn barco me nduco ihyan apóstol chahn. Dihvo vo ne, a demañ ye quenan ye tingüete me.

⁴⁸ Ndiñchero ye che ama chi cuno ihyan chahn che ricahca ye barco me, te cuan nan che rechi yuhne cuahn ye. Adiva, ura che a nino co dave ne, cuahn Dihvo vo, rica ye nan vine me, nde a nahn chuhnan ye ihyan chahn.

⁴⁹ Cuahn che ndiñchero ihyan chahn che rica Dihvo vo nan vine me ne, rahco ye te co vaco chihnga cochi, nde tuno cah ye che vah ye.

⁵⁰ Nducoyaca ihyan chahn ne, ndiñchero ye che cochi Dihvo vo nan nune, ate nducote hua nchanan ye ihyan ne, ama dihya ye chi. Ndetahno rahn Dihvo vo ri ye ihyan chahn:

—Hua dihya nchuhn co, te a u che cochí. Hua dehve rahco ne.

⁵¹ Tuhme chenda ye chete barco me nan che chenun ihyan chahn. Ndetahno chehuan yuhne me, ne ama rahn ino ihyan chahn.

⁵² Ama rahn ino ye, te nducote cheche chedave yahn ye ne, metah cuihno conahn ye yahn vederihno che din Dihvo vo nduco pan chahn.

Nda Dihvo vo Jesucristo yahn yahn Genesaret, ne din ye che ndoyahn ihyan cah

⁵³ Cuahn che a chuh Dihvo vo nduco ihyan apóstol chahn tama lado viche cah ne, nda ye yahn yahn Genesaret, ne dechiche ihyan chahn barco me chihto vine me.

⁵⁴ Cuahn che a ndiquenda Dihvo vo chete barco me ne, ndetahno nchanan ihyan yan min ihyan.

⁵⁵ Tuhme cuahn ihyan chahn rano ye numachahte chihto yan, ne canan ye retechecan ye ihyan cah yahn ye nduco yundo, regu ye ihyan cuahn nan che quenun Dihvo vo.

⁵⁶ Adecotino nan che renda Dihvo vo, andahre yan cahya man, andahre yan rahte man, andahre viyata man, min racondihte ihyan chahn ihyan cah yahn ye chihto yune. Rica ihyan chahn che cah yune Dihvo vo cuaconahn tah ihyan cah chahn andahre chihto tino yahn ye. Nducoyaca ihyan cah che chaconahn tah ye tino yahn ye ne, ndetahno ndoyahn ye.

7

Nduhca che rahtendihco ihyan nunde

¹ Sahn fariseo man, sahn devano ley che dirun Moisés che chica se yan Jerusalén man ne, ndo dama se nan Dihvo vo.

²⁻⁵ Sahn chahn nduco nducoyaca ihyan nación yahn Israel chenahn ne, riquendi se costumbre che chihco ihyan ndico yahn se che renano se tah se ura che cheh se man, ura che renda se che rahn se ndihve man. Rahco se te nduco tihca ne, redinahn se che rihquentiyon Dendiohs. Namin renano se

vaso man, jarro man, dehtenduh chenahn che retoh se man. Ndiherero se che reh ihyan apóstol, ne hua renano ye tah ye nduhca costumbre yahn se, ne rahn se ri se Dihvo vo:

—¿Dehco che hua renano ihyan apóstol yahn ne tah ye ura che reh ye nduhca che chihco cade ihyan ndico yuhn vo ne?

⁶ Ndahconan Dihvo vo, ne rahn ye ri ye sahn:

—¡o nan o chende nchuhn! Riquendaḥ cuaco nduhca che dirun ihyan profeta Isaías yahn ne tuhca:

Dendudo no che rahn sahn sih che ritahno se Dendiohs, te hua cuaco.

⁷ Nde hua cochihve che rendeva se yavenan Dendiohs, te ricuahn se costumbre yahn man se, redin ca se che vederihquentiyon yahn Dendiohs.

⁸ Tihca redin nchuhn. Rihcoman ne vederihquentiyon yahn Dendiohs, ne riquendi ne costumbre yahn man ne. Renano ne jarro man, vaso man, ama ndeh nan ca dehtenduh che tihchan redin ne.

⁹ ¡Ama vivo nchuhn che rahco ne! Riquendi ne costumbre yahn man ne, ne rihcoman ne vederihquentiyon yahn Dendiohs.

¹⁰ Moisés ne, dirun ye tuhca: “Cuendeva yavenan chide man, yavenan cheque man.” Namin dirun ye: “Adecoduhno ihyan che cahva ye yahn chida ye o cahva ye yahn chaco ye ne, quenana cuma che cahno ihyan yan ihyan.”

¹¹ Ate ndotanen che quendi nchuhn vederihquentiyon min ne, ricuahn ne ihyan che cahma ye co ye indihche yahn ye: “Hua co conan nchuhn, te nducuahn che va yahn ne, a ndihco mendahn che co vedino nan Dendiohs.”

¹² Adecoduhno ihyan che cahma ye tihca ne, redin nchuhn fuerza ihyan che dinahn ye, ne hua rahnecun ne che conan ye indihche yahn ye.

¹³ ¡Ama ndeh nan ca dehtenduh che tuhchan redin nchuhn! Rihcoman ne vederihquentiyon yahn Dendiohs, ne riquendi ne costumbre yahn man ne.

Rahn Dihvo vo Jesucristo te ndiyu cava dehtenduh che reh ihyan che chendihco ye nunde

¹⁴ Nedin dama Dihvo vo ihyan, ne rahn ye:

—Cuihcovan ndah nchuhn cava che conahn ne che cahma nduco ne:

¹⁵ Nducuahn che chihnga che riquendaḥ chete chedave yahn ihyan ne, a cava chemin che chendihco ye nunde, ndiyu cava dehtenduh che reh ye.

¹⁶ ¡Cuihcovan ndah ne cava che conahn ne!

¹⁷ Cuahn che chica Dihvo vo min, ndonda ye vah ne, chica ihyan apóstol ihyan che cah cuande ye ihyan deh conahn che nte ye me.

¹⁸ Rahn ye ri ye ihyan chahn:

—Namin nchuhn dama ri ne nduco ihyan sih, te hua renahn ne. Nducuahn che reh ihyan ne, ndiyu cava chemin che chendihco ye nunde,

¹⁹ te vacochendereh yahn ye rahn, ndiyu chete chedave yahn ye.

Tihca chicuahn Dihvo vo che ndiyu cava dehtenduh che reh ihyan che chendihco ye nunde.

²⁰ Quendi ye, ne rahn ye:

—Nducuahn che chihnga che rendedecadino ihyan man, che redin ye man ne, a cava chemin che chendihco ye nunde.

²¹ Chete chedave yahn ihyan riquendaḥ che chihnga rendedecadino ye man, reduco ye man, rihno vih ye man,

²² rahtenan ye nduco ihyan che hua nihnevaco ye nduco ye man, nahn yahn ye dehtenduh yahn ihyan man, rihncheh ye man, duhtuno ihyan ye man, ndere ihyan ye man, ve ye man, yade ye man, nine ye man.

²³ Nducuahñ dehtenduh chemin chan ne, reconan chete chedave yahn ihyan, ne a çava chemin che chendihco ye nunde.

Ama tahn tãma naci3n ne, chica te Dihvo vo Jesucristo che conan ye tahn

²⁴ Chica Dihvo vo min, ne cuahn ye cuahn yahn yahn yan Tiro man, Sid3n man. Cuahn che nda ye ne, ndaca ye ama vah nan che conan ye. Hua nahn ye che cadino ihyan che min quenan ye, ate a çade no che checadino ihyan.

²⁵ Min va ama tahn dihn che quenun vaco chihnga tahn. Ndetãhno che checadino çaco te che nda Dihvo vo ne, chahn te nan quenan ye, ne chehntihya te nan ye.

²⁶ Tahn min ne, ndiyu tahn naci3n yahn Israel, te tahn tãma naci3n. A min Sirofenicia yan vaco te. Chica te Dihvo vo che ndetendãh ye vaco chihnga che quenun tahn dihn yahn te.

²⁷ Ate rahn Dihvo vo ri ye tahn:

—Ihyan yãhn ne, ama rendotenan ye che conãn ihyan. Ndete che conãn di ne, anduhneça ndete che cahneví pan che reh cheçahya, çãh, cheh yahna.

²⁸ Ndaconan te, ne rahn te ri te ihyan:

—Dihvé, cuaco che rahn ne. Ate yahna ne, rahtenun te man mesa, ne rendaca ðache chende cheçahya reh te.

²⁹ Tuhme rahn ye ri ye tahn:

—Nðaça ndaconen. Co nahn. Vaco chihnga me ne, a ndiquendãh tahn daye.

³⁰ Conãhn te, ne cuahn che ntã te ndevaco te ne, ntãca te ðaya te che quendite te nan yundo. A ntiquendãh vaco chihnga me tahn.

Din Dihvo vo Jesucristo che ndoyahn ama sahn che nde chato se man, nde lihme se man

³¹ Chihno neve ro ne, ndaca Dihvo vo yahn yahn Tiro, nchuh ye yan Sid3n man, te neve yan çahya che nino yan Decãpolis man, ne ntã ye nan va vine yahn Galilea.

³² Min nda ama o ihyan, nda ye ama sahn che nde chato se man, nde lihme se man, ne chica ye Dihvo vo che nahn tah ye sahn, din ye che ndoyahn se.

³³ Quenda Dihvo vo sahn ama laço, ne terun ye ndutihãh ye iverevan se man, nahn tah ye chihya se nduco nunedan ye man.

³⁴ Chenihyon nan ye cuahn nan ro, ne chenãhn ino ye che chi ndache ye, ne rahn ye:

—¡Efata! —che nahn çahma: ¡Condah!

³⁵ Ndetãhno chihnevan se man, ndiquendãh çahn se man.

³⁶ Tuhme chihquentiyon Dihvo vo che hua çahma ihyan chahn taça chi che ndoyahn sahn min. Ate cuahn che rihquentiyon ye che hua çahma ihyan ne, nde tahque racotuhn ca ihyan ndudo.

³⁷ Ama rahn ino nducoyaca ihyan, ne rahn ye:

—¡Ama ndaça nducuahñ che redin ihyan cuh! Nde ihyan che chato ye ne, redin ye che ri rihnevan ye, ne ihyan che lihme ye ne, redin ye che ri rente ye.

8

Dihvo vo Jesucristo ne, çah ye, cheh cun mil ihyan

¹ Tahn min ne, ama yahn ihyan ndidãma ye nan Dihvo vo, ne ametah che cheh ye. Tuhme cah Dihvo vo ihyan ap3stol, ne rahn ye ri ye ihyan:

² —Renan vahin3 ihyan sih, te a ino ro che chenãn ye nduc3, ne man ne, ametah che cheh ye.

³ Ndete che ndedechúh ihyan che hua cheh ye ne, condave cuno ye cuahn yune, te nahñ ye ne, yahn yan vāco ye.

⁴ Tuhme rahñ ihyan chahn ri ye ihyan:

—Ate ¿deh çah vo, cheh ye?, te muhn ne, metah dehva.

⁵ Tumerune Dihvo vo ihyan chahn:

—¿Tava pan va yahn nchuhn ne?

Ndahconan ye:

—Ndache pan va yahn nuhn.

⁶ Tuhme chihquentiyon Dihvo vo che cuahte nducoyaça ihyan ndiyahn. Chetañ ye nduh che ndache pan chahn, ne cuahn che a neçah ye nundihve cuahn Dendiohs ne, ndeh ye. Tuhme çah ye pan me ihyan apóstol chahn çava che çah ye, cheh nducoyaça ihyan.

⁷ Namin va neve yahca çahya, ne ndaconan çah Dihvo vo nundihve cuahn Dendiohs. Tuhme dechuh ye ihyan apóstol chahn, çava che çah ye yahca me, cheh nducoyaça ihyan chahn.

⁸ Cheh nducoyaça ye nde nan che chito ihyan. Chihno min ne, nedin dama ihyan apóstol chahn nducuahn che ngava, ne chito ndache cuahte.

⁹ Ihyan che cheh ye ne, ri tenduh cun mil ihyan. Tuhme ndedechuh Dihvo vo ihyan chahn,

¹⁰ ne chenda ye chete ama barco nduco ihyan apóstol yahn ye, cuahn ye nduco vih cuahn yahn yahn yan Dalmanuta.

Sahn fariseo ne, rica se che din Dihvo vo Jesucristo ama vederihno, ndihchero se

¹¹ Cuahn che nda ye min ne, nda neve sahn fariseo, ne canan rente se nduco Dihvo vo, retumarande se ihyan. Chica se che çaca ye Dendiohs che conahn ama vederihno, ndihchero se.

¹² Ama chenañ ino Dihvo vo che chi ndache ye çava se, ne rahñ ye ri ye sahn:

—Ihyan che vate ye man ro cuh ne, hua ndahça che retumarande ye Dendiohs, rica ye ama vederihno ndihchero ye. Cuaco rahñ ri nchuhn te Dendiohs ne, hua tumacah ye yahn ye.

¹³ Tuhme chihcomañ ye sahn chahn, ne ndonda ye chete barco me, tuche ye tama lado viche yahn vine me.

Dihvo vo Jesucristo ne, rahñ ye te ndudo che ricuahn sahn fariseo ne, anduhneçayā yahn pan

¹⁴ Ihyan apóstol ne, chinan ye, hua quenda ye deh che cheh ye. Atenan ama pan nda ye.

¹⁵ Rahñ Dihvo vo ri ye ihyan chahn:

—Cuihco nchuhn cudado. Hua tumacah ne yahn ya yahn sahn fariseo man, ya yahn Herodes man.

¹⁶ Tuhme canan rente ihyan chahn nduco vih:

—Tihça rahñ ye, yahn che hua nda vo pan.

¹⁷ Checadingo Dihvo vo che tihça rente ihyan chahn. Ate nducote a rahñ ye yahn ndudo che ricuahn sahn chahn ndiyu yahn pan ne, chemin che chihya ye ihyan:

—¿Dehco che rahñ nchuhn yahn che hua nda ne pan? ¿A hua retumacadingo nchuhn? ¿Dehco che ama cheche chedave yahn ne?

¹⁸ ¿A nduhneça ndete che hua ro nan ne? ¿A nduhneça ndete che hua rihnevan ne? ¿A hua renecaço ne?

¹⁹ Cuahn che chihcachéh uhn mil ihyan nduco uhn pan ne, ¿tava cuahte pan che ngava nedin dama ne ne?

Ndahconan ihyan chahn, ne rahn ye:

—Ndichio cuahte nedin dama nuhn.

²⁰ Namin no tun cuahn che chihcachéh cun mil ihyan nduco ndache pan ne, ztava cuahte pan che ngava nedin dama ne ne?

Ndahconan ihyan chahn, ne rahn ye:

—Ndache cuahte nedin dama nuhn.

²¹ Tuhme rahn ye ri ye ihyan chahn:

—Me ztaca che hua renahn ne?

Dihvo vo Jesucristo ne, din ye che chi ro nan ama sahn nan ve

²² Ura che nda Dihvo vo nduco ihyan apóstol yahn ye yan Betsaida ne, nda ama o ihyan nan ye, nda ye ama sahn nan ve, ne chica ye Dihvo vo che cuaconahn tah ye sahn, din ye che ndoyahn se.

²³ Tuhme chetah ye tah sahn nan ve me, quenda ye sahn cuahn chihto yan. Nahn ye nunedan ye ndutinan se, ne tumerune ye sahn ndete che a ro nan se.

²⁴ Sahn min ne, ndihchero se cuahn chihto nan se, ne rahn se ri se ihyan: —A ri ro nan ihyan che vatechica ye. Ate nduhca che ro yahn rahte, tihca ro ye.

²⁵ Nahn tah ye ndutinan se tama yune, ne ndetahno a chi ro nan ndah se.

²⁶ Tuhme ndedechuh ye sahn cuahn ndevaco se, ne rahn ye ri ye sahn:

—Hua conda yan tih, nde hua cahme nduco nde ama ihyan sih taca chi che ndoyehn.

Pedro ne, rahn ye te Dihvo vo Jesucristo ne, a ihyan min che a va cade che chi ye ndedevahn ye ihyan iyehkse

²⁷ Chihno min ne, quenda Dihvo vo ihyan apóstol yahn ye, cuahn ye nduco vih nan yan cahya cuahn chihto yan Cesarea de Filipino. Cuahn che chenun ye yune ne, tumerune ye ihyan chahn:

—¿Duh u, rahn ihyan ne?

²⁸ Ndahconan ihyan chahn yahn ye:

—Ama o ihyan ne, rahn ye te ndih ne, Juan Bautista. Tama te o ye ne, rahn ye te ndih ne, Elías. Tama te o ye ne, rahn ye te ndih ne, ama cha ihyan profeta.

²⁹ Tuhme tumerune ye ihyan chahn:

—Me nchuhn, zdeh rahn ne yahn ne?

Ndahconan Pedro, ne rahn ye ri ye ihyan:

—A ndih che a va cade che chi ne ndedevahn ne ihyan iyehkse.

³⁰ Ate rahn Dihvo vo ri ye ihyan chahn che hua cahma ye chemin nduco nde ama ihyan.

Dihvo vo Jesucristo ne, rahn ye te cahno sahn nunde ihyan

³¹ Tuhme cah cuande Dihvo vo ihyan apóstol yahn ye, ne rahn ye:

—U che rinducó nducoyaca ihyan ne, va che ama chuhríhn. Intiyahn man, chidocuyan ndinan man, sahn devano ley che dirun Moisés man ne, co tan se nducó, ne cahno se u. Ate cuihno ino ro ne, va che ntuché van tenahn.

³² Nduco chemin ne, cah cuande ndah Dihvo vo ihyan chahn nduhca che cuahno co ye. Tuhme quenda Pedro ihyan ama lado, ne yahve ye ihyan cava che hua cah yune ye che tihca cuahno co ye.

³³ Ate chaconan Dihvo vo ndihchero ye ihyan apóstol chenahn, ne chihya ye Pedro:

—Di ne, jnduhca chundah, di! ¡Cuehn ama lado! ¡Hua din vahche yahn!, te di ne, ihyan iyehkse di, nde hua renehn che nahn Dendiohs.

³⁴ Ura min ne, cah Dihvo vo ihyan apóstol man, ihyan che chenun nduco ye man, ne rahn ye ri ye ihyan:

—Adecoduhno ihyan che nahn conduco ye u ne, va che cahcoman ye vedeyeno yahn man ye. Hua co che dendudo no conduco ye u, te va che cahco mendahn ye ihyan cava che conduco ye u, andahre conahn yah ye nan ama cruz cavá.

³⁵ Tihca, te adecoduno ihyan che hua nahn cahco mendahn ye ihyan cava che conduco ye u ne, va che conda ye. Me adecoduhno ihyan che conduco ye u numacuahn chedave yahn ye ne, hua dehve din yahn andahre cahno sahn nunde ihyan yahn che ritahno ye u man, ndudo ndah yahn man, te ndevahn ye.

³⁶ Andahre nedin dama ihyan nducuahn vedecuihca che va iyehense, ate ¿dehra cochihve yahn ye ndete che va che conda ye?,

³⁷ te hua cochihve vedecuihca nan Dendiohs cava che ndevahn ihyan.

³⁸ Tihca, te adecoduhno ihyan che co cuihnan ye cava u man, cava ndudo yahn man, nan ihyan nunde che rahcotahn ye yahn Dendiohs ne, namin u che rinducó nducoyaca ihyan ne, co cuihnán cava ye ro che numacuahn vederihquentiyon yahn Chidá ndá nduco ángel ndah.

9

¹ Quendi Dihvo vo rahn ye nduco ihyan chahn:

—Cuaco rahn rí nchuhn te ama o ihyan che chenun ye muhn nduco vo ne, vate ca ye iyehense ndá ro che numacuahn vedeyudo conahn vederihquentiyon yahn Dendiohs.

Dihvo vo Jesucristo ne, ndo diyahn ye

² Chihno an ro me ne, quenda Dihvo vo Pedro man, Jacobo man, Juan man, cuahn ye nduco vih ama tingüete. Min ndo diyahn ye nan ihyan chahn.

³ Tino yahn ye ne, ama ndo cua nduhca ihve, nde tuno diyahn ro. Nde ama ihyan reñan che vate ye muhn iyehense cuh ne, hua co din ye che tihca ndo cua.

⁴ A denan chihnde ro Elías nduco Moisés, ne ndihchero ihyan chahn che rente ye nduco Dihvo vo.

⁵ Tuhme rahn Pedro ri ye Dihvo vo:

—Ihyan ricuahn yahn, ama ndahca che chenun vo muhn. Dendah nuhn ino vache vah. Ama nan che cuhnde ne, tama nan che cuhnde Moisés, ne tama nan che cuhnde Elías.

⁶ Tihca rahn ye, te ama dihya ihyan chahn chi, nde hua rentaquino ye deh che cahma ye.

⁷ Ura min chiya ama man, quendihco nan che chenun ihyan chahn. Van man me ne, chenun ama ndudo che rahn tuhca:

—Sahnguh che Dayá. Yahinó sahn. Che cahma se ne, chemin che codinahn nchuhn.

⁸ A denan cuahn che ndihchero ihyan chahn ne, ametah duhva. A deman Dihvo vo nti ye.

⁹ Ura che cuenchan ihyan chahn cuete me ne, rahn Dihvo vo ri ye ihyan:

—Hua cahma nchuhn nduco nde ama ihyan yahn vederihno che ndihchero ne nde ndá ro che u che rinducó nducoyaca ihyan ntuché van tenahn.

¹⁰ Dinahn ihyan chahn che rahn Dihvo vo, chahtenun ino ye vederihno min, ne retumerune vih ye:

—¿Dehra conahn ndudo che tihca rahn ye che ntuche ye van tenahn ne?

¹¹ Numanahn che chenun yune ca ye ne, tumerune ye Dihvo vo:

—¿Deh cuande che rahn sahn devano ley che dirun Moisés che Elías va che chi ye menan ne?

¹² Ndahconan Dihvo vo, ne rahn ye:

—Cuaco te va che chi Elías menan, ne ndahco cade ye nducuahn. Ate, ¿a renahn ne nduhca che ndirun yahn nan Ndudo yahn Dendiohs?, te a ndirun te u che rinduco nducoyaca ihyan ne, va che chuhrihn man, va che ndahchenan ihyan u man.

¹³ Ate rahn ri nchuhn te a nda Elías, ne din tan ihyan nduco ye nduhca che a ndirun yahn ye nan Ndudo yahn Dendiohs.

Dihvo vo Jesucristo ne, ndetendah ye vaco chihnga che quenun ama sahn dihn

¹⁴ Cuahn che nta Dihvo vo nan che chenun ihyan apóstol chenahn ne, ndihchero ye che ama ndito ihyan. Sahn devano ley che dirun Moisés ne, rahteruhn chende se nduco ihyan apóstol.

¹⁵ Ndetahno che ndihchero ihyan che chenun ye min Dihvo vo ne, cuahn ino nducoyaca ye, ne aderano ye chahn ye necah ye Dendiohs ihyan.

¹⁶ Tumerune Dihvo vo ihyan apóstol chahn:

—¿Deh cuande che rahteruhn chende sahn sih nduco nchuhn ne?

¹⁷ Tuhme chenda mendahn ama ihyan che quenun ye van ihyan chahn, ne rahn ye ri ye Dihvo vo:

—Ihyan Ricuahn yahn, hua te u ne, nda ndevah, te rahco te muhn quenun ne. Nda sahn dayá che quenun ama vaco chihnga sahn, nedin che ndi lihme se.

¹⁸ Adecotino che rinuhn yahn se ne, redin vaco chihnga me che rendava se. Riche yan chende se man, reh dihyon se man, ri cheche se man. U ne, chicá ihyan apóstol yahn ne che ndetendah ye vaco chihnga me sahn, ate hua chi ndetendah ye.

¹⁹ Tuhme rahn Dihvo vo:

—¡Ama rendedecadinó cava nchuhn! ¿Dehco che hua ritahno ne? ¿Ticuahn cahcoman ne vedenine yahn ne, co ne ihyan? Cuahn ne nguan ne sahn.

²⁰ Tuhme chehua ihyan chahn sahn dihn me, ne cuahn che checadino vaco chihnga me che a ihyan min che Dihvo vo Jesucristo ne, din che nuhn yahn sahn dihn me, ne chendava se. Racondihte yahn se man, riche yan chende se man.

²¹ Tumerune Dihvo vo chida se:

—¿A rahn che tihca ri yahn se ne?

Ndahconan chida se, ne rahn ye:

—Nde ro che lihn se.

²² Ama ndeh yune redin vaco chihnga me che rendahnun se vacoyahn man, van nune man, che nahn cahno sahn. Ate ndete che co ndetendah ne vaco chihnga me sahn ne, conan vahino ne nuhn, cuinan ne nuhn.

²³ Rahn Dihvo vo ri ye chida sahn dihn me:

—Ndete che ritehne ne, adecodehno che caque ne, conahn.

²⁴ Ndetahno rahn chida sahn dihn me numa dito ye:

—Ritahnó. Ate cuenan ne u cava che tahque ndah cotahnó.

²⁵ Ndihchero Dihvo vo che ama ridama ihyan, ne numacuahn vedeyudo chihquentiyon ye vaco chihnga me, ne rahn ye:

—Vaco chihnga che redin che nde lihme nde chato sahn dihn tih, rihquentiyón di che ndiquendah, cahcoman sahn. Ametah ndaconen conda sahn.

²⁶ Tuhme cah vaco chihnga me, din che ama chih dihca sahn dihn me, ndiquendaḥ sahn. Chih taḥn sahn dihn me, quendite dihn se, ne ama yaḥn ihyan raḥn ye che a chih se.

²⁷ Ate chetaḥ Dihvo vo taḥ se, ndedecuan ye sahn, ne chandi se.

²⁸ Chihno min ne, conaḥn Dihvo vo, ne cuahn che a ndonda ye vah ne, tumerune ihyan apóstol chahn ihyan devavih, ne raḥn ye:

—¿Deh cuande che hua chi ndetendaḥ nuhn vaco chihnga me ne?

²⁹ Raḥn Dihvo vo ri ye ihyan chahn:

—Cava che ndetendaḥ vo vaco chihnga chemin chan ne, nahn che covah vo maḥ, cuahte vo yahte maḥ.

Raḥn Dihvo vo Jesucristo tama yune te va che caḥno se ihyan

³⁰ Chihno min ne, chica ihyan chahn min cuahn ye. Chuh ye estaḍo yahn Galilea, ate hua nahn Dihvo vo che cadino nde ama ihyan,

³¹ te ricuahn ye ihyan apóstol yahn ye. Raḥn ye ri ye ihyan chahn:

—U che rinducó nducoyaca ihyan ne, din se preso u, ne caḥno se u. Ate cuihno ino ro ne, ntuché vaḥ tenaḥn.

³² Hua chenahn ihyan chahn ndudo che tiḥca raḥn Dihvo vo, ne vaḥino ye tumerune ye ihyan deh conaḥn.

Nahn codevano ihyan apóstol cha ye che tahque conaḥn ye

³³ Cuahn che nda ihyan chahn yaḥ Capernaum ne, ndonda ye vah. Tuhme tumerune Dihvo vo ihyan apóstol chahn, ne raḥn ye:

—¿Deh che ama rente nchuhn yune ura che cochi vo ne?

³⁴ Ate hua ndaḥconan ihyan chahn yahn ye, te rente ye nduco vih cha ye che tahque conaḥn ye.

³⁵ Tuhme chihnde Dihvo vo, ne cah ye nduh che ndichio ihyan chahn naḥn ye, ne raḥn ye:

—Adecoduhno nchuhn che nahn conaḥn ne ne, va che ndaḥco ndiya maḥn ne nchuhn, co ne anduhneca decaḥya yahn combiero yahn ne.

³⁶ Tuhme cah ye ama lihn, chihno ye mendaḥn. Chetaḥ ye lihn me quenuhn ye, ne raḥn ye ri ye ihyan chahn:

³⁷ —Adecoduhno ihyan che renevahneacun ye ihyan yaḥn che necun ye nduhca checaḥya che tuhchan ne, a u renevahneacun ye. Me ihyan che renevahneacun ye u ne, ihyan che dechuh ye u renevahneacun ye.

Ihyan che hua taḥn ye nduco vo ne, rinan ye uvo

³⁸ Chihno min ne, raḥn Juān ri ye Dihvo vo:

—Ihyan Ricuahn yaḥn, ndihchero nuhn ama ihyan che rentiyon yaḥn ye ndih, ne nduco tiḥca rendetendaḥ ye vaco chihnga. Ate hua caḥ yune nuhn che quendi ye, te hua nduco ye uvo.

³⁹ Raḥn Dihvo vo ri ye ihyan chahn:

—Hua caḥca taḥn nchuhn che tiḥca redin ye, te nde ama ihyan che redin ye vederihno nduco vederihquentiyon yaḥn, hua chihnga raḥn ye yaḥn.

⁴⁰ Tiḥca, te ihyan che hua taḥn ye nduco vo ne, rinan ye uvo.

⁴¹ Adecoduhno ihyan che te ye andahre ama vaḥo nune, cuh ne yahn che rinduco ne u ne, cuāco raḥn rí nchuhn te ndaḥco menun Dendiohs yahn ye.

Caḥnda yahn ihyan che rahtendiḥco ye nunde

⁴² 'Adecoduhno ihyan che tiḥyon yune ye ama ihyan yaḥn che necun ye nduhca checaḥya che tuhchan che condiḥco ye nunde ne, tahque ndaḥca cava ihyan min che dechiche ihyan ama tu yudo chahte daḍo ye, cuācondaḥnun ye ihyan vaḥn nuniyaḥn.

⁴³ 'Ndete che renda yahn ne che cuahtendihco ne nunde, ne nduco tah ne va che dinahn ne ne, tahque ndah che din ne cuande anduhneca ndete che a chihca yan ne tah ne, te tahque ndahca yahn ne che cuahtenan ne vahchetero andahre yuhche tah ne, yudomin ca che numa ne cuahtenun ne van ruchiyahn che riche cuahn dama.

⁴⁴ Min ne, hua rintah cuahno yahn, nde hua rih ndah che reh te ihyan.

⁴⁵ Ndete che renda yahn ne che cuahtendihco ne nunde, ne nduco cah ne va che dinahn ne ne, tahque ndah che din ne cuande anduhneca ndete che a chihca yan ne cah ne, te tahque ndahca yahn ne che cuahtenan ne vahchetero andahre yuhche cah ne, yudomin ca che numa ne cuahtenun ne van ruchiyahn che riche cuahn dama.

⁴⁶ Min ne, hua rintah cuahno yahn, nde hua rih ndah che reh te ihyan.

⁴⁷ Ndete che ndutinan ne ndi che va che cuahtendihco ne nunde ne, codin ne cuande anduhneca ndete che a tico ne, te tahque ndahca yahn ne che cuahtenan ne vahchetero andahre metah ndutinan ne, yudomin ca che numa ne cuahtenun ne van ruchiyahn

⁴⁸ nan che hua rintah cuahno yahn, nde hua rih ndah che reh te ihyan.

⁴⁹ 'Nducoyaca ihyan che ritahno ye u ne, va che chuhrihn ye cava che quendah ndah ye, ne ndeva Dendiohs ihyan. Nducuahn vedino che recah ihyan Dendiohs ne, richihve ndete che dave chedave yahn ye.

⁵⁰ Ima ne ndah, ate ndete che necan dine yahn ne, ametah cochihve. A namin nchuhn, te nahn che runecade ne man, nahn che ndahca cuahtenan ne nduco vih man.

10

Ndihco cade Dendiohs che hua tehche vih ihyan che nihnevaco ye

¹ Chica Dihvo vo yan Capernaum, ne cuahn ye cuahn esta do yahn Judea, yahn viche lado cah yahn ico Jordán, ne ndaconan ndo dama ama yahn ihyan nan ye. Ricuahn ye ihyan chahn nduhca che redin ye ro ro.

² Ama ro min ne, nda ama o sahn fariseo, cava che tumarande se Dihvo vo. Tumerune se ihyan ndete che ndihquentiyon Dendiohs che co tehche ihyan ndahta yahn ye.

³ Ndahconan ye yahn se, ne tumerune ye sahn:

—¿Deh rihquentiyon ley che dirun Moisés ne?

⁴ Ndahconan se, ne rahn se ri se ihyan:

—Nan ley che dirun Moisés ne, ndirun che nduco che dendah ihyan ama acta ne, co tehche ye ndahta yahn ye.

⁵ Rahn Dihvo vo ri ye sahn:

—Tihca dirun ye yahn che duhtuno ihyan nchuhn.

⁶ Ate cuahn che dendah Dendiohs iyehense ne, dendah ye chahn man, ndahta man,

⁷ ne chihquentiyon ye che va che cahcoman ihyan chida ye man, chaco ye man, cava che conan cuma ye ndahta yahn ye.

⁸ Nduco tihca ne, conan cuma vih ye anduhneca ndete che ama no ye.

⁹ Chemin che cuahn che cahnevaco ihyan ne, anduhneca ndete che din dama Dendiohs ihyan, ne ndihquentiyon ye che hua tehche vih ye.

¹⁰ Cuahn che a ndonda Dihvo vo vah ne, tumerune ihyan apóstol deh conahn che rahn ye me.

¹¹ Rahn ye ri ye ihyan chahn:

—Adecoduhno ihyan che tehche ye ndahta yahn ye, ne cahnevaco tun ye nduco tama ndahta ne, din duche yahn ye che nihnevaco ye.

¹² Adecoduhno ihyan ndahta che tehche ye inchañn ye, ne cahnevaco tun ye nduco tama chahn ne, namin din duche yahn ye che nihnevaco ye.

Dihvo vo Jesucristo ne, rica ye Dendiohs che din yahino ye checahya

¹³ Ama yune ne, nda ihyan, nda ye checahya yahn ye nan Dihvo vo cava che nahn tah ye, ne caca ye Dendiohs cava. Ate ihyan apóstol ne, rahva ye nduco ihyan chahn.

¹⁴ Ndihercho Dihvo vo che tihca redin ihyan apóstol chahn, ne chi yudo yahn ye, ne rahn ye:

—Cah yune nchuhn che chi checahya nan. Hua cahdenun ne, te atenan ihyan che necun ye nduhca checahya chuhn, co nevahnecon ye che cahcantiyon Dendiohs ihyan.

¹⁵ Cuaco rahn ri nchuhn te adecoduhno ihyan che hua dinahn ye che rihquentiyon Dendiohs nduhca che redinahn ama lihn ne, ihyan min ne, hua co conan ye nan che rihquentiyon Dendiohs.

¹⁶ Tuhme chetañ Dihvo vo checahya chahn, quenuhn ye. Nahn tah ye, ne chica ye Dendiohs cava.

Ama sahn cuihca che hua chinduco se Dihvo vo Jesucristo

¹⁷ Cuahn che a quenun yune Dihvo vo cuahn ye ne, nda ama se rano se. Chehntihya se nan ye, ne tumerune se ihyan:

—Ihyan Ricuahn ndah, ¿deh va che din cava che conan vahchetero numacuahn ro ne?

¹⁸ Ndahconan ye, ne rahn ye ri ye sahn:

—¿Dehco che rahn che ndah u ne? Metah nde ama ihyan che ndah ye. Atenan Dendiohs, ihyan min che ndah ye.

¹⁹ A devene vederihquentiyon yahn ye: “Hua din duche yehn che nihnevaque. Hua cahne ihyan. Hua doque. Hua cahme ndudo cuahnde. Hua cahnech ihyan. Cuendeva yavenan chide man, yavenan cheque man.”

²⁰ Rahn se ri se ihyan:

—Ihyan Ricuahn, nde ro che lihn u ne, redinahn nducuahn vederihquentiyon min.

²¹ Tuhme ndihchero Dihvo vo sahn numacuahn vedeyahino, ne rahn ye:

—Va tama nan che va che din. Cuehn condihcue nducuahn che va yehn, ne cuinen ihyan chevah cava che conen vahchetero numacuahn ro. Tuhme cochi condoque u, andahre nahn yahn ihyan di nan ama cruz.

²² Ate ama chi ran se che tihca rahn ye, yahn che ama cuihca se. Tahque ndah se ne, ca se yune yahn se conahn se.

²³ Tuhme chaconan Dihvo vo ndihchero ye ihyan apóstol yahn ye, ne rahn ye:

—¡Ama vahche cava ihyan che nevahnecon ye vederihquentiyon yahn Dendiohs!

²⁴ Chahn ino ihyan apóstol chahn che tihca rahn Dihvo vo. Ate ndaconan rahn tun ye:

—Dayá, ¡ama vahche cava ihyan che yahino ye vedecuihca cava che nevahnecon ye vederihquentiyon yahn Dendiohs!

²⁵ Nde hua co nevahnecon ye.

²⁶ Ate nde tahque cuahn ino ihyan chahn che tihca rahn Dihvo vo, ne rahn ye van man ye nduco vih:

—Ndeté che tihca ne, nde ama ihyan hua co ndevahn ye.

²⁷ Ndihercho ye ihyan chahn, ne rahn ye:

—Che lado yahn ihyan ne, hua co. Ate che lado yahn Dendiohs ne, co, te Dendiohs ne, ri redin ye nducuahn.

²⁸ Tuhme tumerune Pedro:

—¿Taca co yahn nuhn tuhme ne? Chihcoman nuhn nducuahñ yahn nuhn, ne chinduco nuhn ndih.

²⁹ Ndahconan Dihvo vo, ne rahn ye ri ye ihyan:

—Cuaco rahn ri nchuhn te vate ihyan che a chihcoman ye dehtenduh yahn ye cava u nduco ndudo ndah yahn Dendiohs. A chihcoman ye vaco ye man, dihno ye man, cahve ye man, chida ye man, chaco ye man, ihyan ndahta yahn ye man, daya ye man, yahn yahn ye man.

³⁰ Man ro cuh ne, ntaca ihyan chahn ama ciento queri ama che chihcoman ye. Andahre che vaco ye man, dihno ye man, cahve ye man, chaco ye man, daya ye man, yahn yahn ye man. Rechuhrihn ye, ate adiva ne, conan ye vahchetero numacuahn ro.

³¹ Ate nda ro che cuhnde cade yahn nducoyaca ihyan ne, ama yahn ihyan che rivahn che quendañ ndah ye ne, hua quendañ ndah ye, ne ihyan che nde hua ro che quendañ ndah ye ne, quendañ ndah ye.

Dihvo vo Jesucristo ne, rahn ye tama yune te va che cahno se ihyan

³² Quendi Dihvo vo cuahn ye yan Jerusalén, ne ndahnñan ye yahn ihyan apóstol yahn ye. Namin cuahn ama yahn ihyan cuahn vedame ye. Ihyan apóstol ne, ama cuahn ino ye che cuahn Dihvo vo yan Jerusalén nan che cahnda yahn ye, ne ihyan chenahn ne, ama vahino ye. Tuhme quenda Dihvo ihyan apóstol chahn ama lado, ne cah cuande ye ihyan nducuahñ che va che cuahno co ye.

³³ Rahn ye:

—Condihche nchuhn. Uvo ne, a chenun yuno vo cuahn vo yan Jerusalén. U che rinducó nducoyaca ihyan ne, necañ sahn nunde u tah chidocuyan ndinan man, sahn devano ley che dirun Moisés man. Sahn chahn ne, cahco cade se che cahno se u, ne ndaco se u tah sahn tama nacióñ

³⁴ che din duche yahn se u man, cañnan dan se u man, cuahn se u man, nde cahno se u man. Ate cuihno ino ro ne, ntuché van tenahn.

Jacobo nduco Juan ne, rica ye nan che cuahte ye

³⁵ Tuhme nda nduh che o daya Zebedeo, Jacobo nduco Juan, ne rahn ye ri ye Dihvo vo:

—Ihyan Ricuahn, rica nuhn ama favor ndih.

³⁶ Tumerune Dihvo vo:

—¿Deh nahn nchuhn ne?

³⁷ Ndahconan ihyan chahn, ne rahn ye:

—Cuahn che cuhnde ne cahcantiyon ne ne, te yune ne che cuhnde ama cha nuhn lado tah cuaco ne, ne tama cha nuhn ne, lado tah cueh ne.

³⁸ Ate rahn Dihvo vo ri ye ihyan chahn:

—Nde hua devano nchuhn deh che rica ne. ¿A cocha ne chuhrihn ne nduhca che va che chuhrihn ne? ¿A cocha ne che cahno se nchuhn nduhca che va che cahno se u ne?

³⁹ Ndahconan ihyan chahn, ne rahn ye:

—Taca hua. Cocha nuhn.

Tuhme rahn Dihvo vo ri ye ihyan chahn:

—Cuaco te chuhrihn nchuhn nduhca che chuhrihn. Namin cahno se nchuhn nduhca che cahno se u.

⁴⁰ Ate che cuahte ihyan lado tah cuaco man, lado tah cueh man ne, ndiyu u che cahcantiyon, te Dendiohs che cahcantiyon ye.

⁴¹ Checadino ihyan apóstol chenahn chahn, ne chi tan ye nduco Jacobo man, Juan man.

⁴² Ate nedin ɗama Dihvo vo nducoyaɗa ihyan chahn nan ye, ne raɗn ye ri ye ihyan:

—Nchuhn ne, a devano ne te ihyan che rihquentiyon ye nducuaɗn naɗiɗon ne, ama yudo rihquentiyon ye, ne saɗn che rinan se ihyan ne, rendinun rendinaɗno se ihyan yahn ye.

⁴³⁻⁴⁴ Ate hua co tiɗɗa van nchuhn. Tahque ndah ne, duh ihyan che nahn conan ye van nchuhn ne, co ye nduhɗa ama saɗn deɗaɗya yahn ne.

⁴⁵ Tiɗɗa, te nde u che rinducó nducoyaɗa ihyan ne, hua ndá ɗava che dín deɗaɗya yáhn ihyan. Tahque ndah ne, ɗava che conan man ihyan, nde ɗahco mendáhn u, cóh, ɗava che ndedeváhn ama yahn ihyan.

Dihvo vo Jesucristo ne, din ye che chi ro nan Bartimeo

⁴⁶ Ndá Dihvo vo nduco ihyan apóstol yahn ye van Jericó. Cuahn che ndaɗa ye min ne, ama yahn ihyan nduco ye ihyan. Chihto yune ne, va ama saɗn nan ve che duce se Bartimeo, ɗaya Timeo. Min va se rica se che dín ihyan vedevahino nduco se.

⁴⁷ Cuahn che chihnevan se che a cochi nino Dihvo vo Jesucristo, ihyan min che chihta ye van Nazaret ne, canan rica se favor ihyan, ne raɗn se numa dito se:

—Jesús, ɗaya David, ¡cuenan vahino ne u!

⁴⁸ Ama yahn ihyan raɗn ye ri ye saɗn che cuhnde dihn chende se. Ate nde tahque yudo nan ca se raɗn se:

—ɗaya David, ¡cuenan vahino ne u!

⁴⁹ Chan Dihvo vo, ne raɗn ye:

—Cuahn nchuhn chehua ne saɗn.

Chahn ihyan, ne raɗn ye nduco se:

—Dehve raque. Cuenecuen, te rah ye di.

⁵⁰ Tuhme chi se ama ɗado tino che rendiche se, ne necuan se aderano se cuahn se nan Dihvo vo.

⁵¹ Tumerune ye saɗn:

—¿Deh nehn che dín ndoque ne?

Ndahconan se yahn ye:

—Ihyan Ricuahn, náhn che dín ne che co ro nan.

⁵² Tuhme raɗn ye ri ye saɗn:

—Co nahn. Nducote chitehne ne, a ndoyehn.

Ndetahno chi ro nan se, ne cuahn se nduco Dihvo vo cuahn nan che cuahn ye.

11

Dihvo vo Jesucristo ne, nda ye van Jerusalén

¹ Cuahn che cuahn nino Dihvo vo van Jerusalén, chihto van Betfagé nduco van Betania nan Cuete Olivo ne, tahve ye o ihyan apóstol yahn ye,

² ne raɗn ye ri ye ihyan:

—Cuahn nchuhn van lihn ɗah. Min nan che conda ne ne, ntaɗa ne ama burro lihn che nchiche te, che nde ama ihyan ametah condudo ye ite. Cuentahte ne ite, quenda ne ite muhn.

³ Ndete che va duh che tumerune nchuhn: “¿Dehco che tiɗɗa redin nchuhn ne?”, cuendahconan ne yahn ye: “Hua te Dihve nuhn ne, náhn ye ite. Ate ndetahno ndedechuh ye ite.”

⁴ Cuahn ihyan chahn, ne ntaɗa ye burro me. Nchiche te chihto yune, nino ama chendevah, ne ntahte ye ite.

⁵ Min vatendi ama o se, ne raɗn se ri se ihyan chahn:

—¿Deh din nchuhn burro tih, rentahte ne ite ne?

⁶ Ndahconan ye yahn se nduhcá che cah cuande Dihvo vo ihyan, ne cah yune se che conahn ye.

⁷ Quenda ihyan chahn burro me nan Dihvo vo. Tihde ye tino yahn ye dame te, ne quendudo Dihvo vo ite.

⁸ Ama yahn ihyan ntah ye tino yahn ye, chehntave ye yune nan che chuh Dihvo vo. Ihyan chenahn ne, chihca ye yata cue, ne chehntave ye numa yune.

⁹ Nducoyaca ihyan, ihyan che ndahnán ye man, ihyan che chenán ive ye man ne, ama rah yeno ye, ne rahn ye:

—¡Ndeva vo yavenan Dihvo vo Dendiohs! ¡Ndeva vo yavenan ihyan cuh che dechuh ye ihyan!

¹⁰ ¡Ama ndah ro yuhn vo, te cochi ye quenán cuma ye vederihquentiyon yahn ihyan ndico yuhn vo David! ¡Ndeva vo yavenan Dendiohs che va ye vahchetero!

¹¹ Cuahn che ndá Dihvo vo yan Jerusalén ne, chenda ye chete yaco chahte, ndihchero ye nducuahn che va min. Nducote a chi chino ne, ndaconan ye yan Betania nduco nduh che ndichio ihyan apóstol yahn ye.

Dihvo vo Jesucristo ne, din dine ye ama yahn higo

¹² Tama ro me ura che chica Dihvo vo yan Betania ne, chi cuico ye.

¹³ Chinán ye ama yahn higo che chenán yata yahn, ne cuahn ye ndihchero ye ndete che chenán ndute yahn. Ate demán yata yahn chenán. Ametah ndute yahn, te hua ro yahn.

¹⁴ Tuhme din dine ye yahn higo me, ne rahn ye:

—Ametah ndaconan co ndute yehn, cheh ihyan.

Chihnevan ihyan apóstol che tihca rahn ye.

Dihvo vo Jesucristo ne, ndetendah vah ye ihyan che rendihcue ye chete yaco

¹⁵ Ndá ihyan chahn yan Jerusalén, ne cuahn che chenda Dihvo vo chete yaco ne, ndetendah vah ye ihyan che rendihcue ye man, ihyan che ra ye man, chenun ye chete yaco me. Chi muhn chi min ye mesa yahn sahn che rendevahcorun se tume man, silla yahn sahn che rendihcue se icui man,

¹⁶ ne ametah cah yune ye che chenda nde ama ihyan chete yaco me che nda ye dehtenduh.

¹⁷ Rahn ye ri ye ihyan che chenun ye min:

—A ndirun nan Ndudo yahn Dendiohs tuhca: “Yaco yahn ne, cava che covah ihyan nducuahn nación.” Ate nchuhn ne, nedin ne anduhneca vah nan che rendo dama sahn ducó.

¹⁸ Chihnevan chidocuyan ndinan man, sahn devano ley che dirun Moisés man, ne rinuhn ino se taca din se che cahno se Dihvo vo, te vah se ihyan yan yahn che nducoyaca ye rihcován ye che ricuahn Dihvo vo.

¹⁹ Cuahn che chi man me ne, ndaca Dihvo vo min, conahn ye.

Tih yahn higo me

²⁰ Chi dave tama ro me, ura che a chenun yune ye ne, ndihchero ye che a nihno ntih yahn higo me.

²¹ Tuhme necahco Pedro, ne rahn ye ri ye Dihvo vo:

—Ihyan Ricuahn, condihche ne yahn higo che din dine ne me ne, a ntih.

²² Ndahconan Dihvo vo, ne rahn ye ri ye ihyan chahn:

—Nahn che cotahno nchuhn Dendiohs.

²³ Cuaco rahn ri nchuhn te adeducuhno ihyan che cahma ye co ye ico cah che cahñ condahnun van nuniyahn, ndete che hua o ndedecadino ye man, cotahno ye che conahn nduhca che rahn ye man ne, va che conahn.

²⁴ Chemin che ráhn rí nchuhn te nducuahñ che çaca ne ura che covah ne ne, cuihco ne chedave yahn ne Dendiohs, ne dinahn ye.

²⁵⁻²⁶ Cuahn che covah nchuhn, ndete che vate ihyan che nedin tan ye nduco ne ne, cuenchahco ne yahn ye, çava che Chida ne che va ye vahchetero ne, nchahco ye nunde yahn ne. Ate ndete che hua nchahco nchuhn yahn ihyan ne, Dendiohs hua nchahco ye yahn ne.

Sahn ndinan ne, nahn cadino se duh çah vederihquentiyon che quenan cuma Dihvo vo Jesucristo

²⁷ Cuahn che nda ihyan chahn yan Jerusalén ne, cuahn Dihvo vo yaco. Ura che quenan ye min ne, chahn nda chidocuyan ndinan man, sahn intiyañ man, sahn devano ley che dirun Moisés man,

²⁸ ne tumerune se ihyan:

¿Deh vederihquentiyon quenan come ne? ¿Duh chihquentiyon di che tihça redin ne?

²⁹ Ndahconan Dihvo vo, ne ráhn ye ri ye sahn chahn:

Namin u ne, va ama nan che tumeruné nchuhn. Cuendahconan ne yáhn, tuhme có nchuhn deh vederihquentiyon quenan cumá che tihça redin:

³⁰ ¿A Dendiohs dechuh ye Juán che chehdenune ye ihyan, o che nahn man ye ne? Cuendahconan nchuhn yáhn.

³¹ Tuhme canan rente se van man se nduco vih:

Ndete che çahmo vo che Dendiohs dechuh ye Juán ne, çahma se co se uvo: “¿Dehco che hua chitahno nchuhn tuhme ne?”

³² Ate, ¿a çahmo vo che ndiyu Dendiohs dechuh ye ihyan ne?

Hua chihquino se ráhn se tihça, te vah se ihyan yan yahn che nducoyaca ye ritahno ye che Dendiohs dechuh ye Juán.

³³ Chemin che ráhn se ri se Dihvo vo:

—Hua devano nuhn.

Tuhme ráhn ye ri ye sahn:

—Namin u ne, hua có nchuhn deh vederihquentiyon quenan cumá che tihça redin.

12

Ejemplo yahn sahn redin ntiyon che duhtuno ihyan se

¹ Quendi Dihvo vo, ne nte ye ama ejemplo, chihnevan sahn chahn. Ráhn ye:

—Ama ihyan ne, chihche ye dihyo uva nan yahn yahn ye, ne dendah ye chan yahn man, dendah ye ama tanque nan che cuhno ye nune yahn uva me man, chahto ye ama chete yaco çava che din ye cudado chendata me man.

’Ndaco ye ntiyon me tah ama o sahn che din se ntiyon nduco çava che necahn manñ se nduco ye. Tuhme chica ye min, cuahn yahn ye.

² Cuahn che a rine ndute me ne, dechuh ye ama sahn deçahya yahn ye çava che çaca se sahn chahn manñ va che va che co yahn ye.

³ Ate chetah sahn chahn sahn, chahn se sahn, ne ndedechuh se sahn diya tah se.

⁴ Dechuh ye tama se, ate chihya sahn chahn sahn, çah se tu sahn, nuhn yah se tin se.

⁵ Dechuh ye tama se, ne chihno sahn chahn sahn. Adiva ne, yahn se dechuh ye. Ama o se ne, chahn sahn chahn sahn, ne tama te o se ne, chihno sahn chahn sahn.

⁶ Chihno min ne, ametah duhva che dechuh ye, atenan ama sahn daya ye che ama yahino ye sahn. Dechuh ye sahn, rahco ye che nevahneñ sahn chahn sahn.

⁷ Ate cuahn che nda se min ne, rahn sahn chahn van man se nduco vih: "Sahn tih che nuhnde tah se ntiyon cuh. Cahno vo sahn, ne co yuhn vo."

⁸ Tuhme chetah sahn chahn sahn, chihno se sahn, ne chacondah se sahn cuahn chihlo me.

⁹ Tuhme rahn Dihvo vo ri ye sahn ndinan chahn:

—A devano nchuhn te ihyan che dihve ntiyon me ne, hua nchahco ye yahn sahn chahn. Nda ye ne, decuihno ye sahn, ne cah ye yahn me tama te o se, din se ntiyon nduco.

¹⁰ Quendi Dihvo vo, ne rahn ye ri ye sahn chahn:

—A ndero ndi che hua renahn nchuhn Ndudo yahn Dendiohs che ndirun tuhca:

Tu che chacondah sahn vicherahto ne, chemin che nde tahque chichihve.

¹¹ Dihvo vo Dendiohs chihquentiyon ye chemin, ne ama ndahca che tihca din ye.

¹² Chenahn sahn chahn che a yahn se che nte Dihvo vo ejemplo me, ne nahn din se preso ihyan. Ate hua chihquino se, te vah se ihyan yan. Tahque ndah chihcoman se ihyan, conahn se.

Sahn fariseo ne, tumerune se Dihvo vo Jesucristo yahn tume cade iyo

¹³ Adivo dechuh chidocuyan ndinan chahn ama o sahn fariseo nduco ama o sahn partido yahn Herodes cava che tumarande se Dihvo vo, ne caca nunde se yahn ye.

¹⁴ Nda sahn chahn nan ye, ne rahn se ri se ihyan:

—Ihyan Ricuahn, devano nuhn che ndih ne, cuaco rahn ne, te dama no rendihche ne nducoyaca ihyan man, numa cuaco ricuahn ne vederihquentiyon yahn Dendiohs man. Cahma ne co ne nuhn: ¿A rihquentiyon Dendiohs che nedihvo vo tume cade iyo yahn César, o hua ne?

¹⁵ Devano Dihvo vo te o nan o chende sahn chahn, ne rahn ye ri ye sahn:

—¿Dehco che retumarande nchuhn u ne? Te ne ama tume, ndihcheró.

¹⁶ Cah se ama tume, ndihchero ye. Tuhme tumerune ye sahn:

—¿Duh ihyan yavenan ye che quenan nan tume cuh man, duh ihyan che quenan che duche ye man ne?

Ndahconan se, ne rahn se ri se ihyan.

—Yahn César.

¹⁷ Tuhme rahn Dihvo vo ri ye sahn:

—Cha che rihquentiyon César ne, codinahn nchuhn. Cha che rihquentiyon Dendiohs ne, namin codinahn ne.

Ama cuahn ino sahn chahn yahn ndudo che tihca ndahconan ye.

Sahn saduceo ne, tumerune se Dihvo vo Jesucristo yahn che ntuche tenahn

¹⁸ Sahn saduceo ne, hua ritahno se che va che ntuche tenahn. Ama yune ne, nda ama o se nan Dihvo vo, ne rahn se ri se ihyan:

¹⁹ —Ihyan Ricuahn, nan ley che dirun Moisés ne, rihquentiyon te ndete che coh inchahn ama ndahta che hua vate daya se ne, va che cahnevaco dihno se nduco te cava che ndaca daya se nduco te, ne nduco tihca hua cuihno ndata yahn dihno se.

²⁰ Ama yune ne, chahte ndache se che dihno se vih. Sahn che menan ne, chihnevaco se nduco ama tahn. Ate chih se, ne hua chihco se nde ama daya se.

²¹ Chihnevaco tama dihno se nduco te, ne cuahn che chih se ne, namin hua chihco se nde ama daya se. Atihnocah chahn chi tama se.

²² Nduh che ndache sahn chahn chihnevaco se nduco te, ate chih nducoyaca se. Nde ama se hua chihco se daya se. Nan che chihnonan yahn ne, namin chih tahn min.

²³ Nda ro che ntuche tenahn ne, nducote nduh che ndache sahn chahn chihnevaco se nduco te ne, zcha se che inchañ te ne?

²⁴ Ndahconan Dihvo vo, ne rahn ye ri ye sahn:

—Nchuhn ne, nde hua devano ne Ndudo yahn Dendiohs man, vederihquentiyon yahn ye man, ne chemin che hua cuaco che ricuahn ne.

²⁵ Cuedevano ne te cuahn che ntuche tenahn ne, metah cahnevaco ye, nde metah decahnevaco ye ihyan yahn ye, te co ye nduhca angel che vate ye vahchetero.

²⁶ Me yahn che va che ntuche tenahn ne, anduhneca ndete che metah ndihchenan nchuhn che dirun Moisés yahn ro min cuahn che quenun Dendiohs chihto yahn lihn che riche, ne rahn ye ri ye ihyan: “U che Dendiohs yahn Abraham man, Isaac man, Jacob man.”

²⁷ Dendiohs ne, Dendiohs yahn nducoyaca ihyan, ihyan che vate ye iyehñse man, ihyan che a ndaca ye muhn man. Hua cuaco che ama yune rihnonan yahn ihyan cuahn che rih ye nduhca che rahco nchuhn.

Vederihquentiyon yahn Dendiohs che tahque menañ vihca

²⁸ Nduco ama sahn devano ley che dirun Moisés quenun se min rihnevan se, ne tumacadino se che ndahca ndahconan Dihvo vo yahn sahn chahn. Chahn nda se nan ye, ne tumerune se ihyan:

—zCha vederihquentiyon yahn Dendiohs che tahque menañ vihca ne?

²⁹ Ndahconan ye yahn se, ne rahn ye:

—Vederihquentiyon yahn Dendiohs che tahque menañ vihca ne, tuhca: “Nchuhn ihyan nación yahn Israel, cuihnevan ne. Va ama no Dendiohs, ihyan min che Dihvo vo.

³⁰ Codin yahino nchuhn ihyan numacuahn chedave yahn ne man, numa ino ne man, numacuahn vederendedecadino yahn ne man, numacuahn fuerza yahn ne man.”

³¹ Va tama vederihquentiyon yahn ye che a nahn dama: “Codin yahino nchuhn nducoyaca ihyan nduhca che yahino man ne nchuhn.” A vederihquentiyon che tuhchan che tahque menañ vihca van nducuah.

³² Tuhme rahn sahn min ri se Dihvo vo:

—Ihyan Ricuahn, ama ndahca rahn ne. Cuaco rahn ne te va ama no Dendiohs. Ametah tama ye nduhca ihyan min.

³³ Me che numacuahn chedave yuhn vo man, numacuahn vederendedecadino yuhn vo man, numacuahn fuerza yuhn vo man, din yahino vo Dendiohs man, din yahino vo nducoyaca ihyan nduhca che yahino man vo uvo man ne, tahque rigonun chihve che co nducuah vedino che recañ vo man, che rihquiyahn vo man.

³⁴ Checadino Dihvo vo che numacuahn vededevano ndahconan sahn min, ne rahn ye ri ye sahn:

—Ametah yahn renda che cahcantiyon Dendiohs di.

Nduco ndudo che ndahconan Dihvo vo ne, nde ama ihyan ametah chihquino ye tumerune ca ye ihyan.

Dihvo vo Jesucristo ne, Daya Dendiohs ihyan

³⁵ Ura che ricuahn Dihvo vo chete yaco ne, rahn ye:

—Ihyan che a va cade che dechuh Dendiohs ihyan, ndedevahn ye ihyan iyehñse ne, zdehco che rahn sahn devano ley che dirun Moisés te daya David ihyan ne?

³⁶ Din Vaco Dendiohs che dirun man David tuhca:

Rahn Dihvé Dendiohs ri ye Dihvé:

“Cuihnde muhn lado tah cuaco

numanahn che ndahco ndiyá ihyan che hua ri rendihche ye di, nevahnecon ye di.”

³⁷ Ihyan che a va çade che dechuh Dendiohs, ndedevahn ye ihyan iyehñse ne, nducote dirun man David che Dihve ye ihyan ne, ¿taca che daya ye ihyan tuhme ne?

Ama yahn ihyan chenun ye min, ne ama yeno ye rihnevan ye che ricuahn Dihvo vo.

Dihvo vo Jesucristo ne, rentihyon yan ye nunde yahn sahn devano ley che dirun Moisés

³⁸ Quendi Dihvo vo ricuahn ye, ne rahn ye nduco ihyan:

—Cuihco nchuhn cudado, ne hua dama co ne nduco sahn devano ley che dirun Moisés, sahn chahn che vatechica se chenun se cahteca chahno se. Ama renan ino se che nevahnecon ihyan sahn, neçah ye Dendiohs sahn cuahn ndihve.

³⁹ Chete yaco ne, renan ino se cuahte se nan che rahte ihyan ndinan. Nan vihco ne, renan ino se cuahte se nan che tahque ndeva ihyan yavenan se.

⁴⁰ Rehnevi se dehtenduh yahn ndahta vah, ne çava che hua cuhnde ro vede idihya yahn se ne, ama rahn revah se, redin ca se che ndah ihyan se. Sahn chahn ne, tahque chahte castigo din Dendiohs sahn.

Vedino yahn ama ndahta vah

⁴¹ Ama yune ne, va Dihvo vo chete yaco, nino nan va yave yahn tume vedino, ne ndihchero ye che renda ihyan, rih ye tume chete. Ama yahn ihyan cuihca ne, ama ndeh tume rih ye chete.

⁴² Ura min nda ama ndahta vah, ne chih ye o tume çahya che ama doh chihve.

⁴³ Tuhme cah Dihvo vo ihyan apóstol yahn ye, ne rahn ye ri ye ihyan:

—Cuçco rahn ri nchuhn te ndahta vah çah ne, tahque rignonun chihve vedino yahn ye nan Dendiohs che co vedino yahn ihyan chenahn sih.

⁴⁴ Nducoyaca ihyan sih ne, chih ye che ngava yahn ye. Ate ndahta çah ne, van vedechevah yahn ye ne, chih ye nducuahn che va yahn ye. Nde che va che toh ye ne, chih ye.

13

Dihvo vo Jesucristo ne, rahn ye te va che ndora yaco yahn yan Jerusalén

¹ Cuahn che ndiquendañ Dihvo vo chete yaco chahte me ne, rahn ama cha ihyan apóstol ri ye ihyan:

—Ihyan Ricuahn, condihche ne tah. ¡Ama ndahça yaco man, tu che ndahto man!

² Ndahconan Dihvo vo, ne rahn ye ri ye ihyan:

—¿A rahn ine che ama ndahça yaco? Rahn ri di te va che ndora, nde o tu che ndahto vih ne, hua cotave.

Dehtenduh che va che co cuahn che a cochi nino che nto iyehñse

³ Tah cuahn adive ne, cuahn ihyan chahn Cuete Olivo nan che rendihche cuaco yaco chahte me. Numanahn che va Dihvo vo ne, chahn nda Pedro man, Jacobo man, Juan man, Andrés man, ne tumerune ye ihyan:

⁴ —¿Ticuahn conahn che rahn ne ri ne nuhn yahn yaco me ne? ¿Deh va che co ro cuahn che a cochi nino che conahn ne?

⁵ Ndahconan Dihvo vo, ne rahn ye:

—Cuihco nchuhn cudado che hua cahñcheh nde ama ihyan nchuhn,

⁶ te nda ama yahn se, cahñcheh se ihyan, din ca se che a vederihquentiyon yahn chenana cuma se. Çahma queri ama se te a sahn chahn che a va çade

che dechuh Dendiohs, ndedevahn se ihyan iyehñse, ne ama yahn ihyan cahñcheh se.

⁷ Cuahn che cahnevan nchuhn che rente ihyan che cuanñ canda man, che a va canda man ne, hua dihya ne co, te a tihca va che co. Ate che nto iyehñse ne, condah ca.

⁸ Ihyan ama naciñ ne, cuahtecuhma ye nduco ihyan tama naciñ man, a muhn a min necuan canda man, nuhn yahn cahnguh cuahngah man, cuhnde cuico man. Ate vedeyah chemin chan ne, cade cuanñ.

⁹ Cuihco nchuhn cudado, te necah ihyan nchuhn tah intiyahn, cuih nunde ye yahn ne man, cuahn ye nchuhn chete yaco man. Va che quenda ihyan nchuhn nan gobernador man, rey man, yahn che rahndudo ne ndudo yahn. Min va che cahma ne nduhca che ritahno ne u.

¹⁰ Ate numanahn che ametah nto iyehñse ne, va che conan cuahndudo ihyan ndudo ndah yahn Dendiohs numachahte iyehñse.

¹¹ Me cuahn che necah ihyan nchuhn tah intiyahn, cuih nunde ye yahn ne ne, hua ndedecadino ne taca cahma ne, te a Vaco Dendiohs te ndudo che cahma ne. Ndiyu van vededevano yahn man ne quenda che cahma ne.

¹² Nda ro min ne, ama din tan ihyan nduco vih. Nahñ ye ne, caça ye che cahno se diho ye, nahñ ye ne, caça ye che cahno se daya ye, nahñ ye ne, caça ye che cahno se indihthe yahn ye.

¹³ Nducoyaca ihyan ndihche tan ye nchuhn yahn che ritahno ne u, ate ndete che cocha ne nducuahn vedeyah chemin chan ne, ndevahn ne.

¹⁴ Dirun ihyan profeta Daniel yahn ama nan che ama chihnga man, che redetohan man. Cuahn che ndihchero nchuhn che a nti nan che hua redin yahn che cuandi ne, tahque ndah che cuano ihyan che vate ye estado yahn Judea, cuahtenun ndeh ye van icoyahn. (Ndahca che conahn tin ihyan cuahn che ndihchenan ye nan Ndudo yahn Dendiohs nan che rahn yahn chemin).

¹⁵ Ro min ne, ihyan che vate ye tin vah yuto ne, ndetahno nchan ye cano ye. Hua redin yahn che condah ca ye chete vah, cotah ye dehtenduh yahn ye.

¹⁶ Me ihyan che chenun ye viyata ne, a min no caça ye, te hua conun yahn ye che nahñ ye viyan, quengua ye tino yahn ye.

¹⁷ ¡Chevah ihyan ndahta che chenun daya ye nda ro min man, ihyan ndahta che retave ye man!

¹⁸ Nahñ che covah nchuhn, caça ne Dendiohs cava che conan ye nchuhn, ne hua ro iche va che cano ne,

¹⁹ te ro min ne, ama yah cuahn ihyan che hua nahno ye nde ro che dendah Dendiohs iyehñse nde meniyan.

²⁰ Ndete che cuahnecun Dendiohs che rahn cuhnde vedeyah min ne, nde ama ihyan hua ndevahn ye. Ate cava che hua chuhnan chuhrihn ihyan che tendahnun ye ne, a chihco cade ye che hua rahn cuhnde vedeyah min.

²¹ Nda ro min ne, ndete che cahma ihyan co ye nchuhn: “Condihchero ne. Muhn quenun ihyan min che a va cade che dechuh Dendiohs, ndedevahn ye ihyan iyehñse”, o cahma ye: “Condihchero ne. Min quenun ye” ne, hua cotahno ne.

²² Va che nda ihyan che ndere cahma ye che a ihyan chahn che a va cade che dechuh Dendiohs, ndedevahn ye ihyan iyehñse. Namin va che nda ihyan che din ca ye che cuahndudo ye Ndudo yahn Dendiohs. Din ihyan chahn vederihno cava che cahñcheh ye, ndete che co ne, nde ihyan che a tendahnun Dendiohs.

²³ Cuihco nchuhn cudado. A riyahvé nchuhn numanahn che metah conahn cava che cuahteyan ne.

Daya Dendiohs ne, va che chi tun ye

²⁴ Cuahn che cuihno vedeyah chemin chan ne, co man iyehñse. Cuihno dave yahn yahn man, iyo man,

²⁵ cora iyon man, nuhn nducuahñ che a nihñde çade nan ro man.

²⁶ Tuhme ndihchero nducoyaca ihyan che u che rinducó nducoyaca ihyan ne, ndá van man numacuahn vederihquentiyon chahte yahn.

²⁷ Dechúh ángel yahn numachahte iyehñse, nedin dama ye nducoyaca ihyan che a tendahnún.

²⁸ 'Cua cuande nchuhn nduhça che rineve yahn higo. Cuahn che renecaño yan, rendo tu yata yahn ne, a devano ne te a cuañan ro ihno.

²⁹ Atihnoça cuahn che ndihchero nchuhn che a conahn nducuahñ dehtenduh che a ráhn rí nchuhn, te nduco chemin codevano ne te a denan ndá.

³⁰ Cuaço ráhn rí nchuhn te nde metah conan coh ihyan che vate ye man ro cuh ne, a conahn nducuahñ.

³¹ Nan ro man, iyehñse man ne, va che cuihno. Ate ndudo yahn ne, hua chuh ya, te va che conahn nducuahñ.

³² Ate hua duh devano deh ro man, deh ura man, che conahn. Nde ángel che vate ye vahchetero hua devano ye. Nde u che Daya Dendiohs ne, hua devano. Atenán Dendiohs Chida che devano ye.

³³ Cuahteyan nchuhn man, covah ne man, te hua devano ne ticuahñ conahn.

³⁴ U che rinducó nducoyaca ihyan ne, nduhça ama ihyan che quendañ ye cuahn ye nan yahn. Ihyan min ne, chihco ye ntiyon che din queri ama mozo yahn ye man, chihquentiyon ye sahn che redin cudado chendevah che cuhndeyan se man.

³⁵ Cuahteyan nchuhn, te nduhça che hua devano sahn chahn deh ura ndaconan dihive se ne, namin hua devano nchuhn deh ura ndaconan chí. ¿A ndá ura che cuehche yahn ne? ¿A ndá nan mahñ yan ne? ¿A ndá ura che co dave ne? Hua devano ne.

³⁶ Chemin che nahn che cuahteyan ne, ne a decodehno ura che ndaconán ne, ntacá nchuhn che vateyan ne.

³⁷ Che ráhn rí nchuhn ne, namin ráhn çava ihyan chenañ: ¡Cuahteyan nducoyaca ne!

14

Rentuhno se taçq din se preso Dihvo vo Jesucristo

¹ O ro ca renda che ndá ro yudo, vihco cuahn che reh ihyan nación yahn Israel pan che hua nduco ya yahn ne, chidocuyan ndinañ nduco sahn devano ley che dirun Moisés ne, rentuhno se deh vederihncheh din se çava che co din se preso Dihvo vo, ne çahno se ihyan.

² Rente çade se van man se nduco vih:

—Hua çahno vo sahn menañ vihco, te ama nto dama ihyan, ne necuan ye numacuahn vedetan.

Ama ihyan ndahta ne, chacotañme ye nunedan tin Dihvo vo Jesucristo

³ Cuahn che quenán Dihvo vo yan Betania, vaco Simón, sahn min che chi se cah che rechá yute ro menañ me, ura che va ye reh ye nan mesa ne, nda ama ihyan ndahta, nda ye ama frañco che ndindah nduco ama nan tu che duche alabastro. Chenun chete frañco me ama nan che demañ nunedan che duche nardo, ama yahn chihve. Cun ye chende frañco me, ne chacotañme ye nunedan me tin Dihvo vo.

⁴ Van ihyan che chenun min ne, nduco ama o se che hua chahtenan ino se che tihca din ihyan ndahta me, ne rahn nun se nan ye van man se nduco vih:
—¿Dehco che ndere redetoh tahn tihh nunedan tih?

⁵ Tahque ndah ndete che ndihcue te, cua te nchuh ca ino ciento tume denario, ne conan te ihyan chevah.
Nde chihya se ihyan.

⁶ Tuhme rahn Dihvo vo ri ye sahn chahn:
—¿Dehco che ri tan nchuhn nduco ihyan ndahta tih? Ndahta che tihca din ye cava.

⁷ Ihyan chevah ne, cuahn dama chenun ye van nchuhn, ne adehno ro che nahn ne ne, co conan ne ihyan. Ate u ne, hua conan van nchuhn numacuahn ro.

⁸ Ihyan ndahta tih ne, din ye nducuahn che tuno tah ye, te chacotahme ye u, ne nduco tihca chihcoyan ye u cava che co cuhche ihyan u.

⁹ Cuaco rahn ri nchuhn te numachahte iyehense che cuahndudo ihyan ndudo ndah yahn Dendiohs ne, ntiyon yan ye nduhca che din ihyan ndahta tih nduco.

Nte cade Judas nduco chidocuyan ndinan che necah se Dihvo vo Jesucristo

¹⁰ Judas Iscariote, ama cha sahn che nduco se chi cuande se van ihyan apostol che ndichio chahn ne, chahn se nte cade se nduco chidocuyan ndinan chahn cava che necah se Dihvo vo.

¹¹ Ama chi yeno chidocuyan chahn che tihca rahn se, ne cah se ndudo yahn se che cah se tume sahn. Tuhme nuhn ino se taca din se che necah se ihyan tah sahn chahn.

Cheh vino Dihvo vo Jesucristo che cuande yahn ro yudo

¹² Ro che canan vihco che reh ihyan naci6n yahn Israel pan che hua nduco ya yahn man, rihno ye itecuche cahya, ri te vedino yahn ro yudo man ne, tumerune ihyan apostol Dihvo vo:

—¿Ti nahn ne che cahh nuhn cahcoyan nuhn che cheh ne che cuande yahn ro yudo ne?

¹³ Tuhme tahve Dihvo vo o ihyan chahn, ne rahn ye ri ye ihyan:
—Cuahn nchuhn viyan, ne min ntaca ne ama sahn che nda se ama cuhtenune. Cuiquendi ne sahn.

¹⁴ Nda ne vah che ndonda se ne, cahma ne co ne ihyan che vaco min: “Nahn cadino Ihyan Ricuahn ti va cuarto nan che cheh vino ye nduco ihyan apostol yahn ye che cuande yahn ro yudo.”

¹⁵ Tuhme nahma ye nchuhn ama cuarto chahte che va nde vaco nan che a vateyan dehtenduh. Min chihcoyan nchuhn che chuh vino vo.

¹⁶ Cuahn ihyan che o chahn viyan me, ne ntaca ye vah me nduhca che rahn Dihvo vo. Min chihcoyan ye che cheh vino ye nduco vih che cuande yahn ro yudo.

¹⁷ Cuahn che chi man me ne, nda Dihvo vo nduco nduh che ndichio ihyan apostol yahn ye.

¹⁸ Cuahn che a vate ye reh ye nduco vih nan mesa ne, rahn Dihvo vo ri ye ihyan:

—Cuaco rahn ri nchuhn te ama cha ne che reh ne dama nduco ne, ndihcue ndeh ne u.

¹⁹ Tuhme chi ran ihyan chahn, ne ca ama ca ama ye rahn ye ri ye Dihvo vo:
—Ate co ndiyu u che tihca din.

²⁰ Ndahconan Dihvo vo, ne rahn ye.

—Ama cha nchuhn che dama reh ne nduco chete cuh cuh che tihca din ne.

²¹ Cuāco te u che rinducó nducoyāca ihyān ne, va che conahn nducó nduhcā che a ndirun nān Ndudo yahn Dendiohs. Ate jchevah sahn che ndihcue ndeh se u! Tahque ndah ndete che hua chihndeyān se.

²² Numanahn che reh vino ihyān chahn ne, chetah Dihvo vo pan, ne necah ye nundihve cuahn Dendiohs. Tuhme ndeh ye, cah ye, cheh ihyān chahn, ne rahñ ye ri ye ihyān:

—Cocheh nchuhn pan cuh. Chu ne, yute yāhn.

²³ Namin chetah ye ama vaso vino, ne cuahn che a necah tun ye nundihve cuahn Dendiohs ne, cah ye, chih nducoyāca ihyān chahn,

²⁴ ne rahñ ye ri ye ihyān:

—Chu ne, yun yāhn. Chu che dito yahn ndudo ra che ndahco cade Dendiohs. Man ne, va che cora cava ama yāhn ihyān.

²⁵ Cuāco rahñ ri nchuhn te ametah ndaconan cūh nune yahn uva nde nda ro che nuhnde cade nducuahñ quenuma ra, ne quenún nān che rihquentiyon Dendiohs.

Rahñ Dihvo vo Jesucristo te cahma Pedro te hua rendihche ye ihyān

²⁶ Chihno che chita ihyān chahn himno ne, cuahn ye cuahn Cuete Olivo.

²⁷ Tuhme rahñ Dihvo vo ri ye ihyān apóstol yahn ye:

—Man vino cuh ne, cahcomān nducoyāca nchuhn u nduhcā che a ndirun nān Ndudo yahn Dendiohs tuhca: “Cuahñecun Dendiohs che cahno se ihyān che redin cudādo itecuche, ne cuihno cotuhn te.”

²⁸ Ate cuahn che ntuché van tenahn ne, cāhn estađo yahn Galilea tahque menā ca che co nchuhn.

²⁹ Tuhme rahñ Pedro ri ye Dihvo vo:

—Andahre che cahcomān nducoyāca ihyān sih ndih ne, ate u ne, hua cahcomān ndih.

³⁰ Rahñ Dihvo vo ri ye ihyān:

—Cuāco rahñ rí di te man yan cuh ne, numanahn che metah cuah o co tuh ne, a ino yune cahme che hua rendihche u.

³¹ Ate tahque yudo nān Pedro rahñ ye:

—Andahre va che cóh dāma nduco ne, ate hua cahcomān ndih.

Atihnoçā rahñ ihyān apóstol chenahn chahn.

Dihvo vo Jesucristo ne, covah ye ama cuān nān che duche Getsemaní

³² Nda ihyān chahn ama cuān nān che duche Getsemaní, ne rahñ Dihvo vo ri ye ihyān apóstol yahn ye:

—Cuahte nchuhn muhn numanahn che cāhn covāh.

³³ Tuhme quenda ye Pedro man, Jacobo man, Juan man, cuahn ye nduco vih. Ura min canān ama chi ndāche ye, ne ama chuhrihn ye che rendecadino ye.

³⁴ Rahñ ye ri ye ihyān chahn:

—Adeche cóh che ama ndāche rí. Cuahtenan rino nchuhn muhn, cuahten-duche ne.

³⁵ Tuhme cuahn Dihvo vo tahque çana nān min, chendih ye ndiyahn, ne chica ye Dendiohs che ndete che cuahñecun ye ne, hua chuhrihn ye nduhcā che a va cade.

³⁶ Rahñ ye:

—Chida mán, ndih ne, ri redin ne nducuahñ che nahn ne. Cuahñecun ne che hua chuhrihn nduhcā che a va cade. Chemin che ricá ndih, ate hua co nduhcā che náhn, co nduhcā che nahn man ne.

³⁷ Tuhme ndaconan ye nān che chenun ihyān apóstol chahn. Ntāca ye ihyān che vateyādo ye, ne rahñ ye ri ye Pedro:

—Simón, ¿a nde ama ura hua chi quendoche?

³⁸ Cuahtenduche nchuhn man, covah ne man, cava che hua dinahn ne che tumarande chundah nchuhn. Ndiyu che rahcotahn ne yahn, ate anduhneca ndete che ndi i ne.

³⁹ Ndaconan cuahn tun ye, ne a chemin no chica ye Dendiohs.

⁴⁰ Cuahn che ndaonan ye ne, a namin no vateyado ihyan chahn, anduhneca ndete che nda vih ndutinan ye che nahn cuahteyado ye, ne hua devano ye deh che ndahconan ye.

⁴¹ Cuahn che nta Dihvo vo nan che chi ino yune ne, rahn ye ri ye ihyan chahn:

—A chahteyado nchuhn. A tuno ura che necah se u che rinducó nducoyaca ihyan tah sahn nunde.

⁴² A cochi sahn che ndihcue ndeh se u. Cuenecuan nchuhn, quendi yuno vo sahn.

Dihvo vo Jesucristo ne, chi ye preso

⁴³ Nde metah cuihno cahma Dihvo vo cuahn che nda Judas, ama cha sahn che chi cuande se van ihyan apóstol che ndichio chahn. Nduco se ama yahn sahn che nda espada man, sahn che nda yahn man, sahn chahn che dechuh chidocuyan ndinan chahn man, sahn intiyahn man, sahn devano ley che dirun Moisés man.

⁴⁴ Judas, sahn min che ndihcue ndeh se Dihvo vo ne, a nte cade se nduco sahn chahn tuhca:

—A ihyan che tenan ihyan ne, a ihyan min codin nchuhn preso ihyan. Cuihco ne cudado che hua cano ye.

⁴⁵ Ndetahn nda se ne, rahn se ri se Dihvo vo:

—¡Ihyan Ricuahn! ¡Ihyan Ricuahn!

Tuhme tenan se ihyan,

⁴⁶ ne din sahn chahn preso ihyan.

⁴⁷ Ama cha ihyan apóstol chahn ne, ndetendah ye espada yahn ye, ne chahn ye ama sahn decahya yahn chidocuyan che tahque ndinan, chahcondah ye revan se.

⁴⁸ Rahn Dihvo vo ri ye sahn chahn:

—Nchuhn ne, cochi ne nda ne espada man, nda ne yahn man, din ne preso u nduhca sahn duco.

⁴⁹ A van nchuhn quenún ro ro, ricuahn chete yaco, ne hua din ne preso u. Ate man ne, nda ne, te a tihca va che conahn nducó nduhca che a ndirun nan Ndudo yahn Dendiohs.

⁵⁰ Ura min chihcoman ihyan apóstol chahn Dihvo vo, ne chihno chano ye.

Chano ama sahn yuno

⁵¹ Cuahn ama sahn yuno cuahn nan che cuahn Dihvo vo, ndacotuma se ama tino chahte. Chetah sahn chahn sahn,

⁵² ate ndairun se tino me, ne devane se chano se.

Nda Dihvo vo Jesucristo nan intiyahn

⁵³ Quenda sahn chahn Dihvo vo nan chidocuyan che tahque ndinan, ne min ndo dama nducoyaca chidocuyan ndinan chahn man, sahn intiyahn man, sahn devano ley che dirun Moisés man.

⁵⁴ Cuahn Pedro diyahn diyahn cuahn nan che quenda sahn chahn Dihvo vo nde nda ye chevah yaco chidocuyan che tahque ndinan me. Min quenun ye van sahn ndahco chahn, rechah ihno ye ihyan chihto yacoyahn.

55 Chidocuyan ndinan chahn nduco sahn intiyahn chahn ne, renuhn ino se deh nunde cacueh dame se Dihvo vo, cava che co cahno se ihyan, ate hua ndaca se nde ama.

56 Ama yahn se ndere rih nunde se yahn Dihvo vo, ate hua chi dama ndudo yahn se nduco vih, te hua cuaco che rahn nde ama se.

57 Necuan ama o se, ne ndere chih nunde se yahn Dihvo vo, ne rahn se tuhca:

58 —Nuhn chihnevan nuhn che rahn sahn tih: “U ndahtera yaco cuh che ndahto ihyan, ne chete che ino ro ne, nahnó tama che hua nduhca yaco che rahto ihyan.”

59 Ate nde nduco nduh ne, hua chidama ndudo yahn se nduco vih.

60 Tuhme necuan chidocuyan che tahque ndinan me, ne rahn ye ri ye Dihvo vo:

—¿Dehco che hua rendahconen yahn sahn sih che ama rica nunde se yehn?

61 Ate nde ama hua rahn Dihvo vo. Tuhme tumerune chidocuyan che tahque ndinan me:

—¿A di che Daya Dendiohs, ihyan min che a va cade che chi ye ndedevahn ye ihyan iyehense ne?

62 Ndahconan Dihvo vo, ne rahn ye:

—A u chemin. Cuedevano ne te u che rinducó nducoyaca ihyan ne, ndihchero ne u che vá lado tah cuaco Dendiohs, ihyan min che ama yudo vederihquentiyon yahn ye. Namin ndihchero ne u che ndá van man.

63 Tuhme chidocuyan che tahque ndinan me ne, ndeh ye tino yahn ye, ne rahn ye:

—¿Dehca din vo testigo ne?

64 A man nchuhn chihnevan ne ndudo che rahn se, ducherino se Dendiohs. Nchuhn cahma ne che co.

Rahn nducoyaca sahn chahn te redin yahn che cahno se ihyan.

65 Tuhme ama o se ne, cahnan dan se Dihvo vo. Dechiche se nan ye, chahn se ihyan, ne rahn se ri se ihyan:

—Cahme co nuhn duh chahn di.

Namin sahn policia ne, chahn se ihyan.

Rahn Pedro te hua rendihche ye Dihvo vo Jesucristo

66 Numanahn min ne, quenun ca Pedro chevah me. Ura min nda ama tahn decahya yahn chidocuyan che tahque ndinan me,

67 ne ndihchero te Pedro che recah ihno ye ihyan chihto vacoyahn. Chahn nino te ndihchero ndah te ihyan, ne rahn te ri te ihyan:

—Namin di ne, chindoque Jesús yahn yan Nazaret.

68 Ate rahn Pedro ri ye tahn:

—Nde hua rendihché duh ihyan che rahn yahn ye.

Tuhme cuahn ye cuan chendevah, ne ura min cah menahn tuh.

69 Ndhichero tahn min ihyan tama yune, ne rahn te ri te sahn che chenun se min:

—Sahguh ne, namin chinduco se sahn chahn.

70 Ate rahn Pedro tama yune te hua cuaco. Tah cuahn adive me ne, rahn sahn che chenun se min ri se ihyan:

—Cuaco che chindoque sahn sih, te nde nan ndudo yehn ro yehn che sahn Galilea di.

71 Tuhme rahva Pedro, ne rahn ye ri ye sahn chahn:

—Nde muhn nde nan Dendiohs, rahn ri nchuhn te hua rendihche duh ihyan che rahn ne.

⁷² Ura min cah o co tuh, ne necahco Pedro che rahn Dihvo vo ri ye ihyan tuhca: “Ura che ametah cuah o co tuh ne, cahmé ino yune te hua rendihche u.” Ndedecadino ye yahn chemin, ne chaco ye.

15

Techecqde Pilato yahn Dihvo vo Jesucristo

¹ Cuahn che a chi dave ne, ndo dama chidocuyan ndinan chahn man, sahn intiyaahn man, sahn devano ley che dirun Moisés man, ne dechiche se Dihvo vo, quenda se ihyan, necah se ihyan tah Pilato.

² Pilato ne, tumerune se Dihvo vo:

—¿A di che rey yahn ihyan nación yahn Israel ne?

Ndahconan ye yahn se:

—U, nduhca che rahn.

³ Chidocuyan ndinan chahn ne, ama rih nunde se yahn Dihvo vo.

⁴ Ndaconan tumerune Pilato ihyan, ne rahn se:

—¿Dehco che hua ndahconen yahn sahn sih?, te ama rih nunde se yehn.

⁵ Ate nde ama ndudo hua ndahconan Dihvo vo yahn se, ne ama rahn ino se.

Chihco cqde Pilato che cahno se Dihvo vo Jesucristo

⁶ Va ama costumbre che nduyo nduyo che renda ro yudo ne, rentahnte Pilato ama preso, adecoduhno che nahn ihyan yan.

⁷ Min vacoyahn ne, chenun sahn preso che chi se contra yahn gobierno, chahtecuhn se nduco ye, chihno se ihyan yahn ye. Van sahn chahn ne, nduco ama se che duche se Barrabás.

⁸ Ro min nda ama yahn ihyan nan Pilato, ne chica ye che ntahte se ama preso nduhca che redin se nduyo nduyo.

⁹ Tumerune Pilato yahn ihyan chahn:

—¿A nahn nchuhn che ntahte rey yahn ne ne?

¹⁰ Tihca rahn se, te a checadino se te che ri ve chidocuyan ndinan chahn yahn Dihvo vo, ne chemin che necah se ihyan tah se.

¹¹ Ate chidocuyan ndinan chahn ne, chinun se ihyan yan che tahque ndahca che caça ye che ntahte Pilato Barrabás.

¹² Tuhme tumerune tun Pilato ihyan chahn:

—¿Me deh nahn nchuhn che din nduco sahgguh che rahn ne che rey yahn ne?

¹³ Ndahconan ihyan chahn, ne rahn ye numacuahn vedetan:

—¡Conahn yah ne sahn!

¹⁴ Tumerune tun Pilato ihyan chahn:

—¿Dehco? ¿Deh nunde quendihco se?

Ate ndaconan cah ihyan chahn:

—¡Conahn yah ne sahn!

¹⁵ Nducote nahn Pilato che co yeno ihyan chahn ne, ntahte se Barrabás. Tuhme chahn se Dihvo vo, ne necah se ihyan tah sandado çava che nahn yah se ihyan.

¹⁶ Quenda sandado chahn Dihvo vo chevah yahn palacio me, ne nedin dama se nducoyaca combiero yahn se.

¹⁷ Chaconuhn se ama tino morado ihyan, ne dendah se ama corona yan, tihyon se tin ye.

¹⁸ Chihno min ne, redin ca se che renevahnecon se ihyan, ne rah se:

—¡Ndeva nuhn yavenan rey yahn ihyan nación yahn Israel!

¹⁹ Chahn se tin ye nduco ama nducodi, ne cahnan dan se ihyan. Chehntihya se nan ye, redin ca se che rendeva se yavenan ye.

²⁰ Chihno che din duche yahn se ihyan ne, chehnevi se tino morado me, ne ntihyon se tino yahn man ye ihyan. Tuhme quenda se ihyan nan che nahn yah se ihyan.

Nahn yah se Dihvo vo Jesucristo

²¹ Ura min ne, chuh Simón, ama ihyan yan Cirene, nahn ye viyata. Ihyan min che chida Alejandro man, Rufo man. Din sandado chahn fuerza ihyan, ne quenda ye cruz nan che nahn yah se Dihvo vo.

²² Quenda sandado chahn Dihvo vo ama cuan nan che duche Gólgota, che nahn cahma Cuete Ine Tin Tenahn.

²³ Min cah se vino che ndihchetahn nduco ama nan ico che duche mirra, cuh Dihvo vo. Ate hua chih ye.

²⁴ Cuahn che a chihno nahn yah sandado chahn ihyan ne, din se sortear tino yahn ye cha sahn quenda yahn se che co yahn se.

²⁵ Nan raco nun vatiyan nahn yahn se ihyan.

²⁶ Nunde yahn ye che ndirun, chaconahn se nan cruz ne, rahn tuhca: “Ihyan cuh che Rey yahn ihyan nación yahn Israel.”

²⁷ Namin nahn yah se o sahn duco, ama se lado tah cuaco ye, ne tama se lado tah cueh ye.

²⁸ Nduco tuhca chinahn nduhca che a ndirun nan Ndudo yahn Dendiohs tuhca: “Din cuande se ihyan van sahn nunde.”

²⁹ Ihyan che rechuh ye min ne, rahva ye yahn Dihvo vo, rahco tin ye, ne rahn ye:

—Di che rahn che ndahtere yaco, ne chete che ino ro nahne,

³⁰ ¡cuendevahn man di, cuenchehn nan cruz tih!

³¹ Namin chidocuyan ndinan chahn man, sahn devano ley che dirun Moisés man ne, din duche yahn se ihyan, ne rahn se van man se nduco vih:

—Ndedevahn se tama ca ihyan, ate man se ne, hua ri rendevahn se sahn.

³² Ndete che cuaco che sahn tih ihyan min che a va cade che dechuh Dendiohs, ndedevahn ye ihyan iyehanse man, rey yahn ihyan nación yahn Israel man ne, ndahca che nchahn se nan cruz, ndihchero vo, cava che cotahno vo.

Nde sahn che chenan yah se dama nduco ye ne, rahva se nduco ye.

Chih Dihvo vo Jesucristo

³³ Cuahn che a chi inguiyahn ne, chi man iyehanse, chengu nde nan rahco ino.

³⁴ Ura min cah Dihvo vo numa dito ye:

—Eloi, Eloi, ¿lama sabactani? —che nahn cahma: Dendiohs yahn, Dendiohs yahn, ¿dehco che chihcoman ne u?

³⁵ Chihnevan ama o sahn che chenun min, ne rahn se:

—Cuihnevan nchuhn. Rah se ihyan profeta Elías.

³⁶ Tuhme aderano ama se, decahnda se ama esponja nduco vinagre. Chacotah se esponja me tin ama nduco, nahn se chende ye cava che tihve ye, ne rahn se:

—Cuahtenan rino vo, ne ndihchero vo ndete che chi Elías ndedevah ye sahn.

³⁷ Ate ama dito cah Dihvo vo, ne chih ye.

³⁸ Ura min nde tino chahte che quendihco chete yaco, chica nde yaco, chiya nde ndiyahn, ne ndo o ndi.

³⁹ Sahn capitán che nti se chihto nan Dihvo vo ne, chihnevan se che cah ye man, ndihchero se nduhca che chih ye man, ne rahn se:

—Cuaco niyon te ihyan cuh che Daya Dendiohs.

⁴⁰ Min vatendi ama o ihyan ndahta ama lado, rendihchero ye. Ama ye ne, duche María yahn yan Magdala. Tama ye ne, duche María che chaco José, ihyan min che menan ye yahn diho ye Jacobo. Tama ye ne, duche Salomé.

⁴¹ Ihyan ndahta chahn ne, chinduco ye Dihvo vo, chinan ye ihyan cuahn che quechica ye estado yahn Galilea. Namin yahn ca ihyan ndahta che nda ye nduco Dihvo vo yan Jerusalén chenun ye min.

Chihche ye Dihvo vo Jesucristo

⁴²⁻⁴³ José yahn yan Arimatea ne, ama ihyan ndinan yahn nación yahn Israel. Ihyan min ne, quenan ino ye che a nun cahcantiyon Dendiohs. Nducote a ro min che vispera yahn ro che rahtetuhno ihyan ne, din nun ino ye chahn ye nan Pilato, ne chica ye sahn che cuahnecon se che cuhche ye Dihvo vo.

⁴⁴ Pilato ne, ama cuahn ino se che rahn ihyan min che a chih Dihvo vo. Tuhme cah se capitán me, ne tumerune se sahn ndete che cuaco.

⁴⁵ Rahn capitán me ri se sahn te cuaco, ne cahnecon se che chahn ye, cuhche ye Dihvo vo.

⁴⁶ Tuhme chahn José, ca ye ama tino cua, quenda ye. Ndedevah ye Dihvo vo, chahcotuma ye tino me ihyan, chacondihte ye ihyan chete ama yayan che ndindah nan yava, ne necahde ye chende yayan me nduco ama tu chahno.

⁴⁷ María yahn yan Magdala man, María che chaco José man ne, chahn ye ndihchero ye nan che quenun Dihvo vo.

16

Dihvo vo Jesucristo ne, ntuche ye van tenahn

¹ Cuahn che a chuh ro che rahtetuhno ihyan ne, María yahn yan Magdala man, Salomé man, María che chaco Jacobo man ne, ca ye nunedan cava che chahn ye nan yayan, cuacotahme ye Dihvo vo.

² Ro min ne, ro che ndeva ndate. Ura che a quenda yahn ne, nda ye nan yayan me,

³ ne rahn ye van man ye nduco vih:

—¿Taca che metah duh che cahnevi tu che ntude nduco chende yayan me?

⁴ Ate cuahn che ndihchero ye ne, a ndavi tu ndico me che ntude nduco chende yayan me.

⁵ Chenda ihyan chahn chete yayan me, ne ndihchero ye ama ángel che va ye lado tah cuaco, ndacotuma ye ama tino cua chahte, ne dihya ihyan chahn chi.

⁶ Tuhme rahn ángel me ri ye ihyan:

—Hua dihya nchuhn co. Nchuhn ne, rinuhn ne Jesús yahn yan Nazaret, ihyan min che quenan yah ye. Ate ametah ye muhn. A ntuche ye. Condihte ne tan nan che chacondihte ye ihyan; ametah ye.

⁷ Cuahn nchuhn ngo ne Pedro man, ihyan apóstol chenahn man, te chahn Dihvo vo estado yahn Galilea tahque menan che co nchuhn. Min ndihchero ne ihyan nduhca che a rahn ye ri ye nchuhn.

⁸ Ndaca ihyan ndahta chahn nan yayan me, conahn ye rano ye, nde tuno rendoh ye che dihya ye chi, ate hua rahn ye nduco nde ama ihyan che chahno chi ye, te vah ye.

Dihvo vo Jesucristo ne, chihnde ro ye nan María yahn yan Magdala

⁹ Cuahn che a ntuche Dihvo vo vatiyan ro che ndeva ndate ne, chihnde ro ye menan vihca nan Maria yahn yan Magdala, ihyan min che chenun ndache vaco chihnga ihyan ro menan me, ndetendah Dihvo vo.

¹⁰ Chahn ihyan min chengo ye ihyan apóstol. Ihyan chahn ne, ran ye man, raco ye man.

¹¹ Ate hua chitahno ye che rahn ihyan ndahta me che ntuche Dihvo vo man, che ndihchero ye ihyan man.

Cihnde ro Dihvo vo Jesucristo nan o ihyan che chinduco ye ihyan

¹² Chihno min ne, chihnde ro Dihvo vo nan o ihyan che chinduco ye ihyan ura che chenun yune ye conahn ye. Ate a ntacorun Dihvo vo, ametah nduhca ye ro menan.

¹³ Tuhme chahn ihyan chahn chengo ye ihyan chenahn che chinduco ye Dihvo vo. Ate a namin no tun, te hua chitahno ihyan chahn.

Dihvo vo Jesucristo ne, chihquentiyon ye ihyan apóstol che cahn ye cuahndudo ye

¹⁴ Adiva ne, chihnde ro Dihvo vo nan ihyan apóstol che ndichiamá chahn ura che vate ye reh ye nan mesa. Chihya ye ihyan chahn yahn che hua chitahno ye che rahn ihyan che a ndihchero ye ihyan che a ntuche ye.

¹⁵ Namin rahn Dihvo vo ri ye ihyan:

—Cuahn nchuhn numachahte iyehense, cuahndudo ne ndudo ndah yahn Dendiohs, cahnevan nducoyaca ihyan.

¹⁶ Ihyan che cotahno ye man, cuedenune ye man ne, ndevahn ye. Ate ihyan che hua cotahno ye ne, conda ye.

¹⁷ Ihyan che ritahno ye ne, din ye vederihno. Numacuahn vederihquentiyon yahn ndetendah ye vaco chihnga man, cahma ye tama te o nan devaco man,

¹⁸ nahn tah ye ihyan cah, ne din ye che ndoyahn ye man. Namin ndete che denan cotah ye ama cu tan, o cuh ye veneno ne, hua dehva co yahn ye.

Dihvo vo Jesucristo ne, conahn ye vahchetero

¹⁹ Chihno nte Dihvo vo nduco ihyan chahn ne, din Dendiohs che conahn ye vahchetero, chihnde ye lado tah cuaco ye.

²⁰ Me ihyan apóstol ne, chahtechica ye numachahte, cahndudo ye ndudo ndah yahn Dendiohs. Rinan Dihvo vo ihyan, ne redin ye che renahn nducoyaca ihyan che cuaco ndudo che rahndudo ihyan chahn yahn vederihno che redin ye. Tihca chi.

NDUDO NDAH YAHN DIHVO VO JESUCRISTO CHE DIRUN SAN LUCAS

¹ Ama yahn ihyan, dirun ye rine quenan yahn dehtenduh che chi van uvo,
² nduhca che a rente ihyan che, nde ro che canan, ndihchero man ye man, cahndudo ye Ndudo yahn Dendiohs man.

³ Ndiñ Teófilo che yahinó ndih, namin rahcó che ndahca che tihca dín. Chemin che ndeh nduyo nedin damá nduco cudado, ndudo yahn queri ama che chi. Man ne, a dirun yahn ne nducuahn chemin,

⁴ cava che codevano ndah ne te cuaco ndudo che chicuahn ihyan ndih.

Tahve Dendiohs ama ángel, checu ye ndudo che cuhndeyan Juan Bautista

⁵ Cuahn che quenan Herodes rey yahn Judea ne, chihnde ama chidocuyan che duche ye Zacarías, ndata yahn Abías. Ihyan ndahta yahn ye ne, duche ye Elisabet, ndata yahn Aarón.

⁶ Nduh che o ye ne, ndah ihyan ye, ne redinahn ye nducuahn che rihquentiyon Dihvo vo Dendiohs.

⁷ Ate metah daya ye, te Elisabet ne, hua rendaça daya ye. Avane ne, nduh che o ye ne, a ndico ye.

⁸ Ama yune ne, quendañ yahn chidocuyan che combiero yahn Zacarías che covah ye nan Dendiohs.

⁹ Chidocuyan chahn ne, ro ro redin ye sortear deh ntiyon din queri ama ye, ne ro min ne, quendañ yahn Zacarías che conda ye chete yaco chahte yahn Dihvo vo, cahcoyahn ye cuhn.

¹⁰ Ura che riche cuhn me ne, revah nducoyaca ihyan yan, chenun ye cuahn chevah.

¹¹ Tuhme chihndero ama ángel che dechuh Dendiohs, chandi ye nan Zacarías lado tah cuaco yahn nan ta.

¹² Cuahn che ndihchero Zacarías ángel me ne, ama dihya ye chi.

¹³ Ate rahñ ángel me ri ye ihyan:

—Zacarías, hua dihye co, te a chihnevan Dendiohs che chique. Man ne, ndahta yehn Elisabet ne, ndaca ama sahn daya te, ne coneñ che duche se, Juan.

¹⁴ Ama co yene, ne namin co yeno ama yahn ihyan che cuhndeyan se,

¹⁵ te daye ne, chahte vederihquentiyon cah Dendiohs, conan cuma se. Hua cuh se vino, nde hua cuh se nde ama nan nune che din che cocoh se. Conun Vaco Ndah yahn Dendiohs sahn nde ro che ametah cuhndeyan se.

¹⁶ Ama yahn ihyan nación yahn Israel, din se che ndaconan cotahno ye Dihve ye Dendiohs.

¹⁷ Nda se tahque menan ca che co Dihvo vo, conan cuma se vederihquentiyon nduhca che quenan cuma Elías, cava che ndoyan ihyan nduco indihnte yahn ye man, cava che cotahno ihyan Ndudo yahn Dendiohs nduhca che ritahno ihyan che ndah ihyan ye nan Dendiohs man. Tihca cahcoyan se chedave yahn ama yahn ihyan, cava che nevahnecon ye Dihvo vo.

¹⁸ Chiquerune Zacarías ángel me:

—¿Taca cotahnó che rahñ ne ne?, te u ne, a indihnte u. Namin ihyan ndahta yahn, a indihnte ye.

¹⁹ Ndahconan ángel me yahn ye:

—U ne, Gabriel che redináhn che rihquentiyon Dendiohs. M̄an ye tahve ye u, çava che çahmá ndoque ndudo ndah cuh.

²⁰ Ndudo che a ráhn ndoque ne, va che conahn, ate nducote hua chitehne ne, co lihme di, ne hua co nte nde ndá ro che cuhndeyan daye.

²¹ Numanahn min ne, ihyan yan çahn ne, çenan rino ye, ne rahn ino ye che ama rendah Zacarías çete yaço.

²² Cuahn che ndiquendaç ye ne, redin taç redin nan ye, te chi lihme ye. Tuhme çenahn ihyan çahn che ndihçhero ye ama vederihno çete yaço.

²³ Cuahn che chihno ndate che quenan Zacarías ntiyon min ne, conahn ye ndevaço ye.

²⁴ Chuh neve ro min ne, a quenun daya ihyan ndahta yahn ye Elisabet. Ihyan min ne, quenun ye vah; hua çahn ye nde ama cuan çete che uhn iyo, ne ndedecadino ye:

²⁵ “Dihvé Dendiohs din ye vederihno cuh nducó. M̄an ne, ametah co cuihnán nan ihyan.”

Ndā ama ángel, çecu ye ndudo che cuhndeyan Dihvo vo Jesucristo

²⁶ Chihno te an iyo ne, tahve tun Dendiohs ángel Gabriel, cuahn ye ama yan lihn che duche Nazaret, estado yahn Galilea.

²⁷ Nda ye ndudo che dechuh Dendiohs yahn ama ndahta ntuco che duche ye María. Ndahta me ne, a va ndudo yahn ye che çahnevaço ye nduco José, ama ihyan che ndáta yahn David.

²⁸ Cuahn che ndá ángel me nan che quenun ndahta me ne, ráhn ye ri ye ihyan:

—Necuma di. Dendiohs ne, yahino ye di, ne nduco ye di. A tendahnun ye di van nducoyaça ndahta.

²⁹ Cuahn che chihnevan ye che ráhn ángel me ne, cuahn ino ye, ne ndedecadino ye: “¿Dehra cuande che tihcá ráhn ye nducó?”

³⁰ Tuhme ráhn ángel me ri ye ihyan:

—María, dehve rahque, te Dendiohs ne, yahino ye di.

³¹ M̄an ne, ndaça ama daye, ne conehn che duche ye, JESUS.

³² Ihyan min ne, ama chahte vederihquentiyon conan cuma ye, te Daya Dendiohs che ama yudo ye ihyan. Dihvo vo Dendiohs ne, ndaçco ye vederihquentiyon che quenan cuma David taç ye.

³³ Çahcantiyon ye ihyan nación yahn Israel, ne hua cuihno vederihquentiyon yahn ye.

³⁴ Tuhme chiquerune María ángel me:

—¿Taça co conahn che ráhn ne ne?, te u ne, ametah çahneváčo.

³⁵ Ndahconan ángel me yahn ye:

—Co Vaco Ndah yahn Dendiohs, conun di, ne nduco vederihquentiyon yahn Dendiohs conahn. Chemin che daye che cuhndeyan ne, Daya Ndah yahn Dendiohs.

³⁶ A ndihçe che din Dendiohs nduco taçn vih Elisabet. Andahre a ndico te, ne hua rendaça daya te, ate m̄an ne, quenun daya te a chi an iyo,

³⁷ te Dendiohs ne, nducuañ che nahn ye ne, rinahn.

³⁸ Tuhme ráhn María:

—Conahn nduhça che ráhn ne, te u ne, renevahnecún che rihquentiyon Dihvé Dendiohs.

Chihno min ne, conahn ángel me.

Chahn María çendihçhero ye Elisabet

³⁹ Ama o ro min ne, cuahn María ama yan che va cuahn icoyahn, estado yahn Judea.

⁴⁰ Nda ye min ne, min chenda ye chete vaco Zacarías, ne necah ye Dendiohs Elisabet.

⁴¹ Ndetahn chihnevan Elisabet che necah María Dendiohs ihyan ne, nuhn decuah yahn ye che quenun chete ye, ne chiya Vaco Ndah yahn Dendiohs, quenun ihyan.

⁴² Rahn ye:

—Van nducoyaca ndahta ne, a tendahnun Dendiohs di. Namin a tendahnun ye daye.

⁴³ Di che co chaco Dihvé. ¿Taca che man cochi quendihchero u?

⁴⁴ Ndetahno che nte Dendiohs u ne, nuhn dayá che quenun cheté che chi yeno.

⁴⁵ ¡Ndah ro yehn che chitehne!, te conahn ndoque ndudo che dechuh Dihvo vo Dendiohs.

⁴⁶ Tuhme rahn María:

Numacuahn chedave yahn, rendeva yavenan Dihvé Dendiohs.

⁴⁷ Ama yeno nduco ye, te ndedevahn ye u.

⁴⁸ Andahre ama chevah u nan ye, ate necahco ye u.

Man ne, nducoyaca ihyan cahma ye te ndah ro yahn,

⁴⁹ te Dendiohs, ihyan min che ama yudo vederihquentiyon yahn ye din ye vederihno nducó.

Ihyan min che cuaco, runecade ye nan nducuahn.

⁵⁰ Numacuahn ro renan vahino ye nducoyaca ihyan che renevahnecun ye ihyan.

⁵¹ Ihyan min ne, redin ye vederihno rahte.

Rendahco ndiya ye ihyan che yade ye.

⁵² Rehnevi ye vederihquentiyon yahn ihyan che ndinan ye, ne redin ye che rinan ihyan che necun ye.

⁵³ Rinan ye ihyan che renevahnecun ye Ndudo yahn ye,

ne rihcoman ye ihyan che rahco ye che nde hua rendotenan ye ihyan.

⁵⁴ Redin ye cudado ihyan naci6n yahn Israel, ne renan vahino ye ihyan,

⁵⁵ nduhca che cah ye ndudo yahn ye

indihte yuhn vo Abraham nduco nducoyaca ndata yahn ye.

⁵⁶ Tenduh ino iyo quenan María vaco Elisabet, tuhme conahn ye ndevaco ye.

Chihndeyan Juān Bautista

⁵⁷ Cuahn che tuno ro yahn Elisabet ne, chihndeyan daya ye.

⁵⁸ Nducoyaca ihyan nino ndevaco ye nduco ihyan yahn ye ne, a devano ye te ama quenan vahino Dendiohs ihyan, ne chi yeno ye nduco vih.

⁵⁹ Chi nine ro ne, cuahn ihyan cava che conahn ye seña decuah me, ne nahn conahn ye che duche se Zacarías, nduhca che duche chida se.

⁶⁰ Ate rahn chaco se.

—Hua, te Juān conan che duche se.

⁶¹ Rahn ihyan chahn:

—¿Dehco ne?, te ametah nde ama ihyan yahn nchuhn che tihca duche ye.

⁶² Tuhme din tah ye che tumerune ye chida se taca nahn ye che conan che duche se.

⁶³ Din tah chida se, chica ye nan che dirun ye, ne chaconahn ye: “Juān duche se.” Tuhme cuahn ino ihyan chahn.

64 A ura min no nuhnde cava chihya Zacarías, ndiquendah cahn ye, ne canan ndeva ye numacuahn vedeyeno yavenan Dendiohs.

65 Nde tahque cuahn ino ihyan chahn chi, ne chetuhn ndudo me nu-machahte estado yahn Judea.

66 Nducoyaca ihyan che checadino ye ne, rente ye nduco vih:

—¡Ama chahte ntiyon conan cuma sahn dihn cah!

Tihca rahn ye, te Dendiohs ne, nduco ye sahn.

Nduhca che cahndudo Zacarías

67 Chiya Vaco Ndah yahn Dendiohs, quenun Zacarías, ne cahndudo ye:

68 Ndeva vo yavenan Dihvo vo Dendiohs yahn Israel, te ndedevahn ye uvo yahn ye.

69 Van ndata yahn David, ihyan min che dinahn ye ndudo yahn ye ne, a tendahnun ye ama ihyan che ndedevahn ye uvo numacuahn vederihquentiyon yahn ye,

70 nduhca che cah ye ndudo yahn ye ro menan, cahndudo ihyan ndah che profeta yahn ye.

71 Tihca ndedevahn ye uvo nan nducoyaca ihyan che hua ri rendihche ye uvo.

72 Renan vahino ye indihthe yuhn vo, ne redinahn ye ndudo ndah yahn ye che chihco cade ye.

73 Ndudo min che cah ye indihthe yuhn vo Abraham,

74 che ndedevahn ye uvo nan ihyan che hua ri rendihche ye uvo, cava che numa ino vo ndeva vo yavenan ye.

75 Numacuahn ro che cuahtenan vo iyehense cuh ne, nahn che dave chedave yuhn vo nan ye.

76 Di, daya man, cuahndode ndudo yahn Dendiohs, ihyan min che ama yudo vederihquentiyon yahn ye.

Cahn tahque menan ca che co Dihvo vo, cahcoyan chedave yahn ihyan, cava che nevahnecon ye ihyan.

77 Cah, checadino ihyan che ndedevahn Dendiohs uvo yahn ye, te nchahco ye nunde yuhn vo.

78 Dendiohs yuhn vo ne, ama quenan vahino ye ihyan iyehense. Chemin che caca Daya ye vahchetero,

79 ndedevahn ye ihyan che cahnda yahn ye che vate ye tah vederih, din ye che ndahca cuahtenan ye.

80 Me sahn dihn me ne, chihta se, ne chi chahte vededevano yahn se. Quechica se yahn nan che metah duhva, nde nda ro che canan cahndudo se ndudo yahn Dendiohs, chihnevan ihyan naci6n yahn Israel.

2

Chihndeyan Dihvo vo Jesucristo

1 Tahn min ne, chihquentiyon emperador Augusto César che conan caca nducoyaca ihyan che vate ye numachahte nan che rihquentiyon ye.

2 Quenan Cirenio gobernador yahn Siria, ne cade ro min canan raconahn caca se ihyan.

3 Nducoyaca ihyan, adecotino che chenan ye ne, va che cahn ye, conan caca ye yan nan che chica ndata yahn ye.

4 José ne, chica ye yan Nazaret, estado yahn Galilea, cuahn ye yan Belén, estado yahn Judea, yan vaco David, te ndata yahn David ihyan.

⁵ Min va che conan çaça ye. Namin min va che conan çaça María, ihyan min che va ndudo yahn ye che cahnevaco ye nduco vih. Ihyan min ne, a nun chuhndeyan daya ye.

⁶ Cuahn che chenay ye Belén ne, nda ro yahn María che cuacoyahn ye.

⁷ Min chihndeyan daya ye che menan, ne चाहcotuma ye decuah me nduco tino. Nducote hua ndaca ye nde ama vah ne, chahtenan ye ama vaco yuhdo. Chete ama inguhto nan che reh nun yuhdo, min din dave ye nan che chacondihte ye decuah me.

⁸ Nino yan Belén vatenduche ama o ihyan, redin ye cudado itecuche yahn ye.

⁹ Nahmin ne, nda ama ángel che dechuh Dihvo vo Dendiohs nan ihyan chahn. Adenan chiya dave nan che chenun ye, ne ama dihya ye chi.

¹⁰ Ate rahn ángel me ri ye ihyan:

—Hua dihya nchuhn co, te cochí, checú ama ndudo ndah, ne ama co yeno nducoyaca ihyan.

¹¹ Man ro cuh ne, min yan vaco David chihndeyan ama decuah. A decuah min che Dihvo vo CRISTO, ihyan min che ndedevahn ye nchuhn.

¹² Codevano nchuhn te cuaco ndudo che ri nchuhn, te ntaca ne decuah me, ndacotuma tino, quendite chete vaco yuhdo.

¹³ Adenan nda ama yahn ángel che chica ye vahchetero, chinduco ye ángel me, ndeva ye yavenan Dendiohs, ne rahn ye:

¹⁴ Ndahca che ndeva nducoyaca ihyan numacuahn vedeyeno yavenan Dendiohs, ihyan min che va ye vahchetero!

Muhn iyehkse cuh ne, nducoyaca ihyan che yeno Dendiohs nduco ye ne, din Dendiohs che ndahca cuahtenan ye nduco vih.

¹⁵ Cuahn che conahn ángel chahn vahchetero ne, ihyan che redin ye cudado itecuche ne, rahn ye:

—Cuhn vo nduco vih yan Belén, quendihchero vo vederihno che chi, nduhca che dechuh Dendiohs ndudo yuhn vo.

¹⁶ Ndetahno cuahn ihyan chahn, ne ntaca ye María nduco José nduco decuah me che quendite chete vaco yuhdo.

¹⁷ Cuahn che ndihchero ihyan chahn decuah me ne, rente ye nduhca che rahn ángel me yahn decuah me.

¹⁸ Nducoyaca ihyan che chihnevan ye che rente ihyan chahn ne, ama rahn ino ye.

¹⁹ María ne, quenun ino ye nducuahn che rente ihyan chahn, ne ndeva ye ndudo me chete chedave yahn ye.

²⁰ Tuhme conahn ihyan chahn, rendeva ye numacuahn vedeyeno yavenan Dendiohs, te a chinahn nducuahn ndudo che dechuh Dendiohs yahn ye, ne a man ye chihnevan ye man, ndihchero ye man.

Simeón nduco Ana

²¹ Chi nine ro me ne, nahn ye seña decuah me, ne chaconahn ye che duche JESUS, a nduhca che rahn ángel me ri ye María nde ro menan cuahn che ametah conun daya ye.

²² Moisés ne, dirun ye te ihyan ndahca che cuacoyahn ye ne, hua co condá ye chete yaco, nde tuno ro che a ndihco cade Dendiohs. María ne, quenan rino ye nde tuno ro min, tuhme cuahn ye nduco José yan Jerusalén, quenda ye decuah me, cava che nahma ye nan Dendiohs.

²³ Tihca din ye, te a nihnde cade nan ley yahn Dendiohs: “Nducoyaca chechahya chahn che rahteyan menan ne, va che cahco vih ihyan, cava che din ntiyan yahn Dendiohs.”

24 Namin ndihco çade Dendiohs te nducoyaça ihyan ndahta che cuhndeyan daya ye ne, va che çah ye o icui, o o pichón çahya, çava che co te vedino, ne çah María vedino min.

25 Ro min ne, min yan Jerusalén va ama ihyan che duche ye Simeón. Ihyan min ne, ndah ihyan ye nan Dendiohs, ne quenun Vaco Ndah yahn Dendiohs ihyan. Quenan rino ye ro che ndedevahn Dendiohs ihyan nación yahn Israel.

26 Çah Vaco Ndah yahn Dendiohs, che checadino ye te hua coh ye nde nda ro che ndihchero man ye ihyan min che dechuh Dihvo vo Dendiohs, çava che ndedevahn ye ihyan iyehñse.

27 Din Vaco Dendiohs che cuahn Simeón yaço chahte, ne ura min nda José nduco María çava che nahma ye decuañ me nan Dendiohs nduhça che a nihnde çade nan ley che dirun Moisés.

28 Simeón ne, chetañ ye decuañ me, quenuhn ye. Ndeva ye numacuahn vedeyeno yavenan Dendiohs, ne rañn ye:

29 Dihvé Dendiohs, man ne, a co ndaçá iyehñse cuh.

Hua dehva rañcó, te a chinahn ndudo che te ne, checadinó.

30 A ndihchero man decuañ cuh yahn ne che ndedevahn ihyan iyehñse.

31 A dechuh ne çava che ndedevahn ihyan iyehñse.

32 Man che cuaço codevano ihyan tama nación Ndudo yahn ne, ne ndeva nducoyaça ihyan yavenan ihyan yahn ne, ihyan nación yahn Israel.

33 José nduco María ne, ama chahn ino ye yahn ndudo che tihça rañn Simeón yahn decuañ me.

34 Tuhme chica Simeón Dendiohs çava ihyan chahn, ne rañn ye nduco María:

—Condiñche. Cuahn che cuihta decuañ cuh che dechuh Dendiohs ne, ama yahn ihyan co tan ye nduco. Chemin che van ihyan nación yahn Israel ne, ama yahn ihyan ndevahn ye, ne ama yahn ye conda ye.

35 Nduco tihça cuhnde ro vederendedecadino yahn queri ama ye. Me di ne, va che choñ ama vedeyah chahte.

36 Min chete yaço quenun ama indihthe ndahta che duche ye Ana. Ihyan min ne, rahndudo ye Ndudo yahn Dendiohs. Fanuel duche chida ye, ndata yahn Aser. Chihno ndache nduyo che chihnevaco ye ne, chih inçahn ye.

37 Ro min ne, a cun raco cun nduyo ye. Ro man, vino man, quenun ye chete yaço, revañ ye man, rihnde ye yahte man.

38 Nda ye ura min, ne neçañ ye nundihve cuahn Dendiohs. Cahndudo ye yahn decuañ me, chihnevan ama yahn ihyan che chenan rino ye ro che ndedevahn Dendiohs ihyan yan Jerusalén.

Chihta Dihvo vo Jesucristo yan Nazaret

39 José nduco María ne, dinahn ye nducuahn che ndihco çade Dendiohs, tuhme conañ ye yan vaço ye Nazaret, estado yahn Galilea.

40 Dihvo vo Jesucristo ne, rihta ye, ne ama va vededevano yahn ye. Dendiohs ne, ama yahino ye ihyan.

Quenun Dihvo vo Jesucristo yaço chahte

41 Nduyo nduyo, ro che renda vihco ro yudo ne, rañn José nduco María yan Jerusalén.

42 Cuahn che chi Dihvo vo ndichio nduyo ne, cuahn tun ihyan chahn vihco me.

43 Chuh vihco me ne, conañ ye, nde hua devano ye te quenun ca Dihvo vo min yan Jerusalén.

⁴⁴ Rahco ye te co van ihyan che a conahn ye chinduco ye, ne rinuhn ye ihyan van ihyan yahn ye man, ihyan rendihche ye man. A numa ro vatechica ye,

⁴⁵ ate nducote hua ntaca ye ihyan ne, ndaconan tun ye yan Jerusalén, rinuhn ye ihyan.

⁴⁶ Nde nan che chi ino ro che rinuhn ye ihyan ne, ntaca ye ihyan chete yaco van sahn devano ley che dirun Moisés. Min quenun ye, rihnevan ye che rente sahn chahn man, retumarune ye sahn man.

⁴⁷ Namin sahn chahn ne, retumarune se ihyan, ne ama rahn ino se yahn che ama va vedevano yahn ye man, yahn ndudo che rendahconan ye man.

⁴⁸ Cuahn che ndihchero José nduco María che min quenun ye ne, ama chahn ino ye, ne rahn María:

—Dayá, ¿dehco che tihca din nduco nuhn?, te u nduco chide, ama chuhrihn nuhn, rendedecadino nuhn cave, rinuhn nuhn di.

⁴⁹ Ndahconan Dihvo vo yahn ye:

—¿Dehco che rinuhn nchuhn u? ¿A hua devano te nan ntiyon yahn Chidá va che conán?

⁵⁰ Ate hua chenahn ihyan chahn deh cuande che tihca rahn ye.

⁵¹ Tuhme conahn ye nduco ihyan chahn yan vaco ye, Nazaret. Quendi redinahn ye che rahn ihyan chahn, ne quenun ino María nducuahn.

⁵² Dihvo vo ne, chihta ye, ne chi chahte vedevano yahn ye. Ndahca quenan ye nan Dendiohs man, nan ihyan man.

3

Rahndudo Juan Bautista che va che nto ino ihyan nunde yahn ye

¹ Cuahn che chi ntiyon nduyo che quenan Tiberio César emperador ne, Poncio Pilato quenan se gobernador yahn Judea. Herodes quenan se gobernador yahn Galilea, ne dihno Herodes che duche se Felipe, quenan se gobernador yahn Iturea nduco Traconite. Lisaniás quenan se gobernador yahn Abilinia.

² Anás nduco Caifás che chidocuyan che tahque ndinan. Nduyo min quechica Juan, daya Zacarías, yahn nan che metah duhva. Min cah Dendiohs che checadino ye ndudo che cuahndudo ye.

³ Chihto ico Jordán canan rahndudo Juan che nto ino ihyan nunde yahn ye man, che cuedenune ye man, cava che nchahco Dendiohs yahn ye.

⁴ Tihca chinahn nduhca che dirun ihyan profeta Isaías tuhca:

Cuahndudo ama se min yahn nan che metah duhva tuhca:

“Cuihcuyan nchuhn chedave yahn ne, te a nun nda Dihvo vo.

⁵ Ihyan che rendah ye yune che ndahca ne, rendedecuto ye ya man, rihtera ye ico nan, cuete man, rene din cuaco ye nan che cueh man, rendahco nahn ye nan che chihnga man.

Tihca va che cahcoyan ihyan chedave yahn ye,

⁶ te codevano nducoyaca ihyan che ndedevahn Dendiohs ihyan.”

⁷ Rahn Juan ri ye ihyan che renda ye cava che cuedenune ye:

—Nchuhn ne, nduhca cu tan tihchan ne. Hua rahco ne che nduco che cuedenune ne a ndevahn ne yahn castigo yahn Dendiohs che va che conahn.

⁸ Va che nto ino nchuhn nunde yahn ne man, ndahca cuahatenan ne nan Dendiohs man. Hua ndere rahco ne che cohihve yahn ne che ndata yahn Abraham nchuhn, te hua redinahn ne. Nde te nahn Dendiohs che ndere co yahn ndata yahn Abraham ne, andahre nan tu che tuhchan, co ndedecuan ca ye ndata yahn ihyan min.

⁹ Nduhca che rihca ihyan yahn ndata che hua richihve ndute yahn, riquiyahn ye ne, tihca a nun techecade Dendiohs yahn nducoyaca ihyan.

¹⁰ Tuhme tumerune ihyan:

—¿Deh va che din nuhn ne?

¹¹ Ndahconan Juan yahn ye:

—Ihyan che va o tino yahn ye ne, va che cah ye ama yahn ihyan che metah yahn ye, ne ihyan che va che reh ye ne, va che conan ye ihyan che metah che cheh ye.

¹² Namin nda ama o sahn rica tumecađiyo cava che cuedenune se, ne tumerune se:

—Ihyan Ricuahn, ¿deh va che din nuhn ne?

¹³ Ndahconan Juan yahn se:

—Hua caca nchuhn tumecađiyo che tahque ndeh che co che rihquentiyon ley.

¹⁴ Namin ama o sandado ne, tumerune se:

—Nuhn, ¿deh va che din nuhn ne?

Ndahconan Juan yahn se:

—Hua duco nchuhn. Hua ndere cuih nunde ne yahn ihyan. Cuahtenan ne vedeyeno nduco tume che renevihve nchuhn.

¹⁵ Ama yahn ihyan rendecadino ye yahn Juan, ne recah yeno ye chedave yahn ye, te rahco ye te co a ihyan min che va cade che chi ye, ndedevahn ye ihyan iyehense.

¹⁶ Ate rahn Juan ri ye nducoyaca ihyan:

—Ndiyu u. Cochi tama ihyan che tahque chahte vederihquentiyon yahn ye che co u. U ne, nde hua redin yahn che co mare ama sahn decahya yahn ye. U ne, rehdenune ihyan, ate ihyan min ne, din ye che conun Vaco Ndah yahn Dendiohs nchuhn man, din ye castigo ihyan nunde man.

¹⁷ Cuahn che retiveyato ihyan trigo ne, renevahn ye ndute yahn, rih ndah ye. Ate dacheyama yahn ne, rene din dama ye, rihquiyahn ye. Atihnoqa ihyan min, te a nun techecade ye yahn nducoyaca ihyan. Ihyan che ndah ihyan ye nan Dendiohs ne, quenda ye ihyan vahchetero, ne ihyan che hua ndah ye ne, dechuh ye ihyan van ruchiyahn che hua rintoh.

¹⁸ Nduco ama ndeh ndudo che tuhchan, rahndudo Juan, ricuahn ye ihyan ndudo ndah yahn Dendiohs.

¹⁹ Juan ne, riyahve ye gobernador Herodes yahn che quenan se nduco Herodias, ndahta yahn dihno se Felipe. Namin riyahve ye sahn yahn nducuah nunde yahn se.

²⁰ Chemin che chihquentiyon se che quenen Juan vacoyahn, ne nduco chemin decuihta nduh se nunde yahn se.

Chedenune Dihvo vo Jesucristo

²¹ Cuahn che chihno chedenune ama yahn ihyan naci6n yahn Israel ne, nda Dihvo vo, chedenune ye. Chihno min ne, nahmin che revah ye ne, ndondah vahchetero.

²² Nduhca che ro ama icui ne, tihca chi ro Vaco Ndah yahn Dendiohs, chiya, quenun ihyan. Tuhme chihnevan ye ama ndudo che chica vahchetero che rahn:

—Di che Dayá. Yahin6 di. Ama yen6 ndoque.

²³⁻³⁸ A tahn min che canan Dihvo vo, redin ye ntiyon yahn ye. A ri ye tenduh ndico ndiche nduyo.

Tuhca cochi ndqta yahn Dihvo vo Jesucristo

Nde n̄an che can̄an ne, dendah Dendiohs Adán. Daya Adán ne, Set. Daya Set ne, Enós. Daya Enós ne, Cainán. Daya Cainán ne, Mahalaleel. Daya Mahalaleel ne, Jared. Daya Jared ne, Enoc. Daya Enoc ne, Matusalén. Daya Matusalén ne, Lamec. Daya Lamec ne, Noé. Daya Noé ne, Sem. Daya Sem ne, Arfaxad. Daya Arfaxad ne, Cainán. Daya Cainán ne, Sala. Daya Sala ne, Heber. Daya Heber ne, Peleg. Daya Peleg ne, Ragau. Daya Ragau ne, Serug. Daya Serug ne, Nacor. Daya Nacor ne, Taré. Daya Taré ne, Abraham. Daya Abraham ne, Isaac. Daya Isaac ne, Jacob. Daya Jacob ne, Judá. Daya Judá ne, Fares. Daya Fares ne, Esrom. Daya Esrom ne, Aram. Daya Aram ne, Aminadab. Daya Aminadab ne, Naasón. Daya Naasón ne, Salmón. Daya Salmón ne, Booz. Daya Booz ne, Obed. Daya Obed ne, Isaí. Daya Isaí ne, David. Daya David ne, Natán. Daya Natán ne, Matata. Daya Matata ne, Mainán. Daya Mainán ne, Melea. Daya Melea ne, Eliaquim. Daya Eliaquim ne, Jonán. Daya Jonán ne, José. Daya José ne, Judá. Daya Judá ne, Simeón. Daya Simeón ne, Leví. Daya Leví ne, Matat. Daya Matat ne, Jorim. Daya Jorim ne, Eliezer. Daya Eliezer ne, Josué. Daya Josué ne, Er. Daya Er ne, Elmodam. Daya Elmodam ne, Cosam. Daya Cosam ne, Adi. Daya Adi ne, Melqui. Daya Melqui ne, Neri. Daya Neri ne, Salatiel. Daya Salatiel ne, Zorobabel. Daya Zorobabel ne, Resa. Daya Resa ne, Joana. Daya Joana ne, Judá. Daya Judá ne, Semei. Daya Semei ne, Matatías. Daya Matatías ne, Maat. Daya Maat ne, Nagai. Daya Nagai ne, Esli. Daya Esli ne, Nahum. Daya Nahum ne, Amós. Daya Amós ne, Matatías. Daya Matatías ne, José. Daya José ne, Jana. Daya Jana ne, Melqui. Daya Melqui ne, Leví. Daya Leví ne, Matat. Daya Matat ne, Elí. Daya Elí ne, José.

Tihçā cochi ndata yahn José. Nducoyaca ihyan ne, rahco ye te Dihvo vo Jesucristo ne, daya José ihyan.

4

Chundah ne, tumarande se Dihvo vo Jesucristo

¹ Dihvo vo ne, quenun Vaco Ndah yahn Dendiohs ihyan, ne chica ye min ico Jordán. Din Vaco Dendiohs che cuahn ye yahn n̄an che metah duhva.

² Min quenan ye o raco ro, ne chundah ne, retumarande se ihyan. Nducuahn ro min ne, hua cheh ye, ne chihno min ne, chi cuico ye.

³ Tuhme rah̄n chundah me ri se ihyan:

—Ndete che Daya Dendiohs ndih ne, cuihquentiyon ne tu cuh che ndacondā p̄an.

⁴ Ndahconan Dihvo vo yahn se:

—N̄an Ndudo yahn Dendiohs a ndirun: “Ndiyu deman nduco p̄an co conun ico ihyan, te namin rendotenan ye Ndudo yahn Dendiohs.”

⁵ Tuhme quenda chundah me Dihvo vo ama tingüete yaco, ne venchahteno nahma se ihyan nducuahn vederihquentiyon che va iyeh̄nse.

⁶ Rah̄n se ri se ihyan:

—U té nducuahn vederihquentiyon che tihchan ndih, ndete che dinahn ne che cah̄má, te u va t̄ah̄ nducuahn, ne adecoduhno ihyan che náhn ne, co c̄ah̄ ihyan.

⁷ Ndete che cah̄ntihya ne n̄an, ndeva ne yaven̄an ne, co yahn ne nducuahn.

⁸ Rah̄n Dihvo vo ri ye sahn:

—Cuehn vane chundah, te n̄an Ndudo yahn Dendiohs a ndirun: “Cuendeva yaven̄an Dihve Dendiohs, ne a ihyan min no codinehn che cah̄ma ye.”

⁹ Tuhme quenda se ihyan tin yáco chahte yahn yan Jerusalén, ne rahn se ri se ihyan:

—Ndete che Daya Dendiohs ndih ne, çava ne muhn.

¹⁰ Hua dehva co yahn ne, te a ndirun nan Ndudo yahn Dendiohs: Dechuh Dendiohs ángel yahn ye çava che conduco ye ndih,

¹¹ din ye cudádo ndih çava che hua dehva co yahn ne.

¹² Rahn Dihvo vo ri ye sahn:

—Namin nan Ndudo yahn Dendiohs a ndirun: “Hua tumarende Dihve Dendiohs.”

¹³ Cuahn che chihno tumarande chundah me Dihvo vo ne, conahn se. Quenan rino se nde nda ama ro che ndahça çava se.

Dihvo vo Jesucristo ne, canan redin ye ntiyon yahn ye estado yahn Galilea

¹⁴ Dihvo vo ne, quenán cuma ye vederihquentiyon yahn Vaco Ndah yahn Dendiohs, ne conahn ye estado yahn Galilea. Nducuahn yan ne, ama chetuhn ndudo yahn vederihquentiyon che quenán cuma ye.

¹⁵ Ricuahn ye chete yáco, ne rendeva nducoyáca ihyan yavenan ye.

Ndetendah ihyan Dihvo vo Jesucristo yan Nazaret

¹⁶ Nda Dihvo vo yan Nazaret nan che chihta ye, ne rahn ye yáco ndate ndate, ro che rahte tuhno ihyan. Ama ro ne, chenda ye chete yáco, ne chandi ye çava che cuahndudo ye Ndudo yahn Dendiohs.

¹⁷ Sahn che redin cudádo yáco me ne, çah se çaca che dirun ihyan profeta Isaías ihyan. Cuahn che nta ye çaca me ne, cahndudo ye nan che ndirun tuhça:

¹⁸ Vaco Dihvé Dendiohs ne, quenun u.

Dechuh Dendiohs u, çava che cacuáhn ndudo ndah yahn ye, cahnevan nducoyáca ihyan che necun ye man, çava che cuahndudó che va ye vedeyeno che nchahco ye yahn ihyan che nto ino ye nunde yahn ye man.

¹⁹ Din che co ro nan ihyan che hua ro nan ye man, ndedeváhn ihyan che yah rahno ye, redin nunde yahn ye man, cuahndudó nduhça che yahino Dihvo vo Dendiohs ihyan iyehñse man.

²⁰ Chihno min ne, ndechetihve Dihvo vo çaca me, neçah ye sahn che redin cudádo yáco me, ne chihnde ye. Nducoyáca ihyan che chenun ye chete yáco me ne, vateyan ye numacuahn vedeneñun.

²¹ Tuhme rahn ye:

—Man ro cuh ne, a chinahn ndudo che chihno cahndudó, chihnevan nchuhn.

²² Chi yeno nducoyáca ihyan nduco Dihvo vo, ne rahn ino ye yahn ndudo ndah che rente ye. Ate canan tumerune ye van man ye nduco vih:

—¿A ndiyu sahn tih che daya José me?

²³ Rahn Dihvo vo ri ye ihyan chahn:

—Cuáco te nahn çahma nchuhn nducó ndudo cuh: “Doctor, tahque ndah che codique man di. Codin muhn yan vaque vederihno nduhça che din min yan Capernaum.”

²⁴ Quendi Dihvo vo, ne rahn ye:

—Cuáco rahn rí nchuhn te nde ama ihyan profeta, hua renevahñecun ihyan yan yáco ye ihyan.

²⁵ Ro menan me ne, ama chihnde cuico, te hua chan co ino nduyo quenán man. Ro min ne, ama vate ndahta vah nación yahn Israel, ne andahre min quenán ihyan profeta Elías,

²⁶ ate hua dechuh Dendiohs ihyan, çava che conan ye nde ama ndahta vah chahn. Tahque ndah ye ne, dechuh ye ihyan, çava che conan ye ama ndahta vah yahn tama naciòn che va te yan Sarepta, nino yan Sidón.

²⁷ Tama yune ne, a naciòn yahn Israel, vate ama yahn ihyan che ndi ye cah che recha yute. Min quenan profeta Eliseo, ne namin hua din ye che ndoyahn nde ama ihyan chahn. Ate din ye che ndoyahn ama sahn naciòn yahn Siria che duche se Naamán, andahre sahn tama naciòn se.

²⁸ Cuahn che chihnevan ihyan che chenun ye chete yaco me che tihça rahn Dihvo vo ne, ama chi tan ye.

²⁹ Ndetahno necuan ihyan chahn, ne quenda ye ihyan numacuahn vedetan cuahn chihto yan nan ama tin yava yaco çava che decava ye ihyan.

³⁰ Ate hua chi din ihyan chahn tihça, te chuh Dihvo vo van nducoyaca ye, ne cuahn ye.

Quenun vaco chihnga ama se

³¹ Nda Dihvo vo Jesucristo yan Capernaum, estado yahn Galilea, ne ndate ndate, ro che rahte tuhno ihyan, ricuahn ye chete yaco.

³² Ihyan che rihnevan ye che ricuahn Dihvo vo ne, ama rahn ino ye, te numacuahn vederihquentiyon yahn ye ricuahn ye.

³³ Ama yune ne, chenda Dihvo vo chete yaco me, ne min quenun ama sahn che quenun vaco chihnga sahn. Ama dito cah se:

³⁴ —Ndih, Jesús yahn yan Nazaret, ¿dehco che recahdenun ne yune yahn nuhn? ¿A cochi ne che decuihno ne nuhn ne? U devano duh ndih. Ndihe che Daya Dendiohs.

³⁵ Chihquentiyon Dihvo vo vaco chihnga me:

—¡Cuenedihn chende! ¡Cuendiquendah sahn tih!

Ndetahno din vaco chihnga me che chendave sahn min nan nducoyaca ihyan che chenun ye min. Ate hua dehva chi yahn se, ne ndiquendah sahn.

³⁶ Nducoyaca ye ne, ama dihya ye chi, ne rente ye van man ye nduco vih:

—¡Ama chahte vederihquentiyon quenan cuma ihyan tih! ¡Nde vaco chihnga redinahn ndudo yahn ye, ne rendiquendah!

³⁷ Numachahte estado yahn Galilea, chetuhn ndudo yahn vederihno che redin Dihvo vo.

Din Dihvo vo Jesucristo che ndoyahn indahn Simón Pedro

³⁸ Chihno min ne, ndiquendah Dihvo vo chete yaco me, ne cuahn ye ndevaco Simón. Indahn Simón ne, quendihte ye, ndi ye cah ihno. Chica ihyan ndevaco ye Dihvo vo che din ye che ndoyahn ye.

³⁹ Chahn nda ye nan ihyan min, ne chihquentiyon ye che cuavi cah me. Ndetahno ndoyahn ihyan min, ne necuan ye, cah ye, cheh Dihvo vo nduco combiero yahn ye.

Din Dihvo vo Jesucristo che ndoyahn ama yahn ihyan cah

⁴⁰ Ura che a chehche yahn ne, quenda ihyan nducoyaca ihyan cah yahn ye che ndeh nan cah ndi ye, cuahn ye nan Dihvo vo. Nahn tah ye queri ama ihyan cah chahn, ne ndoyahn ye.

⁴¹ Van ihyan cah chahn ne, nduco ama yahn ihyan che chenun vaco chihnga ihyan, ne ndetendah Dihvo vo vaco chihnga chahn. Cuahn che rendiquendah ne, rah:

—Ndih che Daya Dendiohs.

Ate chihco yudo Dihvo vo vaco chihnga chahn, ne hua cah yune ye che cahma duh ihyan ye, te a devano che a ihyan min che a va çade che ndedevahn ye ihyan iyehne.

Quechica Dihvo vo Jesucristo estado yahn Galilea rahndudo ye

⁴² Tama ro cuahn che a chi dave ne, cuahn Dihvo vo ama cuan nan che metah duhva, ne min cuahn ihyan yan, quenuhn ye ihyan. Ntaca ihyan chahn ihyan, ne rahn ye nduco ye che hua ndaca ye min, te nahn ihyan chahn che conan ca ye.

⁴³ Ate rahn Dihvo vo ri ye ihyan:

—Va che cahn yan chenahn, cacuahn ndudo ndah yahn vederihquentiyon yahn Dendiohs, te a cava chemin che cochí.

⁴⁴ Tuhme quechica ye nduh yan nduh yan, estado yahn Galilea, ricuahn ye chete yaco.

5

Din Dihvo vo Jesucristo vederihno, ne ama yahn yahca chetah Simón nduco combiero yahn ye

¹ Ama yune ne, nti Dihvo vo chihto vine yahn Galilea, ne ama chi dama ihyan nan ye, cava che cahnevan ye Ndudo yahn Dendiohs.

² Ndihchero Dihvo vo che vate o barco nan nune chihto vine me. Ihyan che retah yahca ne, a ndiquendah ye chete barco chahn, ne ura min ne, renano ye yana yahn ye.

³ Cuahn Dihvo vo, ne chenda ye chete barco che yahn Simón, ne chica ye favor ihyan che cacahca ye barco yahn ye nan che hua nino cuahn chihto vine me. Tuhme chihnde ye chete barco me, ne canan chicuahn ye ihyan che ndi dama ye min.

⁴ Cuahn che chihno chicuahn ye ne, rahn ye ri ye Simón:

—Cuicahque barco cuh cuahn nan che yano nune, ne cuih yana yehn cava che cotah yahca.

⁵ Ndahconan Simón yahn ye:

—Ihyan Ricuahn, a numa yan din nuhn ntiyon, ne nde ama yahca hua chetah nuhn. Ate nducote a ndih che rihquentiyon ne ne, cuh yana.

⁶ Tihca din ihyan chahn, ne ama chito yahca nde a canan rendan yana me.

⁷ Tuhme din tah ihyan chahn yahn combiero yahn ye che chenun ye barco che tama me, cava che chi ye conan ye ihyan. Nda ihyan chahn, ne van nducoyaca ye decuto ye yahca nduh che o barco chahn, nde tuno adeche cuehchenun van nune.

⁸ Cuahn che ndihchero Simón che tihca chi ne, chehtihya ye nan Dihvo vo, ne rahn ye:

—Dihvé, u ne, ndiyu ihyan che co cochí nan ne, te u ne, ihyan nunde u.

⁹ Tihca rahn ye, te cuahn ino ye nduco nducoyaca ihyan chahn yahn vederihno che din Dihvo vo che ama yahn yahca ndaca ye.

¹⁰ Namin cuahn ino nduh che o daya Zebedeo che duche ye Jacobo man, Juan man. Ihyan chahn che combiero yahn Simón. Ate rahn Dihvo vo ri ye Simón:

—Dehve rahque, te nduhca che redin ntiyon che retah yahca ne, man ne, tihca din ntiyon, din dame ihyan cava che conduco ye u.

¹¹ Tuhme ndetendah ihyan chahn barco chahn van nune, ne chihcoman ye ntiyon yahn ye man, dehtenduh yahn ye man, ne cuahn ye, chinduco ye Dihvo vo.

Din Dihvo vo Jesucristo che ndoyahn ama sahn che ndi se cah che rechayute

¹² Ama yune ne, quenan Dihvo vo ama cuan yan, ne nda ama sahn che ndi se cah che rechayute. Cuahn che ndihchero se Dihvo vo ne, cuahn se, chehtihya se nan ye. Chica se favor ihyan, ne rahn se:

—Dihvé, a devanó te co din ne che ndoyáhn, ndete che nahn ne.

¹³ Nahn tah Dihvo vo sahn, ne rahn ye:

—¿Taca hua? Náhn. Man ne, a ndoyehn.

Chihno rahn ye chemin ne, a ndetahno ndoyahn se.

¹⁴ Tuhme chihquentiyon ye sahn che hua cahma se nduco nde ama ihyan taca chi che ndoyahn se. Rahn ye ri ye sahn:

—Nducote a ndoyehn ne, cuehn nan chidocuyan, ne cah vedino che ndihquentiyon Moisés, cava che ndihchero nducoyaca ihyan che a ntoyehn.

¹⁵ Ama nun chetuhn ndudo yahn vederihno che tihca din Dihvo vo, ne ama yahn ihyan ri dama ye ro ro, cava che cahnevan ye che ricuahn Dihvo vo man, cava che din Dihvo vo che ndoyahn ihyan che cah ye man.

¹⁶ Ura va ne, rahn Dihvo vo deman ye nan che metah duhva, ne min revah ye.

Din Dihvo vo Jesucristo che ndoyahn ama sahn che ndi cheche se

¹⁷ Ama ro cuahn che ricuahn Dihvo vo ne, min vate sahn fariseo nduco sahn devano ley che dirun Moisés che chica se nducuahn yan yahn Judea man, yan Jerusalén man, cava che cahnevan se che ricuahn ye. Dihvo vo ne, redin ye che rendoyahn ihyan cah, te quenana cuma ye vederihquentiyon yahn Dihvo vo Dendiohs.

¹⁸ Ura min nda ama o ihyan, nda ye ama sahn che ndi cheche se, quendite se nan yundo. Nahn conda ihyan chahn nduco se chete vah, cava che condihte ye sahn nan Dihvo vo.

¹⁹ Ate hua chi chuh ihyan chahn nduco se chendevah, te ama yahn ihyan ndito ye min. Tuhme cocha ye tin vah me, ne ntihne ye ama ndi ima vah. Nde min ndedevah ye yundo nan che quendite se cuahn chete vah nan nducoyaca ihyan. Nduco tihca nda se nan Dihvo vo.

²⁰ Ndiheche Dihvo vo nduhca che ritahno ihyan chahn, ne rahn ye ri ye sahn che ndi cheche me:

—A nchahcó nunde yehn.

²¹ Sahn fariseo chahn man, sahn devano ley che dirun Moisés man ne, rendedecadino se: “¿Duh sahn tih che redin duche yahn se Dendiohs?, te nde ama ihyan hua co nchahcó ye nunde, atenan Dendiohs.”

²² Ate a devano Dihvo vo che tihca rendedecadino sahn chahn, ne rahn ye ri ye sahn:

—¿Dehco che tihca rendedecadino nchuhn?

²³ ¿Deh che tahque ndahca cahmá: “A nchahcó nunde yehn,” o cahmá: “cuenecuen, cuique”?

²⁴ Ate cava che cadino nchuhn te u che rinducó nducoyaca ihyan ne, va vederihquentiyon yahn cava che nchahcó nunde yahn ihyan muhn iyehense cuh ne, condihche ne.

Tuhme rahn ye ri ye sahn che ndi cheche me:

—Rihquentiyón di. Cuenecuen, cotah yundo yehn, conahn ndevaque.

²⁵ Ndetahno necuan se, chetah se yundo yahn se, ne numacuahn vedeyeno rendeva se yavenan Dendiohs. Chuh se mendahn yahn nducoyaca ihyan che chenun ye min, ne conahn se ndevaco se.

²⁶ Rahn ino nducoyaca ihyan chahn, ne rendeva ye numacuahn vedeyeno yavenan Dendiohs, ne rahn ye:

—Man che cuaco ne, ndihchero vo vederihno.

Dihvo vo Jesucristo ne, yahve ye Leví che conduco se ihyan

²⁷ Cuahn che chica Dihvo vo min ne, ndihchero ye ama sahn rica tume cade iyo che duche se Leví, va se nan che rica se tume. Rahn ye ri ye sahn:

—Cuhn vo ndoque, condoque u.

²⁸ Ndetahno chihcoman se ntiyon yahn se man, nducuahh che va yahn se man, ne necuan se, cuahn se, chinduco se Dihvo vo.

²⁹ Adiva ne, chihquentiyon Leví che chindah comida ndevaco se, ne cah se, cheh Dihvo vo nduco ama yahn ihyan, chenun van ama yahn sahn rica tume cade iyo.

³⁰ Ama o sahn fariseo nduco sahn devano ley che dirun Moisés ne, chi yudo yahn se, ne tumerune se ihyan apóstol yahn Dihvo vo:

—¿Dehco che tihca redin nchuhn che reh ne, rih ne dama nduco sahn nunde man, nduco sahn rica tume cade iyo man ne?

³¹ Ndahconan Dihvo vo yahn sahn chahn:

—Ihyan che hua cah ye ne, hua rendotenan ye sahn doctor, ate ihyan che cah ye ne, nahn ye sahn.

³² Atihnoqa u, te nda cava ihyan nunde cava che nto ino ye nunde yahn ye, ndiyo cava ihyan che rahco ye che metah nunde yahn ye.

Sahn devano ley che dirun Moisés ne, tumerune se Dihvo vo Jesucristo yahn yahte

³³ Tuhme tumerune sahn chahn Dihvo vo:

—¿Dehco che sahn che rahn nduco Juan Bautista nduco sahn che rahn nduco sahn fariseo ne, ama rahte se yahte man, revah se man, ne sahn che rahn ndoque ne, reh se man, rih se man, ro ro ne?

³⁴ Ndahconan Dihvo vo yahn se:

—A devano nchuhn te ihyan che nduco ye sahn rihnevaco ne, hua rahte ye yahte.

³⁵ Ate ndete che cuavi sahn min ne, tuhme che cuaco ne, cuahte ye yahte.

³⁶ Namin nte ye tama te o ejemplo, chihnevan sahn chahn:

—Nde ama ihyan ne, hua rendeh ye ama tino ra cava che necahn ye ama tino ndico. Ndete che tihca din ye ne, din ye che conda tino ra me. Avane ne, ama ndi tino ra nan tino ndico ne, chihnga ro, te hua dama.

³⁷ Namin nde ama ihyan hua rih ye vino ra chete ima ndico, te redin vino che rendan ima, ne rinda vino man, ima man.

³⁸ Chemin che nahn che cuih ihyan vino ra chete ima ra, cava che hua dehva co yahn vino man, ima man.

³⁹ Ihyan che rih ye vino ndico ne, hua nahn cuh ye che ra, te rahn ye te tahque ndah rihn vino ndico.

6

Ihyan apóstol ne, tico ye indo trigo

¹ Ama ro che rahte tuhno ihyan ne, chuh Dihvo vo nan va chendata. Ihyan apóstol yahn ye ne, tico ye indo trigo, ne rendihvenun tah ye, reh ye ndute yahn.

² Tuhme rahn ama o sahn fariseo ri se ihyan chahn:

—¿Dehco che tihca redin nchuhn?, te a va cade che hua co din vo ntiyon ro che rahte tuhno ihyan.

³ Ndahconan Dihvo vo, ne rahn ye ri ye sahn:

—¿A hua ndihchenan nchuhn che ndirun nan Ndudo yahn Dendiohs nduhca che din David ro che chi cuico ye nduco combiero yahn ye?

⁴ A devano ne nduhca che chenda ye chete yaco yahn Dendiohs, ne cheh ye pan che va min, ne cah ye, cheh ihyan che nduco ye. Ate nduco nduh hua quendihco ye nunde, andahre pan chemin chan, a ndi vedino yahn Dendiohs, ne atenan chidocuyan co cheh ye.

⁵ Quendi Dihvo vo rahn ye nduco sahn chahn:

—U che rinducó nducoyaca ihyan ne, rihquentiyón nde nducuahn che redin ihyan ro che rahte tuhno ye.

Dihvo vo Jesucristo ne, din ye che ndoyahn ama sahn che ndi cuma tah se

⁶ Taha ro che rahte tuhno ihyan ne, chenda Dihvo vo chete ama yaco, chicuahn ye. Min quenun ama sahn che ndi cuma tah cuaco se.

⁷ Sahn devano ley che dirun Moisés man, sahn fariseo man ne, rihno se Dihvo vo ndete che din ye che ndoyahn sahn min ro che rahte tuhno ihyan, cava che cuih nunde se yahn ye.

⁸ A devano Dihvo vo che rendedecadino sahn chahn, ne rahn ye ri ye sahn che ndi cuma tah me:

—Cuenecuen, cuandi mendahn.

Necuan sahn min, chandi se.

⁹ Tuhme rahn ye ri ye sahn chahn:

—Man ne, tumerune nchuhn: ¿Deh din vo ro che rahte tuhno ihyan ne? ¿A din vo che ndah, o din vo che hua ndah ne? ¿A cah yune vo che coh ihyan, o ndedevahn vo ihyan ne?

¹⁰ Chaconan ye, ndihchero ye nducoyaca sahn chahn, ne rahn ye ri ye sahn che ndi cuma tah me:

—Cuacondihque tah.

Chacondihco tah se, ne ndetahno ndoyahn tah se.

¹¹ Ama chi tan sahn chahn, ne rente se van man se nduco vih deh din se nduco Dihvo vo.

Tendahnun Dihvo vo Jesucristo ndichio apóstol

¹² Tahn min ne, cuahn Dihvo vo ama cuete, ne min covah ye numa yan.

¹³ Cuahn che chi dave ne, nedin dama ye ihyan che rinduco ye ihyan, ne tendahnun ye ndichio ihyan chahn cava che co ye apóstol.

¹⁴ Ama ihyan chahn ne, Simón, ne chaconahn Dihvo vo che duche ye Pedro. Ihyan chenahn ne, Andrés, dihno Simón man, Jacobo man, Juan man, Felipe man, Bartolomé man,

¹⁵ Mateo man, Tomás man, Jacobo, daya Alfeo man, Simón Zelote man,

¹⁶ Judas, dihno Jacobo man. Namin nduco ama se Judas Iscariote, sahn min che ndihcue ndeh se Dihvo vo.

Chicuahn Dihvo vo Jesucristo ama yahn ihyan

¹⁷ Cuenchahn Dihvo vo cuete me, ne ndo ye ama ya ico nduco ihyan chahn. Namin ama yahn ihyan che vate ye estado yahn Judea man, yan Jerusalén man, chihto yan Tiro nduco Sidón man, ndo dama ye min nduco ye. Nda nducoyaca ihyan chahn, te nahn cahnevan ye che ricuahn Dihvo vo man, nahn ye che din Dihvo vo che ndoyahn ye man.

¹⁸ Namin ndetendah Dihvo vo vaco chihnga che chenun ihyan.

¹⁹ Ihyan che cah ye ne, nahn nahn tah ye Dihvo vo yahn che quenan cuma ye vederihquentiyon chahte, ne nducoyaca ihyan che tihca redin ye ne, ndetahno rendoyahn ye.

Ihyan che ndah ro yahn ye

²⁰ Tuhme ndihchero Dihvo vo Jesucristo ihyan che rinduco ye ihyan, ne rahn ye ri ye ihyan:

—Nchuhn che chevah ne man, che necun ne man ne, ndah ro yahn ne, te ndi cuande ne van ihyan yahn Dendiohs.

²¹ Ndah ro yahn nchuhn che nahn cahnevan ne Ndudo yahn Dendiohs, te din ye conahn ne.

'Ndah ro yahn nchuhn che ndache ri ne, te din Dendiohs che co yeno ne.

²² 'Ndah ro yahn nchuhn cuahn che cava u che rinducó nducoyaca ihyan, co tan ihyan nduco ne man, hua co ndihche ye nchuhn man, cahva ye nduco ne man, ndere cahma ye te duhtuno ihyan ne man.

²³ Ro che tihca din ihyan nduco ne ne, ndahca che cah yeno ne chedave yahn ne, te cuahn che nda ne vahchetero ne, a va yan che ndah cava ne. Ndahca che necahco ne te ihyan ndico yahn ihyan tan chahn ne, a tihca din ye nduco ihyan profeta.

²⁴ 'Ate yah ri cava ihyan cuihca, te atenan man ro cuh che vate ye vedeyeno.

²⁵ 'Yah ri cava ihyan che hua rendotenan ye Ndudo yahn Dendiohs che rahco ye, te nda ro che ndotenan ye.

'Yah ri cava ihyan che yeno ye, te nda ro che co ran ye.

²⁶ 'Yah ri cava ihyan che rahñ nducoyaca ihyan che ndah ihyan ye, te ihyan ndico yahn ihyan chahn tihca rahñ ye yahn ihyan che din ca ye che profeta ye.

Nahn che din yahino vo ihyan che hua ri rendihche ye uvo

²⁷ 'Rahñ ri nchuhn: codin yahino ne ihyan che hua ri rendihche ye nchuhn. Codin ne che ndah nduco ihyan che tan ye nduco ne.

²⁸ 'Ndah cahma ne yahn ihyan che rahva ye nduco ne, covah ne cava ye.

²⁹ 'Ndete che va ihyan che din tan ye nduco ne ne, hua dama co ne nduco ye. Ndete che nahn cahnevi ihyan tino rendiche nchuhn ne, tahque ndah cuahnecon ne che cahnevi ye nde cahtea ne che co che cuhma ne nduco ye.

³⁰ 'Adecoduhno ihyan che caca ye dehtenduh yahn ne, cocah ne, ne ihyan che cahnevi ye deh che va yahn ne ne, hua ndaca ne.

³¹ 'Nduhca che nahn nchuhn che ndah din nducoyaca ihyan nduco ne ne, tihca codin ne che ndah nduco ye.

³² 'Ndete che din yahino nchuhn deman ihyan che yahino ye nchuhn ne, ¿dehra cochihve yahn ne? Nde ihyan che duhtuno ihyan ye ne, tihca redin ye.

³³ 'Ndete che deman ihyan che ndah ihyan ye nduco nchuhn, ndah din ne nduco ye ne, ¿dehra cochihve yahn ne? Nde ihyan che duhtuno ihyan ye ne, tihca redin ye.

³⁴ 'Ndete che deman ihyan che co nedihve ye yahn nchuhn, cah ne, tumanan ye ne, ¿dehra cochihve yahn ne? Nde ihyan che duhtuno ihyan ye ne, tihca recah ye, retumanan combiero yahn ye che co nedihve ye yahn vih.

³⁵ 'Ate nchuhn ne, codin yahino ne nde ihyan che hua ri rendihche ye nchuhn. Codin ne che ndah. Cocah nchuhn, tumanan ihyan, nde hua cuahtenan rino ne che nevihve yahn ne. Ndete che tihca din nchuhn ne, Dendiohs, ihyan min che ama yudo vederihquentiyon yahn ye ne, ndahco menun ndahva ye yahn ne, nedin daya ye nchuhn, te ihyan min ne, ndah ye nde nduco ihyan che duhtuno ihyan ye man, ihyan che nde hua renecah ye nundihve cuahn ihyan man.

³⁶ 'Nduhca che renan vahino Chida nchuhn nducoyaca ihyan ne, tihca codin ne.

Nduhca che va che cuahtenan vo nduco ihyan

³⁷ 'Hua ndahchenan nchuhn ihyan, ne hua conan cuma che techecade Dendiohs yahn ne yahn nunde min, din ye castigo nchuhn. Cuenchahco ne yahn ihyan, ne nchahco Dendiohs yahn ne.

³⁸ Codin nchuhn che ndah nduco ihyan, ne din Dendiohs che ndah nduco ne, nde tihdenan ca ye ndahco menun ye yahn ne. Tihca, te nduhca che redin ne nduco ihyan ne, atihnoça ndahco menun Dendiohs yahn ne.

³⁹ Tuhme nte Dihvo vo ejemplo cuh, chihnevan ihyan chahn:

—A devano nchuhn te ama sahn nan ve hua co quendanan se tama sahn nan ve, te coranun nduh che o se ive yahn.

⁴⁰ Tahque devano ihyan ricuahn che co ama sahn che rahn. Ate cuihno cuahn sahn min ne, anduhneva che devano ihyan ricuahn yahn se ne, tihca codevano se. Hua chuhnan vededevano yahn se.

⁴¹ 'Ndete che rihco nchuhn cudado nunde yahn tama ca ihyan, ne hua retumacah ne nunde yahn man ne ne, anduhneca ndete che ndihchero ne ama iyaca che quenun ndutenan ye, ate nde hua retumacadino ne che quenun ama vihto ndutenan man ne.

⁴² Ndete che tihca ne, o nan o chende ne. Nde hua quenah yahn ne che cahma ne co ne ihyan: “Conán di cava che hua condihque nunde”, te nde hua retumacadino ne che tahque chihnga redin man ne. Tahque ndah che dinoca cahcoman ne che chihnga redin ne, tuhme co conan ne ihyan cava che runecaçe cochica ye.

Ejemplo yahn yahn ndata

⁴³ Yahn ndata che ndah ne, ndah ndute yahn, ne yahn ndata che hua ndah ne, hua ndah ndute yahn.

⁴⁴ Ama yahn ndata ne, ro deh yahn cuahn che ri ndute yahn. Ndute higo ne, hua retun ihyan tin yahn yan, nde hua retun ye uva nan dihyo yan.

⁴⁵ Ihyan che ndah ye ne, redin ye dehtenduh che ndah, te ndah chedave yahn ye, ne ihyan che hua ndah ye ne, redin ye dehtenduh che hua ndah, te hua ndah chedave yahn ye. Nan ndudo yahn ihyan ne, rihcoro nduhca ihyan ye.

⁴⁶ ¿Dehco che rahn nchuhn ri ne u: “Dihve nuhn, Dihve nuhn ne”? te hua redinahn ne che rihquentiýon.

⁴⁷ Adecoduhno ihyan che renda ye nan man, che rihnevan ye che rahn man, che redinahn ye che rihquentiýon man ne, cahma có nchuhn duh nduhca ye.

⁴⁸ Ihyan min ne, nduhca ihyan che chihno ye vaco ye, ne vano chino ye nde nan yava, ne min chihco ye name yahn. Cuahn che chihca ico ne, ama dito chahn nune nan vah me. Ate hua chi quenda nune vah me, te nan yava va name yahn.

⁴⁹ Me ihyan che rihnevan ye ndudo yahn, ne hua redinahn ye ne, ihyan min ne, nduhca tama ihyan che chihno ye vaco ye, nde hua chihco ye name yahn. Cuahn che chihca ico ne, ama dito chahn nune nan vah me. Ndora vah me, ne chihno chinda.

7

Nduhca che chitahno ama capitán

¹ Cuahn che chihno chicuahn Dihvo vo ihyan chahn ne, cuahn ye yan Capernaum.

² Ama capitán che va ye yan min ne, va sahn decahya yahn ye che ama yahno ye sahn, ne chetah cah sahn. Ama tahn ndi se, adeche coh se.

³ Cuahn che checadino capitán me yahn Dihvo vo che redin ye vederihno ne, dechuh ye ama o ihyan ndinan yahn ihyan nación yahn Israel, cava che caça ye favor ihyan che cahñ ye, ne din ye che ndoyahn sahn decahya me.

4 Chahn ihyan chahn nan Dihvo vo, ne ama chica ye favor ihyan, ne rahn ye:

—Capitán cah ne, ndahca che conan ne ihyan,

5 te yahino ye nación yuhn vo, ne chihno ye ama yaco yahn nuhn.

6 Tuhme cuahn Dihvo vo nduco ihyan chahn. Cuahn che a nda nino ye ne, dechuh capitán me ndudo nduco ama o amigo yahn ye, rahn ye tuhca:

—Dihvé, hua denduh ne ndih cava no u, che chi ne nde chete vacó.

7 A devanó te u ne, ndiyu ihyan che co chí nan ne. Nde nan che cochi ne, cuihquentiyon ne, ne ndoyahn sahn decahya yáhn.

8 Che cahcantiyon ne ne, a devanó te va che conahn, te namin u ne, va ihyan che te ye vederihquentiyon quenán cumá, ne vate sandado yáhn. Rihquentiyón ama se che cahñ se, ne rahn se, ne rihquentiyón tama se che chi se, ne rechí se, ne nducuahñ che rihquentiyón sahn decahya yáhn ne, redinahñ se.

9 Yahn che tihca rahn capitán me ne, cuahn ino Dihvo vo, ne chaconan ye, ndihchero ye ihyan che nduco ye, ne rahn ye:

—Cuaco ráhn rí nchuhn te nde numachahte nación yuhn vo ne, hua rendacá ihyan che tihca ama ritahno ye.

10 Cuahn che ndaconan ihyan che chahn ye ntiyon yahn capitán me ne, ntaca ye sahn che adeche coh me che a ntoyahn se.

Ndedetuhche Dihvo vo Jesucristo ama tenahn, daya ama ndahta vah

11 Chihno min ne, Dihvo vo nduco ihyan apóstol yahn ye man, ama yahn ca ihyan man, cuahn ye ama yan che duche Nain.

12 Cuahn che nda ye viyan me ne, tahn nun ye ihyan che cuahn ye cuhche ye ama tenahn daya ama ndahta vah. Ama ndiyahn ra sahn dihn min yahn ndahta vah me, ne ama yahn ihyan nduco ye.

13 Cuahn che ndihche Dihvo vo ndahta vah me ne, quenán vahino ye tahn, ne rahn ye ri ye tahn:

—Hua cueque.

14 Tuhme chahn nda ye, ne cah tah ye yave yahn tenahn me, ne sahn che nda se yave me ne, chahtendi rino se. Rahn ye ri ye tenahn me:

—¡Cuenuen!

15 Ndetahno necuan sahn dihn che a ndih me, ne canañ rente se. Tuhme necah Dihvo vo sahn chaco se.

16 Ama cuahn ino nducoyaca ihyan, ne rendeva ye numacuahn vedeyeno yavenañ Dendiohs, ne rahn ye:

—Nda ama profeta van uvo, ihyan yahn Dendiohs. ¡Ama chahte vederihquentiyon quenán cuma ye! Dechuh Dendiohs ihyan.

17 Ama chetuhn ndudo yahn vederihno che din Dihvo vo numachahte estado yahn Judea man, nduh cuañ nan che nino min man.

Dechuh Juan Bautista ihyan che rinduco ye ihyan nan Dihvo vo Jesucristo

18 Ihyan che rinduco ye Juan Bautista ne, rahn ye ri ye ihyan yahn nducuahñ vederihno che redin Dihvo vo. Tuhme cah Juan o ihyan chahn,

19 ne dechuh ye ihyan cava che tumerune ye Dihvo vo, a ihyan min niyon ihyan che a va cade che dechuh Dendiohs ihyan, ndedevahn ye ihyan iyehñse, o cuahtenan rino ye tama ihyan.

20 Nda ihyan chahn nan Dihvo vo, ne rahn ye ri ye ihyan:

—Juan Bautista ne, dechuh ye nuhn, tumerune nuhn ndih: ¿A ndih ihyan che a va cade che dechuh Dendiohs, ndedevahn ye ihyan iyehñse, o cuahtenan rino nuhn tama ihyan ne?

²¹ Ura min din Dihvo vo che ndoyahn ama yahn ihyan cah man, din ye che chi ro nan ihyan che ve nan ye man, ndetendah ye vaco chihnga che chenun ihyan man.

²² Tuhme ndahconan ye yahn ihyan chahn che dechuh Juan:

—Conahn nchuhn, cuenecah cuande ne Juan yahn nducuahh che ndihchero ne man, che chihnevan ne man. Ihyan che ve nan ye ne, redin che ri ro nan ye. Ihyan che ndi cheche cah ye ne, redin che rica ye. Ihyan che ndi ye cah che rechā yute ne, redin che rendoyahn ye. Ihyan che a ndih ye ne, rendedetuhché ihyan. Ihyan che necun ye ne, ricuáhn ndudo ndah yahn Dendiohs ihyan.

²³ Ndah ro yahn ihyan che ritahno ye che dechuh Dendiohs u.

²⁴ Cuahn che conahn ihyan chahn ne, rente Dihvo vo nduco ihyan che chenun ye min yahn Juan, ne rahn ye:

—¿Deh che chahn nchuhn, ndihchero ne min yahn nan che metah duhva? ¿A ama nduco che ra yuhne?

²⁵ ¿Duh che chahn nchuhn, ndihchero ne tuhme? ¿A ama sahn che ninevaca se nduco tino ndah? A devano nchuhn te sahn che renevaca se nduco tino ndah man, rahte se vihco man ne, sahn chahn ne, chete vaco rey chenun se.

²⁶ Tuhme ne, ¿duhra che chahn nchuhn, ndihchero ne? ¿A ndiyu ama profeta? Cuāco niyon, te ihyan min ne, tahque chahte vederihquentiyon che quenan cuma ye che co ihyan profeta chenahn.

²⁷ A yahn ihyan min che a ndirun nan Ndudo yahn Dendiohs tuhca: Condihche, dechúh ama sahn tahque menan ca che co di, cuahndudo se ndudo yáhn.

Caḥcoyan se chedave yahn ihyan, cava che nevahnecon ye di.

²⁸ Rahn ri nchuhn te van nducoyaca ihyan iyehhse ne, Juan Bautista che tahque chahte vederihquentiyon che quenan cuma ye. Ate ihyan che tahque necun ye van ihyan che rihquentiyon Dendiohs ne, tahque ndah ro yahn ye che co ihyan min.

²⁹ Cuahn che tihca rahn Dihvo vo ne, ama yahn ihyan yan, nde sahn rica tumecaḍiyo, ndeva ye yavenan Dendiohs, te chahn ye, chehdenune Juan ihyan.

³⁰ Ate sahn fariseo nduco sahn devano ley che dirun Moisés ne, chahtohān se che rihquentiyon Dendiohs, te hua chahn se che chehdenune Juan sahn.

³¹ Tuhme rahn Dihvo vo:

—¿Deh cahmá yahn nchuhn che vate ne man ro cuh ne?

³² Nchuhn che vate ne man ro cuh ne, nduhchan sahn cahya che rahn se ri se combiero yahn se: “Tive nuhn cu retive, ne hua ndeh nchuhn. Cah ran nuhn nduhca che rah ran ihyan nan ndih tenahn, ne hua chaco nchuhn.”

³³ Tihchan nchuhn, te nda Juan Bautista, ne hua cheh ye pan, nde hua chih ye vino, ne rahn ne te quenun vaco chihnga ihyan.

³⁴ Nda u che rinducó nducoyaca ihyan, ne réh man, rih man, ne rahn nchuhn: “Nga ama se, ne ama reh se man, ama rih se vino man, rinduco se ihyan nunde man, sahn rica tumecaḍiyo man.”

³⁵ Ate dehve din yahn che tihca rahn nchuhn, te nducoyaca ihyan devano, renahn ye te vededevano yahn Dendiohs ne, chemin che richihve.

Nchahco Dihvo vo Jesucristo yahn ama tahn nunde

³⁶ Ama sahn fariseo ne, yahve se Dihvo vo che cheh ye nduco se, ne cuahn ye ndevaco se.

³⁷ Ama tahn nunde che va te yan min ne, checadino te che min chete vaco sahn fariseo me va Dihvo vo, reh ye. Tuhme nda te, nda te ama frasco nunedan.

³⁸ Chahn nda te, ne chehtihya te nan Dihvo vo. Ama raco te, ne canan te redcahnda te cah ye nduco nune ndutenan te. Rendedetih te nduco yudo tin te. Retenan te cah ye, ne chacotahma te nunedan me.

³⁹ Ndiiche sahn fariseo me, ne ndedecadino se: "Tahn tih ne, chihnga ihyan te. Ndete che cuaco che profeta ihyan tih ne, cadino ye duh ihyan te."

⁴⁰ Tuhme rahn Dihvo vo ri ye sahn fariseo me:

—Simón, nté ama ejemplo, cahneven.

Ndahconan Simón:

—Ihyan Ricuahn, cuente ne, cahneván.

⁴¹ Rahn ye:

—O se ne, quendihco se yahn ama ihyan. Ama se ne, quendihco se uhn ciento, ne tama se ne, quendihco se o raco ndiche.

⁴² Nducote metah dehva yahn sahn chahn ne, hua chi nedihve se yahn ye. Ate nchahco ye yahn nduh che o se. Man ne, cahme co u: ¿Cha sahn chahn che tahque yahino se ihyan min ne?

⁴³ Ndahconan Simón:

—Rahco te sahn che tahque ndeh quendihco se yahn ye.

Rahn Dihvo vo ri ye Simón:

—Ndahca rahn.

⁴⁴ Chaconan ye, ndihchero ye ndahta me, ne tuhme rahn ye ri ye Simón:

—¿A chihque cudado nduhca che din ndahta tih ne? Chenda chete vague, ne hua te nune cava che ntu cah, ate ndahta tih ne, decahnda te cah nduco nune ndutenan te, ne ndedetih te nduco yudo tin te.

⁴⁵ Di ne, hua tenan u che nevahnecon u, ate ndahta tih ne, nde ura che nda ndevaque, nde meniyan ne, hua reguan te retenan te cah.

⁴⁶ Hua chih aceite tin, ate ndahta tih ne, chacotahma te nunedan cah.

⁴⁷ Chemin che rahn ri di te nducote ama va vedeyahino yahn te ne, codevene te va vederenchahco cava te, andahre ama quendihco te nunde. Ate ihyan che ndaca ye vederenchahco yahn tah sihn che quendihco ye ne, hua chahte vedeyahino yahn ye.

⁴⁸ Tuhme rahn Dihvo vo ri ye ndahta me:

—A nchahco nunde yehn.

⁴⁹ Nducoyaca ihyan che vate ye min, reh ye nduco Dihvo vo ne, ndedecadino ye: "¿Duhra sahn tih che rahco se che renchahco se nunde yahn ihyan?"

⁵⁰ Ate rahn Dihvo vo ri ye ndahta me:

—Yahn che chitehne ne, ndaque vederenchahco. Conahn. Dehve rahque.

8

Yahn ihyan ndahta che chinduco ye Dihvo vo Jesucristo

¹ Chihno min ne, quechica Dihvo vo nduh yan nduh yan, ricuahn ye ndudo ndah yahn vederihquentiyon yahn Dendiohs. Nduco ye nduh che ndichio apóstol yahn ye.

² Namin nduco ye yahn ihyan ndahta che ndetendah ye vaco chihnga che chenun ihyan man, ihyan ndahta che din ye che ndoyahn ye man. Van ndahta chahn nduco María yahn yan Magdala, ihyan min che chenun ndache vaco chihnga ro menan, ndetendah ye.

3 Namin nduco Juana, ndahta yahn Chuza, ama sahn ndinan yahn rey Herodes. Nduco Susana man, nduco yahn ca ndahta che chinan ye Dihvo vo nduco tume yahn ye man.

Ejemplo yahn ihyan che retuhdo ye ndute ndata

4 Ama yahn ihyan yahn queri ama yan, ndo dama ye nan Dihvo vo, ne nte ye ejemplo cuh, chihnevan ihyan chahn:

5—Cuahn ama ihyan, retuhdo ye ndute ndata yahn ye. Cuahn che retuhdo ye ne, chera neve ndute chihto yune. Chemin ne, chendinun ihyan, ne nda yahda, ne cheh te.

6 Te neve ndute ne, chera nan tu. Cuahn che quendaḥ ne, tih yahn che ndo cuma yahn nan tu me.

7 Te neve ndute ne, chera van chano yan. Chihta dama nduco chano yan chahn, ne quenun man chendata me.

8 Te neve ndute ne, chera nan yahn ndah, ne quendaḥ, ne chi yahn, cade ciento queri ama.

Chihno nte ye ejemplo me ne, tuhme ama dito rahn ye:

—Nducoyaca nchuhn, jcuendecadino ndah ne yahn ejemplo me!

Rahn Dihvo vo Jesucristo deh cuande che rente ye ejemplo

9 Tuhme tumerune ihyan apóstol chahn ihyan:

—¿Deh conahn ejemplo che nte ne me ne?

10 Rahn ye ri ye ihyan chahn:

—Nchuhn ne, te Dendiohs che conahn ne yahn vederihquentiyon yahn ye. Ate ihyan chenahn sih ne, renté nduco ye deman nduco ejemplo, cava che ndihchero no ye, ne hua nchanan ye, cahnevan no ye, ne hua conahn ye.

Te cuande Dihvo vo Jesucristo deh conahn ejemplo yahn ihyan che retuhdo ye ndute ndata me

11 Tuhca conahn ejemplo me: Ndute ndata me ne, nduhca Ndudo yahn Dendiohs.

12 Ndute che chera chihto yune me ne, nduhca ndudo che rihnevan ama o ihyan, ne ndetahno renda chundah, ne rehnevi se Ndudo me chete chedave yahn ye, cava che hua cotahno ye, ne hua ndevahn ye.

13 Ndute che chera nan tu me ne, nduhca Ndudo che rihnevan tama te o ihyan, ne renevahnevan ye numacuahn vedeyeno. Ate nduhca chendata che metah cua yano dihyoduto tihchan ye, te cuahn che rechuhrihn ye, o redin tan ihyan nduco ye cava Ndudo me ne, ndetahno rihcoman ye.

14 Ndute che chera van chano yan me ne, nduhca Ndudo che rihnevan tama te o ihyan, ate ama rendecadino ye yahn ntiyon yahn ye ro ro man, nahn yahn ye vedecuihca che va iyehense cuh man, nahn quendi ye vedeyeno yahn man ye man. Chemin che hua ri redin Ndudo me che ndah nduco ye.

15 Ate ndute che chera nan yahn ndah me ne, nduhca Ndudo che rihnevan tama te o ihyan, ne renevahnevan ye numacuahn chedave yahn ye, ne riquendi ye. Ihyan chahn che redin Ndudo yahn Dendiohs che ndah nduco ye.

Ejemplo yahn candil

16 Quendi Dihvo vo ricuahn ye:

—Nde ama ihyan ne, hua renahn yahn ye ama candil cava che cahco ndeh ye man cajún, o man yundo. Rihco ye nan che yaco, cava che co ro dave yahn ihyan che renda ye.

¹⁷ Tihcá nducuahñ che ráhn rí nchuhn cuahn che a demañ vo ne, va che cuahndudo nchuhn, cahnevan ihyan. Nducuahñ che ráhn, andahre ama rihñ çava che conahn ihyan, ate conahn ye.

¹⁸ Chemin che cuihnevan ndah nchuhn ndudo che ráhn, te ihyan che ndah renahn ye ne, nde tahque ndah ca conahn ye, ne ihyan che hua ndah renahn ye ne, va che conañ ye nde tah sihn che chenahn ye.

Ndą chaco Dihvo vo Jesucristo nduco dihno ye

¹⁹ Ndą chaco Dihvo vo nduco dihno ye, ne hua chi chenda ihyan chahn ñañ che quenun ye, te ama yahñ ihyan chenun ye min.

²⁰ Tuhme ráhn ihyan ri ye Dihvo vo:

—Chaco ne nduco dihno ne, vatendi ye cuahñ chevah, nahn ndihchero ye ndih.

²¹ Ráhn ye ri ye ihyan chahn:

—Ihyan che rihnevan ye Ndudo yahñ Dendiohs, ne redinahn ye ne, a ihyan chahn che rendihché ihyan nduhcá chaco man, nduhcá dihnó man.

Chihco dihn Dihvo vo Jesucristo yuhne tan

²² Ama yune ne, chenda Dihvo vo chete ama barco nduco ihyan apóstol yahñ ye, ne ráhn ye:

—Cuhn vo nduco nchuhn tama lado viche çah.

Tuhme cuahn ye nduco vih.

²³ Ura che cuahn ye nduco vih ne, quiyado Dihvo vo, ne canañ rano yuhne tan, nde a rito nune chete barco me, adeche cuehchenun chete vine me.

²⁴ Chahn ihyan chahn, ndedetuhche ye Dihvo vo, ne ráhn ye:

—¡Ihyan Ricuahñ! ¡Ihyan Ricuahñ! ¡Cuentuche ne, te adeche cuehchenun vo van nune!

Necuan Dihvo vo, ne chihco dihn ye yuhne tan me, ne quendite dihn vine me.

²⁵ Tuhme tumerune ye ihyan chahn:

—¿A hua ritahno nchuhn?

Ate ihyan chahn ne, ama rahñ ino ye, ama redihya ye ri, ne retumarune vih ye:

—¿Duhra ihyan cuh?, te nde yuhne, nde vine, redinahn che rihquentiyon ye.

Ama sahn yan Gadara che chenun vaco chihnga sahn

²⁶ Chihno min ne, ndą ihyan chahn yan Gadara, ama yan che va tama lado viche yahñ vine yahñ Galilea.

²⁷ Ndetahn che ndiquendah Dihvo vo chete barco me ne, ndą ama sahn yan min ñañ ye. Sahn min ne, a ráhn cuahn che chenun vaco chihnga sahn. Devane se, quechica se, nde hua quenun se vaco se, te ñañ rehche tenahn ne, min quenañ se.

²⁸ Cuahn che ndihchero se Dihvo vo ne, chahn ndą se, chehntihya se ñañ ye, ne cah se:

—Jesús, Daya Dendiohs che ama yudo vederihquentiyon yahñ ye, ¿dehco che recañdenun ne yune yahñ? Ricá favor ndih che hua din ne che chuhrín.

²⁹ Tihcá ráhn se, te Dihvo vo ne, a chihquentiyon ye vaco chihnga chahn che ndiquendah sahn. Ama ndeh yune cuahn che retumangan vaco chihnga chahn sahn ne, redechiche ihyan sahn nduco cadena, ate rihno rendeh se cadena me, ne riquenda vaco chihnga chahn sahn van chano.

³⁰ Dihvo vo ne, tumerune ye sahn:

—¿Deh doche ne?

Ndahconan se:

—Legión duché.

Tihcā duche se yahn che ama yahn vaco chihngā chenun sahn.

³¹ Ama chica vaco chihngā chahn favor ihyan che hua dechuh ye van ruchiayah.

³² Min nino van chano ne, chenān ama yahn cuche, reh te. Ama chica vaco chihngā chahn che cah yune ye che condā chete cuche chahn, ne cah yune ye.

³³ Tuhme ndiquendāh vaco chihngā chahn sahn min, ne chendā cuche chahn. Cuche chahn ne, cochahn te, rano te nan ndava, ne cheranun te chete vine me, cuahn ico te.

³⁴ Cuahn che ndihchero sahn che redin cudado cuche chahn che tihcā chi ne, chano se. Cuahn se, chengo se ihyan viyan man, ihyan rancho man.

³⁵ Tuhme cuahn ihyan viyan ndihchero ye deh che chi. Cuahn che ndā ihyan chahn nan che quenun Dihvo vo ne, ndihchero ye sahn min che a ntiquendāh vaco chahn sahn. Va se chihto nan Dihvo vo, quenun se tino yahn se. A va cuaco dave yahn se, ne dihya ihyan chahn chi.

³⁶ Tuhme ihyan che ndihchero ye ne, rente ye nduco ihyan che ndā chahn taça chi che ndiquendāh vaco chihngā chahn sahn min.

³⁷ Nducoyaca ihyan che vate ye yahn yahn van Gadara, ama dihya ye chi. Chemin che rahn ye ri ye Dihvo vo che ndāça ye van min. Tuhme chendā Dihvo vo chete barco, conahn ye.

³⁸ Sahn che a ntiquendāh vaco chahn sahn ne, ama rica se Dihvo vo che cah yune ye che conduco se ihyan. Ate hua cah yune ye, ne rahn ye ri ye sahn:

³⁹ —Conahn cuahn ndevaque, ne cuente yahn vederihno chahte che din Dendiohs ndoque.

Tuhme conahn se, ne chacotuhn se ndudo numacuahn viyan me yahn vederihno chahte che din Dihvo vo nduco se.

Rica Jairo cava tañh dihn daya se

⁴⁰ Cuahn che ndaconan Dihvo vo viche lado cuh yahn vine me ne, ama yahn ihyan nevahnecon ye ihyan numacuahn vedeyeno, te nducoyaca ye ne, chenān rino ye ihyan.

⁴¹ Ura min ndā ama sahn ndinan yahn yaco, duche se Jairo, ne chehntihya se nan Dihvo vo, chica se favor ihyan, cava che cah ye vaco se,

⁴² te va ama ndiyahn ra tañh dihn yahn se, a ri te tenduh ndichio nduyo. Chetah cah tañh, adeche coh te. Tuhme cuahn Dihvo vo, ne nde hua ri che caça ye, te ama yahn ihyan nduco ye.

Ndoyahn ama ndahta che nahn tañh te tino yahn Dihvo vo Jesucristo

⁴³ Min van ihyan chahn, nduco ama ndahta che cah te, rendora te yun ro ro. A ri ndichio nduyo che quenān cah me tañh, ne a chihno nducuahn yahn te che va che renehive te sahn doctor. Ate nde ama se hua chi dico se tañh.

⁴⁴ Chahn ndā te cuahn vedame Dihvo vo, nahn tañh te tino yahn ye, ne ndetañhno cheguan rahn yun me tañh.

⁴⁵ Tuhme tumerune Dihvo vo:

—¿Duh nahn tañh tino yahn ne?

Nducoyaca ye rahn ye te ndiyu ihyan chahn. Pedro nduco combiero yahn ye ne, rahn ye:

—Ihyan Ricuahn, ama yahn ihyan chenun chiche ye chihto nan ne, ¿dehco che retumerune ne duh nahn tañh tino yahn ne?

⁴⁶ Ate rahn Dihvo vo:

—Va duh che nahn tañh tino yahn, te checadinó che ndoyahn ama ihyan nduco vederihquentiyon yahn.

⁴⁷ Ndiiche ndahta me che a checadino Dihvo vo, ne chahn nda te, chehn-tihya te nan ye, nde tuno rendoh te. Tuhme neçah cuande te ihyan nan nducoyaca ihyan yan deh cuande che nahn tah te tino yahn ye man, nduhca che ndetahno ndoyahn te man.

⁴⁸ Rahn Dihvo vo ri ye tahn:

—Dayá, yahn che chitehne ne, a ndoyehn. Dehve rahque. Co conahn.

Dihvo vo Jesucristo ne, ndedetuhche ye tahn dihn yahn Jairo

⁴⁹ Nde metah cuihno çahma Dihvo vo cuahn che nda ama ihyan ndevaco Jairo, ne rahn ye:

—A chih tahn dihn daya ne. Ametah deh cuande che quenda ne Ihyan Ricuahn.

⁵⁰ Chihnevan Dihvo vo, ne rahn ye ri ye Jairo:

—Hua co ran. Cuitehne che co conán di, ne tahn dihn daye ne, ndaconan conan te.

⁵¹ Cuahn che nda ye ndevaco se ne, hua çah yune ye che chenda nducoyaca ihyan nduco ye, deman Pedro man, Jacobo man, Juan man, nduco chida tahn dihn me man, nduco chaco te man.

⁵² Rah ran nducoyaca ihyan man, raco ye man, çava tahn dihn me. Ate rahn Dihvo vo:

—Hua cuaco nchuhn, te tahn dihn tih ne, dehve ndih te, te quiyado te.

⁵³ Ate riyon nan ihyan chahn ihyan, te a devano ye te tahn dihn me ne, a ndih te.

⁵⁴ Tuhme chetah Dihvo vo tah te, ne ama dito rahn ye:

—Tahn dihn, ¡cuenecuen!

⁵⁵ Nta vaco tahn dihn me, ne ndetahno necuan te. Chihquentiyon Dihvo vo che çah ihyan chahn, cheh te.

⁵⁶ Chida te nduco chaco te ne, ama cuahn ino ye. Ate chihquentiyon Dihvo vo ihyan chahn che hua çahma ye nduco nde ama ihyan, che ndedetuhche ye tahn.

9

Dechuh Dihvo vo Jesucristo nduh che ndichio apóstol che chahn ye cahn-dudo ye

¹ Ama yune ne, din dama Dihvo vo nduh che ndichio ihyan apóstol yahn ye, ne çah ye vederihquentiyon ihyan chahn çava che ndetendaçh ye vaco chihnga man, din ye che ndoyahn ihyan çah man.

² Dechuh ye ihyan chahn che çahn ye cuahndudo ye ndudo ndah yahn vederihquentiyon yahn Dendiohs man, din ye che ndoyahn ihyan çah man.

³ Chihquentiyon ye ihyan chahn:

—Hua dehva quenda nchuhn cuahn yune. Nde indahco, nde dino, nde pan, nde tume, hua quenda ne. A cahteca no ne che chenun ne; hua quenda ne tama.

⁴ Adecotino vaco ihyan che condá nchuhn ne, min cuahtenan ne nde tuno ro che ndaca ne yan min.

⁵ Nan che hua ntumanecun ihyan nchuhn ne, cuendiquendaçh ne yan min, ne condaçhde ne yune yahn che chenan çah ne, çava che cadino ihyan chahn te hua ndaçaçh din ye.

⁶ Tuhme cuahn ihyan chahn nducuahn yan, rahndudo ye ndudo ndah yahn Dendiohs man, redin ye che rendoyahn ihyan çah man.

Herodes ne, nahn ndihchero ye Dihvo vo Jesucristo

⁷ Checadino rey Herodes yahn vederihno che redin Dihvo vo, ate hua devano ye duh ihyan min yahn che nahñ ihyan ne, rahñ ye te Juan Bautista ntuche ye van tenahn.

⁸ Te nahñ ihyan ne, rahñ ye te profeta Elías nuhnde ro ye. Nahñ tun ihyan ne, rahñ ye te ama cha ihyan profeta che chahte ye a rahñ me, ntuche ye.

⁹ Tuhme rahñ Herodes:

—Juan ne, u dechuh che chica yan sandado dando ye. ¿Duhra ihyan cah che rihneván che rente ihyan yahn ye tuhme ne?

Chemin che nahñ ndihchero ye Dihvo vo.

Cah Dihvo vo Jesucristo, cheh uhn mil ihyan

¹⁰ Cuahn che ndaconan ihyan apóstol chahn ne, necah cuande ye Dihvo vo yahn nducuahñ che din ye nan che chahtechica ye. Tuhme quenda Dihvo vo ihyan chahn ama cuan nan che metah duhva nino yan Betsaida.

¹¹ Ate checadino ihyan yan, ne ama yahn ye cuahn ye quendi ye Dihvo vo. Cuahn che nda ye nan che quenun Dihvo vo ne, chicuahñ Dihvo vo ihyan chahn yahn vederihquentiyon yahn Dendiohs, ne din ye che ndoyahn ihyan che cah ye.

¹² Cuahn che a chi chino ne, ndo dama nduh che ndichio apóstol chahn nan Dihvo vo, ne rahñ ye ri ye ihyan:

—Cuedechuh ne ihyan sih yan che nino man, nan rancho man, cava che cua ye che cheh ye man, ndaca nan che cuahtenan ye man, te muhn nan che chenán vo ne, metah dehva.

¹³ Rahñ Dihvo vo ri ye ihyan chahn:

—Cah nchuhn, cheh ihyan sih.

Rahñ ihyan chahn ri ye Dihvo vo:

—Uhn ra pan nduco o yahca va yahn nuhn, atenan che cahñ nuhn, cua nuhn che cheh nducoyaca ihyan sih.

¹⁴ Ihyan chahn ne, ri ye tenduh uhn mil che deman ihyan chahn. Tuhme rahñ Dihvo vo ri ye ihyan apóstol yahn ye:

—Cuihquentiyon nchuhn che co dama ihyan sih, cuahte ye cade o raco ndiche ye queri ama cuan.

¹⁵ Tihca din ihyan chahn, ne chahte nducoyaca ihyan.

¹⁶ Tuhme chetañ Dihvo vo nduh che uhn pan me nduco o yahca chahn, ne chenihyon nan ye nan ro, necah ye nundihve cuahn Dendiohs. Ndeh ye, ne cah ye ihyan apóstol cava che cah ye, cheh ihyan che ndi dama chahn.

¹⁷ Cheh nducoyaca ihyan chahn nduhva che rica chedave yahn ye. Chihno min ne, nedin dama ye che ngava, ne chi ndichio cuahte.

Rahñ Pedro te a Dihvo vo Jesucristo che dechuh Dendiohs, ndedevahn ye ihyan iyehñse

¹⁸ Ama ro ne, quenán Dihvo vo nduco ihyan apóstol yahn ye, ne man ye revañ ye ama lado. Chihno min ne, tumerune ye ihyan chahn:

—¿Duh u, rahñ ihyan ne?

¹⁹ Ndahconan ihyan chahn:

—Nahñ ihyan ne, rahñ ye te ndih ne, Juan Bautista. Nahñ ye ne, rahñ ye te ndih ne, Elías. Nahñ tun ye ne, rahñ ye te ndih ne, ama cha ihyan profeta che chahte ye a rahñ me, ntuche ye.

²⁰ Tuhme tumerune Dihvo vo ihyan chahn:

—Me nchuhn, ¿deh rahñ ne yahn ne?

Ndahconan Pedro:

—A ndih che a va cade che dechuh Dendiohs, ndedevahn ne ihyan iyehñse.

Rahn Dihvo vo Jesucristo te va che cahno se ihyan

²¹ Tuhme chihquentiyon Dihvo vo ihyan chahn che hua nuhnde ye che a ihyan min che a va che chi ye ndedevahn ye ihyan iyehanse.

²² Quendi ye rahn ye:

—U che rinducó nducoyaca ihyan ne, va che ama chuhríhn. Intiyahn man, chidocuyan ndinan man, sahn devano ley che dirun Moisés man ne, ndahchenan se u, ne cahno se u. Ate cuihno ino ro ne, ntuché van tenahn.

²³ Chihno min ne, rahn ye nduco nducoyaca ihyan:

—Adecoduhno ihyan che nahn conducó ye u ne, va che cahcoman ye vedeyeno yahn man ye. Andahre nahn yah se ihyan nan cruz, ate va che conduco ye u ro ro.

²⁴ Tihca, te adecoduhno ihyan che cahcoman ye u che nahn ndedevahn man ye ihyan ne, ihyan min ne, conda ye. Ate ihyan che cahco mendañn ye ihyan, coh ye cava u ne, ihyan min che cuaco ne, ndevahn ye.

²⁵ Nde tah hua cochihve che nedin dama ihyan nducuahñ vedecuihca che va iyehanse ndete che conda ye.

²⁶ Adecoduhno ihyan che co cuihnan ye cava u nduco ndudo yahn ne, tihca u che rinducó nducoyaca ihyan ne, co cuihnan cava ihyan min ro che ndá nduco ángel ndah numacuahn vederihquentiyon yahn man, numacuahn vederihquentiyon yahn Chidá man.

²⁷ Cuaco rahn rí nchuhn te o ino ihyan che chenun ye muhn ne, hua coh ye nde ndá ro che ndihchero ye che conahn vederihquentiyon yahn Dendiohs.

Ndo diyahn Dihvo vo Jesucristo

²⁸ Chihno tenduh nine ro che tihca rahn Dihvo vo ne, quenda ye Pedro man, Jacobo man, Juan man, ne cochá ye ama tingüete cava che covah ye.

²⁹ Numanahn che revah ye ne, ndo diyahn ye. Tino yahn ye ne, ama ndo cua, ama diyahn ro.

³⁰ Adenahñ chihnde ro o ndaco, rente ye nduco Dihvo vo. Ihyan chahn ne, Moisés nduco Elías.

³¹ Quendihco dave yahn vahchetero, ne rente ihyan chahn nduco Dihvo vo yahn che va che cahno sahn nunde ihyan min van Jerusalén.

³² Pedro nduco combiero yahn ye ne, ama rendave yahnde ye. Cuahn che ntañ ndutinan ye ne, ndihchero ye che ama ndo diyahn Dihvo vo. Namin ndihchero ye ihyan che o chahn che chenun ye min nduco ye.

³³ Ura che a rahn Moisés nduco Elías ne, rahn Pedro ri ye Dihvo vo:

—Ihyan Ricuahñ, jndahca che cuahtenan vo muhn! Dendah nuhn ino vache vah, ama nan che cuhnde ne, ne tama nan che cuhnde Moisés, ne tama nan che cuhnde Elías.

Nde hua devano Pedro deh che rahn ye.

³⁴ Numanahn che rahn ye ne, chiya ama man, ne ama dihya ihyan chahn chi che chenun ye van man me.

³⁵ Van man me ne, chihnevan ihyan chahn ndudo che rahn Dendiohs:

—Sahn tih che Dayá. Yahinó sahn. Che cahma se ne, chemin che codinahn nchuhn.

³⁶ Chihno che chihnevan ihyan chahn ndudo me ne, a demañ Dihvo vo nti ye. Tahñ min ne, hua rahn ihyan chahn nduco nde ama ihyan yahn vederihno che ndihchero ye.

Ndetendah Dihvo vo Jesucristo vaco chihngá che quenun ama sahn dihn

³⁷ Tama ro me ne, cuenchahn ihyan chahn cuete me, ne ama yahn ihyan chahn ye, chendi yune ye Dihvo vo.

³⁸ Van ihyan chahn ne, rahn ama se numa dito:

—Ihyan Ricuahn, conan vahino ne u. Condiyhchero ne cava sahn dihn yahn, te ama ndiyahn ra se yahn.

³⁹ Ama vaco chihnga retumangan sahn, ne adenan rah se. Ama dito rendoh se, riche yan chende se. Rihno renuhn yah sahn, ne hua nahn cahcoman sahn.

⁴⁰ A chicá favor ihyan apóstol yahn ne che ndetendah ye vaco chihnga me sahn, ate hua chi ndetendah ye.

⁴¹ Ndahconan Dihvo vo:

—¡Ama yah ri cava nchuhn, ihyan nunde che hua ritahno ne! ¿A nu-macuahn ro conán nduco nchuhn? ¿Tava ro va che cochá nduco ne? Cuehn, ngua daye.

⁴² Ura che nda sahn dihn me ne, tumangan vaco chihnga me sahn, ne chendava se ndiyahn, rih dihca se. Ate ndetendah Dihvo vo vaco chihnga me, ne nenecah ye sahn chida se.

⁴³ Nducoyaca ihyan ne, ama rahn ino ye yahn vederihno chahte che tihca din Dendiohs.

Tama yune rahn Dihvo vo Jesucristo te va che cahno se ihyan

Namin nducoyaca ye rahn ino ye yahn nducuahn vederihno che redin Dihvo vo. Rahn Dihvo vo nduco ihyan apóstol yahn ye:

⁴⁴ Ndah conan ino nchuhn ndudo che rahn nduco ne. U che rinducó nducoyaca ihyan ne, va che necah se u tah sahn nunde.

⁴⁵ Ate hua chenahn ihyan chahn che rahn ye, te vahche yahn ye cava che conahn ye, ne vah ye tumerune ye deh conahn ndudo min.

¿Duh che tahque ndinan ne?

⁴⁶ Ihyan apóstol chahn ne, rente ye van man ye nduco vih, cha ye che tahque conan ye.

⁴⁷ Checadino Dihvo vo che tihca rendedecadino ihyan chahn, ne chetah ye ama lihn. Chehndi ye nan ye,

⁴⁸ ne rahn ye nduco ihyan chahn:

—Adecoduhno ihyan che nevahnecon ye lihn cuh che cuande yahn ne, u nevahnecon ye. Adecoduhno ihyan che nevahnecon ye u ne, Ihyan che dechuh ye u nevahnecon ye. Adecoduhno ihyan che tahque necun ye van nducoyaca nchuhn ne, ihyan min che tahque ndinan ye.

Ihyan che hua tan ye nduco vo ne, rinan ye uvo

⁴⁹ Tuhme rahn Juan ri ye Dihvo vo:

—Ihyan Ricuahn, ndihchero nuhn ama ihyan che, nduco che rahn no ye che duche ne ne, rendetendah ye vaco chihnga. Ate hua cah yune nuhn che quendi ye, te hua nduco ye uvo.

⁵⁰ Rahn Dihvo vo ri ye Juan:

—Hua cahca tan nchuhn che tihca redin ye, te ihyan che hua tan ye nduco vo ne, rinan ye uvo.

Dihvo vo Jesucristo ne, chihya ye Jacobo nduco Juan

⁵¹ Cuahn che a nda nino ro che va che nahñ Dihvo vo vahchetero ne, chihco dama ino ye, ne cuahn ye yan Jerusalén.

⁵² Dechuh menan ye ama o ihyan apóstol ama cuan yan yahn Samaria, cava che nuhn ihyan chahn nan che conan ye.

⁵³ Ate ihyan yan min ne, hua nevahnecon ye Dihvo vo, te a devano ye te yan Jerusalén cahñ ye.

⁵⁴ Cuahn che ndihchero Jacobo nduco Juan che tihca ne, rahn ye:

—Dihve nuhn, nduhça che chihquentiyon ihyan profeta Elías che chera yahn che chica nan ro, ne chiche ama yahn ihyan ne, ¿a nahn ne che tihça din vo, ne cuihno cuco ihyan yan tih ne?

⁵⁵ Chaconan Dihvo vo, ndihchero ye ihyan chahn, ne chihya ye ihyan:

—Nchuhn ne, nde hua devano ne ti rica vedetan yahn ne che tihça rahn ne,

⁵⁶ te u che rinducó nducoyaca ihyan ne, ndá çava che ndedevahn ihyan, ndiyu çava che decuihnó ihyan.

Tuhme chuh dama ye, cuahn ye tama yan nduco vih.

Sahn che nahn conduco se Dihvo vo Jesucristo

⁵⁷ Cuahn che a chenun yune ihyan chahn ne, rahn ama se ri se Dihvo vo:

—Dihvé, conducó ndih adecotino che çahn ne.

⁵⁸ Rahn Dihvo vo ri ye sahn:

—Yuhne ne, va ive vacó te; yahda ne, va nan che rahte te, ate u che rinducó nducoyaca ihyan ne, metah nde nan che conditenán.

⁵⁹ Tama se ne, rahn Dihvo vo ri ye sahn:

—Cuhn vo, condoque u.

Ndahconan se yahn ye:

—Dihvé, te yune ne che conán nan chidá nde ndá ro che coh ye. Cuhché ihyan, tuhme conducó ndih.

⁶⁰ Rahn Dihvo vo ri ye sahn:

—Cuihcoman ihyan che hua ritahno ye u, te anduhneca ndete che a ndih ye nan Dendiohs. Ihyan chahn co cuhche ye tenahn yahn ye. Me di ne, cuehn cuahndode ndudo yahn vederihquentiyon yahn Dendiohs.

⁶¹ Rahn tama se ri se Dihvo vo:

—Dihvé, çahn conducó ndih, ate te yune ne che dinoca çahn çahmá nduco ihyan yahn che chenun ye ndevacó, te va che çahcomán ihyan.

⁶² Rahn Dihvo vo ri ye sahn:

—Nduhça che hua cochihve ntiyon yahn ihyan che ndaconan ye cuahn vedame ye ura che rih rine ye nduco curuhn yahn ne, tihça hua cochihve che hua riquendi ihyan vederihquentiyon yahn Dendiohs cuahn dama.

10

Dechuh Dihvo vo Jesucristo ino raco ndiche ihyan che chahn ye cahndudo ye

¹ Chihno min ne, tendahnun Dihvo vo te ino raco ndiche ihyan che rinduco ye ihyan, ne dechuh ye ihyan chahn çade o ye queri ama yan cuahn nan che va che chuh man ye.

² Rahn ye ri ye ihyan chahn:

—Nduhça che ndeh ndute ndata cuahn che ama riyahn ne, tihça ama yahn ihyan che nahn çahnevan ye Ndudo yahn Dendiohs. Chemin che cuica nchuhn Dihvo vo Dendiohs che dechuh ca ye ihyan che cuahndudo ye Ndudo yahn ye.

³ Cuahn nchuhn, te u dechuh nchuhn nduhça che çahn itecuche van lobo.

⁴ Hua quenda ne dino. Nde tume, nde ndaco, hua quenda ne. Nde hua cuahtendi ne yune çava che necah ne Dendiohs nde ama ihyan.

⁵ Cuahn che condá nchuhn ama vah ne, çahma ne: “Dendiohs nduco ye nchuhn, hua dehve rahco ne.”

⁶ Ndete che min quenun ama ihyan che necun ye ne, conahn nduco ye nduhça che çahma nchuhn. Ndete che hua ne, hua conahn.

⁷ Cuahtenan nchuhn vah nan che nevahnecon ye nchuhn, ne coheh ne man, cuih ne man, deh che reh ye te ye, cheh ne, te nan che redin ihyan ntiyon ne, a min va che quendaḥ che cheh ye. Hua caḥn nchuhn nduh vah nduh vah.

⁸ Cuahn che nda nchuhn adecotino yan nan che nevahnecon ye nchuhn ne, coheh ne adecodehno che caḥco ye nan ne.

⁹ Codin nchuhn che ndoyahn ihyan cah che vate ye min, ne caḥma ne nduco nducoya ca ihyan: “Vederihquentiyon yahn Dendiohs ne, a va van nchuhn.”

¹⁰ Ate adecotino yan che nda nchuhn nan che hua nevahnecon ye nchuhn ne, cuahn che ndiquendaḥ ne cuahn yune ne, caḥma ne:

¹¹ “Nde yune yahn yahn yan vaco nchuhn che quenan caḥ nuhn ne, ndaḥde nuhn yahn che hua chitahno ne. Ate cuedevano nchuhn te vederihquentiyon yahn Dendiohs ne, a va van ne.”

¹² Raḥn ri nchuhn te ro che techecaḁe Dendiohs yahn ihyan ne, tahque chuhrihn ca ihyan yan min che co ihyan yan Sodoma.

Ihyan yan Corazín nduco ihyan yan Betsaida ne, va che co ye castigo yah

¹³ Ihyan yan Corazín, iyah ri cava nchuhn! Ihyan yan Betsaida, iyah ri cava nchuhn!, te ndete che ihyan yan Tiro nduco ihyan yan Sidón ndihchero ye vederihno che ndihchero nchuhn ne, ametah ro nto ino ihyan chahn nunde yah ye, chahtenun ye tino ndere man, chahte ran ye van iya man.

¹⁴ Ate nda ro che techecaḁe Dendiohs yahn ihyan ne, nchuhn che tahque chuhrihn ne che co ihyan yan Tiro nduco ihyan yan Sidón.

¹⁵ Namin nchuhn, ihyan yan Capernaum, ama yaḁe ne man, ama nahn conan ne man, ate va che cuahtenun ne van ruchiyahn.

¹⁶ Me nchuhn che rinduco ne u ne, ihyan che renevahnecon ye nchuhn ne, u renevahnecon ye. Ihyan che hua renevahnecon ye nchuhn ne, u hua renevahnecon ye. Ihyan che hua renevahnecon ye u ne, hua renevahnecon ye Ihyan che dechuh ye u.

Ndaconan ihyan che ino raco ndiche chahn che dechuh Dihvo vo Jesucristo

¹⁷ Ihyan che ino raco ndiche chahn che dechuh Dihvo vo ne, nta ye. Ama yeno ye, ne raḥn ye:

—Dihve nuhn, nde vaco chihnga ne, redinahn yahn nuhn yahn vederihquentiyon che te ne, chenan cuma nuhn.

¹⁸ Raḥn Dihvo vo ri ye ihyan chahn:

—Cuaco, te u ne, ndihchero sahn chundah che nduhca che riya cuah, rica se nan ro, rendaḥ se nde ndiyahn.

¹⁹ U té vederihquentiyon, chenan cuma nchuhn, ne ndaḥco ndiya ne vederihquentiyon yahn chundah. Andahre condinun ne cu tan man, itedahn man, ate hua dehva co yahn ne.

²⁰ Nchuhn ne, nde hua nduh co yeno ne che redinahn vaco chihnga che rihquentiyon ne. Tahque co yeno ne yahn che a chenan ca ca ne vahchetero.

Ama chi yeno Dihvo vo Jesucristo

²¹ Ura min ne, din Vaco Dendiohs che ama chi yeno Dihvo vo, ne covah ye:

—Chida man, ndih che dendah ne vahchetero man, iyehne man. U rendaḁ numacuahn vedeyeno yavenan ne, te chihco ndeh ne vededevano yahn ne nan ihyan che raḥco ye che ama devano ye, ne caḥ ne, chi devano ihyan che necun ye. Chida, tiḥca din ne, te tiḥca nahn man ne.

²² Tuhme raḥn ye ri ye ihyan che nduco ye:

—Chidá ne, ndahco ye nducuahñ dehtenduh tãh. Nde ama ihyan hua rendihche ye duh che Daya Dendiohs. Ate Chidá ne, rendihche ye u, te u che Daya ye. Nde ama ihyan hua rendihche ye Chidá, atenãñ u, Daya ye mañ, ihyan che tendãhnún ihyan mañ, rendihche nuhn ihyan.

²³ Chaconan ye ndihchero ye ihyan che rinduco ye ihyan, ne deva vih raññ ye nduco ye:

—Nchuhn ne, ama ndah ro yahn ne,

²⁴ te raññ rí nchuhn te ama yahn ihyan profeta mañ, rey mañ, che chahte ye a raññ me, chenan ino ye che ndihchero ye che rendihchero nchuhn, ate hua ndãca ndihchero ye. Chenan ino ye che cahnevan ye che rihnevan nchuhn, ate hua ndãca chihnevan ye.

Ejemplo yahn ama saññ nación yahn Samaria

²⁵ Ama saññ devano ley che dirun Moisés ne, çaça che tumerande se Dihvo vo ne, tumerune se ihyan:

—Ihyan Ricuahñ, ¿deh va che dín çaça che conãñ vahchetero numacuahn ro ne?

²⁶ Tumerune Dihvo vo saññ:

—¿Deh che ndirun ñañ ley che dirun Moisés ne? ¿Taça renehn ne?

²⁷ Ndahconan se:

—“Codin yahine Dihve Dendiohs numacuahn chedave yehn mañ, numa ine mañ, numacuahn fuerza yehn mañ, numacuahn vederendedecadino yehn mañ. Namin codin yahine nducoyaça ihyan nduhça che yahine man di.”

²⁸ Tuhme raññ ye ri ye saññ:

—Ndahça ndahconen. Ndete che tihça din ne, conen vahchetero numacuahn ro.

²⁹ Ate nducote hua nahn se che cora vedecuihno yahn se ne, tumerune se Dihvo vo:

—¿Duh ihyan che din yahinó me ne?

³⁰ Ndahconan Dihvo vo yahn se nduco ejemplo cuh:

—Ama ihyan ne, chica ye yañ Jerusalén, cuahn ye yune che renda yañ Jericó. Min taññ nun saññ duco ihyan, ne chahn se ihyan, chehnevi se nde tino yahn ye. Nuhn yah se ihyan, ne chacondihte se ihyan, ndih taññ ye, ne conaññ se.

³¹ Ura min chuh ama chidocuyan ñañ che quendite ihyan che ntãca yah me, ne chahconan ye yune, chuh ye cuahn ye.

³² Namenãñ me ne, chuh tama chidocuyan, ama levita, ihyan che redin cudãdo ñañ ta. Ndihchero ye che quendite ihyan che ntãca yah me, ne namin chahconan ye yune, chuh ye cuahn ye.

³³ Ate chihno min ne, ndã ama saññ nación yahn Samaria ñañ che quendite ihyan che ntãca yah me, ne quenãñ vahino se ihyan.

³⁴ Chahn ndã se, ne dico se ihyan, chih se aceite nduco vino, ne dechiche se nduh cuãñ ñañ yah yahn ye. Tuhme tihde se ihyan dame yuhdo che ra se, ne quenda se ihyan ama vah, ne min din se cudãdo ihyan.

³⁵ Tama ro me, ura che a caññ se ne, tendãñ se tume, cañ se saññ che vaço min, ne raññ se ri se vih: “Codin cudãdo ihyan cuh, ne cuahn che ndaconãñ ne, nedihvé yehn taça ca tume che toh nduco ye.”

³⁶ Tuhme tumerune Dihvo vo saññ:

—¿Cha ihyan che ino chahn che din yahino ye ihyan che nuhn yah saññ duco chahn ne?

³⁷ Ndahconan se yahn ye:

—Saññ che din se vedevahino nduco ye tahque yahino se ihyan.

Tuhme rahn ye ri ye sahn:

—Ndahca ndahconen. Namin di ne, codin yahine nducoyaca ihyan.

Chahn Dihvo vo Jesucristo vaco Marta nduco Maria

³⁸ Chihno min ne, chahn Dihvo vo ama yan lihn, vaco ama ndahta che duche te Marta.

³⁹ Marta ne, va ama tahn coh te che duche te Maria. Tahn min ne, chihnde te nan Dihvo vo, rihnevan te ndudo yahn ye.

⁴⁰ Ate Marta ne, ama va ntiyon yahn te, ne chahn te nan Dihvo vo, ne rahn te ri te ihyan:

—Dihve, za hua rihco ne cudado che tahn coh ne, rihcoman te u nduco ntiyon yahn nuhn? Cahma ne co ne tahn che conan te u.

⁴¹ Ndahconan Dihvo vo yahn te:

—Marta, Marta, di ne, ama rendedecadine yahn ntiyon yehn.

⁴² Ate va ama nan che tahque cochihve. Maria ne, tendahnun te cha che tahque ndah, ne hua duhva cahnevi yahn te.

11

Chicuahh Dihvo vo Jesucristo nduhca che covah vo

¹ Ama yune ne, revah Dihvo vo, ne cuahn che a chihno covah ye ne, rahn ama ihyan apóstol ri ye ihyan:

—Dihve nuhn, cuicuahh ne nuhn, covah nuhn nduhca che chicuahh Juan Bautista ihyan che chinduco ye ihyan.

² Rahn Dihvo vo ri ye ihyan chahn:

—Cuahn che covah nchuhn ne, cahma ne tuhca:

Chida nuhn che va ne vahchetero,

ndahca che ndeva nducoyaca ihyan yavenan ne.

Ndahca che cahcantiyon ne nducoyaca ihyan.

Nduhca che rinahn nducuahh che nahn ne vahchetero ne, tihca conahn muhn iyehhse cuh.

³ Cuete ne che cheh nuhn man nduhca che rete ne ro ro.

⁴ Cuenchahco ne nunde yahn nuhn, te namin nuhn ne, renchahco nuhn yahn nducoyaca ihyan che rendihco ye yahn nuhn.

Hua cuahnecon ne che tumerande chundah nuhn.

Cuenedevahn ne nuhn yahn nducuahh che chihnga.

⁵ Tuhme quendi Dihvo vo, ne rahn ye:

—Ndete che nan mahh yan, chahn ama cha nchuhn vaco amigo yahn ne, ne cahma ne nduco ye: “Combiero, teche ne o ino pan, tumenán,

⁶ te ama amigo yahn nda ye ndevaco, ne metah dehva che cah cheh ye”,

⁷ za ndahconan ye nde chete vah tuhca ne?: “Hua dendoh u, te a quendité nan yundo nduco checahya yahn, ne chendevah ne, a ntude. Hua co necuan té che rique.”

⁸ Rahn ri nchuhn te andahre hua necuan ye, te ye cava che amigo yahn ne ihyan, ate ndete che quendi ne caca ne ihyan ne, necuan ye te ye nducuahh che nahn ne.

⁹⁻¹⁰ Namin rahn ri nchuhn: Cuica ne dehtenduh che nahn ne Dendiohs, ne te ye nchuhn. Tihca, te nducoyaca ihyan che rica ye ne, rendonda tah ye. Ihyan che renuhn ye ne, rendaca ye. Ihyan che riyahve ye ne, renane chendevah cava ye.

¹¹ Ndete che caca daya ama cha nchuhn pan ne, za cah ne ama tu? O ndete che caca daya nchuhn yahca, za cah ne ama cu?

¹² O ndete che caca daya nchuhn ama dute tuh ne, za cah ne ama itedahn?

13 Andahre duhtuno ihyan nchuhn, ate devano çah ne dehtenduh che ndah ðaya ne. ¿A ndiyu tahque nun te Chida nchuhn che va ye vahchetero Vaco Ndah yahn ye nchuhn cuahn che çaca ne?

Rahn se yahn Dihvo vo Jesucristo te quenan cuma ye vederihquentiyon yahn chundah

14 Ama yune ne, ndetendah Dihvo vo vaco chihnga che quenun ama se, nedin che ndi lihme se. Cuahn che a ndiquendah vaco chihnga me ne, a chi çahn sahn min, ne ama cuahn ino ihyan.

15 Ate nahn se ne, rahn se:

—Sahn tih ne, rendetendah se vaco chihnga, te quenan cuma se vederihquentiyon yahn chundah, sahn min che ndinan se yahn vaco chihnga.

16 Nahn tun se che nahn tumerande se Dihvo vo ne, rica se che din ye ama vederihno che çaca vahchetero, ndihchero se.

17 Ate devano Dihvo vo deh che rendedecadino sahn chahn, ne rahn ye ri ye sahn:

—Ndete ihyan che vate ye rihquentiyon ye, cuahtecuhma ye van man ye nduco vih ne, hua co quendi ye çahcantiyon ye. Namin ihyan che chenun ye ama vah, ndete che cuahtecuhma ye van man ye nduco vih ne, hua co quendi ye, cuahtenun ðama ye.

18 Namin chundah, ndete che cuhma se nduco ihyan yahn se ne, ¿taça co quendi çahcantiyon se? Tihça tumeruné nchuhn, te rahn ne te nduco vederihquentiyon yahn chundah, rendetendah vaco chihnga.

19 Ndete che rendetendah vaco chihnga nduco vederihquentiyon yahn chundah ne, tuhme ¿duhra rinan combiero yahn nchuhn che rendetendah se vaco chihnga? Man sahn chahn çahma se co se nchuhn.

20 Ate ndete che nduco vederihquentiyon yahn Dendiohs rendetendah vaco chihnga ne, codevano nchuhn te vederihquentiyon yahn Dendiohs ne, a va van ne.

21 Cuahn che ama sahn dito va che redin nduco se cudado vaco se ne, nducuahn dehtenduh yahn se ne, ndahça va.

22 Ate ndete che nda tama ihyan che tahque dito ye che co sahn min ne, ndahco ndiya ye sahn, çahnevi ye nducuahn dehtenduh che redin nduco se cudado vaco se, ne necahn man ye nduco combiero yahn ye nducuahn che çahnevi ye yahn se.

23 Ihyan che hua rinduco ye u ne, tan ye nducó. Ihyan che hua redin ye ntiyon nducó ne, redetohnan ye ntiyon che redin.

24 Cuahn che a ndiquendah vaco chihnga ama ihyan ne, rechica nan yahn cuma, renuhn nan che conun. Ndete che hua rendaça nan che conun ne, rendedecadino: “Nahn tun nan che ndiquendah.”

25 Cuahn che rendaconan ne, rentaçã ihyan min nduhça ama vah che ndahça nto dave nde tuno necuco.

26 Tuhme rahn regua te ndache vaco che tahque chihnga, ne renda ihyan min, ne tahque rechuhrihn ye che co ro menan me.

Ndah ro yahn ihyan che redinah ye Ndudo yahn Dendiohs

27 Ura che rahn Dihvo vo dehtenduh che tuhchan ne, ama dito rahn ama ndahta van ihyan:

—¿Ndah ro yahn ihyan ndahta che chacoyahn ye ndih man, che tave ye ndih man!

28 Dihvo vo ne, rahn ye:

—Tahque ndah ro yahn ihyan che rihnevan ye Ndudo yahn Dendiohs man, redinah ye man.

Ihyan nunde ne, rica ye ama vederihno ndihchero ye

²⁹ Cuahn che ama ndo dama ihyan ne, rahn Dihvo vo:

—Nchuhn che vate ne man ro cuh ne, duhtuno ihyan ne, rica ne vederihno. Ate vederihno ne, hua ndaca ndihchero ne. Atena ama vederihno nduhca vederihno che din Dendiohs nduco Jonás, ndaca ndihchero ne.

³⁰ Nduhca che ndihchero ihyan yan Ninive vederihno che din Dendiohs nduco Jonás ne, tihca conahn ama vederihno nduco u che rinducó nducoyaca ihyan, ndihchero nchuhn che vate ne man ro cuh.

³¹ Nda ro che techecade Dendiohs yahn nducoyaca ihyan ne, necuan reina che va te cuahn yahn ndiya, caça nunde te yahn nchuhn che vate ne man ro cuh, te tahn min ne, chica te yahn yahn, ne nda te, chihnevan te vededevano yahn Salomón. Ate u che tahque chahte vederihquentiyon yahn che co Salomón, muhn quenún van nchuhn, nde hua retumacah ne u.

³² Nda ro che techecade Dendiohs yahn nducoyaca ihyan ne, necuan ihyan yan Ninive, caça nunde ye yahn nchuhn che vate ne man ro cuh, te ihyan chahn ne, nto ino ye nunde yahn ye cuahn che cahndudo Jonás. Ate u che tahque chahte vederihquentiyon yahn che co Jonás, muhn quenún van nchuhn, nde hua retumacah ne u.

Ejemplo yahn ndudo che ricuahn Dihvo vo Jesucristo

³³ Nde ama ihyan hua rihco ye ama yahn man ama cajún, ate rihco ye nan che yaco cava che co ro dave yahn ihyan che renda ye. Tihca ndudo yahn, te hua co conun ndeh.

³⁴ Ndutenan nchuhn ne, nduhca ama yahn che redin che ri ro nan ne. Chedave yahn ne ne, nduhca ama yahn che redin che ri renahn ne. Ndete che ndah chedave yahn ne ne, conahn ndah ne. Ate ndete hua ndah ne, nde hua conahn ne.

³⁵ Chemin che nahn che cahco nchuhn cudado chedave yahn ne cava che ndah conahn ne.

³⁶ Ndete che tihca cahco ne cudado ne, chedave yahn ne ne, nduhca ama yahn ndah che din che conahn ndah ne.

Sahn fariseo nduco sahn devano ley che dirun Moisés ne, ndevih Dihvo vo Jesucristo nunde yahn se vacoqn se

³⁷ Cuahn che chihno rahn Dihvo vo ne, yahve ama sahn fariseo ihyan che cahñ ye vaco se, cheh ye nduco se. Chenda ye vaco se, ne cuahn che nda ura ne, chihnde ye nan mesa.

³⁸ Ndi chero sahn fariseo me che hua nano ye tah ye nduhca costumbre yahn se, ne ama cuahn ino se chi.

³⁹ Rahn ye ri ye sahn:

—Nchuhn sahn fariseo ne, ama reñano ne vaso man, cuh man. Ate chete chedave yahn man ne ne, ndito vede idihya man, nducuahn che chihnga man.

⁴⁰ ¡Hua renahn nchuhn! ¿A hua devano nchuhn te Dendiohs che dendah ye ihyan ne, tahque nahn ye che dave chedave yahn ihyan che co cuahn menan ye?

⁴¹ Cuedin nchuhn vedevahino numacuahn chedave yahn ne. Tuhme co ro che dave yavenan ne nan Dendiohs.

⁴² Nchuhn sahn fariseo, ¡yah ri cava ne!, te deman riya yahn ive man, aruda man, dehtenduh yata man, recah ne. Ate vederihquentiyon yahn Dendiohs man, vedeyahino yahn ye man, andahre chemin che tahque rigonun chihve ne, rihcoman ne. Nduhca che redinahn ne yahn riya ne, tihca codinahn ne yahn nducuahn.

⁴³ 'Nchuhn sahn fariseo, iyah rí cava ne!, te renan ino ne cuahte ne chete yaco nan silla che rahte ihyan ndinan. Namin renan ino ne che nevahncun ihyan nchuhn, nte ye Dendiohs nchuhn cuahn ndihve.

⁴⁴ 'Nchuhn sahn fariseo man, sahn devano ley che dirun Moisés man, iyah rí cava ne! jo nan o chende ne! Nchuhn ne, nduhca yayan che a nincheh, che vatechica ihyan menan nde hua devano ye che yayan, tihchan ne.

⁴⁵ Tuhme rahn ama sahn devano ley che dirun Moisés:

—Ihyan Ricuahn, cuahn che tihca rahn ne ne, nde nuhn, chihnga riya yahn nuhn.

⁴⁶ Ate rahn Dihvo vo ri ye sahn:

—Namin nchuhn, sahn devano ley che dirun Moisés, iyah rí cava ne!, te recah rihn nduh ne ihyan nduco dehtenduh che nentihdenan ne, rihquentiyon ne che va che dinahn ye. Ate man ne ne, nde tah hua rinan ne ihyan.

⁴⁷ 'iyah rí cava nchuhn!, te rahto ne yayan yahn ihyan profeta che man indihthe yahn ne, chihno ye ihyan.

⁴⁸ Nchuhn ne, devano ne che din indihthe yahn ne, ne dama ri ne nduco ye, te ihyan chahn chihno ye, ne nchuhn rahto ne yayan.

⁴⁹ 'A yahn che tihca redin nchuhn che rahn Dendiohs numacuahn vededevano yahn ye: “Dechuh ihyan profeta man, ihyan apóstol man, ne cahno se nahn ihyan chahn, ne nahn ye ne, din tan se nduco ye.”

⁵⁰ Dendiohs va che techecade ye yahn ihyan che vate ye man ro cuh, te ndehde dame ye yun yahn nducoyaca ihyan profeta che chihno ihyan nde nan che canan iyehense.

⁵¹ Ndehde dame ye nde yun yahn Abel, nde yun yahn Zacarías, che chihno se ihyan mendahn yahn nan ta nduco yaco chahte. Tihca rahn rí nchuhn, te yun yahn nducoyaca ihyan chahn ne, va che nedihve ihyan che vate man ro cuh.

⁵² 'Nchuhn, sahn devano ley che dirun Moisés, iyah rí cava ne!, te vedevano che chihcoro Dendiohs ne, nchuhn ne, rihco ndeh ne. Nde hua riquendi man nchuhn, nde hua rahncun ne che quendi ihyan chengahn.

⁵³ Cuahn che rahn Dihvo vo dehtenduh che tuhchan ne, sahn fariseo man, sahn devano ley che dirun Moisés man ne, chi tan se nduco ye, ne ama ndeh nan dehtenduh retumerune se ihyan.

⁵⁴ Nduco tihca ne, retumarande se ihyan, te nahn se che cahma ye ama ndudo che hua ndahca, cava che co caca nunde se yahn ye.

12

Ndudo che ricuahn sahn fariseo ne, nduhca ya yahn pan

¹ Ura min ne, ama yahn ihyan ndo dama ye nde tuno raconda vih ye. Tuhme rahn Dihvo vo ri ye ihyan apóstol yahn ye:

—Cuihco nchuhn cudado nduco ndudo che ricuahn sahn fariseo, te o nan o chende se, ne ndudo yahn se ne, rendih nduhca che rendih ya yahn pan.

² Nducuahn che va cuahn ndeh ne, va che cuhnde ro. Namin nducuahn che ri cuahn ndeh ne, va che cadino ihyan.

³ Tihca, te che rente nchuhn cuahn deman ne nduco vih ne, va che cadino nducoyaca ihyan. Namin che rahn nchuhn cuahn chete vah ne, va che cuahndudo ihyan nde tin vah yuto.

Duh che va che din vah vo

⁴ Ate nchuhn amigo yahn, rahn rí nchuhn te hua din vah ne sahn che rihno se ihyan, te cuihno min ne, ametah dehva co din se.

⁵ U có nchuhn duh che din vah ne. Codin vah ne Ihyan che co cahnevi ye vedevihche yahn ne, ne cuihno min ne, va vederihquentiyon yahn ye che dechuh ye nchuhn van ruchiyahn. A Ihyan min che codin vah nchuhn.

⁶ Yahda cahya ne, nde hua rigonun chihve te, rendihcue ihyan uhn te, ra ye co tume cahya, ate Dendiohs ne, nda cuande ye ite.

⁷ Nde yudo tin queri ama nchuhn ne, nda cuande ye. Huate vah nchuhn, te tahque rigonun chihve nchuhn che co ama yahn yahda cahya.

Ihyan che renevahnecon ye Dihvo vo Jesucristo nan nducoyaca ihyan

⁸ Rahn ri nchuhn te adecoduhno ihyan che renevahnecon ye u nan nducoyaca ihyan ne, u che rinducó nducoyaca ihyan ne, ndevá ihyan min nan nducoyaca ángel yahn Dendiohs.

⁹ Ate ihyan che hua renevahnecon ye u nan nducoyaca ihyan ne, hua ndevá ihyan min nan ángel yahn Dendiohs.

¹⁰ 'Adecoduhno ihyan, andahre chihnga cahma ye yahn u che rinducó nducoyaca ihyan, co ca ndaca ye vederenchahco. Ate ihyan che cahva ye yahn Vaco Ndah yahn Dendiohs ne, ametah nchahco cuahno Dendiohs cava ye.

¹¹ 'Cuahn che quenda se nchuhn chete yaco man, nan juez man, nan intiyaahn man ne, hua ndedecadino nchuhn deh cahma ne, o taca cahma ne,

¹² te ura min ne, Vaco Ndah yahn Dendiohs te cuande nchuhn deh che cahma ne.

Rihco yudo Dihvo vo Jesucristo yahn vedeidihya

¹³ Rahn ama se ri se Dihvo vo:

—Ihyan Ricuahn, cahma ne co ne sahn dihnó che cahmahñ se nducó dehtenduh che chihco indihthe yahn nuhn.

¹⁴ Ate rahn Dihvo vo ri ye sahn:

—Ndao, ndiyu juez u cava che cahcantiyón che cahmahñ nchuhn dehtenduh yahn ne nduco vih.

¹⁵ Tuhme rahn ye ri ye nducoyaca ihyan:

—Cuihco nchuhn cudado, ne hua din yahino ne vedecuihca che va iyehñse cuh, te andahre ama va vedecuihca yahn ihyan, ate ndiyu nduco chemin co ndevahn ye.

Ama sahn cuihca che hua renahn se

¹⁶ Tuhme nte Dihvo vo ejemplo cuh:

—Chihnde ama sahn cuihca, ne ama nduyo ne, ama chi chendata yahn se.

¹⁷ Tuhme ndedecadino se: “Man ne, taca dín?, te ametah ti nan che cuih ndáh ndute ndata yáhn.

¹⁸ Tuhca dín. Ntihné nducuahn vahyaca yáhn, ne cahno che tahque rahte. Min cuih ndáh nducuahn ndute ndata yáhn.

¹⁹ Ama va vedecuihca yáhn cava ndeh nduyo. Man ne, cuhnde táhn, chéñ man, cúh man, co yenó man.”

²⁰ Ate rahn Dendiohs ri ye sahn: “Hua renehn. Man yan cuh, va che coh. Ama nedin dame vedecuihca, ate man ne, nde hua devene duh che ndah yahn.”

²¹ Quendi Dihvo vo, ne rahn ye:

—Tihchan ihyan che reneñin dama ye vedecuihca cava man ye, ate nan Dendiohs ne, ametah dehva yahn ye.

Dendiohs ne, redin ye cudado ihyan yahn ye

²² Rahn Dihvo vo nduco ihyan apóstol yahn ye:

—Chemin che ráhn rí nchuhn. Hua cuahcoran ne taça din ne che ndaça cheh ne, nde hua cuahcoran ne çaça tino yahn ne.

²³ Vedevihche yahn nchuhn ne, tahque quenun yan che co che reh ne, ne man nchuhn ne, tahque chenun yan ne che co tino che rahtenun ne.

²⁴ Condihche nchuhn chihnda. Nde hua rino te ndaça, nde metah nan che cuih ndah te deh che cheh te, ate Dendiohs ne, rihquecheh ye ite. ¡Tahque rigonun chihve nchuhn che co yahda!

²⁵ ¿Duh nchuhn che andahre ama rendedecadino ne, co tihdenan ne man metro che yaco ne?

²⁶ Ndete che hua ri redin nchuhn cha che hua vahche, ¿dehco che ama rendedecadino ne yahn dehtenduh chenahn?

²⁷ Condihche nchuhn taça rihta nanda. Nde hua rendahton, nde hua rah cuche, ate ráhn rí nchuhn te tahque ndahchan ro nanda che co tino che quenun Salomón, andahre ama chahte vederihquentiyon quenun cuma ye.

²⁸ Dendiohs ne, redin ye che riya nanda viyata andahre ama ro rihnde, ne tama ro ne, rih di. ¿A ndiyu tahque redin ye cudado nchuhn? ¿Dehco che ama doh ritahno ne tuhme?

²⁹ Chemin che hua cah rih man ne nchuhn che rendedecadino ne deh cheh ne man, deh cuh ne man.

³⁰ Ihyan iyehne ne, ama rendedecadino ye yahn nducuahn dehtenduh che tuhchan. Ate nchuhn ne, va Chida ne vahchetero, ne a devano ye che rendotenan ne nducuahn dehtenduh che tuhchan.

³¹ Dinoca cuahnecun nchuhn che cahcantiyon Dendiohs nchuhn. Tuhme nducuahn dehtenduh che tuhchan ne, nde tihdenan ca ye te ye nchuhn.

³² Nchuhn che doh ri ne, che rinduco ne u, huate vah ne, te Chida ne ne, nahn cahcantiyon ye nchuhn.

³³ Condihcue nchuhn dehtenduh che va yahn ne, ne codin ne vede vahino nduco. Codin nchuhn che ndah çaça che ndeva ne che ndah vahchetero. Chemin ne, nduhca ama vedecuihca che hua co cahnevi sahn duco man, hua co detoh iteduh man.

³⁴ Tihca, te cha vedecuihca che va yahn nchuhn ne, a yahn chemin che rendedecadino ne.

Nahn che cuahteyan ihyan

³⁵⁻³⁶ 'Cuahn che rahh ama ihyan vihco nan che rihnevaço ihyan ne, rahtenun sahn decahya yahn ye cudado vah. Vateyan se çaça che ndetahno che nta dihve se yahve ye ne, aderano se nahne se chende vah.

³⁷ Ndah ro yahn sahn decahya che vateyan se ura che nta dihve se. Cuaco ráhn rí nchuhn te man ye cuahcondihte ye mesa, ne cahco ye sahn che cheh se.

³⁸ Andahre nan man yan, o a nino co dave nta ye, ndete che ntaça ye sahn che vateyan se ne, ndah ro yahn se.

³⁹ Cuedevano nchuhn te ndete che devano ama ihyan deh ura nda sahn duco ne, cuhndeyan ye, ne hua cah yune ye che conda se chete vaco ye, duco se.

⁴⁰ Nchuhn ne, tihca cuahteyan ne, te u che rinduco nducoyaca ihyan ne, adenan nda ura che nde tah hua vate ne cudado.

Ejemplo yahn mozo

⁴¹ Tuhme tumerune Pedro:

—Dihvé, ¿a rente ne ejemplo cuh yahn deman nuhn, o yahn nducoyaca ihyan ne?

⁴² Ndahconan Dihvo vo:

—¿Cha sahn decahya che cahco dihve se ntiyon tah se cava che cahcantiyon se vaco ye man, cahcacheh se mozo yahn ye man? ¿A ndiyu sahn che redinahn se man, che rino nan se man?

⁴³ Ndah ro yahn sahn che nta ca dihve se sahn che redinahn se ntiyon yahn ye.

⁴⁴ Cuaco rahn ri nchuhn te cahco dihve sahn min ntiyon tah se cava che din se cudado nducuahn ntiyon yahn ye.

⁴⁵ Ate ndete che rahco ama cha sahn decahya te hua nun nta dihve se, ne cuanan redin tan se, rahn se sahn mozo yahn ye man, tahn mozo yahn ye man, reh se man, rih se man, ricoh se man ne,

⁴⁶ nta dihve se ro che hua quenán rino se, ura che hua devano se, ne din ye castigo sahn nduhca che redin ihyan castigo sahn che hua redinahn se.

⁴⁷ Sahn decahya che a devano se dehtenduh che nahn dihve se, ne hua dinahn se ne, ama chahte castigo co se.

⁴⁸ Ate sahn decahya che hua devano se, ne din se dehtenduh che hua ndahca ne, hua nduh chahte castigo co se. Adecoduhno ihyan che chahte ntiyon conda tah ye ne, ndahva ndehde dame ye, ne ihyan che nde tahque chahte ntiyon conda tah ye ne, nde tahque ndeh ca ndehde dame ye.

Rahn Dihvo vo Jesucristo te va che cuahte canda ihyan

⁴⁹ Cava u ne, cuahte canda ihyan van man ye nduco vih anduhneca ndete che a chih yahn muhn iyehñse cuh, ne jama nahn ndete a riche!

⁵⁰ U ne, va che ama chuhrihn, ne jama yah nahn ndete che a conahn!

⁵¹ ¿A rahco nchuhn che nda muhn iyehñse cuh cava che ndahca cuahtenan ihyan nduco vih? Rahn ri nchuhn te hua, te nda cava che cuahte canda ye nduco vih.

⁵² Cuanan nde meniyan, ndete che uhn ihyan chenun ye ama vah ne, ino ye co tan ye nduco o ye.

⁵³ Ihyan chahn ne, co tan ye nduco sahn daya ye, ne sahn daya ye ne, co tan se nduco chida se. Ihyan ndahta ne, co tan ye nduco tahn daya ye, ne tahn daya ye ne, co tan te nduco chaco te. Namin co tan ihyan ndahta nduco tahn decuno ye, ne tahn decuno ye ne, co tan te nduco indahn te.

Ri ro cuahn che rendacorun tiempo

⁵⁴ Quendi Dihvo vo, ne rahn ye nduco nducoyaca ihyan:

—Cuahn che rendihchero nchuhn che renecan man cuahn nan che rehche yahn ne, ndetahno rahn ne te cuan co, ne tihca ri.

⁵⁵ Namin cuahn che rano yuhneyahn ne, rahn nchuhn te cuhnde ihno, ne tihca ri.

⁵⁶ ¡O nan o chende nchuhn! Devano nchuhn cuahn che co ihno man, cuahn che cuan co man. ¿Dehco che hua devano ne deh ri ro cuh che vate ne?

⁵⁷ ¿Dehco che hua rendedecadino man nchuhn cha che tahque ndah din ne nan Dendiohs?

⁵⁸ Numanahn che chahn ama cha nchuhn nan intiyahn nduco sahn che tan se nduco ne ne, codin nun ino ne, cuenedin ndah ne ndudo nduco se cuahn yune, cava che hua quenda se ndih nan juez, ne necah ye ndih tah policia cava che tihyon se ndih vacoyahn.

⁵⁹ Rahn ri ndih te ndete che hua nedin ndah ne ndudo nduco se ne, hua ndiquenda ne vacoyahn nde cuihno nedihve ne nducuahn che quendihco ne.

¹ Ura min ne, min chenan neve ihyan, ne neçah cuande ye Dihvo vo nduhça che chahno sahn ešado yahn Galilea chi, che chihquentiyon Pilato sandado che chihno se sahn, ura che rihno se ite che co te vedino nan ta.

² Tumerune Dihvo vo ihyan chahn:

—Ça raçho nchuhn che sahn Galilea chahn che tihça chih se, tahque chendihco se nunde van nducoyaça ihyan Galilea?

³ Rahn ri nchuhn te hua. Ndete che hua nto ino nchuhn nunde yahn ne ne, va che conda nducoyaça ne.

⁴ Namin, ça raçho nchuhn che ihyan che ntiyon ino chahn che chendañ ndudo torre yahn Siloé, tahque chendihco ye nunde van nducoyaça ihyan van Jerusalén?

⁵ Rahn ri nchuhn te hua. Ndete che hua nto ino nchuhn nunde yahn ne ne, conda nducoyaça ne.

Ejemplo yahn yahn higo che hua ri yahn

⁶ Namin nte Dihvo vo ejemplo cuh:

—Ama ihyan ne, ndihche ye ama yahn higo van yahn ndata yahn ye, ne ama yune ne, chahn ye chinuhn ye ndute yahn, ne hua ndaça ye, te hua ri yahn.

⁷ Tuhme rahn ye ri ye sahn che redin cudado yahn ndata chahn: “A ino nduyo che renda rinuhn ndute yahn yahn tih, ne hua dehva rendaçá. Cuihque, te çdehco che ndere rehnevi fuerza yahn yahn nan che nti?”

⁸ Ate sahn che redin cudado min ne, rahn se: “Dihvé, cuahneçun ne che cuandi ca yahn tih çama nduyo, ne ndaço cavá yahn yahn, ne cuahto yahn ndah duto.

⁹ A huane co ndute yahn. Ate ndete che a hua co yahn ne, tuhme çahçá nduhça che rahn ne.”

Din Dihvo vo Jesucristo che ndoyahn ama ndahta che ruhte dame te

¹⁰ Ama ro che rahte tuhno ihyan ne, quenun Dihvo vo chete ama yaço, ricuañ ye.

¹¹ Min quenun ama ndahta che a ri ntiyon ino nduyo che hua ri che ndo çaço te. Ruhte dame te, nedin ama vaco chihnga.

¹² Cuahn che ndihchero Dihvo vo tañ ne, çah ye tañ, ne rahn ye:

—Ndahta, a ndevahn di. Ametah chuhrihn.

¹³ Tuhme nahn tañ ye tañ, ne ndetaño ndo çaço te, ne canañ te rendeva te yavenañ Dendiohs.

¹⁴ Ate sahn ndinañ yahn yaço me ne, chi tañ se nduco Dihvo vo yahn che din ye che ndo çaço tañ min ro che rahte tuhno ihyan. Rahn se nduco ihyan che chenun ye min:

—Va an ro che din vo ntiyon. Adecodhno ro chemin çan co chi nchuhn çava che din ye che ndoyahn ne, ate ndiyu ro che rahte tuhno vo.

¹⁵ Tuhme ndahconan Dihvo vo yahn se:

—Di ne, jo nan o chende! Ndeté che çenan chiche itenine, o burro yehn chete vaço te, ça hua ntahte ite ro che rahte tuhno ihyan çava che çahn te cuh te nune?

¹⁶ Ndahta cuh ne, ndata yahn Abraham tañ nduhça di, ne a ntiyon ino nduyo redin chundah che rechuhrihn te. Ça hua redin yahn che ndedevahn tañ andahre ro che rahte tuhno ihyan?

¹⁷ Cuahn che tihça rahn Dihvo vo ne, ama chi cuihnañ nducoyaça sahn che hua ri rendihche se ihyan. Ate nducoyaça ihyan van ne, ama yeno ye yahn vederihno rahte che redin Dihvo vo.

Ejemplo yahn ndute yahn mostaza

18 Tuhme rahn Dihvo vo:

—¿Deh nduhca vederihquentiyon yahn Dendiohs? ¿Deh nduhca, cahma che tihca vederihquentiyon yahn ye?

19 Chemin ne, nduhca ndute yahn mostaza che chino ama se nan yahn yahn se. Quendañ ndute me, ne chihta. Chi chahte nde yahda redin ndahque te van dune.

Ejemplo yahn ya yahn pan

20 Namin rahn Dihvo vo:

—¿Deh nduhca, cahma che tihca vederihquentiyon yahn Dendiohs?

21 Chemin ne, nduhca ya yahn pan che ndahchetahn ama ndahta van ndeh yune pan, din che chihta nducuah.

Ejemplo yahn chendevah che tuhco

22 Quendi Dihvo vo cuahn ye yan Jerusalén, ne rechuh ye yan cahya man, yan rahte man, ricuah.

23 Ama se ne, tumerune se ihyan:

—Dihvé, ¿a yahn ihyan che ndevahn ye ne?

Ndahconan ye:

24 —Nduhca che redin nun ino ihyan che conda ye chendevah che tuhco ne, tihca codin nun ino nchuhn che ndevahn ne. Ate rahn ri nchuhn te ama yahn ihyan nahn ndevahn ye, ne hua co.

25 Cuihno che necuan ama ihyan, necahde ye chendevah vaco ye ne, ndete che ura min nda nchuhn yahve ne: “Dihve nuhn, conahne ne chendevah” ne, ihyan min ne, ndahconan ye yahn ne: “Hua rendihché nchuhn, nde hua devanó ti cochi ne.”

26 Tuhme andahre cahma ne: “Dama cheh dama chih nuhn nduco ne, ne ndih che chicuah ne ndihve yahn yan vaco nuhn”,

27 ate ihyan min ne, ndahconan ye yahn ne: “A rahn ri nchuhn te hua rendihché nchuhn, nde hua devanó ti cochi ne. Nchuhn ne, chihnga ihyan ne. Cuavi ne tan, cuahn ne vane, nde hua nahn ndihcheró nchuhn.”

28 Tuhme che cuaco, cuaco nchuhn man, cheh dihyon ne man, te ndihchero ne Abraham man, Isaac man, Jacobo man, nducoyaca ihyan profeta man, che ndi dama ye nan che rihquentiyon Dendiohs, ate nchuhn ne, cuahn chevah vatendi ne.

29 Namin ndo dama ihyan, caqa ye numachahte iyehense, ne cuahte ye, cheh ndah ye nan che rihquentiyon Dendiohs.

30 Tuhme ne, nahn ihyan che ndahnan ye man ro cuh ne, cuahtenan ive ye, ne nahn ye che chenani ive ye man ne, quendañnan ye.

Rahn sahn fariseo te Herodes nahn cahno se Dihvo vo Jesucristo

31 Ura min ne, nda neve sahn fariseo, ne rahn se ri se Dihvo vo:

—Condaqa ne muhn conahn ne, te nahn cahno Herodes ndih.

32 Ndahconan ye yahn sahn chahn:

—Cuahn nchuhn, ne cahma ne co ne yuhne min: “Condihche, u ne, rendetendáh vaco chihnga, ne redin che rendoyahn ihyan cah man ro cuh man, caviyan man, deman man. Tuhme cuihno din nityon cuh yahn.”

33 Ate va che quendi yune yahn man ro cuh man, caviyan man, deman man, te yan Jerusalén ne, a min va ndi che rihno se nducoyaca ihyan profeta.

Dihvo vo Jesucristo ne, chaco ye caqa ihyan yan Jerusalén

34 Nchuhn ihyan yan Jerusalén, che rihno ne ihyan profeta man, recah ne tu ihyan che redechuh Dendiohs man, jama ndeh yune ndá, te nahn nedin

dámá nchuhn nduhçá che rene din dáma chaco tuh ðaya te man reche te, ate hua cahne cun ne!

³⁵ Condiheche nchuhn, te yáco yahn ne ne, cuhnde man, ne ráhn rí nchuhn te ametah ndaconan ndihchero ne u nde ndá ro che çahma ne yáhn: “Ndeva vo yavenan ihyan cuh che cochi ye menun Dihvo vo Dendiohs.”

14

Din Dihvo vo Jesucristo che ndoyahn ama sahn che ndi se cah ntito

¹ Ama ro che rahte tuhno ihyan ne, chahn Dihvo vo, cheh ye ndevaco ama sahn ndinan yahn sahn fariseo. Combiero yahn se ne, rihno se Dihvo vo, nah ndihchero se deh din ye.

² Min quenun ama sahn che ndi se cah ntito, ne chahn ndá se nan Dihvo vo.

³ Tumerune Dihvo vo sahn fariseo chahn man, sahn devano ley che dirun Moisés man:

—¿A nihnde çade che co din vo che ndoyahn ihyan cah ro che rahte tuhno ihyan ne?

⁴ Ate hua ndahconan sahn chahn. Tuhme chetah ye tah sahn ntito me, din ye che ndoyahn se, ne ndedechuh ye sahn.

⁵ Chihno min ne, ráhn ye nduco sahn chahn:

—Ndete che condahnun ama burro, o ama itenine yahn nchuhn chete veh ico ne, ¿a hua ndetendah nchuhn ite andahre ro che rahte tuhno ihyan?

⁶ Ate hua chi ndahconan sahn chahn nde ama ndudo.

Ejemplo yahn ihyan che rahn ye nan rihnevaco ihyan

⁷ Cuahn che ndihche Dihvo vo nduhçá che retendahnun sahn chahn nan che cuahte se ne, nte ye ejemplo cuh:

⁸ —Ro che yahve ihyan ama cha nchuhn che çahn ne nan vihco che rihnevaco ye ne, hua cuhnde ne nan silla menan, te denan ndiyahve ye ama ihyan che tahque redin yahn che cuhnde ye min.

⁹ Ndete che tihça ne, ura che a va ne ne, çahma ihyan che vaco me co ye ndih: “Cuavi ne tan, cuhnde amigo yáhn.” Tuhme cora vedecuihno yahn ne, ne necuan ne çahn ne cuhnde ne nan che rahte ihyan che dendah ye.

¹⁰ Cuahn che yahve ihyan ndih ne, tahque ndah cuahn ne, cuihnde ne nan silla che rahte ihyan che dendah, ne cuahn che ndá ihyan che vaco ne, çahma ye nduco ne: “Amigo, cuihnde nan silla menan.” Tihça quendah yavenan ne nan ihyan che vate ye min.

¹¹ Tihça, te ihyan che rendeva man ye yavenan ye ne, nuhnde ndiya ye, ne ihyan che necun ye ne, conan ye.

¹² Namin ráhn Dihvo vo nduco sahn fariseo che vaco me:

—Cuahn che yahve ihyan çava che cah, cheh ye ne, hua yahve amigo yehn man, dihne man, ihyan yehn man, ihyan cuihça che vate ye nino ndevaque man, te ihyan chahn ne, co ndahco menun ye yehn.

¹³ Cuahn che cah, cheh ihyan ne, tahque ndah coyahve ihyan che vah man, ihyan che ndi cheche ye man, ihyan che cueh çah ye man, ihyan che ve nan ye man.

¹⁴ Ndete che tihça din ne, ndah ro yehn, te ihyan chahn ne, hua co ndahco menun ye yehn. Ate cuahn che ndedetuhche Dendiohs tenahn che ndah ihyan ye nan ye ne, ro min ndahco menun Dendiohs yehn.

Ejemplo yahn che cheh vino ihyan

¹⁵ Chihnevan ama sahn che nduco se va se reh se, ne ráhn se ri se Dihvo vo:

—Ndah ro yahn ihyan che cuahte ye cheh ye nan che rihquentiyon Dendiohs.

¹⁶ Tuhme nte Dihvo vo ejemplo cuh:

—Ama ihyan ne, yahve ye ama yahn se che cahñ se cheh vino se ndevaco ye.

¹⁷ Ura che a quendihte mesa ne, dechuh ye sahn decahya yahn ye che cahma se nduco sahn chahn: “Cahn nchuhn, te a va yan nducuahñ.”

¹⁸ Ate nducoyaca se ne, canan chica se che din chahtino ye yahn se. Ama se ne, rahñ se: “Cade ca ama ndi yahn, ne va che cahñ ndihcheró. Cahme co ihyan, ne din chahtino ye yahn.”

¹⁹ Tama se ne, rahñ se: “Ca uhn yanda itenine ruhnyahn, ne va che cahñ ndihchenán ite nan ntiyon. Cahme co ihyan, ne din chahtino ye yahn.”

²⁰ Tama se ne, rahñ se: “Cade chihnevaco, ne chemin che cahme co ihyan te hua co cahñ.”

²¹ Ndaconan sahn decahya me, ne neco se dihve se nduhca che rahñ sahn chahn. Chi tan dihve se, ne rahñ ye ri ye sahn decahya me: “Cuehn tenun tenun no cuahn ndihve man, cuahn yune man, ne ihyan chevah man, ihyan che ndi cheche ye man, ihyan che cueh cah ye man, ihyan che ve nan ye man, quenda ihyan muhn ndevaco.”

²² Cuahn che ndaconan sahn decahya me ne, rahñ se: “Dihvé, a dináhn che rahñ ne, ate va ca nan che cuahte ihyan.”

²³ Rahñ dihve se ri ye sahn: “Cuehn cuahn yune man, tinduh cuahn chihto man, ne codin fuerza ihyan che chi ye cava che cuto ihyan vacó.

²⁴ Rahn te nde ama sahn che yahvé menan ne, hua cheh vino se che ndihcoyan.”

Ihyan che nahn conduco ye Dihvo vo Jesucristo ne, va che chuhrihn ye

²⁵ Ama yahn ihyan cuahn ye nduco Dihvo vo. Chaconan ye, ne rahñ ye ri ye ihyan chahn:

²⁶ —Adecoduhno ihyan che nahn conduco ye u ne, va che cahcoman ye chida ye man, chaco ye man, ndahta yahn ye man, daya ye man, dihno ye man, cahve ye man, vida yahn man ye man, cava che co conduco ye u.

²⁷ Ihyan che hua nahn chuhrihn ye cava u ne, hua co conduco ye u.

²⁸ Adecoduhno nchuhn che cahno ne ama vah, ¿a hua dinoca retendah cuande ne tava nahn cava che tuno vah me?

²⁹ Ndete che cahco ne name yahn vah me, ate hua cocha ne tuno ne, nducoyaca ihyan che ndihche ye ne, cahyon nan ye,

³⁰ ne cahma ye: “Sahn tih ne, canan rihno se ama vah, ne hua chicha se tuno.”

³¹ Namin ama rey che va che cahñ ye cuhma ye nduco tama rey, ¿a hua dinoca rihnde ye, rendedecadino ye ndete che nduco ndiche mil sandado yahn ye cocha ye cuhma ye nduco tama rey che cochi ye nduco ndico mil sandado?

³² Me ndete che rihñ che hua cocha ye ne, cuahn che yahn ca cochi rey che cuhma nduco ye ne, dechuh ye sahn che cahñ se menun ye, cahma se nduco rey min cava che cuhnde dihn ye, ne hua cuhma ye nduco viñ.

³³ Tihca, te adecoduhno nchuhn che hua cahcoman ne nducuahñ yahn ne che va ne, hua co conduco ne u.

Ejemplo yahn ima

³⁴ Ima ne, ndah. Ate ndete che cuhno dine yahn ne, ¿dehra nduco ndo dine?

³⁵ Va che cora, te hua cochihve, nde cava che cotave ndiyahn, nde cava che cuahto duto chendata. Nducoyaca nchuhn, ¡cuendecadino ndah ne deh conahn ejemplo cuh!

15

Ejemplo yahn itecuche che chinda te

¹ Rahn nducoyaca sahn rica tumecadiyo man, sahn nunde chenahn man, nan Dihvo vo che nahn cahnevan se ndudo yahn ye.

² Yahn chemin che ri yudo yahn sahn fariseo man, sahn devano ley che dirun Moisés man, ne rahn se yahn Dihvo vo:

—Sahn tih ne, rinduco se sahn nunde, ne reh se dama nduco se.

³ Tuhme nte Dihvo vo ejemplo cuh nduco sahn chahn:

⁴ —Ndete che ama cha nchuhn va ama ciento itecuche yahn ne, me ndete che conda ama te ne, za hua cahcoman ne ite che cun raco ntihton cun chahn viyata, ne cahñ ne, quenuhn ne ite che chinda me, nde nan che ntaca ne ite?

⁵ Cuahn che a ntaca ne ite ne, numacuahn vedeyeno tihde dihme ne ite, ndiquenda ne ite.

⁶ Cuahn che nta ne ne, nedin dama ne ihyan nino ndevaco ne man, ihyan rendihche ne man, ne cahma ne nduco ye: “Cuahte yeno vo nduco nchuhn, te itecuche yahn che chinda te ne, a ntaca ite.”

⁷ Rahn ri nchuhn te tihca tahque cuhnde vedeyeno vahchetero cava ama ihyan nunde che nto ino ye nunde yahn ye che co cava cun raco ntihton cun ihyan che rahco ye che nde hua nahn che nto ino ye.

Ejemplo yahn tume che chinda

⁸ Ndete che ama ndahta che va ndiche tume diyahngua yahn te, ne conda ama ne, za hua nahn yahn te candil, ndache te vah, nuhn te tume me nde nan che ntaca te?

⁹ Cuahn che ntaca te ne, nedin dama te ihyan nino ndevaco te nduco ihyan rendihche te, ne cahma te co te ihyan: “Cuahte yeno vo nduco nchuhn, te a ntaca tume yahn che chinda.”

¹⁰ Rahn ri nchuhn te tihca co yeno angel yahn Dendiohs cava ama ihyan nunde che nto ino ye nunde yahn ye.

Ejemplo yahn sahn yuno che ndere quechica se

¹¹ Quendi Dihvo vo, ne nte ye tama ejemplo:

—Ama ndaco ne, chahte o daya ye.

¹² Sahn che ive me ne, rahn se ri se chida se: “Chida, te ne vedecuihca che va che cahco ne yahn.” Tuhme cahmahñ chida se vedecuihca yahn ye, ne cah ye sahn.

¹³ Chihno neve ro ne, chihcoyan se dehtenduh yahn se, ne cuahn se nan yahn yahn. Min chihno toh se tume yahn se, ndere quechica se.

¹⁴ Cuahn che a chihno toh se tume yahn se ne, ama chihnde cuico yahn nan che quenán se, ne canan ama yah chahno se.

¹⁵ Chica se ntiyon din se ama ihyan che yan vaco ye min, ne dechuh ye sahn, din se cudado cuche yahn ye.

¹⁶ Nde dehtenduh dima che reh cuche chahn ama nahn cheh se, ate nde dehtenduh chemin chan, hua rendaca reh se.

¹⁷ Tuhme necahco se, ne ndecadino se: “Ama yahn ihyan redin ntiyon chenan ye vaco chida, ne ama va che reh ye. Me u ne, muhn quenán, adeche coh cuico.”

¹⁸ Tahque ndah che nahn yahn chidá, ne cahmá có ihyan: Chidá, quendi-hcó nunde, nde nan Dendiohs, nde nan ne.

¹⁹ Ametah redin yahn che cahma ne daya ne yáhn. Man ne, có nduhca ama mozo yahn ne.”

²⁰ Tuhme ndonun yune se, conahn se yahn chida se.

Yahn ca va che ntá se, ne ndihchero chida se sahn. Quenan vahino ye sahn, ne chahn ye rano ye, chahtemahn ye sahn, tenan ye sahn.

²¹ Rahn se ri se ihyan: “Chidá, quendi-hcó nunde, nde nan Dendiohs, nde nan ne. Ametah redin yahn che cahma ne daya ne yáhn.”

²² Ate chida se ne, rahn ye ri ye sahn decahya yahn ye: “Tenun tenun no cuetendah nchuhn tino che tahque ndah, conun se man, chinetah che conun tah se man, ndaço che conun cah se man.

²³ Cuahn nchuhn, ngua ne ama itenine che vihche te, ne cuihno ne ite. Chuh vo ite, ne din vo vihco,

²⁴ te sahn dayá cuh ne, a ndih se che rahcó, ate man ne, ndaconan se. A dendá sahn, ate man ne, a ntacá sahn.” Tuhme canan ihyan chahn vihco vedeyeno.

²⁵ Sahn daya ye che menan me ne, quenan se viyata, ne cuahn che nta nino se ndevah ne, chihnevan se che refive ihyan man, rendeh ye man.

²⁶ Tuhme cah se ama sahn decahya yahn chida se, ne tumerune se sahn deh che ri min.

²⁷ Ndahconan se: “A nta sahn dihno ne, ne hua dehva chahno se chi. Chemin che chihquentiyon chida ne che coh ama itenine che vihche te.”

²⁸ Chi tan sahn che menan me, nde hua nahn ndonda se vah. Tuhme quendah chida se, chica ye favor sahn che ndonda se vah.

²⁹ Ate ndahconan se yahn ye: “U ne, cuahn dama redin ntiyon nduco ne, ne hua rahcotahn yahn ne. Nde ama yune hua te ne amare ama chivato lihn cava che cheh yenó nduco amigo yáhn.

³⁰ Ate cuahn che ndaconan sahn daya ne tih che ndere toh se tume yahn ne nduco ndahta che ndere vatechica te ne, chihquentiyon ne che chih ama itenine vihche cava se.”

³¹ Tuhme ndahconan chida se: “Dayá, di ne, cuahn dama quenen nducó, ne nducuahn dehtenduh yáhn ne, a yehn.

³² Ate ndahca che cah yeno vo chedave yuhn vo, din vo ama vihco vedeyeno, te sahn dihne ne, a ndih se che rahcó, ate man ne, nta se. A denda vo sahn, ate man ne, ntaca vo sahn.”

16

Ejemplo yahn ama sahn duhtuno ihyan che va tah se ama ntiyon

¹ Namin nte Dihvo vo ejemplo cuh nduco ihyan apóstol yahn ye:

—Chihnde ama ihyan cuihca che quenan ama sahn che redin se cudado ntiyon yahn ye, ne chahn ihyan nuhnde ye sahn nan ye che ndere retah se dehtenduh yahn ye.

² Tuhme cah ye sahn, ne rahn ye ri ye sahn: “¿Deh chu che renuhnde ihyan di nan? Cuente cuende u yahn ntiyon che quenen, te cahnevi ntiyon che va tah.”

³ Tuhme ndedecadino se: “¿Taca din man?, te dihvé ne, cahnevi ye ntiyon che va tah. Hua co din ntiyon dito, ne ndete che ndere cacá chéh ne, cuihnán.

⁴ A nta tin taca din cava che nevahnecon ihyan u vaco ye cuahn che a cahnevi dihvé ntiyon che va tah.”

⁵ Tuhme cah se queri ama ihyan che chendihco ye yahn dihve se. Tumerune se ama ye: “¿Tava quendihque yahn dihvé ne?”

⁶ Ndahconan ihyan min yahn se: “Ama ciento barril aceite quendihco yahn ye.” Rahn se ri se ihyan: “Ti va niyon che quenar caça. Cuihnde, ne menchahte no cuahconejn caque o raco ndiche.”

⁷ Chihno min ne, tumerune se tama ye: “Di, ¿tava quendihque yahn dihvé ne?” Ndahconan ye yahn se: “Quendihco ama ciento caçe trigo yahn ye.” Tuhme rahn se ri se ihyan: “Nga caça yehn. Cuahconejn cun raco.”

⁸ Cuahn che checadino dihve ntiyon me ne, ndeva ye yavenan sahn min che ndere retah se dehtenduh yahn ye, yahn che ama vivo se.

Tuhme rahn Dihvo vo:

—Man ro cuh ne, ihyan nunde ne, tahque vivo ye che co ihyan che riquendi ye vederihquentiyon Dendiohs.

⁹ ‘Chemin che rahn ri nchuhn: Cotoh ne vedecuihca andahre chihnga, ne nduco chemin ndaca amigo yahn ne, caça che nda ro che coh ne ne, co cuahtenan ne vahchetero.

¹⁰ ‘Ihyan che hua reduco ye van tah sihn che redin ye cudado ne, namin hua reduco ye andahre che ndeh, ne ihyan che reduco ye van tah sihn che redin ye cudado ne, namin reduco ye ndete che ndeh.

¹¹ Ndete che hua toh nchuhn vedecuihca che va tah ne caça che din ne che ndah ne, ¿duhra te ntiyon yahn Dendiohs, din ne?

¹² Ndete che hua redin nchuhn cudado dehtenduh yahn ihyan che rihco ye tah ne ne, ¿duhra te dehtenduh che co yahn man ne?

¹³ Nde ama ihyan hua co conan cuma ye o dihve ye, te tahque din yahino ye ama che co tama, ne quendi ye nduco ama, ne cahcoman ye tama. Hua co din yahino nchuhn Dendiohs ndete che yahino ne vedecuihca.

¹⁴ Rihnevan sahn fariseo che chenun se min che tihca rente Dihvo vo, ne riyon nan se ihyan, te yahino se vedecuihca.

¹⁵ Tuhme rahn ye ri ye sahn:

—Nchuhn ne, redin ca ne che ndah ihyan ne nan ihyan. Ate Dendiohs ne, a devano ye duh ihyan nchuhn. Va deh che ama richihve che rahco ihyan, ate nan Dendiohs ne, hua richihve.

¹⁶ ‘Ley che dirun Moisés nduco ndudo che dirun ihyan profeta ne, chihnde nde nda ro che nda Juan Bautista. Nde tahn min ne, rahndudo ihyan yahn vederihquentiyon yahn Dendiohs, ne ama yahn ihyan redin nun ino ye che nahn dinahn ye.

¹⁷ Tahque nun nto iyehanse che co che cuavi ama chenelihn nan vederihquentiyon yahn Dendiohs.

¹⁸ ‘Adecoduhno ihyan che tehche ye ndahta yahn ye, ne cahnevaco ye nduco tama te ne, din duche yahn ye che nihnevaco ye. Namin ihyan che cahnevaco ye nduco ama tahn che ntehche inchahn te tahn ne, din duche yahn ye che nihnevaco te.

Ejemplo yahn ama sahn cuihca nduco Lázaro

¹⁹ Namin nte Dihvo vo ejemplo cuh:

—Chihnde ama sahn cuihca che renun se deman cuahno tino ndah, ne ama va deman cuahno che ndah reh se ro ro.

²⁰ Tahn min ne, namin chihnde ama ihyan chevah che duche ye Lázaro, ne ama ndechendih yute ihyan. Quendite ye chendevah yahn sahn cuihca me,

²¹ ne ama nahn cheh ye andahre dache che ra man mesa yahn se. Nde yahna renda te, riyavenan te nan yah yahn ye.

22 Cuahn che ndā ro che chih ihyān chevāh me ne, quenda ángel ihyān vahchetero, ne min quenān Abraham. Adivē ne, chih sahn cuihca me, ne chihche ihyān sahn.

23 Cuahn che rechuhrihn se vān ruchiyāhn ne, chenihyon nān se, ne āma yāhn ndihchero se Abraham. Namin ndihchero se Lázaro che quenān ye min.

24 Tuhme cah se: “Chidá Abraham, conān vahino ne u. Cuedechuh ne Lázaro, decāhnda ye tin ndutetāh ye vān nune, cāva che ndedevān ye chihyá, te āma rechuhrihn muhn vān ruchiyāhn.”

25 Ndahconān Abraham yāhn se: “Dayá, cuenecāhque te āma ndāhca chehne cuahn che quenēn iyehne, ate Lázaro ne, āma yah chahno ye. Mān ne, āma ndāhca quenān ye muhn, ate di ne, rechuhrihn tān nān che quenēn.

26 Avāne ne, a nihnde cāde che ihyān che chenān ye muhn, andahre nāhn cāhn ye tān, ate hua co chuh ye. Namin ihyān che chenun ye tān ne, hua co chuh ye, chí ye muhn.”

27 Tuhme rāhn sahn cuihca me: “Chidá Abraham, ricá ndih, codin ne favor, cuedechuh ne Lázaro che cāhn ye vāco chidá,

28 co ye uhn sahn dihnó che vate se min, cāva che hua chí se muhn nān che rechuhrihn ihyān nunde.”

29 Rāhn Abraham ri ye sahn: “Min va ley che dirun Moisés mān, ndudo che dirun ihyān profeta mān, rahndudo ihyān. A ndudo min va che dināhn se.”

30 Tuhme rāhn sahn cuihca me: “Chidá Abraham, hua retumacāh se yāhn chemin. Ate ndete che ntuche āma ihyān che a ndih ye, cāhn ye, yāhve ye sahn ne, tuhme che cuāco, nto ino se nunde yāhn se.”

31 Ate rāhn Abraham ri ye sahn cuihca me: “Ndete che hua ritāhno se yāhn che dirun Moisés nduco che dirun ihyān profeta ne, namin hua cotāhno se, andahre che ntuche āma ihyān che a ndih ye, cāhn ye, yāhve ye sahn.”

17

Riyāhve Dihvo vo Jesucristo ihyān cāva che hua cuahtendihco ye nunde

1 Rāhn Dihvo vo ri ye ihyān apóstol yāhn ye:

—A cāde no che va dehtenduh che din che cuahtendihco ihyān nunde, ate iyāh rí cāva adecoduhno ihyān che din ye che cuahtendihco ihyān chenāhn nunde!

2 Tahque ndāhca cāva ihyān min che dechiche ihyān āma tu yudo dāndo ye, ne cuacondāhnun ye ihyān vān nuniyāhn, che co che din ye che condihco āma cha ihyān chuhn che necun ye nunde.

3 Cuihco nchuhn cudādo.

’Cuahn che din tān āma ihyān nduco nchuhn ne, coyāhve ne ihyān nduco ndāh. Ndete che nto ino ye che tihca din ye ne, cuenchāhco ne yāhn ye.

4 Andahre ndache yune che āma ro din tān āma ihyān nduco nchuhn, ate ndete che namin ndache yune rendaconān ye, ne rāhn ye: “Yāh rí che tihca dín”, tuhme ne, cuenchāhco ne yāhn ye.

5 Ihyān apóstol ne, rāhn ye ri ye Dihvo vo:

—Cuenān ne nuhn cāva che cotāhno ndāh nuhn.

6 Tuhme rāhn Dihvo vo ri ye ihyān chāhn:

—Ndete che ritāhno nchuhn amare tah sihn, co cāhcantiyon ne yāhn tih: “Cuavi tān, cuehn, cuandi vān nuniyāhn”, ne dināhn yāhn ne.

Nduhca che va che din vo ntiyon nduco Dihvo vo Jesucristo

⁷ 'Ndete che va ama mozo yahn nchuhn che ruhn se yahn, o redin se cudado itenine, ura che ndaconan se che chahn se viyata, za ndetahno cahma ne co ne sahn tuhca?: "Cuechoh, cuihnde nan mesa, cheh."

⁸ ¿A ndiyu tahque ndah che cahcantiyon ne sahn tuhca?: "Cuedendah comida, cuihqueyan nan mesa, cuihque cudado nahmin che cheh vino. Cuihno cheh vino, tuhme cheh vine."

⁹ Cuihno din se nducuahn che chihquentiyon ne, za va che necah ne nundihve cuahn sahn ne? Hua.

¹⁰ Namin cuahn che a cuihno din nchuhn nducuahn che a va cade che din ne ne, tahque ndah che cahma ne co ne Dihve ne: "Nuhn ne, mozo nuhn. Nde hua nahn che nte ne nundihve cuahn nuhn, te atenan ntiyon che chihquentiyon ne ne, a chemin no che din nuhn."

Din Dihvo vo Jesucristo che ndoyahn ndiche sahn che ndi se cah che rechayute

¹¹ Cuahn che cuahn Dihvo vo yan Jerusalen ne, chuh ye nan che rivah estado yahn Galilea nduco naci6n yahn Samaria.

¹² Ura che a nda nino ye ama yan lihn ne, nda ndiche sahn che ndi se cah che rechayute.

¹³ Cah se:

—Dihve nuhn, Jes6s, jconan vahino ne nuhn!

¹⁴ Cuahn che ndihchero ye sahn chahn ne, rahn ye ri ye sahn:

—Cuahn nchuhn nan chidocuyan.

Dinahn sahn chahn, ne nahmin che cuahn se ne, ndoyahn nducoyaca se.

¹⁵ Tuhme ama se ne, cade ndihchero se che a ndoyahn se ne, ndaconan se, ne ama rendeva se yavenan Dendiohs.

¹⁶ Chehntihya se numacuahn vedeneacun nan Dihvo vo, ne necah se nundihve cuahn ihyan. Sahn min ne, sahn tama naci6n se. Samaria naci6n yahn se.

¹⁷ Tuhme tumerune Dihvo vo:

—¿A ndiyu ri ndiche sahn chahn che ndoyahn se? ¿Tiya sahn che nun chahn?

¹⁸ ¿A deman sahn tama naci6n cuh che ndaconan se, ndeva se yavenan Dendiohs?

¹⁹ Chihno min ne, rahn ye ri ye sahn:

—Dehve rahque. Cuenequen. Conahn, te nducote chitehne ne, a ndoyehn.

Nduhca che rihquentiyon Dendiohs

²⁰ Tumerune sahn fariseo Dihvo vo ticaahn cuanan vederihquentiyon yahn Dendiohs, ne ndahconan ye yahn se:

—Vederihquentiyon yahn Dendiohs ne, hua cuanan nduhca che chenano rino nchuhn.

²¹ Nde ama ihyan hua co ye nchuhn: "Muhn va", o "min va", te Dendiohs ne, a ndahco cade ye vederihquentiyon yahn ye van nchuhn.

²² Rahn Dihvo vo ri ye ihyan ap6stol yahn ye:

—U che rinduc6 nducoyaca ihyan ne, nda ro che ama nahn nchuhn che ndaconan, ate hua ndaca ndihchero ne u.

²³ Ndere cahma ihyan co ye nchuhn: "Nga ihyan che a va cade che chi ye, ndedevahn ye ihyan iyehense, quenun ye muhn", o "nga ye, quenun ye min." Hua tumecah nchuhn, nde hua cahne ne, ndihchero ne.

²⁴ Chemin che ri nchuhn te nduhca che rendihchero ihyan che riya cuah, ri ro dave numachahte ne, tuhca ndihchero ihyan u che rinduc6 nducoyaca ihyan, ro che nda.

²⁵ Ate dinoca va che ama chuhrihn, te ihyan che vate ye man ro cuh ne, hua co ndihche ye u.

²⁶ Nduhca che chahno ihyan chi ro che quenan Noé iyehense ne, tihca cuahno ihyan co ro che u che rinducó nducoyaca ihyan, ndá.

²⁷ Ihyan che vate ye ro min ne, reh ye man, rih ye man, rihnevaco ye man, redecahnovaco ye man, nde nda ro che chenda Noé chete arca, ne chan conahn, chito nune iyehense, chihno chih ihyan chahn.

²⁸ Atihnocá chi cuahn che quenan Lot iyehense. Ihyan che vate ye ro min ne, reh ye man, rih ye man, ra ye man, rendihcue ye man, rino ye ndata man, rihno ye vah man.

²⁹ Ate nda ro che chica Lot yan Sodoma ne, chera yahn che chica nan ro, ne chihno chih ihyan yan min.

³⁰ Tihca co ro che u che rinducó nducoyaca ihyan, ndá.

³¹ Nda ro min ne, ihyan che vate ye tin vah yuto ne, tahque ndah che hua conda ye chete vah, cotah ye dehtenduh yahn ye. Namin ihyan che chenun ye viyata ne, tahque ndah che hua ndaconan ye viyan.

³² Cuenechaco nchuhn nduhca che chahno chi ihyan ndahta yahn Lot.

³³ Adecoduhno ihyan che nahn ndedevahn man ye ihyan ne, ihyan min ne, conda ye, ne adecoduhno ihyan che cahco mendahn ye ihyan, coh ye cava u ne, ihyan min ne, ndevahn ye.

³⁴ Rahn ri nchuhn te vino min ne, adecotino che vateyado o ihyan nan yundo ne, ama ye ne, quenda ihyan, ne tama ye ne, cahcomán ihyan.

³⁵ Namin adecotino che chenun o ihyan ndahta, rengu ye ne, ama ye ne, quenda ihyan, ne tama ye ne, cahcomán ihyan.

³⁶ Adecotino che chenun o se viyata ne, ama se ne, quenda sahn, ne tama se ne, cahcomán sahn.

³⁷ Tuhme tumerune ihyan chahn:

—Dihve nuhn, ¿ti che conahn chemin ne?

Ndahconan Dihvo vo yahn ye:

—Adecotino che vate ihyan nunde ne, a min va che conahn.

18

Ejemplo yahn ama ndahta vah che chica te nan juez

¹ Nte Dihvo vo ama ejemplo, chihnevan ihyan chahn, cava che cadino ye te va che covah ye cuahn dama.

² Rahn ye:

—Ama cuan yan ne, chihnde ama juez che nde hua ritahno se Dendiohs, nde hua retumacah se yahn ihyan.

³ Namin chihnde ama ndahta vah yan min, ne ndeh yune rahn te nan juez min, ne rahn te: “Cochí rica nundé yahn ama ihyan che hua ri rendihche ye u.”

⁴ Chuh ro, ne hua tumecah juez me, techecade se yahn te. Ate adive ne, ndedecadino se: “Andahre hua ritahnó Dendiohs, nde hua retumacah yahn ihyan,

⁵ ate nducote tahn ndahta vah tih ama renda te redenduh te u ne, techecade yahn te, cava che hua quendi te denduh te u.”

⁶ Tuhme rahn Dihvo vo:

—Cuihco nchuhn cudado nduhca che ndedecadino juez me, andahre duhtuno ihyan se.

⁷ ¿A ndiyu tahque nun conan Dendiohs ihyan che a tendahnun ye? Dendiohs ne, hua rechuhrihn ye, andahre nde ro nde rahn, revah ihyan nan ye.

⁸ Cuāco ráhn rí nchuhn te Dendiohs ne, nun conan ye ihyan yahn ye. U che rinducó nducoyāca ihyan ne, ¿a ndacá ihyan che ritahno ye u ro che ndá ne?

Ejemplo nduhca che covah ama sahn fariseo man, ama sahn rica tume cade iyo man

⁹ Nte Dihvo vo ejemplo cuh cava ihyan yade che rendahchenan ye ihyan chenahn. Rahn ye:

¹⁰ —O se ne, chenda se chete yaco, covah se. Ama se ne, sahn fariseo, ne tama se ne, sahn rica tume cade iyo.

¹¹ Sahn fariseo me ne, chandi se revah se tuhca: “Dendiohs, nundihve cuahn ndih che din ne che u ne, ndiyu nduhca ihyan chenahn, te rahtendihco ye nunde man, reduco ye man, redin duche yahn ye che nihnevaco ye man. U ne, ndiyu nduhca sahn rica tume cade iyo tih.

¹² U ne, o yune rihnde yahté che ama ndate, ne rihcó riya yahn nducuahn che va yahn nan ne, nduhca che a ndihco cade ne.”

¹³ Ate sahn rica tume cade iyo me ne, nde hua rihquino se cahñ nda se nan ta, nde hua nahn ndonihyon nan se yahn che cuihñan se. Chendih se, chahn se ticua se, ne rahn se: “Dendiohs, ¡cuenan vahino ne u!, te ama quendihcó nunde nan ne.”

¹⁴ Cuāco ráhn rí nchuhn te sahn che necun me ne, a nchahco Dendiohs yahn se, ne conahn se. Ate sahn che yade me ne, hua ntāca se vederenchahco. A tihca va cade, te adecoduhno ihyan che rendeva man ye yavenan ye ne, co cuihñan ye nan Dendiohs, ne adecoduhno ihyan che necun ye ne, ndeva Dendiohs ihyan.

Chica Dihvo vo Jesucristo che conan Dendiohs checahya

¹⁵ Ama ro ne, nda ihyan, nda ye checahya yahn ye cava che nahn tah Dihvo vo, covah ye cava. Ate ihyan apóstol ne, hua nahn cah yune ye che cahñ nda ihyan chahn nan Dihvo vo.

¹⁶ Tuhme cah Dihvo vo ihyan apóstol chahn nan ye, ne rahn ye:

—Hua cahdenun nchuhn yune yahn checahya che chi nan, te deman ihyan che necun ye nduhca checahya sih renevahnecon ye che rihquentiyon Dendiohs ihyan.

¹⁷ Cuāco ráhn rí nchuhn te adecoduhno ihyan che hua necun ye nduhca checahya ne, hua co nevahnecon ye vederihquentiyon yahn Dendiohs.

Ama sahn ndinan che cuihca se

¹⁸ Ama sahn ndinan ne, tumerune se Dihvo vo:

—Ihyan Ricuahn Ndah, ¿deh va che dín cava che conán vahchetero nmacuahn ro ne?

¹⁹ Ndahconan ye:

—¿Dehco che rahn che ndah u? Metah nde ama ihyan che ndah ye, atenan Dendiohs.

²⁰ A devene vederihquentiyon yahn Dendiohs: “Hua cahne ihyan. Hua dín doche yehn che nihnevaque. Hua doque. Hua cahme ndudo cuahnde. Cuendeva yavenan chide man, cheque man.”

²¹ Rahn se ri se ihyan:

—Nducuahn vederihquentiyon cuh ne, redinahn nde ro che lihn u.

²² Chihnevan Dihvo vo che tihca rahn se, ne rahn ye ri ye sahn:

—Va ca tama nan che va che dín. Con dihcué nducuahn che va yehn, ne cuinen ihyan chevah cava che co conen vahchetero. Tuhme cochi, condoque u.

²³ Cuahn che chihnevan se che tihca rahn ye ne, ama chi ndache se, te ama cuihca se.

24 Ndihero Dihvo vo che ama chi ndache se, ne rahn ye:

—Ihyan cuihca ne, jama vahche cava ye che nevahnecon ye che rihquentiyon Dendiohs ihyan!

25 Nde hua co nevahnecon ye.

26 Ihyan che chihnevan ye che tihca rahn Dihvo vo ne, rahn ye:

—¿Duhra ihyan co ndevahn ye tuhme?

27 Ndahconan Dihvo vo yahn ye:

—Nducuahne che hua co din ihyan ne, Dendiohs ne, ri redin ye.

28 Tuhme rahn Pedro:

—Ndihero ne, a chihcoman nuhn nducuahne che va yahn nuhn, ne chin-
duco nuhn ndih.

29 Rahn Dihvo vo ri ye ihyan chahn:

—Cuaco rahn ri nchuhn te adecoduhno ihyan che rihcoman ye a vaco ye man, a indihche yahn ye man, a dihno ye man, a ihyan ndahtha yahn ye man, a daya ye man, cava che co nevahnecon ye che rihquentiyon Dendiohs ihyan ne.

30 ihyan min ne, tahque ndeh ca nuhnde menun yahn ye man ro cuh, ne adive ne, conan ye vahchetero numacuahn ro.

Rahn Dihvo vo Jesucristo te va che cahno se ihyan

31 Nedin dama Dihvo vo nduh che ndichio ihyan apostol yahn ye, ne rahn ye ri ye ihyan:

—Man ne, cuhn vo nduco nchuhn yan Jerusalén. U che rinducó nducoyaca ihyan ne, min va che chuhrihn nduhca che dirun ihyan profeta nde ro menan.

32 Necah ihyan u tah sahn tama nación, din duche yahn se u man, din tan se nducó man, cahnan dan se u man.

33 Cuihno cuahn se u ne, cahno se u. Ate cuihno ino ro ne, ntuché van tenahn.

34 Ihyan chahn ne, hua chenahn ye che tihca rahn Dihvo vo, te vahche ri yahn ye cava che conahn ye.

Din Dihvo vo Jesucristo che chi ro nan ama sahn nan ve

35 Ura che cuahn nino Dihvo vo yan Jericó ne, ama sahn nan ve ne, va se chihto yune, rica se che din ihyan vedevahino nduco se.

36 Nducote ama rechuh ihyan yune ne, tumerune se deh ri.

37 Rahn ihyan ri ye sahn:

—A tan cochi Jesús yahn yan Nazaret.

38 Tuhme rahn se numa dito se:

—Jesús, Daya David, jconan vahino ne u!

39 Ihyan che ndahnan ye ne, rahn ye ri ye sahn che cuhnde dihn chende se. Ate nde tahque yudo nan se rahn se:

—Daya David, jconan vahino ne u!

40 Tuhme chandi Dihvo vo, ne tahve ye che chehua sahn. Cuahn che nda se nan ye ne, tumerune ye sahn:

41 ¿Deh nehn che din ndoque ne?

Ndahconan se yahn ye:

—Dihvé, codin ne che co ro nan.

42 Tuhme rahn Dihvo vo ri ye sahn:

—Nducote chitehne ne, a co ro nan.

43 Ndetahno chi ro nan se, ne cuahn se nduco Dihvo vo, rendeva se numacuahn vedeyeno yavenan Dendiohs. Namin nducoyaca ihyan che

ndihchero ye vederihno me ne, rendeva ye numacuahn vedeyeno yavenan Dendiohs.

19

Nduhca che chitahno Zaqueo Dihvo vo Jesucristo

¹ Nahmin che chuh Dihvo vo Jesucristo mendahn yan Jericó ne,

² quenan rino ama sahn cuihca che duche se Zaqueo. Sahn min ne, ndinan se yahn sahn rica tumecađiyo.

³ Quenan rino se, te nahn ndihchero se Dihvo vo, duh ihyan chemin. Ate hua ri che ndihchero se ihyan, te ama yahn ihyan nduco ye. Avane ne, ama cahya cah se.

⁴ Tuhme cuahn se, rano se tahque nde cana ca nan che va che chuh ye. Cocha se tin ama yahn che duche sicómoro cava che tuno se, ndihchero se ihyan.

⁵ Cuahn che a nda Dihvo vo min ne, chinan ye sahn, ne rahn ye ri ye sahn: —Zaqueo, codin nun ine, cuenchehn tan, te man va che conan ndevaue.

⁶ Tuhme aderano se cuenchahn se, nevahnecon se ihyan numacuahn vedeyeno.

⁷ Ihyan che ndihche ye chemin ne, ama rahn tan ye yahn Dihvo vo che cuahn ye vaco ama sahn nunde.

⁸ Tuhme chandi Zaqueo nan nducoyaca ihyan chahn, ne rahn se ri se Dihvo vo:

—Dihvé, mahn va vedecuihca yahn, nahn cah ihyan chevah, ne ndete che va ihyan che ndere chehnevi dehtenduh yahn ye ne, va vedeyeno che necah cun ndi nduhva che chehnevi yahn ye.

⁹ Rahn Dihvo vo:

—Man ne, ndevahn sahnguh, te chitahno se nduhca che chitahno Abraham. Namin ndevahn ihyan ndevaco se.

¹⁰ U che rinduco nducoyaca ihyan ne, nda, nuhn ihyan che chinda ye, din nunde yahn ye, cava che ndedevahn ihyan.

Ejemplo yahn sahn patron che cah se tume tah ndiche sahn decahya yahn se

¹¹ Cuahn che nda nino Dihvo vo yan Jerusalén ne, ihyan che rihnevan ye che rente ye ne, rahco ye te a nun cuanan vederihquentiyon yahn Dendiohs.

¹² Tuhme nte Dihvo vo ejemplo cuh:

—Ama sahn, ndata yahn ihyan ndinan ne, cuahn se yahn yahn nan va rey cava che cah ye vederihquentiyon, conan cuma se.

¹³ Ro che ametah chahn se ne, nedin dama se ndiche sahn decahya yahn se, ne din duche se tume, cah se queri ama sahn chahn, ne rahn se: “Codin nchuhn ntiyon nduco tume cuh numanahn che cah.”

¹⁴ Ihyan yan vaco se ne, hua ri rendihche ye sahn, ne cuahn che a chuh se cuahn se ne, dechuh ye ama o ihyan cava che cahma ye nduco rey min: “Hua nahn nuhn sahnguh cava che cahcantiyon se nuhn.”

¹⁵ Cuahn che ndaconan se ne, a quenan cuma se vederihquentiyon. Nedin dama tun se ca ama ca ama sahn decahya chahn che va tah se tume me cava che necah cuande se sahn.

¹⁶ Nda ama se, ne rahn se: “Dihvé, tume yahn ne ne, a chi ndiche cade yahn queri ama cade che te ne u.”

¹⁷ Ndahconan dihve se: “Ndahca din. Di ne, sahn decahya ndah. Nducote ndahca din ntiyon nduco tume andahre tah, man ne, cahco ntiyon tah cava che cahquentiyen ndiche yan.”

18 Ndá tãma se, ne rahn se: “Dihvé, tume yahn ne ne, a chi uhn çade yahn queri ãma çade che te ne u.”

19 Ndahconan dihve se: “Namin di ne, çahcó ntiyon tah çava che cahquentiyen uhn yan.”

20 Ndá tãma se, ne rahn se: “Dihvé, nga tume yahn ne, chihco ndáh.

21 Hua dín ntiyon nduco yahn che váh dendá tume yahn ne nan ntiyon, te ndih ne, ãma dito nan ne. A ndihché ndih nduhça che retah nduh ne tume che rendãca nan ntiyon che redin ihyan nduco tume yahn ne.”

22 Tuhme rahn dihve se: “¡Áma duhtuno ihyan di! Nduco ndudo che tihça rahn, a tumecadinó duh ihyan di. A devene che ãma dito nán, che retah ndúh tume che rendãca nan ntiyon che redin ihyan nduco tume yáhn.

23 ¿Dehco che hua cah tume yáhn, dín tãma ihyan ntiyon nduco?, te ndete che tihça dín ne, man che ntá, ndaçá tume yáhn nduco ðaya.”

24 Tuhme rahn dihve se ri se ihyan che chenun ye min: “Cuehnevi nchuhn tume che ndá sahn tih, ne cocah ne sahn che çahcantiyon ndiche yan me.”

25 Ndahconan ihyan chahn: “Dihve nuhn sahn min ne, a va yahn se.”

26 Ate rahn dihve se: “Dehve dín yahn, te ihyan che ndeh va yahn ye ne, nde tahque ndeh ca ndonda tah ye, ne ihyan che doh yahn ye va ne, nde cuavi tah yahn ye che va.

27 Namin ihyan che hua ri rendihche ye u, che hua nahn ye che çahcantiyón ihyan ne, cuahn nchuhn, ngua ne ihyan, ne cuihno ne ihyan muhn nan.”

Ndã Dihvo vo Jesucristo yan Jerusalén

28 Chihno nte Dihvo vo ejemplo me ne, quendañnan ye, quendi ye cuahn ye yan Jerusalén.

29 Cuahn che ndá nino ye yan Betfagé nduco yan Betania, nan che duche Cuete Olivo ne, dechuh ye o ihyan apóstol yahn ye,

30 ne rahn ye ri ye ihyan:

—Cuahn nchuhn yan che va viche lado çah. Ndá nchuhn min ne, ntãca ne ãma burro che nde ãma ihyan ametah condudo ye ite. Cuentãhte ne ite, quenda ne ite muhn.

31 Ndete che çacarune ihyan nchuhn: “¿Dehco che rentãhte nchuhn ite?”, cuendañconan ne yahn ye: “Huate, Dihve nuhn nahn ye ite.”

32 Cuahn ihyan chahn, ne ntãca ye burro me a nduhça che rahn Dihvo vo.

33 Cuahn che rentãhte ye burro me ne, rahn ihyan che dihve te:

—¿Dehco che rentãhte nchuhn burro tih?

34 Ndahconan ihyan chahn:

—Huate, Dihve nuhn nahn ye ite.

35 Tuhme quenda ye ite nan quenán Dihvo vo. Tihde ye tino yahn ye ðame burro me, ne quendudo Dihvo vo ite.

36 Rehntãve ihyan chahn tino yahn ye yune cuahn nan che cuahn Dihvo vo.

37 Cuahn che cuahn nino ye nan che renchahn yune Cuete Olivo ne, nducoyaca ihyan che rinduco ye ihyan ne, chi yeno ye, ne canan ndeva ye numacuahn vedeyeno yavenan Dendiohs yahn nducuahn vederihno che ndihchero ye. Áma rah yeno ye, ne rahn ye:

38 —¡Ndeva vo yavenan rey cuh che cochi ye menun Dihvo vo Dendiohs! ¡Ndoyan Dendiohs, ihyan min che va ye vahchetero! ¡Numacuahn vedeyeno ndeva vo yavenan ye!

³⁹ Tuhme ama o sahn fariseo che nduco se van ihyan chahn ne, rahn se ri se Dihvo vo:

—Ihyan Ricuahn, cuihquentiyon ne ihyan sih che cuahte dihn chende ye.

⁴⁰ Ndahconan ye yahn se:

—Rahn ri nchuhn te ndete che cuahte dihn chende ihyan sih ne, tu che chetava tan ne, va che cuah yeno.

⁴¹ Cuahn che nda ye nan che a chi ro yan Jerusalén ne, chaco ye che yah ri ye cava ihyan yan min.

⁴² Tuhme rahn ye:

—Ama ndahca ndete che devano nchuhn te a man nda ro ndah yahn ne che ndevahn ne. Ate hua devano ne, te hua te Dendiohs che co devano ne.

⁴³ Sahn che tan se nduco nchuhn ne, nda ro che cuahte se trinchera, techendive se yan yahn nchuhn, cuahtecuhma se nduco ne. Hua te yune se che cano ne,

⁴⁴ ne cahno se nchuhn, cuihno ndahtera se yan yahn ne. Nde o tu che ndahto vih hua cotave. Tihca castigo va che co ne, te man che dechuh Dendiohs u cava che ndah yahn ne ne, hua tumacah ne.

Dihvo vo Jesucristo ne, ndetendah vah ye sahn che rendihcue se dehtenduh chete yaco

⁴⁵ Tuhme chenda Dihvo vo chete yaco chahte, ne canan ndetenda vah ye nducoyaca sahn che rendihcue se man, ra se man, min chete yaco.

⁴⁶ Rahn ye ri ye sahn:

—A ndirun nan Ndudo yahn Dendiohs: “Yaco yahn ne, yaco nan che revah ihyan”, ate nchuhn ne, nedin ne nduhca yaco sahn duco.

⁴⁷ Ricuahn Dihvo vo ro ro chete yaco me. Chidocuyan ndinan man, sahn devano ley che dirun Moisés man, sahn intiyahn man, renuhn ino se taca co cahno se ihyan.

⁴⁸ Ate hua rentaca ino se taca din se, te nducoyaca ihyan ne, renevah necun ye numacuahn vedeyeno che ricuahn Dihvo vo.

20

Tumerune ye yahn vederihquentiyon che quenan cuma Dihvo vo Jesucristo

¹ Ama ro ne, ricuahn Dihvo vo chete yaco man, rahndudo ye ndudo ndah yahn Dendiohs man. Ura min nda chidocuyan ndinan man, sahn devano ley che dirun Moisés man, sahn intiyahn man,

² ne tumerune se ihyan:

—¿Deh vederihquentiyon quenan come che tihca redin ne? ¿Duh te vederihquentiyon di ne?

³ Ndahconan Dihvo vo yahn se:

—Namin u, va ama nan che tumerune nchuhn. Condahconan ne yahn:

⁴ ¿A chehdenune Juan che cuande yahn Dendiohs, o chehdenune ye che cuande yahn ihyan ne?

⁵ Ndedecadino sahn chahn, ne rahn se van man se nduco vih:

—Ndete che cahma vo che cuande yahn Dendiohs ne, ndahconan se yuhn vo: “¿Dehco che hua ritahno nchuhn tuhme?”

⁶ A namin no ndete che cahma vo che cuande yahn ihyan. Necuan nducoyaca ihyan yan, cah ye tu uvo, te devano cuaco ye te Juan ne, profeta ye.

⁷ Chemin che tahque ndah rahn sahn chahn te hua devano se.

⁸ Rahn Dihvo vo ri ye sahn:

—Namin u, hua çahmá có nchuhn deh vederihquentiyon va tãh che tihça redín.

Ejemplo yahn sahn redin ntiyon che ama duhtuno ihyan se

⁹ Tuhme nte Dihvo vo ejemplo cuh, chihnevan ihyan che chenun ye min:

—Ama ihyan ne, chihche ye dihyo uva, ne çah ye chendata me ama o sahn che din se ntiyon nduco çava che cahmahn se nduco ye. Chica ye min, ne cuahn rahn ye.

¹⁰ Cuahn che nda ro che a rine ndute me ne, dechuh ye ama sahn decahya yahn ye çava che ndaca se mahn va ndute ndata me sahn chahn. Ate chahn se sahn decahya me, ne ndedechuh se sahn, diya tah se.

¹¹ Dechuh ye tama sahn decahya yahn ye, ne din tan sahn chahn nduco se, chahn se sahn, ne namin ndedechuh se sahn, diya tah se.

¹² Dihve chendata me ne, ndaconan dechuh ye tama sahn decahya yahn ye. Namin chahn sahn chahn sahn, chi nun se sahn cuahn chevah.

¹³ Tuhme ndecadino ihyan che dihve chendata me: “¿Taca din? Tahque ndah dechuh sahn dayá che yahinó. ¿A huane nevahnecon sahn chahn sahn cuahn che nda se min?”

¹⁴ Ate cuahn che ndihchero sahn chahn sahn ne, rahn se van man se nduco vih: “Sahnguh che co yahn se vedecuihca cuh. Çahno vo sahn çava che co yuhn vo.”

¹⁵ Tuhme quenda sahn chahn sahn cuahn chihto nan va chendata me, ne chihno se sahn.

Rahn Dihvo vo ri ye ihyan chahn:

—¿Deh din ihyan che dihve chendata me nduco sahn chahn?

¹⁶ Çahn ye, ne decuihno ye sahn. Tuhme çah ye chendata me tah tama ca ihyan che din ye ntiyon nduco.

Nducote chihnevan sahn fariseo che chenun se min ne, rahn se:

—¿Tahque ndah ndete che hua cuahnecon Dendiohs che tihça co!

¹⁷ Ate ndihchero Dihvo vo sahn chahn, ne rahn ye ri ye sahn:

—¿Tuhme deh conahn che ndirun nan Ndudo yahn Dendiohs tuhça?:

Tu che hua quenan ino sahn che rahto vah ne,

chemin che tahque chichihve.

¹⁸ Ihyan che cotahno ye u ne, anduhneca ndete che condah ndudo ye nan tu me, ndaca yah ye. Me ihyan che hua cotahno ye u ne, anduhneca ndete che condah ndudo tu me ihyan, cuihnonan yahn ye.

Tume çade iyo che renehve ihyan yahn César

¹⁹ A ura min no, chidocuyan ndinan man, sahn devano ley che dirun Moisés man ne, ran dito se che nahn cotah se Dihvo vo, te tumacadino se che a yahn se che nte ye ejemplo me. Ate hua dehva din se, te vah se ihyan yan.

²⁰ Tuhme dechuh se ama o se che din ca se che ndah ihyan se, çava che tumerande se ihyan, din se che çahma ye ama ndudo che hua ndahça. Tihça din se, te nahn çaca nunde se yahn ye nan gobernador.

²¹ Rahn sahn chahn ri se ihyan:

—Ihyan Ricuahn, a devano nuhn te ndah ndudo che rente ne man, ricuahn ne man. Dama no rendihche ne nducoyaca ihyan, ne ricuahn ne numa cuaco nduhça che nahn Dendiohs che cuahtechica ihyan.

²² Çahma ne co ne nuhn: ¿a redin yahn che nehve vo tume çade iyo yahn César, o hua?

²³ A devano Dihvo vo te o nan o chende sahn chahn, ne rahn ye ri ye sahn:

—¿Dehco che retumarande nchuhn u?

24 Conahma ne ama tume u.

Cuahñ che ndihchero ye tume me ne, tumerune ye sahn:

—¿Duh yavenañ man, duh che duche man, quenan nan tume cuh ne?

Ndahconan sahn chahn:

—César.

25 Tuhme rahn ye ri ye sahn:

—Cha che rihquentiyon César ne, codinahn nchuhn, ne cha che rihquentiyon Dendiohs ne, namin codinahn ne.

26 Hua chi tumerande se ihyan nduco nde ama ndudo nan ihyan yan. Cuahn ino se chi yahn che tihça ndahconan ye, ne chahte dihn chende se.

Tumerune sahn saduceo yahn che ntuche tenahn

27 Chihno min ne, nda ama o sahn saduceo. Sahn chahn ne, hua ritahno se che va che ntuche tenahn. Rahn se ri se Dihvo vo:

28 —Ihyan Ricuahn, nan ley che dirun Moisés ne, rihquentiyon tuhça: “Ndete che coh ama se che hua ndaça daya se nduco ndahta yahn se ne, va che cahnevaco dihno se nduco te, ça va che hua cuihno ndahta yahn dihno se.”

29 Ama yune ne, chahte ndache se che dihno se vih. Sahn che menañ me ne, chihnevaco se nduco ama ndahta. Ate hua no rahn me ne, chih se, ne hua ndaça daya se nduco te.

30 Chihnevaco ama dihno se nduco te, ne namin chih se, ne hua ndaça daya se nduco te.

31 Tihça queri ama sahn chahn, nduh che ndache se, chihnevaco se nduco te, ate chih nducoyaça se nde ama se hua ndaça daya se nduco te.

32 Adiva ne, chih ndahta me.

33 Nda ro che ntuche tenahn ne, nducote nduh che ndache se chihnevaco se nduco tahn min ne, ¿cha se che ndahta yahn se tahn ne?

34 Tuhme ndahconan Dihvo vo:

—Ihyan che vate ye man ro cuh ne, rihnevaco ye man, redcahnovaco ye man.

35 Ate nda ro che ntuche tenahn ne, ihyan che ndevahn ye ne, metah cahnevaco ye, nde metah decahnovaco ye,

36 te ametah ndaconan coh ye. Nducote ntuche ihyan chahn van tenahn ne, nedin daya Dendiohs ihyan, ne nduhça ángel ne, tihça co ye.

37 Yahn che va che ntuche tenahn ne, man Moisés dirun ye yahn cuahn che riche yahn yan me: “Dihvo vo Dendiohs ne, Dendiohs yahn Abraham man, Isaac man, Jacob man.”

38 Dendiohs ne, Dendiohs yahn nducoyaça ihyan, ihyan che chenduche ye man, ihyan che a ndih ye man, te nan ye ne, chenduche nducoyaça ye.

39 Tuhme rahn ama o sahn devano ley che dirun Moisés ri se Dihvo vo:

—Ihyan Ricuahn, cuaco niyon rahn ne.

40 Nduco chemin ne, ametah chihquino se tumerune ca se ihyan.

David ne, dirun ye yahn Dihvo vo Jesucristo che Dihve ye ihyan

41 Rahn Dihvo vo ri ye sahn chahn:

—¿Dehra cuande che rente ihyan te ihyan che a va çade che chi ye, ndedevahn ye ihyan iyehñse ne, Daya David ihyan?

42 Man David a dirun ye nan libro yahn Salmo:

Rahn Dihvé Dendiohs ri ye Dihvé:

“Cuihnde muhn lado tah cuaco,

43 numanahn che ndahco ndiyá ihyan che hua ri rendihche ye di.”

44 Nducote dirun David te ihyan min che Dihve ye ne, ¿taça che daya ye tuhme?

Sahn devano ley che dirun Moisés ne, ndevih Dihvo vo Jesucristo nunde yahn se vaçonan se

⁴⁵ Nan nducoyaça ihyan che chenun ye min ne, rañn Dihvo vo ri ye ihyan apóstol yahn ye:

⁴⁶ —Cuihco nchuhn cudado nduco sahn devano ley che dirun Moisés, te renan ino se cuahtechica se, chenun se cahteca chano se man, renan ino se che necağ ihyan Dendiohs sahn cuahn ndihve numacuahn vedenecun man, chete yaço man, nan vihco man ne, renan ino se cuahte se nan che tahque ndeva ihyan yavanan se man.

⁴⁷ Nde dehtenduh che va yahn ndahta vah ne, rehnevi se, ne ama rañn revağ se, redin ca se che ndah ihyan se. Sahn chahn che tahque chahte castigo din Dendiohs sahn.

21

Vedino yahn ama ndahta vah

¹ Cuahn che quenun Dihvo vo Jesucristo chete yaço ne, ndihchero ye nduhca che rih ihyan cuihca tume chete yave yahn tume vedino.

² Namin ndihchero ye che chih ama ndahta vah o tume cahya chete yave me.

³ Tuhme rañn Dihvo vo:

—Cuaco rañn rí nchuhn te nan Dendiohs ne, tahque rigonun chihve vedino yahn ndahta vah cağ che co vedino yahn ihyan chenañn sih,

⁴ te nducoyaça ye ne, chih ye che ngava yahn ye. Ate ndahta vah cağ ne, van vedechevah yahn ye ne, chih ye nde che va che toh ye.

Dehtenduh che va che conahn cuahn che a cochi nino che nto iyehñse

⁵ Rañn ama o ihyan te yaço chahte ne, ama ndaħchan tu che ndahto man, dehtenduh vedino che necuco man. Tuhme rañn Dihvo ye:

⁶ —Nducuahn dehtenduh che tahchan cağ che rendihchero nchuhn ne, nda ro che hua cotave dama nde o tu che ndahto vih.

⁷ Tumerune ihyan chahn:

—Ihyan Ricuahn, țticuahn conahn che rañn ne me ne? ¿Deh vederihno co ran cuahn che a nun conahn ne?

⁸ Rañn Dihvo vo:

—Cuihco nchuhn cudado che hua cañncheh nde ama ihyan nchuhn, te ama yahn sahn rihñcheh nda se, ne caħma queri ama se te a man se ihyan min che a va cađe che dechuh Dendiohs, ndedevahn ye ihyan iyehñse. Namin caħma se: “A cochi nino ro.” Ate rañn rí nchuhn che hua tumacağ ne yahn se.

⁹ Cuahn che cañnevan nchuhn che va canda man, che rahteruhn ihyan nduco vih man ne, hua dehve dihya nchuhn co, te a tiħca va che co menağ vih. Ate ro min ne, ametah conahn nducuahn.

¹⁰ Van nación ne, cuanağ canda, ne cuahtecuhma ama ihyan che rihquentiyon ye nduco tama ye.

¹¹ Ama nuhn yahn man, ne cuahnguh cuahngah ne, ama cuhnde cuico man, cağ man. Nan ro ne, cuhnde ro vederihno rahte, ne ama dihya ihyan co.

¹² Ate cuahn che ametah conahn nducuahn che tiħchan ne, co tan ihyan nduco nchuhn man, din ye preso nchuhn man, quenda ye nchuhn yaço man, cuih ye nchuhn vaçoyağ man. Yahn che rinduco nchuhn u ne, quenda ye nchuhn nan rey man, gobernador man, ndere caça nunde ye yahn ne.

¹³ Tiħca cuahno nchuhn cağa che ndaça yune che cuahndudo ne ndudo yaħn, cañnevan ihyan chahn.

14 Nde hua ndedecadino nchuhn taça ndahconan ne yahn ye,

15 te u cahmá có nchuhn ndudo che cahma ne man, té vededevano yahn che conan cuma ne man, nde hua co ndahconan ye yahn ne.

16 Nde indihthe yahn nchuhn man, dihno ne man, ihyan yahn ne man, ihyan rendihche ne man, necah ye nchuhn. Ama o nchuhn ne, cahno ye nchuhn.

17 Nducoyaca ihyan ne, hua co ndihche ye nchuhn yahn che rinduco ne u.

18 Ate nde ama yudo tin nchuhn ne, hua conda.

19 Ndete che quendaḥ ne vedechahtino van nducuahñ vedeyah min ne, ndevahn ne.

20 Cuahn che ndihchero nchuhn che a ntechendive sandado yan Jerusalén ne, codevano ne te a nda ro che cuihno yan min.

21 Tuhme ihyan che vate ye estado yahn Judea man, yan Jerusalén man ne, tahque ndah che cano ye, cahn ye van icoyahn. Ihyan che chenán ye viyata ne, tahque ndah che hua ndaconan ye viyan.

22 Ro min ne, co ihyan castigo, din nunde yahn ye cava che conahn nducuahñ che a chenán caça.

23 ¡Chevaḥ ihyan ndahta che chenun daya ye ro min man, che retava ye daya ye man!, te ama chahte castigo co ihyan yan min, ne ama cuhnde vedeyah iyehñse.

24 Nahñ ye ne, cahno se ihyan nduco espada, ne nahñ ye ne, quenda se ihyan tama nación cava che din ye ntiyon. Sahn tama nación ne, condinun condinaḥno se yan Jerusalén nde tuno ro che ndihco cade Dendiohs.

25 Tuhme cuhnde ro vederihno yahn Dendiohs nan yahn man, iyo man, iyon man. Muhn iyehñse cuh ne, ama cuhnde vedeyah nducuahñ nación, nde hua devano ihyan deh che din ye che vah ye.

26 Condave cuno ihyan che rendedecadino ye yahn nducuahñ vedeyah che cochi ca, te nde nducuahñ che va cade nan ro ne, nuhn.

27 Tuhme ndihchero ihyan u che rinducó nducoyaca ihyan, che ndá van man numacuahn vederihquentiyon chahte yahn.

28 Cuahn che cuanān conahn dehtenduh che tuhchan ne, caḥ yeno nchuhn chedave yahn ne, te a cochi nino ro che ndevahn ne.

29 Namin nte Dihvo vo ejemplo cuh:

—Condihche nchuhn nduhça che ri yahn yahn higo man, yahn chenān che rendaconun yata yahn man.

30 Cuahn che a renecaḥno yan ne, a devano nchuhn te a cochi nino ro ihno.

31 Namin cuahn che a rinahn dehtenduh che tuhchan ne, cuedevano nchuhn te a nun cuanān vederihquentiyon yahn Dendiohs.

32 Cuaco ráhn rí nchuhn te cuahn che ametah coh ihyan che vate ye man ro cuh ne, a conahn nducuahñ.

33 Iyehñse ne, cuihno. Ate ndudo yahn ne, hua cuihno; va che conahn.

34 Cuihco nchuhn cudado. Hua denda ne ura yahn ne che demān che cheh ne man, che cocoh ne man, che ndedecadino ne yahn ntiyon yahn ne man, cava che nda ro min ne, vateyan ne.

35 Vedeyah che tuhchan ne, a denān conahn numachahte iyehñse.

36 Ro ro ne, cuahteyān nchuhn man, covān ne man, cava che co ndevahn ne yahn vedeyah che tuhchan man, cava che vateyan ne ro che u che rinducó nducoyaca ihyan, ndá.

37 Ro ne, ricuahn Dihvo vo chete yaco chahte, ne vino ne, rahn ye renan ye ama cuān nan che duche Cuete Olivo.

38 Nducoyaca ihyan yan, rahn ye yaco vatiyan vatiyan, rihnevan ye che ricuahn Dihvo vo.

22

Rente çade se taça din se preso Dihvo vo Jesucristo

¹ Cuahn che a cochi nino vihco ro yudo, ro che reh ihyan pan che ametah ya yahn ne,

² chidocuyan ndinan man, sahn devano ley che dirun Moisés man ne, renuhn ino se taça çahno se Dihvo vo çava che hua cadino ihyan yan, te vah se che co tan ye.

³ Chenda chundah Judas Iscariote, ama cha sahn che chi cuande se van ihyan che ndichio chahn,

⁴ ne chahn se nan chidocuyan ndinan man, sahn ndinan yahn policia che redin se cudado yaco chahte man, ne rahn se te co necah se Dihvo vo tah sahn chahn.

⁵ Chi yeno sahn chahn, ne nte çade se nduco se che çah se tume sahn.

⁶ Çah Judas ndudo yahn se sahn chahn, ne nuhn ino se taça co necah se Dihvo vo çava che hua cadino ihyan yan.

Vihco ro yudo

⁷ Nda vihco ro yudo, ro che reh ihyan pan che ametah ya yahn. Ro min ne, nihnde çade che rihno ihyan ama itecuche lihn çava che co te vedino.

⁸ Dihvo vo ne, dechuh ye Pedro nduco Juan, ne rahn ye:

—Cuahn nchuhn, cuihcoyan ne che chuh vo che cuande yahn ro yudo.

⁹ Tumerune ihyan chahn:

—¿Ti nahn ne che çahcoyan nuhn ne?

¹⁰ Ndahconan Dihvo vo:

—Ura che conda nchuhn viyan ne, ntaca ne ama sahn che nda se ama cuhtenune. Quendi nchuhn sahn min nde vah nan che conda se,

¹¹ ne çahma ne co ne ihyan che vaco ye min: “Dechuh Ihyan Ricuahn nuhn che tumerune nuhn ndih: ¿Ti va cuarto nan che cheh ye nduco ihyan apóstol yahn ye che cuande yahn ro yudo ne?”

¹² Tuhme nahma ye ama cuarto chahte nchuhn che a va yan. Min cuihcoyan nchuhn che chuh vo nduco vih.

¹³ Chahn ihyan chahn, ne ntaca ye nducuahn che rahn Dihvo vo ri ye ihyan, ne chihcoyan ye che cheh ye che cuande yahn ro yudo.

¹⁴ Cuahn che nda ura che cheh ye ne, chihnde Dihvo vo nan mesa nduco ihyan apóstol yahn ye,

¹⁵ ne rahn ye ri ye ihyan chahn:

—Ama nahn chéh nduco nchuhn che cuande yahn ro yudo numanahn che ametah çahno se u,

¹⁶ te rahn ri nchuhn te ametah ndaconan chéh, nde nda ro che conahn nducó che ndihco çade Dendiohs, ne conán nan che rihquentiyon ye.

¹⁷ Tuhme chetah ye ama vaso vino, necah ye nundihve cuahn Dendiohs, ne rahn ye:

—Cotah nchuhn, cuih ne nduco vih.

¹⁸ Rahn ri nchuhn te ametah ndaconan cüh vino yahn uva, nde nda ro che conahn vederihquentiyon yahn Dendiohs.

¹⁹ Chetah ye pan me, ne necah ye nundihve cuahn Dendiohs. Tuhme ndeh ye, çah ye ihyan chahn, ne rahn ye:

—Che tuhca redin ne, conahn che cuahnecún che çahno ihyan u çava che ndevahn nchuhn. Tihca cheh nchuhn çava che çahco ran ne che renecaçco ne u.

²⁰ Chihno cheh vino ye ne, ndaconan chetah ye vaso vino me, ne rahn ye:

—Chu ne, yun yáhn che recáh dito ndudo ra che ndáhcó cåde Dendiohs. Va che cora cáva nchuhn.

²¹ Meniyon ne, sahn che necáh se u ne, dáma reh se nducó.

²² Cuáco te cáhno ihyan u che rinducó nducoyáca ihyan, nduhcá che a nihnde cáde. Ate yah ri cáva sahn che necáh se u.

²³ Tuhme canán tumerune vih ihyan chahn cha ye che tihcá din ye.

Rente ihyan apóstol nduco vih cha ye che tahque conan ye

²⁴ Chihno min ne, rente ihyan apóstol nduco vih cha ye che tahque conan ye.

²⁵ Tuhme ráhn Dihvo vo ri ye ihyan:

—Adecoduhno rey ne, ama yudo rihquentiyon ye nación yahn ye, ne sahn intiayahn ne, rendeva ihyan yavenan se.

²⁶ Ate van nchuhn ne, hua co tihcá, te cha nchuhn che tahque quenun yan ne ne, co ne nduhcá ama sahn yuno, ne cha nchuhn che tahque ndinan ne ne, co ne nduhcá ama mozo.

²⁷ Condedecadino ne duh che tahque ndinan. ¿A ihyan che va ye nan mesa, reh ye, o sahn decáhya che redin se cudado numanahn che reh ye? ¿A ndiyu ihyan che va ye nan mesa, reh ye che tahque ndinan ye? Ate condihche nchuhn. U ne, nduhcá ama ihyan che redin ye ntiyon yahn nchuhn.

²⁸ Ro ro che chuhríhn ne, a nchuhn che chinduco ne u.

²⁹ Chemin che nduhcá che te Chidá vederihquentiyon, quenán cumá ne, namin té vederihquentiyon, cuahtenan cuma ne

³⁰ cáva che chuh vo man, cuh vo man, dáma nduco vih, ro che cahcantiyón, ne cuahte ne techecáde ne yahn ihyan nación yahn Israel, nduh che ndichio ndata yahn ye.

Dihvo vo Jesucristo ne, ráhn ye te cáhma Pedro te hua rendihche ye ihyan

³¹ Namin ráhn Dihvo vo ri ye Pedro:

—Simón, Simón, cuihque cudado, te chundah ne, chica se Dendiohs cáva che tumerande se nchuhn nde nan che ndáhcó ndiya se nchuhn.

³² Ate u ne, cováh cave cáva che hua ama yune no cahcoman. Cuañ che ndaconen cotehne ne, cuenecáh yan chedave yahn ihyan che ritahno ye u.

³³ Ndahconan Simón, ne ráhn ye:

—Dihvé, va vedeyenó che conducó ndih, andahre conún vacoyahn nduco ne man, andahre cóh dáma nduco ne man.

³⁴ Ate ráhn Dihvo vo ri ye ihyan:

—Pedro, ráhn ri di te ura che ametah cuah tuh ne, cahme ino yune te hua rendihche u.

³⁵ Tuhme ráhn Dihvo vo nduco nducoyáca ihyan chahn:

—Cuañ che dechúh nchuhn che nde dino, nde morral, nde indáco, hua quenda ne ne, ¿deh chinda yahn ne ne?

Ndahconan ye:

—Hua dehva chinda yahn nuhn.

³⁶ Tuhme ráhn Dihvo vo ri ye ihyan chahn:

—Ate man ne, ndete che va dino yahn nchuhn, cuiquenda ne, ndete che va morral, cuiquenda ne. Cha nchuhn che ametah espada yahn ne ne, cuendihcue ne tino rendiche ne, cua ne ama.

³⁷ Ráhn ri nchuhn te va che conahn ndúdo cuh che a ndirun yáhn: “Cáhma ihyan te ihyan min ne, ihyan nunde ye.” Nducuahn che a ndirun che va che cuahno có ne, va che conahn.

³⁸ Tuhme ráhn ihyan chahn:

—Dihve nuhn, ngá o espada, va yahn nuhn.

Ndahconan ye:

—Nduco sih ne, a va.

Getsemani

³⁹ Cihno min ne, cuahn Dihvo vo Cuete Olivo nduhca che a rahn ye, ne cuahn ihyan apóstol nduco ye.

⁴⁰ Cuahn che nda ye min ne, rahn ye nduco ihyan chahn:

—Covah nchuhn cava che hua dinahn ne cuahn che tumarande chundah nchuhn.

⁴¹ Tuhme chihco rino Dihvo vo ihyan chahn, ne cuahn ye cana nan me. Min chehntiyya ye, covah ye,

⁴² ne rahn ye:

—Chida man, ndete che nahn ne ne, cuehnevi ne che va che chuhríhn. Ate hua co nduhca che nahn. Co nduhca che nahn man ne.

⁴³ Tuhme nda ama ángel che chica ye vahchetero, ne necah yan ye chedave yahn Dihvo vo.

⁴⁴ Ama chuhríhn ye che rendedecadino ye, ne tahque dito covah ye. Ama chi ye nuneyan nduhca yun, ne ra nde ndiyahn.

⁴⁵ Cihno covah ye ne, ndaconan ye nan che chenun ihyan apóstol chahn, ne ntaca ye ihyan che vateyado ye, te ama ndi cuno ye che ran ye.

⁴⁶ Tuhme rahn ye ri ye ihyan:

—¿Dehco che vateyado nchuhn? Cuenecuan ne, covah ne cava che hua dinahn ne cuahn che tumarande chundah nchuhn.

Din se preso Dihvo vo Jesucristo

⁴⁷ Nde ametah cuihno cahma ye cuahn che nda ama yahn sandado nduco sahn policia che redin se cudado yaco chahte, ne ndahnán Judas, ama cha sahn che chi cuande se van ihyan che ndichio chahn. Chahn nda sahn min nan Dihvo vo cava che tenan se ihyan.

⁴⁸ Tuhme rahn Dihvo vo ri ye sahn:

—Judas, ¿a nahn tenan u, ne nduco tihca necah u che rinducó nducoyaca ihyan ne?

⁴⁹ Cuahn che ndihchero ihyan apóstol che tihca ri ne, tumerune ye ihyan:

—Dihve nuhn, ¿a cuahn nuhn sahn sih nduco espada ne?

⁵⁰ Ama cha ihyan chahn ne, chahn ye ama sahn decahya yahn chidocuyan che tahque ndinan, chacondah ye revan se lado tah cuaco se.

⁵¹ Ate rahn Dihvo vo:

—Hua cuhma nchuhn.

Tuhme nahn tah ye revan sahn min, ne ndonan.

⁵² Rahn Dihvo vo ri ye chidocuyan ndinan man, sahn ndinan yahn policia che redin cudado yaco man, sahn intiyyahn man:

—¿A cochi nchuhn nduco espada man, nduco yahn man, din ne preso u nduhca sahn duco?

⁵³ Ro ro quenún chete yaco chahte van nchuhn, ne hua din ne preso u. Ate man ne, nda ura yahn ne, ura che rihquentiyon chundah.

Rahn Pedro te hua rendihche ye Dihvo vo Jesucristo

⁵⁴ Tuhme din sahn chahn preso Dihvo vo, quenda se ihyan yaco chidocuyan che tahque ndinan. Cuahn Pedro diyahn diyahn, quendi ye ihyan.

⁵⁵ Din sahn chahn ama vacoyahn chevah, ne vatendi se, recah ihno se sahn.

⁵⁶ Tuhme ndihchero ama tahn decahya che nduco Pedro, nti ye min. Ndhichero ndah te ihyan, ne rahn te:

—Sahnguh ne, chinduco se sahn preso cah.

57 Ndahconan Pedro, ne rahn ye ri ye tahn:

—Nde hua rendihché ihyan.

58 Namenan me ne, ndihchero tama se ihyan, ne rahn se:

—Namin di, ndoque van sahn che rinduco se sahnghah.

Ndahconan Pedro:

—Ndiyu u.

59 Chihno tenduh ama ura ne, rahn tama se:

—Cuaco te sahnghuh ne, chinduco se sahnghah, te sahn Galilea se.

60 Ndahconan Pedro:

—Nde hua devano deh che rahn.

Nde ametah cuhno cahma Pedro, ne cah tuh.

61 Tuhme chaconan Dihvo vo, ndihchero ye Pedro, ne necahco ye nduhca che rahn Dihvo vo: “Ura che ametah cuah tuh ne, cahme ino yune te hua rendihche u.”

62 Tuhme ndihquenda Pedro, ne ama chaco ye.

Chahn se Dihvo vo Jesucristo

63 Sahn che redin se cudado Dihvo vo ne, redin duche yahn se ihyan, ne rahn se ihyan.

64 Dechiche se ama tino nan ye. Rahn se ihyan, ne rahn se:

—Cahme duh che chahn di.

65 Ama ndeh nan ca dehtenduh rahn se, din duche yahn se ihyan.

Quenda se Dihvo vo Jesucristo nan intiyahn

66 Cuahn che a chi dave me ne, ndo dama chidocuyan ndinan man, sahn devano ley che dirun Moisés man, sahn intiyahn man, ne quenda se Dihvo vo nan che cuhnde cade yahn ye.

67 Min tumerune se ihyan:

—¿A di ihyan che a va cade che chi ye, ndedevahn ye ihyan iyehanse ne?

Ndahconan ye, ne rahn ye ri ye sahn:

—Ndete che cahma có nchuhn te u ne, nde hua cotahno ne.

68 Ndete che va deh che tumeruné ne, nde hua ndahconan ne yahn.

69 Ate u che rinducó nducoyaca ihyan ne, a nun cuhndé lado tah cuaco Dendiohs, ihyan min che ama yudo vederihquentiyon yahn ye.

70 Tumerune nducoyaca sahn chahn:

—¿A di che Daya Dendiohs tuhme ne?

Ndahconan ye yahn se:

—A u. A man nchuhn rahn ne meniyan.

71 Tuhme rahn se:

—¿Dehca din vo testigo? Nduco ndudo che tihca rahn se ne, a va. A man vo chihnevan vo.

23

Quenda se Dihvo vo Jesucristo nan Pilato

1 Tuhme necuan nducoyaca se, quenda se Dihvo vo nan Pilato.

2 Canan ndere rica nunde se yahn ye, ne rahn se:

—Ntaca nuhn sahnghuh che rinun se ihyan che hua nedihve ye tumecadiyo yahn César. Avane ne, rahn se te man se che rey man, ihyan che a va cade che chi ye, ndedevahn ye ihyan iyehanse man.

3 Tuhme tumerune Pilato ihyan:

—¿A di che rey yahn nación yahn Israel ne?

Ndahconan Dihvo vo:

—U, nduhca che rahn.

4 Rañh Pilato ri se chidocuyan ndinan nduco nducoyaça ihyan:

—Hua rendacá nde ama nunde yahn sañguh.

5 Ate quendi sañh chahn rica nunde se, ne rañh se:

—Numacuahn nación yahn nuhn, nde estado yahn Galilea nde muhn, ndedecuan se ihyan nduco ndudo che ricuahn se.

Quenda se Dihvo vo Jesucristo nan Herodes

6 Cuahn che chihnevan Pilato che rañh se yahn Galilea ne, tumerune se ndete che min yan vaco Dihvo vo.

7 Cuahn che checadino se te min yan vaco ye ne, dechuh ye ihyan nan Herodes, te sañh min che rihquentiyon se min, ne quenan se yan Jerusalén ro min.

8 Ama chi yeno Herodes cuahn che ndihchero se Dihvo vo, te a rañh che nahn ndihchero se ihyan. Nducote rihnevan se che ama rente ihyan yahn Dihvo vo ne, quenan rino se che din ye ama vederihno, ndihchero se.

9 Ama ndeh nan che tumerune se, ate nde hua ndahconan Dihvo vo.

10 Chidocuyan ndinan man, sañh devano ley che dirun Moisés man ne, ndevanan se, ndere rica nunde se yahn ye.

11 Tuhme Herodes nduco sandado yahn se ne, din duche yahn se Dihvo vo. Tihyon se ama tino ndah ihyan, ne ndedechuh se ihyan nan Pilato.

12 Ro menan ne, tan Pilato nduco Herodes, ate nde ro min ne, ndoyan se nduco vih.

Ndaconan Dihvo vo Jesucristo nan Pilato

13 Nedin dama Pilato chidocuyan ndinan man, sañh intiyahn man, ihyan yan man,

14 ne rañh se:

—Nchuhn ne, nda ne sañguh nan, rica nunde ne yahn che ndedecuan se ihyan yan. Ate tumeruné sañh nan nchuhn yahn dehtenduh che rica nunde ne yahn se, ne metah nde ama nunde yahn se.

15 Dechuh nchuhn nduco se nan Herodes, ne namin hua ntaca se nde ama nunde yahn se. Cuaco te hua dehva din se cava che cahno vo sañh.

16 Tahque ndah cuahn sañh, ntahte sañh.

17 Nduyo nduyo che rendá vihco ro yudo ne, va che ntahte se ama preso.

18 Ate cah nducoyaça ihyan:

—¡Cuihno ne sañh tih! ¡Cuentahte ne Barrabás!

19 Barrabás ne, quenun se vacoyahn, te ndedecuan se ihyan yan che cuhma ye nduco gobierno man, chihno se sandado yahn ye man.

20 Ndaconan rañh Pilato te nahn ntahte se Dihvo vo.

21 Ate cah tun ihyan chahn:

—¡Cuenahn yah ne sañh! ¡Cuenahn yah ne sañh!

22 Ndaconan rañh Pilato nde nan che chi ino yune:

—¿Dehra nedin sañguh? Hua co cahno vo sañh, te metah nde ama nunde yahn se. Tahque ndah din castigo sañh, ne ntahte sañh.

Nahn yah se Dihvo vo Jesucristo

23 Ate quendi ihyan chahn rah ye, rica ye che conan yah Dihvo vo. Ama quendi chidocuyan ndinan nduco nduco ihyan chahn rah ye.

24 Tuhme cah yune Pilato che co nduhca che rica ye.

25 Ntahte se sañh che quenun vacoyahn me nduhca che nahn ye, ne chihquentiyon se sandado che nahn yah se Dihvo vo.

²⁶ Cuahn che quenda sandado chahn Dihvo vo ne, chihquentiyon se ama ihyan yan Cirene che duche ye Simón, che cuenchi ye nahn ye viyata, che ntiñde diñme ye cruz, quendi ye Dihvo vo.

²⁷ Ama yahn ihyan yan man, ihyan ndahta che raco ye man, rah ran ye man, cuahn ye nduco vih.

²⁸ Ndiñchero Dihvo vo ihyan ndahta chahn, ne rahn ye ri ye ihyan:

—Nchuhn ihyan yan Jerusalén, hua cuaco ne cava u. Cuaco ne cava man ne man, cava daya ne man,

²⁹ te nda ro che cahma ihyan: “Ndah ro yahn ihyan ndahta che hua rahcoyan ye man, ihyan ndahta che hua rendaça daya ye man, ihyan ndahta che hua reta ve ye man.”

³⁰ Ro min ne, cahma ihyan co ye ico man, cuete man: “Condah ndudo nchuhn nuhn, cuedendeñ ne nuhn.”

³¹ Nducote numacuahn vedetan cahno se u che ametah nunde yahn ne, nda ro min ne, tahque nun cahno se ihyan nunde.

³² Namin quenda se o sahn nunde cava che cahno se sahn dama nduco Dihvo vo.

³³ Cuahn che nda se nan che duche Cuete Ine Tin Tenahn ne, nahn yah se Dihvo vo dama nduco sahn nunde chahn. Ama se ne, quenah yah se lado tah cuaco ye, ne tama se lado tah cueh ye.

³⁴ Covah Dihvo vo:

—Chida man, cuenchahco ne yahn ihyan sih, te nde hua devano ye deh che redin ye.

Sandado chahn ne, din se sortear tino yahn ye, cha sahn quendañ yahn se che co yahn se queri ama.

³⁵ Ihyan yan chahn ne, vatendi ye, rendiñchero ye. Sahn intiyahn ne, riyon nan se Dihvo vo, ne rahn se:

—Tama ca ihyan ne, ndedevahn se. Ndete che sahn tih che a va cade che dechuh Dendiohs, ndedevahn se ihyan iyehñse ne, ¿dehco che hua ndedevahn man se sahn?

³⁶ Namin redin duche yahn sandado chahn ihyan, recañ se vinagre, cuh ye,

³⁷ ne rahn se ri se ihyan:

—Ndete che di che rey yahn nación yahn Israel ne, cuenedevahn man di.

³⁸ Tin cruz ne, ndirun ndudo griego man, ndudo latin man, ndudo hebreo man, tuhca: “Nga Rey yahn nación yahn Israel.”

³⁹ Ama cha sahn nunde chahn che quenah yah se ne, riyon nan se ihyan, ne rahn se:

—Ndete a di ihyan che a va cade che chi ye, ndedevahn ye ihyan iyehñse ne, cuenedevahn man di man, cuenedevahn nuhn man.

⁴⁰ Ate sahn che tama me ne, rahva se nduco vih, ne rahn se:

—Namin di, ¿a hua vah Dendiohs, andahre quenah yah nduhca che quenah yah ye?

⁴¹ Uvo ne, a redin yahn che rechuhriñ vo, te reñediñvo vo nunde yuhn vo. Ate ihyan cuh ne, nde ama nunde hua quendiñco ye.

⁴² Tuhme rahn se ri se Dihvo vo:

—Cuahn che a va ne, rihquentiyon ne ne, cuenecañco ne u, ne conan vahino ne u.

⁴³ Ndahconan Dihvo vo yahn se:

—Cuaco rahn ri di te nde a man ro cuh conen nducó vahchetero.

Nduhca che chih Dihvo vo Jesucristo

44 Ura che a chi mañn yahn ne, ama chi man numachahte iyehñse nde nañ rahco ino a chino,

45 te chih yahn. Tino che quendihco chete yaço chahte ne, nde, ndo o ndi.

46 Tuhme cah Dihvo vo:

—Chida mañ, ndahcó chedave yahn tañ ne.

Chihno rañn ye tihca ne, chih ye.

47 Nducote ndihchero sañn ndinañ yahn sandado che tihca chi ne, ndeva se yavenañ Dendiohs, ne rañn se:

—Cuaco niyon te ihyan tih ne, metah nde ama nunde yahn ye.

48 Nducoyaça ihyan che chenun ye min, ndihchero ye che tihca chi ne, yah ri ye, ne conañ ye, rañn ye ticua ye.

49 Ate nducoyaça ihyan che a rendihche ye Dihvo vo mañ, ihyan ndahta che chinduco ye Dihvo vo nde estado yahn Galilea mañ ne, yahn no chahtendi ye, ndihchero ye che tihca chi.

50 Ama ihyan yan Arimatea, estado yahn Judea, che duche ye José che nduco ye van ihyan ndinañ yahn nación yahn Israel ne, ndah ihyan ye nañ Dendiohs mañ, nañ ihyan mañ.

51 Namin quenán rino ye che conahn vederihquentiyon yahn Dendiohs. Ihyan min ne, hua chi dama ndudo yahn ye nduco combiero yahn ye, chih nunde se yahn Dihvo vo.

52 Chahn ihyan min nañ Pilato, ne chica ye sañn che cah yune se che cuhche ye Dihvo vo.

53 Tuhme chahn ye, ndedevah ye ihyan. Chahcotuma ye ama tino ihyan, ne chacondihte ye ihyan chete ama yañan ra, che ndindah nañ ama yaça.

54 Ro min ne, víspira yahn ro yudo, a cuanañ ro che rahte tuhno ihyan.

55 Ihyan ndahta chahn che chica ye estado yahn Galilea nduco Dihvo vo ne, chahn nduco ye, ne ndihchero ye nañ va yañan mañ, taça chacondihte ye Dihvo vo mañ.

56 Cuahn che ndaconan ihyan ndahta chahn ne, ca ye yunedan mañ, nunedan mañ, ne nducote a canañ ro che rahte tuhno ihyan ne, chahte tuhno ye nduhca che a va cade.

24

Ntuche Dihvo vo Jesucristo van tenahn

1 Ama vatiyañ dahca, ro che ndeva ndate ne, cuahn ihyan ndahta chahn nduco taña te o ihyan ndahta, quenda ye yunedan mañ, nunedan mañ, che a ndihcoyañ ye.

2 Cuahn che nda ye nañ yañan me ne, ndihchero ye che a ndavi tu che ndechendih chende.

3 Chenda ye chete yañan me, ate hua ntaca ye Dihvo vo.

4 Ama dihya ye chi che tihca, ne numanahmin ne, adenañ chinañ ye o ángel, vatendi ye, chenun ye tino che ama diyahn.

5 Tuhme nde tahque dihya ihyan ndahta chahn chi, ne chendih ye, nde ametah nahn ndoniñyon nañ ye che vah ye. Rañn ángel chahn nduco ye:

—¿Dehco che van tenahn renuhn nchuhn ama ihyan che quenduche ye?

6 Metah ye muhn, te a ntuche ye. Cuenecañco nchuhn cuahn che nduco ca ne ihyan estado yahn Galilea, nduhca che rañn ye ri ye nchuhn:

7 “U che rinducó nducoyaça ihyan ne, va che necañ se u tañ sañn nunde çaça che nahn yah se u. Ate cuihno ino ro ne, ntuché.”

8 Tuhme ntañ tin ihyan ndahta chahn che tihca rañn Dihvo vo.

⁹ Ndaca ye nan yayan me, conahn ye, ne necah cuande ye ihyan apóstol che ndichiamá chahn man, ihyan chenahn che nduco ye man.

¹⁰ María yahn yan Magdala man, Juana man, María che chaco Jacobo man, nduco ihyan ndahta chenahn chahn ne, a ihyan chahn che necah cuande ye ihyan apóstol che tihca chi.

¹¹ Ate ihyan apóstol chahn ne, hua chitahno ye, ne rahco ye te co hua va cuaco dave yahn ihyan ndahta chahn che tihca rahn ye.

¹² Tuhme necuan Pedro, cuahn ye rano ye nan yayan me. Nda ye min ne, ndihchero ye che a deman tino che chacotuma Dihvo vo quendite min. Ama cuahn ino ye che tihca, ne conahn ye.

Cihnde ro Dihvo vo Jesucristo nan o ihyan che cuahn ye yan Emaús

¹³ A ro min no ne, cuahn o ihyan chahn ama yan lihn che duche Emaús, ri tenduh ndichio dahno che renda yan Jerusalén.

¹⁴ Numanahn che chenun yune ihyan chahn ne, rente ye nduco vih yahn nducuahn che chi.

¹⁵ Ura min nda man Dihvo vo nan ihyan chahn, ne cuahn ye dama nduco vih.

¹⁶ Ate hua nchanan ihyan chahn ihyan, te a tihca va cade che hua nchanan ye ihyan.

¹⁷ Tumerune Dihvo vo ihyan chahn:

—¿Deh che rente nchuhn van man ne nduco vih che ama ran ne ne?

¹⁸ Ama cha ihyan chahn che duche ye Cleofas ne, ndahconan ye:

—¿A deman ndih che tama yan cochi ne, che hua devano ne dehtenduh che chi yan Jerusalén ro cuh?

¹⁹ Tumerune Dihvo vo:

—¿Deh chi min ne?

Tuhme ndahconan ihyan chahn yahn ye:

—Ama ndeh nan dehtenduh chahno chi Jesús yahn yan Nazaret. Ihyan min ne, ama ihyan profeta che quenan cuma ye vederihquentiyon chahte nan Dendiohs man, nan ihyan man, che din ye vederihno man, chicuahn ye man.

²⁰ Chidocuyan ndinan man, sahn intiyahn man ne, chih nunde se yahn ye, ne necah se ihyan tah sahn che nahn yah se ihyan.

²¹ Nuhn ne, chenan ino nuhn che a ihyan min che ndedevahn ye ihyan nación yuhn vo, Israel. Man ne, a chi ino ro che chihno se ihyan.

²² Avane ne, ama rendedecadino nuhn, te ama o ihyan ndahta che chin-duco ye nuhn ne, chahn ye nan yayan ura che chi dave,

²³ ate hua ntaca ye ihyan min chete yayan me. Cuahn che ndaconan ye ne, rahn ye te ndihchero ye ángel. Angel chahn ne, rahn ye te a ntuche ihyan min.

²⁴ Tuhme chahn ama o combiero yahn nuhn nan yayan me, ne ntaca ye nduhca che rahn ihyan ndahta chahn, ate hua ndihchero ye ihyan min.

²⁵ Tuhme rahn Dihvo vo ri ye ihyan chahn:

—¡Ama tuntu nchuhn! ¡Taca che hua renahn ne nduhca che dirun ihyan profeta!

²⁶ ¡A ndiyu a nihnde cade che ihyan che a va cade che chi ye, ndedevahn ye ihyan iyehñse ne, chuhrihn ye dehtenduh che tuhchan man, nda ye vahchetero man?

²⁷ Tuhme cah cuande ye ihyan chahn Ndudo yahn Dendiohs, canan ye nde che dirun Moisés man, che dirun nducoyaca ihyan profeta man, yahn nduhca che cuahno ye co.

28 Nda ihyan chahn yan lihn me, ne din ca Dihvo vo che nahn chuh dama ye, cahñ ye tahque yahn ca.

29 Ate din ihyan chahn fuerza ihyan che conan ye min, te a chi chino. Tuhme chenda ye chete vah, chinduco ye ihyan chahn.

30 Ura che chahte ye, cheh vino ye ne, chetañ Dihvo vo pan, necañ ye nundihve cuahn Dendiohs, ne ndeh ye, cah ye ihyan chahn.

31 Ura min nchanan ihyan chahn te a ihyan min che Dihvo vo, ne adenan no chehnan ihyan chahn ihyan.

32 Tuhme rahn ye nduco vih:

—¿A ndiyu yeno chedave yuhn vo numanahn che rente ye nduco vo man, ricuahn ye uvo Ndudo yahn Dendiohs man, cuahn yune?

33 Ndetahno ndaconan ihyan chahn yan Jerusalén, ne ntaca ye ihyan apóstol che ndichiama chahn che ndi dama ye nduco ihyan chenhahn chahn.

34 Ihyan che ndi dama ye min ne, rente ye van man ye nduco vih:

—Cuaco che ntuche Dihvo vo, te chihnde ro ye nan Simón.

35 Tuhme necañ cuande ihyan che o chahn nduhca che chahno ye chi cuahn yune man, nduhca che nchanan ye Dihvo vo ura che ndeh ye pan man.

Chihnde ro Dihvo vo Jesucristo nan ihyan apóstol yahn ye

36 Numanahn che rente ihyan chahn yahn dehtenduh che tihchan ne, adenan chinan ye Dihvo vo che nti ye mendañ. Rahn ye ri ye ihyan chahn: —Dehve rahco nchuhn.

37 Dihya ihyan chahn chi, rahco ye te co ama vaco ndihchero ye.

38 Ate rahn Dihvo vo ri ye ihyan:

—¿Dehco che ama vah nchuhn man, ndeh rendedecadino ne man?

39 Condiñche ne yahvetah man, cah man, te a u che nti nan ne. Conahn tah ne u, ne condihche ne te va yute yahñ man, va ine yahñ man, ndiyu ama vaco nduhca che rendedecadino ne.

40 Chihno rahn ye chemin ne, nahma ye yahvetah ye man, cah ye man, ihyan chahn.

41 Ate nducote ama cuahn ino ihyan chahn man, ama yeno ye man ne, nde ametah cotahno ye. Chemin che tumerune Dihvo vo ihyan chahn:

—¿A va deh che chuh vo muhn ne?

42 Tuhme cah ihyan chahn ama ndi yahca ndiyuche nduco ama ndi vaconedih yahn.

43 Cheh ye man, chih ye man, nan ihyan chahn.

44 Rahn ye ri ye ihyan chahn:

—Cuahn che nduco ca nchuhn ne, a te cuandé nchuhn te va che conahn nducuahn che nihnde cade che cuahno có, nduhca che a ndirun nan ley che dirun Moisés man, nduhca che dirun ihyan profeta man, nduhca che ndirun nan libro yahn Salmo man.

45 Tuhme din Dihvo vo che chenhahn ihyan chahn Ndudo yahn Dendiohs,

46 ne rahn ye:

—A tihca va che conahn nducó nduhca che a ndirun nan Ndudo yahn Dendiohs. U che a va cade che chí, ndedevahn ihyan iyehñse ne, a tihca nihnde cade che cahno se u nduhca a chí. Namin a nihnde cade che cuihno ino ro ne, ntuché van tenahn.

47 Va che dechuh ihyan, cuahndudo ye muhn yan Jerusalén man, nde nducuahn nación man, che nto ino ihyan nunde yahn ye cava che nchahco Dendiohs yahn ye.

⁴⁸ A nchuhn che ndihchero ne nducuahn dehtenduh che tihc̄a chinahn, ne va che cuahndudo ne.

⁴⁹ Condihche nchuhn. Nduhc̄a che a te Chidá ndudo yahn ye ne, u dechúh Vaco Ndah yahn ye, conun nchuhn. Cuahtenan rino nchuhn muhn yan Jerusalén nde ndā ro che cuahtenan cuma ne vederihquentiyon yahn Vaco Ndah yahn ye.

Condā Dihvo vo Jesucristo vahchetero

⁵⁰ Cuahn Dihvo vo nduco ihyan chahn nde yan Betania. Chenihyon tah ye, ne chica ye Dendiohs cava ihyan chahn.

⁵¹ Tuhme chica ye min, ne condā ye vahchetero.

⁵² Ndeva ihyan chahn yavenan̄ Dihvo vo, ne conahn ye yan Jerusalén, ama yeno ye.

⁵³ Min chete yaco chahtenun ye ro ro, rendeva ye yavenan̄ Dendiohs numacuahn vedeyeno. Tihc̄a chi.

NDUDO NDAH YAHN DIHVO VO JESUCRISTO CHE DIRUN SAN JUAN

¹ Cuahn che metah cuhnde iyehñse ne, a va ama ihyan che duche ye Ndudo yahn Dendiohs. Ihyan min ne, nduco ye Dendiohs Chida, ne Dendiohs ye.

² Nde nan che canan nducuahn ne, a nduco ye Dendiohs.

³ A nduco ye Dendiohs dendah ye nducuahn. Ndendi ndendita che va ne, a nduco ye dendah ye.

⁴ Ihyan min ne, a va cade che chi ye, ndedevahn ye ihyan iyehñse, ne anduhñeca dave yahn yahn che ri ro dave nan ihyan ne, tihca ihyan min, te chicuahn ye ndudo yahn Dendiohs ihyan.

⁵ Quechica ye van ihyan nunde, chicuahn ye ihyan, ne andahre nahn ndahco ndiya ihyan chahn vederihquentiyon yahn ye, ate hua chicha ye, te vederihquentiyon yahn ye ne, anduhñeca dave yahn yahn che rendihco dave nan che man.

⁶ Ama yune ne, tendahnun Dendiohs ama ihyan che duche ye Juan,

⁷ cah ye vederihquentiyon ihyan che cuahndudo ye ndudo yahn ihyan min che a va cade che chi ye ndedevahn ye ihyan iyehñse, cava che cahnevan nducoyaca ihyan, ne cotahno ye.

⁸ Juan ne, ndiyu man ye che ndedevahn ye ihyan iyehñse, te vederihquentiyon che quenan cuma ye ne, che cuahndudo ye yahn ihyan min che a va cade che chi ye.

⁹ Ro che quechica Juan cahndudo ye ne, a cochi nino ro che cuanan ntiyon yahn ihyan min che cacuahn ye nducoyaca ihyan iyehñse nduhca che nahn Dendiohs che runecade cuahtechica ye.

¹⁰ Ihyan min che duche ye Ndudo yahn Dendiohs ne, nda ye iyehñse, ne andahre nduco ye Dendiohs dendah ye iyehñse, ate ihyan iyehñse ne, chacondah vedame ye ihyan.

¹¹ Nda ye muhn iyehñse cuh che dendah man ye, ate ihyan naci3n yahn ye ne, chacondah vedame ye ihyan.

¹² Me ihyan che nevahñecun ye ihyan, chitahno ye ihyan ne, numacuahn vederihquentiyon yahn ye, ndahco ye ihyan chahn tah Dendiohs, nedin daya ye ihyan.

¹³ Ihyan chahn ne, chi daya Dendiohs ihyan, ndiyu cava ndata yahn ye, nde huane yahn che tihca nahn indihñte yahn ye, te man Dendiohs nedin daya ye ihyan.

¹⁴ Ihyan min che duche ye Ndudo yahn Dendiohs ne, ndo ye nduhca ihyan iyehñse, ne quechica ye neve nduyo van nuhn. Ndiñchero nuhn che ama yudo vederihquentiyon quenan cuma ye, ne tumacadino nuhn che Daya Dendiohs Chida ihyan. Metah nde ama ihyan nduhca ye. Ama chahte vedeyahino quenan cuma ye man, deman ndudo cuaco chicuahn ye man.

¹⁵ Ama yune ne, rahn Juan yahn ihyan min tuhca:

—A ihyan tih che rente yahn ye ro menan me cuahn che rahn ri nchuhn che cochi ama ihyan che tahque chahte vederihquentiyon quenan cuma ye che co u, te a va ye nde ro che metah cuhnde iyehñse.

¹⁶ Ihyan min ne, numacuahn vederihquentiyon chahte yahn ye, redin yahino ye nducoyaco vo.

¹⁷ Ihyan min ne, Dihvo vo Jesucristo, che dechuh Dendiohs ihyan, chicuahn ye Ndudo yahn ye man, yahn vedeyahino yahn ye man, ne chemin ne, tahque yudo che co vederihquentiyon che dirun Moises.

¹⁸ Nde ama ihyan, hua ndihche ye Dendiohs Chida. Ate Dihvo vo Jesucristo, ihyan min che Daya man ye, che ama yahino ye ne, a ihyan min che chicuahn ye uvo taça ye.

Juan Bautista ne, rahn ye yahn Dihvo vo Jesucristo

¹⁹ Ama yune ne, sahn ndinan yahn naci6n yahn Israel che vate se yan Jerusal6n ne, dechuh se ama o chidocuyan ndinan man, sahn levita che redin se cudado nan ta man, che chahn se tumerune se Juan deh vederihquentiyon quenan cuma ye.

²⁰ Juan ne, rahn cuaco ye ri ye sahn chahn:

—U ne, ndiyu ihyan min che a va cade che chi ye ndedevahn ye ihyan iyehanse.

²¹ Tumerune se ihyan:

—¿Duh ndih tuhme ne? ¿A ndih che profeta Elías ne?

Ndahconan Juan yahn se:

—Ndiyu u.

Tumerune tun se ihyan:

—Tuhme, ¿a ndih ihyan profeta che a va cade che chi ye ne?

Ndahconan Juan yahn se:

—Ndiyu u.

²² Ndaconan tumerune se ihyan:

—¿Deh vederihquentiyon quenan cuma ne ne?, te va che necah cuande nuhn ihyan ndinan yahn nuhn che tahve ye nuhn. ¿A hua co cahma ne co ne nuhn deh ntiyon quechica ne ne?

²³ Ndahconan Juan yahn se:

—Ntiyon che quechicá ne, che rahndudó yahn nan che metah duhva nduhca che dirun ihyan profeta Isaías tuhca: “Cuihcuyan nchuhn chedave yahn ne cava che nevahnecon ne Dihvo vo cuahn che nda ye.”

²⁴ Sahn ndinan che dechuh se sahn chahn ne, fariseo se.

²⁵ Rahn se ri se Juan:

—Nducote ndiyu ndih ihyan min che a va cade che chi ye ndedevahn ye ihyan iyehanse, nde huane Elías, nde huane profeta min ne, ¿deh cuande che rehdenune ne ihyan tuhme?

²⁶ Ndahconan Juan, ne rahn ye ri ye sahn:

—Ntiyon che quechicá ne, che rihcoyán chedave yahn ihyan cava che nevahnecon ye Dihvo vo, ne chemin che rehdenuné ihyan. Ihyan min ne, quechica ye naci6n yuhn vo, ne nde hua rendihche nchuhn ihyan.

²⁷ A va ye nde ro che metah cuhnde iyehanse, ne a va cade che chi ye tah cuahn adive che co u. U ne, nde hua rignonun chihvé cava che có mare ama sahn decahya yahn ye.

²⁸ Ro min ne, quenan Juan rehdenune ye ama cuan nan che duche Betábara, chihto ico Jordán, lado cuahn nan che riquendah yahn. Min che chahn sahn chahn tumerune se ihyan.

Juan Bautista ne, rahn ye yahn Dihvo vo Jesucristo che a ihyan min che nedihve ye nunde yahn ihyan iyehanse

²⁹ Tama ro me ne, nda nino Dihvo vo, ne cuahn che ndihchero Juan ihyan ne, rahn ye ri ye ihyan che chenun ye min:

—Condihche nchuhn. A ihyan tih che dechuh Dendiohs ihyan. Nduhca ama itecuche lihn che co te vedino cava nunde yahn ihyan ne, tuhca ye, cahco mendahn ye ihyan coh ye, nedihve ye nunde yahn ihyan iyehanse.

³⁰ A ihyan tih che renté yahn ye ro min cuahn che tuhçá ráhn: “Cochi ama ihyan che tahque chahte vederihquentiyon quenan cuma ye che co u, te a va ye nde ro che metah cuhnde iyehñse.”

³¹ Ro menañ me ne, nde hua devanó che a ihyan tih, ihyan che a va çade che chi ye ndedevahn ye ihyan iyehñse. Ate nducote a devanó che va che chi ye ne, chemin che rehdenuné ihyan nación yuhn vo Israel, çava che cuahteyan ye, ne nevahñecun ye ihyan.

³² Namin ráhn Juan ri ye ihyan chahn:

—Ndiheró Vaco Ndah yahn Dendiohs, nduhçá ama icui, chiya, ne quenun ihyan tih.

³³ Ro menañ me ne, nde hua devanó duh ihyan che a va çade che chi ye ndedevahn ye ihyan iyehñse, ate Dendiohs, ihyan min che deçuh ye u çava che cuehdenuné ihyan yan ne, ráhn ye ri ye u: “Ihyan che ndihchero che co Vaco Ndah yahn, conun ihyan ne, a ihyan min che din ye che conun Vaco Ndah yahn ihyan yahn.”

³⁴ Man ne, a ndihché ihyan, ne ráhn rí nchuhn te Daya Dendiohs ihyan.

Ihyan che chinduco ye Dihvo vo Jesucristo cuahn che canan din ye ntiyon yahn ye

³⁵ Tama ro me ne, a min tun quenan Juan nduco o ihyan che rinduco ye ihyan.

³⁶ Ura min ne, ndihchero ye che chuh Dihvo vo, ne ráhn Juan ri ye ihyan chahn:

—A ihyan tih che dechuh Dendiohs. Nduhçá ama itecuche lihn che co te vedino çava nunde yahn ihyan ne, tihçá ye, te çahco mendahn ye ihyan coh ye, nedihve ye nunde yahn ihyan iyehñse.

³⁷ Chihnevan ihyan che o chahn che tihçá ráhn ye, ne cuahn ye cuahn nan cuahn Dihvo vo çava che conduco ye ihyan.

³⁸ Ndaconan Dihvo vo, ndihchero ye ihyan chahn, ne tumerune ye:

—¿Deh renuhn nchuhn?

Ndahconan ihyan chahn yahn ye:

—Ihyan Ricuahn, nuhn ne, cochi nuhn, te nahn ndihchero nuhn ti vaco ne.

³⁹ Rahn Dihvo vo ri ye ihyan chahn:

—Cuhn vo nduco nchuhn, ndihchero ne.

Tuhme cuahn ihyan chahn nduco ye nan che quenan ye, ne nducote a ri tenduh nan rahco cun a chino ura min ne, chahtenan ye nduco vih.

⁴⁰ Ama cha ihyan chahn ne, duche ye Andrés, dihno Simón Pedro.

⁴¹ Ihyan min ne, cuahn che ndaça ye min ne, dinoca chahn ye chinuhn ye dihno ye Simón, ne cuahn che ntaça vih ye ne, ráhn ye ri ye ihyan:

—Ntaça nuhn ihyan min che Mesías.

Ihyan nación yahn Israel ne, ráhn ye “Mesías” yahn ihyan min che a va çade che chi ye ndedevahn ye ihyan iyehñse.

⁴² Ndetahno quenda ye dihno ye nan quenan Dihvo vo, ne cuahn che ndaça ye ne, ráhn Dihvo vo ri ye ihyan:

—Di ne, doche Simón, daya Jonás, ate man ne, ndahcó che doche Cefas —che nahn çahma Pedro.

Dihvo vo Jesucristo ne, yahve ye Felipe nduco Natanael çava che conduco ye ihyan

⁴³ Cuahn che a chi cun ro min ne, tahñ nun Dihvo vo ama ihyan che duche ye Felipe, ne ráhn ye ri ye ihyan:

—Cuhn vo, condoque u.

Tuhme cuahn Dihvo vo nduco ihyan che rinduco ye ihyan estado yahn Galilea.

⁴⁴ Felipe ne, yan Betsaida yan vaco ye. Dama yan vaco ye nduco Andrés man, Pedro man.

⁴⁵ Ura che cuahn Felipe ne, chinuhn ye ama amigo yahn ye che duche ye Natanael, ne rahn ye ri ye ihyan:

—Ntaca nuhn ihyan min che dirun Moisés man, ihyan profeta man, yahn ye. Ihyan min ne, duche ye Jesús daya José. Nazaret yan vaco ye.

⁴⁶ Rahn Natanael ri ye Felipe:

—¿Taca che yan min quendah ama ihyan che cochihve ye?

Ndahconan Felipe yahn ye:

—Cuhn vo ndoque, ne ndihchero man.

⁴⁷ Cuahn che nda ihyan chahn min ne, nte Dihvo vo yahn Natanael, ne rahn ye:

—Ihyan cuh che cuaco ne, redin yahn che cahmo vo yahn ye che ihyan naci6n yahn Israel ihyan, te hua o nan o chende ye.

⁴⁸ Cuahn ino Natanael, ne rahn ye:

—¿Taca che a rendihche ne u?

Ndahconan Dihvo vo yahn ye:

—Ndhichero di nde ura che metah yahve Felipe di, ura che ve min man yahn higo me, ne a checadin6 nduhca ihyan di.

⁴⁹ Tuhme rahn Natanael ri ye ihyan:

—Ihyan Ricuahn, ndih che Daya Dendiohs, ndih che Rey yahn naci6n yuhn vo Israel.

⁵⁰ Rahn Dihvo vo ri ye ihyan:

—Chitehne u, yahn che rahn ri di che ndihchero di man yahn higo me man, yahn che checadin6 nduhca ihyan di man, ate rahn ri di te nde hua cahñ ine cava chemin, te comañ ndihchero vederihno che tahque rahte ca.

⁵¹ Namin rahn ye ri ihyan chahn:

—Cuaco rahn ri nchuhn te cuhnde ro vederihquentiyon chahte yahn Dendiohs che te ye quenán cumá, ne anduhneca ndete che condah vahchetero, ndihchero ne u che rinducó nducoyaca ihyan, che cuahn cochi ángel yahn ye nan.

2

Vihco che rihnevaco ihyan yan Caná, estado yahn Galilea

¹ Cuahn che a co ino ro che chinduco Felipe man, Natanael man, Dihvo vo ne, chihnde ama vihco che rihnevaco ihyan, ama yan che duche Caná, estado yahn Galilea. Chaco Dihvo vo ne, a quenán ye min.

² Namin Dihvo vo nduco ihyan che rinduco ye ihyan ne, yahve ihyan che redin vihco me ihyan cava che cahñ ye conduco ye.

³ Cade mendahn vihco me ne, a chihno vino, ne rahn chaco Dihvo vo ri ye ihyan:

—A chihno vino yahn ihyan sih. ¿A hua conen tah ihyan?

⁴ Ate rahn Dihvo vo ri ye ihyan:

—Chacó, metah deh cuande che cahma ne nducó yahn vino, te metah nda ura che cuhnde ro vederihquentiyon che quenán cumá.

⁵ Tuhme rahn chaco ye ri ye sahn che chenán se rinan se nan vihco me:

—Codinahn nchuhn nducuahn che cahcantiyon ye.

⁶ Min vate an chite rahte che demañ tu ndi ndah. Chite chemin chan ne, che retoh ihyan naci6n yahn Israel, rih ye nune che reñano ye dehtenduh

çava che co vihco nduhça costumbre yahn ye. Queri ama chite chemin çan ne, rahn tenduh ama ciento litro nune.

⁷ Rahn Dihvo vo ri ye sahn çahn:

—Cuedecuto nchuhn nune chite che tihchan vate tan.

Cuahn che a çihno decuto nahn se chite çahn ne,

⁸ tuhme rahn Dihvo vo ri ye sahn:

—Mañ ne, cuetendah nchuhn tah, ne çah ne ndaço ndihte.

Dinahñ sahn çahn,

⁹ ne çah se ndaço ndihte me, deçihñ ye. Nune me ne, a ntaçonda vino, nde hua devano ndaço ndihte me ti chica, atenañ sahn çahn. Tuhme çah ye sahn che rihnevaco me,

¹⁰ ne rahn ye ri ye sahn:

—Nducoyaça ihyan che redin ye vihco ne, dinoca vino ndah reça ye, ne cuahn che a ya ndih ihyan ne, reça ye vino ndere. Me di ne, ¿dehra cuande che denderen che redin, nde mañ tendah vino ndah?

¹¹ Tihça çhi che canañ din Dihvo vo vederihno, min yan Caná, estado yahn Galilea, çihco ro ye che ama yudo vederihquentiyon che quenan cuma ye, ne ihyan che rinduco ye ihyan ne, çitahno ye ihyan.

¹² Çihno min ne, cuahn Dihvo vo yan Capernaum nduco çaco ye mañ, diho ye mañ, ihyan çahn che rinduco ye ihyan mañ, ne min chahtenan ye nduco vih neve ro.

Dihvo vo Jesucristo ne, ndetendah ye sahn che rendihcue se dehtenduh, çhenun se çete yaço

¹³ Cuahn che a nda nino vihco ro yudo che renuan van ihyan nación yahn Israel ne, cuahn Dihvo vo yan Jerusalén.

¹⁴ Cuahn che nda ye min ne, cuahn ye çete yaço chahte, ne min çhenun sahn che rendihcue itenine mañ, sahn che rendihcue itecuche mañ, sahn che rendihcue icui mañ. Namin min çhenun sahn che rendahcorun tume, vate se nañ mesa yahn se.

¹⁵ Tuhme din çhine ye ama ndi ihyo, ne nduco chemin ndetendah ye sahn çahn çete yaço, nde nduco itenine yahn se mañ, itecuche yahn se mañ. Me sahn che rendahcorun tume çahn ne, çih muñ çih min ye mesa yahn se, çihtera ye tume me ndiyahn.

¹⁶ Me sahn che rendihcue icui çahn ne, rahn ye ri ye sahn:

—¿Cuahn nchuhn cuahn chevah nduco dehtenduh yahn ne! ¡Hua tuma ne yaço yahn Chidá çava che ndihcue ne dehtenduh yahn ne!

¹⁷ Ura min ne, nta tin ihyan che rinduco ye ihyan nduhça che a ndirun yahn ye nañ Ndudo yahn Dendiohs tuhça: “¡Ama yahnó yaço yahn ne! ¡Hua cuahneçún che ndere din ihyan, cuahtenun ye çete!”

¹⁸ Sahn ndinañ yahn nación yahn Israel che redin se cudado min ne, rahn se ri se Dihvo vo:

—Codin ama vederihno, ndihçhero nuhn, cuhnde ro deh vederihquentiyon che quenan come che tihça redin.

¹⁹ Rahn ye ri ye sahn:

—Ndete che ndahtera nchuhn yaço cuh ne, cuihno ino ro ne, nedin numá.

²⁰ Tuhme rahn se ri se ihyan:

—O raco añ nduyo çendah ihyan, che dendah ye yaço cuh, ¿a rahque che nduco ino ro no nedin nome?

²¹ Sahn çahn ne, hua çenahn se. Raçco se che yahn yaço che nti min che tihça rahn ye. Ate rahn ye yahn mañ ye, ndiyu yahn yaço.

²² Nda ro che ndedetuhche Dendiohs ihyan van tenahn ne, tuhme nta tin ihyan apóstol yahn ye yahn che tihça rahn ye, ne çitahno ye Ndudo yahn

Dendiohs, chenahn ye che nduco ndudo che tihca rahn ye ne, conahn che va che ntuche ye van tenahn.

Dihvo vo Jesucristo ne, a devano ye deh che rendedecadino ihyan

²³ Numanahn che quenah Dihvo vo yan Jerusalén ro yudo me ne, ama yahn ihyan chitahno ye ihyan, yahn vederihno che din ye.

²⁴ Ate Dihvo vo ne, hua chichahtino ye ihyan chahn, te a devano ye nduhchan ihyan iyehense, rendacorun ye vederendedecadino yahn ye.

²⁵ Hua rendotenan ye che cahma ihyan nduco ye tachan ye, te a man ye devano ye deh che rendedecadino queri ama ihyan.

3

Nicodemo ne, chendihchero ye Dihvo vo Jesucristo

¹ Chihnde ama ihyan, partido yahn fariseo, che duche ye Nicodemo. Ihyan min ne, nduco ye van ihyan ndinan yahn ihyan nación yahn Israel.

² Tuma ye ama vino, chahn ye chendihchero ye Dihvo vo, ne rahn ye ri ye ihyan:

—Ihyan Ricuahn, a devano nuhn che Dendiohs dechuh ye ndih cava che cacuahn ne nuhn, te nde ama ihyan hua co din ye vederihno che redin ne, ndete che hua nduco Dendiohs ihyan.

³ Tuhme rahn Dihvo vo ri ye ihyan:

—Cuaco rahn ri ndih te cava che nedin yahn Dendiohs ihyan, cahcantiyon ye ihyan ne, va che cuahteyan ye quenuma ra.

⁴ Cuahn ino Nicodemo chi, ne rahn ye ri ye ihyan:

—¿Taca chemin? ¿Taca co ndonun ama ihyan che a ndico ye chete chaco ye cava che ndaconan cuhndeyan ye?

⁵ Ndahconan Dihvo vo, ne rahn ye ri ye ihyan:

—Cuaco rahn ri ndih te ne, atenan ihyan che din Vaco Ndah yahn Dendiohs che ndacorun vederendedecadino yahn ye, ndo ye ihyan ra, cuedenune ye ne, atenan ihyan chahn che nedin yahn Dendiohs ihyan, cahcantiyon ye ihyan.

⁶ Daya ihyan iyehense ne, ihyan nunde. Ate ihyan che redin Vaco Ndah yahn Dendiohs che rendacorun vederendedecadino yahn ye, rendo ye ihyan ra ne, quenun Vaco Ndah yahn Dendiohs ihyan.

⁷ Hua cahn ino ne yahn che rahn ri ndih: “Nducoyaca ihyan, nahn che ndacorun vederendedecadino yahn ye, ndo ye ihyan ra.”

⁸ Yuhne ne, rano muhn min, ne andahre rihnevan ne, ate hua devano ne ticuahn rechi, nde huane ticuahn rahn. Atihnoca Vaco Ndah yahn Dendiohs, te hua devano ne taca redin che rendacorun vederendedecadino yahn ihyan, rendo ye ihyan ra.

⁹ Tuhme tumerune Nicodemo ihyan:

—¿Taca che rahn ne?, te hua renahn.

¹⁰ Rahn Dihvo vo ri ye ihyan:

—¿Taca che ihyan ricuahn yahn ihyan nación yahn Israel ndih, ne hua renahn ne che rahn nduco ne?

¹¹ Cuaco rahn ri ndih te nuhn ne, rahn nuhn ri nuhn nchuhn yahn dehtenduh che devano nuhn man, che a ntihche nuhn man, ate nchuhn ne, hua ritahno ne.

¹² Nducote hua ritahno nchuhn che renté nduco ne yahn dehtenduh che ri iyehense ne, tahque hua cotahno ne ndete che nté nduco ne yahn vahchetero.

13 'Nde *ama* *ihyan* *iyeh* *nse* *ne*, *hua* *nahn* *ye* *vahchetero*, *çava* *che* *co* *nte* *ye* *yahn*. *Atenan* *u* *che* *rinducó* *nducoyaca* *ihyan*, *te* *min* *chicá*, *ne* *min* *va* *che* *ndaconán*.

14 *Nduhca* *che* *chaconahn* *Moisés* *cu* *che* *ntave* *ye* *me* *tin* *ama* *yahn* *min* *yahn* *nán* *che* *metah* *duhva* *ne*, *tihca* *u* *che* *rinducó* *nducoyaca* *ihyan* *ne*, *va* *che* *cuaconahn* *yah* *ihyan* *u* *nán* *ama* *cruz*,

15 *çava* *che* *ndevahn* *nducoyaca* *ihyan* *che* *cotahno* *ye* *u*, *cuahtenan* *ye* *vahchetero* *numacuahn* *ro*.

Nduhca che din yahino Dendiohs ihyan iyeh

16 *Tihca*, *te* *ama* *yahino* *Dendiohs* *ihyan* *iyeh* *nse*, *ne* *andahre* *ama* *ndiyahn* *ra* *Daya* *ye*, *ate* *chihco* *mendahn* *ye* *ihyan*, *çava* *che* *nducoyaca* *ihyan* *che* *cotahno* *ye* *ihyan* *min* *ne*, *ndevahn* *ye*, *cuahtenan* *ye* *vahchetero* *numacuahn* *ro*.

17 *Dechuh* *Dendiohs* *Daya* *ye* *muhn* *iyeh* *nse* *cuh*, *ndiyu* *çava* *che* *din* *ye* *castigo* *ihyan* *iyeh* *nse*, *ate* *çava* *che* *cotahno* *ihyan* *iyeh* *nse* *ihyan* *min*, *ndevahn* *ye* *ihyan*.

18 *Ihyan* *che* *ritahno* *ye* *Daya* *Dendiohs* *ne*, *hua* *co* *ye* *castigo*. *Ate* *ihyan* *che* *hua* *ritahno* *ye* *ne*, *a* *vate* *mendahn* *ye* *che* *co* *ye* *castigo*, *te* *hua* *ritahno* *ye* *Daya* *man* *Dendiohs*.

19 *Ihyan* *che* *hua* *ritahno* *ye* *Daya* *Dendiohs* *ne*, *a* *vate* *mendahn* *che* *co* *ye* *castigo*, *te* *nda* *ihyan* *min* *muhn* *iyeh* *nse* *cuh*, *chicuahn* *ye* *Ndudo* *yahn* *Dendiohs*, *ate* *ihyan* *chahn* *ne*, *tahque* *yeno* *ye* *che* *quendi* *ye* *cuahtendihco* *ye* *nunde*, *ne* *chemin* *che* *hua* *chitahno* *ye*.

20 *Nducoyaca* *ihyan* *che* *riquendi* *ye* *rahtendihco* *ye* *nunde* *ne*, *rahcotahn* *ye* *yahn* *Ndudo* *yahn* *Dendiohs*. *Hua* *renevah* *necun* *ye*, *te* *hua* *nahn* *ye* *che* *cuhnde* *ro* *nunde* *yahn* *ye*.

21 *Ate* *ihyan* *che* *runecade* *vatechica* *ye* *ne*, *renevah* *necun* *ye* *Ndudo* *yahn* *Dendiohs*, *çava* *che* *cuhnde* *ro* *che* *rinduco* *Dendiohs* *ihyan* *nán* *dehtenduh* *che* *redin* *ye*.

Juan Bautista ne, quendi ye nte ye yahn Dihvo vo Jesucristo

22 *Chihno* *min* *ne*, *cuahn* *Dihvo* *vo* *nduco* *ihyan* *che* *rinduco* *ye* *ihyan*, *estado* *yahn* *Judea*. *Min* *chahtenan* *ye* *neve* *ro*, *ne* *chidama* *ihyan*, *chedenune* *ye*.

23-24 *Ro* *min* *ne*, *metah* *din* *se* *preso* *Juan*, *ne* *quenan* *ye* *ama* *cuán* *nán* *che* *duche* *Enón*, *nino* *yán* *Salim*, *rehdenune* *ye* *ihyan* *che* *renda* *ye*, *te* *min* *ne*, *ama* *va* *nune*.

25 *Tahn* *min* *ne*, *nda* *ama* *o* *sahn* *ndinan* *yahn* *nación* *yahn* *Israel*, *ne* *chahtecuhn* *chende* *se* *nduco* *ihyan* *che* *rinduco* *ye* *Juan*, *nda* *hchenan* *se* *che* *redenune* *ihyan*.

26 *Tuhme* *chahn* *ihyan* *chahn* *chengo* *ye* *Juan*:

—*Ihyan* *Ricuahn*, *ihyan* *che* *nduco* *ne* *cuahn* *che* *quenan* *ne* *viche* *lado* *çah* *yahn* *ico* *Jordán*, *che* *nte* *ne* *yahn* *ye* *nduco* *nuhn* *ne*, *man* *ne*, *rehdenune* *ye* *ihyan*, *ne* *ama* *yahn* *ihyan* *rinduco* *ye* *ihyan*.

27 *Rahn* *Juan* *ri* *ye* *ihyan*:

—*Querí* *ama* *vo* *ne*, *a* *man* *Dendiohs* *ndihco* *ye* *tah* *vo* *ntiyon* *che* *redin* *vo*.

28 *A* *rahn* *cuacó* *rí* *nchuhn* *te* *ndiyu* *u*, *ihyan* *che* *a* *va* *cade* *che* *chi* *ye* *ndevahn* *ye* *ihyan* *iyeh* *nse*, *te* *ntiyon* *che* *ndihco* *Dendiohs* *tah* *ne*, *che* *cahcoyán* *chedave* *yahn* *ihyan* *çava* *che* *nevahnecun* *ye* *ihyan* *min*.

29 *Nán* *vihco* *che* *rihnevaco* *ihyan* *ne*, *ama* *ri* *yeno* *nda* *co* *ndihte* *cuahn* *che* *ndihchero* *ye* *che* *yeno* *sahn* *che* *cahnevaco* *se*, *te* *a* *devano* *ye* *te* *nda* *hca*

rinahn ntiyon che quenan ye. Atihnoçá u, te ama ri yenó yahn che ama ri yahn ihyan rinduco ye ihyan min.

³⁰ Ihyan min ne, a va çade che co chahte ntiyon yahn ye, ne u ne, a va çade che cuihno ntiyon yáhn.

Dihvo vo Jesucristo ne, a vahchetero chica ye che ndá ye muhn iyehñse cuh

³¹ Dihvo vo ne, chica ye vahchetero, ne ndinan ye yahn nducoyaço vo. Ihyan iyehñse ne, rahndudo ye demañ yahn dehtenduh che ri iyehñse cuh.

³² Ihyan min ne, rahndudo ye yahn dehtenduh che ri vahchetero, che ndihche ye mañ, chihnevan ye mañ, ate atenañ ama o ra ihyan ritahno ye.

³³ Ihyan che ritahno ye ne, reçañ dito ye Ndudo yahn Dendiohs che rahndudo ihyan min, rihco ro ye che cuaço.

³⁴ A Dendiohs dechuh ye ihyan min, din ye che quenun Vaco Ndah yahn ye ihyan, quenan cuma ye nducuañ vederihquentiyon yahn. Chemin che numacuañ vederihquentiyon min rahndudo ye Ndudo yahn Dendiohs.

³⁵ Dendiohs Chida ne, yahino ye ihyan min che Daya ye, ndahco ye nducuañ vederihquentiyon tañ ye.

³⁶ Ihyan che ritahno ye ihyan min che Daya Dendiohs ne, cuahtenan ye vahchetero numacuañ ro. Ate ihyan che hua ritahno ye ihyan min ne, hua ndaçá vahchetero cuahtenan ye. Tahque ndah ne, ama yah castigo din Dendiohs ihyan.

4

Ama tañh nación yahn Samaria, chitahno te Dihvo vo Jesucristo

¹ Tañh min ne, ama yahn ihyan rinduco ye Dihvo vo, redenune ye, ne checadino sañh fariseo che tahque yahn ihyan rinduco ye Dihvo vo che co Juan.

² Ndiyu mañ Dihvo vo che rehdenune ye ihyan chahn, te ihyan apóstol yahn ye.

³ Nducote hua nahn Dihvo vo che co yudo yahn sañh chahn, yahn che ama yahn ihyan rinduco ye ihyan ne, chica ye min estado yahn Judea, conañ ye estado yahn Galilea.

⁴ Yune cuañh nañ che cuañh ye ne, chuh nación yahn Samaria.

⁵⁻⁶ Ama ro, tenduh nañ inguiyahn ne, ndá ye chihto ama yan yahn Samaria che duche Sicar, nañ yahn yahn Jacob che chihco ye yahn daya ye José. Min va ama pozo nune che duche Pozo yahn Jacob, ne nducote ndi cuno Dihvo vo ne, cuañh ye chihnde ye chihto pozo me.

⁷⁻⁸ Ihyan apóstol yahn ye ne, cuañh ye viyan me cua ye dehtenduh che cheh ye nduco viñ. Ura min ne, ndá ama tañh yan min nañ pozo me tendah te nune, ne rañh Dihvo vo ri ye tañh:

—¿A hua te tah nune, cúh?

⁹ Cuañh ino te, ne rañh te ri te ihyan:

—¿Taça che rica ne nune cuh ne u?, te ndih ne, ihyan nación yahn Israel ndih, ne u ne, ihyan nación yahn Samaria u.

(Tihça rañh te, te ihyan nación yahn Israel ne, nde hua rente ye nduco ihyan nación yahn Samaria.)

¹⁰ Tuhme rañh Dihvo vo ri ye tañh:

—Nde hua reneñh yahn vedeyahino yahn Dendiohs, nde hua devene duh u che ricá nune di, te ndete che devene ne, man caque nune u, nune min che vedevihche yahn ihyan iyehñse.

¹¹ Rañh te ri te ihyan:

—Pozo cuh ne, ama yano, ne ndih ne, nde hua nda ne deh che tendah nduco ne nune, ¿ti ra ngua ne nune che rahn ne che te ne u?

¹² Ihyan ndico yahn nuhn Jacob, chino ye pozo cuh, chichihve yahn man ye man, yahn daya ye man, yahn ite ndata yahn ye man, ne man ne, nuhnde tah nuhn. ¿A rahco ne che tahque rigonun chihve ne che co ihyan min?

¹³ Rahn ye ri ye tahn:

—Nducoyaca ihyan che cuh ye nune tih ne, ndaconan co yaca ye.

¹⁴ Ate ihyan che cuh ye nune che cah ne, ametah ndaconan co yaca ye, te nune min ne, hua nda ro che tihnan, ne din che cuahtenan ye vahchetero numacuahn ro.

¹⁵ Tuhme rahn te ri te ihyan:

—Te ne nune che rahn ne me, cúh, cava che ametah ndaconan co yaca, ne hua conan cuma che chí tendah nan pozo cuh.

¹⁶ Rahn ye ri ye tahn:

—Cuehn ngua inchahn, tuhme cochi nduco se.

¹⁷⁻¹⁸ Ndahconan te yahn ye:

—Metah inchahn.

Tuhme rahn ye ri ye tahn:

—Cuaco rahn che metah inchahn, te ro menan ne, uhn inchahn nenan come, ate sahn che quenan come man ne, ndere quenen nduco se.

¹⁹ Cuahn che chihnevan te che tihca rahn ye ne, rahn te ri te ihyan:

—Che tihca rahn ne ri ne u ne, a ndero ndi che ihyan profeta ndih.

²⁰ Ihyan ndico yahn nuhn ne, muhn cuete cuh rechi ye rendeva ye yavenan Dendiohs, ne nchuhn ihyan nación yahn Israel ne, rahn ne te min yan Jerusalén va che ndeva vo yavenan ye. ¿Cha che cuaco ne?

²¹ Ndahconan ye yahn te:

—Cuedevene te ndiyu deman cuete cuh, nde huane deman yan Jerusalén ndeva ihyan yavenan Dendiohs Chida, te a nda ro che, adecotino che chenah ihyan ne, a min no co ndeva ye yavenan ye.

²² Nchuhn, ihyan nación yahn Samaria ne, nde hua devano ne taca va cade che ndeva ihyan yavenan Dendiohs. Ate nuhn ihyan nación yahn Israel ne, a devano nuhn, te a van ndata yahn nuhn, quendah ihyan che ndedevahn ye ihyan iyehanse.

²³ A nda ro che ihyan che redin yahn che cahmo vo che rendeva ye yavenan Dendiohs Chida ne, rendeva ye yavenan ye numacuahn chedave yahn ye man, numa cuaco man, te ihyan min ne, nahn ye che tihca ndeva ihyan yavenan ye.

²⁴ Dendiohs ne, ama Vaco, ne ihyan che rendeva ye yavenan ye ne, nahn che ndeva ye numacuahn chedave yahn ye man, numa cuaco man.

²⁵ Rahn te ri te ihyan:

—A devano che va che chi ihyan min che Mesías, che a va cade che ndedevahn ye ihyan iyehanse, ne cuahn che nda ye ne, te cuande ye uvo yahn nducuahn.

²⁶ Rahn ye ri ye tahn:

—A u, ihyan min, che renté ndoque.

²⁷ Ura min nta ihyan apóstol yahn ye, ne cuahn ino ihyan chahn che rente ye nduco ama ndahta, ate nde ama ye hua chihquino ye tumerune ye ihyan deh chica ye tahn man, deh yahn che rente ye nduco te man.

²⁸ Tuhme chihco te cuhte yahn te min, conahn te, ne rahn te ri te ihyan viyan:

29 —Cochi nchuhn ndihchero ne ama ihyan che rahn ye ri ye u nducuahn che nedín. Co a ihyan min che a va cade che chi ye ndedevahn ye ihyan iyehse.

30 Tuhme cuahn ihyan yan quendihchero ye Dihvo vo.

31 Numanahn min ne, rahn ihyan apóstol yahn ye ri ye ihyan:

—Ihyan Ricuahn, za hua cheh inguiyahn ne?

32 Ndahconan ye, ne rahn ye ri ye ihyan chahn:

—U ne, va ama comida yáhn, che nde hua devano nchuhn yahn.

33 Ate hua chenahn ihyan chahn deh conahn che tihca rahn ye, ne rente ye van man ye nduco vih:

—¿A va duh che checu che cheh ye, che tihca rahn ye?

34 Tuhme rahn ye ri ye ihyan chahn:

—Che dináhn nan ntiyon yahn Dendiohs, ihyan min che dechuh ye u ne, chemin che vedeyeno yáhn, anduhneca ama comida yáhn.

35 Nchuhn ne, rahn ne te renda ca te cun iyo cava che ndevahn ihyan ndute ndata. Ate u ne, rahn rí nchuhn te, nde meniyon ne, ama yahn ihyan vateyan ye cava che cahcovan ye Ndudo yahn Dendiohs che cuahndudo ne.

36 Nan ntiyon yahn ihyan ne, nahn cuán ne, ama ye rino ye ndute ndata, ne tama ye rendevahn ye cuahn che a ri yahn. Atihnoca nan ntiyon yahn Dendiohs, te nahn cuán ne, ama ye ranan ye rahndudo ye Ndudo yahn Dendiohs, ne tama ye riquendi ye, tuhme ritahno ihyan. Ihyan che ritahno ye ne, rendevahn ye, ne cuahtenan ye vahchetero numacuahn ro. Me ihyan che redin ye ntiyon min, ihyan che rahndudo ye menan man, ihyan che rahndudo ye cuahn che a ritahno ihyan man ne, rahte yeno ama tama ye nduco vih.

37 Nducote tihca ne, riquenda cuaco ndudo che tuhca rente ihyan: “Ama ye rino ye ndute ndata, ne tama ye rendevahn ye cuahn che a ri yahn.”

38 U ne, dechuh nchuhn, cuahndudo ne Ndudo yahn Dendiohs nan che a vih ihyan nedin ye ntiyon, ne ndonda tah ne ntiyon min quendi ne.

39 Ama yahn ihyan yan min, rente tahn min nduco ye yahn che rahn Dihvo vo ri ye tahn nducuahn che nedin te, ne chitahno ye ihyan.

40 Chemin che cuahn che nda ihyan yan chahn nan Dihvo vo ne, yahve ye ihyan che conan ye min. Quenan ye yan min o ro,

41 ne nde tahque yahn ca ihyan chitahno ye ihyan cuahn che chihnevan ye che rahndudo ye.

42 Tuhme rahn ihyan yan chahn ri ye tahn min:

—Chitahno nuhn ihyan min, yahn che nte yahn ye nduco nuhn. Ate man ne, tahque chichahtino nuhn ihyan, te chihnevan man nuhn che rahndudo ye. A devano cuaco nuhn te a ihyan min che a va cade che chi ye ndedevahn ye ihyan iyehse.

Dihvo vo Jesucristo ne, din ye che ndoyahn ama sahn dihn, daya ama sahn ndinan

43 Chihno nduh che o ro min ne, chica Dihvo vo yan min cuahn ye cuahn estado yahn Galilea.

44 Nducote man ye rahn ye te atenan ihyan tama yan che renevah necun ye ihyan profeta, ndiyu ihyan yan vaco ye ne, chemin che cuahn ye min.

45 Cuahn che nda ye ne, ihyan che vate ye min ne, ama nevah necun ye ihyan, te vamin chahn ihyan chahn yan Jerusalén vihco ro yudo, ne ndihchero ye vederihno che din ye min.

46-47 Cuahn che quechica ye min estado yahn Galilea ne, nda tun ye yan Caná, yan min nan che din ye vederihno, din ye che ndacondá vino nune

me. Numanahn che quenan ye yan min ne, nda ama sahn ndinan che va se yan Capernaum, rinuhn se ihyan. Sahn min ne, ama cah sahn dihn yahn se, adeche coh se, ne chemin che, cuahn che checadino se che a ndaconan Dihvo vo che chahn ye estado yahn Judea ne, chahn se yahve se ihyan. Chica se favor ihyan che cahn ye ndevaco se, din ye che ndoyahn daya se.

⁴⁸ Tuhme rahn Dihvo vo ri ye sahn:

—Nchuhn ne, nde hua cotahno ne ndete che hua ndihchero ne vederihno.

⁴⁹ Ate rahn se ri se ihyan:

—Co din favor, ne cuhn vo nduco ne, te adeche coh daya.

⁵⁰ Tuhme rahn ye ri ye sahn:

—Co ndaconen conahn, te sahn daye ne, a ndoyahn se.

Chitahno se che rahn ye, ne conahn se.

⁵¹ Ura che a nta nino se ndevaco se ne, chahn ama o mozo yahn se chendi yune se sahn, ne rahn se ri se sahn:

—Sahn dihn yahn ne, a ndoyahn se.

⁵² Tumerune se sahn chahn deh ura canan chihnde dihn yahn daya se. Ndahconan sahn chahn yahn se:

—Ico, nan rahco ama a chino, chavi ihno che netah sahn.

⁵³ Tuhme nta tin sahn ndinan me che a ura min rahn Dihvo vo nduco se che a ndoyahn daya se, ne chemin che chitahno se ihyan nduco nducoyaca ihyan yahn se.

⁵⁴ Nduco chemin chi o yune che din Dihvo vo vederihno estado yahn Galilea.

5

Dihvo vo Jesucristo ne, din ye che ndoyahn ama sahn che ndi cheche se ama cuan nan che duche Betesda

¹ Cuahn che quenan ca Dihvo vo estado yahn Galilea ne, quenun ama vihco yahn ihyan naci6n yahn Israel min yan Jerusal6n, ne cuahn Dihvo vo vihco me.

² Ama chendevah yahn chete che ndacoriya yan min ne, duche Chendevah yahn Itecuche. Nino chendevah min ne, va ama tanque nune che duche Betesda, che devaco hebreo. Chihto tanque me ne, chendihco uhn corredor,

³ ne min chenun ama yahn ihyan che ve nan ye man, ihyan che neneva doh cah ye man, ihyan che ndi cheche ye man, chenan rino ye ura che nuhn nune me.

⁴ Yahn quenun riya ama 6ngel, rendahchetahn ye nune me, ne ihyan che conun cond6 ye van nune me ura che cuihno ndahchetahn ne, ndoyahn ye, adcodehno che ndi yahn ye.

⁵ Min quendite ama sahn che a ri ndico ntihyon ino nduyo che ndi cheche se.

⁶ Nda Dihvo vo min, ne ndihchero ye sahn. Checadino ye che a rahn cuahn ndi cheche se, ne tumerune ye sahn:

—¿A nehn che ndoyehn ne?

⁷ Ndaconan se yahn ye:

—Taca hua. Nahn che ndoyahn, ate metah duh ihyan che quenda ye u van nune ura che nuhn. Queri ama yune che redin fuerza, nahn cond6 van nune ne, tama ca ihyan rechuhnan ye u, renda ye.

⁸ Tuhme rahn Dihvo vo ri ye sahn:

—Cuenecuen, condo tah yundo yehn, ne cuique.

⁹ A ndetahno ndoyahn sahn min, ndo tah se yundo yahn se, ne canan rica se. Ro min ne, ama ro che rahtetuhno ihyan,

¹⁰ ne ama o sahn ndinan yahn naci6n yahn Israel ne, rahn se ri se sahn che ndoyahn me:

—Man ne, ro che rahtetuhno vo. Hua redin yahn che din ntiyon, quenohn yundo yehn.

¹¹ Ndahconan sahn min, ne rahn se ri se sahn chahn:

—Hua te, a man ihyan che din ye che ndoyahn, chihquentiyon ye che quenuhn yundo yahn, ne cacá.

¹² Tuhme tumerune sahn chahn sahn:

—¿Duh ihyan min che chihquentiyon ye che quenohn yundo yehn, caque ne?

¹³ Ate sahn min ne, nde hua devano se che a Dihvo vo Jesucristo che din ye che ndoyahn se, te ama yahn ihyan chenun ye min, ne ndetahnno chenda ye van ihyan, cheh nan se ihyan.

¹⁴ Adiva ne, ndihchero Dihvo vo sahn, quenun se chete yaco, ne rahn ye ri ye sahn:

—Cuihcoven che cahmá có di. Man che a ndoyehn ne, ametah ndaconen condihque nunde cava che hua cotah tama cah di, din che tahque chuhrihn.

¹⁵ Tuhme chahn sahn min, chengo se sahn ndinan chahn che a Dihvo vo che din ye che ndoyahn se.

¹⁶ Nducote a ro che rahtetuhno ihyan redin Dihvo vo che rendoyahn ihyan cah ne, chemin che din tan sahn chahn nduco ye, nahn cahno se ihyan.

¹⁷ Ama yune ne, rahn Dihvo vo ri ye sahn chahn:

—Chidá ne, cuahn dama redin ye che ndah cava ihyan, ne u ne, riquendí yune yahn ye.

¹⁸ Che tihca rahn ye ne, nde tahque chi tan sahn ndinan chahn, nahn cahno se ihyan, te cuahn che rahn ye te a Dendiohs che Chida ye ne, rahco se te duche rino ye ihyan, nahn co ye dama nduhca ihyan min. Avane ne, nducote redin Dihvo vo che rendoyahn ihyan cah, andahre ro che rahtetuhno ihyan ne, rahco se te rahcotahn ye che rihquentiyon ley nduhca che rahtetuhno ihyan.

Vederihquentiyon che quenana cuma Dihvo vo Jesucristo

¹⁹ Tuhme rahn Dihvo vo ri ye sahn chahn:

—Cuaco rahn rí nchuhn te hua co dín nde ama nan ntiyon che ndiyu ntiyon yahn Chidá. Nducuahne che redin ye ne, namin redín.

²⁰ Chidá ne, yahino ye u, ne man ye nduco ye u redin ye nducuahne vederihno. Nde va ca vederihno che tahque rahte che din ye, ne ama cahñ ino nchuhn.

²¹ Cuahn che man náhn ne, nde ndedetuhché tenahn, nduhca che redin Chidá.

²² Chidá ne, ndahco ye vederihquentiyon yahn ye tahn, cava che techecadé yahn nducoyaca ihyan,

²³ te nahn ye che ndeva ihyan yavenan nduhca che rendeva ihyan yavenan ye. Ihyan che hua rendeva ye yavenan ne, namin hua rendeva ye yavenan Chidá, ihyan min che dechuh ye u.

²⁴ Cuaco rahn rí nchuhn te ihyan che rihcovan ye ndudo yahn, ne ritahno ye ihyan min che dechuh ye u ne, cuahtenan ye vahchetero numacuahn ro. Ihyan chahn ne, hua conda ye, te ndevahn ye.

²⁵ Cuaco rahn rí nchuhn te nducoyaca ihyan nunde ne, anduhneca ndete che a ndih ye nan Dendiohs. Man ne, a nda ro che cahnevan ye ndudo yahn, ne nducoyaca ye che cotahno ye ne, ndevahn ye.

26 Tihca, te Chidá ne, quenan cuma ye vederihquentiyon cava che ndedevahn ye ihyan iyehense, ne ndahco ye vederihquentiyon min táh.

27 Namin ndahco ye vederihquentiyon táh cava che techecadé yahn ihyan iyehense, te a u che rinducó nducoyaca ihyan.

28 Hua cahñ ino nchuhn che tihca ráhn, te ndá ro che, nducoyaca tenahn ne, cahnevan ye ndudo yáhn,

29 ne ntuche ye. Ihyan che ndah din ye chahtenan ye iyehense ne, cuahtenan ye vahchetero, ne ihyan che hua ndah din ye ne, co ye castigo.

Nduhca che a ndero ndi vederihquentiyon yahn Dihvo vo Jesucristo

30 'Che tin demán ne, hua co dín nde ama nan dehtenduh. Retechedadé nduhca che rihquentiyon Dendiohs Chida u, ne nducuahn che retechedadé ne, numa cuaco, te a ndudo yahn ihyan min ndiyu ndudo yahn mán.

31 Cuahn che rendonán vederihquentiyon che quenan cumá ne, nde hua richihve che renté, che rahco nchuhn.

32 Ate che rendonan Dendiohs vederihquentiyon yáhn ne, a ndero ndi che cuaco, te ihyan min ne, cuaco nducuahn che ráhn ye.

33 Nchuhn ne, tahve ne sahn che tumerune se Juañ, ne ndudo che ndahconan ye yahn ne yahn vederihquentiyon che quenan cumá ne, cuaco.

34 U ne, hua rendotenan che ihyan iyehense cahma nan ye u, ate ntihton yán ndudo che ndahconan ye yahn ne, cava che cotahno ne u, ne ndevahn ne.

35 Juán ne, nduhca ama yahn che din che chi ro dave nan ne neve ro, te chicuahn ye nchuhn yahn vederihquentiyon yáhn, ne quenan ino ne.

36 Ate vederihno che redín ne, tahque rihco ro che quenan cumá vederihquentiyon che co ndudo che ráhn Juán yáhn, te cava chemin ne, a ndero ndi che a Dendiohs Chida dechuh ye u.

37 Namin, andahre hua nihnevan nchuhn ndudo yahn Dendiohs Chida, nde hua ntihsche ne ihyan, ate rihco ro ye van nchuhn, che man ye dechuh ye u.

38 Me nchuhn ne, racondah vedame ne ndudo yahn ye, te hua ritahno ne u che man ye dechuh ye.

39 Rendihchenan ne Ndudo yahn ye nduco cudado, te rahco ne te ndudo min din che ndevahn ne, ne cuahtenan ne vahchetero numacuahn ro. Ate nde hua retumacadino ne che a nan Ndudo min ndirun yahn vederihquentiyon yáhn.

40 Hua nahn cotahno ne u cava che ndevahn ne, cuahtenan ne vahchetero numacuahn ro.

41 'U ne, hua rendotenán che ndeva nchuhn yavenán.

42 Avane ne, a rendihché nduhchan ihyan nchuhn, ne a devanó che hua yahino ne Dendiohs.

43 U ne, man Chidá dechuh ye u, ne nchuhn ne, racondah vedame ne u. Ate ndete che ndá tama sahn che ricuahn se vededevano yahn man se ne, sahn min che cuaco nevahnecon ne sahn.

44 ¿Taca co cotahno nchuhn Dendiohs?, te ndotenan che nuhn ino ne dinahn ne, cava che co yeno ye nduco ne ne, renan ino ne rendeva ama tama ne yavenan vih.

45 Ndiyu u che cahco ró nunde yahn nchuhn nan Chidá, te a ley che dirun Moisés, che ama ndichahtino nchuhn ne, a chemin che renuhnde nunde yahn ne.

46 Ndete che ritahno nchuhn che dirun Moisés ne, namin cotahno ne u, te ihyan min dirun ye yahn vederihquentiyon yáhn.

⁴⁷ Ate nducote hua ritahno ne ndudo che dirun ye ne, chemin che nde hua co cotahno ne ndudo yáhn.

6

Cah Dihvo vo Jesucristo cheh nchuh ca uhn mil ihyan

¹ Chihno min ne, cuahn Dihvo vo tãma lađo viche yahn vine yahn Galilea, ñan che duche Tiberias.

² Nducote rendihchero ihyan vederihno che redin ye che rendoyahn ihyan cah ne, chemin che ãma yáhn ihyan cuahn ye nduco ye.

³ Cuahn che ndã Dihvo vo min ne, cocha ye ãma tingüete chihnde ye nduco ihyan apóstol yahn ye.

⁴ Ro min ne, a ndã nino vihco ro yudo yahn ihyan nación yahn Israel.

⁵ Cuahn che ndihchero Dihvo vo che ãma yáhn ihyan ndã ye chidãma ye min ne, tumerune ye Felipe:

—¿Ti cuhn vo cua vo che cheh nducoyãca ihyan sih ne?

⁶ Dihvo vo ne, a derahn ye tihcã che nahn cadino ye deh cahma Felipe, te man ye ne, a devano ye taçã din ye che cahcacheh ye ihyan chahn.

⁷ Ndahconan Felipe yahn ye:

—Andahre o ciento tume diyahngua quenda vo che cua vo pan ne, nde hua tuno çava che ndãca tahsihn, cheh queri ãma ihyan sih.

⁸ Tuhme tãma ihyan apóstol, ihyan min che duche ye Andrés, dihno Simón Pedro ne, rahñ ye ri ye Dihvo vo:

⁹ —Muhn quenun ãma sahn dihn che nda se uhn pan che ndindah nduco cebada man, o yahca man. Ate rahcó che dehra cochihve chemin çava ihyan sih, te ãma yahn ri ye.

¹⁰ Rahñ Dihvo vo:

—Cãhma nchuhn co ne nducoyãca ihyan sih che cuahte ye.

ãma va chano cahya min, ne chahte ihyan chahn ñan chano me. Che demã ihyan chahn ne, ri tenduh uhn mil ye.

¹¹ Tuhme chetañ Dihvo vo pan me, ne necah ye nundihve cuahn Dendiohs. Chihno min ne, cah ye ihyan apóstol yahn ye çava che cah ye cheh nducoyãca ihyan. Namin chetañ ye yahca me. Atihnoçã din ye, ne cheh nducoyãca ihyan nde ñan che chito ihyan.

¹² Cuahn che a chenãn cheh ihyan ne, rahñ Dihvo vo ri ye ihyan apóstol:

—Cuendevahn nchuhn nducuahn che ngava çava che hua cora.

¹³ Ndevahn ihyan chahn nducuahn, ne chito ndichio cuahte cheyahn pan me che ngava.

¹⁴ Nducote ndihchero ihyan vederihno min che din Dihvo ne, rahñ ye:

—Cuãco niyon te ihyan cuh, ihyan profeta che a va çade che chi ye iyehñse.

¹⁵ Checardino Dihvo vo che nahn quenda ihyan chahn ihyan nduco fuerza, çava che co ye rey yahn ye, ne chemin che ndiquendañ ye van ye, cuahn ye demã ye tãma tingüete yaço.

Dihvo vo Jesucristo ne, rica ye ñan nune vine

¹⁶ Chahn che a chi ñah ne, cuenechahn ihyan apóstol chahn cuahn chihto vine me.

¹⁷ Chahtenun ye chete ãma barco che va min, ne cuahn ye tãma lađo viche me, cuahn yan Capernaum. A man, ne Dihvo vo ne, a hua renta ye.

¹⁸ Ura min ne, canãñ rano yuhne tan, ne ãma rendedecuan nune vine me.

¹⁹ A cuahn ihyan chahn nduco barco me tenduh ãn mil metro, cuahn che ndihchero ye Dihvo vo, che a ndã nino ye, rica ye ñan nune vine me, ne ãma dihya ye chi.

20 Tuhme rahn Dihvo vo ri ye ihyan:

—A u che ntá. ¡Condi nchuhn dihya ne co!

21 Chenda Dihvo vo chete barco me, ne ama yeno ihyan chahn, netumane-cun ye ihyan. Nduco venchahte no nda barco me nan che cuahn ye.

Chinuhn ihyan Dihvo vo Jesucristo

22 Me ihyan che chahtenan ye tama lado viche yahn vine me ne, tumacadino ye chi dave tama ro me, che ihyan apóstol chahn ne, chahtenun ye chete ama ndiyahn ra barco che va min, cuahn ye, ne Dihvo vo ne, hua cuahn ye nduco vih.

23 Numanahn che chenán ye min ne, nda neve barco che chica yan Tiberias, ne chan chihto vine, nino nan che cheh ye pan che cah Dihvo vo a ama ro me.

24 Nducote ndihchero ihyan chahn che ametah Dihvo vo min, nde huane ihyan apóstol yahn ye ne, chahtenun ye chete barco chahn, cuahn ye yan Capernaum, quenuhn ye ihyan.

25 Cuahn che a tuche ihyan chahn vine me, nda ye nan che quenun Dihvo vo, ne tumerune ye ihyan:

—Ihyan Ricuahn, ¿deh ura nda ne muhn ne?

26 Ate rahn Dihvo vo ri ye ihyan:

—Cuaco rahn rí nchuhn te rinuhn ne u, yahn che chihcachéh nchuhn nde nan che chito nchuhn, ndiyu yahn che chenahn ne yahn vederihno che dín.

27 Hua cuahcoran nchuhn deman yahn dehtenduh che reh ne, te chemin ne, rihno. Tahque ndah ne ne, codinun ino ne, cuihcovan ne ndudo yahn, cava che ndevahn ne, ne cuahtenan ne vahchetero numacuahn ro. Ndudo yahn ne, anduhneca ama comida che ngu cuahn dama yahn ne. Tihca, te u che rinducó nducoyaca ihyan ne, ndahco Dendiohs Chida vederihquentiyon tah, cava che ndedevahn nchuhn.

28 Tuhme tumerune ihyan chahn Dihvo vo:

—¿A va vederihquentiyon yahn Dendiohs che va che dinahn nuhn ne?

29 Ndahconan Dihvo vo, ne rahn ye ri ye ihyan chahn:

—Che nahn Dendiohs ne, che cotahno nchuhn u che man ye dechuh ye.

30 Ndaconan tumerune ihyan chahn Dihvo vo:

—¿Deh vederihno co din ne, ndihchero nuhn, cava che cotahno nuhn ndih ne? ¿Deh ntiyon nda ne ne?

31 Ihyan ndico yahn nuhn ne, cheh ye pan che duche maná, min yahn nan che metah duha nduhca che ndirun nan Ndudo yahn Dendiohs tuhca: “Cah Dendiohs pan che chica vahchetero, cheh ye.”

32 Ndahconan Dihvo vo, ne rahn ye ri ye ihyan chahn:

—Cuaco rahn rí nchuhn: Pan che chica vahchetero ne, ndiyu Moisés che cah ye ihyan, te a Chidá. Namin rete ye nchuhn tama nan pan che tahque ndah che chica vahchetero.

33 Pan min che cah Dendiohs ne, chica vahchetero, ne nduco chemin rendevahn ihyan iyehñse.

34 Tuhme rahn ihyan chahn ri ye Dihvo vo:

—Te ne pan che rahn ne me nuhn ro ro.

35 Rahn Dihvo vo ri ye ihyan chahn:

—A u che anduhneca pan cava ihyan che ritahno ye u, te rendedevahn ihyan, ne cuahtenan ye vahchetero. Che reh ihyan man, che rih ye man ne, hua retumanan ihyan cuahn dama. Ate vedeyahino yahn cava ihyan che ritahno ye u, ne hua nda ro che cuihno.

³⁶ Ate nchuhn ne, hua ritahno ne u, andahre rendihchero ne u, nduhc̄a che a ráhn rí nchuhn.

³⁷ Nducoyaca ihyan che retendahnun Chidá cava che cotahno ye u ne, ritahno ye u, ne hua racondah vedamé ihyan.

³⁸ Tihc̄a, te u ne, chicá vahchetero, dechuh Chidá u, cava che dináhn che nahn ye, ndiyu che nahn mán.

³⁹ Chidá ne, dechuh ye u, ne nahn ye che ndedeváhn nducoyaca ihyan che man ye tendahnun ye cava che cotahno ye u. Namin nahn ye che ndedetuhché ihyan chahn ro che cuihno iyehense.

⁴⁰ Chidá ne, nahn ye che nducoyaca ihyan che ndihchero ye u che Daya ye, ne cotahno ye u ne, ndedetuhché ihyan ro che cuihno iyehense, ne cuahtenan ye vahchetero numacuahn ro.

⁴¹ Nducote ráhn Dihvo vo yahn man ye, che anduhnec̄a pan che chica vahchetero cava ihyan iyehense ne, chemin che ndahchenan sahn ndinan yahn nación yahn Israel chahn ihyan,

⁴² ne rente se van man se nduco vih:

—Ihyan tih che Jesús, che daya José me. Uvo ne, a rendihcho vo chida ye man, chaco ye man, ¿me dehco che ráhn ye che vahchetero chica ye?

⁴³ Tuhme ráhn Dihvo vo ri ye sahn chahn:

—Hua ndahchenan nchuhn u.

⁴⁴ Cuedevano ne te nde ama ihyan hua co cotahno ye u, ndete che hua man Chidá tendahnun ye ihyan. Nducoyaca ihyan che cotahno ye u ne, ndedetuhché ihyan ro che cuihno iyehense.

⁴⁵ Nan libro che dirun ihyan profeta ne, tuhca ráhn: “Dendiohs ne, din ye che conahn nducoyaca ihyan.” Chemin che nducoyaca ihyan che redinahn ye yahn Dendiohs Chida ne, ritahno ye u.

⁴⁶ Nde ama ihyan iyehense ne, hua ntihche ye Dendiohs Chida. Atenan u che rendihché ihyan.

⁴⁷ Cuaco ráhn rí nchuhn te ihyan che ritahno ye u ne, cuahtenan ye vahchetero numacuahn ro.

⁴⁸ U ne, anduhnec̄a pan cava ihyan iyehense, te rendedeváhn ihyan, cuahtenan ye vahchetero numacuahn ro.

⁴⁹ Ihyan ndico yahn nchuhn ne, cheh ye pan che duche maná min yahn nan che metah duhva, ate pan min ne, metah vederihquentiyon yahn cava che ndevahn ye, cuahtenan ye vahchetero.

⁵⁰⁻⁵¹ Ate ihyan che cheh ye pan che chica vahchetero ne, cuahtenan ye vahchetero numacuahn ro. Pan min ne, redin che rendevahn ihyan. Adecoduhno ihyan che cheh ye ne, ndevahn ye, ne cuahtenan ye vahchetero numacuahn ro. Che ráhn yahn pan min ne, ráhn yahn mán, te va che cahco mendáhn u cóh, cava che ndedeváhn ihyan iyehense.

⁵² Tuhme ama ndeh rente sahn ndinan chahn van man se nduco vih, ne ráhn se:

—¿Taca che ráhn ihyan tih che covahn ye pan, cava che chuh vo ihyan?

⁵³ Ráhn Dihvo vo ri ye sahn:

—Cuaco ráhn rí nchuhn te, u che rinducó nducoyaca ihyan ne, cava che ndevahn ne ne, va che cotahno ne u man, cochahtino ne yun yahn che cora man.

⁵⁴ Ihyan che cotahno ye u, ne cochahtino ye yun yahn che cora ne, ndedetuhché ihyan ro che cuihno iyehense, cuahtenan ye vahchetero numacuahn ro.

⁵⁵ Tihçá, te çáva che co ndevahn ihyan ne, va che çahco mendáhn u, cora yun yáhn çáva ye.

⁵⁶ Ihyan che cotahno ye u, ne cochahtino yun yáhn che corá ne, conduco ye u, ne dín cudádo ihyan.

⁵⁷ Dendiohs Chida ne, hua ndá ro che cuihno ye. A ihyan min che dechuh ye u, ne vedereno yáhn ne, che richahtinó ihyan. Me ihyan che richahtino ye u ne, ndedeváhn ihyan, cuahtenan ye vahchetero.

⁵⁸ U ne, anduhncá pan che chica vahchetero, çáva ihyan iyehñse. Pan che duche maná, che cheh ihyan ndico yahn nchuhn ne, metah vederihquentiyon yahn çáva che ndevahn ihyan, cuahtenan ye vahchetero. Ate ihyan che cochahtino ye u ne, cuahtenan ye vahchetero numacuahn ro.

⁵⁹ Chete yaçco, min yan Capernaum, che tihçá chicuahn Dihvo vo sahn chahn.

⁶⁰ Chihno chicuahn Dihvo vo ndudo min ne, nde ihyan che rinducó ye ihyan ne, ama yahn ye rahñ ye:

Ndudo che tihçá ricuahn ye ne, ama vahche. Nde ama ihyan hua co nevahnecun ye.

⁶¹ Checádo Dihvo vo che hua chahtenan ino ihyan chahn ndudo che chicuahn ye, ne rahñ ye ri ye ihyan:

—Nducote hua chahtenan ino nchuhn ndudo che tihçá ricuáhn ne,

⁶² nde tahque hua cuahtenan ino ne ndete che ndihchero ne u che rinducó nducoyaça ihyan, che náhn vahchetero nan che chicá.

⁶³ A Vaco Ndah yahn Dendiohs che redin che rendevahn ihyan. U ne, çahco mendáhn u cóh, nedihvé nunde yahn ihyan iyehñse, ate a Vaco Ndah yahn Dendiohs che redin che rendevahn ye. Ndudo che renté nduco nchuhn ne, renté numacuahn vederihquentiyon yahn Vaco Ndah yahn Dendiohs, çáva che ndevahn ne.

⁶⁴ Ate hua nducoyaça nchuhn ritahno ne.

Tihçá rahñ Dihvo vo, te a devano ye nde ro menañ, duhtenduh ihyan che hua ritahno ye ihyan man, sahn che va che ndihcue ndeh se ihyan man.

⁶⁵ Namin rahñ ye:

—Rahñ rí nchuhn te ihyan che man Chidá tendáhnun ye ihyan ne, atenan ihyan chahn che co cotahno ye u.

⁶⁶ Ama yahn ihyan che chinduco ye Dihvo vo ro menañ ne, chihcomañ ye ihyan nde ro min, ametah chinducó ye ihyan.

⁶⁷ Tuhme tumerune Dihvo vo nduh che ndichio ihyan apóstol yahn ye:

—Namin nchuhn ne, ¿a nahn çahcomañ ne u ne?

⁶⁸ Ndahconan Simón Pedro, ne rahñ ye:

—Dihve nuhn, metah nde tama ihyan che cochahtino nuhn çáva che ndevahn nuhn, atenan ndih. Ndudo che ricuahn ne ne, retihyon yune ihyan che ndevahn ye, cuahtenan ye vahchetero numacuahn ro.

⁶⁹ Nuhn ne, a ritahno nuhn ndih, ne a devano cuaco nuhn te ndih che Daya Dendiohs, che hua ndá ro che cuihno vederihquentiyon yahn ye man, ndih, ihyan min che a va çáde che chí ye, ndedevahn ye ihyan iyehñse man.

⁷⁰ Rahñ Dihvo vo ri ye ihyan chahn:

—A devano nchuhn che a man tendáhnún nduh che ndichio ne, ate nde nduco nduh ne, rihquentiyon chundah ama cha nchuhn.

⁷¹ Che tihçá rahñ Dihvo vo ne, rahñ ye yahn daya Simón, sahn min che duche se Judas Iscariote, te sahn min va che ndihcue ndeh se ihyan, andahre nduco se ndi cuande se van ihyan apóstol chahn.

7

Dihno Dihvo vo Jesucristo ne, hua ritahno ye ihyan

¹ Quendi Dihvo vo quechica ye estado yahn Galilea. Hua nahn conan ye estado yahn Judea, te sahn ndinan yahn nación yahn Israel che vate se min ne, nahn cahno se ihyan.

² Ro min ne, a nda nino vihco yahn vah cue che redin ihyan nación yahn Israel.

³ Tuhme rahn dihno Dihvo vo ri ye ihyan:

—Cuique muhn, cuehn yan Jerusalén cava che namin ihyan che vate ye min, che ritahno ye di ne, ndihchero ye vederihno che redin.

⁴ Tihca, te cuahn che nahn vo che cadino ihyan yahn ntiyon che redin vo ne, va che cahco ro vo. Chemin che tahque ndah, cuehn min, din vederihno nan che tahque yahn ihyan rendo dama ye.

⁵ Tihca rahn dihno ye, te nde ihyan chahn ne, hua ritahno ye ihyan.

⁶ Ndahconan Dihvo vo, ne rahn ye ri ye ihyan:

—Metah nda ura che cahn, ate nchuhn ne, adecodehno ura che nahn ne, co cahn ne.

⁷ Nchuhn ne, hua tan ihyan nunde nduco ne, ate u che cuaco ne, tan ye nduco, te renevih nunde yahn ye vaconan ye.

⁸ Cuahn nchuhn vihco. U ne, hua cahn meniyan, te metah nda ura che cahn.

Chahn Dihvo vo Jesucristo vihco yahn vah cue

⁹⁻¹⁰ Chihno min ne, quenan ca Dihvo vo estado yahn Galilea, ne cuahn dihno ye. Adiva ne, cuahn che a chihno cuahn nducoyaca ihyan vihco me ne, tuhme cuahn ye deman ye.

¹¹ Sahn ndinan yahn nación yahn Israel ne, rinuhn ndudo se ti quenan Dihvo vo.

¹² Ama yahn ihyan ne, rente ye yahn Dihvo vo. Nahn ye ne, rahn ye: “Ihyan min ne, ndah ihyan ye.” Ate nahn ye ne, rahn ye: “Hua ndah ihyan ye, te rincheh ye ihyan.”

¹³ Nducoyaca ihyan ne, cuahn ndeh rente ye yahn Dihvo vo, yahn che vah che cadino sahn ndinan yahn nación yahn Israel.

¹⁴ Cuahn che a mendahn vihco me ne, chenda Dihvo vo chete yaco, canan ricuahn ye ihyan.

¹⁵ Me sahn ndinan chahn ne, ama rahn ino se che ama ndahca ricuahn ye, ne rahn se:

—¿Ti chehua ihyan tih che tihca ricuahn ye?, te hua nahn ye escuela che rahn ihyan ricuahn.

¹⁶ Rahn Dihvo vo ri ye sahn:

—Che ricuahn ne, ndiyu che cuande yahn man, te che cuande yahn Dendiohs, ihyan min che dechuh ye u.

¹⁷ Ihyan che nahn dinahn ye che rihquentiyon Dendiohs ne, conahn ye te che ricuahn ne, che cuande yahn Dendiohs, ihyan min che dechuh ye u, ndiyu che cuande yahn man.

¹⁸ Ihyan che ricuahn ye vededevano yahn man ye ne, che nahn ye ne, che ndeva ihyan yavenan ye. Ate ihyan che ricuahn ye cava che quenda yavenan ihyan che dechuh ye ihyan ne, ricuahn ye numa cuaco.

¹⁹ Moisés ne, dirun ye ley, chihco ye yahn nchuhn, ate nde ama ne hua redinahn ne. Tahque ndah ne ne, nahn cahno ne u.

²⁰ Ndahconan ihyan chenahn, ne rahn ye ri ye ihyan:

—Co quenun vaco chihnga ndih, ne chemin che tihca rahn ne. ¿Duh nahn cahno ndih?

²¹ Rahn Dihvo vo ri ye ihyan chahn:

—Yahn ama vederihno che din ro che rahtetuhno ihyan ne, ama rahn ino nducoyaca nchuhn.

²² Moisés ne, dirun ye yahn ley che renan seña nchuhn, nduhca che chihquentiyon Dendiohs ihyan ndico yahn ye. Chemin che raconahn ne seña checahya, andahre ro che rahtetuhno ihyan.

²³ Nducote raconahn ne seña checahya, andahre ro che rahtetuhno ihyan cava che hua cuahcotahn ne yahn ley min ne, ¿me dehco che ri tan ne nducó, yahn che ro che rahtetuhno ihyan din che ndoyahn ama sahn che rechuhrihn se?

²⁴ Ndotenan che ndahchenan nchuhn ne, cuendedecadino ndah ne, ne tumacadino ne che ndahca redín.

²⁵ Ama o ihyan che vate ye yan min che a devano ye che nahn cahno se Dihvo vo ne, retumerune vih ye:

—¿A ndiyu ihyan tih che rinuhn se ihyan, che nahn cahno se ihyan ne?

²⁶ Man ne, nga ye, quenun ye tan ricuahn ye, ne hua duhva retumacah ihyan, cava che co ye preso. A din ndete che, a nduco ihyan ndinan yuhn vo, ritahno ye che ihyan tih, che a va cade che chi ye ndedevahn ye ihyan iyehense.

²⁷ Ate ndiyu ihyan tih chemin, te uvo ne, a devano vo ti chica ye. Cuahn che nda ihyan min ne, nde ama ihyan hua co devano ye ticuahn quendahe ye.

Dihvo vo Jesucristo ne, rahn ye ti chica ye

²⁸ Dihvo vo ne, chihnevan ye che tihca rente ihyan chahn. Tuhme ama dito rahn ye:

—Nchuhn ne, rahn ne che a rendihche ne u man, a devano ne ti chicá man, ate ndere rahn ne chemin. Ndiyu che cuande yahn man che cochí, te cochí che cuande yahn Chidá, ihyan min che quenan cuma ye vederihquentiyon che ama chahte, ihyan min che nde hua rendihche ne ihyan.

²⁹ U ne, a rendihché ihyan, te a nan ye quenán, ne a man ye dechuh ye u.

³⁰ Cuahn che chihnevan sahn ndinan chahn che tihca rahn ye ne, nahn din se preso ihyan, ate nde ama se, hua chihquino se din se preso ihyan, te ro min ne, metah nda ro yahn ye che cahno se ihyan.

³¹ Van ihyan chahn ne, ama yahn ihyan chitahno ye ihyan, ne rahn ye:

—A ihyan cuh che a va cade che chi ye ndedevahn ye ihyan iyehense, te ¿a chi tama ye che tahque din ca ye vederihno che co ihyan cuh?

Sahn fariseo ne, dechuh se policia cava che din se preso Dihvo vo Jesucristo

³² Checadino sahn fariseo che rendonan ihyan yan Dihvo vo. Chemin che nte cade se nducó chidocuyan ndinan, ne dechuh se policia yahn yaco, ngua se ihyan, co ye preso.

³³ Cuahn che nda se ne, rahn Dihvo vo:

—Conan cá te neve ro nduco nchuhn, tuhme nahn nan ihyan che dechuh ye u.

³⁴ Nda ro min ne, nuhn nchuhn u, ate hua ntaca ne u, te hua co cahñ ne nan che conán.

³⁵ Tuhme rente sahn chahn van man se nduco vih, ne rahn se:

—¿Ti ra conan ihyan tih che rahn ye che hua ntaca vo ihyan? ¿A ndihco ye che cahñ ye van ihyan nación yuhn vo che chenán ye nación chenahn? ¿A min conan ye, cacuahn ye ihyan nación chenahn chahn?

³⁶ ¿Deh conahn che tihcā rahn ye che nuhn vo ihyan, ne hua ntāca vo ihyan, te hua co cuhn vo nān che conan ye?

Rahn Dihvo vo Jesucristo te ihyan che ritahno ye ihyan ne, conun Vaco Ndah yahn Dendiohs ihyan

³⁷ Ro vihco chahte me ne, chandi Dihvo vo nān nducoyaça ihyan, ne cahndudo ye:

—Adecoduhno ihyan che yaça ye ne, chi ye nān, cāh nune, cuh ye.

³⁸ Nduhcā che a ndirun nān Ndudo yahn Dendiohs ne, ihyan che cotahno ye u ne, cuahtenan cuma ye vederihquentiyon, anduhneçā āma nune che hua retihnan.

³⁹ Che tihcā rahn Dihvo vo ne, cāh ye, checadino ihyan, che ihyan che cotahno ye ihyan ne, conun Vaco Ndah yahn Dendiohs ihyan. Ro min ne, ametah co Vaco Ndah yahn Dendiohs, te metah nāhn Dihvo vo vahchetero.

Ihyan ne, hua ra vih ndudo ye cāva Dihvo vo Jesucristo

⁴⁰ Cuahn che a chihno cāh cuande Dihvo vo ihyan ne, nāhn ihyan ne, rāhn ye:

—Cuāco niyon che ihyan tih, ihyan profeta che a va cāde che chi ye.

⁴¹ Nāhn ye ne, rāhn ye:

—Ihyan tih ne, a mān ihyan min che a va cāde che chi ye ndedevahn ye ihyan iyehñse.

Ate nāhn ihyan ne, rāhn ye:

—Hua cuāco chemin, te ihyan min che a va cāde che chi ye ne, ndiyu ešādo yahn Galilea quendāh ye,

⁴² te nān Ndudo yahn Dendiohs ne, a ndirun che ihyan min ne, nān ndāta yahn rey David quendāh ye mān, cuhndeyān ye yān Belén, yān vaço David mān.

⁴³ Tihcā chi che a vih rāhn āma, a vih rāhn tāma ihyan chahn, yahn Dihvo vo.

⁴⁴ Vān ihyan chahn ne, chenun āma o se che nahn din se preso Dihvo vo, ate hua chihquino se.

Sāhn ndinān yahn ihyan nación yahn Israel ne, hua chitahno se Dihvo vo Jesucristo

⁴⁵ Sāhn policia chahn ne, ndaconan se nān che chenun sāhn fariseo mān, chidocuyān ndinān mān. Tuhme rāhn se ri se sāhn policia chahn:

—¿Dehco che hua quenda nchuhn ihyan min?

⁴⁶ Ndahconan sāhn policia chahn, ne rāhn se:

—Hua quenda nuhn ihyan, te nde āma yune hua nihnevan nuhn che ricuahn ihyan nduhcā che ricuahn ihyan min.

⁴⁷ Rāhn sāhn fariseo chahn ri se sāhn:

—Namin nchuhn ne, co a cāh yune ne che chihnechēh ye nchuhn.

⁴⁸ Cuedevano ne, te nde āma nuhn, hua ritahno nuhn ihyan min.

⁴⁹ Sāhn yān sih ne, hua devano se ley che dirun Moisés, ne chemin che ndinda se.

⁵⁰ Vān sāhn ndinān chahn ne, ndi cuande āma ihyan fariseo che duche ye Nicodemo. A ihyan min che chahn ye āma vīno, chendihchero ye Dihvo vo. Ihyan min ne, rāhn ye ri ye combiero yahn ye:

⁵¹ —Ley che riquendi vo ne, rihquentiyon che hua co cāhmo vo che a ndinda āma ihyan numanahn che metah cadino cuāco vo deh nunde yahn ye va.

⁵² Ndaconan se yahn Nicodemo, ne rāhn se:

—¿A namin nduco di chique estado yahn Galilea? Condi hchenen nan Ndudo yahn Dendiohs, ne cadine te nde ama ihyan profeta hua quenda h ye min.

⁵³ Chihno min ne, conahn queri ama se ndevaco se.

8

Ama tahn che ndere quechica te

¹ Chihno chicuahn Dihvo vo ihyan chahn ne, cuahn ye Cuete Olivo.

² Chi dave tama ro me ne, nda tun ye, ne chenda ye chete yaco. Ndo dama nducoyaca ihyan nan ye, ne chihnde ye, ndevanan ricuahn ye ihyan chahn.

³ Tuhme nda sahn devano ley che dirun Moisés man, sahn fariseo man, nda se ama tahn ndahta che va incha h te, che ntaca ihyan tahn, ura che quendite te nduco chihyo te. Chihno se tahn mendahn,

⁴ ne rahn se ri se Dihvo vo:

—Ihyan Ricuahn, tahn tih ne, ntaca ihyan tahn, ura che quendite te nduco chihyo te.

⁵ Nan ley che dirun Moisés ne, rihquentiyon che cahno nuhn tahn che tihchan sih, nduco tu. ¿Me ndih, deh rahn ne ne?

⁶ Tihca rahn sahn chahn, te retumarande se Dihvo vo, renuhn ino se taca co caca nunde se yahn ye. Ate Dihvo vo ne, nde hua tumacah ye yahn se, ne canan dirun ye ndiyahn, nduco ndutitah ye.

⁷ Quendi se retumarune se ihyan. Nan menan ne, ndevandi cuaco ye, ne rahn ye ri ye sahn:

—Adecochano nchuhn che metah nunde yahn ne ne, cah ne tu tahn.

⁸ Chihno rahn ye ne, ndaconan ndondih ye, ne quendi ye redirun ye ndiyahn.

⁹ Chi cuihnan sahn chahn che tihca rahn ye ri ye sahn, te a devano se te chendihco se nunde, ne canan ndiquenda h vah ca ama ca ama se, conahn se ne, menan vihca sahn che tahque ndico chahn. Cuahn che a chihno conahn se ne, a deman tahn ndahta me, nti te min.

¹⁰ Tuhme ndevandi cuaco Dihvo vo, ne tumerune ye tahn:

—¿Tiya sahn chahn che rih nunde se yehn ne? ¿A nde ama se hua quendi se rih nunde se yehn ne?

¹¹ Ndaconan te yahn ye, ne rahn te:

—Hua Dihvé, nde ama se.

Tuhme rahn ye ri ye tahn:

—U ne, nchahco nunde yehn. Man ne, conahn. Ametah ndaconan ndere cochique condihque nunde.

Ihyan che ritahno ye Dihvo vo Jesucristo ne, cuahtenan ye vahchetero

¹² Tama yune ne, ricuahn Dihvo vo ihyan, ne rahn ye:

—U ne, anduhneca ama yahn che ri ro dave nan ihyan iyehnse. Chemin che ihyan che ritahno ye u ne, conahn ye ndudo yahn, ne ndedevahn ihyan, cuahtenan ye vahchetero.

¹³ Tuhme rahn sahn fariseo chahn ri se ihyan:

—Ndi h ne, rendonan man ne ndih. Chemin ne, hua cochihve yahn ne.

¹⁴ Ndahconan ye, ne rahn ye ri ye sahn:

—Ndudo che renté ne, cuaco, andahre rahn nchuhn che rendonan man u, te u ne, devano ti chicá man, ti nah man. Ate nchuhn ne, hua devano ne ti chicá nde huane ti nah.

¹⁵ Nchuhn ne, ra cuande ne ihyan nduhca costumbre yahn ne, renda hchenan ne ihyan. Ate u ne, hua renda hchenan nde ama ihyan.

16 Me cuahn che retechecadé ne, retechecadé numa cuaco, te retechecadé dama nduco Chidá, ihyan min che dechuh ye u, ndiyu demán.

17 Nan ley che rendihchenan nchuhn ne, rihquentiyon che, cuahn che va o testigo che ra vih ndudo yahn ye, rahn ye che cuaco ne, va che cotahno vo che rahn ye.

18 U ne, ráhn ndudo cuaco yahn ntiyon yáhn. Me Chidá che dechuh ye u ne, namin rahn ye yahn.

19 Tuhme tumerune sahn chahn ihyan, ne rahn se:

—¿Ti va chida ne ne?

Ndahconan ye yahn se, ne rahn ye:

—Nchuhn ne, hua renahn ne yahn vederihquentiyon che quenan cumá, nde hua rendihche ne Chidá. Nducote hua renahn ne yahn vederihquentiyon che quenan cumá ne, chemin che hua rendihche ne Chidá.

20 Tihca chicuahn Dihvo vo chete yaco, nan che va yave yahn tume vedino. Ate nde ama sahn chahn, hua din se preso ihyan, yahn che metah nda ura che ndihco cade Dendiohs.

Dihvo vo Jesucristo ne, rahn tun ye che nahn ye vahchetero

21 Ndaconan rahn Dihvo vo tama yune nduco ihyan tuhca:

—U ne, náhn, ne nchuhn ne, nuhn ne u, ate hua ntaca ne u. Conda ne, din nunde yahn ne, te nan che náhn ne, hua co nda ne.

22 Tuhme rahn sahn ndinan chahn van man se nduco vih:

—¿A cahno man ihyan tih ihyan, che tihca rahn ye che nan che cahne ye ne, hua co nda vo ne?

23 Rahn Dihvo vo ri ye sahn:

—Nchuhn ne, ihyan iyehense nchuhn. Ate u ne, vahchetero chicá.

24 Chemin che rahn ri nchuhn che conda ne, din nunde yahn ne. Tihca, te ndete che hua cotahno ne che u, ihyan min che a va cade che chi ye ndedevahn ye ihyan iyehense ne, conda ne, din nunde yahn ne.

25 Tuhme tumerune sahn chahn ihyan:

—¿Duh ndih ne?

Ndahconan ye, ne rahn ye ri ye sahn:

—A rahn ri nchuhn nde a rahn me.

26 Ama ndeh nan dehtenduñ va che có nchuhn man, nevíh nunde yahn ne vaconan ne man. Ihyan che dechuh ye u ne, riquendah cuaco che rahn ye. Me u ne, a ndudo yahn ye che ricuáhn ihyan iyehense.

27 Ate sahn chahn ne, hua chenahn se che a yahn Dendiohs Chida che tihca rahn ye.

28 Chemin che rahn ye ri ye sahn:

—Cuahn che cuaconahn yah nchuhn u che rinducó nducoyaca ihyan ne, tuhme tumacadino ne yahn vederihquentiyon che quenan cumá. Namin tumacadino ne che hua ricuáhn che cuande yahn man, te ricuáhn ndudo che a man Chidá te cuande ye u.

29 Tihca, te Chidá ne, dechuh ye u, ne rinduco ye u. Hua rihcoman ye u, te cuahn dama redinahn nducuahn che renan ino ye.

30 Cuahn che chihno rahn Dihvo vo nducuahn ndudo chemin chan ne, ama yahn ihyan chitahno ye ihyan.

31 Tuhme rahn Dihvo vo ri ye ihyan chahn:

—Ndete che quendi nchuhn numa ino ne cotahno ne ndudo che ricuáhn nchuhn ne, tuhme che cuaco conuco ne u.

32 Avane ne, conahn ne ndudo yáhn, ne ndo ne libre.

33 Ndahconan ihyan chahn ne, rahn ye ri ye Dihvo vo:

—Nuhn ne, ndata yahn Abraham nuhn, ne nde ama yune hua ntihcue ihyan nuhn. ¿Me taça che rañn ne che ndo nuhn libre ne?

³⁴ Rañn Dihvo vo ri ye ihyan chahn:

—Cuaco ráñn rí nchuhn te nducoyaca ihyan che vatechica ye vedeyeno yahn man ye, rahtendiho ye nunde ne, anduhneca ndete che hua libre ye, te hua co çahcomañ ye nunde yahn ye.

³⁵ Nchuhn ne, nduhca sañn decahya yahn ihyan che hua redin cuande ye van daya ye ne, tihchan nchuhn nan Dendiohs. Ate u ne, Daya ye u.

³⁶ Chemin che, cuahn che ndedeváhn ihyan ne, ametah deh che ndedecadino ye.

³⁷ A devanó che ndata yahn Abraham nchuhn. Ate hua renevahnecun ne ndudo yáhn, ne chemin che nahn çahno ne u.

³⁸ U ne, ricuáhn nchuhn ndudo che rete cuande Chidá u, ne nchuhn ne, redin ne dehtenduh che nahn chida ne.

³⁹ Ndahconan ihyan chahn yahn Dihvo vo, ne rañn ye:

—Nuhn ne, Abraham che chida nuhn.

Ate rañn ye ri ye ihyan chahn:

—A ndere redin chida nchuhn Abraham, te hua riquendi ne yune yahn ye.

⁴⁰ U ne, rañn cuacó rí nchuhn ndudo che a man Dendiohs rete cuande ye u, ate nchuhn ne, nahn çahno ne u. Abraham ne, ndiyu chemin che din ye.

⁴¹ Nchuhn ne, cuahto redin chida ne, cuahto redin man ne.

Rañn ihyan chahn ri ye Dihvo vo:

—Nuhn ne, Dendiohs che Chida nuhn.

⁴² Rañn Dihvo vo ri ye ihyan chahn:

—A ndere redin Chida nchuhn Dendiohs. Hua cuaco che rañn ne, ne chemin che hua ri rendihche ne u. Ndiyu che cuande yahn man che cochí, te a man Dendiohs dechuh ye u.

⁴³ Yahn che hua renevahnecun nchuhn ndudo yáhn ne, chemin che hua renahn ne.

⁴⁴ Nchuhn ne, chundah che chida ne, sañn min che redinahn ne yahn se. Sañn min ne, rihquentiyon se sañn rihno ihyan nde ro che chihnde iyehñse. Cuahn dama rihñcheh se, te chemin che ntiyon yahn se.

⁴⁵ U ne, ricuáhn ndudo cuaco, ate nducote ndi nino ne vederihñcheh ne, chemin che hua ritahno ne che ráñn.

⁴⁶ Nde ama nchuhn ne, hua co çahma ne che va nunde yáhn. Ndudo cuaco che ricuáhn, ne redin yahn che cotahno ne.

⁴⁷ A ndero ndi ihyan che yahn Dendiohs ihyan, te rihcovan ye Ndudo yahn ye. Ate nchuhn ne, ndiyu yahn Dendiohs nchuhn, ne chemin che hua nahn çahcovan ne Ndudo yahn ye.

Dihvo vo Jesucristo ne, a va ye nde ro che metah cuhndeyan Abraham

⁴⁸ Tuhme rañn sañn ndinan chahn ri se Dihvo vo:

—Rañn cuaco nuhn ri nuhn ndih che ndere ihyan ndih, nduhca ihyan nacióñ yahn Samaria man, quenun vaco chihnga ndih man.

⁴⁹ Rañn Dihvo vo ri ye sañn chahn:

—U ne, rendevá yavenan Chidá. Ate nchuhn ne, rendañchenan ne u, ne chemin che ndere rañn ne che quenun vaco chihnga u.

⁵⁰ U ne, hua rendetan man u. Ate va Chidá che rendeva ye yavenan, ne ihyan min che retechecade ye.

⁵¹ Cuaco ráñn rí nchuhn te ihyan che rihcovan ye che ricuáhn ne, cuahtenan ye cuahn dama.

⁵² Tuhme rañn se ri se Dihvo vo:

—Man ne, a devano cuaco nuhn che quenun vaco chihnga ndih, yahn che tihca rahn ne. Abraham man, nducoyaca ihyan profeta man ne, chih ye. Me ndih ne, rahn ne te ihyan che cahcovan ye ndudo che ricuahn ne ne, cuahtenan ye cuahn dama.

⁵³ ¿A tahque rigonun chihve ndih che co chida nuhn Abraham, che rahnco ne? Ihyan min man, nducoyaca ihyan profeta man ne, chih ye. ¿Duh ndih, che rahnco ne?

⁵⁴ Rahn Dihvo vo ri ye sahn:

—Ndete che rendonan man u ne, nde hua cochihve yahn. Chida, ihyan min che rahn nchuhn che Dendiohs yahn ne ne, a ihyan min che rendeva ye yavenan.

⁵⁵ U ne, rendihché ihyan, ate nchuhn ne, hua rendihche ne ihyan. Rendihché ihyan, ne redinahn che rihquentiyon ye. Cuaco che rahn, ndiyu nduhca nchuhn che ndere rahn ne che rendihche ne ihyan.

⁵⁶ Ihyan ndico yahn nchuhn, Abraham ne, ama chi yeno ye cuahn che checadino ye che va che chi iyehense, ne nde tahque chi yeno ye cuahn che a chinahn.

⁵⁷ Tuhme rahn se ri se Dihvo vo:

—Nde mare o raco ndiche nduyo metah co ndih, ¿taça che ndihchero ne Abraham?

⁵⁸ Rahn Dihvo vo ri ye sahn:

—Cuaco rahn ri nchuhn te u ne, a va nde ro che metah cuhndeyan Abraham.

⁵⁹ Tuhme chetah sahn chahn tu, che cah se Dihvo vo. Ate cheh nan se ihyan, ne ndiquendañ ye chete yaco me. Chuh ye van nducoyaca se, cuahn ye.

9

Dihvo vo Jesucristo ne, din ye che chi ro nan ama sahn che ve nan se nde ro che chihndeyan se

¹ Ama ro ne, ndihchero Dihvo vo ama sahn che ve nan se nde ro che chihndeyan se.

² Ihyan apóstol yahn ye ne, tumerune ye ihyan:

—Ihyan Ricuahn, ¿dehco che ve nan sahn tih ne? ¿A cava nunde yahn indihche yahn se, o cava nunde yahn man se ne?

³ Ndahconan Dihvo vo yahn ihyan chahn, ne rahn ye:

—Ndiyu cava nunde yahn indihche yahn se, nde huane cava nunde yahn man se. Ve nan se cava che cuhnde ro vederihquentiyon yahn Dendiohs, tumacadino ihyan.

⁴ U ne, va che din nun inó dinahn ntiyon yahn Ihyan che dechuh ye u numanahn che quenana cá iyehense.

⁵ Numacuahn ro che quenán muhn ne, ricuahn Ndudo yahn Dendiohs ihyan cava che netah ndutinān ye.

⁶ Chihno rahn ye chemin ne, din ye tah nchete nduco nunedan ye, ne chacotahme ye ndutinān sahn nan ve me.

⁷ Tuhme rahn ye ri ye sahn:

—Cuehn conane nan nan nune che duche Siloé —che tihca duche nune me ne, conahn “Nune Rica.”

Cuahn sahn nan ve me, ne cuahn che nano se nan se nan nune me ne, chi ro nan se.

⁸ Cuahn che nta se ne, rahn ihyan nino ndevaco se man, ihyan che rendihche ye sahn man:

—¿A ndiyu sahn tih che rica se che din ihyan vedevahino nduco se ne?

⁹Nahn ihyan ne, rahn ye:

—Sahn tih chemin.

Nahn tun ihyan ne, rahn ye:

—Ndiyusahn tih chemin, ate tihca ro se.

Rahn man se:

—A u chemin.

¹⁰Tumerune ihyan sahn:

—¿Me taca chi che chi ro nan ne?

¹¹Ndahconan se, ne rahn se:

—Ihyan min che duche ye Jesus, din ye nchete, chacotahme ye ndutinán, ne tahve ye u, chahn nanó nan nan nune Siloé. Chihno nanó nan ne, ndetahno chi ro nan.

¹²Tumerune ihyan chahn sahn:

—¿Ti quenan ihyan min ne?

Ndahconan se, ne rahn se:

—Hua devano.

¹³Tuhme quenda ihyan sahn min nan sahn fariseo.

¹⁴Ro che din Dihvo vo che chi ro nan sahn min ne, ro che rahtetuhno ihyan.

¹⁵Chemin che tumerune sahn fariseo chahn sahn taca chi che chi ro nan se. Ndahconan se, ne rahn se ri se sahn chahn:

—Chacotahme Jesus nchete ndutinán, ne nanó nan nduhca che rahn ye, ne ndetahno chi ro nan.

¹⁶Tuhme rahn ama o sahn fariseo chahn:

—Sahn che tihca din me ne, ametah yahn Dendiohs che tihca redin se, te hua renevahnecon se ro che rahtetuhno ihyan.

Ate tama te o se ne, rahn se:

—Ndete che hua yahn Dendiohs sahn ne, ¿taca redin se vederihno tuhme? Nduco tihca ne, hua cavih ndudo yahn se nduco vih,

¹⁷ne ndaconan tumerune se sahn min:

—Me di, ¿deh rahn yahn sahn min che din se che chi ro nan ne?

Ndahconan se, ne rahn se ri se sahn chahn:

—U ne rahn te ihyan min ne, ama ihyan profeta.

¹⁸Ate sahn chahn ne, hua nahn cotahno se che ve nan sahn min ro menan. Chemin che tahve se chehua indihthe yahn sahn min,

¹⁹ne tumerune se ihyan:

—¿A nchuñ daya ne sañguh ne? ¿A cuaco che ve nan se cuahn che chihndeyan se ne? ¿Me taca chi che chi ro nan se ne?

²⁰Ndahconan indihthe yahn sahn min:

—Sañguh che daya nuhn, ne ve nan se cuahn che chihndeyan se.

²¹Ate hua devano nuhn taca chi che chi ro nan se, nde hua devano nuhn duh ihyan din ye che chi ro nan se. Tumerune nchuñ sahn. A va nduyo yahn se, ne man se co nte cuande se nchuñ.

²²Indihthe yahn sahn min ne, tihca rahn ye, te vahino ye, yahn che a checadiño ye te sahn ndinan chahn ne, a ntuño se che ndetendah se adecoduhno ihyan chete yaco, ndete che cotahno ye che Dihvo vo ne, a ihyan min che a va cade che chi ye ndedevahn ye ihyan iyehñse.

²³Chemin che rahn ihyan chahn ri ye sahn ndinan chahn che tumerune se man sahn daya ye te a va nduyo yahn se.

²⁴Tuhme ndaconan cah sahn ndinan chahn sahn min, ne rahn se ri se sahn:

—Codin cava Dendiohs, ne cahme co nuhn cha che cuaco, te nuhn ne, devano nuhn te sahn min che din se che chi ro nan ne, sahn nunde se.

²⁵ Ndahconan sahn min, ne rahn se ri se sahn chahn:

—U ne, hua devano a ihyan nunde ye o hua. Ate devano che ro menan me ne, ve nan, ne ihyan min din ye che chi ro nan.

²⁶ Ndaconan tumerune sahn chahn sahn:

—¿Taca din se che chi ro nan ne?

²⁷ Ndahconan sahn min, ne rahn se ri se sahn chahn:

—A rahn ri nchuhn, ne hua ritahno ne. ¿Deh ndah co yahn ne che ndaconan cahma tun ne? ¿A nduco ne nahn cotahno ne ihyan min ne?

²⁸ Rahn sahn chahn nduco sahn min, ne rahn se ri se sahn:

—Di ne, ndichahtine sahn min. Ate nuhn ne, ndichahtino nuhn Moisés.

²⁹ A devano nuhn te Moisés ne, a man Dendiohs cah ye ntiyon ihyan. Ate sahn che rahn me ne, nde hua devano nuhn ti chica se.

³⁰ Ndahconan sahn min, ne rahn se ri se sahn chahn:

—Ama rahn ino yahn nchuhn, che rahn ne che hua devano ne ti chica ihyan min, te u ne, din ye che chi ro nan.

³¹ A devano cuaco vo te Dendiohs ne, hua rihcovan ye yahn ihyan nunde, ate rihcovan ye yahn ihyan che renevahneacun ye ihyan man, redinah ye vederihquentiyon yahn ye man.

³² Nde ama yune hua nihnevan vo yahn ama ihyan che co din ye che co ro nan ihyan nan ve.

³³ Ihyan min ne, Dendiohs dechuh ye ihyan, ne chemin che redin ye vederihno. Ndete che hua ne, hua dehva co din ye.

³⁴ Rahn sahn chahn ri se sahn min:

—Di ne, ama sahn nunde di nde ro che chihneyan. ¿Taca che nahn cacuehn nuhn ne?

Chihno rahn se chemin ne, ndetendah se sahn chete yaco.

³⁵ Checadino Dihvo vo che ndetendah sahn ndinan chahn sahn min chete yaco, ne cuahn che ntaca ye sahn ne, tumerune ye sahn:

—¿A ritehne Daya Dendiohs ne?

³⁶ Rahn se ri se ihyan:

—Dihvé, cahma ne co ne u duh ihyan min cava che cotahnó ihyan.

³⁷ Ndahconan Dihvo vo, ne rahn ye ri ye sahn:

—A u chemin, che renté ndoque. Man ne, a ndihche u.

³⁸ Tuhme chehntihya se nan Dihvo vo, ne rahn se ri se ihyan:

—Dihvé, ritahnó ndih.

³⁹ Namin rahn Dihvo vo:

—U ne, nda iyehense cuh cava che techecade yahn nducoyaca ihyan. Ihyan che hua devano ye Ndudo yahn Dendiohs ne, cacúahn ihyan, ne ihyan che devano ye che rahco ye ne, cuhnde ro yahn ye che nde hua devano ye.

⁴⁰ Ama o sahn fariseo che chenun se min ne, chihnevan se che tihca rahn ye, ne rahn se ri se ihyan:

—¿A namin nuhn, rahn ne yahn nuhn che hua devano nuhn ne?

⁴¹ Ndahconan Dihvo vo, ne rahn ye ri ye sahn:

—Ndete che hua devano nchuhn ne, nde hua chendihco ne nunde. Ate nducote a man nchuhn rahn ne te a devano ne man, nducote rahcotahn ne man ne, chemin che chendihco ne nunde.

10

Ejemplo yahn itecuche

¹ Quendi Dihvo vo, ne rahn ye:

—Cuaco rāhn rí nchuhn te sahn duco ne, hua renda se cuahn chendevah yahn chan nan chenun itecuche, te renda se cuahn chihto chan.

² Ate ihyan che redin ye cudado itecuche ne, renda ye cuahn chendevah yahn chan.

³ Sahn che redin cudado chendevah ne, renahne se, ne renda ye. Rahn ye che duche queri ama te, ne rah ye ite. Cuahn che rah ye ite ne, rechí te, ne retenda ye ite chete chan.

⁴ Cuahn che a retenda ye nducoyaca te chete chan ne, riquendañan ye yahn te, ne riquendi te ihyan, te ndi nino te ihyan.

⁵ Ate hua riquendi te sahn che hua rendihche te. Tahque ndah te ne, rano te yahn se, yahn che hua rendonahn te ndudo yahn se.

⁶ Dihvo vo ne, nte ye ejemplo cuh cava sahn chahn, ate hua chenahn se.

Ejemplo yahn ihyan che ndah redin ye cudado itecuche

⁷⁻⁹ Quendi Dihvo vo, ne rahn ye ri ye sahn chahn:

—Cuaco rāhn rí nchuhn te, nduhca che richihve chendevah yahn chan cava che co chuh itecuche ne, tihca u cava ihyan yahn. Ihyan che ritahno ye u ne, ndevahn ye, ne cuahtenan ye vahchetero. Ihyan chahn ne, anduhneca itecuche che hua ndere vatechica man te, che rondonda te chete chan, ri te cudado man, riquendañan te rahn te reh te man. Nducoyaca sahn rihneh che chahte se ro che metañ nda, redin ca se che Ndudo yahn Dendiohs rahndudo se ne, anduhneca sahn duco, tihchan se, ne ihyan yahn Dendiohs ne, hua rihcovan ye ndudo yahn se.

¹⁰ 'Sahn duco ne, renda se cava che cahno se ihyan man, duco se man, cuihno denda se ihyan man. Ate u ne, nda cava che ndedevahn ihyan, ne ama ndahca cuahno ye, cuahtenan ye vahchetero.

¹¹ Nduhca ama ihyan che ndah redin ye cudado itecuche yahn ye nde ndihco mendahn ye ihyan cava che ndedevahn ye ite ne, tihca u, te ndah redin cudado ihyan yahn, nde cahco mendahn u coh, cava che ndedevahn ihyan.

¹² Ate nducoyaca sahn mozo che redin se ntiyon min ne, nducote ndiyu yahn se itecuche ne, hua cudado se. Cuahn che renda lobo ne, rihcoman se itecuche che nduco se, ne rano se. Tuhme retah lobo ite, ne rihno rano ite chenañan.

¹³ Rano se, te ndiyu dihve itecuche sahn, ne hua redin se cudado ite numa ino se.

¹⁴⁻¹⁵ 'U ne, anduhneca ama ihyan che ndah redin ye cudado itecuche yahn ye. Chida ne, rendihche ye u, ne u ne, rendihche ihyan. U ne, nda cuandé ihyan yahn, ne man ye ne, richahtino ye u. U ne, nde cahco mendahn u coh, cava che ndedevahn ihyan.

¹⁶ Namin vate ca ihyan che nedin yahn ihyan, ndedevahn ihyan. Man ne, vatechica vane ye, ate nevahnecon ye u, ne ndo dama ye van ihyan yahn.

¹⁷ 'Chida ne, yahino ye u, te cahco mendahn u coh, cava che ndedevahn ihyan iyehñse. Cuihno min ne, va che ntuché.

¹⁸ Nde ama ihyan ne, hua co cahno ye u, ndete che hua man cahco mendahn u. Va vederihquentiyon yahn cava che cahco mendahn u coh. Namin va vederihquentiyon yahn che ntuché. Vederihquentiyon min che te Chida u.

¹⁹ Cuahn che chihno rahn Dihvo vo ndudo chemin chan, chihnevan sahn ndinan chahn ne, ndevanan se, a vih rahn ama a vih rahn tama se.

²⁰ Ama yahn se ne, rahn se:

—Nde hua tumacah nchuhn che rahn sahn tih, te quenun vaco chihnga sahn, ne hua va cuaco dave yahn se.

²¹ Ate nahn tun se ne, rahn se:

—Adecoduhno ihyan che quenun vaco chihnga ihyan ne, hua tihca runeca de rente ye. Avane ne, hua co din ye che co ro nan ihyan nan ve.

Sahn ndinan yahn naciön yahn Israel ne, nahn cah se tu Dihvo vo Jesucristo

²² Ro min ne, ro iche, ne tahn min redin ihyan vihco yahn yaco, min yan Jerusalén.

²³ Dihvo vo ne, quechica ye ndiyaco me man corredor che duche Corredor yahn Salomón.

²⁴ Ndo dama sahn ndinan chahn nan ye, ne rahn se ri se ihyan:

—Ndete che ndih, ihyan min che a va cade che chi ye ndedevahn ye ihyan iyehse ne, cahma cuaco no ne co ne nuhn. Hua ndahca che rihco ndeh ne.

²⁵ Ndahconan Dihvo vo, ne rahn ye ri ye sahn:

—A rahn ri nchuhn, ne hua ritahno ne. Nduco vederihno che redin numacuahn vederihquentiyon yahn Chidá ne, a ndero ndi che a u chemin.

²⁶ Ate nchuhn ne, hua ritahno ne, te hua ndi cuande ne van ihyan yahn, nduhca che a rahn ri nchuhn.

²⁷ Ihyan yahn ne, rihcovan ye ndudo yahn, ne rinduco ye u. Me u ne, nda cuandé ihyan.

²⁸ Rendedevahn ihyan, ne cuahtenan ye vahchetero numacuahn ro. Hua duhva co din che conda ye, te u nda cuandé ihyan.

²⁹ Man Chidá tendahnun ye ihyan chahn cava che cotahno ye u. Ihyan min che tahque chahte vederihquentiyon yahn ye, ne nducote namin nda cuande ye ihyan ne, chemin che hua duhva co din che conda ye.

³⁰ U nduco Chidá ne, ama no vederihquentiyon yahn nuhn man, ama no vederenedecadino yahn nuhn man.

³¹ Cuahn che tihca rahn Dihvo vo ne, ndaconan chetah sahn ndinan chahn tu che cah se ihyan.

³² Tuhme rahn ye ri ye sahn:

—Numacuahn vederihquentiyon yahn Chidá, ama ndeh nan dehtenduh che ndah nedín nan nchuhn. Ate nchuhn ne, de tu nahn cah ne u.

³³ Ndahconan sahn chahn ne, rahn se ri se ihyan:

—Ndiyu yahn dehtenduh che redin ne che cah nuhn tu ndih, ate yahn che duche rino ne Dendiohs che tihca rahn ne. A ndero ndi che ihyan iyehse ndih, ne rahn ne te ama no vederihquentiyon quenan cuma ne nduco Dendiohs.

³⁴ Tuhme rahn Dihvo vo ri ye sahn chahn:

—Nan ley che riquendi nchuhn ne, ndirun che rahn Dendiohs yahn ihyan tuhca: “Nchuhn ne, menun Dendiohs nchuhn.”

³⁵⁻³⁶ A devano nchuhn te cha che ndirun nan Ndudo yahn Dendiohs ne, hua co cahmo vo che hua cuaco. Nducote a man Dendiohs rahn ye yahn ihyan che rihnde tah ye Ndudo yahn ye te menun Dendiohs ihyan ne, chemin che nde tah hua ndahca che tihca rahn ne che duche rinó Dendiohs, che rahn che u che Daya ye man, che tendahnun ye u, dechuh ye u muhn iyehse man.

³⁷ Cuentah nchuhn ndutinan ne, condihchero ne. Ndete che numacuahn vederihquentiyon yahn Chidá, redin vederihno, tuhme cotahno ne u.

³⁸ Nducote redin vederihno numacuahn vederihquentiyon yahn ye ne, cotahno ne u, andahre hua nahn cotahno ne yahn ndudo che ricuahn. Tuhme tumacadino ne che rinduco Dendiohs Chida u.

39 Chihco dāma ino sahn chahn tama yune che nahn din se preso ihyan, ate ndiquendāh ye van se, ne din vi ye.

40 Tuhme cuahn ye cuahn chihto ico Jordán, ne min quenān ye, lado cuahn nan che riquendāh yahn, cuahn nan che quenān Juan Bautista chehdenune ye ihyan ro menān.

41 Ama yahn ihyan rahn ye, rendihchero ye Dihvo vo, ne rahn ye:

—Juan Bautista ne, andahre hua din ye nde ama vederihno, ate nducuahh che rahn ye yahn ihyan cuh ne, cuāco.

42 Ihyan che chahn ye min ne, ama yahn ye chitahno ye ihyan.

11

Chih Lázaro

1-3 Yan Betania ne, chihnde ama ihyan che duche ye Lázaro. Ihyan min ne, chahte o cahve ye; ama ye ne, duche ye María, ne tama ye ne, duche ye Marta. A ihyan che duche María me che chacotāhme ye nunedān cah Dihvo vo, ne ndi cuma ye nduco yudo tin ye. Ama yune ne, chetāh cah Lázaro, ne ama tahn ndi ye. Tuhme tahve nduh che o cahve ye ndudo yahn Dihvo vo, ne rahn ye:

—Dihve nuhn, amigo yahn ne Lázaro ne, chetāh cah ihyan, ne ama tahn ndi ye.

4 Cuahn che chihnevan Dihvo vo ne, rahn ye:

—Cah min ne, andahre din che coh ye, ate chemin ne, cava che cuhnde ro vederihquentiyon chahte yahn Dendiohs, ne ndeva ihyan yavenān ye mān, ndeva ye yavenān u che Daya ye mān.

5 Andahre ama yahino Dihvo vo ihyan chahn, Lázaro mān, María mān, Marta mān ne,

6 cuahn che ndā ndudo yahn ye che cah Lázaro ne, chendāh ca ye te o ro min nan che quenān ye.

7 Chihno min ne, rahn ye ri ye ihyan apóstol yahn ye:

—Ndaconan cuhn vo nduco nchuhn estado yahn Judea.

8 Tuhme rahn ihyan chahn ri ye ihyan:

—Ihyan Ricuahh, cade chuh neve ro che nahn cahno sahn ndinān chahn ndih nduco tu, ne mān ne, ¿a rihco ne che cahh tun ne min ne?

9 Rahn ye ri ye ihyan chahn:

—Ndichio ura che ama ro, ne cuahn che ro vatechica vo ne, hua renda cah vo, te ro nan vo yahn che quendiho dave yahn yahn.

10 Ate ndete che vino vatechico vo ne, conda cah vo yahn che man ro.

11 Chihno min ne, rahn ye ri ye ihyan chahn:

—Amigo yuhn vo Lázaro ne, quiyādo ye, ate cahh ndedetuhché ihyan.

12 Rahn ihyan chahn ri ye ihyan:

—Dihve nuhn, ndete che chetāh yahnde ihyan ne, ametah nduh dito ri yahn ye.

13 Dihvo vo ne, hua rahn cuāco ye che a chih Lázaro, ne chemin che rahco ihyan apóstol chahn che quiyādo ye.

14 Tuhme rahn cuāco ye ri ye ihyan chahn:

—Lázaro ne, a chih ye.

15 Tahque ndāhcā che hua quenān min ro che chih ye, te nduco tihcā ne, tahque ndāh ro yahn nchuhn, cava che cotahno ne. Mān ne, cuhn vo quendihero vo ihyan.

16 Tomás, ihyan min che ntāhco ihyan che duche ye “Cuāhche” ne, rahn ye ri ye ihyan apóstol chenān chahn:

—Cuhn vo nduco nchuhn, conduco vo Dihvo vo, andahre va che coh vo dama nduco ye.

A Dihvo vo Jesucristo che rendedevahn ye ihyan iyehanse man, rendedetuiche ye tenahn man

¹⁷ Cuahn che nda Dihvo vo yan Betania ne, a cun ro che quenun Lázaro chete yayan.

¹⁸ Betania ne, nino nduco yan Jerusalén, ri tenduh o kilómetro quenan mahn,

¹⁹ ne ama yahn sahn ndinan yahn nación yahn Israel, chahn se chendi- hchero se Marta man, María man, cava che necah se vedechahtino ihyan, yahn che chih cahve ye.

²⁰ Cuahn che checadino Marta che a nda nino Dihvo vo ne, cuahn ye quendi yune ye ihyan. Numanahn min ne, quenun María vah.

²¹ Ura che a tahn nun Marta Dihvo vo ne, rahn ye ri ye ihyan:

—Dihvé, ndete che muhn quenan ne ro che chi dito yahn cahvé ne, nde hua chih ye.

²² Ate dehve din yahn, te ndih ne, adecodehno che caca ne Dendiohs ne, cuahnecun ye.

²³ Rahn Dihvo vo ri ye Marta:

—Quehve ne, ndaconan conan se.

²⁴ Rahn Marta ri ye Dihvo vo:

—Cuaco che ndaconan conan ye, cuahn che ntuche tenahn, ro che cuihno iyehanse.

²⁵ Tuhme rahn Dihvo vo ri ye Marta:

—Che ntuche tenahn man, che cuahtenan ye vahchetero man ne, a u che rihquentiyón. Ihyan che ritahno ye u ne, andahre coh ye ne, ntuche ye.

²⁶ Nducoyaca ihyan che ritahno ye u ne, hua conda ye, te cuahtenan ye vahchetero cuahn dama. ¿A ritehne chemin ne?

²⁷ Rahn Marta ri ye Dihvo vo:

—Taca hua, Dihvé. Ritahnó. Namin ritahnó che a ndih che Daya Dendiohs man, a ndih che a va cade che chi ne ndedevahn ne ihyan iyehanse man.

²⁸ Chihno rahn Marta ne, cuahn ye ngua ye coh ye María, ne rahn ye deco deco ri ye ihyan:

—Nda Ihyan Ricuahn, ne rah ye di.

²⁹ Ndetahno necuan María, ne cuahn ye nan che quenun Dihvo vo.

³⁰ Dihvo vo ne, ametah conda ye viyan, te quenan rino ye yune nan che ntaca Marta ihyan.

³¹ Sahn ndinan chahn che chenan se vaco María renecah se vedechahtino ihyan ne, ndihchero se che aderano ye necuan ye cuahn ye, ne cuahn se nduco ye. Rahco se te cuahn ye nan yayan, cuaco ye cava cahve ye.

³² Cuahn che nda María nan Dihvo vo ne, chehntihya ye, ne rahn ye:

—Ndete che muhn quenan ne ro che chi dito yahn cahvé ne, nde hua chih ye.

³³ María ne, ama raco ye. Namin sahn chahn ne, raco se. Ndihchero Dihvo vo, ne ama chi ndache ye.

³⁴ Tumerune ye ihyan chahn:

—¿Ti chihche nchuhn tenahn me ne?

Rahn ihyan chahn ri ye ihyan:

—Dihve nuhn, cuhn vo nduco ne, ndihchero ne.

³⁵ Namin chaco Dihvo vo.

³⁶ Tuhme rahn ama o sahn chahn:

—Condihche nchuhn. A ndero ndi che ama yahino ye tenahn me.

³⁷ Tama te o se ne, rahn se:

—Ihyan tih ne, din ye che chi ro nan sahn nan ve me. ¿Taca che hua din ye che ndoyahn Lázaró, ne hua chih ye?

Dihvo vo Jesucristo ne, ndedetuhche ye Lázaró

³⁸ Dihvo vo ne, ama chi ndache ye, ne cuahn nda ye nan yayan me. Yayan me ne, ndindah nan ama yava, ne ama tu chahno ndi chendevah yahn.

³⁹ Rahn Dihvo vo:

—Cuehnevi nchuhn tu chende yayan. Conahne ne.

Tuhme rahn Marta ri ye Dihvo vo:

—Dihvé, co a ran tenahn, te a chihno cun ro che chih ye.

⁴⁰ Ate rahn Dihvo vo ri ye Marta:

—A rahn ri di te ndete che ritehne ne, tumacadine vederihquentiyon chahte yahn Dendiohs.

⁴¹ Tuhme chehnevi ihyan chahn tu me. Chenihyon nan Dihvo vo nan ro, ne covah ye tuhca:

—Chidá, renté nundihve cuahn ndih yahn che rihcovan ne che reváh.

⁴² A devanó te cuahn dama che reváh ne, rihcovan ne, ate tihca rahn cava che ndah yahn ihyan che chenun ye muhn, cava che cotahno ye che a ndih dechuh ne u.

⁴³ Chihno covah ye ne, rahn ye ama dito:

—Lázaró, ¡cuendiquendah tan!

⁴⁴ Ndetahno ntuche ihyan min, ndiquendah ye chete yayan. Deva ndacotuma ye tino, nde tah nde cah ye man, nan ye man. Rahn Dihvo vo ri ye ihyan chahn:

—Cuentahte nchuhn tino che ndacotuma ye.

Rente cade sahn ndinan chahn che din se preso Dihvo vo Jesucristo

⁴⁵ Sahn ndinan chahn che chahn se chinduco se María cuahn che chih cahve ye ne, ndihchero se vederihno che din Dihvo vo, ne ama yahn se chitahno se ihyan.

⁴⁶ Ate nah se ne, chahn se chengo se sahn fariseo yahn vederihno che din ye, ndedetuhche ye Lázaró.

⁴⁷ Tuhme ndo dama sahn fariseo chahn man, chidocuyan ndinan man, nduco nducoyaca sahn ndinan yahn nación yahn Israel, nte cade se, ne rahn se:

—¿Taca din vo?, te ihyan min ne, ama redin ye vederihno.

⁴⁸ Ndete che cahcoman vo che quendi ye ne, nducoyaca ihyan cotahno ye ihyan, ne denan chi sahn ndinan yahn Roma, cuihno ndahtera se yaco yuhn vo man, cuihno cahno se ihyan nación yuhn vo man.

⁴⁹ Ate Caifás, ihyan min che chidocuyan che tahque ndinan nduyo min ne, rahn ye ri ye sahn chahn:

—Nchuhn ne, nde hua devano ne.

⁵⁰ Nde tah hua retumacadino ne, te tahque ndahca yuhn vo, che coh ama no ihyan cava ihyan nación yuhn vo yudomin ca che coh nducoyaca ye.

⁵¹ Caifás ne, ndiyu che ndedecadino man ye che tihca rahn ye. Nducote ihyan min ndinan ye nduyo min ne, cah Dendiohs, checadino ye, ne chemin che rahn ye che va che coh Dihvo vo Jesucristo, cava che ndedevahn ye ihyan nación yahn Israel man,

⁵² nducoyaca ihyan yahn Dendiohs che chenan ye muhn min numachahte iyehne man.

⁵³ Tihcá chi, che nde ro min, chihco cåde sahn ndinan chahn che cahno se Dihvo vo.

⁵⁴ Chemin che ametah quechica ro Dihvo vo van ihyan. Tahque ndah ye ne, chica ye estađo yahn Judea, ne cuahn ye ama cuan, nino yahn nan che metah duhva, chihto ama yan che duche Efraín. Min quenan ye nduco ihyan apóstol yahn ye.

⁵⁵ A cochi nino vihco ro yudo yahn ihyan nación yahn Israel, ne ama yahn ihyan rica ye yan vaco ye, rahn ye yan Jerusalén ama o ro numanahn che metah cuanan vihco me, cava che ndo dave ye nduhca costumbre yahn ye.

⁵⁶ Rinuhn ihyan chahn Dihvo vo, ne ama retumarune vih ye ura che chenun ye chete yaco:

—Nchuhn, a hua devano ne, ¿a chi ye vihco ne?

⁵⁷ Sahn fariseo man, chidocuyan ndinan man ne, a ndihquentiyon se che adecoduhno ihyan che devano ye ti quenan Dihvo vo ne, cahma ye co ye sahn, cava che din se preso ihyan.

12

Ama ihyan ndahta ne, chacotahme ye nunedan cah Dihvo vo Jesucristo

¹ Te an ro ca renda che nda ro yudo me, ne cuahn Dihvo vo yan Betania, quendihchero ye Lázaro, ihyan min che ndedetuhche ye ihyan van tenahn.

² Vaco Lázaro din ihyan chahn ama vihco cava Dihvo vo, ne cah ye, cheh vino ye. Marta ne, chihntave ye che cheh ihyan chahn, ne Lázaro man, Dihvo vo man, vate ye nduco ihyan chenhahn nan mesa.

³ Ura min nda María, nda ye tenduh man litro nunedan ndah, che duche nardo. Chemin ne, ama yahn chihve. Chacotahme ye cah Dihvo vo, ne nedin cuma ye nduco yudo tin ye. Numacuahn chetevah me quendihco chan dan.

⁴ Tuhme ama sahn che ndi cuande se van ihyan apóstol chahn, che duche se Judas Iscariote, daya Simón, sahn min che va che ndihcue ndeh se Dihvo vo ne, rahn se:

⁵ —Nunedan tih ne, rignonun chihve tenduh ino ciento tume diyahngua, ¿taça che hua ndihcue tahn tih, ndaca che conan te ihyan chevah?

⁶ Judas ne, ndiyu che yahino se ihyan chevah che tihca rahn se, te yahn che duco se. Nducote sahn min ndi se tesorero van ihyan apóstol chahn ne, rendaca yune che reduco se.

⁷ Tuhme rahn Dihvo vo ri ye sahn:

—Hua cahca tan che tihca redin te. Chehdenda te nunedan me u, cava che chuhndeyan che conun chete yayan.

⁸ Ihyan chevah ne, cuahn dama chenun ye van nchuhn, ne co conan ne ihyan cuahn che nahn ne. Ate u ne, hua cuahn dama conan nduco ne.

Rentuhno sahn ndinan chahn cava che cahno se Lázaro

⁹ Ama yahn ihyan nación yahn Israel, checadino ye che yan Betania quenan Dihvo vo, ne cuahn ye quendihchero ye ihyan. Namin nahn ndihchero ye Lázaro, ihyan min che ndedetuhche Dihvo vo ihyan van tenahn.

¹⁰ Tuhme ntuhno chidocuyan ndinan chahn che namin nduco Lázaro cahno se ihyan,

¹¹ te a cava Lázaro che ama yahn ihyan nación yahn Israel rihcoman ye sahn, ritahno ye Dihvo vo.

Chenda Dihvo vo Jesucristo yan Jerusalén

¹² Ama yahn ihyan nda ye vihco ro yudo, yan Jerusalén. Chi dave tama ro me ne, checadino ye che va che nda Dihvo vo.

¹³ Tuhme chihca ye iyon, quenda ye, ne cuahn ye quendi yune ye Dihvo vo. Cuahn che tahn nun ye ihyan ne, chenda ye viyan rah yeno ye:

—¡Ndeva vo yavenan Dihvo vo Dendiohs! ¡Ndeva vo yavenan ihyan cuh che dechuh ye! ¡Ndeva vo yavenan ihyan cuh che Rey yahn nación yuhn vo Israel!

¹⁴ Dihvo vo ne, ndaca ye ama burro lihn, quendudo ye ite, te a ndirun nan Ndudo yahn Dendiohs tuhca:

¹⁵ Nchuhn ihyan yan Jerusalén, hua dehva rahco ne. Condiheche ne. Cochi Rey yahn ne, quendudo ye ama burro lihn.

¹⁶ Ro menan ne, hua chenahn ihyan apóstol yahn dehtenduh che tuhchan, ate adive cuahn che a conahn Dihvo vo vahchetero ne, tuhme chenahn ye che nducuahh che chahno chi Dihvo vo ne, a ndirun yahn nan Ndudo yahn Dendiohs.

¹⁷ Ihyan che ndihchero ye vederihno che din Dihvo vo, ndedetuhche ye Lázaro van tenahn ne, rente ye yahn.

¹⁸ Chahn ino ihyan yahn vederihno me, ne chemin che ama yahn ye chahn ye chendi yune ye Dihvo vo.

¹⁹ Tuhme rente sahn fariseo chahn van man se nduco vih:

—Condiheche nchuhn. A chihnonan yahn ntiyon yuhn vo, te nducoyaca ihyan ne, a chinduco ye ihyan cah.

Ama o sahn nación yahn Grecia ne, nahn ndihchero se Dihvo vo Jesucristo

²⁰ Van ihyan che chahn ye vihco min yan Jerusalén, ndeva ye yavenan Dendiohs ne, nduco neve sahn nación yahn Grecia.

²¹ Sahn chahn ne, chahn nda se nan ama ihyan yan Betsaida, estado yahn Galilea, duche ye Felipe, ne rahn se ri se ihyan:

—Codin ne favor, ne quenda ne nuhn nan Jesús, te nahn ndihchero nuhn ihyan.

²² Felipe ne, chahn ye rahn ye nduco Andrés, ne cuahn nduh che o ye, yahve ye Dihvo vo.

²³ Tuhme rahn Dihvo vo ri ye ihyan chahn:

—U che rinducó nducoyaca ihyan ne, a decodehno ura nahn vahchetero.

²⁴ Cuaco rahn ri nchuhn te cava che co yahn ama ndute trigo, ndo ndeh ne, va che cuehche ndiyahn. Ndete che hua cuehche ne, hua co ndeh.

²⁵ Ihyan che nahn ndedevahn man ye ihyan ne, denda ye ihyan. Ate ihyan che rihco mendahn ye ihyan muhn iyehhne ne, cuahtenan ye vahchetero numacuahn ro.

²⁶ Duh ihyan che nahn din ye ntiyon yahn ne, va che cahco dama ino ye conduco ye u. Ihyan che redin ye ntiyon yahn ne, cuahtenan ye vahchetero nducó, ne din Chidá che quenda yavenan ye.

Rahn Dihvo vo Jesucristo te va che cahno se ihyan

²⁷ Man ne, ama ran. Ate ndotenan che cahmá có Chidá che ndedevahn ye u, cahnevi ye che va che chuhrin ne, tahque ndah cahco dama inó, te a cava che chuhrin che cochí.

²⁸ Chidá, cahmá có ihyan: “Vá vedeyeno che dinahn nducuahh che chihquentiyon ne, cava che quenda yavenan ne.”

Tuhme chenun ama ndudo che chica vahchetero, che rahn:

—A din che quenda yavenan. Man ne, din che quenda yavenan tama yune.

²⁹ Chihnevan ihyan che chenun ye min, ne nahn ye ne, rahn ye che chine dave. Nahn tun ye ne, rahn ye te co ama angel yahve ye Dihvo vo.

³⁰ Tuhme rahn Dihvo vo ri ye ihyan chahn:

—Ndudo che chihnevan nchuhn ne, a cava man ne, ndiyu cava u.

³¹ A nda ura che cuhn de cade yahn ihyan iyehense, ne chundah, sahn min che rihquentiyon se iyehense ne, ndahco ndiya Dendiohs sahn.

³² Cuedevano nchuhn te cuahn che conan yah, din che cotahno ihyan numachahte iyehense u.

³³ Che tihca rahn ye ne, rahn ye nduhca che va che coh ye.

³⁴ Rahn ihyan chahn ri ye ihyan:

—A devano nuhn te nan Ndudo yahn Dendiohs ne, a ndirun che ihyan che a va cade che chi ye ndedevahn ye ihyan iyehense ne, hua nda ro che cuhno vederihquentiyon yahn ye. ¿Taca che rahn ne che ndih che rinduco ne nducoyaca ihyan, conan yah ne? ¿Duh ndih tuhme ne?

³⁵ Tuhme rahn Dihvo vo ri ye ihyan chahn:

—Conan ca te neve ro nduco nchuhn, cacuahn nchuhn. Cuihcovan ne ndudo yahn, cava che runecade cuahtechica ne, ne co ndevahn ne, te ihyan che hua runecade vatechica ye ne, nde hua devano ye ti nda ti tuno ye.

³⁶ Cuitahno nchuhn u, numanahn che quenán nduco ne, cava che co ne ihyan runecade.

Chihno rahn Dihvo vo chemin ne, chihcoman ye ihyan chahn, ne cuahn ye.

Deh cuande che hua ritahno ihyan naci6n yahn Israel Dihvo vo Jesucristo

³⁷ Andahre ama din Dihvo vo vederihno van ihyan chahn ne, hua chitahno ye ihyan.

³⁸ Hua chitahno ye, te va che conahn nduco ye, nduhca che dirun ihyan profeta Isaías tuhca:

Dihvé, neve cuahn ra ihyan che ritahno ye ndudo che rahndudo nuhn.

Neve cuahn ra ihyan che tumacadino ye vederihquentiyon yahn ne.

³⁹ Tihca chi che hua chi chitahno ihyan chahn. Namin dirun ihyan profeta Isaías tuhca:

⁴⁰ Dendiohs ne, deche ye ndutinahn ihyan chahn man, din cheche ye chedave yahn ye man,

cava che hua nchanahn ye man, hua conahn ye man,

ne hua cotahno ye Dihvo vo, ndevahn ye.

⁴¹ Tihca dirun ihyan profeta Isaías yahn vederihquentiyon chahte yahn Dihvo vo, te chinahn ama vederihno nduco ye, ndihchero ye vederihquentiyon min.

⁴² Andahre tihca ne, ama yahn ihyan naci6n yahn Israel chitahno ye Dihvo vo. Nde sahn ndinahn chahn, chitahno neve se. Ate hua chihco ro se che ritahno se ihyan, yahn che vah se che cahnevi sahn fariseo chahn vederihquentiyon yahn se chete yaco.

⁴³ Hua chihco ro se che ritahno se Dihvo vo, te tahque renan ino se che quenda h yavenahn se nan ihyan iyehense che co nan Dendiohs.

Ihyan che hua rihcovan ye ndudo yahn Dihvo vo Jesucristo ne, va che conda ye

⁴⁴ Ama yune cuahn che rahndudo Dihvo vo ne, ama dito rahn ye:

—Ihyan che ritahno ye u ne, namin ritahno ye Dendiohs Chida, ihyan min che dechuh ye u.

⁴⁵ Ihyan che rendihche ye u ne, retumacadino ye taca ihyan min.

⁴⁶ U ne, nda muhn iyehense, ricuahn Ndudo yahn Dendiohs, cava che ihyan che cotahno ye u ne, ndevahn ye, ne runecade cuahtenan ye.

⁴⁷ Ate ihyan che rihnevan ye ndudo yáhn, ne hua redinahñ ye ne, ndiyu che nahn mán che dín castigo ihyan, te ndá cava che ndedeváhn ihyan iyehñse, ndiyu demañ che dín castigo ihyan.

⁴⁸ Ihyan che racondah vedame ye u, ne hua rihcovan ye ndudo yáhn ne, va che co ye castigo ro che cuihño iyehñse, tunoca che hua dinahn ye ndudo che ricuáhn.

⁴⁹ Tihça, te Dendiohs Chida, ihyan min che dechuh ye u ne, a ndudo che rihquentiyon ye che renté mán, che rahndudó mán, ndiyu dehtenduh che ri yeno mán.

⁵⁰ A devanó te che rihquentiyon Chidá ne, che cuahtenan ihyan vahhetero cuahn dāma. Chemin che rahndudó nduhça che rihquentiyon ye u.

13

Dihvo vo Jesucristo ne, ñano ye çah ihyan apóstol yahn ye

¹ Cuahn che a tama ro ra renda che cuañan vihco ro yudo me ne, nducote a devano Dihvo vo che a ndá ro che ndāca ye iyehñse, ne ñahn ye ñan Dendiohs Chida ne, chihco ro ye nduhça che ama yahino ye ihyan yahn ye.

²⁻⁴ Chundah ne, a nde menañ çahn nun se chete chedave yahn Judas Iscariote, dāya Simón, nduhça che ndihcue ndeh se Dihvo vo. Nducote Dihvo vo ne, a devano ye che a mán Dendiohs Chida ndahco ye nducuahn vederihquentiyon tah ye mán, ñan ihyan min chica ye mán, min ñahn ye mán ne, ura che chihno cheh vino ye nduco ihyan apóstol yahn ye ne, necuan ye ñan mesa. Chehnevi ye tino tu che quenun ye, ne chetah ye ama toalla, chacondihco ye yutoran ye.

⁵ Namin chetah ye cu che reñano nun ye tah ye, ne chih ye nune. Tuhme canañ reñano ye çah ihyan apóstol yahn ye, ne renedin cuma ye nduco toalla me.

⁶ Cuahn che ndá ye ñan va Simón Pedro cava che ñano ye çah ye ne, rahn ihyan min ri ye ihyan:

—Dihvé, çtaca che ndih ñano ne çah ne?

⁷ Ndahconan Dihvo vo, ne rahn ye ri ye ihyan:

—Mán ne, hua renehñ deh conahn che tihça redín, ate adiva ne, coneñ.

⁸ Ate rahn Simón Pedro ri ye Dihvo vo:

—U ne, hua ndá ro che ñano ne çah.

Rahn Dihvo vo ri ye ihyan:

—Ndete che hua ñanó çah ne, ametah din cuandé di van ihyan yáhn.

⁹ Rahn Simón Pedro ri ye Dihvo vo:

—Dihvé, ndete che tihça ne, conāno ne ndiyu demañ çah, te namin conāno ne tahn mán, tñ mán.

¹⁰ Ate rahn Dihvo vo ri ye ihyan:

—Ihyan che a dave ye ne, a de çah ye rendotenan che ntu. Nchuhn ne, a dave ne, andahre hua nducoyaca ne.

¹¹ Rahn ye te hua dave nducoyaca ihyan chahn, yahn che a devano ye te ama cha sahn che chi cuande se van ihyan chahn ndihcue ndeh se ihyan.

¹² Chihno ñano Dihvo vo çah ihyan chahn ne, ndonun ye tino tu yahn ye, ne ndaconan chihnde ye ñan mesa. Tuhme rahn ye ri ye ihyan chahn:

—¿A chenahn nchuhn deh conahn che ñanó çah ne? Çahmá có nchuhn deh conah che tihça ñanó çah ne.

¹³ Nchuhn ne, renevahñecun ne u, rahn ne te a u che Dihve ne mán, Ihyan Ricuahn yahn ne mán, ne cuāco che rahn ne.

¹⁴ Cua cuande nchuhn. Andahre u che Dihve ne man, Ihyan Ricuahn yahn ne man, ate nanó cah ne. Tihca quenan cuma che din yahino ama tama ne vih, nano ne cah vih.

¹⁵ Chihcó ejemplo cuh cava che quendi ne.

¹⁶ Cuaco ráhn rí nchuhn te nde ama mozo hua tahque chahte vederihquentiyon yahn se che co patrón yahn se. Namin nde ama sahn che rahn ntiyon hua tahque chahte vederihquentiyon yahn se che co ihyan che redечuh ye sahn.

¹⁷ Ndete che chenahn nchuhn yahn ejemplo che chihcó yahn ne, ne dinahn ne ne, ama ndah ro yahn ne.

¹⁸ Che tuhca ráhn ne, hua cava nducoyaca nchuhn. U ne, ndiyu che hua tumacadinó duh nduh nchuhn che tendahnún nchuhn, ate va che conahn Ndudo yahn Dendiohs che a ndirun tuhca: “Sahn che dama reh dama rih se nducó ne, sahn min che din tan se nducó.”

¹⁹ Ráhn rí nchuhn ndudo cuh man che ametah conahn, cava che cuahn che a conahn ne, cotahno ne te a u che a va cade che chí ndedeváhn ihyan iyehse.

²⁰ Cuaco ráhn rí nchuhn te adecoduhno ihyan che nevahnecon ye ihyan che dechúh ihyan ne, a u renevahnecon ye. Me ihyan che renevahnecon ye u ne, renevahnecon ye Dendiohs Chida, ihyan min che dechuh ye u.

Dihvo vo Jesucristo ne, ráhn cuaco ye te Judas va che ndihcue ndeh se ihyan

²¹ Chihno ráhn Dihvo vo chemin ne, ama chi ran ye, ne ráhn cuaco ye:

—Cuaco ráhn rí nchuhn te ama cha nchuhn ndihcue ndeh ne u.

²² Ihyan apóstol chahn ne, a ndere rendihchenun ye nan vih, rendecadino ye duh yahn che ráhn Dihvo vo.

²³ Ama ihyan apóstol che ama yahino Dihvo vo ihyan ne, dama va ye nduco vih.

²⁴ Din tah Simón Pedro yahn ye, cava che tumerune ye Dihvo vo duh yahn che ráhn ye.

²⁵ Tuhme cuahn nda ca ye nan Dihvo vo, ne tumerune ye ihyan:

—Dihvé, ¿duh yahn che ráhn ne ne?

²⁶ Ndahconan Dihvo vo, ne ráhn ye ri ye ihyan:

—Decahnda ama ndi pan, ne sahn che cah, cheh se ne, a sahn min.

Tuhme decahnda Dihvo vo ama ndi pan, ne cah ye, cheh Judas Iscariote, daya Simón.

²⁷ Ndetahno che chetah Judas pan me ne, quenun chundah chete chedave yahn se. Tuhme ráhn Dihvo vo ri ye sahn:

—Cha che ndihque che din ne, codin no ndetahno.

²⁸ Nde ama ihyan che vate ye nan mesa ne, hua chenahn ye deh cuande che tihca ráhn Dihvo vo ri ye Judas.

²⁹ Nducote sahn min ndi se tesorero yahn ihyan chahn ne, chemin che rahn ye ne, ndedecadino ye, te co ráhn Dihvo vo nduco se che cua se dehtenduh che nahn yahn vihco, o che cah se tume ihyan chevah.

³⁰ Ura min ne, a man, ne cuahn che chihno cheh Judas pan me ne, quendah vah se cuahn se.

Ama vederihquentiyon ra

³¹ Cuahn che a chuh Judas cuahn se ne, ráhn Dihvo vo:

—Man ne, u che rinducó nducoyaca ihyan ne, nan dehtenduh che cuahno có ne, cuhnde ro vederihquentiyon chahte yahn. Namin cuhnde ro vederihquentiyon chahte yahn Dendiohs.

³² Nducote u che rinducó nducoyaca ihyan, cahco ró vederihquentiyon chahte yahn Dendiohs ne, namin Dendiohs ne, cahco ro ye vederihquentiyon chahte yáhn, ne a nun cuahn cahco ro ye.

³³ Dayá che yahinó nchuhn, a te neve ro ra che quenán nduco ne. Nchuhn ne, nuhn ne u, ate anduhneca che ráhn nduco sahn ndinan chahn ne, tihca ráhn nduco ne man, te nan che náhn ne, hua co cahñ ne quenuhn ne u.

³⁴ Cahco ama vederihquentiyon ra cava nchuhn. Chemin ne, che din yahino ama tama ne vih, nduhca che yahino man nchuhn.

³⁵ Ndete che din yahino ama tama ne vih ne, tumacadino nducoyaca ihyan che ritahno ne u.

Rahn Dihvo vo Jesucristo te cahma Pedro te hua rendihche ye ihyan

³⁶ Simón Pedro ne, tumerune ye Dihvo vo:

—Dihvé, ¿ti che nahñ ne ne?

Ndahconan Dihvo vo, ne rahñ ye ri ye ihyan:

—Nan che náhn ne, hua co condoque u man, ate adiva ne, condoque u.

³⁷ Tuhme rahñ Pedro ri ye ihyan:

—Dihvé, ¿dehco che hua co conducó ndih man?, te nde vá vedeyeno che cahco mendáhn u, andahre cahno ihyan u cava ne.

³⁸ Ate rahñ Dihvo vo ri ye ihyan:

—Ndere rahn che ve vedeyeno che cahco mendahn di, cava u. Cuaco ráhn rí di te numanahn che metah cuah tuh ne, cahme ino yune te hua rendihche u.

14

Atenañ che cotahno ihyan Dihvo vo Jesucristo che co cuahtenan ye nan Dendiohs Chida

¹ Hua ndeh ndedecadino nchuhn. Codin chahtino ne Dendiohs. Namin codin chahtino ne u.

² Vaco Chidá ne, ama va nan che cuahtenan ihyan. Ndete che hua tihca ne, a rahñ cá rí nchuhn. Cahn cahcoyan nan che cuahtenan ne.

³ Cuahn che a chahn chihcoyan nan che cuahtenan nchuhn ne, chi tún ndichecuá nchuhn cava che cuahtenan ne dama nducó nan che conán.

⁴ Nchuhn ne, a devano ne ti náhn. Namin a devano ne taça tuno ne min.

⁵ Rahn Tomás ri ye Dihvo vo:

—Dihvé, nducote hua devano nuhn ti che nahñ ne ne, nde hua codevano nuhn taça che co tuno nuhn min.

⁶ Rahn Dihvo vo ri ye ihyan:

—A u che retihyon yuné ihyan, a u che ricuáhn ndudo cuaco, a u che rendedeváhn ihyan. Atenañ cava u che co cuahtenan ihyan nan Dendiohs Chida.

⁷ Ndete che a tumacadino nchuhn yahn vederihquentiyon che quenán cumá ne, namin tumacadino ne duh che Chidá. Man ne, a tumacadino ne duh che Chidá, anduhneca ndete che a ndihchero ne ihyan.

⁸ Tuhme rahñ Felipe ri ye Dihvo vo:

—Dihvé, codin ne che co ndihchero nuhn Dendiohs Chida, ne nduco chemin ne, a cochahtino nuhn.

⁹ Ndahconan Dihvo vo, ne rahñ ye:

—Felipe, ametah ro che rinducó nchuhn, me ¿taça che hua retumacadine yahn vederihquentiyon yáhn? Ihyan che rendihchero ye u ne, anduhneca

ndete che rendihchero Dendiohs Chida. Ametah deh cuande che caque u che dín che ndihchero nchuhn ihyan.

¹⁰ Che tihça rahñ ne, rihque ro che hua devene che u ne, rinducó Chidá, ne rinduco man ye u. Ndudo che ricuáhn nchuhn ne, ndiyu che cuande yahn man, te che cuande yahn Chidá. A ihyan min che rinduco ye u, redin ye che rinahn ntiyon yahn ye.

¹¹ Cuitahno nchuhn che u ne, rinducó Chidá, ne man ye rinduco ye u. Me ndete che hua co cotahno ne chemin che dendudo renté nduco ne ne, cuitahno ne yahn vederihno che redín.

¹² Cuaco ráhn rí nchuhn te ihyan che ritahno ye u ne, namin din ye vederihno nduhça che redín, nde vederihno che tahque rahte din ye. Tihça, te u ne, náhn nan Dendiohs Chida,

¹³ ne nducuahñ che çaça nchuhn ihyan che cuande yáhn ne, u che Daya ye ne, dín che conahn nduco ne, çahco ró che ama chahte vederihquentiyon yahn ye.

¹⁴ U dín che conahn nduco nchuhn adecodehno che çaça ne che cuande yáhn.

Rahñ Dihvo vo Jesucristo che dechuh ye Vaco Ndah yahn Dendiohs

¹⁵ Ndete che yahino nchuhn u ne, codinahñ ne che rihquentiyón.

¹⁶ Nducote va che náhn ne, çacá favor Chidá, ne dechuh ye Vaco Ndah yahn ye conduco nchuhn cuahn ðama, ndaçã vedechahtino yahn ne. A Vaco Ndah yahn ye redin che renahn ihyan cha che cuaco.

¹⁷ Ihyan nunde ne, hua co conduco Vaco Ndah yahn Dendiohs ihyan, te hua retumacadino ye vederihquentiyon yahn. Ate nchuhn ne, retumacadino ne, te rinduco Vaco ye nchuhn, ne conun nchuhn cuahn ðama.

¹⁸ Hua ama yune çahcomán nchuhn, te ndaconan conducó nchuhn.

¹⁹ Cuihno neve ro ne, ametah ndaconan ndihchero ihyan iyehñse u, ate nchuhn ne, tumacadino ne che quendí conducó nchuhn, ne cuahtenan ne vahchetero, te u ne, vá çava ne.

²⁰ Tuhme tumacadino ne te u ne, rinducó Chidá. Me nchuhn ne, ndichahtino ne u, ne rinducó nchuhn.

²¹ Ihyan che renahn ye, ne redinahñ ye che rihquentiyón ne, rihco ro ye che yahino ye u. Chidá ne, yahino ye ihyan che yahino ye u, ne namin u ne, yahinó ihyan, ne rinducó ihyan.

²² Ama ihyan apóstol che duche ye Judas, ndiyu Judas Iscariote ne, tumerune ye Dihvo vo:

—Dihvé, ¿dehco che ráhn ne che conduco ne nuhn, ne hua conduco ne ihyan iyehñse ne?

²³ Ndahconan Dihvo vo, ne ráhn ye ri ye ihyan:

—Ihyan che yahino ye u ne, redinahñ ye che rihquentiyón. Ihyan chahn ne, yahino Chidá ihyan man, rinduco ye ihyan man. Namin u ne, rinducó ihyan.

²⁴ Ihyan che hua yahino ye u ne, hua redinahñ ye che rihquentiyón. Ndudo che ricuáhn nchuhn ne, a ndudo yahn Chidá, ihyan min che dechuh ye u, ndiyu ndudo yahn man.

²⁵ Rete cuandé nchuhn nducuahñ ndudo che tuhchan numanahn che quenán cá nduco ne.

²⁶ Avane ne, Vaco Ndah yahn Dendiohs, che dechuh ye che cuande yáhn, çava che nte vedechahtino nchuhn man, conan nchuhn man ne, din che

conahn nchuhn nducuahn man, ntihton yan nducuahn che te cuandé nchuhn man.

²⁷ Man ne, Dendiohs conduco ye nchuhn. Dín che ama ndahca cuahtenan ne, cuahte dihn chedave yahn ne, ne chemin ne, hua co din nde ama ihyan iyehse. Hua ndeh ndedecadino nchuhn, nde huane dihya ne co.

²⁸ A chihnevan nchuhn che rahn rí nchuhn che nahn, ne ndaconán conducó nchuhn. Ndete che cuaco che yahino nchuhn u ne, nde tuno chi yeno ne che rahn rí nchuhn che nahn nan Chidá, te Ihyan min ne, tahque chahte vederihquentiyon yahn ye che co u.

²⁹ A nde man no rahn rí nchuhn, çava che cuahn che a conahn ne, cotahno ne che a nan ihyan min che nahn.

³⁰ Ametah tuno ura yahn che quendi cá te cuandé nchuhn, te a cochi nino ura che conahn che nahn chundah, sahn min che rihquentiyon se iyehse cuh. Sahn min ne, metah nde ama vederihquentiyon yahn se nan,

³¹ ate cuahneçún che conahn nduhca che nahn se, çava che codevano ihyan iyehse che yahino Chidá, ne redinahn che rihquentiyon ye. Man ne, çaco vo muhn, cuhn vo nduco nchuhn.

15

Ejemplo yahn dihyo uva

¹ U ne, anduhneçá dihyo uva ndah. Me Chidá ne, anduhneçá ihyan che redin ye cudado dihyo uva.

² Dune dihyo uva che hua ri yahn ne, rihca ye. Ate dune che ri yahn ne, rihca ndudo ye man, reneçin dave ye man, çava che tahque co yahn. Anduhneçá ndete che tihca redin Chidá nduco ihyan che ritahno ye u.

³ Nchuhn ne, anduhneçá dihyo uva che a nedin davé, tihchan ne, yahn che a chicuáhn nchuhn.

⁴ Cuiquendi ne cochahtino ne u, ne u ne, quendí nda cuandé nchuhn. Ndete che nda riya ama dune dihyo uva ne, ametah co yahn, te ametah nda nan duto. Cuihco nchuhn cudado çava che hua cuahno co ne tihca. Ndete che hua quendi ne cochahtino ne u ne, co ne nduhca dune dihyo uva che a metah ri ndute yahn, yahn che ametah nda nan duto.

⁵ U ne, anduhneçá duto dihyo uva. Me nchuhn ne, anduhneçá dune. Nchuhn che nda cuandé nchuhn, ne ndete che quendi ne cochahtino ne u ne, co ne nduhca dune dihyo uva che ama ri yahn. Ate che tin deman nchuhn ne, hua dehva co din ne, te hua ndichahtino ne u.

⁶ Duh nchuhn che hua cochahtino ne u ne, cuacondah vedamé nchuhn, co ne nduhca ama dune dihyo uva che a ntah. Dune chemin chan ne, retiñ, ne reneçin dama ihyan rihquiyahn ye.

⁷ Ndete che quendi nchuhn cochahtino ne u man, quendi ne dinahn ne che a chicuáhn nchuhn man ne, cuica ne deh che nahn ne, ne conahn nduco ne.

⁸ Chidá ne, riquendah yavenan ye cuahn che ama ndahca redin nchuhn ntiyon. Nduco tihca ne, rihco ro ne che numa cuaco rinduco ne u.

⁹ Nduhca che yahino Chidá u ne, tihca yahino nchuhn. Cuiquendi ne, cochahtino ne u, ne quendi din yahino nchuhn.

¹⁰ U ne, redinahn vederihquentiyon yahn Chidá, ne cuahn dama yahino ye u. Namin nchuhn ne, ndete che dinahn ne che rihquentiyón ne, quendí din yahino nchuhn.

¹¹ Tihca ricuáhn nchuhn çava che ama co yeno ne nduhca che yeno man.

¹² Vederihquentiyon yáhn cava nchuhn ne, che din yahino ama tama ne vih nduhca che yahino man nchuhn.

¹³ Vedeyahino che tahque chahte che co cuahtenan cuma ihyan ne, che cahco mendahn ye ihyan coh ye, ndedevahn ye amigo yahn ye.

¹⁴ Nchuhn ne, amigo yáhn nchuhn, ndete che dinahn ne che rihquentiyón nchuhn.

¹⁵ Ihyan ne, hua renecah cuande ye mozo yahn ye dehtenduh che redin ye. Ate nchuhn ne, amigo yáhn nchuhn. Hua rinó nchuhn nduhca mozo yáhn, ne chemin che chicuáhn nchuhn nducuahh ne te cuande Chidá u.

¹⁶ Ndiyu nchuhn che tendahnun ne u. A man che tendahnún nchuhn, ne chihquentiyón nchuhn che din ne ntiyon yáhn, ntiyon min che cochihve numacuahh ro. Nduco tihca ne, din Chidá che conahn nduco ne, nducuahh che caca ne ihyan che cuande yáhn.

¹⁷ Man ne, ndaconan rihquentiyón nchuhn che din yahino ama tama ne vih.

Ihyan iyehhse ne, rendihche tan ye Dihvo vo Jesucristo man, ihyan yahn ye man

¹⁸ Nchuhn ne, a devano ne che din tan ihyan iyehhse nducó. Chemin che nde hua cahh ino ne cuahn che din tan ye nduco ne.

¹⁹ Nchuhn ne, hua dama ri ne nduco ihyan nunde. Chemin che hua yahino ye nchuhn nduhca che yahino ye combiero yahn ye. U ne, a tendahnún nchuhn van ye, ne redin tan ye nduco ne, yahn che ametah dama ri ne nduco ye.

²⁰ Cuenecahco nchuhn ndudo che a ráhn rí nchuhn tuhca: “Nde ama mozo yahn ihyan ne, hua tahque yudo se che co man ye.” Ihyan che redin tan ye nducó ne, namin din tan ye nduco nchuhn. Me ihyan che redinahh ye yahn ndudo che ricuáhn ne, namin nevahnecon ye ndudo che cacuahh nchuhn.

²¹ Va che chuhrihn nchuhn nducuahh vedetan yahn ihyan, yahn che rinduco ne u. Din tan ye nduco ne, te hua rendihche ye Chidá, ihyan min che dechuh ye u.

²² Nducote ndá, chicuáhn ihyan, ne hua chitahno ye ne, chemin che tahque chihta nunde yáhn ye, nde nan che cahma ye metah.

²³ Ihyan che hua ri rendihche ye u ne, namin hua ri rendihche ye Chidá.

²⁴ Vederihno che nde ama ihyan hua nedin ye ne, din van ye, ate nde nduco nduh ne, rendihche tan ye u man, rendihche tan ye Chidá man, ne chemin che nde tahque chihta nunde yahn ye.

²⁵ Tihca va che co cava che conahn ndudo yahn Dendiohs che a ndirun tuhca: “Andahre nde ama nunde yáhn metah, ate din tan ihyan nducó.”

²⁶ A Vaco Ndah yáhn Dendiohs che rete vedechahtino nchuhn man, che rete duto ndudo yahn ndudo ndah yahn ye man. Dechúh, ne cuahn che nda ne, te duto ndudo yahn ndudo yáhn.

²⁷ Namin nchuhn ne, cah ne duto ndudo yahn ndudo yáhn, te chinduco ne u nde ro che canan ntiyon yáhn.

16

¹ Rete cuandé nchuhn yahn dehtenduh che cuahno co ne, cava che hua ndaca dama ne.

² Sahn tan chahn ne, ndetendah se nchuhn chete yaco, ne nda ura che adecoduhno sahn che cahno se nchuhn ne, nde tuno ndedecadino se che a ntiyon yahn Dendiohs che redin se.

³ Tihca din se, te hua rendihche se Chidá man, u man.

4 Cuahn che nda ura che conahn nduco nchuhn tihca ne, cueneca hco ne te a rahn ri nchuhn.

Vederihquentiyon yahn Vaco Ndah yahn Dendiohs

'Ro menan ne, hua te cuandé nchuhn yahn ndudo cuh, yahn che quenan cá muhn iyehense nduco ne.

5 Ate man ne, nahn nan Ihyan che dechuh ye u, ne nde ama nchuhn hua returamune ne u ti che nahn.

6 Tahque ndah ne, ama chi ran ne che tihca rahn nduco ne.

7 Rahn cuacó ri nchuhn te tahque ndah cava ne che nahn, te atenan nduco tihca co dechuh Vaco Ndah Yahn Dendiohs, nte vedechahtino nchuhn.

8 Cuahn che nda ne, din che conahn ihyan che chendihco ye nunde man, din che conahn ye che runecade u man, din che conahn ye che Dendiohs ne, techecade ye yahn ye, din ye castigo ihyan man.

9 Conahn ye che chendihco ye nunde yahn che hua ritahno ye u.

10 Conahn ye che runecade u, te nahn nan Chida, ndaca van nchuhn.

11 Conahn ye che Dendiohs ne, techecade ye yahn ye, din ye castigo ihyan, te chundah, sahn min che quenan cuma se vederihquentiyon muhn iyehense ne, a techecade ye yahn se, ne va che din ye castigo sahn.

12 'Ama va ca ndudo che cacuahn nchuhn ate meniyon ne, hua tuno vederendecadino yahn ne che conahn ne.

13 A Vaco Ndah yahn Dendiohs che recah duto ndudo yahn ndudo ndah yahn ye. Cuahn che nda ne, te cuande nchuhn yahn ndudo min. Ndiyu tin deman che tihca din, te a Dendiohs che rihquentiyon che tihca din. Namin te cuande nchuhn nde yahn dehtenduh che coman cochi che co.

14 Ndeva yavenan, te a vederihquentiyon yahn che te cuande nchuhn.

15 Tihca, te nducuaahn vederihquentiyon yahn Chida ne, va tah. Chemin che rahn che Vaco Ndah yahn ye ne, a vederihquentiyon yahn che te cuande nchuhn.

Ihyan apóstol ne, co ran ye, ate adive ne, cuavi vederan yahn ye, ne co yeno ye

16 'A tah ra che quenán nduco nchuhn, te nahn nan Dendiohs Chida. Ate adive tah cuahn ne, ndaconan ndihchero ne u.

17 Tuhme returamune vih nahn ihyan apóstol chahn van man ye nduco vih:

—Rahn ye che cuihno neve ro ne, ametah ndihchero vo ihyan man, che adive tah cuahn ne, ndaconan ndihchero vo ihyan man, che a nahn ye nan Dendiohs Chida man. ¿Dehra conahn ne?

18 ¿Dehra conahn che rahn ye che cuihno neve ro me ne? Hua renahn vo deh conahn che tihca rahn ye.

19 Dihvo vo ne, checadino che hua chenahn ihyan chahn, ne nahn tumerune ye ihyan. Tuhme rahn ye ri ye ihyan:

—U ne, rahn ri nchuhn che cuihno neve ro ne, ametah ndihchero ne u, ne adive tah cuahn ne, ndaconan ndihchero ne u. ¿A yahn chemin che ama returamune vih ne ne?

20 Cuaco rahn ri nchuhn che ama co ndache ne, nde ama cuaco ne. Numanahn min ne, ihyan nunde ne, ama co yeno ye. Ate cuavi vederan yahn ne, ne co yeno ne.

21 Ama ndahta, cuahn che a nda ura yahn te che cuacoyahn te ne, ri ran te, yahn che ra yah chete te. Ate cuahn che a chacoyahn te decuah yahn te ne, nde metah renecahco te yahn vedeyah me, yahn che ama yeno te che a va decuah yahn te.

²² Nduhca vederan min che hua rengu ne, tihca vederan yahn nchuhn, te cuahn che ndaconan conducó nchuhn ne, ama co yeno ne, nde hua duhva co din che co ran ne.

²³ Nda ro min ne, nde ama nan dehtenduh ametah ndotenan che caca ne u che te cuandé nchuhn. Cuaco rahn ri nchuhn te nducuahh dehtenduh che nahn ne ne, co caca ne Chidá che cuande yahn, ne din ye che conahn nduco ne.

²⁴ Nde meniyon ne, nde ama nan dehtenduh hua rica nchuhn Ihyan che cuande yahn. Man ne, cuica ne nducuahh dehtenduh che nahn ne, ne din ye che conahn nduco ne, cava che ama co yeno ne.

Dihvo vo Jesucristo ne, ndahco ndiya ye ihyan nunde

²⁵ Ricuahh nchuhn deman nduco ejemplo, ate nda ro che ametah cacuahh nchuhn nduco ejemplo, te tahque ndah ne, cahma cuacó có nchuhn yahn vederihquentiyon yahn Chidá.

²⁶ Ro min ne, nducuahh dehtenduh che caca ne Dendiohs Chida che cuande yahn ne, metah ndotenan che u cacá favor ihyan che conahn nduco ne,

²⁷ te yahino ye nchuhn, ne man ye din ye che conahn nduco ne. Yahino ye nchuhn yahn che yahino ne u man, yahn che ritahno ne che man ye dechuh ye u man.

²⁸ U ne, chicá nan Dendiohs Chida, ndá muhn iyehhse. Man ne, a nun ndaca muhn, ne nahn tün nan ye.

²⁹ Tuhme rahn ihyan apóstol yahn ye ri ye ihyan:

—Man che cuaco ne, rahn cuaco ne nduco nuhn. Ametah nduco ejemplo rete cuande ne.

³⁰ A ndero ndi che devano ne nducuahh dehtenduh nde hua rendotenan che caca ihyan ndih che cah cuande ne ihyan. Chemin che ritahno nuhn che Dendiohs dechuh ye ndih.

³¹ Rahn Dihvo vo ri ye ihyan chahn:

—Man ne, a ritahno nchuhn u numa ino ne.

³² Ate a cochí nino ura che cano ne, cahn muhn cahn min ne, cahcoman ne u. Ate hua deman, te nduco Dendiohs Chida u.

³³ Nducuahh dehtenduh chemin chan ne, rete cuandé nchuhn cava che cochahtino ne u, ne cuahte dihn chedave yahn ne. Cuedevano ne te va che chuhrihn ne, din tan ihyan nunde nduco ne, ate hua dehva rahco ne, te va che ndahco ndiyá chundah nduco ihyan yahn se.

17

Dihvo vo Jesucristo ne, covah ye cava ihyan apóstol yahn ye

¹ Chihno che tihca rahn Dihvo vo nduco ihyan apóstol yahn ye ne, chenihyon nan ye nan ro, ne covah ye tuhca:

—Chidá, ndá nino ura che va che chuhrihn. Cuendeva ne yavenan cava che namin u ne, ndevá yavenan ne.

² Tihca, te ndih ne, chihco ne vederihquentiyon tãh che cahcantiyón nducoyaca ihyan iyehhse man, che ndedeváhn nducoyaca ihyan che tendahnun ne che cotahno ye u, ne cuahtenan ye vahchetero numacuahn ro man.

³ Atenan ndih che Dendiohs, ne ihyan che nevahnecon ye ndih man, u che dechuh ne man ne, atenan ihyan chahn che cuahtenan ye vahchetero numacuahn ro.

4 'U ne, ndevá yavenan ne muhn iyehñse. Namin dináhn ntiyon che chihquentiyon ne che dín.

5 Chidá, man ne, cuendeva ne u, ne codin ne che cuhnde ro vederihquentiyon yuhn vo nduhcá ro menan cuahn che metah cuhnde iyehñse.

6 'Ihyan che tendahnun ne van ihyan nunde cava che cotahno ye u ne, a cah cuandé ihyan che Dendiohs ndih. Ihyan chahn ne, ihyan yahn ne, ne dín ne che chitahno ye u, nevahñecun ye ndudo ndah yahn ne.

7 Man ne, a devano ye te nducuahñ vederihquentiyon che quenán cumá ne, a ndih te ne u.

8 Chicuahñ ihyan ndudo yahn ne che ndahco ne táh, ne nevahñecun ye. A checadino ndah ye, ne chitahno ye che a man ne dechuh ne u.

9 'Ricá ndih cava ihyan chuñ che tendahnun ne che cotahno ye u, te ihyan yahn ne ihyan. Ndiyu cava ihyan nunde che ricá.

10 Nducoyaca ihyan yáhn ne, yahn ne ihyan. Namin nducoyaca ihyan yahn ne ne, yáhn ihyan, ne a cava ihyan chahn che ndeva ihyan yavenán.

11 'U ne, ndacá muhn iyehñse, ne nchí cava che conán nduco ne. Ate ihyan chuñ ne, cuahtenan ca ye iyehñse. Chidá che va ne vahchetero, numacuahn vederihquentiyon yahn ne, codin ne cudado ihyan che tendahnun ne che cotahno ye u, cava che ama ndudo co no ye nduhcá uvo.

12 Numanahn che quenán muhn iyehñse nduco ihyan chuñ che tendahnun ne che cotahno ye u ne, numacuahn vederihquentiyon yahn ne, dín cudado ihyan. Hua chinda nde ama ye, atenan ama sahn che a ndinda se, cava che conahn nduhcá che a ndirun nan Ndudo yahn ne.

13 'Man ne, nchí nan ne. Ate numanahn che quenán cá muhn iyehñse ne, tihcá ricá ndih cava che co yeno ihyan chuñ, nduhcá che yeno man.

14 Chicuahñ ndudo yahn ne ihyan chuñ, ne ihyan nunde ne, rendihche tan ye ihyan yahn che ametah dama ri ye nduco ye, nduhcá che u ne, hua dama rí nduco ihyan nunde.

15 Ricá ndih cava ihyan chuñ. Ndiyu cava che ndetahno ndeva ne ihyan, ate che ndedevahn ne ihyan tah chundah.

16 Nduhcá che ndiyu ihyan nunde u ne, namin ihyan chuñ ne, ametah dama ri ye nduco ihyan nunde.

17 Numacuahn vederihquentiyon yahn Ndudo yahn ne, Ndudo min che redin che renahn ihyan cha che cuaco ne, cuihco vih ne ihyan chuñ cava man ne.

18 Nduhcá che te ne ntiyon u, dechuh ne u van ihyan nunde ne, tihcá cah ntiyon ihyan chuñ, dechuh ihyan van ihyan nunde.

19 A cava ihyan chuñ che cahco mendahn u cóh, cava che cotahno ye ndudo ndah yahn ne, ne runecade cuahtenan ye.

20 'Ricá ndih, ndiyu deman cava ihyan chuñ, te namin cava ihyan che cotahno ye u adivé, yahn che cahnevan ye ndudo che cuahndudo ihyan chuñ.

21 Chidá, nduhcá u nduco ne ne, ama no vederendedecadino yuhn vo ne, ricá ndih che din ne che ama ndudo no co nducoyaca ye, cochahñtino ye uvo. Nahñ che ama ndudo no co nducoyaca ye, cava che cotahno ihyan iyehñse che ndih dechuh ne u.

22 Vederihquentiyon che te ne u ne, namin cah ihyan chuñ, cava che ama ndudo no co ye, nduhcá che u nduco ndih ne, ama no vederendedecadino yuhn vo.

²³ Ndiḥ ne, rinduco ne u, ne u ne, rinducó ihyan chuḥn, cava che ama ndudo no co ye. Nduco tiḥca ne, tumacadino ihyan nunde che dechuḥ ne u maḥ, yahino ne ihyan chuḥn nduḥca che yahino ne u maḥ.

²⁴ Chidá, ihyan chuḥn che tendahnun ne cava che co nduco ye u ne, náhn che cuahtenan ye nducó naḥ che conán, cava che tumacadino ye yahn vederihquentiyon che numacuahn vedeyahino yahn ne ndaḥco ne taḥ nde ro che metah cuḥnde iyehñse.

²⁵ Chidá che va ne vahchetero, ihyan nunde ne, hua rendihche ye ndih, ate u ne, rendihché ndih. Me ihyan chuḥn ne, a devano ye che ndih dechuḥ ne u.

²⁶ A caḥ cuandé ihyan chuḥn yahn vederihquentiyon yahn ne, ne conduco cá ihyan, quendí caḥ cuandé ihyan, cava che, nduḥca che yahino ne u ne, tiḥca diḥ yahino ne ihyan.

18

Din se preso Dihvo vo Jesucristo

¹ Chihno raḥn Dihvo vo dehtenduh che tuhchan ne, chica ye min nduco ihyan apóstol yahn ye, cuahn ye tama laḍo viche ama ya che duche Cedrón. Ama cuan min ne, va yahn ndata, ne min chenda ye nduco vih.

² Judas, saḥn min che a rihco cade se che ndihcue ndeh se Dihvo vo ne, namin a rendihche se min, te ama ndeh yune chahn Dihvo vo nduco ihyan apóstol yahn ye.

³ Nducote a rendihche se min ne, hua chi vahche yahn se, ne chahn cuaco no se naḥ che quenun Dihvo vo. Nduco se ama yahn sandado maḥ, policía yahn yaḥo maḥ, che dechuḥ chidocuyan ndinan nduco saḥn fariseo. Sandado chahn maḥ, policía maḥ ne, nda se espada maḥ, linterna maḥ. Cuahn che a ndá niño saḥn chahn ne,

⁴ nducote a devano Dihvo vo nducuaḥn che va che cuahno co ye ne, quendaḥ ye vaḥ ihyan apóstol yahn ye ne, tumerune ye saḥn:

—¿Duh rinuḥn nchuḥn ne?

⁵ Ndahconan saḥn chahn, ne raḥn se ri se ihyan:

—Jesús yahn yaḥ Nazaret, rinuḥn nuḥn.

Raḥn ye ri ye saḥn:

—A u che raḥn nduco nchuḥn.

Judas, saḥn min che ndihcue ndeh se Dihvo vo ne, min quenun se vaḥ saḥn chahn.

⁶ Cuahn che raḥn Dihvo vo ri ye saḥn chahn che a ihyan min che rinuḥn se ne, chica dama nducoyaḥa se, ne chera se nde ndiyahn.

⁷ Tuhme ndaconan tumerune Dihvo vo saḥn:

—¿Duh rinuḥn nchuḥn ne?

Raḥn se ri se ihyan:

—Jesús yahn yaḥ Nazaret rinuḥn nuḥn.

⁸ Raḥn ye ri ye saḥn:

—A raḥn rí nchuḥn te a u che raḥn nduco ne. Nducote u che rinuḥn ne ne, cuahñecun ne che naḥn ihyan chuḥn.

⁹ Tiḥca chi cava che conahn nduḥca che raḥn maḥ Dihvo vo tuhca: “Ihyan che tendahnun Dendiohs Chida cava che conduco ye u ne, hua chinda nde ama ye.”

¹⁰ Simón Pedro ne, nda ye ama espada. Ndetendaḥ ye, ne chahn ye ama saḥn decahya yahn chidocuyan che taḥque ndinan che duche se Malco, ne chacondaḥ ye revan se laḍo taḥ cuaco se.

11 Ate raḥn Dihvo vo ri ye Pedro:

—Cuentihyen ndah espada tih chete vaꝑo. Va che chuhrihn nducuahñ che a ndihco caꝑe Dendiohs Chida.

Quenda se Dihvo vo Jesucristo nan chidocuyan che tahque ndinan

12 Sandaꝑo chahn nduco sahn ndinan yahn se mañ, sahn policia yahn yaꝑo mañ ne, chi ihyo se Dihvo vo, din se preso ihyan.

13 Quenda se ihyan ndevaꝑo Anás, inchahn ndico Caifás, chidocuyan che tahque ndinan ye nduyo min.

14 Caifás ne, a ihyan min che raḥn ye ri ye sahn ndinan yahn nación yahn Israel, che tahque ndaḥca che ama no ihyan coh ye caꝑa nducoyaca ihyan nación yahn ye.

Pedro ne, raḥn ye te hua rendihche ye Dihvo vo Jesucristo

15 Simón Pedro nduco tama ihyan apóstol ne, cuahn ye diyahn diyahn cuahn nan cuahn Dihvo vo. Ihyan apóstol che tama me ne, a rendihche chidocuyan ndinan me ihyan, ne chemin che chi chenda ye ura che nda Dihvo vo, quenun ye nan che ri chevah vaꝑo chidocuyan ndinan me.

16 Ate Pedro ne, chandi ye cuahn chevah me. Tuhme quendaḥ ihyan apóstol che tama me, ne yahve ye taḥn che redin cudaꝑo chendevah me, ne quenda ye Pedro cuahn chete me.

17 Taḥn che redin cudaꝑo chendevah me ne, tumerume te Pedro:

—¿A ndiyu nduco di rindoque ihyan caḥ ne?

Ndahconan Pedro ne, raḥn ye ri ye taḥn:

—Hua. Hua rinducó ihyan.

18 Nducote ama iche vino min ne, sahn decahya yahn chidocuyan mañ, sahn policia mañ, ndihco se ama vaꝑoyahn, ne vatendi se recaḥ ihno se sahn. Namin Pedro ne, nduco ye sahn chahn, nti ye chihto vaꝑoyahn me, recaḥ ihno ye ihyan.

Chihnde caꝑe yahn Dihvo vo Jesucristo nan chidocuyan che tahque ndinan

19 Chicarune chidocuyan che tahque ndinan me Dihvo vo, duh nduh ihyan che rinduco ye ihyan mañ, deh che ricuahñ ye mañ.

20 Raḥn Dihvo vo ri ye chidocuyan me:

—U ne, cuahn dama chicuáhn vañ nducoyaca ihyan, chete yaꝑo chahte mañ, yaꝑo cahya mañ, nan che rendo dama nducoyaca ihyan nación yahn Israel. Dehve chicuáhn cuahn mañ cuahn ndeh.

21 Ndotenan che u caꝑarune ne ne, cuicarune ne ihyan che chicuáhn. Ihyan chahn caḥma ye co ye ndih deh che chicuáhn ihyan.

22 Cuahn che tiḥca raḥn Dihvo ne, chahn ama sahn policia yahn yaꝑo vaꝑonan ye, ne raḥn se ri se ihyan:

—¿Dehco che tiḥca ndahconen yahn chidocuyan ndinan?

23 Raḥn Dihvo vo ri ye sahn:

—Ndete che hua tiḥca che raḥn ne, cahme ti quenan che hua ndaḥca raḥn. Ate ndete che ndaḥca raḥn ne, hua ndaḥca din che chehn u.

24 Tuhme ndedechuh Anás Dihvo vo, nchiche ihyo ye, taḥ Caifás, chidocuyan che tahque ndinan.

Ndaconan raḥn Pedro che hua rendihche ye Dihvo vo Jesucristo

25 Numanahn min ne, nti Pedro recaḥ ihno ye ihyan chihto vaꝑoyahn, ne tumerune sahn che chenun min ihyan:

—¿A ndiyu nduco di rindoque ihyan caḥ ne?

Ndahconan Pedro yahn se:

—Hua. Hua rinducó ihyan.

²⁶ Tuhme ama sahn decahya yahn chidocuyan che tahque ndinan, sahn vih sahn che chacondah Pedro revan me ne, rahn se ri se Pedro:

—¿Taca hua?, te u ne, ndihcheró di nduco ye min van yahn ndata me.

²⁷ Ndaconan rahn Pedro che hua rendihche ye Dihvo vo, ne ura min cah tuh.

Quenda se Dihvo vo Jesucristo nan Pilato

²⁸ Tuhme quenda sahn ndinan chahn Dihvo vo, chica se vaco Caifás, ne nda se nduco ye nan palacio yahn gobernador. Ura min ne, a chi dave. Sahn chahn ne, hua chenda se chete palacio me, te rahco se te cahnda yahn se, ne hua co conduco se, ro yudo me.

²⁹ Nducote hua chenda se ne, quenda Pilato, ne tumerune se sahn:

—¿Deh yahn che rica nunde nchuhn yahn ihyan cuh ne?

³⁰ Ndahconan sahn chahn, ne rahn se:

—A che a duhtuno ihyan sahn tih, ne chemin che checu nuhn sahn tah ne.

³¹ Tuhme rahn Pilato ri se sahn chahn:

—Cuiquenda nchuhn ihyan, cotechecade man ne yahn ye nduhca che rihquentiyon ley yahn ne.

Ndahconan sahn chahn, ne rahn se:

—Ate nuhn ihyan naci6n yahn Israel ne, metah vederihquentiyon yahn nuhn cava che cahno nuhn ihyan.

³² Nduco tihca ne, canan chinahn che rahn Dihvo vo nduhca che va che cahno se ihyan.

³³ Ndaconan ndonda Pilato chete palacio, ne cah se Dihvo vo, tumerune se ihyan:

—¿A ndih che Rey yahn ihyan naci6n yahn Israel ne?

³⁴ Rahn Dihvo vo ri ye sahn:

—¿A che rendecadine man che tihca retumerone, o a ihyan rahn ye ri ye di ne?

³⁵ Ndahconan Pilato, ne rahn se:

—U ne, ndiyu ihyan naci6n yahn Israel u. Sahn naci6n yahn ne man, chidocuyan ndinan man, checu se ndih tah. ¿Deh din ne ne?

³⁶ Tuhme rahn Dihvo vo ri ye sahn:

—Ndiyu iyehse cuh che rihquentiy6n. Chemin che ihyan che rinduco ye u ne, hua cuhn ye cava che ndedevahn ye u tah sahn sih.

³⁷ Rahn Pilato ri se ihyan:

—¿A Rey ndih tuhme ne?

Ndahconan ye, ne rahn ye ri ye sahn:

—Rey u, nduhca che rahn. U ne, nda iyehse cuh, chihndeyan, cava che cuahndudó ndudo cuaco. Nducoyaca ihyan che renevahnecun ye ndudo cuaco ne, rihcovan ye che rahndudó.

³⁸ Rahn Pilato ri se ihyan:

—¿Deh ndudo cuaco che tihca rahn ne yahn ne?

Chihco cade se che cahno se Dihvo vo Jesucristo

Chihno rahn Pilato chemin ne, quenda se tama yune, ne rahn se ri se sahn ndinan chahn:

—Ihyan cuh ne, nde ama nunde yahn ye metah.

³⁹ Nchuhn ne, va costumbre yahn ne che ntahté adecoduhno preso che nahn ne vihco ro yudo. ¿A nahn ne che ntahté ihyan cuh che Rey yahn ne ne?

⁴⁰ Tuhme ndaconan cah sahn chahn:

—¡Sahn tih ne, hua! ¡Cuentahte ne Barrabás!
Me Barrabás ne, ama sahn duco.

19

¹ Tuhme chihquentiyon Pilato che chahn sandado Dihvo vo.

² Sandado chahn ne, dendah se ama corona yan, tihyon se tin Dihvo vo, ne tihyon se ama tino morado ihyan, nduhca tino che rahtenun rey.

³ Chihno min ne, ndo dama se nan ye, ne redin ca se che rendeva se yavenan ye. Rah se:

—¡Ndeva vo yavenan Rey yahn ihyan naci6n yahn Israel!
Namin chahn se vaconan ye.

⁴ Quendah tun Pilato, ne rahn se ri se sahn ndinan chahn:

—Condihche nchuhn. Ndetendah ihyan meniyan cava che codevano ne te metah nde ama nunde yahn ye.

⁵ Quendah Dihvo vo, quenun tin ye corona yan me man, quenun ye tino morado me man. Tuhme rahn Pilato ri se sahn chahn:

—¡Nga ye! ¡Condihchero nchuhn ihyan!

⁶ Cuahn che ndihchero chidocuyan ndinan chahn man, sahn policia man, Dihvo vo ne, numacuahn vedetan cah se:

—¡Cuaconahn yah ne sahn! ¡Cuaconahn yah ne sahn!

Rahn Pilato ri se sahn:

—Cuiquenda man nchuhn ihyan, cuaconahn yah ne ihyan, te u ne, a techecade yahn ye, ne a devano te metah nde ama nunde yahn ye.

⁷ Ndahconan sahn chahn, ne rahn se ri se Pilato:

—Sahn tih ne, va che coh se, te tuhca rihquentiyon ley yahn nuhn yahn che rahn se che Daya Dendiohs sahn.

⁸ Cuahn chihnevan Pilato che tuhca rahn sahn chahn ne, nde tahque dihya se chi.

⁹ Ndaconan ndonda se chete palacio yahn se, ne tumerune se Dihvo vo:

—¿Ti yan vaco ne ne?

Ate Dihvo vo ne, nde hua ndahconan ye yahn se.

¹⁰ Tuhme rahn se ri se ihyan:

—¿Dehco che hua rendahconan ne yahn? ¿A hua devano ne te va vederihquentiyon yahn? Co ndahco libre ndih ndete che nahn. Namin co cahcantiy6n che conan yah ne.

¹¹ Ndahconan Dihvo vo, ne rahn ye ri ye sahn:

—Nde ama vederihquentiyon, hua co conan come nan, ndete che Dendiohs hua te ye di. Chemin che sahn che checu se u tah ne, tahque chendihco se nunde che co di.

¹² A nde ura min rinuhn ino Pilato taca co ndahco se libre Dihvo vo, ate sahn ndinan chahn ne, cah se yahn se:

—Ndete che ndahco ne libre sahn tih ne, ¡hua amigo yahn ne emperador ndih!, te adecoduhno ihyan che nahn co ye rey ne, redin vahche ye yahn ye.

¹³ Cuahn che chihnevan Pilato che tuhca rahn sahn chahn ne, chihquentiyon se che ndiquendah Dihvo vo, ne chihnde se nan che retechecade se, nan che duche Gabata che devaco hebreo, che nahan tuhca: “Nan Che Chenun Tu.”

¹⁴ Ura min ne, ri tenduh nan mahh yahn, ne a tama ro me che ro yudo. Tuhme rahn Pilato ri se sahn ndinan chahn:

—¡Nga Rey yahn nchuhn!

¹⁵ Ate sahn chahn ne, rah se:

—¡Cuedecuihno ne sahn! ¡Cuedecuihno ne sahn! ¡Cuaconahn yah ne sahn!

Rahn Pilato ri se sahn chahn:

—¿Taca che cuaconahn yah Rey yahn ne?

Ate sahn chicocuyan ndinan chahn ne, ndahconan se, ne rahn se ri se Pilato:

—Nuhn ne, atenan emperador che rey yahn nuhn.

16 Nduco ndudo che tihca rahn se ne, ndahco Pilato Dihvo vo tah se cava che conan yah ye, ne quenda se ihyan.

Chaconahn yah se Dihvo vo Jesuchristo

17 Quenda se Dihvo vo, ne quenda ye cruz nan che va che conan yah ye, cuahn ye ama cuan nan che duche Cuete Ine Tin Tenahn, ne che devaco hebreo ne, duche Gólgota.

18 Min chaconahn yah se Dihvo vo dama nduco o se, ama se ama ama lado chihto nan ye.

19 Dirun Pilato ama letrero, ne chihquentiyon se che quenan tin cruz. Ndirun tuhca: “Ihyan cuh che Jesús yahn yan Nazaret, Rey yahn ihyan nación yahn Israel.”

20 Ama yahn sahn nación yahn Israel ndihchenan se che tihca ndirun, te nan che chaconahn yah se Dihvo vo ne, nino viyan me. Letrero me ne, ndirun devaco hebreo man, griego man, latin man.

21 Chidocuyan ndinan chahn ne, rahn se ri se Pilato:

—Hua ndahca che dirun ne “Rey yahn ihyan nación yahn Israel.” Tahque ndah ne, codirun ne “Ihyan cuh ne, rahn ye che man ye che Rey yahn ihyan nación yahn Israel.”

22 Ate Pilato ne, rahn se ri se sahn:

—Che dirun ne, a tihca conan, ametah ndahcorun.

23 Cuahn che a chihno chaconahn yah sandado chahn Dihvo vo ne, cahn mahñ se tino yahn ye van cun se. Namin chetañ se cahteca tu yahn ye, ne nducote chemin ne, hua ntahyon te ndiya ne,

24-25 chemin che rahn se nduco vih:

—Tahque ndah ne, hua ndeh vo, ne tendah vo suerte yuhn vo cava che cadino vo cha uvo che quendañ yuhn vo che co yuhn vo.

Tihca din se, ne chinahn nduhca che ndirun nan Ndudo yahn Dendiohs tuhca: “Cahn mahñ se tino yahn nduco vih, ne tendah se suerte cha sahn quendañ yahn se che co yahn se tino tu yahn.”

Chihto cruz nan che quenan yah Dihvo vo ne, nti chaco ye man, coh chaco ye María, ndahta yahn Cleofas man, María yahn yan Magdala man.

26 Cuahn che ndihchero Dihvo vo chaco ye man, ama ihyan apóstol, ihyan min che ama din yahino ye man, che vatendi ye min ne, rahn ye ri ye chaco ye:

—Chacó, nga daya ne, nti se tan.

27 Namin rahn ye ri ye ihyan apóstol me:

—Ngá cheque, nti ye tan.

Nde ro min ndeva ihyan apóstol min chaco Dihvo vo ndevaco ye.

Chih Dihvo vo Jesuchristo

28 Chihno min ne, nducote a devano Dihvo vo che a chinahn nducuahn ne, cava che conan conahn nduhca che a ndirun nan Ndudo yahn Dendiohs ne, rahn ye:

—Yaca rí.

29 Va ama jarro min ndito vino. Tuhme chaconahn sahn chahn ama esponja tin ama nduco che duche hisopo, ne decahnda se esponja me nduco vino me, chaconahn se chende Dihvo vo.

³⁰ Tihve ye vino me, ne rahn ye:
—Man ne, a chinahn nducuahñ.
Tuhme chendih ye, ne chih ye.

Ama sandado ne, terun se lanza ticua Dihvo vo Jesucristo

³¹ A tama ro me che vihco ro yudo, ne chemin che hua nahn chidocuyan ndinan chahn che cuahtendihco tenahn nan cruz ro che rahtetuhno ihyan, te ama yudo ro min. Chemin che chica se Pilato che dechuh se sandado che cahñ se, ndeh se ine dihma ihyan che chenah yah chahn, ne ndedevah se ihyan.

³² Tuhme tahve Pilato sandado, chahn se, ndeh se ine dihma ama sahn che quenan yah chihto nan Dihvo vo. Chihno min ne, ndeh se ine dihma sahn che tama me.

³³ Me cuahn che chahn nda se nan che quenan yah Dihvo vo ne, ndihchero se che a ndih ye. Chemin che ametah ndeh se ine dihma ye.

³⁴ Ate nde nduco nduh ne, cah ama sandado lanza ticua ye nino van chete ye, ne quendañ yun man, nune man.

³⁵ U che dirun caça cuh ne, cuaco ndudo che dirun, te man ndihchero che tihca chi. Dirun yahn caça che namin nchuhn ne, cotahno ne.

³⁶ Tihca chahno chi Dihvo vo caça che conahn nduhca che a ndirun nan Ndudo yahn Dendiohs tuhca: “Hua ndeh se nde ama ine yahn ye.”

³⁷ Namin chinahn nduhca che a ndirun tama cuan nan Ndudo yahn Dendiohs tuhca: “Cuahtendi se, ndihchero se ihyan che cah se lanza.”

Quenun Dihvo vo Jesucristo chete yayan

³⁸ Chihno min ne, ama ihyan yan Arimatea che duche ye José, che chitahno ye Dihvo vo cuahn ndeh yahn che vah ye chidocuyan ndinan chahn ne, chica ye Pilato caça che cah yune se che ndedevah ye Dihvo vo, quenda ye ihyan, cuhche ye ihyan. Cah yune Pilato, ne chahn José quenda ye Dihvo vo.

³⁹ Nicodemo, ihyan min che chahn ye vino chendihchero ye Dihvo vo ne, namin chahn ye nduco José, ne quenda ye ndico ndiche kilo nunedan che ndindah nduco mirra man, aloes man.

⁴⁰ Ndedevah ihyan chahn Dihvo vo, ne chacotahme ye nunedan me tino, chahcotuma ye Dihvo vo nduhca costumbre yahn ihyan naciön yahn Israel che rihche ye tenahn.

⁴¹ Nino nan che nahn yah se Dihvo vo ne, va ama cuan nan che va yahn ndata. Min va ama yayan ra nan che nde ama tenahn metah conun ye.

⁴² Min chaconuhn ihyan chahn Dihvo vo yahn che nino ri, te a cuan ro che rahtetuhno ihyan.

20

Ntuche Dihvo vo Jesucristo van tenahn

¹ Ro che ndeva ndate ne, chahn María yahn yan Magdala vateyan dahca, nan yayan nan che quenun Dihvo vo, ne cuahn che nda ye ne, a ndavi tu chahno che ndechendih chende yayan me.

² Tuhme conahn ye rano ye nan che quenun Simón Pedro nduco tama ihyan apötol, ihyan min che ama din yahino Dihvo vo, ne rahn ye ri ye ihyan chahn:

—Ndetendañ ihyan Dihvo vo chete yayan, ne hua devano nuhn ti quenda ye ihyan.

³ Ndetahno cuahn Pedro nduco ihyan apötol che tama me nan yayan.

⁴ Ama rano nduh che o ye cuahn ye, ate ihyan che t̄ama me ne, tahque dito chaño ye che co Pedro, ne tahque men̄an ca nd̄a ye nan yayan me.

⁵ Ndi hchenun ye chete yayan me, ne ndihchero ye tino che chahcotuma ihyan Dihvo vo che chet̄ave min, ate hua chend̄a ye.

⁶ Numanahn min ne, nd̄a Simón Pedro, ne chend̄a ye chete yayan me. Namin ndihchero ye tino chahn che chet̄ave min.

⁷ Av̄ane ne, tino che chahcotuma tin Dihvo vo ne, ndechetive, quendite ama lado.

⁸ Tuhme chend̄a ihyan apóstol che t̄ama me chete yayan, ne ndihchero ye nduhc̄a che chi, ne chitahno ye.

⁹ Ro min ne, metah conahn ihyan chahn che a ndirun nan Ndudo yahn Dendiohs nduhc̄a che va che ntuche Dihvo vo van tenahn.

¹⁰ Chihno min ne, ndaconan ihyan apóstol chahn nan che chenun ye.

Dihvo vo Jesucristo ne, chihnde ro ye nan María yahn yan Magdala

¹¹ Numanahn min ne, ndaconan María, ne chihnde ye chihto yayan me, raco ye. Ura che raco ye ne, ndihchenun ye chete yayan me,

¹² ne ndihchero ye o ángel chenun ye tino cua, vate ye nan che chacondihte ihyan Dihvo vo. Ama ye cuahn nan che chi nihno tin Dihvo vo, ne t̄ama ye ne, cuahn ndiya cah ye.

¹³ Tumerune ángel chahn ihyan:

—¿Deh cuande che reque ne?

Ndahconan María, ne rahn ye ri ye ángel chahn:

—Racó yahn che quenda ihyan Dihvé, ne hua devanó ti chengu ye ihyan.

¹⁴ Cade chihno rahn ye chemin cuahn che ndaconan ye, ne ndihchero ye Dihvo vo che nti ye min, ate hua devano ye che ihyan min.

¹⁵ Tuhme tumerune Dihvo vo ihyan, ne rahn ye:

—¿Deh cuande che reque ne? ¿Duh rinohn ne?

María ne, rahco ye te co sahn che redin cud̄ado yahn nd̄ata me, ne rahn ye:

—Ndete che ndih quenda ne Dihvé ne, cahma ne co ne u ti chengu ne ihyan, c̄ava che c̄ahn quenguá ihyan.

¹⁶ Tuhme rahn Dihvo vo ri ye ihyan:

—¡María!

Ndaconan María, ne rahn ye devaco yahn ye, hebreo, ri ye Dihvo vo:

—¡Raboni! —che nahn cahma Ihyan Ricuahn.

¹⁷ Rahn Dihvo vo ri ye ihyan:

—Hua nahn tah u, te metah nahn nan va Chidá. Tahque ndah ne, cuehn ngo ihyan apóstol yahn che nah̄n nan va Chidá, ihyan min che Chida nchuhn man, Dendiohs yahn man, Dendiohs yahn ne man.

¹⁸ Tuhme chahn María chego ye ihyan apóstol chahn che ndihchero ye Dihvo vo man, nduhc̄a che rahn ye ri ye ihyan man.

Chihnde ro Dihvo vo Jesucristo nan ihyan apóstol yahn ye

¹⁹ A ro min no cuahn che a chi man ne, ndi dama ihyan apóstol chahn, ne nenec̄ahde ye vah nan che chenun ye yahn che vah ye sahn ndinan yahn ihyan nación yahn Israel. Ura min ne, aden̄an chend̄a Dihvo vo vah, chandi ye mendahn, ne rahn ye:

—Dendiohs din yahino ye nchuhn. Hua dehve rahco ne.

²⁰ Chihno rahn Dihvo vo chemin ne, nahme ye tah ye nan che nchuh cl̄avo man, ticua ye man, ihyan chahn, ne ama chi yeno ye ndihchero ye ihyan.

²¹ Ndaconan rahn Dihvo vo ri ye ihyan chahn:

—Dendiohs din yahino ye nchuhn. Hua dehve rahco ne.

Namin rahn ye ri ye ihyan chahn:

—Nduhca che dechuh Chidá u ne, namin dechúh nchuhn.

²² Tuhme tivenan ye ihyan chahn, ne rahn ye ri ye ihyan:

—Conun Vaco Ndah yahn Dendiohs nchuhn.

²³ Ndete che nchahco ne nunde yahn adecoduhno ihyan ne, a ndaca ye vederenchahco. Me ndete che hua ne, a hua ndaca ye.

Tomás ne, chitahno ye che ntuche Dihvo vo Jesucristo cuahn che ndihchero man ye ihyan

²⁴ Ama ihyan apóstol chahn che duche ye Tomás, ihyan min che ntahco ihyan che duche ye “Cuahche” ne, metah ye ro che nda Dihvo vo.

²⁵ Cuahn che nta ye ne, rahn ihyan chenahn chahn ri ye ihyan:

—A ntuche Dihvo vo. A ndihchero nuhn ihyan.

Ate rahn Tomás ri ye ihyan chahn:

—Ateñan che terún ndutitah yahvetah ye nan che nchuh clavo man, ticua ye nan che nchuh lanza man, tuhme cotahnó che a ntuche ye.

²⁶ Chihno nine ro ne, nto dama tun ihyan apóstol chahn chete ama vah, ne ro min ne, nduco Tomás quenun ye min. Andahre ntude chendevah ne, chenda Dihvo vo chandi ye mendahn, ne rahn ye:

—Dendiohs din yahino ye nchuhn. Hua dehve rahco ne.

²⁷ Tuhme rahn ye ri ye Tomás:

—Condihchero yahvetah, ne cueteron ndutitah. Namin cueteron ndutitah ticua. Cuitehne, che a ntuché. Hua o ndedecadine.

²⁸ Tuhme rahn Tomás ri ye Dihvo vo:

—¡Ndi che Dihvé man, Dendiohs yahn man!

²⁹ Rahn Dihvo vo ri ye ihyan:

—Tomás, man ne, ritehne yahn che ndihchero u. Ndah ro yahn ihyan che andahre hua rendihchero ye u, ate ritahno ye u.

Chirun caca cuh cava che cotahno ihyan Dihvo vo Jesucristo

³⁰ Dihvo vo Jesucristo ne, ama ndeh nan ca vederihno din ye nan ihyan apóstol yahn ye che hua ndirun nan caca cuh.

³¹ Me nducuahn che ndirun ne, cava che cotahno nchuhn che Dihvo vo Jesucristo ne, a ihyan min che a va cade che chi ye ndedevahn ye ihyan iyehne man, a ihyan min che Daya Dendiohs man, ne nduco che cotahno ne ihyan ne, ndevahn ne, cuahtenan ne vahchetero numacuahn ro.

21

Dihvo vo Jesucristo ne, nda ye nan chenun ndache ihyan apóstol yahn ye

¹ Chihno min ne, nda Dihvo vo nan che chenun ihyan apóstol yahn ye, chihto vine yahn Galilea nino yan Tiberias. Tuhca chi:

² Nto dama ihyan apóstol chahn, Simón Pedro man, Tomás, ihyan min che ntahco ihyan che duche ye “Cuahche” man, Natanael yahn yan Caná, estado yahn Galilea man, nduh che o sahn daya Zebedeo man, nduco te o ihyan apóstol man.

³ Rahn Simón Pedro ri ye ihyan chahn:

—Cahn cotah yahca.

Rahn ihyan chahn ri ye ihyan:

—Namin nuhn ne, cahn nuhn nduco ne.

Tuhme cuahn ye, ne chahtenun ye ama barco che va nan vine me, ate numa yan min ne, nde ama yahca hua chetah ye.

4 Cuahn che a cochi ri dave ne, nda Dihvo vo chihto vine me, ate ihyan apóstol chahn ne, hua nchanan ye che ihyan min.

5 Tuhme rahn ye ri ye ihyan chahn:

—Nchuhn sahn cahya, ¿a hua ndaca ne nde ama yahca ne?

Ndahconan ihyan chahn, ne rahn ye ri ye ihyan:

—Nde ama te hua ndaca nuhn.

6 Rahn ye ri ye ihyan chahn:

—Cotihyon nchuhn yana yahn ne lado tah cuaco barco, ne ndaca ne ite.

Tihca din ihyan chahn, ne cuahn che ndetendah ye yana me ne, nde hua richa ye che ama ndito yahca.

7 Tuhme ama ihyan apóstol, ihyan min che ama din yahino Dihvo vo ihyan ne, rahn ye ri ye Pedro:

—¡A Dihvo vo che nda ye tan!

Ndetahno che chihnevan Simón Pedro yahn Dihvo vo ne, ndonun ye tino menan yahn ye, ne ca nun ye van nune che chahn ye nan che va ye.

8 Nan chenun ihyan apóstol chenhahn chahn nduco chihto vine ne, ri tenduh ama ciento metro. Chicahca ye barco me nde min, chihnda ye yana me, ndito yahca.

9 Cuahn che ndiquendah ye chete barco me ne, ndihchero ye che va ama vacoyahn, ama chenun nducoyahn, ne quendudo ama yahca nan nducoyahn me, riyuche te. Namin va pan.

10 Rahn Dihvo vo ri ye ihyan chahn:

—Te nchuhn neve yahca che cade chetah ne.

11 Chenda Simón Pedro chete barco me, ne chihnda ye yana me, ndetendah ye van nune. Chenun deman yahca rahte, ri ama ciento quenan o raco ndiche ino te. Andahre ama yahn te, ate hua chendan yana me.

12 Tuhme rahn Dihvo vo ri ye ihyan chahn:

—Cochi nchuhn, cahdino ne.

Ihyan apóstol chahn ne, a devano ye che Dihvo vo, ne chemin che nde hua chihquino ye tumerune ye ihyan duh ihyan ye.

13 Chahn nda Dihvo vo, ne chetah ye pan me man, yahca me man, ne cah ye, cheh ihyan chahn.

14 A ro min chi ino yune che chendihchero Dihvo vo ihyan apóstol yahn ye cuahn che a ntuche ye van tenahn.

Dihvo vo Jesucristo ne, yahve ye Simón Pedro

15 Cuahn che a chihno cahdino ihyan chahn ne, tumerune Dihvo vo Pedro:

—Simón, daya Jonás, ¿a tahque yahine u che co ihyan chuhn ne?

Ndahconan Simón Pedro yahn ye:

—Taca hua, Dihvé. Yahinó ndih. A man ne devano ne.

Rahn Dihvo vo ri ye ihyan:

—Tuhme ne, codin cudado ihyan yahn.

16 Ndaconan tumerune ye ihyan, chi o yune:

—Simón, daya Jonás, ¿a yahine u ne?

Ndahconan Pedro yahn ye:

—Taca hua, Dihvé. Yahinó ndih. A man ne devano ne.

Rahn Dihvo vo ri ye ihyan:

—Tuhme ne, codin cudado ihyan yahn.

17 Ndaconan tumerune ye ihyan, chi ino yune:

—Simón, daya Jonás, ¿a yahine u ne?

Nducote a nde ino yune che tumerune ye Pedro ndete che a yahino ye ihyan ne, chi ndache ye, ne rahn ye:

—Dihvé, a man ne devano ne nducuahn. A devano ne che yahinó ndih.

Rahn Dihvo vo ri ye ihyan:

—Tuhme ne, codin cudado ihyan yáhn.

¹⁸ Cuaco ráhn rí di te cuahn che decahya di ne, rendonon man tino yehn, ne rehn ti che nahn cahn. Ate cuahn che a co ndico di ne, ntah reche, ne tama ca ihyan ntihton ye tino yehn di, ne quenda ye di nan che hua nahn cahn.

¹⁹ Che tihca rahn Dihvo vo ri ye Pedro ne, conahn nduhca che va che cahco mendahn ye ihyan nan ntiyon yahn Dendiohs, cahno se ihyan. Tuhme rahn Dihvo vo ri ye Pedro:

—¡Cuíndoque u!

²⁰ Ura che cuahn ye ne, ndaconan Pedro, ne ndihchero ye che cuahn nduco ihyan apóstol min che ama din yahino Dihvo vo, ihyan min che dama chihnde ye nduco Dihvo vo cuahn che cheh vino ye me, ne tumerune ye duh che ndihcue ndeh ihyan.

²¹ Tuhme tumerune Pedro Dihvo vo:

—Dihvé, me ihyan tih ne, ¿deh co yahn ye ne?

²² Ndahconan Dihvo vo, ne rahn ye ri ye ihyan:

—Ndete che u náhn che conan ye iyehñse nde ro che ndaconan chí ne, di ne, hua cuande yehn chemin. Cuíndoque u.

²³ Chemin che chihnde ndudo van dihno vo che ihyan apóstol min ne, hua nda ro che coh ye. Ate Dihvo vo ne, ndiyu che rahn ye che hua coh ihyan min, te rahn ye te ndete che nahn ye che conan ihyan min nde ro che chí tun ye ne, hua cuande yahn Pedro chemin.

²⁴ A ihyan apóstol min che dirun ye caça cuh, ne a devano vo che nducuahn che dirun ye ne, cuaco.

²⁵ Ama ndeh nan ca dehtenduh che din Dihvo vo Jesucristo. Ndete che corun queri ama nan dehtenduh che din ye ne, rahcó te cuto libro numachahte iyehñse, nde hua tuno nan che conun. Tihca chí.

NTIYON CHE DIN IHYAN APOSTOL

Nda Vaco Ndah yahn Dendiohs nduhca che a necah ye ndudo yahn ye

¹ Ndiñ Teófilo che yahinó ndih, ñan çaça che dendáh menañ ne, a dirún ama ndeh ñan dehtenduh che din Dihvo vo Jesucristo man, che chicuahn ye man,

² nde nda ro che conahn ye vahchetero. Cuahn che ametah ñahn ye vahchetero ne, numacuahn vederihquentiyon yahn Vaco Ndah yahn Dendiohs, cah ye ntiyon che va che din ihyan apóstol yahn ye che a tendah nun ye.

³ Adiva che chihno se Dihvo vo ne, ntuche ye, ne man ye nda ye ndeh yune, chinduco ye ihyan chahn chete che o raco ro. Nduco chemin ne, chenahn ihyan chahn te cuaco che quenduche ye, ne cah cuande ye ihyan chahn yahn vederihquentiyon yahn Dendiohs.

⁴ Cuahn che nduco ca ye ihyan apóstol chahn ne, rahn ye ri ye ihyan:

—Hua ndaca nchuhn yan Jerusalén. Conan rino ne nde nda ro che conahn che ndihco cade Dendiohs Chida che co Vaco Ndah yahn ye. A yahn chemin che renté nduco ne nde ro menañ.

⁵ Cuaco te Juan ne, chehdenune ye ihyan, ate nchuhn ne, cuihno neve ro ne, conun Vaco Ndah yahn Dendiohs nchuhn.

Conahn Dihvo vo Jesucristo vahchetero

⁶ Tahn min cuahn che ndidama ihyan chahn ne, tumerune ye Dihvo vo:

—Dihve nuhn, ¿a man ro cuh che ndahco cade ne che cahcantiyon man nación yahn Israel ne?

⁷ Ndahconan ye, ne rahn ye ri ye ihyan chahn:

—Hua cuande yahn nchuhn che cadino ne deh ro, o deh ura che conahn che man Dendiohs Chida a ndihco cade ye.

⁸ Ate chu che cuande yahn ne. Cuahn che co Vaco Ndah yahn Dendiohs, conun nchuhn ne, conan cuma ne vederihquentiyon. Tuhme cuacotuhn ne ndudo yahn yan Jerusalén man, numacuahn estaño yahn Judea man, nación yahn Samaria man, nde numachahte iyehne.

⁹ Chihno rahn Dihvo vo chemin ne, nahn min che rendihchero ihyan chahn ne, conda ye vahchetero. Tuhme quendihco ama man, ne chehñan ihyan chahn ihyan.

¹⁰ Numanahn che vatendi ca ye, rihno ye che conda Dihvo vo ñan ro ne, adenan nda o ángel, chenun ye tino cua.

¹¹ Rahn ye ri ye ihyan chahn:

—Nchuhn, sahn Galilea, ¿dehco che rihno cuahn ñan ro ne? Man Dihvo vo che ndaca ye van nchuhn, din Dendiohs che conahn ye vahchetero ne, nduhca che ndihchero ne che conahn ye, tihca ndaconan chi tun ye.

Tendahnun ye Matías cava che co ye apóstol, conan ye menun Judas

¹² Chihno min ne, ndaca ihyan chahn min ñan che duche Cuete Olivo, ne conahn ye yan Jerusalén. Nino yune min, nuhneva che nihnde cade ñan ley yahn Dendiohs che co çaça ihyan ro che rahte tuhno ye.

¹³ Cuahn che nta ihyan chahn viyan me ne, chenda ye ama vah, cocha ye ñan o cuahto, cuarto ñan che rahtenun ye. Van ihyan chahn ne, nduco Pedro man, Jacobo man, Juan man, Andrés man, Felipe man, Tomás man, Bartolomé man, Mateo man, Jacobo, che daya Alfeo man, Simón Zelote man, Judas, che dihno Jacobo man.

14 Ro ro ne, rendo dama nducoyaca ihyan chahn nduco dihno Dihvo vo man, chaco ye, María man, yahn ca ihyan ndahta man, revah ye.

15 Ama ro min ne, chandi Pedro nan ihyan che ritahno ye Dihvo vo, che ri ye tenduh ama ciento quenan ndico, ne cahndudo ye:

16 —Nchuhn dihnó, a va che conahn ndudo che din Vaco Ndah yahn Dendiohs che dirun David yahn Judas, che quendañnan se yahn sahn che din se preso Dihvo vo.

17 Sahn min ne, chi cuande se van nuhn, din se ntiyon nduco nuhn.

18 Tume che ndaca se yahn nunde yahn se ne, ca ama ndi yahn. Chihno min ne, chendañ se, denderen se, ne chendan se, chihno chetuhn rehte se ndiyahn.

19 Cuahn che checadino ihyan yan Jerusalén yahn chemin ne, chaconahn ye che duche yahn min, Acéldama, devaco yahn ye, che nahn cahma Yahn Yuh Yun.

20 A ndirun nan libro yahn Salmo tuhca:

Cuhnde man vaco se.

Nde ama ihyan hua conun ye min.

Namin a ndirun:

Conan tama ihyan menun se, ndonda tah ye ntiyon che quenan cuma se.

21 Chemin che ama cha ihyan che namin chinduco ye Dihvo vo numacuahn ro che quechica ye,

22 nde ro che chehdenune Juan ihyan, nde nda ro che din Dendiohs che conahn ye vahchetero ne, va che co cuande ye van nuhn, cava che cuacotuhn ye ndudo yahn che a ntuche Dihvo vo.

23 Ntiyon yan ihyan chahn o ihyan. Ama ye ne, José Barsabás, che namin duche ye Justo, ne tama ye ne, Matías.

24 Tuhme covah nducoyaca ye:

—Dihve nuhn, a ndih che rendihche ne chedave yahn nducoyaca ihyan. Conahma ne nuhn cha ihyan che o chuhn, nahn ne

25 che co ye apóstol, conan ye menun Judas, din ye ntiyon che denda se, din nunde yahn se, te a cuahn se nan che redin yahn che conun se.

26 Tuhme din ihyan chahn sortear, ne quendañ yahn Matías che co ye apóstol, co cuande ye van ihyan che ndichiamá chahn.

2

Chiya Vaco Ndah yahn Dendiohs

1 Cuahn che nda vihco Pentecostés ne, nto dama ihyan apóstol nduco nducoyaca ihyan chahn che ritahno ye Dihvo vo Jesucristo.

2 Adenañ chahco chine nan ro nduhca yuhne tan che ama rano, ne chito chete vah nan che chenun ye.

3 Ndihchero ye che deca ro ruchiyahn ro chetuhn, ne chiya tin queri ama ye.

4 Tuhme quenun Vaco Ndah yahn Dendiohs nducoyaca ihyan chahn, din che rahn ye tama te o nan devaco.

5 Ama yahn ihyan ndata yahn Israel che redinahn ye che nihnde cade nan ley yahn Dendiohs ne, chica ye numachahte iyehñse, ne chenun ye yan Jerusalén ro min.

6 Cuahn che chihnevan ye che chine ne, ndo dama ye, ne ama rahn ino ye, te queri ama ye ne, chihnevan ye devaco yahn man ye che rente ihyan che chenun ye chete vah.

7 Ama rahn ino ihyan chahn, ne rahn ye van man ye nduco vih:

—¿A ndiyu ihyan Galilea nducoyaca ihyan sih che tihca rente ye?

⁸ ¿Taca che rente ye devaco yahn queri ama vo che rente vo yan vaco vo?

⁹ Van nducoyaco vo ne, nduco ihyan yahn yahn Partia man, Media man, Elam man, Mesopotamia man, Judea man, Capadocia man, Ponto man, Asia man,

¹⁰ Frigia man, Panfilia man, Egipto man, Africa che nde tahque yahn ca va che co yan Cirene man. Namin nduco ihyan yan Roma man. Nahñ vo ne, ihyan naci6n yahn Israel, ne nahñ vo ne, ihyan tama naci6n che ritahno vo dama nduco ye.

¹¹ Namin nduco ihyan yahn yahn Creta man, Arabia man. Rahndudo ihyan sih ndudo yahn vederihno che redin Dendiohs, rihnevan queri ama vo devaco yahn man vo.

¹² Ama rahn ino nducoyaca ye, ne tumerune vih ye:

—¿Deh conahn che tihca ri ne?

¹³ Ate nahñ ihyan chahn ne, duche rino ye, ne rahn ye:

—Coh ihyan sih, ne chemin che tihca redin ye.

Cahndudo Pedro

¹⁴ Tuhme necuandi Pedro nduco ihyan ap6stol che ndichiamā chahn, ne cahndudo ye:

—Nchuhn, ihyan naci6n yahn Israel nduco nducoyaca ne che vate ne yan Jerusal6n, cua cuande ne man, cuihcovan ndah ne che cahmā man.

¹⁵ Hua dehve coh nuhn nduhca che rahn nchuhn, te meniyon ne, comān rahco nun vatiyan.

¹⁶ Che rendihchero nchuhn ne, a yahn chemin che dirun ihyan profeta Joel tuhca:

¹⁷ Rahn Dendiohs: “Cuahn che a nahn tuno ro che conahn che a ndihco cad6 ne,

dechuh Vac6, cava che conun ihyan iyehñse.

Daya nchuhn ne, cuahndudo ye ndudo yahn man,

ihyan decahya ne, ndihchero ye vederihno van yahnde yahn ye man,

ihyan ndico ne, cahno ye man.

¹⁸ Ro min ne, dechuh Vac6 cava che conun ihyan che redin ye ntiyon yahn, ne cuahndudo ye ndudo yahn.

¹⁹ Nan ro man, ndiyahn man, dín vederihno, ne cuhnde ro yun man, yahn man, yahme man.

²⁰ U che Dihve nducoyaca ihyan ne, cuahn che ametah nda ro che techecad6 ne,

nan yahn ne, co man,

ne iyo ne, ndo nduhca yun.

Ro min ne, ro che ama yudo, ro che cahco r6 che ama chahte vederihquentiyan yahn.

²¹ Tuhme nducoyaca ihyan che cuah ye u che Dihve ye ne, ndedevahn ihyan.”

²² Nchuhn, ihyan naci6n yahn Israel, cuihcovan ndah ne che cahmā: Dendiohs ne, dechuh ye Jes6s yahn yan Nazaret van nchuhn, ne man nchuhn devano cuaco ne, te numacuahn vederihquentiyan yahn Dendiohs, dín ye vederihno, ndihchero ne.

²³ Cuahn che nda ye tah nchuhn ne, nduhca che a ndihco cade Dendiohs nde ro menan ne, dín nchuhn preso ihyan, necah ne ihyan tah sahn nunde. Nahñ yah se ihyan, ne chihno se ihyan nduhca che nahñ ne.

²⁴ Ate ndedetuhche Dendiohs ihyan, chehñevi ye ihyan tah vederih, te hua co che ndahco ndiya vederih ihyan.

²⁵ Hua co che conan ye t̄ah vederih cuahn d̄ama, te a yahn ye che dirun David tuhçā:

Dihvé, cuahn d̄ama rendihché ndih che nduco ne u.

Quenan ne l̄ado t̄ah cuaçó, çava che hua dihya nun inó co.

²⁶ Chemin che chi yenó, ne ndevá yavenan ne numacuahn vedeyeno.

Recāh vedechahtino chedave yāhn,

²⁷ te u che yahino ne ne, hua çahcoman ne u van tenahn,

nde hua cuahnecon ne che conún chete yayan cuahn d̄ama, çā u.

²⁸ Tihyon yune ne u nduhçā che ndahçā conán nan ne.

Āma yenó yahn che nduco ne u.

²⁹ 'Nchuhn dihnó, cuāco te chih indihthe yuhn vo David man, che chehche ye man, che va yayan yahn ye nde meniyon man.

³⁰ Ihyan min ne, profeta ye, ne numacuahn vedeyudo ne, çah Dendiohs ndudo yahn ye che van ndata yahn ye ne, quendāh ihyan min che a va çade che chi ye, ndedevahn ye ihyan iyehñse, nuhnde t̄ah ye vederihquentiyon yahn ye.

³¹ David ne, anduhneca ndete che ndihchero ye che ntuche ihyan min che a va çade che chi ye, ndedevahn ye ihyan iyehñse, ne chemin che dirun ye che hua conun ihyan min van tenahn man, che hua çā ye man.

³² Man ne, Dendiohs ne, a ndedetuhche ye Dihvo vo Jesucristo, ne nuhn ne, devano cuāco nuhn yahn.

³³ Nducote ndedetuhche Dendiohs Chida ihyan min numacuahn vederihquentiyon yahn ye man, nducote dinahn ye ndudo che necah ye che dechuh ye Vaco Ndah yahn ye man ne, chemin che redin ihyan min vederihno che rendihchero nchuhn man, rihnevan ne man.

³⁴ A yahn ihyan min che ndā ye vahchetero che dirun David tuhçā, ndiyu yahn man ye:

Dihve Dendiohs ne, rahn ye ri ye Dihvé:

“Cuihnde muhn l̄ado t̄ah cuaçó,

³⁵ numanahn che ndahco ndiyá ihyan che hua ri rendihche ye di, ndeva ye yavenan.”

³⁶ 'Nducote tihçā ne, codevano cuāco nducoyāca ihyan nación yahn Israel te a Jesús, ihyan min che nahn yah nchuhn ne, ndahco Dendiohs vederihquentiyon t̄ah ye che ndedevahn ye ihyan iyehñse man, che co ye Dihve nducoyāca ihyan man.

³⁷ Cuahn che chihnevan ihyan chahn che tihçā cahndudo Pedro ne, ama chi ran ye, ne tumerune ye Pedro nduco ihyan apóstol chenahn chahn:

—Dihno nuhn, ¿deh va che din nuhn man ne?

³⁸ Ndahconan Pedro, ne rahn ye ri ye ihyan:

—Querí ama nchuhn, cuento ino ne nunde yahn ne, ne cuah ne Dihvo vo Jesucristo, cuedenune ne, çava che nchahco Dendiohs nunde yahn ne, ne din ye che conun Vaco Ndah yahn ye nchuhn.

³⁹ Tihçā, te a necah Dihvo vo Dendiohs ndudo min çava nducoyāca ihyan che tendāhnun ye, nchuhn man, dāya ne man, ndata yahn ne man.

⁴⁰ Cuahn che chihno cahndudo Pedro ndudo cuh nduco ndeh nan ca ndudo che tuhchan ne, yahve ye ihyan chahn, ne rahn ye:

—Cuenedevahn ne nchuhn van ihyan nunde che vate ye man ro cuh.

⁴¹ Tuhme ihyan che nevahnecon ye ndudo yahn ye ne, chedenune ye, ne ro min ne, tenduh ino mil ihyan chitahno ye Dihvo vo, chinduco ye ihyan chahn.

⁴² Nducoyaca ye ne, riquendi ye che ricuahn ihyan apóstol chahn, ne rendo dama ye nduco vih man, revah ye man, rendeh ye pan nduhca che chihquentiyon Dihvo vo man.

Nduhca che redin ihyan che ritahno ye Dihvo vo Jesucristo

⁴³ Ama rahn ino nducoyaca ihyan yan, te ama redin ihyan apóstol chahn vederihno.

⁴⁴ Nducoyaca ihyan che ritahno ye Dihvo vo ne, ama no vederendecadino yahn ye nduco vih, ne rihco mendahn ye dehtenduh yahn ye cava nducoyaca ye.

⁴⁵ Cuahn che va vederetahn yahn combiero yahn ye ne, rendihcue ye yahn yahn ye man, dehtenduh yahn ye man, ne recah ye tume me queri ama ihyan chahn tunoca va vederetahn yahn ye.

⁴⁶ Ro ro rendo dama ye yaco chahte, ne ndevaco ye ne, reh ye nduco vih, ne rendeh ye pan nduhca che chihquentiyon Dihvo vo. Chenan cuma ye vedeyeno man, vedenecon man.

⁴⁷ Rende va yavenan Dendiohs numacuahn vedeyeno, ne ndahca chenan ye nan nducoyaca ihyan. Ro ro ne, rendedevahn Dihvo vo Dendiohs ihyan, rinduco ye ihyan chahn.

3

Ndoyahn ama sahn che neneva doh cah se

¹ Ama ro nan rahco ino a chino, ura che revah ihyan ne, cuahn Pedro nduco Juan yaco chahte.

² Ama chende yaco me ne, duche Hermosa, ne ama sahn che neneva doh cah se nde ro che chihndeyan se ne, va se min. Ro ro riquenda ihyan sahn, ne min rihco ye sahn cava che caca se ihyan che renda ye yaco che din ye vedevahino nduco se.

³ Cuahn che ndihchero se Pedro nduco Juan che nda ye chende yaco me ne, chica se che din ye vedevahino nduco se.

⁴ Ndhichero ihyan chahn sahn, ne rahn Pedro ri ye sahn:

—Condihchero nuhn.

⁵ Sahn min ne, va yan se, rendihchero se ihyan, te rahco se te cah ye tume sahn.

⁶ Ate rahn Pedro ri ye sahn:

—Metah diyahnguan yahn, nde hua ne diyahngua, ate co conan di. Nduco vederihquentiyon yahn Jesucristo yahn yan Nazaret, cuenecuen, ne cuique.

⁷ Chetah Pedro tah cuaco se, ndedecuan ye sahn, ne ndetahno nuhnde cava dandocah se, ne ndo cuaco cah se.

⁸ Tuhme nde tuno ca yaco se, canan rica se. Chenda se chete yaco nduco ihyan chahn, ra yaco se che yeno se man, rendeva se yavenan Dendiohs numacuahn vedeyeno man.

⁹ Nducoyaca ihyan che chenun ye min ne, ndihche ye che rica se man, chihnevan ye che rendeva se yavenan Dendiohs man,

¹⁰ ne ama rahn ino ye man, redihya ye ri man, yahn vederihno me, te a rendihche ye te a sahn min che rihnde se chende yaco Hermosa, rica se che din ihyan vedevahino nduco se.

Cahndudo Pedro man corredor che duche Salomón

¹¹ Sahn che a ndoyahn me ne, nda ca se tah Pedro man, Juan man, chenun ye man corredor che duche Salomón. Nducoete ama rahn ino ihyan che chenun ye chete yaco ne, aderano ye, ndo dama ye min.

¹² Cuahn che ndihchero Pedro che ama chito ihyan min ne, cahndudo ye:

—Nchuhn, ihyan nación yahn Israel, ¿dehco che ama rahn ino ne? ¿Dehco che ama rendihchero ne nuhn? ¿A rahco ne che nduco vederihquentiyon yahn man nuhn, o che ama ndah ihyan sahn, din nuhn che ndoyahn sahnguh?

¹³ Hua, te Dendiohs yahn indihthe yuhn vo Abraham man, Isaac man, Jacob man ne, a ihyan min che din ye vederihno cuh, cava che ndeva ye yavenan daya ye Jesucristo che necah nchuhn tah Pilato. Pilato ne, nahn ntahte ye ihyan, ate nchuhn ne, hua cahnecon ne.

¹⁴ Ndotenan che cava nchuhn che ntahte ye ihyan min che ndah ye nan Dendiohs ne, chica ne che ntahte ye ama sahn rihno ihyan.

¹⁵ Tihca chihno nchuhn ihyan min che quenana cuma ye vederihquentiyon che din ye che cuahtenan ihyan vahchetero numacuahn ro. Ate Dendiohs ne, ndedetuhche ye ihyan van tenahn, ne yahn chemin ne, nuhn devano cuaco nuhn.

¹⁶ Nduco vederihquentiyon yahn Dihvo vo Jesucristo ne, ndoyahn sahnguh che a ntihche nchuhn sahn, te chitahno se ihyan. Chitahno se ihyan, ne chemin che ndoyahn se nduhca che rendihchero ne.

¹⁷ Nchuhn dihno, u devano te van vedetundo yahn ne nduco ihyan ndinan yahn ne, chihno ne Dihvo vo.

¹⁸ Ate nde ro menan me ne, a ndihco cade Dendiohs che va che chuhrihn ihyan min yahn ye che a va cade che chi ye, ndedevahn ye ihyan iyehense. Yahn chemin ne, a dirun ihyan profeta, ne tihca chinahn.

¹⁹ Man ne, cuento ino nchuhn nunde yahn ne man, cuah ne Dendiohs man, cava che nchahco ye yahn ne man, din ye che cuahte dihn chedave yahn ne man, necah van ye chedave yahn ne man.

²⁰ Va che dechuh tun ye Dihvo vo Jesucristo, ihyan min che a va cade che chi ye, ndedevahn ye nchuhn.

²¹ Ate man ro cuh ne, va che conan ca ye vahchetero nde nda ro che cuihno ndahco cade Dendiohs nducuahn, nduhca che cah ye ndudo yahn ye, dirun ihyan profeta ndah yahn ye a rahn me.

²² A chinahn nduhca che rahn Moisés ri ye indihthe yuhn vo tuhca: “Dihvo vo Dendiohs ne, tendah nun ye ama ihyan profeta van ndata yahn nchuhn nduhca che tendah nun ye u. Codinahn ne nducuahn che cahma ihyan min,

²³ te nducoyaca ihyan che hua dinahn ye che cahma ye ne, conda ye van ihyan nación yuhn vo.”

²⁴ Nducoyaca ihyan profeta, nde Samuel, nde nducoyaca ye che chahte ye adiva ne, namin dirun ye yahn ro cuh.

²⁵ A cava nchuhn che dirun ihyan chahn, ne che ndah yahn ne che nte cade Dendiohs nduco ihyan ndico yuhn vo nduhca che cah ye ndudo yahn ye Abraham tuhca: “Cava ihyan, ndata yehn, din che ndah nduco nducoyaca ihyan iyehense.”

²⁶ Cuahn che a ndedetuhche Dendiohs Daya ye ne, menan vih ca dechuh ye ihyan van nchuhn, cava che din ye che ndah nduco ne, ne cahcoman ne nunde yahn ne.

4

Sahn intiyahn ne, din se preso Pedro man, Juan man

¹ Nde ametah cuihno cuahndudo Pedro man, Juan man, cuahn che nda chidocuyan ndinan chahn man, sahn saduceo man, sahn ndinan yahn policia che redin se cudado yaco man.

²Yudo ri yahn sahn chahn yahn che Pedro nduco Juan ne, ricuahn ye ihyan yan che a ntuche Dihvo vo Jesucristo, ne chemin che va che ntuche tenahn.

³Tuhme quenda se ihyan chahn, chih se ihyan vacoyahn nde tama ro me, te ura min ne, a chino.

⁴Ate yahn ihyan che chihnevan ye che ricuahn ihyan chahn ne, chitahno ye Dihvo vo Jesucristo, ne ihyan chahn nduco ihyan che a chitahno ye Dihvo vo nde ro menan me ne, ri ye tenduh uhn mil che deman ihyan chahn.

⁵Tama ro me ne, min yan Jerusalén ndo dama nducoyaca sahn ndinan yahn nación yahn Israel man, sahn intiyahn man, sahn devano ley che dirun Moisés man.

⁶Namin nduco Anás, chidocuyan che tahque ndinan man, Caifás man, Juan man, Alejandro man, nducoyaca ihyan che ndata yahn chidocuyan ndinan chahn man.

⁷Tuhme tahve sahn chahn che ngua Pedro man, Juan man, chahtendi ye mendahn, ne chiquerune se ihyan:

—¿Duh te nchuhn vederihquentiyon che redin ne dehtenduh che tihchan ne?

⁸Tuhme numacuahn vederihquentiyon yahn Vaco Ndah yahn Dendiohs, ndahconan Pedro, ne rahn ye ri ye sahn:

—Nchuhn, sahn ndinan man, sahn intiyahn yahn nación yuhn vo man,

⁹man che riquerune ne yahn vederihno che chinahn nduco sahgguh che nenevadoh cah se man, taça chi che ndoyahn se man,

¹⁰cahma nuhn nan nchuhn cava che codevano nducoyaca ihyan nación yuhn vo. Sahnguh che nti se muhn nan nducoyaca nchuhn ne, a ntoyahn se nduco vederihquentiyon yahn Jesucristo yahn yan Nazaret. A ihyan min che nahn yah nchuhn, ate Dendiohs ne, ndedetuhche ye ihyan van tenahn.

¹¹Nduhca sahn rahto vah che chacondah se tu che tahque cochihve yahn se ne, tihchan nchuhn, te hua nevahnecon ne ihyan min.

¹²Nde ama ihyan hua co ndedevahn ye uvo, te atenan ihyan min che va tah ye vederihquentiyon che ndedevahn ye ihyan iyehanse.

¹³Cuahn che ndihche sahn ndinan chahn che hua vah Pedro man, Juan man, che rente ye numa ino ye ne, nducote a devano se te ihyan chahn ne, ndata yahn ihyan chevah ihyan man, hua devano ye caca man ne, ama cuahn ino se, ne tumacadino se che chinduco ye Dihvo vo Jesucristo.

¹⁴Avane ne, sahn che ndoyahn me ne, min nti se nduco ihyan chahn. Chemin che nde nan che cahma sahn ndinan chahn metah.

¹⁵Tuhme chihquentiyon se che ndiquendah vah ihyan chahn, numanahn che nte cade se nduco vih.

¹⁶Rahn se:

—¿Deh din vo nduco sahn chuhn ne?, te nducoyaca ihyan che vate ye yan Jerusalén, a devano ye yahn vederihno me, ne hua co cahma vo che hua cuaco.

¹⁷Man ne, cava che hua quendi cotuhn ndudo yahn vederihno me ne, nahn dihyo vo sahn, ne ametah quendi se cahma se nduco nde ama ihyan yahn vederihquentiyon yahn Jesús min.

¹⁸Tuhme cah sahn ndinan chahn ihyan, ne chihquentiyon se che ametah quendi ye cacuahn ye vederihquentiyon yahn Dihvo vo.

¹⁹Ate ndahconan ihyan chahn, ne rahn ye ri ye sahn:

—Condedecadino man nchuhn. Nan Dendiohs ne, ¿a ndahca che hua dinahn nuhn che rihquentiyon ye, cava che dinahn nuhn yahn ne ne?

²⁰Va che dinahn nuhn yahn Dendiohs, te yahn nducuahn che ndihchero nuhn man, chihnevan nuhn man ne, va che cahma nuhn.

²¹ Tuhme nahn dihya sahn ndinan chahn ihyan, ne ndedechuh se ihyan, conahn ye. Hua chihquino se din se castigo ihyan yahn che rendeva nducoyaca ihyan yan yavenan Dendiohs yahn vederihno che chinahn.

²² Sahn che chinahn vederihno nduco me, ndoyahn se ne, a ri se nchuh o raco nduyo.

Ihyan che ritahno ye Dihvo vo Jesucristo ne, chica ye che cah Dendiohs vedechahtino ihyan

²³ Pedro nduco Juan ne, cuahn che ndaca ye nan chidocuyan ndinan chahn man, sahn intiyahn chahn man ne, conahn ye nan che chenun combiero yahn ye, ne necah cuande ye ihyan nducuahn che rahn se ri se ihyan.

²⁴ Chihno necah cuande ye ihyan ne, covah nducoyaca ye tuhca:

—Dihve nuhn, Dendiohs, ndih che dendah ne nan ro man, iyehmse man, nuniyahn man, nducuahn che va man.

²⁵ Numacuahn vederihquentiyon yahn Vaco Ndah yahn ne ne, cah cuande ne ihyan yahn ne David, ne dirun ye tuhca:

¿Dehco che rendedecadino ihyan naci6n yahn Israel yahn dehtenduh che hua cochihve?

¿Dehco che renecuan ihyan naci6n chenahn, ri tan ye nduco Dendiohs?

²⁶ Nducoyaca rey che vate ye iyehmse ne, necuan ye, ne nducoyaca ihyan che rihquentiyon ye ne, ndo dama ye, cava che cuhma ye nduco Dihvo vo Dendiohs man, ihyan yahn ye che a va cade che chi ye, ndedevahn ye ihyan iyehmse man.

²⁷ Tihca chinahn, te muhn yan cuh ne, ndo dama Herodes man, Poncio Pilato man, sahn naci6n yahn Israel man, sahn naci6n chenahn man, cava che chihno se Daya Ndah yahn ne, Jesucristo, ihyan min che ndahco ne vederihquentiyon tah ye.

²⁸ Nduco tihca chenun cah nducuahn che a ndihco cade ne.

²⁹ Dihve nuhn, man ne, condihche ne nduhca che renahn dihya sahn sih nuhn. Cuete ne vedechahtino nuhn cava che numa ino nuhn cuahndudo nuhn Ndudo yahn ne.

³⁰ Numacuahn vederihquentiyon yahn ne ne, codin ne che ndoyahn ihyan cah man, che cuhnde ro vederihno man, che cuande yahn Daya Ndah yahn ne, Jesucristo.

³¹ Cuahn che chihno covah ihyan chahn ne, nuhn yahn nan che chenun ye. Vaco Ndah yahn Dendiohs ne, quenun nducoyaca ye, ne rahndudo ye Ndudo yahn Dendiohs numa ino ye.

Ihyan che ritahno ye Dihvo vo Jesucristo ne, va mendahn dehtenduh yahn ye cava nducoyaca ye

³² Nducoyaca ihyan che ritahno ye Dihvo vo Jesucristo ne, ama no vederedecadino yahn ye nduco vih. Nde ama ye ne, hua rihco vih ye dehtenduh yahn ye, te ndihco mendahn ye cava nducoyaca ye.

³³ Numacuahn vederihquentiyon yahn Dendiohs rahndudo ihyan apostol chahn che ntuche Dihvo vo Jesucristo, ne ama rinan Dendiohs nducoyaca ihyan chahn, redin ye che chenun cuma ye vedeyahino nduco vih.

³⁴ Nde ama ihyan chahn ne, hua rindanan dehtenduh che nahn ye, te ihyan che va yahn yahn ye man, o vah yahn ye man ne, rendihcue ye, ne riquenda ye tume me,

³⁵ renecah ye ihyan apostol chahn cava che recah ihyan chahn queri ama ihyan tunoca vederetahn yahn ye.

³⁶ Tihcā din āma ihyān, yāhn yāhn Chipre, che duche ye José, ndata yāhn chidocuyān Levita. Ihyān apóstol ne, chaconāhn ye che duche ye Bernabé, che nāhn cāhma ihyān che renecāh yān ye chedave yāhn ihyān.

³⁷ Ihyān min ne, ndihcue ye āma yāhn yāhn ye, ne necāh ye tume me ihyān apóstol chāhn.

5

Nunde yāhn Ananías nduco Safira

¹ Ate hua tihcā din āma sāhn che duche se Ananías nduco ndāhta yāhn se Safira. Namin ndihcue se āma yāhn yāhn se,

² ne chihco vih se tah tume yāhn. Quenda se tume chenāhn me, din cā se che a nducuah, ne necāh se ihyān apóstol chāhn. Tāhn ndāhta yāhn se ne, a devano te chemin.

³ Tuhme rāhn Pedro ri ye sāhn:

—Ananías, ¿dehco che dinehn che chinun chundah di ne?, te nāhn cah-ncheh Vaco Ndah yāhn Dendiohs, chihco vih tah tume yāhn yāhn che ndihcue.

⁴ Nde āma ihyān hua din ye fuerza di cava che ndihcue yāhn yēhn, nde huane che checo tume che ca yāhn muhn. ¿Dehco che tihcā ndedecadine?, te nunde yāhn vederihncheh yēhn ne, quendihque nān Dendiohs, ndiyu demān nān ihyān.

⁵ Cuahn che chihnevan Ananías ndudo cuh ne, chendāh se, ne chih se. Nducoyāca ihyān che checadino ye che tihcā chi ne, āma dihya ye chi.

⁶ Nda āma o sāhn decāhya, ne chahcotuma se tino sāhn, quenda se sāhn, chihche se sāhn.

⁷ Chihno tenduh ino ura ne, ndā tāhn ndāhta me, nde hua devano te deh che chi.

⁸ Tumerune Pedro tāhn:

—¿A cuāco che tuhva tume ca nchuhn yāhn yāhn yāhn ne ne?

Ndahconan te:

—Cuāco. Nduco tihva.

⁹ Tuhme rāhn Pedro ri ye tāhn:

—¿Dehco che tihcā din nchuhn, che ntuhno ne cava che tumarande ne Vaco Ndah yāhn Dihvo vo Dendiohs? A tān cuenchi sāhn che chāhn se chihche se inchāhn. Mān ne, namin quenda se di, cuhche se di.

¹⁰ Ndetāhno chendāh tāhn min, ne chih te nān Pedro. Cuahn che ntā sāhn decāhya chāhn ne, a ndih te, ne quenda se tāhn chihche se tāhn dāma nduco inchāhn te.

¹¹ Nducoyāca ihyān che ritahno ye Dihvo vo Jesucristo, nde ihyān chenāhn ne, checadino ye che tihcā chi, ne āma dihya ye chi.

Āma din ihyān apóstol vederihno

¹² Āma redin ihyān apóstol vederihno nān ihyān, ne nducoyāca ihyān che ritahno ye Dihvo vo Jesucristo ne, rendo dāma ye yāco chahte, mān corredor che duche Salomón.

¹³ Ihyān yān ne, āma renevahnecon ye ihyān chāhn, ne andahre vāhino ye, condā vān ye mīn,

¹⁴ ate āma yāhn ye, nde ndāhta, nde chāhn ye, chitahno ye Dihvo vo, ne chinduco ye ihyān chāhn.

¹⁵ Quendi tihcā nde ndā ro cuahn che āma riquenda ihyān ihyān cah yāhn ye nduco yundo, rentāve ye chihto yune, cava che cuahn che chuh Pedro ne, amare dāhno ye conan āma o ihyān chāhn.

16 Namin rica ihyan yan che nino, renda ye yan Jerusalén, nda ye ihyan cah yahn ye nduco ihyan che chenun vaco chihnga ihyan, ne ihyan cah chahn ne, rendoyahn ye, ne ihyan che chenun vaco chihnga ihyan ne, rendiquendah.

Din se preso Pedro man, Juan man

17 Tuhme chidocuyan che tahque ndinan nduco sahn saduceo che rinduco se ihyan ne, chi tan se, din vedeve.

18 Din se preso ihyan apóstol chahn, ne chih se ihyan vacoyahn.

19 Ate ama ángel yahn Dendiohs ne, nahne ye vacoyahn me vino, ne ndetendah ye ihyan chahn, ne rahñ ye ri ye ihyan:

20 —Cuahn nchuhn chete yaco chahte, cuahndudo ne nan ihyan vederihquentiyon che rendahcorun Dendiohs ihyan, rendedevahn ye ihyan.

21 Dinahn ihyan chahn, ne tama ro tiyan ndita ne, chenda ye chete yaco me, cahndudo ye.

Numanahmin ne, chidocuyan che tahque ndinan nduco sahn che rinduco se ihyan ne, nedin dama ye nducoyaca sahn ndinan yahn nación yahn Israel man, sahn intiyañ man. Tuhme tahve ye che chehua ihyan apóstol che chenun ye vacoyahn.

22 Ate cuahn che nda sahn policía vacoyahn me ne, metah ihyan chahn, ne ndaconan se, chengu se ndudo.

23 Rahñ se:

—Vacoyahn ne, ndah ntude, ne sandado chahn ne, chenan se cudado chendevah. Ate cuahn che nahne nuhn chende vacoyahn me ne, metah duhva.

24 Cuahn che chihnevan chidocuyan che tahque ndinan man, sahn ndinan yahn policía che redin cudado yaco man, chidocuyan ndinan chahn man ne, retumerune vih se nde ti nda, nde ti tuno che tihca ri.

25 Ura min ne, nda ama se, ne rahñ se ri se sahn chahn:

—Sahn che chih nchuhn vacoyahn ne, chete yaco chenun se, ricuahn se.

26 Tuhme cuahn sahn ndinan me nduco policía yahn se, chehua se ihyan apóstol chahn nduco ndah. Hua din tan se nduco ye, te vah se che cah ihyan yan tu sahn.

27 Cuahn che nta se ne, chengu se ihyan nan sahn ndinan chahn. Tuhme rahñ chidocuyan che tahque ndinan me ri ye ihyan apóstol chahn:

28 —Nuhn ne, numacuahn vedeyudo chihquentiyon nuhn che hua quendi nchuhn cacuahn ne vederihquentiyon yahn sahn min. Ate hua dinahn ne, te a ndacotuhn ne ndudo che ricuahn ne numachahte yan Jerusalén. Avane ne, ricueh dame ne nuhn che nuhn chihno nuhn sahn min.

29 Tuhme Pedro nduco ihyan apóstol chenahn chahn ne, ndahconan ye:

—Nuhn ne, quenan cuma che dinahn nuhn vederihquentiyon yahn Dendiohs, te chemin che tahque yudo che co vederihquentiyon yahn ihyan iyehñse.

30 Nchuhn ne, nahn yah ne Jesucristo nan ama cruz, chihno ne ihyan, ate Dendiohs yahn indihñe yuhn vo ne, ndedetuhche ye ihyan,

31 ne chihco ye ihyan lado tah cuaco ye, ndahco ye vederihquentiyon tah ye che conan ye man, ndedevahn ye ihyan iyehñse man, cava che nto ino ihyan nación yahn Israel nunde yahn ye, ne ndaca ye vederenchahco.

32 Nuhn ne, racotuhn nuhn ndudo yahn dehtenduh che tuhchan numacuahn vederihquentiyon yahn Vaco Ndah yahn Dendiohs, che redin Dendiohs che renun ihyan che redinahn ye ndudo yahn ye.

33 Cuahn che chihnevan sahn ndinan chahn che tihca rahñ ihyan apóstol ne, ama chi tan se, ne nahn cahno se ihyan.

³⁴ Ate van sahn chahn ne, nduco ama ihyan fariseo che duche ye Gamaliel. Ihyan min ne, ihyan devano ley che dirun Moisés, ne ama renevahne cun ihyan yan ihyan. Chandi ye, ne chihquentiyon ye che ndiquendah vah ihyan apóstol chahn menan lihn.

³⁵ Tuhme rahn ye ri ye combiero yahn ye:

—Nchuhn, ihyan ndinan yahn nación yuhn vo Israel, cuihco ne cudado deh che rihco ne che din ne nduco ihyan sih.

³⁶ Cuenecahco ne te ametah rahn me che necuan Teudas, chinun se ihyan che va tah se ama vederihquentiyon, ne chinduco tenduh cun ciento ihyan sahn. Ate chihno sandado sahn, chihno chano nducoyaca ihyan che chinduco ye sahn, ne min chihnonan yahn se.

³⁷ Adivo ne, ro che renan caca ihyan ne, necuan Judas yahn estado yahn Galilea, ne ama yahn ihyan chinduco ye sahn. Ate namin chihno sandado sahn, ne chihno chano ihyan che chinduco ye sahn.

³⁸ Chemin che tahque ndahca che hua cahdenun nchuhn yune yahn ihyan sih, te ndete che vederihquentiyon yahn man ye che ricuahn ye ne, va che cuihno.

³⁹ Ate ndete che vederihquentiyon yahn Dendiohs che ricuahn ye ne, hua co decuihno nchuhn. Avane ne, ndete che tihca ne, cahnda yahn ne, te redin vahche ne yahn vederihquentiyon yahn Dendiohs.

⁴⁰ Quenan ino nducoyaca sahn ndinan chahn che rahn ihyan min, ne cah se ihyan apóstol chahn, chahn se ihyan. Chihquentiyon se che ametah ndaconan cacuahn ye vederihquentiyon yahn Dihvo vo, ne ndedechuh se ihyan, conahn ye.

⁴¹ Ndacá ihyan apóstol chahn nan sahn ndinan chahn, ne ama yeno ye, te cah yune Dendiohs che chuhrihn ye cava Dihvo vo.

⁴² Quendi ihyan apóstol chahn chicuahn ye vederihquentiyon yahn Dihvo vo ro ro, chete yaco man, vaco ihyan man.

6

Tendahnun ye ndache diácono

¹ Tahn min ne, ama ri yahn ihyan che ritahno ye Dihvo vo Jesucristo. Ihyan che rente ye devaco griego ne, chica nunde ye yahn ihyan che rente ye hebreo, te ura che rih ye dehtenduh che cheh ihyan ne, hua ndahva rechah ye ndahta vah che rente ye griego.

²⁻³ Tuhme nedin dama ihyan apóstol che ndichio chahn nducoyaca ihyan che ritahno ye Dihvo vo, ne rahn ye:

—Dihno nuhn, hua ndahca che cahcoman nuhn che rahndudo nuhn Ndudo yahn Dendiohs, din nuhn ntiyon che cuih nuhn che cheh nchuhn. Chemin che van nchuhn ne, cuetendahnun ne ndache ihyan che quenun Vaco Ndah yahn Dendiohs ihyan man, che chenan ino vo ihyan man, che ndahca vederendedecadino yahn ye man, ne ihyan chahn ne, ndahco nuhn ntiyon cuh tah ye.

⁴ Me nuhn ne, quendi nuhn covah nuhn man, cacuahn nuhn Ndudo yahn Dendiohs man.

⁵ Chahtenan ino ihyan chahn, ne tendahnun ye Esteban, ama ihyan che numa ino ye ritahno ye Dihvo vo Jesucristo man, che quenun Vaco Ndah yahn Dendiohs ihyan man. Namin tendahnun ye Felipe man, Prócoro man, Nicanor man, Timón man, Parmenas man, Nicolás man, ama ihyan yan Antioquia che chitahno ye dama nduco ihyan nación yahn Israel ro menan.

⁶ Tuhme covah ihyan apóstol cava ihyan chahn, nahn tah ye ihyan, ndahco ye ntiyon min tah ye.

⁷ Ndudo yahn Dendiohs ne, ama retuhn, ne min yan Jerusalén ne, ihyan che ritahno ye Dihvo vo Jesucristo ne, ama ri yahn ye. Nde chidocuyan, ama yahn ye chitahno ye, chinduco ye ihyan chahn.

Din se preso Esteban

⁸ Esteban ne, redin ye vederihno nan ihyan, te ama yahino Dendiohs ihyan man, necah ye vederihquentiyon ihyan man.

⁹ Ama o sahn ndiyaco che duche Esclavos Libertados, nduco ama o sahn yan Cirene man, Alejandria man, yahn yahn Cilicia man, Asia man ne, canan se ruhn chende se nduco Esteban.

¹⁰ Ate hua chi ndahco ndiya se ihyan, te quenun Vaco Ndah yahn Dendiohs ihyan man, ama va vededevano yahn ye man.

¹¹ Tuhme nedihve se ama o sahn cava che cuacotuhn se ndudo cuahnde, ne cahma se te chihnevan se che chihnga rahn Esteban yahn Dendiohs man, yahn ley che dirun Moisés man.

¹² Nduco chemin ne, ndedecuan se sahn yan man, sahn ndinan man, sahn devano ley che dirun Moisés man, ne chi tan sahn chahn nduco Esteban, quenda se ihyan nan intiyahn.

¹³ Namin nuhn sahn chahn ama o se che cahma se ndudo cuahnde tuhca: —Cuahn dama chihnga rahn sahn tih yahn yaco cuh che nihnde vih yahn Dendiohs man, yahn ley che dirun Moisés man.

¹⁴ Cuaco chemin, te chihnevan nuhn che rahn se te Jesucristo yahn yan Nazaret ne, ndatera ye yaco cuh man, ndahcorun ye costumbre che chihco Moisés man.

¹⁵ Nducoyaca sahn ndinan che vate se min ne, ndihchero se Esteban, ne nduhca che ro nan angel, tihca ro nan ye.

7

Cahndudo Esteban che rendedevahn ye ihyan

¹ Tuhme chidocuyan che tahque ndinan me ne, chiquerune ye Esteban:

—¿A cuaco nducuah che rica nunde sahn sih yehn ne?

² Ndahconan Esteban, ne rahn ye:

—Nducoyaca nchuhn, dihnó man, ihyan ndinan yahn nación yuhn vo man, cuihcovan ne che cahmá. Dendiohs yuhn vo, ihyan min che ama yudo vederihquentiyon yahn ye ne, nda ye nan indihnte yuhn vo Abraham, cuahn che quenana ca ye yahn yahn Mesopotamia, ro che ametah cuhnde ye yan Harán,

³ ne rahn ye ri ye ihyan: “Cuihcoman yan vaque man, nducoyaca ihyan yehn man, ne cuehn ama cuan yahn nan che nahmá di.”

⁴ Tuhme chica Abraham yan vaco ye, Caldea, ne chahn ye, chihnde ye yan Harán. Adiva ne, chih chida ye, ne nahma Dendiohs ihyan yune, nde nan che nda ye muhn, yahn nan che vahto vo man ro cuh.

⁵ Hua cah Dendiohs nde ama ndi yahn cuh ihyan, nde nan che cahno ye ama cah ye. Ate cah ye ndudo yahn ye ihyan te co yahn ndata yahn ye, andahre ro min ne, ametah nde ama daya ye.

⁶ Namin rahn Dendiohs ri ye ihyan te ndata yahn ye ne, va che cuahtenan ye yan vaco ihyan tama nación, ne din tan ihyan nación min nduco ye man, din ye ntiyon yahn ihyan chahn nduco fuerza man, nde cuihno cun ciento nduyo.

⁷ Ate namin rahn Dendiohs ri ye ihyan: “U dín castigo ihyan nación min che cahcantiyon ye numacuah vedetan ndata yehn che din ye ntiyon yahn

ye. Cuihno min ne, ndāca ye nación min, ne cochi ye muhn yahn cuh, ndeva ye yavenán.”

⁸ Namin çah Dendiohs ndudo yahn ye Abraham, ne chihquentiyon ye che conan ama seña queri ama ihyan, ndata yahn ye, çava che çahco ran ye che nevahnecon ye ndudo min. Chemin che cuahn che chihndeyan ðaya Abraham che duche Isaac ne, chihno nine ro ne, chaconahn ye seña. Tihça chaconahn Isaac seña ðaya ye Jacob, ne Jacob ne, tihça chaconahn ye seña nducoyaca ðaya ye. A ihyan min che chihco ndata ye nduh che ndichio ndata yahn ihyan nación yahn Israel.

⁹ ðaya Jacob che ihyan ndico yuhn vo ne, a ihyan chahn che din ve ye yahn dihno ye José, ne ndihcue ndeh ye ihyan nduco sahn che quenda se ihyan nde nación yahn Egipto. Ate Dendiohs ne, chinduco ye José,

¹⁰ ne ndedevahn ye ihyan yahn nducuahn che rechuhrihn ye. Çah Dendiohs vederendedecadino che ndahça ihyan, ne din ye che Faraón, rey yahn Egipto ne, din yahino ye ihyan. Chemin che chaconahn Faraón ihyan che çahcantiyon ye ndevaco ye man, nde numachahte nación yahn Egipto man.

¹¹ Tuhme chihnde cuico numachahte nación yahn Egipto man, Canaán man, ne ama chuhrihn nducoyaca ihyan, nde indihthe yuhn vo, ne ametah rendaca che cheh ye.

¹² Ate cuahn che checadino Jacob che min nación yahn Egipto va trigo ne, dechuh ye ðaya ye. Tahñ min ne, cade ama yune chahn ihyan ndico yuhn vo.

¹³ Cuahn che chi o yune che chahn ihyan chahn ne, çah José che checadino ye te ihyan min che dihno ye, ne nduco chemin checadino Faraón ti chica ndata yahn José.

¹⁴ Tuhme dechuh José che chehua chida ye Jacob nduco ihyan yahn ye. Nducoyaca ihyan chahn ne, ri ye ino raco ntihyon.

¹⁵ Tihça chi che chahn Jacob, chihnde ye nación yahn Egipto. Adiva ne, chih ye, ne namin a min chih ihyan ndico yuhn vo.

¹⁶ Adiva ne, ndiquenda ihyan ine yahn tenahn chahn nde yan Siquem. Min chihche tun ye ihyan nan yayan che ca Abraham, ndihcue ðaya Hamor.

¹⁷ Cuahn che a nda nino ro che conahn ndudo che çah Dendiohs numacuahn vedeyudo Abraham ne, ihyan nación yahn Israel ne, ama chi yahn ye min nación yahn Egipto.

¹⁸ Tahñ min chihnde tama rey yahn Egipto che hua rendihche ye José.

¹⁹ Rey min ne, din tan ye numacuahn vederihncheh nduco ihyan ndico yuhn vo, ne chihquentiyon ye ihyan chahn che cade cuahteyan ðaya ye che chahn ne, çahn ye, cuacondah ye çava che coh.

²⁰ Tahñ min chihndeyan Moisés, ne ama quenán ino Dendiohs lihn me. Ino iyo ra chi tave indihthe yahn se sahn,

²¹ ne cuahn che chihcoman ye lihn me ne, tahñ ðaya man rey ntaca te sahn. Ndeva te sahn, ne tave te sahn nduhça ðaya man te.

²² Chemin che chahn Moisés nducuahn vededevano yahn nahan nación yahn Egipto. Cuahn che chi chahte ye ne, ama dito nan ye nan che rente ye man, nan dehtenduh che redin ye man.

²³ Cuahn che a chi ye o raco nduyo ne, chahn ye chendihchero ye ihyan nación yahn ye, Israel.

²⁴ Min ndihchero ye che chahn ama sahn Egipto ama sahn nación yahn ye, ne chihno ye sahn Egipto me, ndedevahn ye sahn che tama me.

25 Tihcā din ye, te rahco ye te nduco chemin ne, ihyan nación yahn ye ne, conahn ye te dechuh Dendiohs ihyan, ndedevahn ye ihyan chahn. Ate ihyan chahn ne, hua chenahn ye.

26 Tama ro me ne, ndihchero Moisés o sahn nación yahn ye che rahteruhn se nduco vih, ne nahn cahco dihn ye sahn. Rahñ ye ri ye sahn: “Nchuhn ne, dāma nación yuhn vo nduco vih, ¿dehco che rahteruhn ne nduco vih?”

27 Ate sahn che redin tan nduco combiero yahn me ne, chacondā se ihyan, ne rahñ se: “¿Duh chaconahn di che conan yahn nuhn, techecade yahn nuhn?”

28 ¿A namin nahn cahne u nduhcā che chihne sahn Egipto me ico?”

29 Cuahn che chihnevan Moisés che tihcā rahñ sahn min ne, chano ye, ne cuahn ye, chihnde ye āma cuāñ yahn che duche Madián. Min chihnevāco ye, ne ndāca o dāya ye.

30 Chihno o raco nduyo ne, min yahn nan che metah duhva, nino nan cuete che duche Sinaí ne, adenāñ chihnde ro āma ángel van ruchiyahn yahn āma yahn lihn che riche, ndihchero Moisés.

31 Moisés ne, āma cuahn ino ye yahn vederihno che rendihchero ye, ne cuahn che chahn ndā ye cava che ndihchero ndah ye ne, chihnevan ye che rahñ Dihvo vo Dendiohs:

32 “U che Dendiohs yahn ihyan ndico yehn, Abraham man, Isaac man, Jacob man.” Tuhme āma dihya Moisés chi, nde tuno rendoh ye che vah ye, nde metah chihquino ye ndihchero ca ye.

33 Rahñ Dendiohs ri ye ihyan: “Cuehnevi ndāco che chenun cah, te cahnda yehn yahn che nti nino nan che quenún.

34 A ndihcheró che rechuhrihn ihyan yahn min nación yahn Egipto, ne chihnevāñ che revah ye. Chemin che cochí, ndedevāñ ihyan. Man ne, conan yan, te dechuh di Egipto.”

35 Andahre hua nevahnevan ihyan chahn Moisés ro menāñ, rahñ ye ri ye ihyan: “¿Duh chaconahn di che conan yahn nuhn, techecade yahn nuhn?” Ate man Dendiohs dechuh ye ihyan cava che conāñ ye yahn ihyan chahn man, cava che ndedevahn ye ihyan man, nduhcā che rahñ ye ro che chihnde ro ángel me nan yahn lihn che riche me.

36 A Moisés che ndetendāñ ye ihyan ndico yuhn vo min nación yahn Egipto, ne din ye vederihno yahn min man, nan Nuniyahñ Cuāñ man, yahn nan che metah duhva man, chete che o raco nduyo.

37 A Moisés che rahñ ye ri ye ihyan nación yuhn vo, Israel: “Dendiohs ne, ndedecuan ye āma ihyan profeta van ndāta yuhn vo nduhcā che ndedecuan ye u, ne che cahma ihyan min ne, chemin che codinah nchuhn.”

38 A Moisés che quendāññan ye yahn ihyan nación yuhn vo, Israel, min yahn nan che metah duhva, ne a ihyan min che nte ángel nduco ye min Cuete Sinaí cava che cah ye ndudo min ihyan ndico yuhn vo. A ihyan min che chihnevan ye ndudo yahn che ndedevahn Dendiohs ihyan iyehñse, chihco ye cavo vo.

39 Ate ihyan ndico yuhn vo ne, chacotāñ ye yahn Moisés man, nahn ndaconan ye nación yahn Egipto man.

40 Rahñ ihyan chahn ri ye Aarón: “Nahn nuhn che dendah ne āma o dendiohs che quendāññan ye yuhn vo, te Moisés, ihyan min che ndetendāñ ye uvo nación yahn Egipto ne, a hua rentā ye, ne hua devano nuhn deh chi yahn ye.”

41 Tuhme dendah ihyan chahn āma itenine lihn. Chihno ye āma o ite cava che co te vedino nan itenine me, ne āma chi yeno ye nduco dendiohs min yahn ye che dendah man ye.

⁴² Chemin che chihcoman Dendiohs ihyan chahn, ne cah yune ye che chitahno ye iyon che chenana ro, chivahn dendiohs yahn ye, nduhca che dirun ama cha ihyan profeta tuhca:

Nchuhn, ihyan naci6n yahn Israel, cuahn che chahtechica ne yahn nan che metah duhva chete che o raco nduyo ne,

ndotenan che cahno ne ite cava che co te vedino, ndeva ne yavenan ne,

⁴³ tahque ndah ne ne, quenda ne yaco nan che quenun Moloc man, iyon yahn Renfan man,

ndeva ne yavenan dendiohs chemin chan che dendah man ne.

Chemin che quenana cuma che din castigo nchuhn, dechuh nchuhn nde tahque cana yahn naci6n yahn Babilonia.

⁴⁴ Min yahn nan che metah duhva ne, ihyan ndico yuhn vo ne, chihnde tah ye yaco che chindah nduhca che nahma Dendiohs Mois6s taca va che dendah ye. A chete yaco min ne, chenun ndah tu rahno nan che ndirun ley yahn Dendiohs.

⁴⁵ Chan rine, chihnde tah ihyan chahn yaco me nde ro che nda ye nduco Josue, chetah ye yahn yahn ihyan tama naci6n che chehnevi Dendiohs nan ye. Tihca chihco cudado ye yaco me nde ro che quenana David.

⁴⁶ Dendiohs, ihyan min che ndeva Jacob yavenan ye ne, din yahino ye rey David, ne nahn cahno rey me ama yaco yahn ye.

⁴⁷ Ate Salom6n che chihno ye yaco yahn Dendiohs,

⁴⁸ andahre Dendiohs, ihyan min che ama yudo vederihquentiyon yahn ye, hua rendotenan ye yaco che rihno ihyan. Tihca nduhca che dirun ihyan profeta me tuhca:

⁴⁹ Rahn Dihvo vo Dendiohs: "Rihquentiy6n nde vahchetero man, nde numachahte iyehne man.

¿Taca conun chete ama yaco che rihno ihyan?

¿Taca cuhnd6 ama cuan no?

⁵⁰ A man dendah nducuahn dehtenduh che va."

⁵¹ Quendi Esteban, ne rahn ye:

—Nchuhn ne, cheche chedave yahn ne. Dama ri ne nduco ihyan che hua ritahno ye Dendiohs, te hua redinahne. Numacuahn ro ne, rahcotahn ne vederihquentiyon yahn Vaco Ndah yahn Dendiohs. Nduhca ihyan ndico yahn ne ne, tihchane.

⁵² Nducoyaca ihyan profeta ne, din tan ihyan ndico yahn nchuhn nduco ye. Ihyan ndico yahn ne ne, chihno ye ihyan profeta chahn che dirun ye nde ro menan che va che chi Daya Dendiohs, ne cuahn che nda ye ne, a man nchuhn hua chitahno ne ihyan, ne chihno ne ihyan.

⁵³ Nchuhn ne, nduco angel dechuh Dendiohs ley yahn ye cava che dinahn ne, ate hua redinahne.

⁵⁴ Cuahn che chihnevan sahn ndinan chahn che tihca rahn Esteban ne, ama chi tan se, nde tuno reh dihyon se.

⁵⁵ Ate Esteban ne, quenun Vaco Ndah yahn Dendiohs ihyan, ne chenihyon nan ye nan ro, ne ndihchero ye che ama yudo vederihquentiyon yahn Dendiohs man, che nti Dihvo vo Jesucristo lado tah cuaco ye man.

⁵⁶ Tuhme rahn ye:

—¡Condihe nchuhn! ¡Quendah vahchetero! ¡Nga Ihyan min che rinduco ye nducoyaca ihyan, nti ye lado tah cuaco Dendiohs!

⁵⁷ Ate sahn chahn ne, necahde se iverevan se, nde tuno rah tan se, tumangan se Esteban.

⁵⁸ Quenda se ihyan cuahn chihto yan, ne min cah se tu ihyan. Ama sahn che duche se Saulo ne, din se cudado tino yahn sahn che chenan se ntiyon che cah se tu ihyan.

⁵⁹ Ura che recah se tu Esteban ne, covah ye tuhca:

—Dihvé Jesucristo, ndahcó chedave yáhn tah ne.

⁶⁰ Tuhme chehntihya ye, ne rahn ye numa dito ye:

—Dihvé, cuenchahco ne yahn sahn sih che tihca redin se.

Chihno rahn ye chemin ne, chih ye.

8

Din tan Saulo nduco ihyan che ritahno ye Dihvo vo Jesucristo

¹ Saulo ne, dama chi se nduco sahn chahn che chihno se Esteban.

A ro min no canan ama redin tan se nduco ihyan yan Jerusalén che ritahno ye Dihvo vo. Van ihyan chahn ne, atenan ihyan apóstol che chahtenan ye min, te chihno chano nducoyaca ye, cuahn muhn cuahn min ye estado yahn Judea man, nación yahn Samaria man.

² Ihyan che ndah ihyan ye nan Dendiohs ne, ama chi ran ye cava Esteban, ne chahn ye chihche ye ihyan.

³ Saulo ne, quendi se redin tan se nduco ihyan che ritahno ye Dihvo vo, ne renda se nduh vah nduh vah, retendah vah se ihyan. Nde ndahta, nde chahn ye, rihnda rudo se ihyan, riquenda se ihyan, rih se ihyan vacoyahn.

Rahndudo ye ndudo ndah yahn Dendiohs min nación yahn Samaria

⁴ Ihyan che chano chahn ne, rahndudo ye ndudo ndah yahn Dendiohs nduh cuan yan nan che renda ye.

⁵ Ama cha ihyan chahn che duche ye Felipe ne, cuahn che nda ye ama cuan yan yahn Samaria ne, min rahndudo ye ndudo yahn Dihvo vo Jesucristo, che a ihyan min che a va cade che chi ye ndedevahn ye ihyan iyehanse.

⁶ Ama rendo dama ihyan, rihnevan ye numacuahn vedenecun che rahndudo Felipe man, rendihchero ye vederihno che redin ye man.

⁷ Ama yahn ihyan che chenun vaco chihnga ihyan ne, rendihquendah vaco chahn, ama rah. Namin rendoyahn ama yahn ihyan che ndi cheche ye man, che neneva doh cah ye man, tah ye man.

⁸ Chemin che nducoyaca ihyan yan min ne, ama yeno ye.

⁹ Yan min ne, va ama sahn che duche se Simón, che cuah se. A rahn me ne, ama chihncheh se ihyan che vate ye numachahte nación yahn Samaria, rahn se te ametah nde ama ihyan nduhca sahn min.

¹⁰ Nducoyaca ihyan, nde ihyan ndico man, nde chechaya man, renevah-necun ye sahn, ne rahn ye:

—Sahnguh ne, quenana cuma se vederihquentiyon chahte yahn Dendiohs.

¹¹ Ama rahn chitahno ihyan chahn sahn, te nduco vedecuah yahn se ne, chihncheh se ihyan.

¹² Ate cuahn che chihnevan ihyan chahn che rahndudo Felipe yahn vederihquentiyon yahn Dendiohs man, yahn che ndedevahn Dihvo vo Jesucristo ihyan man ne, nducoyaca ye, nde ndahta, nde chahn ye, chitahno ye Dihvo vo, ne chedenune ye.

¹³ Nde Simón cuah me ne, chitahno se, ne chedenune se. Chinduco se Felipe, ne ama rahn ino se yahn vederihno che rinahn.

¹⁴ Cuahn che ihyan apóstol che chenan ye yan Jerusalén checadino ye che nevah-necun ihyan yahn yahn Samaria Ndudo yahn Dendiohs ne, dechuh ye Pedro nduco Juan.

¹⁵ Cuahn che nda ihyan apóstol chahn ne, covah ye cava che conun Vaco Ndah yahn Dendiohs ihyan chahn.

¹⁶ Ametah conun Vaco Ndah yahn Dendiohs nde ama ihyan chahn, te cade chedenune ye che nevahnecon ye Dihvo vo Jesucristo.

¹⁷ Tuhme Pedro nduco Juan ne, nahn tah ye ihyan chahn, ne quenun Vaco Ndah yahn Dendiohs ihyan.

¹⁸ Cuahn che ndihchero Simón che renun Vaco Ndah yahn Dendiohs ihyan che renahn tah ihyan apóstol chahn ne, nahn cah se tume ihyan,

¹⁹ ne rahn se:

—Cuedin nchuhn che namin nducó conan cumá vederihquentiyon tih, cava che adecoduhno ihyan che nahn tah ihyan ne, conun Vaco Ndah yahn Dendiohs ihyan.

²⁰ Tuhme rahn Pedro ri ye sahn:

—A ndinda di nde nduco tume yehn, te rendedecadine te co cua nduco tume vederihquentiyon che rechah Dendiohs.

²¹ Di ne, nde hua co conen nan ntiyon cuh, te hua ndah chedave yehn nan Dendiohs.

²² Cuento ine yahn nunde yehn, ne cuique Dendiohs ndete che nchahco ye yehn che tihca rendedecadine,

²³ te ndero ndi che a ndinda di, nedin nunde yehn.

²⁴ Ndahconan Simón, ne rahn se ri se ihyan:

—Covah nchuhn cava che nchahco Dihvo vo Dendiohs nunde yahn, ne hua cuahno có nduhca che rahn ne.

²⁵ Cuahn che a nte ihyan apóstol chahn yahn vederihno che din Dendiohs man, cahndudo ye Ndudo yahn Dendiohs man ne, conahn ye yan Jerusalén, racotuhn ye ndudo ndah yahn Dihvo vo Jesucristo ama ndeh yan yahn Samaria nan che rechuh ye.

Felipe nduco sahn nación yahn Etiopía

²⁶ Chihno min ne, rahn ama ángel yahn Dihvo vo Dendiohs ri ye Felipe:

—Cuehn cuahn yune che rica yan Jerusalén, rahn cuahn yan Gaza.

Yune min che rechuh cuahn yahn nan che metah duhva.

²⁷ Tuhme cuahn Felipe, ne ura che a quenun yune ye ne, ntaca ye ama sahn ndinan, che tesoroero yahn tahn Candace, reina yahn nación yahn Etiopía. Ro min ne, a ndaconan se che chahn se yan Jerusalén, ndeva se yavenan Dendiohs.

²⁸ Conahn se yan vaco se, va se chete carro yahn se, ne rahndudo se libro che dirun ihyan profeta Isaías.

²⁹ Tuhme rahn Vaco Dendiohs nduco Felipe:

—Cuehn, cotone carro tih.

³⁰ Cuahn che tuno Felipe carro me ne, chihnevan ye che rahndudo sahn min libro che dirun Isaías, ne tumerune ye sahn:

—¿A renahn ne ndudo tih che rahndudo ne ne?

³¹ Ndahconan se yahn ye:

—Hua, te metah duh che te cuande u.

Tuhme yahve se ihyan che condá ye chete carro me, cuhnde ye dama nduco se.

³² Nan Ndudo yahn Dendiohs che rahndudo se ne, ndirun tuhca:

Nduhca che riquenda ihyan itecuche nan che cahno ye ite ne, tihca quenda ye ihyan.

Nduhca ama itecuche lihn che hua rah te che rendu ihyan ite ne, tihca ihyan min, te hua dehva cahma ye.

³³ Ndere çaça nunde se yahn ye, ne ametah deh che çaħma ye, te hua ndaça duh che techecađe yahn ye numa cuąco.

¿Duh co çaħma yahn ndata yahn ihyan min?, te çaħno se ihyan, ne ndaça ye iyehñse cuh.

³⁴ Tumerune saħn min Felipe:

—Codin favor, ne cahme co u, ¿Duh yahn che tiħca dirun ihyan profeta me? ¿A yahn mañ ye, o yahn tama ihyan?

³⁵ Tuhme canan Felipe nde nan che rahndudo se, caħ cuande ye saħn ndudo ndah yahn Dihvo vo Jesucristo.

³⁶ Cuahn che nda ihyan chahn ama cuan nan che va nune ne, raħn saħn ndinan me:

—Muhn va nune, ¿a hua co cuedenuné ne?

³⁷ Ndahconan Felipe yahn se:

—Ndete che ritahnó ne numacuahn chedave yahn ne ne, taça hua, co cuedenune ne.

Tuhme raħn saħn min:

—Ritahnó te Jesucristo ne, ihyan min che Daya Dendiohs.

³⁸ Chihquentiyon se che chan carro me. Tuhme cochahn se nduco Felipe nan nune me, ne chehdeneñe ye saħn.

³⁹ Cuahn che ndiquenda ihyan chahn van nune ne, quenda Vaco Dihvo vo Dendiohs Felipe, ne chehnan se ihyan. Tuhme ndonun yune se, conaħn se, ne ama yeno se.

⁴⁰ Felipe ne, adenan nda ye yan Azoto, ne chuh ye nduh yan nduh yan, rahndudo ye Ndudo yahn Dendiohs nde nda ye yan Cesarea.

9

Nto ino Saulo nunde yahn se

¹ Numacuahn ro min ne, riquendi Saulo redin tan se nduco ihyan che ritahno ye Dihvo vo Jesucristo, nahn çaħno se ihyan. Chahn se nan chidocuyan che tahque ndinan,

² chica se ama çaça, quenda se, çaça che caħn se yaço yahn ihyan nación yahn Israel che vate ye yan Damasco, din se preso nde ndahta, nde chahn, ihyan che ritahno ye Dihvo vo, quenda se ihyan yan Jerusalén.

³ Ate cuahn che nda nino se yan Damasco ne, adenan chiya ama dave che chica nan ro nan se.

⁴ Ndetahno chendaħ se ndiyahn, ne chihnevan se ama ndudo che raħn:

—Saulo, Saulo, ¿dehco che redin tan nduco ihyan yahn?

⁵ Tumerune se:

—Dihvé, ¿duh ndih ne?

Ndaconan ndudo me:

—U che Jesucristo che redin tan nducó. Nduhca itenine che renun yah mañ te ite, renun te yahn cuiyon che rahco nduco ihyan ite ne, tiħca redin.

⁶ Saulo ne, ama dihya se chi, nde tuno rendoh se che vaħ se, ne raħn se:

—Dihvé, ¿deh nahn ne che din ne?

Ndahconan Dihvo vo yahn se:

—Cueneñen, ne cuehn viyañ. Min çaħma ama ihyan co ye di deh va che din.

⁷ Namin saħn che nduco Saulo ne, ama dihya se chi, te chihnevan saħn chahn ndudo me, ate hua duhva ndiħche se.

⁸ Tuhme necuan Saulo, ate cuahn che naħne se ndutinan se ne, ametah ro nan se. Chemin che chetaħ saħn chahn taħ se, ne quendanan se saħn nde nda se yan Damasco.

9 Min quenan se ino ro, ne hua ro nan se, nde hua cheh se, nde hua chih se.

10 Yan min va ama ihyan che duche ye Ananías che ritahno ye Dihvo vo Jesucristo. Ndiherero ihyan min ama vederihno van yahnde yahn ye che nda Dihvo vo nan ye, ne yahve ye ihyan:

—¡Ananías!

Ndahconan ye:

—Dihvé, cahma ne.

11 Tuhme rahn Dihvo vo ri ye ihyan:

—Cuehn cuahn yune che duche Yune Cuaco, ne min ndevaco Judas, cuiquerone cava ama sahn yan Tarso che duche se Saulo. Min quenun se, revah se.

12 Sahn min ne, din Dendiohs che van yahnde yahn se ndihchero se di che nda, nahn tah sahn cava che ndaconan co ro nan se.

13 Cuahn che chihnevan Ananías che tihca ne, rahn ye:

—Dihvé, ama yahñ ihyan rente ye nduco yahn sahn min che ama redin tan se min yan Jerusalén nduco ihyan che ritahno ye ndih.

14 Man ne, nda se muhn, nda se ama caça che dendah chidocuyan che tahque ndinan cava che din se preso nducoyaca nuhn che ritahno nuhn ndih, quenda se nuhn.

15 Ate rahn Dihvo vo ri ye ihyan:

—Cuehn, te man tendahnún sahn cava che cuahndudo se ndudo yahn, cahnevan ihyan nación yahn Israel man, ihyan nación chenahn man, rey yahn ye man.

16 Cah cuandé sahn che va che ama chuhrihn se che cuande yahn.

17 Tuhme cuahn Ananías, chenda ye vah nan che quenun Saulo. Nahn tah ye sahn, ne rahn ye ri ye sahn:

—Dihno Saulo, Dihvo vo Jesucristo, ihyan min che chihnde ro ye nan cuahn yune ne, dechuh ye u cava che ndaconan co ro nan man, cava che conun Vaco Ndah yahn Dendiohs di man.

18 Ndetahno chera che deca ro yun ro che chenandutin se, ne chi ro nan se. Tuhme necuan se, ne chedenune se.

19 Chihno min ne, cheh se, ne ndeva fuerza sahn. Quenan se neve ro min yan Damasco nduco ihyan che ritahno ye Dihvo vo.

Cahndudo Saulo Ndudo yahn Dendiohs yan Damasco

20 Chihno min ne, canan cahndudo Saulo nduh cuan chete yaco, ne rahn ye te Jesucristo ne, ihyan min che Daya Dendiohs.

21 Nducoyaca ihyan che rihnevan ye ne, rahn ino ye, ne retumarune vih ye:

—¿A ndiyu sahn tih che redin tan se yan Jerusalén nduco ihyan che ritahno ye Jesús? ¿A ndiyu sahn tih che nda se muhn cava che quenda se ihyan che ritahno ye ihyan min, necah se ihyan tah chidocuyan ndinan?

22 Ate Saulo ne, nde tahque numa ino se rahndudo se che cuaco te Dihvo vo Jesucristo ne, a ihyan min che a va cade che chi ye ndedevahn ye ihyan iyehse. Nde nan che ametah deh che cahma ihyan nación yahn Israel che vate ye min yan Damasco.

Chano Saulo

23 Chihno ndeh ro ne, ihyan nación yahn Israel chahn ne, ntuhno ye cava che cahno ye Saulo,

24 ate checadino se. Nde ro nde rahn rano ihyan chahn sahn nduh cuan chende chan yahn yan me cava che cahno ye sahn.

²⁵ Ate ama vino ne, ihyan che ritahno ye Dihvo vo ne, ndedevah ye sahn chete ama cuahte chahte nan chete che ndi chan yahn yan me, ne tihca chi che ndevahn se.

Nta Saulo yan Jerusalén

²⁶ Cuahn che nta Saulo yan Jerusalén ne, nahn conduco se ihyan che ritahno ye Dihvo vo Jesucristo, ate nducoyaca ihyan chahn ne, vah ye, te rahco ye te co hua cuaco che a ritahno se Dihvo vo.

²⁷ Ate Bernabé ne, quenda ye Saulo nan ihyan apóstol chahn, ne necah cuande ye ihyan nduhca che chihnde ro Dihvo vo nan se cuahn yune man, nduhca che yahve ye sahn man, nduhca che numa ino se cahndudo se yan Damasco vederihquentiyon yahn Dihvo vo man.

²⁸ Tuhme chinduco Saulo ihyan apóstol chahn, ne quenan se min yan Jerusalén.

²⁹ Numa ino se rahndudo se vederihquentiyon yahn Dihvo vo, riyahve se ihyan, ndata yahn Israel, che rente ye devaco griego. Ate ihyan chahn ne, rinuhn ino ye taca co cahno ye sahn.

³⁰ Cuahn che checadino ihyan che ritahno ye Dihvo vo che tihca ne, quenda ye sahn yan Cesarea, ne ndedechuh ye sahn yan vaco se Tarso.

³¹ Tahn min ne, numachahte estado yahn Judea man, Galilea man, nación yahn Samaria man ne, nducoyaca ihyan che ritahno ye Dihvo vo ne, cheguan redin tan ihyan nduco ye, ne a ndevate tahn ye, rendeva ye yavenan Dihvo vo Dendiohs numacuahn vedenehun. Renecah yan Vaco Ndah yahn Dendiohs chedave yahn ihyan chahn, ne redin Dendiohs che ama yahn ihyan ritahno ye Dihvo vo, rinduco ye ihyan.

Ndoyahn Eneas

³² Cuahn che quechica Pedro, rahndudo ye yan ihyan che ritahno ye Dihvo vo Jesucristo ne, chahn ye, chendihchero ye ihyan che vate ye yan Lida.

³³ Min ntaça ye ama sahn cah che duche se Eneas. A nine nduyo ndi cheche se, quendite se nan yundo.

³⁴ Rahn Pedro ri ye sahn:

—Eneas, Dihvo vo Jesucristo din ye che ndoyehn. Cuenequen, condihte ndah yundo yehn.

Ndetahno ndoyahn Eneas, ne necuan se.

³⁵ Nducoyaca ihyan yan Lida man, yan Sarón man, ndihchero ye che ndoyahn se, ne ama yahn ye chihcoman ye dehtenduh che ritahno ye ro menan, ne chitahno ye Dihvo vo Jesucristo.

Ntuche Dorcas

³⁶ Tahn min ne, chihnde ama ihyan ndahta yan Jope che ritahno ye Dihvo vo Jesucristo. Ihyan min ne, duche ye Tabita, ne che devaco griego ne, Dorcas. Ama ndah ihyan ye, ne ama yeno ye, rinan ye ihyan chevah.

³⁷ Chetah cah ihyan min, ne chih ye. Chihno nano ihyan tenahn me ne, chacondihte ndah ye ihyan chete cuarto che va nan o cuahto.

³⁸ Checadino ihyan che ritahno ye Dihvo vo che yan Lida quenan Pedro, ne nducote nino yan min ne, tahve ye o ihyan che cah ye, ngua ye ihyan, ne rahn ye:

—Cuhn vo nduco ne yan Jope tenun tenun no.

³⁹ Tuhme cuahn Pedro nduco ihyan chahn, ne cuahn che nda ye min ne, quenda ihyan chahn ihyan chete vah nan che quendite tenahn me. Min chenun nducoyaca ndahta vah, ama raco ye, ne nahme ye Pedro vestido man, coyano man, che ndahyon tenahn me ro che quenan ye iyehense.

⁴⁰ Chihquentiyon Pedro che ndiquendah vah nducoyaca ihyan chahn, ne chentihya ye, covah ye. Ndiherero ye tenahn me, ne rahn ye:

—Tabita, cuenecuen.

Ndetahno nahne ye ndutinan ye, ne ndiherero ye Pedro, ne necuan ye, va nan yundo.

⁴¹ Tuhme chetah Pedro tah ye, ne ndedecuan ye ihyan. Cah ye nducoyaca ihyan che ritahno ye Dihvo vo Jesucristo man, ndahra vah chahn man, ne nahme ye ihyan ndahra me che a ntuche ye van tenahn.

⁴² Nducoyaca ihyan yan Jope ne, checadino ye yahn vederihno me, ne ama yahn ye chitahno ye Dihvo vo.

⁴³ Rahn quenan Pedro min yan Jope, ndevaco Simón, ama sahn che redin dave se ima.

10

Chahn Pedro ndevaco Cornelio

¹ Min yan Cesarea chihnde ama capitán che duche se Cornelio, che ndi cuande se compañia che duche Italiana.

² Sahn min nduco nducoyaca ihyan yahn se che chenun ye ndevaco se ne, rendeva se yavenan Dendiohs numacuahn vedenecon. Ama recah se tume che rinan se ihyan nación yahn Israel, ne revah se ro ro.

³ Ama ro, tenduh nan rahco ino a chino ne, chinahn ama vederihno nan se, ndiherero ndah se ama ángel yahn Dendiohs che chenda ye nan quenun se, ne yahve ye sahn:

—¡Cornelio!

⁴ Ama dihya se chi, ndiherero se ángel me, ne tumerune se ihyan:

—Dihvé, ¿deh nahn ne ne?

Ndahconan ángel me yahn se:

—Dendiohs, a chihnevan ye che revah, ne ndiherero ye che redin vedevahino nduco ihyan chevah.

⁵ Man ne, cuedechoh ihyan che cahñ ye yan Jope, ngua ye Simón che namin duche ye Pedro.

⁶ Quenan ye ama vah che nti nino nuniyahn, vaco ama sahn redin dave ima che namin duche se Simón. Ihyan min cahma ye co ye di deh che va che din.

⁷ Cuahn che conahn ángel me ne, cah Cornelio o sahn decahya yahn se nduco ama sandado che quenan se ndevaco se che namin ritahno se Dendiohs.

⁸ Chihno necah cuande se sahn nducuahn ne, dechuh se sahn yan Jope.

⁹ Tama ro me ne, tenduh nan inguiyahn ne, cuahn che a cuahn nino sahn chahn yan Jope ne, cocha Pedro tin vah yuto nan che quenan ye, cava che covah ye.

¹⁰ Ama chi cuico ye, ne numanahn che rindah che cheh ye ne, chinahn ama vederihno nan ye.

¹¹ Ndiherero ye nan ro ama che deca ro ama tino chahte tihca ro che nechiche nduh che cun esquina yahn, ne cochahn cuahn ndiyahn nino nan ye.

¹² Min chete tino me chenun nducoyaca nan ite che cun cah te man, cu man, yahda man.

¹³ Tuhme chihnevan ye ama ndudo che rahn:

—Pedro, cuihne ite sih, cocheh ite.

¹⁴ Ate ndahconan Pedro:

—Dihvé, hua, te u ne, nde menahn metah chéh nde ama nan ite che chihnga te.

¹⁵ Ndaconan ndudo me:

—Cha che a nedin dave Dendiohs ne, hua quendi ndedecadine che chihnga.

¹⁶ Ino yune ndaconan ndihchero ye vederihno me. Tuhme condá tino me cuahn nan ro.

¹⁷ Nahmin che ama rendedecadino Pedro deh conahn vederihno me ne, sahn che dechuh Cornelio ne, a ndá se chendevah, retumerune se ti che vaco Simón.

¹⁸ Tuhme tumerune se a min quenán ama ihyan che duche ye Simón che namin duche ye Pedro.

¹⁹ Rendedecadino ca Pedro yahn vederihno me cuahn che yahve Vaco Ndah yahn Dendiohs ihyan:

—Ndá ino se, rinuhn se di.

²⁰ Cuenchehn, ne cuehn nduco se. Dehve rahque, te u dechuh sahn.

²¹ Tuhme cuenchahn Pedro cuahn nan che vatendi sahn che dechuh Cornelio, ne rahn ye ri ye sahn:

—U che rinuhn nchuhn. ¿Deh ntiyon cochi ne ne?

²² Ndahconan sahn chahn:

—Huata, capitán Cornelio dechuh ye nuhn. Ihyan min ne, ama ndah ihyan ye, ne rendeva ye yavenán Dendiohs. Nducoyaca ihyan nación yahn Israel ne, yahino ye ihyan. Rahn ama ángel yahn Dendiohs ri ye ihyan che dechuh ye chehua ndih, ça va che cahñ ne ndevaco ye, cahnevan ye deh che va che cahma ne co ne ihyan.

²³ Tuhme rahn Pedro che condá sahn chahn chete vah, ne chahtenan se nduco ye. Nde tãma ro me cuahn ye nduco se, nduco neve ihyan yan Jope che ritahno ye Dihvo vo.

²⁴ Nan che chí o ro me ne, ndá ihyan chahn yan Cesarea, ne quenán rino Cornelio nduco nducoyaca ihyan yahn se man, amigo yahn se man, che ndiyahve se.

²⁵ Cuahn che ndá nino ihyan chahn vaco Cornelio ne, quendañ se vah ça va che nevahnevan se Pedro, ne chehntihya se nan ye, rendeva se yavenán ye.

²⁶ Ate ndedecuan Pedro sahn, ne rahn ye:

—Cuenecuan, cuandi. Hua ndahca che ndeva yavenán, te u ne, ihyan iyehñse u nduhca di.

²⁷ Ca rahn ca rica ye, chenda ye chete vah, ne ndihche ye che ama yahn ihyan ndi dãma ye min.

²⁸ Tuhme rahn ye ri ye ihyan chahn:

—Nchuhn ne, a devano ne te cahnda va yahn nuhn, ihyan nación yahn Israel, che cahñ nuhn ndevaco ihyan tãma nación man, che conduco nuhn ihyan chahn man. Ate Dendiohs ne, te ye, checadino te hua quendi ndedecadino che hua ndahca che codãma nuhn nduco ihyan tãma nación.

²⁹ Chemin che cuahn che tahve nchuhn che chehua u ne, ndetãhno cochí, hua chacotãhñ. Man ne, nahn cadino deh cuande che tahve ne che chehua u.

³⁰ Tuhme ndahconan Cornelio:

—A man cun ro, co tenduh ura cuh ne, va yahaté man, reváh man, muhn chete vacó, cuahn che chihnde ro ama ángel, quenun ye tino che tuno diyahn ro.

³¹ Rahn ye ri ye u: “Cornelio, chihnevan Dendiohs che revah, ne ndihchero ye che redin vedevahino nduco ihyan chevah.

³² Man ne, cuedechoh nde yan Jope che ngua Simón che namin duche ye Pedro. Quenan ye ama vah che nti nino nuniyahñ, ndevaco ama sahn che rindin dave ima, che namin Simón duche se.”

³³ Chemin che a ndetahño dechúh che chehua ndih. Ndahca din ne che cochi ne. Man ne, nto dama nducoyaca nuhn muhn nan Dendiohs cava che cahnevan nuhn nducuahn che chihquentiyon ye che cahma ne.

³⁴ Tuhme cahndudo Pedro:

—Man ne, a chenahn te Dendiohs che cuaco niyon ne, hua retendah nun ye ihyan,

³⁵ te dama no yahino ye nducoyaca ihyan adecotino nación yahn ye, ndete che rendeva ye yavenan ye man, redin ye che ndah man.

³⁶ Dendiohs ne, dechuh ye Jesucristo, Dihve nducoyaca ihyan, van ihyan nación yahn Israel, cava che cuahndudo ye ndudo ndah yahn che ndo yan Dendiohs nduco ihyan iyehñse.

³⁷ Nchuhn ne, a devano ndah ne yahn nducuahn che coman chinahn numachahte nación yahn Israel, canan nde estado yahn Galilea, cuahn che a chuh che cahndudo Juan Bautista man, chehdenuñe ye ihyan man.

³⁸ A devano ne te Dendiohs ne, din ye che quenun Vaco Ndah yahn ye Jesucristo yahn yan Nazaret, ne ndahco ye vederihquentiyon chahte tah ye. Ihyan min ne, quechica ye, redin ye che ndah, ne rendedevahn ye ihyan che rechuhriñh ye, redin chundah. Tihca redin ye, te quenun cuma ye vederihquentiyon yahn Dendiohs.

³⁹ Nuhn racotuhn nuhn ndudo cuaco yahn nducuahn che din Dihvo vo Jesucristo numachahte nación yahn Israel man, yan Jerusalén man. Ihyan min ne, nahn yah se ihyan nan ama cruz, chihño se ihyan.

⁴⁰ Ate chihño ino ro ne, ndedetuhche Dendiohs ihyan, ne cahñecun ye che quechica ro ye van nuhn.

⁴¹ Hua quechica ro ye van nducoyaca ihyan yan, ate quechica ro ye van nuhn che a tendah nun Dendiohs nuhn nde ro menan cava che cuacotuhn nuhn ndudo yahn che tihca chi. Cuahn che a ntuche ye van tenahn ne, dama cheh nuhn, dama chih nuhn nduco ye.

⁴² Chihquentiyon ye che cuahndudo nuhn nan ihyan che ndahco Dendiohs vederihquentiyon tah ye cava che teche cade ye yahn nducoyaca ihyan che chenduche ye man, che ndih ye man.

⁴³ A yahn ihyan min che dirun nducoyaca ihyan profeta nde a rahn me. Dirun ye te nducoyaca ihyan che cotahño ye ihyan min ne, nchahco Dendiohs nunde yahn ye che cuande yahn ihyan min.

⁴⁴ Nde metah cuihño cuahndudo Pedro cuahn che quenun Vaco Ndah yahn Dendiohs nducoyaca ihyan che rihnevan ye ndudo me.

⁴⁵ Ihyan nación yahn Israel che ritahño ye Dihvo vo che nduco ye Pedro ne, ama cuahn ino ye chi yahn che quenun Vaco Ndah yahn Dendiohs nde ihyan tama nación.

⁴⁶ Devano cuaco ye te quenun Vaco Ndah yahn Dendiohs ihyan chahn, te rente ye tama te o nan devaco man, rendeva ye yavenan Dendiohs man.

⁴⁷ Chemin che rahn Pedro:

—¿A va duh che cahco tan che cuedenune ihyan chuhn?, te a quenun Vaco Ndah yahn Dendiohs ihyan nduhca che quenun uvo.

⁴⁸ Tuhme chihquentiyon ye che cuedenune ihyan chahn, cuah ye Dihvo vo Jesucristo. Chihño min ne, chica ihyan chahn favor Pedro che conan ye neve ro nduco vih.

11

Necah cuande Pedro ihyan ndiyaco che vate ye yan Jerusalén

¹ Ihyan apóstol chahn nduco ihyan che ritahno ye Dihvo vo Jesucristo che vate ye estado yahn Judea ne, checadino ye te nde ihyan tama nación a chitahno ye Ndudo yahn Dendiohs.

² Cuahn che nta Pedro yan Jerusalén ne, ihyan nación yahn Israel che ritahno ye Dihvo vo ne, rahva ye nduco ye.

³ Tumerune ihyan chahn:

—¿Dehco che chehn vaco ihyan tama nación, cheh dama nduco ye ne?

⁴ Tuhme necah cuande Pedro ihyan chahn nducuahñ che chi:

⁵ —Ama ro cuahn che quenán yan Jope ne, ura che reváh ne, chinahn ama vederihno nan. Ndiheró ama che deca ro tino chahte tuhca ro, ne nechiche nduh che cun esquina yahn, chica nan ro, cochahn cuaco nan che quenún.

⁶ Cuahn che chihco ndah cudado deh chenun chete ne, ndihcheró ite che cun cah te man, ite chano man, cu man, yahda man,

⁷ ne chihneván ndudo che rahñ: “Pedro, cuihne ite sih, coheh ite.”

⁸ Ate ndahconán: “Dihvé, hua, te nde menahn metah chéh nde ama ite che chihnga te.”

⁹ Tuhme ndaconan ndudo me nde nan ro: “Cha che u, Dendiohs, a nedin davé ne, hua quendi ndedecadine che chihnga.”

¹⁰ Ino co ndaconan chinahn vederihno me nan, ne conda cuahn nan ro.

¹¹ A ura min no nda ino se che rinuhn se u, che chica se nde yan Cesarea.

¹² Chihquentiyon Vaco Dendiohs che hua dehve rahcó, cahn nduco se. Namin an dino vo chuhn ne, chinduco ye u, chahn nuhn vaco ama sahn,

¹³ che nte cuande se nuhn che ndihchero se ama ángel che chandi ye, chihto nan se ndevaco se, ne tuhca rahñ ye ri ye sahn: “Cuedechoh che ngua Simón che namin duche ye Pedro, quenán ye yan Jope.

¹⁴ Ihyan min cahma ye co ye di nduco ihyan yehn deh va che din nchuhn cava che ndevahn ne.”

¹⁵ Cuahn che chihno nte sahn min ne, canan cahndudó. Ate numanahn che cahndudó ne, adenán quenun Vaco Ndah yahn Dendiohs ihyan chahn nduhca che quenun uvo ro menan me.

¹⁶ Tuhme necahcó che rahñ Dihvo vo: “Juan ne, chehdenune ye ihyan, ate nchuhn ne, conun Vaco Ndah yahn Dendiohs nchuhn.”

¹⁷ Nducote man Dendiohs din ye nduco ihyan chahn nduhca che din ye nduco uvo che chitahno vo Dihvo vo Jesucristo ne, ¿duh u cava che din vahché yahn Dendiohs?

¹⁸ Cuahn che chihnevan ihyan chahn ne, chahtediñ chende ye, ne ndeva ye yavenan Dendiohs, ne rahñ ye: “Tuhme ne, rahnecon Dendiohs che nto ino ihyan tama nación nunde yahn ye, cuahtenan ye vahchetero numacuahn ro.”

Ihyan yan Antioquía che ritahno ye Dihvo vo Jesucristo

¹⁹ Cuahn che chuh che chih Esteban ne, canan redin tan ihyan nduco ihyan che ritahno ye Dihvo vo, ne chano ihyan chahn. Nahn ye ne, cuahn ye nde nación yahn Fenicia man, Chipre man, yan Antioquía man. Min chacotuhn ye Ndudo yahn Dendiohs atenan van ihyan nación yahn Israel, te van ihyan tama nación ne, hua chacotuhn ye ndudo me.

²⁰ Ate neve ihyan nación yahn Chipre man, yan Cirene man, cuahn ye yan Antioquía, ne ihyan chahn chacotuhn ye ndudo ndah yahn Dihvo vo Jesucristo nde van ihyan tama nación.

²¹ Nducote chenan cuma ihyan chahn vederihquentiyon yahn Dihvo vo ne, ama yahn ihyan chihcoman ye dehtenduh che ritahno ye ro menan me, ne chitahno ye Dihvo vo.

²² Cuahn che checadino ihyan che ritahno ye Dihvo vo che chenan ye yan Jerusalén ne, dechuh ye Bernabé nde yan Antioquia.

²³ Cuahn che nda Bernabé min ne, ndihchero ye che ama va vedeyahino yahn Dendiohs van ihyan chahn, ne ama chi yeno ye. Yahve ye ihyan chahn che quendi ye numa ino ye vederihquentiyon yahn Dihvo vo.

²⁴ Tihca din Bernabé, te ama ndah ihyan ye man, quenun Vaco Ndah yahn Dendiohs ihyan man, numa ino ye ritahno ye man. Yan min ne, ama yahn ihyan chitahno ye Dihvo vo.

²⁵ Chihno min ne, cuahn Bernabé yan Tarso, ngua ye Saulo. Cuahn che ntaca ye ihyan ne, ndaconan ye nduco vih yan Antioquia.

²⁶ Min chahtenan ye ama nduyo nduco ihyan che ritahno ye Dihvo vo, chicuahn ye ama yahn ihyan. Min yan Antioquia cade canan ihyan rahn ye yahn ihyan che ritahno ye Dihvo vo Jesucristo te cristiano ye.

²⁷ Tahn min ne, ama o ihyan che recadino ye yahn che va che co ne, chica ye yan Jerusalén, ne nda ye min yan Antioquia.

²⁸ Ama cha ihyan chahn che duche ye Agabo ne, din Vaco Dendiohs che checadino ye che ama cuhnde cuico numachahte iyehnse. Chandi ihyan min nan ihyan che ritahno ye Dihvo vo, ne rahn ye che tihca va che co. Ndudo min ne, chinahn adiva cuahn que quenan Claudio emperador.

²⁹ Tuhme ihyan che ritahno ye Dihvo vo Jesucristo che vate ye min yan Antioquia ne, nte cade ye nduco vih che nedin dama ye tume nduhva che tuno tah ye, dechuh ye yahn dihno vo che vate ye estado yahn Judea cava che conan ye ihyan.

³⁰ Tihca din ihyan chahn, ne dechuh ye Bernabé nduco Saulo, quenda ye tume me, necah ye tah intiyahn yaco che vate ye min.

12

Chihno se Jacobo man, chaconuhn se Pedro vacoyahn man

¹ Tahn min ne, redin tan rey Herodes nduco ihyan che ritahno ye Dihvo vo Jesucristo.

² Jacobo, dihno Juan ne, chihquentiyon rey me che chihno se ihyan nduco espada,

³ ne nducote ndihchero se che quenan ino ihyan naci6n yahn Israel ne, namin din se preso Pedro. Ro che tihca din se ne, ro vihco che reh ihyan pan che hua nduco ya yahn.

⁴ Cuahn che a din se preso Pedro ne, chaconuhn se ihyan vacoyahn, ne ntihyon ama sandado chahtenan se cudado ihyan, te chuh vihco me ne, nahn tendah se ihyan, techecade se yahn ye, ne cahno se ihyan nan ihyan yan.

⁵ Ama vateyan sandado che redin se cudado Pedro che quenun ye vacoyahn, ne ihyan che ritahno ye Dihvo vo ne, revah ye numa ino ye cava ye.

Din Dendiohs che ndiquendah Pedro vacoyahn

⁶ Vino che co dave tama ro me che nahn tendah Herodes Pedro nan ihyan yan ne, quiyado ye chete vacoyahn me mendahn yahn o sandado, nchiche ye nduco o cadena. Sandado chengahn chahn ne, redin se cudado chende vacoyahn me.

⁷ Adenān chenda ama ángel yahn Dihvo vo Dendiohs chete vacoyahn me, ne ama chiya dave. Denuhn nun ángel me Pedro, ndedetuhche ye ihyan, ne rahn ye ri ye ihyan:

—Cuenequen tenun tenun no.

Ndetahn ntahte cadena che nchiche tah Pedro,

⁸ ne rahn ángel me:

—Condahco chiche ima che renan chete, ne condonun cah ndaco yehn.

Cuahn che a va yan Pedro ne, ndaconan rahn ángel me:

—Condonon tino tu yehn, ne cuiquendi u, cuhn vo.

⁹ Pedro ne, quendi ye ángel me, nde hua devano ye a cuaco chemin, te rihno ye che rahco ye.

¹⁰ Chuh ye o cuan nan che chenun sandado, redin se cudado, ne cuahn che nda ye chendevah cu che a renda nan calle ne, nane man chendevah me. Ndiquendah ye, chica ca ye tah, ne conahn ángel me.

¹¹ Tuhme chenahn Pedro, ne ndedecadino ye:

—Man ne, a devano cuaco te Dendiohs tahve ye ama ángel yahn ye cava che ndedevahn ye u tah Herodes man, yahn nducuah che chenan ino ihyan nación yahn Israel che cuahno có man.

¹² Pedro ne, ca rendedecadino ye yahn che tihca chi, ca rica ye, cuahn ye ndevaco María, chaco Juan Marcos. Min ndi dama ama yahn ihyan, revah ye.

¹³ Cuahn che nda ye min ne, recah tah ye chendevah chahte man, riyahve ye man. Cuahn ama tahn dihn che duche te Rode, quendihchero te duh che riyahve.

¹⁴ Ate cuahn che ndonahn te ndudo Pedro ne, nducote ama yeno te ne, nde hua nahne te chendevah me. Ndaconan te, rano te, ngu te ndudo che nti Pedro chendevah.

¹⁵ Ihyan chahn ne, rahn ye ri ye tahn:

—¡Luco ri di, tahn dihn!

Ate tahn min ne, rahn te te cuaco che ihyan min. Tuhme rahn ihyan chahn:

—Ndiyuh ihyan min. Co ángel che redin cudado ihyan.

¹⁶ Numanahmin ne, quendi Pedro, recah tah ye chendevah. Cuahn ihyan chahn nahne ye chendevah me, ne cuahn che ndihchero ye Pedro ne, ama cuahn ino ye chi.

¹⁷ Ate din tah Pedro yahn ihyan chahn che cuahte dihn chende ye nahmin che necah cuande ye nduhca che ndetendah Dendiohs ihyan vacoyahn. Namin rahn ye:

—Cahma nchuhn co ne Jacobo man, dihno vo chenahn man, nduhca che chi.

Tuhme chica ye min, cuahn ye tama cuan.

¹⁸ Cuahn che chi dave tama ro me ne, a ri rite co luco sandado chahn, te hua devano se deh chi nduco Pedro.

¹⁹ Herodes ne, dechuh ye che chinuhn Pedro, ne nducote hua ntaca ihyan ne, chica ye sahn chahn che necah cuande se ihyan deh chi. Tuhme chihquentiyon ye sandado chenahn che cahno se sahn. Chihno min ne, chica Herodes min estado yahn Judea, ne cuahn ye quenān ye yan Cesarea.

Chih Herodes

²⁰ Herodes ne, tan ye nduco ihyan yan Tiro man, ihyan yan Sidon man, ate ihyan chahn ne, ntuho ye cava che chahn ye nan Herodes. Yahve ye ama sahn ndinan yahn rey me che duche se Blasto, che cahma nan se ihyan, cava

che ndoyan rey me nduco ye. Tihcā din ihyan chahn, te nān yañn yahn rey me, rica dehtenduh che reh ye.

²¹ Herodes ne, chihco vih ye ama ro cava che ndo dama ihyan chahn, ne nda ro min ne, ndonun ye tino che renun ye ura che retechecade ye. Chihnde ye nān che rihquentiyon ye, ne cahndudo ye, chihnevan ihyan chahn.

²² Tuhme rendeva ihyan chahn yavenān rey me, ne rah ye:

—Ihyan tih che rahndudo ye ne, jndiyu ihyan iyehñse ye, te Dendiohs ye!

²³ A ura min no chiya ama ángel yahn Dendiohs, ne din ye che chetañ cah Herodes. Chine ndah ihyan, ne ama yah vederih chih ye, te cah yune ye che ndeva ihyan yavenān ye, nduhcā ndete che ihyan min che Dendiohs.

²⁴ Tahñ min ne, ama retuhn ndudo yahn Dihvo vo Jesucristo, ri yañn ihyan che ritahno ye.

²⁵ Cuahn che a dinahn Bernabé nduco Saulo ntiyon che chahn ye ne, ndaca ye yañ Jerusalén, conañ ye yañ Antioquía, quenda nduco ye Juān Marcos.

13

Bernabé nduco Saulo ne, canañ chahtechica ye cahndudo ye

¹ Vañ ihyan che ritahno ye Dihvo vo Jesucristo, che vate ye yañ Antioquía ne, chenun vañ ihyan che rahndudo ye Ndudo yahn Dendiohs mañ, ihyan ricuañ mañ. Ihyan chahn ne, Bernabé mañ, Saulo mañ, Simón cuan mañ, Lucio yahn yañ Cirene mañ, Manaén mañ, ihyan min che chihta ye dama nduco Herodes, gobernador yahn Galilea.

² Ama ro che vate ihyan chahn yahte mañ, revañ ye mañ ne, rañn Vaco Ndah yahn Dendiohs nduco ye:

—Cuedechuh nchuhn Bernabé nduco Saulo che cañ se, din se ntiyon che a necañ che din se.

³ Tuhme chahte tun ihyan chahn yahte, ne covañ ye. Chihno min ne, nahn tañ ye ihyan che o chahn cava che nuhnde tañ ye ntiyon min, ne dechuh ye ihyan, cuahn ye.

Cahndudo ihyan apóstol yañn yahn Chipre

⁴ Bernabé nduco Saulo ne, cuahn ye yañ Seleucia nduhcā che chihquentiyon Vaco Ndah yahn Dendiohs. Min chahtenun ye ama barco, ne cuahn ye yañn yahn Chipre.

⁵ Cuahn che nda ihyan chahn yañ Salamina ne, canañ rahndudo ye Ndudo yahn Dendiohs chete yaço. Juān Marcos ne, nduco se ihyan chahn, rinan se ihyan.

⁶ Chahtechica ye numachahte yañ min, ne nda ye yañ Pafos. Min ntaca ye ama sañn, ndata yahn Israel, che duche se Barjesús. Sañn min ne, cuah se, ne redin ca se che Dendiohs rinan ye sañn.

⁷ Nduco se gobernador Sergio Paulo, ama ihyan che renahn ye. Ihyan min ne, tahve ye che chehua Bernabé nduco Saulo, te nahn cahnevan ye Ndudo yahn Dendiohs.

⁸ Ate sañn cuah me, che namin duche se Elimas ne, redin vañche se yahn ihyan chahn, te hua nahn se che cotahno gobernador me.

⁹ Tuhme Saulo, che namin duche ye Pablo ne, quenun Vaco Ndah yahn Dendiohs ihyan. Ndihche ro ndah ye sañn,

¹⁰ ne rañva ye nduco se:

—Di, jdaya chundah! ¡Ama duhtuno ihyan di! ¡Ndere quechique, rihñneh! ¡Hua renan ine nde ama dehtenduh che ndah! ¿Dehco che hua reguen, redetohnen vederihquentiyon yahn Dendiohs?

11 Man ne, Dendiohs din ye castigo di. Co ve nan, ne hua co ro nan.

Ndetahno chiya man nan se, ametah chi ro nan se. Canan rinuhn tah se duh che quendanan sahn, te hua ro nan se.

12 Cuahn che ndihchero gobernador me che tihca chi ne, chitahno ye Dihvo vo Jesucristo, te ama rahn ino ye yahn ndudo yahn Dihvo vo che ricuahn ihyan chahn.

Pablo nduco Bernabé ne, nda ye yan Antioquía, yahn yahn Pisidia

13 Pablo nduco combiero yahn ye ne, chahtenun ye ama barco, ne chica ye yan Pafos, nda ye yan Perge, yahn yahn Panfilia. Juan Marcos ne, chihcoman se ihyan chahn, ne conahn se yan Jerusalén.

14 Ihyan chahn ne, quendi ye yune yahn ye, chica ye yan Perge, ne nda ye yan Antioquía, yahn yahn Pisidia. Ama ro che rahte tuhno ihyan ne, chenda ye chete yaco yahn ihyan nación yahn Israel, chahte ye.

15 Cuahn che a chihno cahndudo ihyan ley che dirun Moisés man, ndudo che dirun profeta man ne, ihyan ndinan yahn yaco me ne, dechuh ye ndudo yahn ihyan chahn:

—Dihno nuhn, ndete che va ndudo che cahma ne nduco ihyan ne, co cahma ne meniyon.

16 Tuhme necuan Pablo, ne din tah ye che cahteyan ihyan chahn, ne cahndudo ye:

—Nchuhn, ndata yahn Israel, che rendeva ne yavenan Dendiohs, cuihnevan ne.

17 Dendiohs yahn nación yuhn vo Israel ne, tendahnun ye ihyan ndico yuhn vo. Cuahn che chenan ca ihyan chahn nación yahn Egipto ne, din ye che ama chi yahn ye, ne ndetendah ye ihyan numacuahn vederihquentiyon yahn ye.

18 Cuahn che chenan ihyan chahn yahn nan che metah duhva ne, din chahtino Dendiohs yahn ye tenduh o raco nduyo,

19 ne decuihno ye ndache nación min yahn yahn Canaán, ne cah ye yahn min ihyan chahn.

20 Canan nde ro min, chete che cun ciento quenan o raco ndiche nduyo, nde ro che quenan ihyan profeta Samuel ne, raconahn Dendiohs juez che rihquentiyon ye ihyan chahn.

21 Tuhme chica ihyan chahn ama rey cava che cahcantiyon ye ihyan, ne cahnecun Dendiohs. Chaconahn ye Saúl, daya Cis, ndata yahn Benjamín, cava che co se rey yahn ihyan chahn o raco nduyo.

22 Cuahn che tuno ro ne, Dendiohs ne, chehnevi ye Saúl. Cah ye vederihquentiyon me David, ne rahn ye: “David, daya Isaí ne, ama sahn che renevahnecun se che náhn, ne dinahn se nducuahn che cahcantiyón.”

23 Van ndata yahn David ne, ndedecuan Dendiohs Jesucristo, nduhca che a cah ye ndudo yahn ye cava che ndedevahn ye ihyan nación yahn Israel.

24 Numanahn che metah nda Jesucristo ne, nda Juan, cahndudo ye che nto ino nducoyaca ihyan nación yahn Israel nunde yahn ye, ne cuedenune ye.

25 Cuahn che a nino cuihno ntiyon yahn Juan ne, rahn ye: “Co rahco nchuhn te u ne, ihyan che chenan rino ne, ate ndiyu u, te adive ne, cochi ama ihyan che ama yudo vederihquentiyon yahn ye. U ne, nde hua rignonun chihve u cava che co mozo yahn ihyan min, ntahte correa yahn ndaco yahn ye.”

26 Nchuhn dihnó, ndata yahn Abraham, che rendeva ne yavenan Dendiohs, a dechuh ye ndudo cuh yahn ne cava che ndevahn ne.

²⁷ Ihyan van Jerusalén nduco ihyan ndinan yahn ye ne, hua checadino cuaco ye deh vederihquentiyon quenan cuma Dihvo vo Jesucristo, nde hua chenahn ye che dirun ihyan profeta, andahre ndate ndate, ro che rahtetuhno ihyan, rihnevan ye ndudo min, rahndudo ihyan chete yaco. Chemin che chihco cade ye che cahno se ihyan min, ne nduco chemin chinahn nducuahn che dirun ihyan profeta chahn.

²⁸ Andahre metah nde ama nunde yahn Dihvo vo, ate chica ihyan chahn che cahcantiyon Pilato che cahno sandado ihyan.

²⁹ Cuahn che a din ihyan chahn nducuahn che a va cade che cuahno Dihvo vo co, nduhca che a ndirun nan Ndudo yahn Dendiohs ne, ndedevah ye ihyan nan cruz, ne chacondihte ye ihyan chete ama yayan.

³⁰ Ate Dendiohs ne, ndedetuhche ye ihyan van tenahn,

³¹ ne ama ndeh ro chinduco ye ihyan che chica ye estado yahn Galilea, nda ye nduco ye van Jerusalén. Man ne, a ihyan chahn che racotuhn ye ndudo yahn ihyan min van nducoyaca ihyan.

³² Namin nuhn ne, rahndudo nuhn nan nchuhn yahn ndudo ndah che cah Dendiohs ihyan ndico yuhn vo.

³³ Man ne, a dinahn Dendiohs ndudo min, te a ndedetuhche ye Dihvo vo Jesucristo cava uvo, nduhca che a ndirun nan Salmo o tuhca: “Di che Dayá. Man ro cuh ne, a chihco ró di nan nducoyaca ihyan, cava che codevano ye te Daya man di.”

³⁴ Namin tama cuan nan Ndudo yahn Dendiohs a ndirun tuhca: “U, Dendiohs, din yahinó nchuhn nduhca che a cah ndudo yahn David.” Nduco ndudo cuh ne, chihco ro ye che ndedetuhche ye Dihvo vo Jesucristo van tenahn cava che hua cha ye.

³⁵ Namin va tama ndudo che ndirun nan tama Salmo tuhca: “Hua cuahne-cun ne che cha Daya ne.”

³⁶ Me David ne, a devano vo che, nduhca che chihquentiyon Dendiohs ne, chichihve ye nan ihyan che vate ye ro che quenan ye iyehense. Tuno ro yahn ye ne, namin chih ye nduhca ihyan ndico yahn ye, ne cha ye.

³⁷ Ate ihyan min che ndedetuhche Dendiohs ihyan ne, hua cha ye.

³⁸ Nchuhn, dihnó, cuedevano ne te che cuande yahn ihyan min ne, co ndaca ne vederenchahco yahn nunde yahn ne. Chu che rahndudo nuhn nan ne.

³⁹ Che cuande yahn Dihvo vo Jesucristo ne, nducoyaca ihyan che ritahno ye ihyan ne, rendaca ye vederenchahco yahn nunde yahn ye, che hua ndaca ihyan ro che rihquentiyon ley che dirun Moisés.

⁴⁰ Man ne, cuihco nchuhn cudado che hua conahn nduco ne nduhca che dirun ama cha ihyan profeta tuhca:

⁴¹ Nchuhn che duche rino ne, condihche ne.

Cuahn ino ne, ne cuih ne, te ro che vate ne ne, u, Dendiohs, din vederihno rahte, che nde hua cotahno ne, andahre cahma ihyan co ye nchuhn.

⁴² Cuahn che ndiquendah Pablo nduco combiero yahn ye chete yaco me ne, ihyan che hua ndata yahn Israel ne, chica ye che ndaconan cuahndudo ye yahn dehtenduh che tuhchan, ndate che tama, ro che rahtetuhno ihyan.

⁴³ Cuahn che a conahn ihyan ne, ama yahn ihyan nación yahn Israel man, ihyan tama nación man, che ritahno ye numa ino ye nduco vih ne, cuahn ye nduco Pablo nduco Bernabé. Ama riyahve ye ihyan chahn che quendi ye numa ino ye, cotahno ye, ne hua cahcoman ye Dendiohs, ihyan min che redin yahino ye ihyan.

⁴⁴ Tama ndate me, ro che rahtetuhno ihyan ne, ndo dama a nahn numa yan, ihyan che nahn cahnevan ye Ndudo yahn Dendiohs.

⁴⁵ Ate cuahn che ndihchero ihyan nación yahn Israel chahn che ama yahn ihyan ne, chi ve ye, ne canan ruhn chende ye nduco Pablo man, rahn tan ye man.

⁴⁶ Tuhme Pablo nduco Bernabé ne, numa ino ye rahn ye ri ye ihyan chahn: —Nchuhn, ihyan nación yahn Israel, a cava nchuhn menan vihca che rahndudo nuhn Ndudo yahn Dendiohs. Ate man ne, nducote hua nahn nevahnevan nchuhn man, rahco ne te dehve rendotenan ne man ne, cahcoman nuhn nchuhn, ne cuahndudo nuhn, cahnevan ihyan tama nación.

⁴⁷ Va che dinahn nuhn nduhca che chihquentiyon Dihvo vo Jesucristo nuhn tuhca:

Tendah nún di cava che cuahndode ndudo yahn van ihyan nducuahn nación. Nde numachahte iyehanse, nducoyaca ihyan che nevahnevan ye ndudo yahn, ndevahn ye.

⁴⁸ Cuahn che chihnevan ihyan tama nación che chenun ye min che tihca rahn ihyan chahn ne, ama chi yeno ye, ne nevahnevan ye ndudo yahn Dihvo vo Jesucristo. Van ihyan chahn ne, chitahno nducoyaca ihyan che a va cade che cuahtenan ye vahchetero numacuahn ro.

⁴⁹ Tihca chetuhn ndudo yahn Dihvo vo numachahte yahn min.

⁵⁰ Ate ihyan nación yahn Israel chahn ne, chinun ye ama o sahn rahn nduco ama o tahn ndahta che ndah ihyan te, che renevahnevan ihyan yan tahn. Tihca ndedecuan ihyan chahn ihyan che chi tan ye nduco Pablo nduco Bernabé nde cande che ndetendah ye ihyan yahn min.

⁵¹ Tuhme chihde ihyan chahn ndaco yahn ye, chihtera ye yuniyahn cava che nahma ye ihyan yan min te hua ndahca din ye che hua nevahnevan ye Ndudo yahn Dendiohs, ne cuahn ye yan Iconio.

⁵² Me ihyan che ritahno ye Dihvo vo Jesucristo ne, ama yeno ye, ne quenun Vaco Ndah yahn Dendiohs ihyan.

14

Pablo nduco Bernabé ne, nda ye yan Iconio

¹ Cuahn che nda Pablo nduco Bernabé yan Iconio ne, chenda ye chete yaco, ne ama ndahca cahndudo ye. Chemin che ama yahn ihyan nación yahn Israel man, ihyan tama nación man, chitahno ye.

² Ate ihyan nación yahn Israel che hua chitahno ye ne, chinun ye ihyan tama nación che ametah cotahno ye, cava che ndihche tan ye ihyan che ritahno ye Dihvo vo Jesucristo.

³ Ama rahn chahtenan ihyan chahn min, ne rahndudo ye numa ino ye, chenun ino ye Dendiohs. Dendiohs ne, redin ye che renahn ihyan te cuaco che yahino ye ihyan iyehanse nduhca che rahndudo ihyan chahn, te cah ye vederihquentiyon ihyan cava che din ye vederihno.

⁴ Ihyan yan min ne, o cuan ndi ye. Ama cuan ye ne, rinduco ye ihyan nación yahn Israel, ne tama cuan ye ne, rinduco ye ihyan apóstol chahn.

⁵ Tuhme ihyan nación yahn Israel chahn nduco ihyan tama nación ne, ntuho ye nduco intiyahn cava che din tan ye nduco ihyan apóstol chahn, cah ye tu ihyan.

⁶ Ate Pablo nduco Bernabé ne, checadino ye, ne chano ye, cuahn ye yahn yahn Licaonia, yan Listra man, yan Derbe man, nduh cuan nan che nino man.

⁷ Min chahtechica ye, cahndudo ye Ndudo yahn Dendiohs.

Ihyan yan Listra ne, cah ye tu Pablo

⁸ Min yan Listra va ama sahn che nenevadoh cah se nde ro che chihndeyan se, nde tah hua ri rica se.

⁹ Sahn min ne, va se, rihnevan se che rahndudo Pablo. Ndihchero ndah ye sahn, ne checadino ye te ritahno se che co din Dendiohs che ndoyahn se.

¹⁰ Tuhme cah ye yahn se:

—Cuenequen, cuandi cuaque.

Ndetahno chandi cuaço se, ne canan rica se.

¹¹ Cuahn che ndihchero ihyan yan vederihno che din Pablo ne, nduco devaço yahn man ye, devaço yahn Licaonia ne, rah ye:

—O dendiohs yuhn vo, ndaconda ye ihyan, chiya ye iyehmse.

¹² Rahn ihyan chahn te Bernabé ne, dendiohs yahn ye che duche ye Júpiter, ne Pablo ne, Mercurio, te ihyan min che rahndudo ye.

¹³ Chidocuyan yahn Júpiter che nti yaco yahn ye chihto yan me ne, nda ye, nda ye nanda man, itenine man, cava che cahno ye ite che co te vedino, ndeva ye nduco ihyan yan chahn yavenan Bernabé nduco Pablo.

¹⁴ Cuahn che checadino ihyan apóstol chahn che tihca ne, canan rendeh ye tino yahn ye cava che nahma ye che hua tihca din ihyan chahn, ne chenda ye van nducoyaca ye, rah ye:

¹⁵ —¿Dehco che tihca redin nchuhn?, te nuhn ne, ihyan iyehmse nuhn nduhca nchuhn. A cava chemin che cochi nuhn, cahma nuhn nduco ne che cahcoman ne dehtenduh che tihchan che hua cochihve, ne cotahno ne Dendiohs, ihyan min che quenduche ye. A ihyan min che dendah ye nan ro man, iyehmse man, nuniyahn man, nducuahn che va man.

¹⁶ Ro menan me ne, cah yune ye che quendi ihyan yune yahn man ye.

¹⁷ Ate hua chihcoman ye ihyan, te din ye che ndah nduco ye, chihco ro ye vedeyahino yahn ye. A Ihyan min che redin ye che ran co man, che ndah ri chendata man. Rihquechey ye uvo man, renecah yan ye chedave yuhn vo man.

¹⁸ Andahre tihca rahn Pablo man, Bernabé man, ate aconunde cuahn chicade chica tan ye che cahno ihyan yan chahn itenine che co te vedino, che ndeva ye yavenan ye.

¹⁹ Tuhme nda neve ihyan, ndata yahn Israel, che chica ye yan Antioquia man, yan Iconio man, chinun ye ihyan yan, ne cah ye tu Pablo. Chihno min ne, co a ndih Pablo rahco ihyan chahn, ne chihnda rudo ye ihyan nde cuahn chihto yan.

²⁰ Ate ura che ndi dama ihyan che ritahno ye Dihvo vo nan Pablo ne, necuan ye, ne conahn ye viyan nduco vih. Tama ro me ne, chica ye min nduco Bernabé, nda ye yan Derbe.

²¹ Min cahndudo ye Ndudo yahn Dendiohs, ne ama yahn ihyan chitahno ye Dihvo vo. Chihno min ne, ndaconan ye, nchuh ye yan Listra man, yan Iconio man, nta ye yan Antioquia.

²² Queri ama yan nan che nchuh ye ne, renecah yan ye chedave yahn ihyan che ritahno ye Dihvo vo, ne riyahve ye ihyan che quendi cotahno ye numa ino ye. Rahn ye ri ye ihyan chahn te va che ama chuhrihn ye muhn iyehmse, ate adive ne, cuahtenan ye vahchetero.

²³ Namin tendah nun ye neve ihyan queri ama cuan cava che co ye intiyahn yaco. Covah ye man, chahte ye yahte man, ne ndahco ye nducoyaca ihyan chahn che ritahno ye Dihvo vo tah Dendiohs.

Pablo nduco Bernabé ne, conahn ye yan Antioquia, yahn yahn Siria

²⁴ Chihno min ne, nchuh ihyan chahn yahn yahn Pisidia, ne nda ye yahn yahn Panfilia.

²⁵ Cahndudo ye Ndudo yahn Dendiohs yan Perge, tuhme cuahn ye yan Atalia.

²⁶ Chahtenun ye ama barco, chica ye min, conahn ye yan Antioquia, a yan min che ndahco intiyanh yaco ihyan chahn tah Dendiohs che ama va vedeyahino yahn ye, cava che cahñ ye nan ntiyon che man ne, a dinahn ye.

²⁷ Cuahn che a nta ye ne, nedin dama ye nducoyaca ihyan che ritahno ye Dihvo vo, ne necah cuande ye ihyan chahn nducuahñ che din Dendiohs nduco ye man, nduhca che din Dendiohs che chitahno ihyan tama naciñ man.

²⁸ Pablo nduco Bernabé ne, ama rahñ chahtenun ye yan min nduco ihyan che ritahno ye Dihvo vo.

15

Chi ama junta yan Jerusalén

¹ Tahñ min ne, ama o sahn che chica se estado yahn Judea, nda se yan Antioquia ne, min chicuahñ se ihyan che ritahno ye Dihvo vo te cava che co ndevahn ye ne, va che conan seña ihyan nduhca che chihquentiyon Moisés.

² Pablo nduco Bernabé ne, riyahve ye sahn chahn che ndiyu tihca, ate ama chahtecuhn chende se nduco ye. Nducote hua chi chihnde cade min ne, nte cade ihyan che ritahno ye Dihvo vo che dechuh ye ihyan chahn nduco tama te o ihyan yan Jerusalén cava che nte cade ye nduco ihyan apóstol man, intiyanh yaco man.

³ Chica ihyan chahn yan Antioquia, chuh ye naciñ yahn Fenicia man, Samaria man, renecah cuande ye ihyan che ritahno ye Dihvo vo che vate ye min, nduhca che chihcomañ ihyan tama naciñ dehtenduh che ritahno ye menañ, ne chitahno ye Dendiohs. Nducoyaca ihyan che chihnevan ye ndudo me ne, ama chi yeno ye.

⁴ Cuahn che nda Pablo nduco Bernabé min yan Jerusalén ne, nducoyaca ihyan ndiyaco man, ihyan apóstol man, intiyanh yaco man, nevahñecun ye ihyan. Tuhme Pablo nduco Bernabé necah cuande ye ihyan chahn yahn nducuahñ che din Dendiohs nduco ye.

⁵ Ate ama o sahn fariseo che namin ritahno se Dihvo vo ne, chahtendi se, ne rahñ se:

—Va che conan seña ihyan tama naciñ che ritahno ye Dihvo vo man, va che dinahn ye ley che dirun Moisés man.

⁶ Tuhme ndodama ihyan apóstol chahn nduco intiyanh yaco cava che nte cade ye yahn chemin.

⁷ Cuahn che a ama ndeh rente ihyan chahn ne, chandi Pedro, ne rahñ ye: —Dihno, a devano nchuhn te a rahñ ne, van uvo ne, tendah nun Dendiohs u cava che cuahndudó Ndudo yahn ye, cahnevan ihyan tama naciñ, ne cotahno ye.

⁸ Dendiohs che rendihche ye chedave yahn nducoyaca ihyan ne, te ye, checadino vo che ndeva ye ihyan chahn, te din ye che quenun Vaco Ndah yahn ye ihyan, nduhca che quenun uvo.

⁹ Dendiohs ne, dama no yahino ye uvo nduco ihyan chahn, te namin ihyan chahn ne, nchahco ye nunde yahn ye yahn che chitahno ye.

¹⁰ ¿Dehco che retumarande nchuhn Dendiohs? Che tihca rihquentiyon ne ne, recah rihñ ne ihyan tama naciñ che ritahno ye Dihvo vo, te nducuahñ che nahñ ne che dinahn ye ne, nde ihyan ndico yuhn vo, nde man vo, hua chi dinahn vo.

11 A devano vo te demañ nduco vedeyahino yahn Dihvo vo Jesucristo che ndevahn vo man, ihyan chahn man.

12 Tuhme chahtediñ chende ihyan, ne chihcovan ye che necah cuande Pablo nduco Bernabé yahn vederihno che din Dendiohs nduco ye van ihyan tama nación.

13 Cuañ che chihno nte ihyan chahn ne, necuandi Jacobo, ne rahn ye:

—Dihno, cuihcovan nchuhn che cahmá.

14 Simón Pedro ne, a neco ye uvo nduhca che din yahino Dendiohs ihyan tama nación, ne tendah nun ye van ihyan chahn, ihyan che co yahn ye.

15 Tihca va che co, te a tihca dirun ama cha ihyan profeta tuhca:

16 Rahn Dendiohs: “Cuihno min ne, ndaconán, ne ndahco cadé vederihquentiyon yahn David che va man.

Dín che ndaconan ndo chahte man, che cahcantiyon man man,

17 cava che ihyan yahn nducuahn nación che a tendahnún ne, cotahno ye u che Dihve ye.”

18 Tihca rahn Dihvo vo Dendiohs, te ye, checadino vo dehtenduh che tuhchan nde a rahn me.

19 Chemin che rahn te hua ndahca che cah rihñ vo ihyan nación chenahn che a chihcomañ ye dehtenduh che ritahno ye ro menañ me, ne chitahno ye Dendiohs.

20 Tahque ndahca che dirun vo yahn ye che hua cheh ye che rihco ihyan nan che rahn ye dendiohs yahn ye man, che hua cheh ye yute yahn ite che hua ra yun yahn te man, che hua cheh ye yun man, che hua ndere cuahtenan ye nduco ndahta che ndiyu ndahta yahn ye man.

21 Tihca din vo, te nducuahn yan, nde a rahn me, ndate ndate, ro che rahtetuhno ihyan ne, rahndudo ihyan ley che dirun Moisés, ne hua ndahca che din vo che co ndache ihyan che riquendi ye ley min.

22 Tuhme ihyan apóstol man, intiyahn yaco man, nducoyaca ihyan chenahn che ritahno ye Dihvo vo man ne, nte cade ye, ne tendahnun ye o ihyan cava che dechuh ye ihyan nduco Pablo man, Bernabé man, yan Antioquía. Quendah yahn o ihyan che namin ndinañ ye van ihyan che ritahno ye Dihvo vo. Ama ye ne, Judas, che namin duche ye Barsabás, ne tama ye ne, duche ye Silas.

23 Nduco ihyan chahn ne, dechuh ye ama cava nan che dirun ye:

“Nuhn, ihyan apóstol man, intiyahn yaco man, nducoyaca ihyan chenahn che ritahno ye Dihvo vo man ne, rente nuhn Dendiohs nchuhn, dihno nuhn, ihyan nación chenahn che vate ne yan Antioquía man, yahn yahn Siria man, Cilicia man.

24 Checadino nuhn te ama o ihyan che chica ye muhn, ne nda ye tan ne, redin vahche ye yahn nchuhn man, redetoh ye ino nchuhn man, che ndere ricuahn ye che va che conan seña nchuhn man, dinahn ne ley che dirun Moisés man. Hua ndiyu nuhn che dechuh nuhn ihyan chahn.

25 A nte cade nuhn, ne tendahnun nuhn o dihno vo van nuhn, dechuh nuhn ihyan tan, quendihchero ye nchuhn dama nduco dihno vo che ama yahino vo ihyan, Bernabé man, Pablo man.

26 Ihyan chahn che ndihco mendahn ye ihyan, redin ye ntiyon yahn Dihvo vo.

27 Me ihyan che o che dechuh nuhn ne, Judas man, Silas man. A ihyan chahn che nte cuande ye nchuhn yahn nducuahn che nte cade nuhn.

28 Numacuahn vederihquentiyon yahn Vaco Ndah yahn Dendiohs nte cade nuhn che hua cah rihñ nuhn nchuhn nduco ama ndeh nan dehtenduh. Atenañ dehtenduh che tuhchan, va che dinahn ne.

²⁹ Hua cheh nchuhn yute che rihco ihyan che ri vedino nan dehtenduh che redin ye dendiohs yahn ye man, hua cheh ne yun man, yute yahn ite che hua ra yun yahn te man, hua ndere cuahtenan ne nduco ndahta che ndiyu ndahta yahn man ne man. Ndete che dinahn ne dehtenduh che tuhchan ne, ndahca din ne. Dendiohs conduco ye nchuhn.”

³⁰ Tuhme chica ye min, ne nda ye yan Antioquia. Nedin dama ye nducoyaca ihyan che ritahno ye Dihvo vo, ne necah ye caca me.

³¹ Cuahn che cahndudo ihyan caca me, chihnevan ihyan chahn ne, ama necah yan ye chedave yahn ye, ne chi yeno ye.

³² Judas nduco Silas ne, namin quenan cuma ye vederihquentiyon che rahndudo ye Ndudo yahn Dendiohs, ne cuahn che cahndudo ye, chihnevan ihyan chahn ne, ama necah yan ye chedave yahn ye.

³³ Cuahn che a ndeh ro chahtenan ye min ne, ihyan che ritahno ye Dihvo vo ne, ndedechuh ye ihyan numacuahn vedeyeno yan Jerusalén.

³⁴ Ate Silas ne, quenan ye min yan Antioquia.

³⁵ Namin Pablo man, Bernabé man, chahtenan ye min, ne nduco ama yahn ihyan ne, quendi ye, ricuahn ye ndudo yahn Dihvo vo Jesucristo man, rahndudo ye man.

Chahn Pablo tama yune cahndudo ye

³⁶ Adiva ne, rahn Pablo ri ye Bernabé:

—Cuhn vo tama yune nduco ne, quendihchero vo nducoyaca dihno vo che vate ye nducuahn yan nan che a chahtechico vo, cahndudo vo ndudo yahn Dihvo vo. Ndihchero vo taça chenan ye.

³⁷ Bernabé ne, nahn ye che cahn Juan Marcos, co nduco se ihyan.

³⁸ Ate Pablo ne, rahn ye te hua ndahca che quenda ye sahn yahn che, cuahn che chahn ye menan me ne, chihcoman se ihyan yahn yahn Panfilia, conahn se, ne hua quendi se nduco ye nan ntíyon.

³⁹ Nducote hua chidama ndudo yahn ye nduco vih ne, chihcoman vih ye. Bernabé ne, quenda ye Juan Marcos, ne chahtenun ye ama barco, ne cuahn ye yahn yahn Chipre.

⁴⁰ Me Pablo ne, quenan ino ye che conduco Silas ihyan. Covah ihyan che ritahno ye Dihvo vo cava che numacuahn vedeyahino conduco Dendiohs ihyan, ne cuahn ye.

⁴¹ Chuh ye yahn yahn Siria man, Cilicia man, renecah yan ye chedave yahn ihyan che ritahno ye Dihvo vo.

16

Timoteo ne, chinduco se Pablo nduco Silas

¹ Pablo nduco Silas ne, chuh ye yan Derbe, ne nda ye yan Listra. Min va ama sahn che duche se Timoteo, che ritahno se Dihvo vo Jesucristo. Sahn min ne, daya ama ndahta nación yahn Israel che namin ritahno ye Dihvo vo. Chida se ne, ihyan nación yahn Grecia.

² Ihyan che vate ye yan Listra man, yan Iconio man, che ritahno ye Dihvo vo ne, rahn ye yahn se che ndah ihyan se.

³ Pablo ne, nahn ye che conduco sahn min ihyan, ne nahn ye seña sahn cava che hua co yudo yahn ihyan nación yahn Israel che vate ye yahn min, te nducoyaca ye ne, devano ye te chida se ne, ihyan tama nación ye.

⁴ Nducuahn yan nan che renda ye ne, recah cuande ye ihyan che ritahno ye Dihvo vo nduhca che chihco cade ihyan apóstol man, intiyahn yaco man, che vate ye yan Jerusalén.

⁵ Me nducoyaca ihyan che ritahno ye Dihvo vo ne, riquendi ritahno ye numa ino ye, ne ro ro ne, ihyan che ranan ritahno ye Dihvo vo ne, rinduco ye ihyan chahn, ne ri yahn ye.

Chinahn ama vederihno, ne ndihchero Pablo ama sahn yahn yahn Macedonia van yahn de yahn ye

⁶ Vaco Ndah yahn Dendiohs ne, hua cah yune che cah ihyan chahn, cuahndudo ye yahn yahn Asia. Chemin che chahtechica ye yahn yahn Frigia man, Galacia man,

⁷ nde nda ye nan ri vah yahn yahn Misia. Cuahn che chenah ye min ne, nahn cah ye yahn yahn Bitinia, ate hua cah yune Vaco Dihvo vo Jesucristo che cah ye.

⁸ Tuhme chuh dama ye yahn yahn Misia, ne nda ye yan Troas.

⁹ Min chinahn ama vederihno, ne ndihchero Pablo van yahn de yahn ye che nti ama sahn yahn yahn Macedonia nan ye, ne rica se favor ihyan: "Cahn ne yan vaco, Macedonia, conan ne nuhn."

¹⁰ Ndetahn che ndihchero ye vederihno me ne, chihco yan nuhn deht-
enduh yahn nuhn cava che cah nuhn yahn yahn Macedonia, te a devano
cuaco nuhn te nahn Dendiohs che cah nuhn, cuahndudo nuhn Ndudo yahn
ye min.

Pablo nduco Silas ne, nda ye yan Filipos

¹¹ Min yan Troas chahtenun nuhn ama barco, ne cuahn cuaco nuhn yahn yahn Samotracia, ne tama ro me ne, nda nuhn yan Neapolis.

¹² Chica nuhn min, ne nda nuhn yan Filipos, yan che tahque chahte che co tama yan min yahn yahn Macedonia. Yan min ne, Roma ndi cuande. Min chahtenan nuhn neve ro.

¹³ Nda ro che rahte tuhno ihyan ne, cuahn nuhn cuahn chihto yan. Nda nuhn chendico nan che rahn ihyan, revah ye. Min chahte nuhn, ne cahndudo nuhn Ndudo yahn Dendiohs, chihnevan neve ihyan ndahta che chi dama ye min.

¹⁴ Min nduco ama ndahta yahn yan Tiatira che duche ye Lidia. Ihyan min ne, ihyan rendihcue tino morado, ne ritahno ye Dendiohs. Rihnevan ye che rahndudo Pablo, ne din Dihvo vo che chenahn ye ndudo me.

¹⁵ Ihyan min nduco ihyan ndevaco ye ne, chedenune nducoyaca ye. Chihno min ne, chica ye favor nuhn:

—A ndihche nchuhn che a chitahnó Dihvo vo Jesucristo. Cuhn vo nduco ne ndevaco, cuahtenan ne.

Tuhme din ye fuerza nuhn che chahtenan nuhn.

¹⁶ Ama ro ne, ura che cuahn nuhn, covah nuhn ne, ndihchero nuhn ama tahn dihn che quenun vaco chihnga tahn, che recadino suerte yahn ihyan. Vate ama o dihve te, ne ama renda se tume nan ntiyon min.

¹⁷ Tahn min ne, quenda te nuhn, ne rah te:

—Ihyan chuhn ne, redin ye ntiyon yahn Dendiohs, ihyan min che ama yudo vederihquentiyon yahn ye, ne rahndudo ye ndudo nduhca che co ndevahn ihyan.

¹⁸ A ama nde ro che tihca redin te, nde nan che chi yudo yahn Pablo, ne chaconan ye, ndihchero ye tahn, ne rahn ye ri ye vaco chihnga che quenun tahn:

—Numacuahn vederihquentiyon yahn Jesucristo, rahn ri di, cuendiquenda tahn tih.

A ndetahnó ndiquenda vaco me tahn.

¹⁹ Cuahn che checadino dihve te che a ndiquendāh vaco chihnga me tahn, che ametah ndāca se tume nan ntiyon min ne, chetāh se Pablo nduco Silas, ne quenda se ihyan ndevācoyan nan intiyahn.

²⁰ Cih nunde se yahn ye, ne rāhn se:

—Sāhn chuhn ne, sāhn nación yahn Israel, ne rendedecuan se ihyan yan vaco vo.

²¹ Ricuahn se costumbre che hua co nevahnecon vo, nde hua co quendi vo, te uvo ne, Roma ndi cuando vo.

²² Tuhme chi tān ihyan yan nduco ihyan chahn, ne chihquentiyon intiyahn che cahnevi se tino yahn ye, ne cuahn se ihyan nduco nducodi.

²³ Chihno che āma chahn se ihyan ne, chih se ihyan vacoyahn, ne chihquentiyon se sāhn che redin cudādo vacoyahn me che din ndah se cudādo ihyan.

²⁴ Sāhn che redin cudādo vacoyahn me ne, chih se ihyan chahn chete āma cuarto che va nde cuahn candevāh chete vacoyahn me, ne chih chiche se cāh ye nduco āma nan vihto che duche cepo.

²⁵ Tenduh nan mahn yan me ne, revāh Pablo nduco Silas, rita ye himno, rendeva ye yavenān Dendiohs, ne sāhn preso che chenun se min ne, rihcovan se.

²⁶ A ura min no adenān āma nuhn yahn, nde name yahn vacoyahn me, āma chihde. Nāne nducuahn chende vacoyahn me, ne chihno ntāhte cadena che nechiche nducoyāca preso chahn.

²⁷ Sāhn che redin cudādo vacoyahn me ne, ntuche se, ne cuahn che ndihchero se che chendāh chende vacoyahn me ne, tico se espāda yahn se, nahn cāhno mān se sāhn, te rāhco se te co a chihno chano preso chahn.

²⁸ Ate cah Pablo yahn se:

—Hua te cahne man di, te muhn chenun nducoyāca nuhn.

²⁹ Tuhme chica se āma yahn, ne aderano se, chendā se nan che chenun preso chahn, nde tuno rendoh se che vāh se, ne chehtihya se nan Pablo nduco Silas.

³⁰ Ndetāhno ndetendāh se ihyan chahn, ne tumerune se ihyan:

—¿Deh va che dīn cāva che ndevahn u ne?

³¹ Ndahconan ye yahn se:

—Cuitehne Dihvo vo Jesucristo, ne ndevahn di nduco ihyan ndevaue.

³² Tuhme cahndudo ihyan chahn ndudo yahn Dihvo vo, chihnevan se nduco nducoyāca ihyan ndevāco se.

³³ A ura min no chete rāhn, nāno se nan ntāca yah yahn ihyan chahn. Tuhme chedenune se nduco nducoyāca ihyan ndevāco se.

³⁴ Chihno min ne, ndiquenda se ihyan chahn ndevāco se, ne cāh se, cheh ye. Ama yeno se che chitahno se Dendiohs, ne ihyan ndevāco se ne, namin āma yeno ye che chitahno ye.

³⁵ Cuahn che a chi dave me ne, dechuh intiyahn sāhn policia che cāhma se nduco sāhn che redin cudādo vacoyahn me, che ntāhte se Pablo nduco Silas.

³⁶ Tuhme rāhn sāhn che redin cudādo vacoyahn me ri se Pablo:

—A chihquentiyon intiyahn u che ntāhté nchuhn. Mān ne, co ndiquendāh ne, hua dehve rāhco ne.

³⁷ Rāhn Pablo ri ye sāhn policia chahn:

—Ihyan che ndi cuande ye Roma ne, rihquentiyon ley che hua co co ye castigo numanahn che metah cuhnde cade yahn ye. Nuhn ne, Roma ndi cuande nuhn, ate nchuhn ne, nde hua teche cade ne yahn nuhn, ne chahn ne nuhn nan nducoyāca ihyan yan, chih ne nuhn vacoyahn. Mān ne, ¿a rihco nchuhn che ndetendāh ne nuhn cuāhn ndeh ne? Hua. Chi mān intiyahn, ndetendāh ye nuhn.

³⁸ Nta sahn policia chahn, ne necah cuande se intiyahn chahn. Cuahn che checadino ye te ndi cuande ihyan chahn Roma ne, ama dihya ye chi,

³⁹ ne cuahn ye, ndaca ye che nchahconunde Pablo nduco Silas. Tuhme ndetendah ye ihyan chahn, ne chica ye favor ihyan che ndaca ye yan min.

⁴⁰ Cuahn che ndiquendah ye vacoyahn me ne, cuahn ye ndevacho Lidia, quendihchero ye ihyan chahn che ritahno ye Dihvo vo. Chihno yahve ye ihyan chahn ne, chica ye min, ne cuahn ye.

17

Ndo dama sahn yan Tesalónica, nahn cuahn se Pablo

¹ Pablo nduco Silas ne, chuh ye yan Anfipolis man, yan Apolonia man, ne nda ye yan Tesalónica, nan che nti ama yaco yahn ihyan nación yahn Israel.

² Pablo, nducote a ntiyon min nda ye ne, chahn ye yaco me, ne ino ndate, ro che rahte tuhno ihyan ne, rahndudo ye che ndirun nan Ndudo yahn Dendiohs, rihnevan ihyan yan min.

³ Rahndudo ye nduhca che va che chuhrihn Dihvo vo Jesucristo man, nduhca che chihno se ihyan man, nduhca che va che ntuche ye man. Namin rahn ye:

—Dihvo vo Jesucristo che rahndudó yahn ye nan nchuhn ne, a ihyan min che a va cade che chi ye, ndedevahn ye ihyan iyehanse.

⁴ Tuhme neve ihyan nación yahn Israel chahn ne, chitahno ye Dihvo vo, ne chinduco ye Pablo nduco Silas. Namin ama yahn ihyan nación yahn Grecia, che renevahnevan ye Dendiohs nde menan, nduco ama yahn ndahta nchico ne, chitahno ye Dihvo vo.

⁵ Ate sahn nación yahn Israel che hua chitahno se ne, chi ve se, ne din dama se ama o sahn dahnde che duhtuno ihyan se, vatechica se viyan, ne chinun se sahn che ndedecuan se ihyan yan. Chahn se vaco ama ihyan che duche ye Jasón, rinuhn se Pablo nduco Silas cava che tendah vah se ihyan, necah se ihyan tah ihyan yan.

⁶ Nducote hua ntaca se ihyan chahn min ne, chihnda rudo se Jasón nduco ama o dihno vo che chenan ye min, quenda se ihyan nan intiyahn, ne cah se: —Sahn che rinun se ihyan, rendedecuan se ihyan numachahte iyehanse ne, man ne, nda se muhn.

⁷ Jasón tih ne, retuma ino se sahn ndevaco se. Nducoyaca sahn chahn ne, redetoh nan se ley yahn César, te rahn se te va tama rey che duche ye Jesús.

⁸ Cuahn che chihnevan ihyan yan man, intiyahn man, che tihca ne, ama chi tan ye.

⁹ Ate Jasón nduco ihyan chenahn chahn ne, nedihve ye intiyahn, ne ntahte ye ihyan.

Pablo nduco Silas ne, nda ye yan Berea

¹⁰ Ihyan che ritahno ye Dihvo vo ne, a vino min no dechuh ye Pablo nduco Silas nde yan Berea. Cuahn che nda ye min ne, chenda ye chete yaco yahn ihyan nación yahn Israel.

¹¹ Ihyan nación yahn Israel che vate ye min ne, tahque renahn ye che co ihyan che vate ye yan Tesalónica, te nevahnevan ye Ndudo yahn Dendiohs numacuahn vedeyeno, ne ro ro rendihchenan ye Ndudo min cava che cadino ye a cuaco nduhca che rahndudo Pablo.

¹² Chemin che ama yahn ihyan chahn chitahno ye Dihvo vo Jesucristo. Namin van ihyan nación yahn Grecia, nde ndahta nchico man, nde chahn man, chitahno ye ihyan.

¹³ Cuahn che checadino sahn nación yahn Israel che vate se yan Tesalónica che quenan Pablo min yan Berea, rahndudo ye Ndudo yahn Dendiohs ne, chahn se min, chinun se ihyan yan, ndedecuan se ihyan.

¹⁴ Ate ihyan che ritahno ye Dihvo vo ne, ndetahno dechuh ye Pablo cuahn chihto nuniyahñ. A demañ Silas nduco Timoteo chahtenan ye min yan Berea.

¹⁵ Me ihyan che chengu yune ye Pablo ne, chinduco ye ihyan nde yan Atenas. Ndetahno ndaconan ihyan chahn, nda ye ndudo yahn Pablo che çahn Silas nduco Timoteo, ntuno ye ihyan tenun tenun no.

Quenan Pablo yan Atenas

¹⁶ Numanahn che quenan rino Pablo che nda Silas nduco Timoteo min yan Atenas ne, ama rendedecadino ye yahn ihyan yan min, te ndihche ye te ama vate dehtenduh che redin vahn ye dendiohs yahn ye.

¹⁷ Chemin che ama rente ye chete yaco nduco ihyan nación yahn Israel man, ihyan tama nación che renevahnecun ye Dendiohs man. Namin rente ye ro ro nduco ihyan che chenun ye ndihve.

¹⁸ Ama o sahn che rahñ se vededeveno yahn Epicureo nduco tama te o se che rahñ se vededeveno yahn estoico ne, canañ rente se nduco Pablo. Ama o se ne, tumerune se:

—¿Deh che rahñ sahn tih che ama çahnda chende se?

Tama te o se ne, rahñ se:

—Cane racotuhn se ndudo yahn tama te o dendiohs.

Tihça rahñ sahn chahn, te rahndudo Pablo ndudo yahn Dihvo vo Jesucristo man, yahn che va che ntuche tenahn man.

¹⁹ Tuhme quenda se ihyan ama cuete che duche Areópago nan che rendo dama ihyan ndinañ, rente çade ye, ne tumerune se ihyan:

—¿A nahn te cuande ne nuhn yahn ndudo ra che rahndudo ne ne?,

²⁰ te rente ne dehtenduh ndudo che hua nihnevan nuhn, ne nahn cadino nuhn deh conahn.

²¹ Tihça rahñ se, te nducoyaca ihyan yan Atenas man, ihyan nación chenahn che vate ye min man ne, demañ yahn dehtenduh che hua devano ye nahn nte ye man, nahn çahnevan ye man.

²² Tuhme chandi Pablo min Areópago nan nducoyaca sahn chahn, ne cahndudo ye:

—Nchuhn ihyan yan Atenas, rendihché te ama ritahno ne dendiohs yahn ne,

²³ te cuahn che quechicá, rendihcheró yaco yahn nchuhn, ne namin ntaça ama nan ta nan che ndirin tuhça: “Nan ta yahn Dendiohs che hua rendihche ihyan.” Dendiohs min che rende va nchuhn yavenañ ye andahre hua rendihche ne ihyan ne, a ndudo yahn ye che rahndudó.

²⁴ A Dendiohs min che dendah ye iyehñse nduco nducuahn che va. A Dendiohs min che rihquentiyon ye numachahte iyehñse, nde nan ro man, nde ndiyahn man. Hua renun ye chete yaco che rihno ihyan,

²⁵ nde hua rendotenan ye dehtenduh che co din ihyan çava ye, te man ye redin ye che chenun ico nducoyaco vo man, rete ye vedevihche yuhn vo man, nducuahn dehtenduh che rendotenan vo man.

²⁶ A ihyan min dendah ye ama ndata no ihyan yahn nducuahn nación, ne chihquentiyon ye che cuahnte ye numachahte iyehñse. Chihco çade ye ro che cuahnte ye man, nan che cuahnte ye man.

²⁷ Nahn Dendiohs che nuhn ihyan iyehñse ihyan ndete che ndaça ye ihyan, andahre çuaco te hua yahn quenan ye yahn queri ama vo.

²⁸ Hua yahn quenan ye, te a ihyan min che redin ye che chenun ico vo man, vatechico vo man, chenduche vo man. Namin rahn ama o ihyan devano yahn nchuhn ndudo cuh che dama: “Ndata yahn Dendiohs uvo.”

²⁹ Tuhme, nducote ndata yahn Dendiohs uvo ne, hua ndedecadino vo che Dendiohs ne, ama mieca che ndindah nduco diyahnguan man, o diyahngua man, o tu man, che redendah ihyan nduhca che nahn man ye.

³⁰ Ro menan me ne, din chahtino Dendiohs vedetundo yahn ihyan, ate man ne, rihquentiyon ye ihyan che vate ye numachahte iyehmse che nto ino ye nunde yahn ye,

³¹ te a ndihco cade ye ro che techecade ye numa cuaco yahn nducoyaca ihyan iyehmse. A tendah nun ye ama ihyan che techecade ye menun ye, ne ndedetuhche ye ihyan min van tenahn. Nduco chemin ne, cah ye, checadino nducoyaca ihyan che tihca va cade.

³² Cuahn che chihnevan sahn chahn yahn che ntuche tenahn ne, nahn se ne, rihyon nan se Pablo, ne nahn se ne, rahn se:

—Tahque ndah tama ro cuahndudo ne, cahnevan nuhn.

³³ Tuhme chica Pablo min, conahn ye.

³⁴ Ate van sahn chahn ne, chenun neve ihyan che chitahno ye Dihvo vo Jesucristo, ne chinduco ye Pablo. Ama ye ne, duche ye Dionisio. Ihyan min ne, ama intiyahn yahn junta Areópago. Tama ye ne, ama ndahta che duche ye Dámaris. Namin te neve ihyan, chitahno ye Dihvo vo.

18

Nda Pablo yan Corinto

¹ Chihno min ne, chica Pablo yan Atenas, ne nda ye yan Corinto.

² Min ntaca ye ama sahn, ndata yahn Israel, che duche se Aquila. Yahn yahn Ponto chihta se. Adiva ne, chihnde se yahn yahn Italia. Nducote chihquentiyon emperador Claudio che ndaca nducoyaca ihyan, ndata yahn Israel, Roma, yahn yahn Italia ne, chica se min nduco ndahta yahn se che duche te Priscila. Pablo ne, cuahn ye, quendihchero ye ihyan chahn,

³ ne nducote dama ntiyon yahn ihyan chahn nduco ye, che rendahyon ye tino tu cava che co vah tino ne, quenan ye nduco ihyan chahn, din ye ntiyon nduco vih.

⁴ Ndate ndate, ro che rahtetuhno ihyan, rahn Pablo yaco. Min rahndudo ye, ne redin ye che renahn ihyan nación yahn Israel man, ihyan tama nación man.

⁵ Cuahn che nda Silas nduco Timoteo che chica ye yahn yahn Macedonia ne, chihcoman Pablo ntiyon che redin ye, ne rahndudo ye ro ro nan ihyan nación yahn Israel. Rahndudo ye te Dihvo vo Jesucristo ne, a ihyan min che a va cade che chi ye, ndedevahn ye ihyan iyehmse.

⁶ Ate ihyan chahn ne, chi tan ye nduco Pablo, ne rahn tan ye nduco ye. Chemin che chihde ye tino yahn ye, cah ye, checadino ihyan chahn che ndaca ye min, cahcoman ye ihyan. Rahn ye:

—A man nchuhn chendihco ne nunde che conda ne, te u ne, a yahve nchuhn. Man ne, cahn, cuahndudó, cahnevan ihyan nación chenahn.

⁷ Ndiquendah ye yaco min, ne cuahn ye vaco ama ihyan che duche ye Justo, che nti chihto yaco. Ihyan min ne, namin rendeva ye yavenan Dendiohs.

⁸ Ama intiyahn yaco che duche ye Crispo nduco nducoyaca ihyan ndevaco ye ne, chitahno ye Dihvo vo Jesucristo. Namin cuahn che chihnevan ama yahn ihyan yan Corinto Ndudo yahn Dendiohs ne, chitahno ye, ne chedenune ye.

⁹ Ama vino ne, chinahn ama vederihno nan Pablo, ne chihnevan ye che rahñ Dihvo vo nduco ye:

—Cuiquendi, cuahndode. Hua te vah. Hua ngüen,

¹⁰ te u ne, nducó di, ne nde ama ihyan hua co nahn tah ye di cava che nuhn yah ye di. Cuiquendi, cuahndode, te muhn yan cuh ne, vate ca ama yahn ihyan che cotahno ye u.

¹¹ Chemin che quenán Pablo min yan Corinto ama nduyo quenán man, ricuahn ye Ndudo yahn Dendiohs, rihnevan ihyan chahn.

¹² Ate cuahn che quenán Galión gobernador yahn Acaya ne, ihyan nación yahn Israel ne, chí tan ye nduco Pablo, ne ndo dama ye, quenda ye ihyan nan se.

¹³ Rahn ye ri ye sahn:

—Sahnguh ne, rinun se ihyan che cotahno ye Dendiohs, ate hua nduhca che rihquentiyon ley.

¹⁴ Pablo ne, adeche cuanán cahma ye cuahn che rahñ Galión ri se ihyan chahn:

—Nchuhn, ihyan nación yahn Israel, ndete che cava ama nunde chahte che nda ne sahn tih nan ne, va vedeyenó che techecadé yahn se.

¹⁵ Ate nducote demán ndudo man, che duche ihyan man, yahn ley yahn man nchuhn man ne, tan condihche ne taça techecade man ne, te u ne, nde hua nahn techecadé yahn dehtenduh che tihchan.

¹⁶ Chihno rahñ se chemin ne, chihquentiyon se che ndiquendah vah ihyan chahn.

¹⁷ Tuhme nducoyaca sahn nación yahn Grecia che nduco se min ne, tumangan se ihyan ndinan yahn yaco che duche ye Sóstenes, ne a min no chahn se ihyan. Gobernador ne, ndihchero se, ate nde hua tumacah se.

Nta Pablo yan Antioquía, ne ndaconan cuahn tun ye che co ino yune, cuahndudo ye

¹⁸ Pablo ne, ndeh ro ca quenán ye yan min. Tuhme yahve ye ihyan che ritahno ye Dihvo vo, ne chahtenun ye ama barco nduco Aquila nduco Priscila, ne cuahn ye nduco vih yahn yahn Siria. Min yan Cencrea, ura che ametah conun Pablo chete barco me ne, ndu rah tin ye cava che nahma ye che a tuno ro yahn ama ndudo che a necah ye Dendiohs ro menán.

¹⁹ Cuahn che nda ihyan chahn yan Efeso ne, Pablo ne, chihcomán ye Aquila nduco Priscila, ne cuahn ye yaco, nte ye nduco ihyan nación yahn Israel che rendo dama ye min.

²⁰ Ihyan chahn ne, chica ye favor ihyan che conan ca ye min, ate hua cahnecon ye.

²¹ Tuhme yahve ye ihyan chahn:

—Va che cahñ yan Jerusalén cava che a min quenán nda ro vihco. Ate ndete che nahn Dendiohs ne, ndaconan tun, ndihchero vih vo.

Tuhme ndonun ye barco me, ne chica ye yan Efeso.

²² Cuahn che nda Pablo yan Cesarea ne, chahn ye yan Jerusalén, necah ye Dendiohs ihyan ndiyaco. Tuhme conahn ye yan Antioquía.

²³ Cuahn che a chí rahñ che nta ye min ne, cuahn tun ye nduh yan nduh yan, yahn yahn Galacia man, Frigia man, renecah yan ye chedave yahn nducoyaca ihyan che ritahno ye Dihvo vo Jesucristo.

Rahndudo Apolos yan Efeso

²⁴ Tahñ min ne, ama ihyan, ndata yahn Israel, che duche ye Apolos ne, nda ye yan Efeso. Ihyan min ne, chihta ye yan Alejandría. Ama devano ye Ndudo yahn Dendiohs, ne ama ndahca rahndudo ye.

²⁵ Ndah nahn ye vederihquentiyon yahn Dihvo vo Jesucristo, ne numa cuāco man, numa ino ye man, rahndudo ye yahn ye, andahre deman yahn che chehdenune Juan Bautista devano ye.

²⁶ Min chete yaco ne, tihca cahndudo ye numa ino ye, ne cuahn che chihno cahndudo ye ne, Aquila nduco Priscila ne, quenda ye ihyan deva vih, ne cah cuande ndah ye ihyan yahn vederihquentiyon yahn Dendiohs.

²⁷ Cuahn che nahn cahñ Apolos yahn yahn Acaya ne, ihyan che ritahno ye Dihvo vo Jesucristo ne, chinan ye ihyan, ne dirun ye ama caca yahn ihyan che ritahno ye Dihvo vo che vate ye yahn min cava che nevahneun ye ihyan. Cuahn che nda ye yahn min ne, ama chinan ye ihyan chahn che numacuahn vedeyahino yahn Dendiohs chitahno ye Dihvo vo Jesucristo,

²⁸ te riho ro ye nan nducoyaca ihyan te hua ndahca che rendedecadino ihyan naciōn yahn Israel, nde nan che cahma ye metah. Nduco Ndudo yahn Dendiohs ne, recah cuande ye ihyan chahn te Dihvo vo Jesucristo ne, a ihyan min che va cade che ndedevahn ye ihyan iyehñse.

19

Nda Pablo yan Efeso

¹ Numanahn che quenān Apolos yan Corinto ne, chuh Pablo cuahn icoyahn, ne nda ye yan Efeso. Min ndihche ye neve se che ritahno se Dihvo vo Jesucristo,

² ne tumerune ye sahn:

—¿A quenun Vaco Ndah yahn Dendiohs nchuhn cuahn che chitahno ne Jesucristo ne?

Ndahconan sahn chahn:

—Nde hua nihnevan nuhn yahn Vaco Ndah yahn Dendiohs.

³ Tuhme ndaconan tumerune ye sahn chahn:

—¿Taca chedenune nchuhn tuhme ne?

Ndahconan se:

—Chedenune nuhn nduhca che chehdenune Juan Bautista ihyan.

⁴ Rahn Pablo ri ye sahn:

—Juan ne, chehdenune ye ihyan cava che co ro che a nto ino ihyan chahn nunde yahn ye. Namin rahn Juan ri ye ihyan te va che cotahno ye ama ihyan che cochi ye adiva. A ihyan min che Jesús che a va cade che chi ye, ndedevahn ye ihyan iyehñse.

⁵ Cuahn che chihnevan sahn chahn che tihca ne, chedenune se, cah se Dihvo vo Jesucristo.

⁶ Nahn tah Pablo sahn, ne quenun Vaco Ndah yahn Dendiohs sahn, din che nte se tama te o devaco man, cahndudo se Ndudo yahn Dendiohs man.

⁷ Van nducoyaca ne, ri se tenduh ndichio ihyan se.

⁸ Numanahn che quenān Pablo min ino iyo ne, rahn ye yaco, rahndudo ye numa ino ye, redin ye che renahn ihyan yahn vederihquentiyon yahn Dendiohs.

⁹ Ate ama yahn ihyan ne, nducote cheche chedave yahn ye ne, hua chitahno ye, ne chihnga rahn ye yahn ndudo ndah yahn Dendiohs. Chemin che Pablo nduco nducoyaca ihyan che ritahno ye Dihvo vo ne, chihcomān ye ihyan chahn, ne cuahn ye, ndo dama ye chete escuela yahn ama ihyan che duche ye Tiranno. Min cahndudo ye ro ro.

¹⁰ Chete che o nduyo quendi ye, rahndudo ye min, ne ama yahn ihyan, ihyan naciōn yahn Israel man, ihyan naciōn chenahn man, che vate ye yahn yahn Asia ne, chihnevan ye ndudo yahn Dihvo vo.

11 Dendiohs ne, caḥ ye vederihquentiyon, quenan cuma Pablo, ne rinahn vederihno rahte.

12 Nde tino che retoh Pablo, o payon yahn ye ne, riquenda ihyan, renahn ye ihyan cah, ne rendoyahn ye, renahn ye ihyan che chenun vaco chihnga ihyan, ne rendiquendaḥ.

13 Ate ama o sahn nación yahn Israel che vatechica se, rendetendaḥ se vaco chihnga che chenun ihyan ne, nahn ndetendaḥ se vaco chihnga nduco vederihquentiyon yahn Dihvo vo Jesucristo. Raḥn se ri se vaco chahn:

—Numacuahn vederihquentiyon yahn Jesucristo che rahndudo Pablo yahn ye ne, rihquentiyon nuhn nchuhn che ndiquendaḥ ne.

14 Esceva, ama ihyan nación yahn Israel, che chidocuyan ndinan ye ne, vate ndache daya ye, ne sahn chahn ne, tiḥca redin se.

15 Ate ama yune cuahn che tiḥca raḥn se nduco ama vaco chihnga ne, ndahconan vaco me yahn se:

—A rendihché Jesucristo. Namin a devanó duh che Pablo. Ate nchuhn ne, ¿duh nchuhn ne?

16 Tuhme sahn che quenun vaco chihnga me ne, tumangan se sahn chahn, ne chahn se sahn numacuahn vedetan, nde nan che din cuno se nducoyaca se. A devane sahn chahn man, ntaca yah se man, ndiquendaḥ vah se, chano se.

17 Nducoyaca ihyan nación yahn Israel man, ihyan nación chenaḥn man, che vate ye min yan Efeso ne, checadino ye che tiḥca chi. Ama chahn ino ye, ne ndeva ye yavenan Dihvo vo Jesucristo.

18 Me ihyan che ritahno ye Dihvo vo ne, ama yahn ye ne, ntuma ino ye nunde yahn ye che chitahno ye vedecuah ro menan me.

19 Namin ama yahn ihyan che quenun cuma ye vedecuah ro menan me ne, quenda ye libro yahn ye, chihquiyahn ye nan nducoyaca ihyan. Cuahn che tendah cuande ihyan tava chihve nducuahn libro chahn ne, rignonun o raco ndiche mil tume diyahngua.

20 Nduco tiḥca ne, ama chetuhn ndudo yahn Dihvo vo, chihnde ro vederihquentiyon yahn ye.

21 Chihno min ne, chihco cade Pablo che caḥn ye yahn yahn Macedonia man, Acaya man, quendihchero ye ihyan che ritahno ye Dihvo vo, ne quendi ye nde yan Jerusalén. Tuhme va che caḥn ye yan Roma.

22 Dechuh ye o combiero yahn ye che rinan se ihyan, Timoteo nduco Erasto, che caḥn se yahn yahn Macedonia numanahn che quenan ca ye yahn yahn Asia.

Ndo dama ihyan yan Efeso numacuahn vedetan

23 Tahḥn min ne, ama chi tan ihyan yahn che retuhn ndudo ndah yahn Dendiohs.

24 Vedetan min ne, canan cava ama sahn vichedyahngua che duche se Demetrio. Sahn min ne, rendedevihne se diyahngua, redendah se yaco cahya nduhca yaco yahn Diana, dendiohs che va ye yan vaco se. Yahn chihve ntiyon min, ne yahn sahn che redin se ntiyon nduco se.

25 Din dama se sahn chahn man, nducoyaca ca sahn che rinan se sahn nan ntiyon min man, ne raḥn se ri se sahn:

—Nchuhn ne, a devano ne te nan ntiyon cuh ama rendaḥ vo tume.

26 A rendihche ne man, a rihnevan ne man, nduhca che ama racotuhn Pablo ndudo van nducoyaca ihyan yan Efeso man, van ihyan che vate ye numachahte yahn yahn Asia man. Hua renguan se, rahndudo se te dendiohs che redendah ihyan ne, ndiyu dendiohs, ne a ama yahn ihyan ritahno ye.

²⁷ Che redin se ne, cahnda yahn ntiyon che redin vo, te co cuihno, nde co cuhnde man yaco yahn dendiohs Diana, che ama yudo ye, che rendeva nducoyaca ihyan yavenan ye, numachahte yahn yahn Asia man, numachahte iyehse man. Ndete che quendi tihca ne, nde ametah tumecah ihyan yahn vederihquentiyon yahn ye.

²⁸ Cuahn che chihnevan sahn chahn che tihca ne, ama chi tan se, ne canan cah se:

—iAma yudo vederihquentiyon yahn Diana, dihve ihyan yan Efeso!

²⁹ Nduco chemin ne, necuan ihyan yan numacuahn vedetan, chetah ye Gayo nduco Aristarco, o ihyan yahn yahn Macedonia che nduco ye Pablo, ne chihnda rudo ye ihyan chahn, quenda ye ihyan ndevacoyan.

³⁰ Pablo ne, nahn cahñ ye min, yahve ye ihyan yan chahn, ate ihyan che ritahno ye Dihvo vo ne, hua cahneacun ye.

³¹ Namin o ino ihyan ndinan che rihquentiyon ye yahn yahn Asia, che amigo yahn Pablo ne, tahve ye ndudo yahn ye che hua nahme nan ye min.

³² Numanahmin ne, vari chende ihyan yan chahn, chenun ye min. A vih rah ama, a vih rah tama ye, te a nahn nducoyaca ye nde hua devano ye deh cuande che nto dama ye.

³³ Ama o sahn che nduco se min ne, cah cuande se Alejandro deh che ri, ne chaconahn ihyan naciön yahn Israel sahn nan nducoyaca ihyan cava che cahma nan se ihyan. Din tah se che cuahte dihn chende nducoyaca ihyan yan chahn cava che cuahndudo se.

³⁴ Ate cuahn che checadino ye te ndata yahn Israel sahn ne, cah ye tenduh o ura tuhca:

—iAma yudo vederihquentiyon yahn Diana, dihve ihyan yan Efeso!

³⁵ Tuhme nda sahn secretario, chihco dihn se ihyan chahn, ne rahn se:

—Nchuhn, ihyan yan Efeso, numachahte iyehse ne, devano ihyan te redin ihyan yan Efeso cudado yaco yahn dendiohs Diana che chica ye nan ro.

³⁶ Nducote nducoyaca ihyan devano ye yahn chemin ne, cuahte dihn nchuhn. Hua cuhma ne numahn che metah ndedecadino ndah ne,

³⁷ te sahn sih che nda ne muhn ne, hua chihnga rahn se yahn dendiohs yahn ne.

³⁸ Ndete che Demetrio nduco sahn che redin ntiyon nduco se vate canda se nduco adecoduhno ihyan ne, va vacoyan man, vate intiyahn che retechecade ye man. Min cahñ queri ama se cuhnde cade yahn se.

³⁹ Ate ndete che tahque chahte canda yahn se ne, conan rino se, te va che ndo dama nducoyaca ihyan yan, ne ro min ne, co cuhnde cade yahn se.

⁴⁰ Nde cahnda yuhn vo che tihca rendo dama nchuhn, rah ne, te co caca nunde ihyan yuhn vo che rendedecuan vo canda. Ndete che cacarune ihyan ndinan ne, nde nan che cahma vo metah.

⁴¹ Chihno rahn ye chemin ne, ndedechuh ye ihyan yan chahn, conahn ye.

20

Ndaconan Pablo, nchuh ye yahn yahn Macedonia, ntq ye yahn yahn Grecia

¹ Cuahn che a chahte dihn ihyan yan chahn ne, nedin dama Pablo ihyan che ritahno ye Dihvo vo, ne yahve ye ihyan. Chihno min ne, chahtemahn vih ye, ne ndaca ye min, nda ye yahn yahn Macedonia.

² Quechica ye nduh yan nduh yan yahn Macedonia, yahve ye nducoyaca ihyan che ritahno ye Dihvo vo, nde nda ye yahn yahn Grecia.

³ Min quenan ye ino iyo, ne cuahn che a va yan yahn ye che conun ye ama barco, nahn ye yahn yahn Siria ne, checadino ye te ihyan naciön yahn Israel

ne, nahn cahno ye ihyan. Chemin che ndonun yune ye, ndaconan ye yahñ yahn Macedonia.

⁴ Sópater yahn yan Berea man, Aristarco nduco Segundo yahn yan Tesalónica man, Gayo yahn yan Derbe man, Timoteo man, Tíquico man, Trófimo yahn yahn yahn Asia man ne, cuahn ye nduco Pablo.

⁵ Quendah nan ihyan chahn yahn nuhn, ne chahtenan rino ye nuhn nde yan Troas.

⁶ Chuh ro yudo, vihco che reh ihyan pan che metah ya yahn ne, chahtenun nuhn ama barco, chica nuhn yan Filipos. Chihno uhn ro ne, ntuno nuhn ihyan chahn min yan Troas, ne min chahtenan nuhn nduco vih ndache ro.

Rahndudo Pablo yan Troas

⁷ Ro che ndeva ndate ne, ndo dama nducoyaca ihyan che ritahno ye Dihvo vo cava che ndeh ye pan nduhca che a va cade, ne riyahve Pablo ihyan. Quendi ye rente ye nde chi mahñ yan, te tama ro me ne, va che ndaca ye min.

⁸⁻⁹ Nto dama ihyan chahn nde nan cuarto che tahque yaco, nan ino cuahto, ne ama chendihco lámpara, riche. Ama sahn yuno che duche se Eutico ne, va se nan ventana, ne nducote ama rahñ quendi Pablo rahndudo ye ne, chetah yahnde sahn, ne cuahn che a ndah quiyado se ne, ndaconda se min, chendah se nde ndiyahn. Chahn ihyan chahn, ndedecuan ye sahn, ne a ndih se.

¹⁰ Tuhme cuenchahn Pablo, ne chahtemahn ye sahn. Rahñ ye ri ye ihyan chahn:

—Huete dihya nchuhn co, te man ne, quenduche se, a ndedetuhche Dendiohs sahn.

¹¹ Chihno min ne, conda Pablo, ne cheh ye nduco ihyan chahn. Quendi ye rahndudo ye nde chi dave, ne tuhme cuahn ye.

¹² Me sahn yuno me ne, ndiquenda ihyan chahn sahn ndevaco se, quenduche se, ne ama chi yeno nducoyaca ye.

Pablo nduco combiero yahn ye, chica ye yan Troas, cuahn ye yan Mileto

¹³ Chahtenun nuhn ama barco, quendah nan nuhn yahn Pablo, cuahn nuhn yan Asón. A nte cade nuhn te min va che cuahtenan rino nuhn ihyan, te man ye nahn caca cahñ ye nde min.

¹⁴ Cuahn che ntaca vih nuhn nduco ye min yan Asón ne, chenda ye chete barco nduco nuhn, ne nda nuhn yan Mitilene.

¹⁵ Tama ro me ne, chica nuhn min, ne chuh nuhn yan Trogilio, ne nde tama ro me ne, nda nuhn yan Mileto.

¹⁶ Tihañ din nuhn, te nahn chuh dama Pablo yan Efeso cava che hua condah ye yahñ yahn Asia. Ndete che conun ne, nahn ntá nun ye yan Jerusalén, conan ye min nda ro vihco Pentecostés.

Cahndudo Pablo nan intiyahn yaco che vate ye yan Efeso

¹⁷ Cuahn che a chenán nuhn yan Mileto ne, tahve Pablo che chehua intiyahn yaco nde yan Efeso.

¹⁸ Cuahn che nda ihyan chahn min ne, cahndudo Pablo:

—Nchuhn ne, a devano ne nduhca che quechicá van nchuhn nde ro che nda yahñ yahn Asia.

¹⁹ Numacuahn ro che quenán nduco nchuhn ne, dín ntiyon yahn Dendiohs numacuahn vedenecon. Ama chuhríhn man, chihtera nune ndutinán man, yahn che ihyan nación yahn Israel ne, chenun ino ye vedetan nducó.

20 Ate hua cheguán cahndudó ñan nchuhn nducuahñ che cochihve yahn ne. Chicuáhn nchuhn ñan nducoyaca ihyañ man, queri ama ne ndevaco ne man.

21 Ihyañ nación yahn Israel man, ihyañ nación chenahn man, chicuáhn nducoyaca ye che va che nto ino ye nunde yahn ye, ne cotahno ye Dihvo vo Jesucristo.

22 Man ne, nahn Vaco Dendiohs che cahn yan Jerusalén, nde hua devanó nducuahñ che cuahno có min.

23 Ate devanó te nduh cuañ yan ñan che ráhn ne, ráhn Vaco Ndah yahn Dendiohs ri u te va che conún vacoyahn man, ama chuhrihn man.

24 Ate nde hua rendedecadinó yahn chemin, andahre cahno ihyañ u, te nahn dináhn numacuahñ vedeyeno ntiyon che te Dihvo vo Jesucristo u, che cuahndudó ndudo ndah yahn vedeyahino yahn Dendiohs.

25 Man ne, a devano cuacó te nde ama nchuhn che cahndudó ndudo yahn vederihquentiyon yahn Dendiohs ñan ne ne, ametah ndaconan ndihchero ne u.

26 Chemin che cahmá có nchuhn te ametah quendihcó nunde cava nde ama ne,

27 te a cahndudó ñan ne nducuahñ che ndihco cade Dendiohs, nde tah hua chinán.

28 Cuihco nchuhn cudado man ne. Namin codin ne cudado nducoyaca ihyañ che ritahno ye Dihvo vo, te chaconahn Vaco Ndah yahn Dendiohs nchuhn che din ne ntiyon min. Nunde yahn ihyañ chahn ne, a nenevihve nduco yun yahn Dihvo vo.

29 U devanó te cuahn che a conáhn ne, nda sahn che conun se ihyañ che ritahno ye Dihvo vo, ne din se che cuihno cotuhn ye nduhca che retuhn iteuche cuahn che renda lobo.

30 Van man nchuhn ne, quendañ sahn che detoh ñan se ndudo cuaco, cahñcheh se ihyañ che a ritahno ye Dihvo vo, ne quenda se ihyañ lado yahn se.

31 Chemin che cuihco nchuhn cudado, ne cuenecahco ne te ino nduyo nde ro nde ráhn, riyahvé queri ama ne, nde chihterá nune ndutinán cava ne.

32 Dihno, man ne, ndahcó nchuhn tah Dendiohs. Codinahñ ne ndudo yahn vedeyahino yahn ye, te va vederihquentiyon yahn, ne co din che quendi cotahno ne Dihvo vo Jesucristo numa ino ne. Namin nedin dama Dendiohs nchuhn nduco nducoyaca ihyañ che a ndihco vih ye cava che co ye ihyañ yahn man ye.

33 Cava man ne, hua nahn yahn nde ama dehtenduh yahn ihyañ, nde tume, nde tino.

34 Man redin ntiyon cava che ndaca che rechuhnún nduco ihyañ che rinduco ye u. A man nchuhn devano ne.

35 Cuahn dama chicuáhn nchuhn che tihca va che din vo ntiyon, ne conan vo ihyañ che metah yahn ye nduhca che ráhn Dihvo vo Jesucristo: "Tahque ndah che cah vo ihyañ che co che cotah vo che te ye."

36 Cuahn che a chihno cahndudo Pablo ne, chehtihya ye, ne covah ye nduco nducoyaca ihyañ chahn.

37 Tuhme ama chaco nducoyaca ihyañ chahn, chatemahn ye Pablo, ne tenañ ye ihyañ,

38 te ama chi ran ye yahn che ráhn Pablo te ametah ndaconan ndihche vih ye. Tuhme chengu yune ye Pablo nde ñan che va barco.

21

Cuahn Pabło yan Jerusalén

1 Chihco man nuhn dihno vo chahn, chahtenun nuhn chete barco me, ne cuahn dama nuhn nde yahn yahn Cos. Tama ro me ne, nda nuhn yahn yahn Rodas, ne chica nuhn min, cuahn nuhn yan Pátara.

2 Min ndihche nuhn ama barco che cuahn cuahn yahn yahn Fenicia, ne chahtenun nuhn chete, cuahn nuhn.

3 Chuhnan nuhn yahn yahn Chipre, quenan cuahn lado tah cueh nuhn, ne cuahn dama nuhn nde yahn yahn Siria. Nducote barco min ne, yan Tiro chan cava che ndevah chede yahn ne, cuenchahn nuhn.

4 Min ntaca nuhn ihyan che ritahno ye Dihvo vo, ne chahtenan nuhn nduco ye ndache ro. Ihyan chahn ne, din Vaco Dendiohs che checadino ye deh che va che co, ne rahn ye ri ye Pabło che hua cahn ye yan Jerusalén.

5 Ate chihno ndate min ne, chica nuhn min, ne nducoyaca ihyan chahn, nde ndahta, nde chahn, nde chechahya yahn ye man, chengu yune ye nuhn nde chihto nuniyahn. Min chehtihya nducoyaca nuhn, covah nuhn.

6 Chihno yahve vih nuhn man, chahteman vih nuhn man, tuhme chahtenun nuhn barco me, ne ihyan chahn ne, conahn ye ndevaco ye.

7 Chica nuhn yan Tiro, nda nuhn yan Tolemaida. Min ntaca nuhn ihyan che ritahno ye Dihvo vo, ne chahtenan nuhn nduco ye ama ro.

8 Tama ro me ne, chica nuhn min, ne nda nuhn yan Cesarea. Chenda nuhn vaco dihno vo, Felipe evangelista, ama ihyan diacono che ndache chahn, ne min chahtenan nuhn nduco ye.

9 Ihyan min ne, vate cun tahn ntuco daya ye, che rahndudo te Ndudo yahn Dendiohs.

10 A ndeh ro chenah nuhn min cuahn che nda ama ihyan che duche ye Agabo che chica ye estado yahn Judea. Ihyan min ne, rechah Dendiohs che recadino ye deh che va che co.

11 Nda ye nan che chenun nuhn, ne chetah ye payon chahno yahn Pabło. Dechiche ye cah ye man, tah ye man, ne rahn ye:

—Rahn Vaco Ndah yahn Dendiohs te ihyan naci6n yahn Israel che vate ye yan Jerusalén ne, tuhca dechiche ye ihyan che yahn ye payon chahno cuh, ne necah ye ihyan tah sahn tama naci6n.

12 Tuhme nuhn nduco dihno vo che vate ye yan Cesarea ne, ama ndeh rahn nuhn nduco Pabło che hua cahn ye yan Jerusalén.

13 Ndahconan ye, ne rahn ye ri ye nuhn:

—¿Dehco che raco nchuhn, rechah ran ne chedave yahn?, te u ne, a va yan ndiyu deman che dechiche ihyan u, ate a va yan andahre cahno ye u min yan Jerusalén yahn che rahndud6 ndudo yahn Dihvo vo.

14 Nducote hua chicha ndudo yahn nuhn ne, cheguan nuhn riyahve nuhn ihyan, ne rahn nuhn:

—Co nduhca che nahn Dihvo vo Dendiohs.

15 Chihno min ne, chihco yan nuhn dehtenduh yahn nuhn, ne cuahn nuhn yan Jerusalén.

16 Yahn dihno vo che vate ye min yan Cesarea ne, cuahn ye nduco nuhn. Namin cuahn ama dihno vo, yahn yahn Chipre, che duche ye Mnas6n. Ihyan min ne, a rahn ritahno ye Dihvo vo, ne vaco ye va che cuahtenan nuhn min yan Jerusalén.

Chahn Pabło quendihchero ye Jacobo

¹⁷ Cuahn che nda nuhn yan Jerusalén ne, ihyan yan min che ritahno ye Dihvo vo ne, nte ye Dendiohs nuhn numacuahn vedeyeno.

¹⁸ Tama ro me ne, chahn nuhn nduco Pablo, chendihchero ye Jacobo, ne min nto dama nducoyaca intiyaahn yaco.

¹⁹ Pablo ne, necah ye Dendiohs ihyan chahn, tuhme necah cuande ye ihyan queri ama vederihno che din Dendiohs van ihyan nación chenahn.

²⁰ Cuahn che chihnevan ihyan chahn ne, ndeva ye numacuahn vedeyeno yavenan Dendiohs. Tuhme rahn ye ri ye Pablo:

—Dihno nuhn, ndahca nduhca che rahn ne, ate rendihche ne te ama yahn ihyan nación yahn Israel, cade mil ye, ritahno ye Dihvo vo Jesucristo, ne nducoyaca ye ne, nahn ye che quendi vo, dinahn vo ley che dirun Moisés.

²¹ Checadino ihyan chahn te ndih ne, ricuahn ne ihyan nación yahn Israel che vate ye nación chenahn, che hua dinahn ye ley min man, hua nahn ye seña daya ye man, hua quendi ye costumbre ndico yuhn vo man.

²² Man ne, ¿deh din ye?, te ndo dama nducoyaca ye cuahn che cadino ye che a nda ne.

²³ Tahque ndah tuhca codin ne. Vate cun sahn dihno vo muhn che a nahn cuihno ro che vate se yahnte yahn ndudo che cah se Dendiohs.

²⁴ Cuinduco ne sahn, ne cah ne tume sahn cava che cua se dehtenduh che co vedino ro min cuahn che va che ndu rah tin se. Tuhme cadino ihyan chahn te hua cuaco nduhca che rahn ihyan nduco ye yahn ne, ne codevano ye te namin ndih ne, redinahn ne che rihquentiyon ley.

²⁵ Me ihyan tama nación che ritahno ye Dihvo vo ne, a dirun nuhn yahn ye che hua tumecah ye yahn nducuahn dehtenduh, atenan o ino che tuhchan. Hua cheh ye yute che ri vedino, rihco ihyan nan dehtenduh che redin vahn ye dendiohs yahn ye man, hua cheh ye yun man, yute yahn ite che hua ra yun yahn te man, hua cuahtenan ye nduco ndahnta che ndiyu ndahnta yahn ye man.

Din se preso Pablo chete yaco chahte

²⁶ Tuhme chinduco Pablo sahn che cun chahn, ne tama ro me ne, ndodave ye nduco se nduhca costumbre min, ne chenda ye chete yaco chahte cava che co ye chidocuyan ro che cuihno yahnte yahn se man, cah queri ama se vedino yahn se man.

²⁷ Ate cuahn che a nahn tuno nduh che ndache ro che va che cah sahn chahn vedino yahn se ne, nda ino cun sahn nación yahn Israel che chica se yahn yahn Asia, ne ndihchero se Pablo chete yaco me. Chinun se nducoyaca ihyan yan, ne tumangan se Pablo,

²⁸ cah se:

—Nchuhn, ihyan nación yahn Israel, ¡cuinan ne nuhn! Cotah vo sahguh che quechica se nduh yan nduh yan, rinun se ihyan che hua dinahn ye che rihquentiyon nación yuhn vo man, yaco yuhn vo man, ley yuhn vo man. Avane ne, nda se ama o sahn tama nación muhn chete yaco, detoh nan se muhn nan che rendeva vo yavenan Dendiohs.

²⁹ Tihca rahn sahn chahn yahn che ndihchero se Pablo viyan me che nduco ye Tróximo, ama sahn yan Efeso, ne rahco se te co quenda ye sahn min chete yaco.

³⁰ A nahn nducoyaca ihyan yan, aderano ye, ndo dama ye, ne tumangan ye Pablo numacuahn vedetan. Chihnda rudo ye ihyan cuahn chevah, ne ndetahno necahde ye chende yaco.

³¹ Adeche cahno ihyan chahn Pablo cuahn che checadino ihyan ndinan yahn sandado che nducoyaca ihyan yan Jerusalén, a nto dama ye numacuahn vedetan.

³² Ndetahno quenda ihyan ndinan me sandado yahn ye man, capitán man, ne cuahn ye rano ye nan che nto dama ihyan yan chahn. Cuahn che ndihche ihyan yan chahn che nda ihyan ndinan me nduco sandado chahn ne, chenguan ye rahn ye Pablo.

³³ Chihquentiyon ihyan ndinan me che din sandado chahn preso Pablo, dechiche se ihyan nduco o cadena. Tuhme tumerune ye duh ihyan ye man, deh nedin ye man.

³⁴ Ihyan yan chahn ne, a vih rah ama, a vih rah tama ye, ne nducote hua chi chenahn ihyan ndinan me yahn che ama vari chende ye ne, chihquentiyon ye sandado che quenda se Pablo chete cuartel.

³⁵ Cuahn che nda sandado chahn nduco Pablo nan nda che renda chete cuartel ne, quenda yaco se ihyan, te ama canda chende ihyan yan chahn,

³⁶ ndito cahche ye, rah ye:

—¡Cuihno nchuhn sahn tih!

Cahndudo Pablo nan ihyan yan

³⁷ Cuahn che nda se nduco Pablo chendevah cuartel ne, tumerune ye ihyan ndinan me:

—¿A te yune ne che cahmá ama o ndudo ne?

Ndahconan ihyan ndinan me:

—¿A ri rente devaco griego?

³⁸ ¿A ndiyu di sahn nación yahn Egipto che ndedecuen canda a rahn me, quenda cun mil sahn rihno ihyan cuahn icoyahn?

³⁹ Tuhme ndahconan Pablo:

—U ne, ihyan nación yahn Israel u. Yan vacó ne, Tarso, ama yan chahte, yahn yahn Cilicia. Codin ne favor, ne te yune ne che cahmá nduco ihyan sih.

⁴⁰ Cah yune ihyan ndinan me che cahma Pablo, ne chandi ye nan nda me, din tah ye cava che cuahte dihn chende ihyan yan chahn. Tuhme cahndudo ye devaco hebreo:

22

¹ —Nducoyaca nchuhn, ihyan ndico man, dihnó man, cuihcovan ne che cahmá, te hua dehva nedín yahn ne.

² Cuahn che chihnevan ihyan chahn che devaco hebreo rente ye ne, tahque chahte dihn chende ye, ne quendi ye rahn ye:

³ —U ne, ndata yahn Israel u. Chihndeyán yan Tarso, yahn yahn Cilicia, ate muhn yan Jerusalén chihotá. Muhn chahn ndáh, Gamaliel chicuahn ye u nducoahn ley che dinahn ihyan ndico yuhn vo. Numacuahn ro ne, redinahn numa inó nducoahn che rihquentiyon Dendiohs, nduhca che redin nchuhn man ro cuh.

⁴ Ro menan ne, tihca redin tán nduco ihyan che ritahno ye Jesucristo, ne retendah vah nde ndahta, nde chahn ye, rih ihyan vacoyahn, nde nahn decuihnó ihyan.

⁵ Chidocuyan che tahque ndinan nduco intiyahn, a devano cuaco ye yahn chemin, te a ihyan chahn te ye caca u cava che cahn yan Damasco, nguá nducoyaca ihyan che ritahno ye ihyan min, din nuhn castigo ihyan muhn yan Jerusalén.

Cahndudo Pablo nduhca che chitahno ye Dihvo vo Jesucristo

6 'Ate cuahn che cuahn ninó yān Damasco, tenduh nān inguiyāhn ne, adenān chiya chihto nān āma dave che chica nān ro,

7 ne chendāh nde ndiyāhn. Ura min no chihnevān āma ndudo che rāhn nducó: "Saulo, Saulo, ¿dehco che redin tan nduco ihyān yāhn?"

8 Tuhme tumeruné: "Dihvé, ¿duh ndih ne?" Ndahconan ndudo me: "U che Jesucristo yahn yān Nazaret. A u che redin tan nducó."

9 Sāhn che nduco se u ne, āma dihya se chi, ndihche se dave me, ate hua chenāhn se ndudo me.

10 Tuhme tumeruné: "Dihvé, ¿deh va che dín ne?" Rāhn Dihvo vo ri ye u: "Cuenecuen, ne cuehn dame yān Damasco. Min cahma ihyān co ye dí deh che va che dín."

11 Chi ve u, dín dave me, ne a sāhn combiero yāhn chetāh se tāh, quenda nan se u nde ndā nuhn viyān me.

12 'Min va āma ihyān che duche ye Ananías che redinahñ ye ley che dirun Moisés, ne nducoyāca ihyān naciōn yahn Israel che vate ye yān min ne, āma renevāhñecun ye ihyān.

13 Ndā ihyān min nān che quenún, ne rāhn ye: "Dihno Saulo, mān ne, ndaconan co ro nan." Ndetāhno chi ro nān, ne ndihcheró ihyān.

14 Tuhme rāhn ye ri ye u: "Dendiohs yahn ihyān ndico yuhn vo ne, a tendāh nun ye dí nde ro menān cāva che coneñ deh che nahn ye mān, cāva che ndihche Daya Ndah yahn ye mān, cāva che cahneven ndudo che cahma ye co ye dí mān.

15 Tihcā dín Dendiohs, te va che cuahndode ndudo yahn ye nān nducoyāca ihyān mān, va che cuacotohn ndudo yahn nducuahñ dehtenduh che ndihchero mān, chihneven mān.

16 Mān ne, ¿dehco che quenān rine? Cuenecuen, ne cuedenune dí, cuah Dihvo vo Jesucristo cāva che nchahco Dendiohs nunde yehn."

Rāhn Pablo nduhcā che dechuh Dihvo vo Jesucristo ihyān, cuahndudo ye vān ihyān naciōn chenāhn

17 'Cuahn che ndaconān muhn yān Jerusalén ne, cháhn, covāh chete yāco chahte. Numanahñ che revāh ne, chinahñ āma vederihno nān.

18 Ndiheró Dihvo vo Jesucristo, ne rāhn ye ri ye u: "Cuique muhn yān Jerusalén tenun no, te muhn ne, hua tumacāh ihyān che cuahndode ndudo yāhn."

19 Tuhme rāhn rí ihyān: "Dihvé, nducoyāca ihyān sih ne, a devano ye te quechicā nduh yān nduh yān, rendā chete yāco, rehuá ihyān che ritahno ye ndih, ne ráhn ihyān mān, ríh ihyān vacoyāhn mān.

20 Cuahn che nte cāde intiyañ che va che coh Esteban, ihyān min che dinahñ ye ndudo yahn ne mān, cahndudo ye ndudo yahn ne mān ne, namin nducó, chí dāma ndudo yāhn nduco ye, nde tuno dín cudādo tino yahn sāhn che chihno se ihyān."

21 Ate rāhn Dihvo vo ri ye u: "Cuehn, te u dechúh dí yāhn yahn, cuahndode ndudo yāhn vān ihyān naciōn chenāhn."

Va Pablo tāh ihyān ndinān yahn sandādo

22 Nde ndudo min chihnevan ihyān yān chahn, tuhme canān rah ye:

—¡Cuihno nchuhn sāhn tih! ¡Ametah nahn ndihchero nuhn sāhn!

23 Nducote quendi rah ihyān chahn numacuahn vedetān, ri yāco ye tino yahn ye mān, ri yāco ye yuniyāhn mān,

²⁴ chihquentiyon ihyan ndinan me che quenda sandado chahn Pablo chete cuartel, ne cuahn se ihyan cava che cahma ye deh cuande che tihca rah ihyan yan chahn yahn ye.

²⁵ Ate cuahn che a dechiche sahn chahn Pablo che a cuanan cuahn se ihyan ne, tumerune ye sahn capitán che nti se min:

—¿A rihquentiyon ley che cuahn nchuhn ama ihyan che ndi cuande ye Roma numanahn che metah techecade ne yahn ye?

²⁶ Cuahn che chihnevan capitán chemin ne, chahn se, chengo se ihyan ndinan yahn se:

—Cuihco ne cudado deh che redin ne, te sahnghah ne, Roma ndi cuande se.

²⁷ Tuhme cuahn ihyan ndinan me nan Pablo, ne tumerune ye ihyan:

—¿A cuaco che Roma ndi cuande di ne?

Ndahconan Pablo yahn ye:

—Taca hua. Roma ndi cuandé.

²⁸ Tuhme rahn ihyan ndinan me ri ye ihyan:

—U ne, ama ndeh tume nedihvé cava che chi cuandé Roma.

Rahn Pablo:

—Ate u ne, dehve nedihvé che ndi cuandé min, te chidá ne, min ndi cuande ye.

²⁹ Nduco chemin ne, sandado che vatendi yan se che cuahn se Pablo ne, ndaca dame se, chihcoman se ihyan. Nde man ihyan ndinan me ne, nducote checadiño ye che Roma ndi cuande Pablo ne, dihya nun ino ye chi yahn che chihquentiyon ye che chahyato ye.

Chahn Pablo nan nducoyaca sahn ndinan yahn nación yahn Israel

³⁰ Tama ro me ne, nducote nahn cadino ihyan ndinan me deh cuande che redin tan ihyan yan chahn nduco Pablo ne, chihquentiyon ye che ntahte sandado cadena che nchiche ihyan, ne cah ye nducoyaca sahn ndinan yahn nación yahn Israel, chidocuyan ndinan man, sahn intiyahn man. Tuhme tendah ye Pablo, ne nda ye ihyan nan sahn chahn.

23

¹ Ndhichero Pablo nducoyaca sahn ndinan chahn, ne rahn ye:

—Nchuhn, dihnó, u ne, dave yavenán nan Dendiohs nde meniyon.

² Tuhme chidocuyan che tahque ndinan che duche ye Ananías ne, chihquentiyon ye sahn che vatendi se min che cuahn se chende Pablo.

³ Rahn Pablo ri ye ihyan min:

—O nan o chende ne, Dendiohs tihca cuahn ye ndih. ¿A ndiyu va ne tan che techecade ne yahn nduhca che rihquentiyon ley? ¿Me dehco che redin ne che hua rihquentiyon ley, chihquentiyon ne che cuahn sahn sih u?

⁴ Sahn che vatendi min ne, rahn se ri si Pablo:

—¿Dehco che rahn tan nduco chidocuyan che tahque ndinan?, te a Dendiohs che necah ye vederihquentiyon ihyan.

⁵ Rahn Pablo:

—Dihno, a ndirun nan Ndudo yahn Dendiohs: “Hua cahme tan yahn ihyan ndinan yahn yan vaque.” Ate hua nta tin che ihyan tih che chidocuyan che tahque ndinan.

⁶ A devano Pablo te sahn ndinan chahn che nto dama se, retechecade se ne, o cuan ndi se. Ama cuan se ne, saduceo, ne tama cuan se ne, fariseo. Chemin che rahn ye numa dito ye:

—Dihno, u ne, fariseo u. Namin chidá ne, fariseo ye. Retechecade nchuhn yahn yahn che ritahnó te va che ntuche tenahn.

⁷ Cuahn che tihça rahn ye ne, sahn fariseo chahn nduco sahn saduceo chahn ne, canan rahteruhn chende se, ne hua chi dāma ndudo yahn se nduco vih,

⁸ te sahn fariseo ne, ritahno se te va che ntuche tenahn man, vate ángel man, vaco man. Ate sahn saduceo ne, hua ritahno se nde ama nan dehtenduh che tihchan.

⁹ Ama vari chende nducoyaca sahn chahn. Tuhme necuan neve sahn devano ley che dirun Moisés che ndi cuande se van fariseo, ne rahn nan se Pablo:

—Sahnguh ne, metah nunde yahn se. Ndete che ndiyahve ama vaco ndah, o ama ángel sahn ne, hua ndahça che din tan vo nduco se, te co din vahcho vo yahn Dendiohs.

¹⁰ Nducote ama rahteruhn chende sahn chahn ne, vah ihyan ndinan me che denan cahno se Pablo. Chemin che dechuh ye che chehua sandado cava che ndetendāh se ihyan van sahn chahn, ndiquenda se ihyan nan cuartel.

¹¹ Vino min ne, chihnde ro Dihvo vo Jesucristo nan Pablo, ne rahn ye ri ye ihyan:

—Pablo, hua dehve rahque, te nduhça che cahndode ndudo yahn muhn yan Jerusalén ne, namin va che cuahndode min yan Roma.

Rinuhn ino sahn yan Jerusalén taça cahno se Pablo

¹² Tama ro me, ura che a chi dave ne, yahn sahn nación yahn Israel ntuhno se nduco vih che cahno se Pablo. Cah se ndudo yahn se numacuahn vedeyudo che nde hua cheh se nde hua cuh se numanahn che ametah dinahn se ndudo min.

¹³ Sahn che tihça ntuhno chahn ne, nchuh ca o raco ihyan se.

¹⁴ Chahn sahn chahn nan chidocuyan ndinan man, sahn intiyahn yahn nación yahn Israel man, ne rahn se:

—Nuhn ne, ntuhno nuhn, ne cah nuhn ndudo yahn nuhn numacuahn vedeyudo che nde hua cheh nuhn nde hua cuh nuhn numanahn che ametah cahno nuhn Pablo.

¹⁵ Man ne, nchuhn nduco nducoyaca ihyan ndinan chenahn ne, cuedechuh ne ndudo yahn ihyan ndinan yahn sandado che checu ye Pablo caviyan muhn nan ne, din ça ne che nahn techecade ndah ne yahn se. Me nuhn ne, cuahtenan yan nuhn yune, ne ura che metah nda nino se ne, cahno nuhn sahn.

¹⁶ Ate sahn dihn dācua Pablo ne, checadino se che nahn cahno sahn chahn ihyan, ne chahn se nan cuartel, chengo se ihyan.

¹⁷ Tuhme cah Pablo ama sahn capitán, ne rahn ye ri ye sahn:

—Cuiquenda ne sahn dihn cuh nan ihyan ndinan yahn ne, te va ama ndudo che cahma se nduco ye.

¹⁸ Capitán min ne, quenda se sahn dihn me nan ihyan ndinan me, ne rahn se:

—Pablo che quenun ye vacoyahn ne, cah ye u, ne rahn ye ri ye u che checú sahn dihn cuh nan ne, te va ama ndudo che cahma se nduco ne.

¹⁹ Ihyan ndinan me ne, chetah ye tah sahn dihn me, quenda ye sahn ama lado, ne tumerune ye sahn:

—¿Deh che nahn cahme nducó ne?

²⁰ Tuhme rahn sahn dihn me ri se ihyan:

—Yahn sahn yan ne, ntuhno se nduco ihyan ndinan yahn nación yahn nuhn che caca ye ndih che ngu ne Pablo nan ye caviyan, cava che techecade ndah ye yahn ye.

²¹ Ate hua cotahno ne che cahma ye, te nchuh ca o raco se chenun ndeh se, chenan rino se Pablo. Sahn chahn ne, a cah se ndudo yahn se numacuahn vedeyudo che nde hua cheh se nde hua cuh se numanahn che ametah cahno se ihyan. Man ne, a vateyan se, chenan rino se deh ndudo ndahconan ne.

²² Tuhme rahn ihyan ndinan me ri ye sahn dihn me che hua cahma se nduco nde ama ihyan che cah se, checadino ye yahn chemin, ne ndedechuh ye sahn.

Dechuh ye Pablo tah gobernador Félix

²³ Cah ihyan ndinan me o sahn capitán yahn ye, ne chihquentiyon ye sahn che cahcoyan se cun ciento quenan ino raco ndiche sandado, o ciento sahn che rica cah man, o ciento sahn che nda lanza man, ino raco ndiche sahn che ra yuhdo man. Cuahteyan se cava che cahñ se yan Cesarea nan rahco nun vino.

²⁴ Namin chihquentiyon ye che cahcoyan se ama o caballo che ca Pablo man, din se cudado ihyan man, cava che ndahca nda ye nan gobernador Félix.

²⁵ Nduco sahn capitán chahn dechuh ye ama caca nan che dirun ye tuhca:

²⁶ “Gobernador Félix che ama renevahne cun ndih, u, Claudio Lisias nté Dendiohs ndih.

²⁷ Ihyan nación yahn Israel ne, din ye preso sahn guh, a nahn cahno ye sahn, ate cuahn che checadino che Roma ndi cuande se ne, chahn nduco sandado yahn, chehnevi sahn tah ye.

²⁸ Nducote nahn cadino deh cuande che din ye preso sahn ne, quenda sahn nan sahn ndinan yahn ye.

²⁹ Min checadino te nahn techecade sahn chahn yahn se nduhca che rihquentiyon ley yahn man se. Ate nduhca che rihquentiyon ley yahn vo ne, nde metah deh cuande che cahno ye sahn, nde hua ne che co se preso.

³⁰ Adiva checadino te ama yahn sahn yan ntuhno se che cahno se sahn. Chemin che man ne, dechuh sahn nan ne. A rahn ri sahn ndinan chahn che chi se nan ne, cuhnde cade yahn se nduco se. Caviyan tuhme.”

³¹ Dinahn sandado chahn che chihquentiyon ihyan ndinan me, ne quenda se Pablo vino min, nda se nde yan Antipatris.

³² Tama ro me ne, a deman sandado ra yuhdo cuahn se nduco Pablo, ne sahn chenahn chahn ne, ndaconan se nan cuartel.

³³ Cuahn che nda se yan Cesarea ne, necah se caca me tah gobernador. Namin necah se Pablo tah ye.

³⁴ Cuahn che chihno ndihchenan gobernador caca me ne, tumerune ye Pablo deh estado ndi cuande ye, ne cuahn che checadino ye che Cilicia ne,

³⁵ rahn ye ri ye ihyan:

—Techecade yehn cuahn che nda sahn che rica nunde se yehn.

Tuhme chihquentiyon ye sandado che din se cudado ihyan chete palacio yahn Herodes.

24

Pablo nan gobernador Félix

¹ Chihno uhn ro min ne, Ananías, chidocuyan che tahque ndinan nduco neve sahn intiyahn ne, nda se min yan Cesarea, nda se ama abogado che duche se Tértulo. Chahn sahn chahn nan gobernador cava che caca nunde se yahn Pablo.

² Cuahn che a chehua sandado Pablo ne, canan Tértulo, rica nunde se yahn ye:

—Gobernador, nundihve cuahn ndih yahn che numacuahn vededevano yahn ne, redin ne cudado numachahte yan vaco nuhn, ne ama dihn va man, ama ndahca chenan nuhn man.

³ Gobernador Félix, ama renewahnecon nuhn ndih, ne nte nuhn nundihve cuahn ndih yahn nducuahn che redin ne cava nuhn.

⁴ Man ne, cava che hua nduh tihyon nuhn ura yahn ne ne, codin chahtino ne, cuihnevan ne menan lihn che cahma nuhn.

⁵ Sahn tih ne, nduhca ama cah cava nuhn, tihca se, te quechica se numachahte yahn yahn Roma, rendedecuan se ihyan naci6n yahn Israel, rinun se ihyan che rahteruhn ye nduco vih. Namin ndinan se yahn partido yahn sahn yan Nazaret che duche se Jesús.

⁶ Nde nahn detoh nan se yaco chahte yahn nuhn. Chemin che chetah nuhn sahn, nahn techecade nuhn yahn se nduhca che rihquentiyon ley yahn nuhn.

⁷ Ate Lisias, ihyan ndinan yahn sandado ne, chenda ye, ntico ye sahn numacuahn fuerza tah nuhn,

⁸ ne rahn ye te duh ihyan che nahn caca nunde ye yahn se ne, chi ye nan ne. Co cacarune man ne sahn, ne cadino ne te cuaco nducuahn che rica nunde nuhn yahn se.

⁹ Sahn naci6n yahn Israel che nduco se min ne, namin rahn se te cuaco nducuahn chemin.

¹⁰ Tuhme din tah gobernador cava che cahma Pablo, ne rahn ye:

—Ama yen6 che ndih techecade ne yahn, te a devan6 te a ndeh nduyo rihquentiyon ne yan vac6.

¹¹ Co cadino man ne te coman ri ndichio ro che nda yan Jerusal6n cava che ndevá yavenan Dendiohs.

¹² Hua rente candá nduco ihyan, hua rendedecuán ihyan, nde huane chete yaco chahte man, nde huane chete yaco cahya man, nde huane viyan man.

¹³ Sahn sih ne, hua co ndahco cuaco se nde ama dehtenduh che rica nunde se yahn.

¹⁴ Cahma cuac6 có ndih te redinahn vederihquentiyon ra che ndahco cade Dendiohs yahn ihyan ndico yahn. Sahn sih ne, rahn se te a deva vih vederihquentiyon min, ate hua, te ritahn6 Dendiohs man, nducuahn ley yahn ye man, nducuahn vederihquentiyon yahn ye che dirun ihyan profeta man.

¹⁵ Nduhca che ritahno sahn sih ndudo yahn Dendiohs che va che ntuche nducoyaca tenahn, ihyan che ndah ye nan Dendiohs man, ihyan che hua ndah ye man ne, tihca ritahn6.

¹⁶ Chemin che ama rihc6 cudado ro ro cava che dave yavenan nan Dendiohs man, nan ihyan man.

¹⁷ Chihno ndeh nduyo che quechicá nan yahn yahn ne, ndaconán naci6n yahn cava che necáh tume che ndi vedevahino cava ihyan chevah man, cah vedino yahn nan Dendiohs man.

¹⁸ Chihno che ndo davé nduhca costumbre yahn nuhn ne, ama o sahn naci6n yahn Israel che chica se yahn yahn Asia ne, ndihchero se u chete yaco chahte ura che recáh vedino yahn. Hua redin candá, nde hua yahn ihyan nduc6.

¹⁹ A sahn chahn che va che chi se muhn, caca nunde se yahn ndete che va dehca che nedín yahn se.

²⁰ Ndete che hua ne, sahn sih cahma se deh nunde ntaca se ro che ndo dama se, techecade se yahn.

²¹ Ametah nde ama nunde yahn atenan che ama dito rahn nan se tuhca: "Man ne, retechecade nchuhn yahn che ritahnó che va che ntuche tenahn."

²² Cuahn che chihnevan Félix che tihca ne, nducote a ndah devano ye nduhca che ritahno ihyan Dihvo vo Jesucristo ne, chaconahn nan ye che retechecade ye, ne rahn ye ri ye sahn chahn:

—Cuahn che nda Lisias, ihyan ndinan yahn sandado ne, cadino ndah yahn dehtenduh che rica nunde nchuhn.

²³ Tuhme chihquentiyon Félix capitán me che quendi se, din se cudado Pablo. Ate hua tihyon chiche se ihyan man, cah yune se che cahn ihyan yahn ye quendichero ye ihyan man, cah ye dehtenduh yahn ye man.

²⁴ Chihno neve ro me ne, chenda Félix nan che retechecade ye, ne nduco ye ndahta yahn ye, Drusila, ama tahn nación yahn Israel. Dechuh tun ye che chehua Pablo cava che cahma ye nduhca che va che cotahno ihyan Dihvo vo Jesucristo.

²⁵ Ate cuahn che rahn Pablo yahn che va che cahcoman ihyan dehtenduh che ri yeno man ye man, va che dinahn ye che rihquentiyon Dendiohs man, va che techecade Dendiohs yahn ihyan man ne, dihya Félix chi, ne rahn ye ri ye ihyan:

—Nduco chemin ne, a va. Tama ro cuahn che conun yahn ne, tahvé che ngua di.

²⁶ Namin quenán rino Félix che cah Pablo tume ihyan cava che ntahte ye ihyan, ne chemin che ama ndeh yune cah ye ihyan cava che nte ye nduco vih.

²⁷ Tihca chihno o nduyo, ne ndiquendah Félix che quenán ye gobernador, chenda Porcio Festo menun ye. Nducote Félix ne, nahn ye che quendi co yeno ihyan nación yahn Israel nduco ye ne, hua ntahte ye Pablo.

25

Pablo nan gobernador Festo

¹ Tuhme nda Festo cava che conan ye gobernador. Chihno ino ro min ne, chica ye min yan Cesarea, ne nda ye yan Jerusalén.

² Chidocuyan che tahque ndinan nduco sahn ndinan yahn nación yahn Israel ne, necah cuande se ihyan nduhca che a chica nunde se yahn Pablo.

³ Nducote a ntuhno sahn chahn che dechuh se sahn che cahno se Pablo cuahn yune ne, chica se ama favor chahte Festo che tahve ye che quengua Pablo yan Cesarea.

⁴ Ate ndahconan Festo te Pablo ne, a yan Cesarea quenán ye vacoyahn, ne cuihno neve ro ne, va che ndaconan man ye min nan che rihquentiyon ye.

⁵ Rahn ye ri ye sahn chahn:

—Co cahn nchuhn yan Cesarea nducó, ne min cuhnde cade yahn ne nduco sahn min ndete che va nunde chahte yahn se.

⁶ Atenan nun, o ndiche ro quenán Festo yan Jerusalén, tuhme conahn ye yan Cesarea. Tama ro me ne, chihnde ye nan che retechecade ye, ne tahve ye che chehua Pablo.

⁷ Cuahn che nda Pablo ne, ama yahn sahn ndinan yahn nación yahn Israel che chica se yan Jerusalén, nda se min ne, chahtendi se, chica nunde se yahn ye yahn ama nde nan nunde rahte, ate nde ama hua chi ndahco cuaco se.

⁸ Tuhme rahn Pablo, rendedevahn ye ihyan:

—U ne, hua quendihco nde ama nunde. Hua chihnga rahn, nde huane yahn ley yahn ihyan nación yahn Israel, nde huane yahn yaco chahte yahn ne, nde huane yahn emperador che rihquentiyon ye Roma.

⁹ Ate nducote nahn Festo che co yeno ihyan nación yahn Israel nduco ye ne, tumerune ye Pablo:

—¿A nahn cahn yan Jerusalén ça va che min techecadé yehn ne?

¹⁰ Ndahconan Pablo yahn ye:

—A nan inti yahn yahn emperador yahn Roma ntí meniyan. A muhn va che cuhnde cade yahn. A devano ndah ne te nde ama nunde hua quendiho yahn ihyan nación yahn Israel.

¹¹ Ndete che quendiho ama nunde che va che coh ne, cuihquentiyan ne che coh. Ate ndete che hua cuaco nde ama nan dehtenduh che rica nunde sahn sih yahn ne, nde ama ihyan hua co necah se u tah se. Man ne, ricá che man emperador teche cade ye yahn.

¹² Nte cade Festo nduco ihyan che rinañ ye ihyan, tuhme rahn ye ri ye Pablo:

—Man ne, nducote a chique che techecade emperador yehn ne, nan emperador cahn.

Pablo nan rey Agripa

¹³ Chihno neve ro min ne, rey Agripa nduco Berenice ne, chahn ye yan Cesarea che ndihchero ye Festo.

¹⁴ Ndeh ro chahtenan ihyan chahn min, ne ama ro ne, rente Festo nduco rey me yahn Pablo, ne rahn ye:

—Quenun ama preso vacoyahn che chaconahn Félix sahn.

¹⁵ Cuahn che chahn yan Jerusalén ne, chidocuyan che tahque ndinan nduco sahn ndinan yahn nación yahn Israel ne, nte cuande se u yahn nunde che redcueh dame se sahn, ne chica se che coh se.

¹⁶ Ndahconán yahn sahn chahn te ihyan ndinan yahn Roma ne, hua rihquentiyan ye che coh ama ihyan numanahn che ametah cuhnde cade yahn ye nduco ihyan che rica nunde ye yahn ye.

¹⁷ Chemin che cuahn che nda sahn chahn muhn ne, hua chihco rinó ihyan. Tama ro me ne, chahn nan che retechecadé, ne tahvé che chehua sahn preso me.

¹⁸ U rahco te co ama nunde chahte quendiho se, ate sahn che rica nunde chahn ne, hua ri deh nunde che redcueh dame se sahn.

¹⁹ Deman yahn dehtenduh che ritahno se nduco yahn ama ihyan che duche ye Jesucristo che a ndih ye, ne sahn preso ne, rahn se te quenduche ye. A chemin no che rica nunde sahn chahn yahn se.

²⁰ Nducote u ne, hua devano taça techecadé yahn dehtenduh che tihchan ne, tumerune sahn ndete che nahn cahn se yan Jerusalén, cuhnde cade yahn se.

²¹ Ate chica se che techecade emperador Augusto yahn se. Chemin che chihquentiyan che ndonun se vacoyahn nde ro che co dechuh sahn tah ye.

²² Tuhme rahn Agripa ri ye Festo:

—Namin u nahn cahneván che cahma se.

Ndahconan Festo yahn ye:

—Caviyan cahnevan ne che cahma se.

²³ Tama ro me ne, Agripa nduco Berenice ne, chenda ye numacuahn vedeyudo chete palacio nduco ihyan ndinan yahn sandado man, ihyan nan che vate ye yan min man. Tuhme tahve Festo che chehua Pablo,

²⁴ ne rahn ye:

—Rey Agripa man, nchuhn che nto dama ne muhn man, nga sahnguh. Ama yahn sahn ndinan yahn nación yahn Israel, nde chica nunde se yahn

se cuahn che cháhn min yan Jerusalén, nde nda se muhn, hua renguan se rica se u che cahcantiyón che coh se.

²⁵ Ate u ne, hua ntacá nde ama nunde yahn se cava che coh se, ne nducote man se chica se che techecadé emperador Augusto yahn se ne, chihquinó che dechúh sahn nan ye.

²⁶ Ate nducote hua devanó deh nunde yahn se che dirún nan cava che dechúh yahn emperador yuhn vo ne, tahvé che chehua sahn. Nti se nan nducoyaca nchuhn, menan vihca nan ndih, rey Agripa, cava che tumacadino ne deh nunde quendihco se che co dirún nan cava che dechúh,

²⁷ te rahcó te dín ama vedenine ndete che dechúh ama preso che nde hua dirún deh nunde quendihco se.

26

Chihnevan rey Agripa yahn Pablo

¹ Tuhme rahn Agripa ri ye Pablo:

—Co cahme.

Chenihyon Pablo tah ye, ne rahn ye:

² —Rey Agripa, ama ndah ro yahn che co cahma nan ne yahn nducuah che rica nunde sahn ndinan yahn nación yahn Israel yahn,

³ te ndih ne, a devano ne nducuah costume yahn nuhn, ihyan nación yahn Israel man, yahn che ndeh cuan ndi nuhn man. Chemin che ricá ndih che din chahtino ne yahn nducuah che cahma.

Nduhca che din Pablo ro che ametah cotahno ye Dihvo vo Jesucristo

⁴ Nducoyaca ihyan nación yahn Israel ne, ndihche ye nduhca che quechicá yan vacó man, yan Jerusalén man, nde ro che lihn u.

⁵ Ndete che nahn ye ne, co cahma ye te nde ro che chihchá ne, chinducó partido yahn fariseo, partido min che tahque yudo vederihquentiyon yahn.

⁶ Man ne, cuhnde cade yahn, te ritahnó che va che ndedetuhche Dendiohs tenahn nduhca che a cah ye ndudo yahn ye ihyan ndico yahn nuhn.

⁷ Nducoyaca ihyan, nduh che ndichio ndata yahn Israel ne, ritahno ye che dinahn Dendiohs ndudo yahn ye, ne chemin che, nde ro nde rahn, redinahn ye che rihquentiyon ye man, rendeva ye yavenan ye numacuahn chedave yahn ye man. Rey Agripa, man ne, a yahn che tihca ritahnó che va che conahn ndudo min che rica nunde sahn chahn yahn.

⁸ ¿Dehco che hua ritahno nchuhn che Dendiohs va che ndedetuhche ye tenahn?

Nduhca che din tan Pablo ro menan me, nahn cahno ye ihyan che ritahno ye Dihvo vo Jesucristo

⁹ Ro menan me ne, ndedecadinó che va che din tan nduco ihyan che ritahno ye Jesucristo yahn yan Nazaret,

¹⁰ ne tihca din tan nduco ihyan chahn yan Jerusalén. Chidocuyan ndinan ne, dirun ye ama cava, te ye u cava che cuh ihyan vacoyahn, ne chih ama yahn ihyan che ritahno ye Jesucristo. Cuahn che rihno ye ama cha ihyan chahn ne, namin nducó ri dama ndudo yahn nduco ye.

¹¹ Ama ndeh yune cah rihn ihyan chahn cava che cahcoman ye che ritahno ye Jesucristo. Tihca redin nduh yan nduh yan chete yaco, te ama din tan nduco ihyan chahn che nde tama nación rahn, rinuhn ihyan.

Rente Pablo nduhca che chitahno ye Dihvo vo Jesucristo

12 'A ntiyon min cháhn yān Damasco, ndá çaca che te chidocuyan ndinan chahn u.

13 Ndiñ rey, cuihcovan ndah ne. Nān inguiyahn, cuahn che quenun yuné, cuáhn ne, u nduco sahn che nducó, ndihchero nuhn āma dave che chica nan ro, che tahque yudo ro che co yahn che quendihco nan ro, ne chiya chihito nan nuhn.

14 Chera nducoyaca nuhn ndiyahn, ne chihneván āma ndudo devaço yahn mán, che rahn: “Saulo, Saulo, ¿dehco che redin tan nduco ihyan yáhn? Che tihça redin ne, nduhça redin itenine che renun yah mān te ite, renun te yahn cuiyon che rahco nduco ihyan ite.”

15 Tuhme tumeruné: “Dihvé, ¿duh ndih ne?” Ndahconan Dihvo vo, ne rahn ye ri ye u: “A u che Jesucristo che redin tan nducó.

16 Cuenecuen, te chihnde ró nan çava che din ntiyon yáhn. A tendahnún di çava che cuacotohn ndudo yáhn che ndihchero u mān ro cuh. Mān va ca che ndihchero u, ne tihça cuacotohn ndudo yahn chemin.

17 Ndedeváhn di tah ihyan nación yahn Israel mān, tah ihyan nación chenahn mān, te van ihyan chahn dechúh di,

18 çava che cacuehn ihyan, ne hua quendi ye vedetundo yahn ye mān, hua quendi ye, dinahn ye che rihquentiyon chundah mān. Ate quendi ye vededevano mān, dinahn ye vederihquentiyon yahn Dendiohs mān. Namin cotahno ye u, ne nduco chemin ne, ndaça ye vederenchahco yahn nunde yahn ye, ne cuahtenan ye dāma nduco ihyan yahn Dendiohs.”

Dinahn Pablo ndudo che chihnevan ye

19 Rey Agripa, hua chacotáhn ndudo che chica vahchetero, chihneván,

20 te cahndudó ndudo min nan ihyan yān Damasco mān, nan ihyan yān Jerusalén mān, nan ihyan che vate ye numachahte estádo yahn Judea mān, nan ihyan che vate ye nación chenahn mān. Riyahvé ihyan chahn che nto ino ye nunde yahn ye mān, che cuah ye Dendiohs mān, che ndahça cuahtenan ye çava che çahco ro ye che a nto ino ye mān.

21 Yahn che tihça redín ne, sahn nación yahn Israel ne, tumangan se u min chete yaço chahte, nahn çahnó se u.

22 Ate rinan Dendiohs u, ne nde meniyon riquendí rahndudó ndudo yahn ye nan nducoyaca ihyan, ihyan nahñ mān, ihyan chevah mān. Ndudo che din Dendiohs che dirun ihyan profeta mān, Moisés mān, yahn che va che co ne, a ndudo min no che rahndudó.

23 Rahndudó che a va che chuhrihn ihyan min che a va çade che chi ye, ndedevahn ye ihyan iyehñse, ne cuihno che coh ye ne, ihyan min menañ vihca va che ntuche ye van tenahn, çah ye ndudo ihyan nación yahn nuhn mān, ihyan nación chenahn mān, che ndevahn nducoyaca ihyan che cotahno ye ihyan.

Nahn Pablo che cotahno rey Agripa

24 Cuahn che tihça rahn Pablo, che rendedevahn ye ihyan ne, cah Festo:

—Pablo, ¡luco ri di!, yahn che āma rehn.

25 Ate ndahconan Pablo:

—Festo, che āma renevahñecún ndih, hua dehve luco u, te che renté, rihñevan nchuhn ne, demañ ndudo çaço.

26 Ngā rey Agripa, a devano ndah ye dehtenduh che tuhchan. Chemin che nde hua rá cudado, renté nan ye. A devano cuacó te namin ihyan cuh ne, a devano ye nducuahn dehtenduh che tuhchan, te nan nducoyaca ihyan chinahn.

²⁷ Rey Agripa, ¿a ritahno ne ndudo che din Dendiohs che dirun ihyan profeta ne? U devanó te ritahno ne.

²⁸ Rahn Agripa ri ye Pablo:

—Nduco tah cuahn ne, din che cotahnó Jesucristo.

²⁹ Tuhme rahn Pablo:

—Nduco tah o nduco ndeh ama ndahca ndete che cuahnecon Dendiohs che ndih nduco nducoyaca ihyan che vate ye muhn, rihnevan ye che rahn, cotahno nchuhn Jesucristo nduhca che ritahnó. Namin ama ndahca ndete che hua cuahnecon Dendiohs che co nchuhn preso nduhca u.

³⁰ Chihno rahn Pablo chemin ne, rey me man, Berenice man, gobernador man, nducoyaca ihyan che vate ye min man ne, necuan ye,

³¹ cuahn ye ama lado, ne rente ye yahn Pablo van man ye nduco vih:

—Sahn tih ne, dehve quendihco se nde ama nunde cava che coh se, nde huane cava che conun se vacoyahn.

³² Agripa ne, rahn ye ri ye Festo:

—Ndete che hua chica se che techecade emperador yahn se ne, co ntahte vo sahn.

27

Dechuh ye Pablo yan Roma

¹ Cuahn che a chihnde cade che dechuh ye Pablo yahn yahn Italia ne, chinduco nuhn ihyan. Ama capitán che duche se Julio, che ndi cuande se batallón che duche Augusto, ndonda tah se Pablo nduco te neve preso che va che cahñ se.

² Chahtenun nducoyaca nuhn ama barco yahn yan Adramitio che a va yan che rahn yahn yahn Asia, ne chica nuhn min. Namin Aristarco yahn yan Tesalónica, yahn yahn Macedonia ne, chinduco ye nuhn.

³ Tama ro me ne, nda nuhn yan Sidón, ne nducote Julio ne, renevahnecon se Pablo ne, cah yune se che chahn ye, chendihchero ye amigo yahn ye man, che conan ihyan chahn ihyan man.

⁴ Cuahn che chica nuhn yan Sidón ne, chuhnan nuhn yahn yahn Chipre, quenán lado tah cueh nuhn, te cuahn nan che cuahn nuhn rechi yuhne.

⁵ Chuh dama nuhn yahn yahn Cilicia man, Panfilia man, ne nda nuhn yan Mira, yahn yahn Licia.

⁶ Min ndaca capitán me ama barco yahn yan Alejandria che cuahn yahn yahn Italia, ne chihquentiyon se che chahtenun nuhn chete, quendi nuhn cuahn nuhn.

⁷ Chihno ndeh ro ne, a conunde nda nino barco me yan Gnido, te ama rino cuahn. Nducote ama rechi yuhne cuahn nan cuahn ne, tahque ndah che chuh nino yan Salmón, ne chaconduto nan yahn yahn Creta.

⁸ Ama conunde chuh barco me numacuahn chihto nuniyahn nde nda ama cuan nino yan Lasea nan che duche Buenos Puertos.

⁹ Ama ndeh ro chinda, ne ama cahnda che cuahtechica ca barco nan nuniyahn, te a cochi nino ro iche. Chemin che yahve Pablo nducoyaca ihyan che chenun ye min,

¹⁰ ne rahn ye:

—Nchuhn combiero, devanó te ama cahnda ndete che quendi vo cuhn vo, te denda vo barco cuh nduco chede che nda. Nde man vo ne, cahnda yuhn vo.

¹¹ Ate capitán me ne, tahque tumacah ca ye yahn sahn che yahn se barco me man, sahn ndinan che ricahca man, che co che rahn Pablo.

¹² Nducote *yān* min ne, hua ndahca che cuahtenan ihyān ro iche ne, nducoyāca ihyān chahn ne, nahn ye che ndaca nuhn min, ndete che co nda nuhn Fēnice, āma *yān*, *yāhn* *yāhn* Creta che rendihche cuāco cuāhn nān Africa, cāva che min cuahtenan nuhn ro iche.

Āma ri yudo nān nuniyāhn

¹³ Āma ro ne, canān quendihco yuhne cuto che hua dito rano, ne chihco dāma ino ihyān chahn, ne cuahn nuhn numacuahn chihto *yāhn* *yāhn* Creta.

¹⁴ Ate huane rāhn me ne, canān āma dito rano yuhne tān, rahn nān bārcō me.

¹⁵ Nducote hua recah yune yuhne tān me che cāhn bārcō cuāhn nān che nahn nuhn ne, tahque ndah chihcomān nuhn che quenda cuāhn nān che nahn.

¹⁶ Chuh nuhn nino nān āma *yāhn* lihn che duche Claudia nān che ametah nduh dito rano yuhne, ne a conunde chi ndo tāh ihyān chahn indu lihn che renda bārcō,

¹⁷ ndeterun ye chete. Tuhme chahcotuma ye ihyo bārcō me cāva che hua condan. Nino min va āma cuān nān che duche Sirte, nān che hua *yāno* nune, ne vah ye che min cuān bārcō me. Chemin che ndedevah ye tino tu che quendihco nān *yāhn* *yāhn* bārcō me cāva che hua cāhn min.

¹⁸ Tāma ro me ne, quendi ca rano yuhne tān me, ne chiltera ye chede che nda bārcō me vān nuniyāhn.

¹⁹ Chihno ino ro min ne, chiltera ye nde āma ndeh nān dehtenduh *yāhn* bārcō me.

²⁰ A āma ndeh ro che nde *yāhn* nde iyon hua rendihchero nuhn, ne a min cuihno coh nuhn che rāhco nuhn, te āma riquendi ri yudo.

²¹ Chihno ndeh ro che hua reh nuhn ne, chandi Pāblo mendāhn, ne rāhn ye:

—Combiro, ndete che dinahn nchuhn che rāhn ro che chenān vo *yāhn* *yāhn* Creta ne, hua chica vo min, ndere chinda dehtenduh.

²² Mān ne, hua dehve rāhco nchuhn, te andahre conda bārcō, ate nde āma vo ne, hua dehva co yuhn vo.

²³ U ne, devanó chemin, te icuino ne, Dendiohs yāhn che redín ntiyon *yāhn* ye ne, dechuh ye āma ángel *yāhn* ye,

²⁴ ne rāhn ye ri ye u: “Pāblo, hua dehve rahque, te va che nda nān emperador *yāhn* Rōma, ne cāva di ne, ndedevahn Dendiohs nducoyāca ihyān che chenun ye ndoque chete bārcō.”

²⁵ Combiro, cāh *yān* nchuhn chedave *yāhn* ne, te u ne, devano cuācō te Dendiohs ne, redinahn ye ndudo *yāhn* ye, ne conahn nduhcā che rāhn ángel me.

²⁶ Ate bārcō ne, va che cāhnān nān yāva.

²⁷ Riquenda muhn riquenda min yuhne bārcō me, ne chihno o ndate ne, rechuh āma cuān nān che duche Adria. Nān māhn *yān* ne, checadino sāhn che recahca bārcō me che a nino va *yāhn* cuma.

²⁸ Decāde se vān nune me a *yāno* ca, ne ri ndico ntihyon āma metro. Tah cuahn cāna nān ne, decāde tun se, ne ri ndico ndache metro.

²⁹ Nducote vah se che cāhnān bārcō me nān yāva ne, ndedevah se nduco ihyo cun cu che duche ancla cuāhn cāh bārcō me, cāva che ametah co cāhn ca, ne chahtenan rino se, āma rendedecadino se nde chi dave.

³⁰ Numanahmin ne, sāhn che ricahca bārcō me ne, nahn cāno se, ndedevah se sāhn. Chemin che canān ndedevah se indu me, redin cā se che nahn ndedevah se tāma te o cu cuāhn tin bārcō me.

³¹ Ate rāhn Pāblo ri ye capitān me nduco sandādo chahn:

—Ndete che çano sahn chuhn ne, nchuhn ne, hua co ndevahn ne.

³² Tuhme chihca sandado chahn ihyo che nechiche indu me ne, chendah nun van nune.

³³ Cuahn che a nahn co dave ne, rahn Pablo ri ye nducoyaca sahn chahn:

—Ndahca che cheh nchuhn, te a o ndate che nde hua reh ne nde hua rahteyado ne.

³⁴ Cocheh nchuhn mare tah çava che cocha ne, çahca ne nune. Hua dehve rahco ne, te hua dehva co yahn ne.

³⁵ Chihno rahn ye chemin ne, chetah ye pan, ne neçah ye nundihve cuahn Dendiohs nan nducoyaca sahn chahn, ne ndeh ye canan reh ye.

³⁶ Tuhme chavi tah vederan yahn sahn chahn, ne namin cheh se.

³⁷ Van nducoyaca nuhn che chenun nuhn chete barco me ne, ri nuhn o ciento quenan ino raco ntihyon ama ihyan.

³⁸ Chihno che cheh sahn chahn tah ne, chihtera ca se trigo çava che ndah cah nduh barco me.

Chehchenun barco van nuniyahn

³⁹ Cuahn che a chi dave me ne, hua nchanan sahn ricaçca barco chahn ti man che chenun se. Ate chinan se ama reche nuniyahn che a ro yahndute numa chihto. Tuhme chihquino se che cacahca se barco me, ndete che co nda min.

⁴⁰ Chihca se ihyo yahn ancla chahn, nuhnde çava barco me. Ndahco çava se indu che ricaçca barco, ne cuahn che ndedeca yaco se tino tu che rendihco tin yahn yahn barco ne, canan rica, cuahn cuahn nan va reche nuniyahn.

⁴¹ Ate nda barco me ama cuan nan che rentahn nun vih nune, ne çahn nan çava. Min chihnde chiche, ne nducote ama rahn nune cuahn vedame ne, chihno chendan.

⁴² Tuhme ntuhno sandado chahn che çahno se sahn preso çava che hua çano nde ama se.

⁴³ Ate capitán min ne, nducote hua nahn se che coh Pablo ne, hua çah yune se che tihça din se. Chihquentiyon se che nducoyaca sahn che ri se nune ne, çahca se nune, çahn se nan yahn cuma,

⁴⁴ ne sahn chenahn ne, nan irahno man, cheyahn barco man, çahn nduco se. Nduco tihça ne, ndevahn nducoyaca nuhn.

28

Quenan Pablo yahn yahn Malta

¹ Cuahn che a nda nuhn yahn min ne, checadino nuhn che Malta duche.

² Ihyan che vate ye min ne, ama nevahnecon ye nuhn, ne chihco ye ama vacoyahn chahte çava che neçah ihno nuhn, te ama iche man, ama ran co man.

³ Pablo ne, reneidin dama ye duniyahn cuma, ne cuahn che rih ye vacoyahn ne, quendah ama cu tan yahn ihno yahn vacoyahn, ne çah te tah ye.

⁴ Cuahn che ndihche ro ihyan yahn min che quendihco raco cu me tah Pablo ne, rahn ye van man ye nduco vih:

—Sahn tih ne, co sahn rihno ihyan se, ne andahre ndevahn se van nuniyahn, ate tah Dendiohs ne, hua ndevahn se.

⁵ Ate chihde Pablo tah ye, ne chendahnun cu me vacoyahn, ne hua dehva chi yahn ye.

⁶ Nducoyaca ihyan chahn ne, chenani rino ye che condito Pablo, o adenan no condah ye, coh ye. Ate cuahn che a chi ndeh ura che chenani rino ye ne, a

hua dehva chi, ne ndahcorun ye che rendedecadino ye, ne rahn ye te Pablo ne, Dendiohs ye.

⁷ Nino min va yahn yahn ama ihyan che duche ye Pulio. Ihyan min ne, ndinan ye yahn ihyan chahn. Ama nevahnecon ye nuhn numacuahn vedeyano, ne chahtenan nuhn vaco ye ino ro.

⁸ Chida Pulio ne, quendite ye, ndi ye cah ihno man, cah yun man. Chahn Pablo, chendihchero ye ihyan, ne chihno covah ye ne, nahn tah ye ihyan min, ne ndo yahn ye.

⁹ Checadino ihyan yahn chemin, ne ndo dama ihyan cah che vate ye yahn min, ne namin ndoyahn ye.

¹⁰ Ama nevahnecon ihyan yahn min nuhn, ne te ye nducuahn dehtenduh che cochihve yahn nuhn cuahn che ndaca nuhn min.

Nda Pablo yan Roma

¹¹ Chihno ino iyo ne, chahtenan nuhn chete tama barco yahn yan Alejandria che quenan min ro iche. Barco min ne, nda ama bandera nan che nentava se Castor nduco Polux, che rivahn dendiohs yahn sahn che ricahca barco.

¹² Nda nuhn yan Siracusa, ne min chahtenan nuhn ino ro.

¹³ Chica nuhn min, quendi nuhn numa chihto nuniyahn nde nda nuhn yan Regio. Tama ro me ne, rano yuhnuyahn, ne chihno o ro ne, nda nuhn yan Puteoli.

¹⁴ Min ntaca nuhn yahn dihno vo, ne rahn ye nduco nuhn che cuahtenan nuhn nduco ye. Chahtenan nuhn ama ndate, tuhme cuahn nuhn yan Roma.

¹⁵ Dihno vo che vate ye yan Roma ne, checadino ye che nda nino nuhn, ne nda ye, chendi yune ye nuhn ama cuan nan che duche Tres Tabernas. Nahn ye ne, nda dama ye nde ndihve che duche Foro de Apio. Cuahn che ndihchero Pablo ihyan chahn ne, cah yan ye chedave yahn ye, ne necah ye nundihve cuahn Dendiohs.

¹⁶ Cuahn che nda nuhn yan Roma ne, necah capitán me preso chahn tah ihyan ndinan yahn sandado che redin cudado min. Me Pablo ne, cah yune ye che nuhn ye ama vah nan che conun ye, ne nduco ye ama sandado che redin se cudado ihyan.

Rahndudo Pablo Ndudo yahn Dendiohs yan Roma

¹⁷ Chihno ino ro che nda nuhn ne, din dama Pablo nducoyaca ihyan nahn, ndata yahn Israel, che vate ye min yan Roma, ne rahn ye ri ye ihyan:

—Nchuhn dihnó, u ne, nde ama nunde hua quendiho nan ihyan nación yuhn vo Israel, nde hua rahcotahn costumbre che chihco ihyan ndico yuhn vo. Ate andahre che tihca ne, din ye preso u min yan Jerusalén, ne necah ye u tah ihyan ndinan yahn Roma.

¹⁸ Ihyan ndinan chahn ne, techecade ye yahn, ne nducote ametah nde ama nunde yahn cava che cahcantiyon ye che coh ne, nahn ntahte ye u.

¹⁹ Ate ihyan nación yuhn vo ne, hua cahnecon ye. Chemin che a cade chicá che techecade emperador yahn, andahre metah nde ama nunde che cah ihyan nación yuhn vo.

²⁰ Man ne, din dama nchuhn cava che ndihche vih vo man, cava che nte cuandé nchuhn dehco che nchiche cadena cuh u man. Nchiche cadena cuh u, te ritahnó che va che conahn ndudo che te Dendiohs, checadino uvo, ihyan nación yahn Israel.

²¹ Tuhme rahn ihyan chahn ri ye ihyan:

—Nde ̄ama cāca che dirun ihyan ēstado yahn Judea yahn dehtenduh che redin ne, ametah nd̄a tāh nuhn. Namin nde ̄ama dihn̄o vo che rica ye min, rend̄a ye muhn ne, hua chihnḡa rāhn ye yahn ne.

²² Ate nahn cahnevan nuhn deh cāhma ne, te a numacuahn no ne, tān ihyan yahn vederihquentiyon ra che ritahno nchuhn.

²³ Tuhme chihco ye ̄ama ro, ne ̄ama yahn ye ndo dama ye vah nān che quenun Pablo, ne numa ro cahndudo ye yahn vederihquentiyon che ndahco cāde Dendiohs. Rahndudo ye ley che dirun Moisés mān, ndudo che dirun profeta mān, ne nahn ye che conahn ihyan chahn yahn Dihvo vo Jesucristo.

²⁴ Nāhn ihyan chahn ne, chitahno ye, ne nāhn ye ne, hua chitahno ye.

²⁵ Nducote nāhn ye ne, hua quenan ino ye ne, necuan ye che nahn nāhn ye. Tuhme rāhn Pablo ri ye ihyan chahn:

—A nd̄ahcā ndudo che cāh Vaco Ndah yahn Dendiohs, cahndudo ihyan profeta Isaías, chihnevan ihyan ndico yuhn vo:

²⁶ Cuehn, cuahndode nān ihyan sih tuhcā:

“Cuahn dama rihnevan nchuhn, ate hua renahn ne.

Cuahn dama rendihche ro ne, ate hua renchanan ne,

²⁷ te nedin cheche mān ne chedave yahn ne.

Hua redinahn ne mān, hua rihcovan ne mān,

hua renahn ne mān, hua rento ino ne nunde yahn ne mān.

Chemin che hua renchahco Dendiohs cāva ne.”

²⁸ Mān ne, cadino nchuhn te cuahndudo nuhn ndudo ndah yahn Jesucristo van ihyan nación chenahn. Ihyan chahn che cuaco ne, cāhcovan ye, ne ndedevahn Dendiohs ihyan.

²⁹ Cuahn che chihno rāhn Pablo tihcā ne, conahn ihyan chahn, quenan ama ndeh rente ye nduco vih, te chi tān ye yahn ndudo min.

³⁰ Pablo ne, quenan ye min o nduyo, quenun ye vah nān che tumanan ye, ne nevahnecun ye nducoyaca ihyan che rāhn ye, rendihchero ye ihyan.

³¹ Rahndudo ye yahn vederihquentiyon yahn Dendiohs mān, ricuahn ye ndudo yahn Dihvo vo Jesucristo mān, ne nde ̄ama ihyan ne, hua din vahche ye yahn ye.

CAÇA CHE DIRUN SAN PABLO, DECHUH YE YAHN IHYAN YAHN DENDIOHS CHE VATE YE YAN ROMA

¹ U Pablo, che tendahnun Dendiohs u, che dín ntiyon yahn Dihvo vo Jesucristo man, che co apóstol man, che cuahndudó ndudo ndah yahn ye man ne, dirún çaça cuh yahn ne.

² Yahn ndudo ndah min ne, a chihco çade Dendiohs nan Ndudo ndah yahn ye nde a rahn me, dirun ihyan profeta yahn ye.

³ Ndudo ndah min ne, rahn yahn Daya ye, Dihvo vo Jesucristo, ihyan min che chihndeyan ye van ndata yahn David.

⁴ Numacuahn vederihquentiyon yahn Vaco Ndah yahn Dendiohs ne, ntuche ye van tenahn, ne nduco chemin chihnde ro che Daya Dendiohs ihyan.

⁵ Che cuande yahn ihyan min ne, din yahino Dendiohs nuhn, ne a tendahnun ye nuhn che co nuhn apóstol, cuahndudo nuhn Ndudo yahn ye van ihyan nducuahn nación, çaça che nevahneceun ye, ne cotahno ye.

⁶ Van ihyan chahn ne, nchuhn che a nedin yahn Dihvo vo Jesucristo nchuhn, ne nduco ne ndi cuande ne, te a tendahnun Dendiohs nchuhn.

⁷ Nchuhn, ihyan yahn Dendiohs che yahino ye nchuhn, vate ne yan Roma ne, dechuh çaça cuh yahn ne. Chido vo Dendiohs man, Dihvo vo Jesucristo man, din yahino ye nchuhn, din ye che ndahça cuahtenan ne.

Pablo ne, nahn çahn ye yan Roma

⁸ Numachahte iyehse ne, a chetuhn ndudo yahn nchuhn, nduhça che ritahno ne Dihvo vo Jesucristo. Chemin che menan vihca che cuande yahn ihyan min ne, renecáh nundihve cuahn Dendiohs çaça ne.

⁹ Dendiohs, ihyan min che redín ntiyon yahn ye numa inó, rahndudó ndudo ndah yahn Daya ye ne, devano ye che cuahn dama reváh çaça nchuhn.

¹⁰ Ricá ihyan che atanoca nduh ne, cuahneceun ye che chí quendihcheró nchuhn,

¹¹ te ama nahn chí quendihcheró nchuhn, çaça che dín che cuahtenan cuma ne vederihquentiyon yahn Vaco Ndah yahn Dendiohs, ne tahque numa ino ne cotahno ne Dihvo vo Jesucristo.

¹² Avane ne, náhn che neçah yan ama tamo vo chedave yahn vih, yahn che ritahno vo Dihvo vo Jesucristo.

¹³ Dihno, ráhn rí nchuhn te ama ndeh yune nahn chí quendihcheró nchuhn, ne cuahndudó ndudo ndah yahn Dihvo vo Jesucristo, nduhça che redín van ihyan nación chenahn, çaça che din Dendiohs che co yahn ihyan, cotahno ye dama nduco nchuhn. Ate nde meniyan ne, hua ri che chí.

¹⁴ A chihquentiyon Dihvo vo Jesucristo u che cuahndudó ndudo ndah yahn ye van ihyan yahn nducuahn nación, van ihyan devano man, van ihyan tundo man.

¹⁵ Chemin che quenán inó che a nun cuahn chí van nchuhn che vate ne yan Roma, cuahndudó ndudo ndah yahn ye, cahnevan ne.

Vederihquentiyon yahn ndudo ndah yahn Dihvo vo Jesucristo

¹⁶ Hua ri cuihnán yahn ndudo ndah yahn Dihvo vo Jesucristo, te chemin che vederihquentiyon yahn Dendiohs, çaça che ndedevahn ye nducoyaca

ihyan che ritahno ye, menan vihca ihyan naci6n yahn Israel, namin ihyan naci6n chenahn.

¹⁷ Ndudo ndah min ne, a vederihquentiyon yahn Dendiohs, te a nan ndudo min riho ro ye che renedin yahn ye nducoyaca ihyan che ritahno ye, nduhca che a ndirin nan Ndudo yahn ye tuhca: "Ihyan che ritahno ye ne, ndo yan Dendiohs nduco ye, nedin yahn ye ihyan, ndevahn ye."

Nunde yahn ihyan

¹⁸ Nahn che cotahno vo, te a devano vo che Dendiohs, ihyan min che va ye vahchetero ne, din ye castigo yah nducoyaca ihyan nunde che rahcotahn ye yahn Ndudo yahn ye.

¹⁹ Hua ndahca che tihca rahcotahn ye, te a devano cuaco ye yahn vederihquentiyon yahn Dendiohs, yahn che a man Dendiohs cah ye, checadino ye.

²⁰ Nde ro che dendah Dendiohs iyehmse ne, a devano ihyan te ihyan min che Dendiohs, ne quenana cuma ye vederihquentiyon cuahn dama, te tumacadino ye duh ihyan min, yahn dehtenduh che dendah ye. Chemin che nde metah deh che cahma ye, cava che ndedevahn ye ihyan.

²¹ Andahre a devano ye che va Dendiohs, ate hua rendeva ye yavenan ye, nde hua renecah ye nundihve cuahn ihyan. Tahque ndah ye ne, rendedecadino ye yahn dehtenduh che nde hua richihve, nto ye ihyan tundo.

²² Andahre ama devano ye, che rahco ye, ate nde hua renahn ye.

²³ Ndotenan che ndeva ye yavenan Dendiohs, ihyan min che va ye cuahn dama man, che ama chahte vederihquentiyon yahn ye man ne, rendeva ye yavenan dehtenduh che redendah man ye, rentave ye ihyan iyehmse man, ite che chenan cun cah te man, yahda man, cu man.

²⁴ Chemin che chacondah vedame Dendiohs ihyan chahn, cava che quendi ye yune chihnga yahn ye, cahtera ye vedecuihno yahn ye van man ye nduco vih.

²⁵ Ndotenan che quendi ye yune cuaco, ndeva ye yavenan Dendiohs, ihyan min che dendah ye iyehmse man, rendeva nducoyaco vo yavenan ye cuahn dama man ne, quendi ye vederihnceh, rendeva ye yavenan dehtenduh che man Dendiohs dendah ye.

²⁶ Chemin che chacondah vedame Dendiohs ihyan cava che quendi ye nunde yahn ye nduco vih, cahtera ye vedecuihno yahn ye. Ihyan ndahta ne, ndotenan che cahnevaco ye, cuahtenan ye nduco inchahn ye ne, rahtenan ye van man ye nduco vih, rahtendihco ye nunde.

²⁷ A namin no tun ihyan chahn. Ndotenan che nuhn ye ndahta yahn ye ne, rihtera ye vedecuihno yahn ye, rahtenan ye van man ye nduco vih, ne nduco chemin recah rihn man ye ihyan, riho yan man ye castigo che va che co ye.

²⁸ Nducote hua chihco ye chedave yahn ye che nevahnecon ye Dendiohs ne, chacondah vedame Dendiohs ihyan cava che quendi ye vederendecadino chihnga yahn ye, cuahtendihco ye nunde.

²⁹ A ndedecuihta man ye nducuahn nan nunde, chendihco ye. Ndere rahtenan ye nduco ihyan che hua nihnevaco nduco ye man, ndere rahtechica ye man, chenan cuma ye vede idihya man, vedeve man, vedetan man, vederihnceh man. Cuahtende chende ye man, vate canda ye nduco vih man, riho ye vih man.

³⁰ Chihnga rahn ye yahn vih man, rahcotahn ye yahn Dendiohs man, hua renevahnecon ye nde ama ihyan man, redin yade ye man, redin cun ye man, rendedecadino ye deman yahn dehtenduh che chihnga man, hua renevahnecon ye indihthe yahn ye man,

³¹ hua renahn ye man, hua redinahn ye ndudo yahn ye man, hua renan vahino ye vih man, hua devano nchahco ye yahn vih man.

³² Andahre devano ndah ye vederihquentiyon yahn Dendiohs che ihyan nunde ne, va che co ye castigo yahn nunde yahn ye, ate riquendi ye rahtendihco ye nunde, nde tuno rendonan ye combiero yahn ye che dāma ri ye nduco vih.

2

Dendiohs ne, techecāde ye numa cuāco

¹ Nducote a devano nducoyāca ihyan che va che co ihyan nunde castigo ne, adecoduhno ihyan che rendāhchenan ye ihyan chenāhn ne, nde nan che cāhma ye metah, te a dāma ri ye nduco vih, rahtendihco ye nunde.

² A devano vo che dāma no redin Dendiohs castigo ihyan che rendāhchenan ye.

³ Nchuhn che rendāhchenan ne ihyan nunde chenāhn, ate dāma ri ne nduco ye ne, hua rahco ne che ndevahn ne yahn castigo yahn Dendiohs.

⁴ Hua ducherino ne vedechahntino yahn Dendiohs man, vedeyahino chahte yahn ye man. A devano ne che quenan cuma Dendiohs vedeyahino nduco ne, te nahn ye che nto ino ne nunde yahn ne.

⁵⁻⁶ Ate nducote redin cheche ne chedave yahn ne, hua nahn nto ino ne ne, redecuhta ne nunde yahn ne. Man ne vedin ne, te techecāde Dendiohs yahn ne numa cuāco, ne va che co ne castigo. Ndā ro min ne, techecāde ye yahn nducoyāca ihyan, tunoca che nedin ye ndahtenan ye iyehñse.

⁷ Ihyan che chahtino ye, redin ye che ndah man, chenān ino ye che quendāh yavenān ye man, che ndeva Dendiohs ihyan man ne, a ihyan chahn che cuahtenan ye vahchetero numacuahn ro.

⁸ Ate ihyan che cānda tin ye man, che rahcotāhn ye yahn ndudo cuāco man, che riquendi ye yune chihngā yahn ye man ne, quenan cuma che din Dendiohs castigo yah ihyan.

⁹ Nducoyāca ihyan nunde yahn nducuahn naciōn, menān vihca ihyan naciōn yahn Israel ne, chuhrihn ye, din Dendiohs castigo ihyan.

¹⁰ Me ihyan nducuahn naciōn che din ye che ndah, menān vihca ihyan naciōn yahn Israel ne, āma ndah ro yahn ye man, ndeva Dendiohs ihyan man, din ye che ndāhcā cuahtenan ye man.

¹¹ Tihcā, te Dendiohs ne, quendihconahn rettechecāde ye.

¹² Nducoyāca ihyan che chendihco ye nunde, che nde hua devano ye ley che dirun Moisés ne, ndiyu ley min che cāhcantiyon castigo che co ye, ate va che co ye castigo. Namin nducoyāca ihyan che a devano ye ley min, ate chendihco ye nunde ne, va che co ye castigo nduhcā che rihquentiyon ley min.

¹³ Tihcā, te atenan ihyan che redinahñ ye ley min, che ndo yan Dendiohs nduco ye, nedin yahn ye ihyan, ndiyu ihyan che ndere rihnevan ye.

¹⁴ Cuahn che ihyan naciōn chenāhn, che nde hua devano ye ley min, redin ye nduhcā che rihquentiyon ne, a ndero ndi che redinahñ ye vederihquentiyon yahn Dendiohs, andahre hua devano ye ley min.

¹⁵ Nan nducuahn che redin ye ne, rihco ro ye che anduhneca ndete che renevahnecun ye ley min. Nahn cuān ne, renda yahn ye che cuahtendihco ye nunde, ne va che co ye castigo. Nahn cuān ne, rendā yahn ye che hua co ye castigo, yahn che rahco ye che hua chahte nunde yahn ye.

¹⁶ Ndā ro yahn ne, quenan cuma che cāhcantiyon Dendiohs che techecāde Dihvo vo Jesucristo nunde yahn nducoyāca ihyan, nde nducuahn nunde che chahtendihco ye cuāhn ndeh.

Nunde yahn ihyan naciōn yahn Israel

¹⁷ Nchuhn ihyan nación yahn Israel, hua dehva co yahn ne, che rahco ne, te ndichahtino ne ley che dirun Moisés. Redin yade ne, rahco ne che yahn Dendiohs nchuhn.

¹⁸ A devano ne deh che nahn ye che dinahn ne che rahco ne, ne nducote chahn ne ley min ne, rahco ne che devano tendahnun ne cha che ndah van dehtenduh che redin ne.

¹⁹ Numacuahn vedeyade chenán ino ne che devano cacuahn ne ihyan tundo. Rahco ne che ama devano cah cuande ne ihyan taça co tuno ye nan Dendiohs.

²⁰ Rahco ne che ama devano cacuahn ne nde ihyan che hua renahn ye man, nde checahya man, te a nchuhn che va tah ne vededevano man, ndudo cuaco man, nan ley che dirun Moisés.

²¹ Tuhme nducote ama devano cacuahn ne, che rahco ne, ¿me dehra cuande che hua redinahn man ne? Nducote rahndudo ne che hua din duco ihyan, ¿me dehra cuande che reduco man ne?

²² Nducote rahndudo ne che hua din duche yahn ihyan che a nihnevaco ye, ¿me dehra cuande che redin duche yahn man ne che a nihnevaco ne? Nducote rahndudo ne che hua ndeva ihyan yavanan dehtenduh che redin ye dendiohs yahn ye, ¿me dehra cuande che reduco ne dehtenduh che rigonun chihve che va chete yaco yahn ihyan chahn?

²³ Nducote ama redin yade ne che devano ne ley yahn Dendiohs, ¿me dehra cuande che duche rino ne ihyan, hua redinahn ne che rihquentiyon ye?

²⁴ Nduco che tihça redin ne ne, a tan renun cah nduhça che a ndirun nan Ndudo yahn Dendiohs tuhça: "Ihyan nación chenahn ne, a cava che duhtuno ihyan nchuhn che chihnga rahn ye yahn Dendiohs."

²⁵ Che chenán seña nchuhn ne, taça hua, richihve yahn ne ndete che redinahn ne ley che dirun Moisés. Ate nducote hua redinahn ne ne, a ndere chenán seña me nchuhn.

²⁶ Me ihyan nación chenahn ne, ndete che redinahn ye che rihquentiyon ley min ne, redin yahn Dendiohs ihyan, andahre hua chenán seña ihyan.

²⁷ Ihyan che redinahn ye ley min, andahre hua chenán seña ihyan ne, ndahco ndiya ye nchuhn che nde chenán seña nchuhn man, nde devano ne ley min man, ate hua redinahn ne.

²⁸ Ndiyu che ndata yahn Israel nchuhn man, che chenán seña nchuhn man, che cochihve yahn ne cava che nedin yahn Dendiohs nchuhn,

²⁹ te atenan ihyan che numacuahn chedave yahn ye renevahnecun ye che rihquentiyon Dendiohs man, redinahn ye man, rene din yahn Dendiohs ihyan. Che cochihve yahn ne ne, che nedin yahn Dendiohs nchuhn, ndiyu che nevahnecun ihyan iyehse nchuhn.

3

¹ Nducote tihça ne, co vate nchuhn che rahco ne che tahque ndah ro yahn ihyan nación chenahn, che co nchuhn che ndata yahn Israel nchuhn man, che chenán seña nchuhn man.

² Ate tahque ndah ro yahn nchuhn, te a tah ihyan ndico yahn ne, chihco Dendiohs Ndudo yahn ye.

³⁻⁴ Andahre ama yahn ihyan chahn hua dinahn ye yahn Ndudo min, ate ndiyu cava chemin che ndaça dama Dendiohs yahn ndudo yahn ye che cah ye, te ihyan min ne, redinahn ye ndudo yahn ye, andahre nducoyaca ihyan hua redinahn ye. Tihça ye, nduhça che a ndirun nan Ndudo yahn ye tuhça: Nducuahn che redin Dendiohs ne, ndah.

Chemin che nde hua co cahma nunde ihyan yahn ye.

⁵ Co vate nchuhn che rahco ne te nan nunde yahn ne rihnde ro che ama ndah Dendiohs, ne hua redin yahn che din ye castigo nchuhn cava nunde yahn ne.

⁶ Ate hua, te Dendiohs ne, a numa ca ndah ihyan ye. Ndete che hua tihca ne, nde hua co techecade ye yahn ihyan nunde.

⁷ Ndete che nan nunde yuhn vo tahque ndah cuhnde ro che ama ndah Dendiohs ne, nde hua quenan cuma che techecade ye yuhn vo.

⁸ Ndete che tihca ne, tahque ndah quendi vo nunde yuhn vo, te chemin che cochihve. Vate nahn ihyan che ndere rahn ye che tihca rahndudo nuhn. Ihyan chahn ne, redin yahn che din Dendiohs castigo ihyan.

Nducoyaca ihyan ne, chendihco ye nunde

⁹ Co vate nchuhn che rahco ne che uvo, ihyan naci6n yahn Israel che tahque ndah ihyan uvo van nducoyaca ihyan iyehense. Ate hua cuaco chemin, te nducoyaca ihyan naci6n yahn Israel man, ihyan naci6n chenahn man ne, quendihconahn chendihco ye nunde nduhca che a ndirun yahn ye,

¹⁰ nan Ndudo yahn Dendiohs tuhca:

Metah nde ama ihyan che ndah ihyan ye.

¹¹ Metah nde ama ihyan che renahn ye.

Metah nde ama ihyan che renecahco ye Dendiohs.

¹² Nducoyaca ye ne, chacondah vedame ye Dendiohs, quendi ye yune chihnga.

Metah nde ama ihyan che runecade ye.

¹³ Deman ndudo chihnga man, ndudo rihnceh man, ndudo rendih man, rente ye.

¹⁴ Deman che rahva ye man, rahn tan ye man.

¹⁵ Nduco hua no rihn deh ne, rihno ye vih.

¹⁶ Nduh cuan nan che vatechica ye ne, redetohnan ye man, rihco ye vedeyah man.

¹⁷ Nde hua renda yahn ye che ndahca cuahtenan ye nduco vih.

¹⁸ Nde hua renda yahn ye che nevahnecon ye Dendiohs.

¹⁹ A devano vo te nducuahn che ndirun nan ley che dirun Mois6s ne, a ndirun cava che, nducoyaca ihyan che rihquention ley min ihyan ne, tumacadino ye yahn nunde yahn ye, nde metah deh che cahma ye ro che techecade Dendiohs yahn ye.

²⁰ Ley min ne, nducote a chihnde atenan cava che co devano ihyan che va nunde yahn ye ne, chemin che nde ama ihyan hua co cahma ye che ndah ihyan ye nan Dendiohs, andahre rahn ye che redinahn ye.

Cava che ndevahn vo ne, va che cotahno vo

²¹ Ate man ne, a devano vo te ndiyu che quendi vo ley min che ndo yan Dendiohs nduco vo, nedin yahn ye uvo, te a man ye te ye, checadino vo faca che din ye, ne chemin ne, a ndirun nan ley min man, nan ndudo che dirun ihyan profeta man.

²² Nducoyaco vo ne, cava che ndo yan Dendiohs nduco vo, nedin yahn ye uvo ne, va che cotahno vo Dihvo vo Jesucristo. Tihca, te dama no rendihche ye nducoyaco vo.

²³ Nducoyaco vo ne, chendihco vo nunde, nde hua co cahmo vo che ndah ihyan uvo nan Dendiohs.

²⁴ Andahre hua co cahmo vo che ndah ihyan uvo nan ye, ate numacuahn vedeyahno ndo yan ye nduco vo, nedin yahn ye uvo, dechuh ye Dihvo vo Jesucristo, ndedevahn ye uvo. Man ne, a ndo yan ye nduco vo.

²⁵ Dechuh ye ihyan, chih ye, chera yun yahn ye cava nunde yuhn vo, ne che cotahno vo ihyan ne, ndaço vo vederenchahco. Che tihça din Dendiohs ne, chihco ro ye che numa cuāco din chahtino ye yahn nunde che chahtendihco ihyan ndico nde ro menañ.

²⁶ Namin chihco ro ye man ro cuh, che numa cuāco rendo yan ye nduco ihyan che ritahno ye Dihvo vo Jesucristo, reneđin yahn ye ihyan.

²⁷ Mañ ne, ametah din yađe nchuhn che redinahn ne yahn ley min, te atenañ che cotahno ne Dihvo vo Jesucristo, ndo yan Dendiohs nduco ne, nedin yahn ye nchuhn.

²⁸ Tihça, te rahn ri nchuhn te andahre hua nedinahn ihyan ley min, ate nduco che cotahno ye ihyan min ne, ndo yan Dendiohs nduco ye, nedin yahn ye ihyan.

²⁹ Dendiohs ne, Dendiohs yahn nducoyaça ihyan iyehñse, ihyan naciñ yahn Israel mañ, ihyan naciñ chenahn mañ, ndiyu demañ yahn ihyan naciñ yahn Israel.

³⁰ Tihça, te ama no Dendiohs, ne ihyan min ne, rendo yan ye nduco ihyan naciñ yahn Israel mañ, ihyan naciñ chenahn mañ, reneđin yahn ye ihyan nduco che cotahno ye Dihvo vo Jesucristo.

³¹ Che ritahno vo ihyan min ne, ndotenan che rendaħco ndiyu vo ley min ne, recaħ dito vo.

4

Nduhça che chitahno Abraham

¹ A devano vo nduhça che din ihyan ndico yuhn vo Abraham.

² Co raħco ihyan che nedin yahn Dendiohs ihyan min yahn che runecađe quenan ye iyehñse. Ate hua tihça,

³ te nan Ndudo yahn Dendiohs ne, ndirun tuhça: “Abraham ne, chitahno ye Dendiohs, ne chemin che din yahino Dendiohs ihyan, nedin yahn ye ihyan.”

⁴ Che reneđihvo vo mozo yuhn vo ne, ndiyu vedevahino chemin, te quendihco vo yahn ye.

⁵ Ate che rendo yan Dendiohs nduco ihyan nunde che ritahno ye Dihvo vo Jesucristo, reneđin yahn ye ihyan ne, chemin che cuāco ne, vedevahino, ndiyu che quendihco ye.

⁶ Atihnoçano tun che dirun David yahn ihyan che redin Dendiohs vedevahino nduco ye, rendo yan ye nduco ye, reneđin yahn ye ihyan.

⁷ Dirun ye tuhça:

Ama ndah ro yahn ihyan che rendaça ye vederenchahco cava nunde yahn ye.

⁸ Dihvo Dendiohs ne, hua redin ye castigo ihyan chahn.

⁹ Cuedevano nchuhn te vedeyahino yahn Dendiohs ne, ndiyu demañ cava ihyan che chenana seña ihyan, te namin cava ihyan che hua chenana seña ihyan. A rahn vo che Abraham ne, nducote chitahno ye ne, nedin yahn Dendiohs ihyan.

¹⁰ Ro che nedin yahn Dendiohs ihyan ne, nde metah conan seña ihyan.

¹¹ Dinoca chitahno Abraham, tuhme nedin yahn Dendiohs ihyan, chihquentiyon ye che conan seña ihyan, cava che cuhnde ro che a nedin yahn ye ihyan. Nduco tihça ne, tihyon yune Abraham nde ihyan che hua chenana seña ihyan, che cotahno ye Dendiohs, cava che ndo yan Dendiohs nduco ye, nedin yahn ye ihyan.

¹² Namin tihyon yune ye ihyan che chenan seña ihyan, che hua cochahntino ye che chenan seña ihyan, te tahque ndah ye ne, cotahno ye Dendiohs nduhça che chitahno man ye, ro che nde metah conan seña ihyan.

Rendedevahn Dendiohs ihyan che ritahno ye

¹³ Dendiohs ne, çah ye ndudo yahn ye Abraham che co yahn ndata yahn ye iyehñse, yahn che chitahno ye ihyan, ndiyu yahn che dinahn ye ley che dirun Moisés.

¹⁴ Ndete che atenan ihyan che redinahn ye ley min che reneidin yahn Dendiohs ihyan ne, tuhme nde metah deh cuande che cotahno vo ihyan, nde huane che çah ye ndudo yahn ye.

¹⁵ Ate hua tihça, te ley min ne, ndotenan che çahco ro che nedin yahn Dendiohs ihyan ne, tahque ndah ne, rihco ro che din ye castigo ihyan nunde. Me ndete che metah ley min ne, nde hua tumacadino vo che va nunde yahn ihyan.

¹⁶ Chemin che, che ritahno vo Dendiohs ne, numacuahn vedeyahino reneidin yahn ye uvo. Andahre hua ndi cuande vo van ihyan che va tah ye ley min, hua dehve din yahn, te nduco che ritahno vo ihyan nduhça che chitahno Abraham ne, reneidin yahn ye nducoyaco vo. Nduco tihça ne, riquendi vo yune yahn Abraham,

¹⁷ nduhça che a ndirun nan Ndudo yahn Dendiohs tuhça: “Ama yahn ihyan quendi ye yune yehn, cotahno ye u.” Quendi vo yune yahn ye nduhça che nahn Dendiohs, ihyan min che rendedetuhche ye ihyan che a ndih ye man, rihco çade ye dehtenduh che nahn ye, ne rinahn man.

¹⁸ Abraham ne, andahre ametah vedechahtino che ndaca ndata yahn ye, ate numacuahn vedechahtino chitahno ye che rahn Dendiohs nduco ye, che ama co yahn ndata yahn ye.

¹⁹ Ro min ne, ametah vedechahtino yahn ye, te a ri ye tenduh ama ciento nduyo, ne ihyan ndahta yahn ye Sara ne, namin a indihte ye. Avane ne, a numaçã hua rendaça daya ye. Ate nde nduco nduh ne, a chitahno ye ndudo che çah Dendiohs ihyan.

²⁰ Ndotenan che o vederendedecadino yahn ye ne, chitahno ye numa ino ye ndudo che çah Dendiohs ihyan, ne ndeva ye yavenan ye.

²¹ Chichahntino ye numacuahn chedave yahn ye che Dendiohs ne, va vederihquentiyon yahn ye che redinahn ye nducuahñ ndudo yahn ye che reça ye.

²² Chemin che nducote tihça chitahno ye Dendiohs ne, nedin yahn Dendiohs ihyan.

²³ Che nedin yahn Dendiohs ihyan min ne, a ndirun nan Ndudo yahn ye, ndiyu deman çava ihyan min,

²⁴ te namin çava uvo, çava che tumacadino vo che nduco che cotahno vo Dendiohs ne, ndo yan ye nduco vo, nedin yahn ye uvo. A ihyan min che ndedetuhche ye Dihvo vo Jesucristo van tenahn.

²⁵ Che chihno ihyan iyehñse Dihvo vo ne, a çava nunde yuhn vo, ne che ntuche ye ne, a çava che ndo yan Dendiohs nduco vo, nedin yahn ye uvo.

5

Nduhça che ndo yan Dendiohs nduco vo, nedin yahn ye uvo

¹ Nducote tihça ne, nedin yahn Dendiohs uvo man, ndo yan ye nduco vo man, yahn che ritahno vo Dihvo vo Jesucristo.

² A çava Dihvo vo Jesucristo che din yahino Dendiohs uvo, nedin yahn ye uvo. Man ne, numacuahn vedeyeno chenani no vo che cuahtenan vo nan ye vahchetero.

³ Ndiyu deman yahn chemin che ri yeno vo, te namin ri yeno vo yahn che rechuhrihn vo. A devano vo te cuahn che rechuhrihn vo ne, rendaço vo vedechahtino man,

⁴ cuahn che chenani como vo vedechahtino ne, riquendaḥ ndah vo man, cuahn che riquendaḥ ndah vo ne, chenani no vo Dendiohs man,

⁵ cuahn che chenani no vo Dendiohs ne, hua dehve raḥco vo man. Hua dehve raḥco vo, te Dendiohs ne, riḥco ro ye vedeyahino chahte yahn ye nduco vo, din ye che quenun Vaco Ndah yahn ye uvo.

⁶ Cuahn che ametah vedechahtino che ndaça iḥyan vederenchahco çava nunde yahn ye ne, ro min niyon chih Dihvo vo Jesucristo çava nducoyaça iḥyan nunde, nduhça che a chihco çade Dendiohs.

⁷ Hua ndere ndaça ama iḥyan che caḥquino ye caḥco mendaḥn ye iḥyan coh ye çava tama ca iḥyan, andahre ndah iḥyan ye.

⁸ Ate Dendiohs che cuaço, andahre ama chendiḥco vo nunde, chihco ro ye che ama yahino ye uvo, dechuh ye Dihvo vo Jesucristo, chih ye çava che ndedevahn ye uvo.

⁹ Man ne, nducote a nedin yahn Dendiohs uvo, yahn che a chih iḥyan min, chera yun yahn ye çava nunde yuhn vo ne, a devano cuaço vo te a ndedevahn iḥyan min uvo, ametah che co vo castigo ro che techecaḍe Dendiohs yahn iḥyan nunde.

¹⁰ Tihça, te ro menan cuahn che ri yudo yahn Dendiohs nduco vo, çava nunde yuhn vo ne, ndo yan ye nduco vo yahn che chih Daya ye, nedihve ye nunde yuhn vo. Man che a ntuche iḥyan min man, che yan Dendiohs nduco vo man ne, tahque nun ndevahn vo.

¹¹ Ama yeno vo che ndo yan Dendiohs nduco vo, din Dihvo vo Jesucristo.

Ejemplo yahn Adán

¹² Çava Adán ne, chihnde nunde muhn iyehñse cuh, ne çava nunde min ne, chihnde çade che coh nducoyaça iḥyan, te nducoyaça ye ne, chendiḥco ye nunde.

¹³ Nde ro che metah cuhnde ley che dirun Moisés ne, iḥyan iyehñse ne, a iḥyan nunde ye. Ate nan che metah ley ne, nde hua duhva ra cuande nunde yahn iḥyan.

¹⁴ Andahre hua dama nunde yahn iḥyan nduhça nunde che chahcotahn Adán yahn Dendiohs, ate quendi chih ye, canan nde ro min, nde nda ro che quenani Moisés iyehñse. Çava Adán ne, nducoyaça iḥyan iyehñse ne, chendiḥco ye nunde. Ate çava Dihvo vo Jesucristo, iḥyan min che nda ye iyehñse adiva ne, co ndevahn nducoyaça ye.

¹⁵ Çava nunde yahn Adán ne, chendiḥco nducoyaça iḥyan nunde. Ate hua tihça vedevahino yahn Dendiohs, te dechuh ye Dihvo vo Jesucristo, ne numacuahn vedeyahino, ndiyu deman ndedevahn ye ama yahn iḥyan çava che hua co ye castigo, ate namin din ye che co cuahtenan ye vahchetero numacuahn ro.

¹⁶ Çava nunde yahn Adán ne, va che co nducoyaça iḥyan castigo. Ate hua tihça vedevahino yahn Dendiohs, te andahre ama chendiḥco iḥyan nunde, ate ndo yan Dendiohs nduco ye, nedin yahn ye iḥyan.

¹⁷ Çava nunde yahn Adán ne, va che coh nducoyaça iḥyan. Ate hua tihça vedevahino yahn Dendiohs, te çava Dihvo vo Jesucristo ne, nducoyaça iḥyan che ndo yan Dendiohs nduco ye, nedin yahn ye iḥyan ne, ama ndah ro yahn ye, cuahtenan ye vahchetero numacuahn ro.

¹⁸ Tuhme nducote quendihco Adán nunde ne, va che co nducoyaca ihyan castigo. Ate nducote ndahca din Dihvo vo Jesucristo, chih ye cava ihyan nunde ne, ndo yan Dendiohs nduco ye, nedin yahn ye ihyan.

¹⁹ Tihca, te yahn che chahcotahn Adán yahn Dendiohs ne, nducoyaca nducondi ihyan ne, chihndanani ihyan. Ate yahn che dinahn Dihvo vo Jesucristo yahn Dendiohs ne, ama yahn ihyan, nedin yahn Dendiohs ihyan.

²⁰ Ley che dirun Moisés ne, chihnde cava che tahque cuhnde ro nunde yahn ihyan che co ro menan, ne ama chihnde ro che chendihco ye nunde. Ate nde nduco nduh ne, tahque quenani cuma Dendiohs vedeyahino,

²¹ ne andahre redin nunde yahn ihyan che co ye castigo, ate numacuahn vedeyahino ndo yan Dendiohs nduco ihyan che ritahno ye Dihvo vo Jesucristo, nedin yahn ye ihyan, cuahtenan ye vahchetero numacuahn ro.

6

Ihyan che ritahno ye Dihvo vo Jesucristo ne, ametah che cuahtendihco ye nunde

¹ Nducote tihca ne, nde hua ndedecadino vo che quendi vo cuahtendihco vo nunde cava che tahque cuhnde ro vedeyahino yahn Dendiohs nduco vo.

² Ndiyu tihca che va che din vo, te a chihcoman vo nunde yuhn vo, ne hua ndahca che quendi vo.

³ Cuedevano nchuhn te che chedenune vo, cah vo Dihvo vo Jesucristo ne, nguahco yuhn vo che chih ye, chi cuande vo van ihyan yahn ye.

⁴ Tihca, cava che nduhca che numacuahn vederihquentiyon ndedetuhche Dendiohs Chida ihyan min van tenahn ne, namin uvo che a ndi i vo, nedin nunde yuhn vo ne, din ye che ndo vo ihyan ra, cuahtechico vo runecade.

⁵ Tihca, te nducote nguahco yuhn vo che chih Dihvo vo, chi cuande vo van ihyan yahn ye ne, namin din Dendiohs che ndo vo ihyan ra, cuahtechico vo runecade nduhca che ndedetuhche ye ihyan min van tenahn.

⁶ Din vo cuande che anduhneca ndete che a chenani yah vo nduco Dihvo vo, cava che cahcoman vo nducuahn nunde che chahtendihco vo ro menan, ne hua quendi vo cuahtendihco vo.

⁷ Nduco tihca ne, anduhneca ndete che a chih vo, ne ama yune no chihcoman vo nunde yuhn vo.

⁸ Me nducote anduhneca ndete che a chih vo dama nduco Dihvo vo Jesucristo ne, a chenani ino vo che conduco vo ihyan,

⁹ te a devano vo che a ndedetuhche Dendiohs ihyan van tenahn, ametah ndaconan coh ye. Cava ye ne, ametah vederih.

¹⁰ Me yahn che chih ye ne, ama yune no chih ye cava nunde yuhn vo. Ate ntuche ye, ne conahn ye vahchetero. Man ne, va ye nan Dendiohs.

¹¹ Nduco tihca ne, din vo cuande, ne cahcoman vo nunde yuhn vo, runecade cuahtechico vo nduhca che nahn Dendiohs, cochahtino vo Dihvo vo Jesucristo.

¹² Chemin che hua quendi vo cuahtechico vo vedeyeno yahn man vo, cuahtendihco vo nunde.

¹³ Hua cahco vo chedave yuhn vo, cuahtendihco vo nunde, te tahque ndah ne, nduhca ihyan ra ne, va che cahco vo chedave yuhn vo tah Dendiohs cava che runecade cuahtechico vo nduhca che nahn ye.

¹⁴ A ndevahn vo, ametah che cuahtendihco vo nunde, te ndotenan che cahcantiyon ley che dirun Moisés uvo ne, a rihquentiyon Dendiohs uvo, redin yahino ye uvo.

¹⁵ Co vate ihyan che rahco ye che nducote yahino Dendiohs uvo man, hua rihquentiyon ley che dirun Moisés uvo man ne, a vatemān vo, co cuahtendihco vo nunde. Ate hua tihca.

¹⁶ A devano vo te ndete che cuahn din vo ntiyon nduco ama patrón ne, va che dinahn vo che cahcantiyon ye. A namin no tun ndete che cahco vo chedave yuhn vo tah Dendiohs ne, va che runecade cuahtechico vo nduhca che nahn ye. Me ndete che cahco vo chedave yuhn vo che quendi vo yune yahn man vo ne, va che co vo castigo.

¹⁷ Nundihve cuahn Dendiohs, te nchuhn ne, andahre chahtechica ne vedeyeno yahn man ne ro menān, chahtendihco ne nunde, ametah tama nan che co din ne ne, ate chitahno ne ndudo ndah yahn Dihvo vo Jesucristo, chihco ne chedave yahn ne tah ye.

¹⁸ A ndevahn ne, a chihcomān ne yune chihnga yahn ne, cava che runecade cuahtechica ne.

¹⁹ Dirún ejemplo chemin chan cava che co conahn ne. Ro menān me ne, chihco ne chedave yahn ne che quendi ne yune chihnga, ne ca cuahn ca cuahn nde tahque chihnga redin ne. Ate man ne, nahn che cahco ne chedave yahn ne tah Dendiohs, cava che tahque runecade cuahtechica ne ro ro.

²⁰ Ro menān cuahn che quendi ne yune chihnga, chahtendihco ne nunde ne, va man ino ne, nde hua renda yahn ne che runecade cuahtechica ne.

²¹ Nducuahñ dehtenduh che chihnga din ne ro min ne, hua chichihve yahn ne, nde ri cuihnan ne yahn. Avāne ne, a vate ne che co ne castigo.

²² Ate man che ndedevahn Dendiohs nchuhn, nchahco ye nunde yahn ne ne, chihco ne chedave yahn ne tah ye. Ama cochihve yahn ne, te runecade cuahtechica ne, ne cuihno min ne, cuahtenan ne vahchetero numacuahn ro.

²³ Ihyan che rahtendihco ye nunde ne, va che co ye castigo, din nunde yahn ye. Ate ihyan che ndichahtino ye Dihvo vo Jesucristo ne, numacuahn vedevahino, ndeva Dendiohs ihyan, cuahtenan ye vahchetero numacuahn ro.

7

Nduhca che rihquentiyon ley che dirun Moisés

¹ Dihno, nducote a devano nchuhn ley che dirun Moisés ne, a tumacadino ne te rihquentiyon ihyan atenan ro che vate ye iyehñse.

² Condihe ne. Ama ndahta ne, rihquentiyon ley min che hua co tehche te inchahn te, cahnevaco te nduco tama chahn. Ate ndete che coh inchahn te ne, nuhndeman te yahn vederihquentiyon min.

³ Chemin che ndete che cuhnde te nduco tama chahn numanahn che va inchahn te ne, din duche yahn te che a nihnevaco te, condihco te nunde. Ate ndete che coh inchahn te ne, nuhndeman te yahn vederihquentiyon min, ne co ndaconan cahnevaco te, ametah condihco te nunde.

⁴ Dihno, nduhca ndahta che a ndih inchahn te ne, tihchan vo nan ley che dirun Moisés, te nducote a chitahno vo Dihvo vo Jesucristo, ihyan min che chih ye ndedevahn ye uvo ne, a chihno vederihquentiyon yahn ley min cavo vo. Man ne, a ndedetuhche Dendiohs ihyan van tenahn, ne a ihyan min che rihquentiyon ye uvo, nahn ye che cochihvo vo nan ntiyon yahn Dendiohs.

⁵ Ro menān cuahn che chahtechico vo vedeyeno yahn man vo ne, andahre chihco ro ley min che chendihco vo nunde, ne va che co vo castigo, ate quendi vo chahtendihco vo nunde.

⁶ Ate ley ndico me ne, chihno vederihquentiyon yahn cavo vo. Man ne, redin vo ntiyon yahn Dendiohs numacuahn vederihquentiyon yahn Vaco Ndah yahn ye.

Rahn Pablo yahn nunde yahn ye

⁷ Andahre tihça, ate hua co çahmo vo che çava ley min che rahtendiho vo nunde. U ne, ndete che hua çava ley min ne, nde hua chidevanó cha che nunde. Nduhça vede idihya ne, a che a ndirun yahn nan ley min che chidevanó che nunde chemin.

⁸ A çava ley min che tumacadinó che ama quendiho nunde yahn vede idihya, ate quendí nduco vede idihya. Ndete hua çava ley min ne, nde hua tumacadinó vo che va nunde yahn vo.

⁹ Ro menan cuahn che nde hua devanó ley min ne, va man inó. Ate cuahn che chidevanó ley min ne, tumacadinó che quendiho nunde, ne ama chi ndaché çava.

¹⁰ Ley min ne, a chihnde çava che tihyon yune ihyan che runecade cuahtehica ye, ne quenan inó che ndahça conán. Ate ndotenan che tihça ne, chihco ro che ama va nunde yahn, ne ama chi ndaché.

¹¹ Quenan inó che ndahça conán, ate chihncneh man u, te hua chichá dináhn nduhça che rihquentiyon ley min. Ama chi ndaché, te cuahn dama redín dehtenduh che rihco yudo ley min yahn.

¹² Chemin che a devano vo te ley min ne, ndah.

¹³ Din che chi ndaché, ate hua co çahma nundé yahn, te ley min ne, ndah, ne atenan che din ne, che chihco ro che chihnga dehtenduh che din. Andahre tihça, ate chahcotáhn che rihquentiyon, ne a nunde yahn man din che ama chi ndaché.

¹⁴ A devano vo te ley min ne, a Dendiohs che chihco ye, ate u ne, ihyan nunde u, a ndihó chedave yahn che condihó nunde.

¹⁵ Nde man hua retumacadinó nduhça che redín, te ndotenan che din dehtenduh che ndah che renan inó ne, redín dehtenduh che hua ndah che hua renan inó.

¹⁶ Nducote redín dehtenduh che chihnga, che nde man hua renan inó ne, retumacadinó te ley min ne, ndah, yahn che rihco yudo yahn dehtenduh che chihnga.

¹⁷ Andahre hua nahn dín dehtenduh chemin chan, ate hua richá, ne redín, rendihó nunde.

¹⁸ Tihça, te vedeyeno yahn man ne, hua ndahça. Nahn dín dehtenduh che ndah, ate hua richá che dín.

¹⁹ Ndotenan che dín dehtenduh che ndah che renan inó ne, redín dehtenduh che chihnga che hua renan inó.

²⁰ Nducote redín deman dehtenduh che hua renan inó, rendihó nunde ne, a ndero ndi che hua ndahça vedeyeno yahn.

²¹ Tihça rahno rí. Chuan che ndedecadinó che nahn dín che ndah ne, tahque nun renda yahn che dín dehtenduh che chihnga.

²² Andahre nahn dináhn vederihquentiyon yahn Dendiohs,

²³ ate hua richa yahn, te tahque nun renda yahn che riquendí vedeyeno yahn man, rendihó nunde.

²⁴ ¡Ama vedín! ¿A va ihyan che co ndevahn ye u yahn che ama quendiho nunde ne?

²⁵ Atenan Dendiohs, te dechuh ye Dihvo vo Jesucristo, ndevahn ye u. ¡Nundihve cuahn ihyan! Nduhça che a rahn ne, nahn dináhn vederihquentiyon yahn Dendiohs, ate hua richa yahn, te tahque nun renda yahn che riquendí vedeyeno yahn man, rendihó nunde.

8

Nduhca che rahtechica ihyan che ritahno ye Dihvo vo Jesucristo

¹ Nducote a chih Dihvo vo Jesucristo cava nunde yahn ihyan iyehense ne, nducoyaca ihyan che ritahno ye ihyan, chihcoman ye che rahtendihco ye nunde, redinahñ ye vederihquentiyon yahn Vaco Ndah yahn Dendiohs ne, ihyan chahn ne, a nchahco Dendiohs nunde yahn ye, ametah co ye castigo.

² Tihca, te uvo che ritahno vo Dihvo vo ne, rihquentiyon Vaco Ndah yahn Dendiohs uvo, redin che rendo vo ihyan ra, ne ametah rahtendihco vo nunde man, ndevahn vo yahn castigo che va che co ihyan nunde man.

³ Nducote ama nahn cuahtechico vo vedeyeno yahn man vo ne, hua chicha vo dinahn vo ley che dirun Moisés. Ate Dendiohs ne, ndedevahn ye uvo, dechuh ye Daya ye, ndo ye nduhca ama ihyan iyehense. Ihyan min ne, andahre hua quendihco ye nunde, ate chih ye, nedihve ye nunde yuhn vo.

⁴ Tihca din ye cava che, uvo che a chihcoman vo vedeyeno yahn man vo, runecade vatechico vo nduhca che nahn Vaco Ndah yahn Dendiohs ne, co dinahn vo che rihquentiyon ley min.

⁵ Ihyan che vatechica ye vedeyeno yahn man ye, rahtendihco ye nunde ne, rendedecadino ye dehtenduh che chihnga. Me ihyan che vatechica ye nduhca che nahn Vaco Ndah yahn Dendiohs ne, rendedecadino ye yahn vederihquentiyon yahn.

⁶ Ihyan che redinahñ ye vederihquentiyon yahn Vaco Ndah yahn Dendiohs ne, rendo ye ihyan ra, ne ndahca rahtechica ye. Ate ihyan che vatechica ye vedeyeno yahn man ye, rahtendihco ye nunde ne, quenan cuma che din Dendiohs castigo ihyan.

⁷ Ihyan che vatechica ye vedeyeno yahn man ye, rahtendihco ye nunde ne, rahcotahn ye yahn vederihquentiyon yahn Dendiohs, nde hua ri che dinahn ye.

⁸ Che tihca redin ihyan chahn ne, hua recah yune ye che ndo yan Dendiohs nduco ye.

⁹ Ate nchuhn ne, ndete che cuaco che quenun Vaco Ndah yahn Dendiohs nchuhn ne, hua vatechica ne vedeyeno yahn man ne, te redinahñ ne che rihquentiyon. Me duh che metah nedin yahn Dihvo vo Jesucristo ne, hua quenun Vaco ye.

¹⁰ Ndete che quenun Vaco ye nchuhn ne, andahre ama chendihco ne nunde, ate ndo yan ye nduco ne, nedin yahn ye nchuhn.

¹¹ Ndete che Vaco Ndah yahn Dendiohs, ihyan min che ndedetuhche ye Dihvo vo Jesucristo van tenahn, quenun nchuhn ne, numacuahn vederihquentiyon min ndedetuhche ye nchuhn nda ro yahn.

¹² Dihno, chemin che quenan cumo vo che cahcoman vo vedeyeno yahn man vo,

¹³ te ndete che cuahtechico vo vedeyeno yahn man vo, cuahtendihco vo nunde ne, va che co vo castigo. Ate ndete che cohahtino vo Vaco Ndah yahn Dendiohs, din che cahcoman vo vedeyeno yahn man vo ne, tuhme runecade cuahtechico vo.

¹⁴ Nducoyaco vo che rihquentiyon Vaco Ndah yahn Dendiohs uvo ne, a yahn ye uvo.

¹⁵ Che quenun Vaco Ndah yahn ye uvo ne, ndiyu cava che din vah vo ihyan nduhca che din vo ro menan, te cava che nedin daya ye uvo. Che rahn vo yahn Dendiohs: "Ndih, Chida nuhn" ne,

¹⁶ a man Vaco ye rete che recadino vo che daya ye uvo.

¹⁷ Me nducote a daya ye uvo ne, ndeva ye uvo, cuahtenan vo dama nduco Dihvo vo Jesucristo vahchetero. Ndete che rechuhrihn vo man ro cuh

nduhça che chuhrihn Dihvo vo ne, quenan cuma che cuahtenan vo ðama nduco ye vahchetero.

18 A devano vo te che rechuhrihn vo man ro cuh ne, tah ra chemin, te ama ndahça cuahno vo cuahn che ndeva Dendiohs uvo, cuahtenan vo vahchetero.

19 Man ro cuh ne, nducuahn che va iyehanse ne, ama ndache chenan, ate nda ro che ndeva Dendiohs ihyan yahn ye ne, nde nducuahn dehtenduh chemin chan ne, ama ndahça cuahno.

20 Tihça, te nducuahn dehtenduh ne, a din dine Dendiohs, andahre metah nunde yahn. Ate nda ro yahn ne,

21 ndahco çade ye nducuahn, ne ama ndahça cuahno nduhça che cuahno ihyan yahn ye, te man ye çahcantiyon ye nducuahn.

22 A devano vo te nde meniyan ne, nducuahn che va iyehanse ne, ama ndache chenan.

23 Namin uvo che quenun Vaco Ndah yahn Dendiohs uvo ne, ama ri ndache ino vo, chenan rino vo che ndedetuhche Dendiohs uvo, ndeva ye uvo.

24 A ndedevahn Dendiohs uvo, ne chenan ino vo che ndeva ye uvo. Dehtenduh che a chinahn ne, ametah chenan ino vo che coman va che conahn, te a chinahn. Tihça, te nde ama ihyan ne, hua quenan ino ye che coman va che conahn dehtenduh che a chinahn.

25 Uvo ne, numacuahn vedechahtino chenan ino vo dehtenduh che coman va che conahn.

26 Namin Vaco Ndah yahn Dendiohs ne, rinan uvo van dehtenduh che rechuhrihn vo. Andahre hua devano covah vo nduhça che redin yahn, ate rinan Vaco Ndah yahn Dendiohs uvo, rahn nan uvo numa dito, nde hua tuno vederedecadino yuhn vo deh çahmo vo yahn.

27 Dendiohs, ihyan min che devano ye deh che rendedecadino vo ne, renahn ye deh che rica Vaco Ndah yahn ye, te rahn nan ihyan yahn ye nduhça che nahn man ye.

Ihyan yahn Dendiohs ne, ametah deh cuande che dihya nun ino ye co

28 A devano vo te uvo che yahino vo Dendiohs, che man ye tendahnun ye uvo ne, nducuahn che rahno ri vo ne, a çava che ndah yuhn vo.

29 Tihça, te a tendahnun Dendiohs uvo, ne chihco çade ye nde ro menan che cotahno vo ihyan, çava che ama yahn vo co vo nduhça Daya ye, ihyan min che conan ye yuhn vo.

30 Uvo che a tendahnun Dendiohs uvo ne, din ye che chitahno vo. Ndo yan ye nduco vo, nedin yahn ye uvo, ne quenan cuma che ndeva ye uvo vahchetero.

31 A devano cuaco vo te nducote a man Dendiohs yahino ye uvo ne, ametah duh che co cahnevi uvo tah ye.

32 Ihyan min ne, andahre ama yahino ye Daya ye, ate chihco mendahn ye ihyan, chih ye çava nducoyoço vo. Nducote tihça din ye çavo vo ne, nde tahque nun din ye dehtenduh chenahn çavo vo.

33 Uvo che a tendahnun Dendiohs uvo ne, nde hua cochihve yahn ihyan che cuih nunde ye yuhn vo, te a man Dendiohs nedin yahn ye uvo.

34 Hua cochihve yahn ihyan che cuih nunde ye yuhn vo, te Dihvo vo Jesucristo, ihyan min che chih ye, ne ntuche ye van tenahn ne, va ye laðo tah cuaco Dendiohs, ne a ihyan min che rahn nan ye uvo.

35 Ametah deh che co din che to ino Dihvo vo Jesucristo nduco vo. Andahre chuhrihn vo man, andahre din tan ihyan nduco vo man, andahre nde metah che chuh vo man, andahre nde metah tino yuhn vo man, andahre çahnda

yuhn vo che vato vo tah vederih man, andahre cahno ihyan uvo man, ate Dihvo vo Jesucristo ne, yahino ye uvo.

³⁶ Tihca rahno ri vo, nduhca che a ndirun nan Ndudo yahn Dendiohs tuhca:

Dihve nuhn, yahn che ritahno nuhn ndih, rihno ihyan combiero yahn nuhn cuahn dama.

Rihno ye nuhn nduhca che rihno ye itecuche che va che cahno ye ite.

³⁷ Ate nde nduco nduh ne, hua dehva co yuhn vo, te Dihvo vo Jesucristo, ihyan min che yahino ye uvo ne, redin ye cudado uvo.

³⁸ Chemin che a devano cuaco vo te nde huane vederih, nde huane vedevihche, nde huane angel, nde huane vaco chihnga, nde huane dehtenduh che ri, nde huane dehtenduh che va che co,

³⁹ nde huane nan yaco, nde huane nan yano, nde ama nan dehtenduh chemin chan, hua co din che to ino Dendiohs nduco vo, te ihyan min ne, yahino ye uvo che cuande yahn Dihvo vo Jesucristo.

9

A tendahnun Dendiohs ihyan naci3n yahn Israel

¹ Nduhca che ritahn3 Dihvo vo Jesucristo man, numacuahn vederihquentiyon yahn Vaco Ndah yahn Dendiohs man ne, cuaco rahn ri nchuhn

²⁻³ te ama yah ri cava ihyan naci3n yahn man, ama rendedecadin3 cava ye man, nde tuno nahn che co dine man nan Dihvo vo Jesucristo, ndete che nduco chemin co ndevahn ihyan chahn.

⁴ Ihyan chahn ne, ndata yahn Israel ihyan, a nedin daya Dendiohs ihyan, ne numacuahn vederihquentiyon chinduco ye ihyan man, cah ye ndudo yahn ye ihyan man, chihco ye ley yahn ye tah ye man, chicuahn ye ihyan taca ndeva ye yavenan ye man.

⁵ Ihyan chahn ne, ndata yahn ihyan ndico ihyan. A nan ndata yahn ye quendah Dihvo vo Jesucristo, ihyan min che Dendiohs ye. ¡Ama chahte vederihquentiyon yahn ye, ndeva vo yavenan ye cuahn dama!

⁶ Che chi dine ama yahn ihyan chahn ne, hua co din vo nunde yahn Dendiohs, te ndudo yahn ye ne, rinahn. Che cuaco ne, andahre nducoyaca ye ndata yahn Israel ihyan, ate hua nducoyaca ye chitahno ye.

⁷ Andahre ndata yahn Abraham ihyan, ate hua nducoyaca ye chitahno ye nduhca che chitahno ihyan min. Nan Ndudo yahn Dendiohs a ndirun tuhca: "Atenan van daye Isaac din cuand3 ndata yehn."

⁸ Nduco tihca ne, tumacadino vo che hua nducoyaca ihyan che ndata yahn Abraham nedin yahn Dendiohs ihyan, te atenan ihyan che a necah ye ndudo yahn ye che nedin yahn ye ihyan.

⁹ Ndudo yahn Dendiohs che cah ye Abraham ne, tuhca: "Nda ro yahn ne, din vederihno, ne Sara ne, ndaca ama daya te."

¹⁰ A namin no tun nduh che o sahn daya ihyan ndico yuhn vo Isaac, nduco ndahta yahn ye Rebeca.

¹¹ Sahn chahn ne, andahre nde metah cuahteyan se, andahre nde metah din se che ndah, nde huane che chihnga, ate Dendiohs ne, tendahnun ye ama cha sahn chahn, chihco ro ye che retendahnun ye ihyan che ri yeno man ye, atanochan ye.

¹² Rahn ye ri ye chaco se: "Sahn che ive me ne, conan se yahn dihno se che menan."

¹³ Tihca chinahn nduhca che a ndirun nan Ndudo yahn Dendiohs tuhca: "Tahque din yahin3 Jacobo che co Esaú."

¹⁴ Nde hua co çahma vo che hua ndahça che tihça redin Dendiohs,

¹⁵ te a ndirun nan Ndudo yahn ye che rahñ ye nduco Moisés tuhça: “Conan vahinó adecoduhno ihyan che ri yeno man.”

¹⁶ Nducote tihça ne, ihyan che ndevahn ye ne, ndiyu yahn ntiyon che redin ye, nde huane yahn che redin nun ino ye, te atenan che conan vahino Dendiohs ihyan.

¹⁷ Namin a ndirun nan Ndudo yahn Dendiohs nduhça che rahñ ye nduco rey yahn Egipto tuhça: “A u che te yuné che quenen rey, ne redin vederihno nan, rihco ró che ama quenana cumá vederihquentiyon, cadino ihyan numachahte iyehñse.”

¹⁸ Nduco tihça ne, a ndero ndi che duh che nahn conan vahino Dendiohs ne, renan vahino ye, ne duh che nahn din cheche ye chedave yahn ne, redin ye.

¹⁹ Co vate ihyan che rahco ye che nducote tihça ne, hua ndahça che din Dendiohs castigo ihyan nunde, te man ye redin cheche ye chedave yahn ihyan chahn.

²⁰ Ate nde ama ihyan hua co çahma nunde ye yahn Dendiohs. A Dendiohs che dendah ye ihyan iyehñse, ne nde ama ihyan hua co çahma nunde ye yahn ihyan min yahn dehtenduh che redin ye.

²¹ Ihyan che redendah ye chite yahn ne, co dendah ye che ndahchan man, co dendah ye che ndere man, atanoca che ri yeno man ye.

²² Atihnoça Dendiohs. Co din ye adecodehno che ri yeno man ye, ne nde ama ihyan hua co çahma nunde ye yahn ye. Cuahn che nahn ye ne, co din ye castigo ihyan nunde, çahco ro ye vederihquentiyon yahn ye. Andahre quenana cuma che din ye castigo ihyan chahn, ate redin chahtino ye yahn ye.

²³ Namin numacuahn vederihquentiyon yahn ye rihco ro ye che ama chahte vedevahino yahn ye nduco ihyan che a tendahnun ye nde ro menan. Ihyan chahn ne, ndeva ye ihyan vahchetero.

²⁴ Uvo van ihyan nación yahn Israel man, van ihyan nación chenahn man ne, a tendahnun ye uvo,

²⁵ nduhça che dirun ihyan profeta Oseas tuhça:

Rahñ Dendiohs: “Ihyan che hua ihyan yahn ne, nedin yahn ihyan.

Ihyan che hua din yahinó ne, din yahinó ihyan.”

²⁶ Namin rahñ ye: “Ihyan nación chenahn che ndiyu ihyan yahn ne, nedin dayá ihyan,

çahma nducoyaca ihyan che ihyan chahn ne, daya Dendiohs ihyan.”

²⁷ Me ihyan nación yahn Israel ne, rahñ Dendiohs yahn ye, dirun ihyan profeta Isaías tuhça: “Andahre ama yahn ihyan nación yahn Israel nduhça che ndeh yahndute che chetave cuahn chito nuniyahn ne, neve ra ye che ndevahn ye,

²⁸ te Dihvo vo Dendiohs ne, nduco nun no din ye castigo ihyan.”

²⁹ Namin dirun ihyan profeta Isaías tuhça:

Ndete che Dihvo vo Dendiohs, ihyan min che va ye vahchetero, hua ndedevahn ye neve ihyan nación yuhn vo ne,

ametah nde ama vo; a chihno chih vo, nduhça che chihno chih ihyan van Sodoma man, ihyan van Gomorra man.

³⁰ Nducote tihça ne, a tumacadino vo che ihyan nación chenahn che nde hua yahn Dendiohs ihyan ne, nducote a chitahno ye ne, nedin yahn Dendiohs ihyan.

³¹ Me ihyan naci6n yahn Israel ne, renevahnecun ye ley che dirun Mois6s, chenán ino ye che ndevahn ye, ate nducote hua dinahn ye ne, hua nedin yahn Dendiohs ihyan.

³² Hua nedin yahn ye ihyan, te ndotenan che cotahno ye ne, tahque ndah ye ne, ndedecadino ye che dinahn ye ley min, ndevahn ye. Ate hua ndevahn ye, te va deh cuande che denda ye,

³³ nduhcā che a ndirun nan Ndudo yahn Dendiohs tuhcā:

Cuihcovan nchuhn. Dechúh ama ihyan naci6n yahn ne.

Ihyan min ne, nduhcā ama tu che conda cāh ihyan.

Ihyan che hua cotahno ye ihyan min ne, conda ye.

Ate ihyan che cotahno ye ihyan ne, ndevahn ye.

10

¹ Dihn6, numacuahn chedave yāhn ricā Dendiohs che ndedevahn ye ihyan naci6n yahn Israel.

² U ne, rāhn te ihyan chahn ne, rahco ye te ama redinahn ye che rihquentiyon Dendiohs, ate nde hua renahn ye vederihquentiyon yahn ye.

³ Tihcā, te nducote nde hua devano ye vederihquentiyon yahn Dendiohs che ndo yan ye nduco ihyan, nedin yahn ye ihyan ne, rahcotāhn ye yahn vederihquentiyon min, riquendi ye vededevano yahn man ye.

⁴ Dendiohs ne, rene dinahn yahn ye nducoyāca ihyan che ritahno ye Dihvo vo Jesucristo. A cāva ihyan min che chihno vederihquentiyon yahn ley che dirun Mois6s.

⁵ Mois6s ne, dirun ye te ihyan che dinahn ye che rihquentiyon ley min ne, nedin yahn Dendiohs ihyan.

⁶ Me che nedin yahn Dendiohs ihyan che ritahno ye ne, co vate ihyan che duche rino ye, ne tuhcā rāhn ye: “¿Duhra chahn vahchetero, ndihchero che min chica ihyan min che a va cāde che chi ye ndedevahn ye ihyan iyehñse?”

⁷ ¿Duhra chahn van tenahn, ndihchero che ntuche ihyan min?” Ama vedetundo che tihcā rāhn ihyan,

⁸ te nan Ndudo yahn Dendiohs ne, a ndirun tuhcā: “Ndudo cuāco ne, a va tāh nchuhn.” Ndudo min ne, a ndudo ndah yahn Dihvo vo Jesucristo che rahndudo nuhn.

⁹ Cāva che ndevahn nchuhn ne, nahn che cotahno ne numacuahn chedave yahn ne, che Dihvo vo Jesucristo ne, ndedetuhche Dendiohs ihyan van tenahn, ne cāhma ne che a ihyan min che Dihve ne, renevahnecun ne ihyan.

¹⁰ Tihcā, te ihyan che numacuahn chedave yahn ye ritahno ye Dihvo vo Jesucristo, ne rāhn ye che ihyan min che renevahnecun ye ne, ndevahn ye, ne rendo yan Dendiohs nduco ye, rene dinahn yahn ye ihyan.

¹¹ Nan Ndudo yahn Dendiohs ne, a ndirun tuhcā: “Adecoduhno ihyan che ritahno ye ihyan min ne, hua conda ye.”

¹² Tihcā, te nducoyāca ihyan, ihyan naci6n yahn Israel man, ihyan naci6n chenahn man, a ihyan min che Dihve ye, ne yahino ye nducoyāca ihyan che ritahno ye ihyan, rende va ye yavenan ye.

¹³ Namin a ndirun tuhcā: “Nducoyāca ihyan che cuah ye Dihvo vo ne, ndevahn ye.”

¹⁴ Ate ndete che hua ritahno ye Dihvo vo ne, nde hua cuah ye ihyan. Ndete che hua nihnevan ye ndudo yahn ye ne, nde hua cotahno ye ihyan. Ndete che metah duh che cuahndudo ne, nde hua cahnevan ye ndudo yahn ye.

¹⁵ Ndete che hua dechuh Dendiohs ihyan che cuahndudo ye ne, nde metah duh che cuahndudo. A ndirun nan Ndudo yahn Dendiohs tuhcā: “¡Ama ndah

ro yuhn vo!, che renda ihyan rahndudo ye ndudo ndah yahn Dendiohs, din che ndahca cuahtenan vo.”

¹⁶ Ate hua nducoyaca ihyan redinahn ye yahn ndudo min nduhca che dirun ihyan profeta Isaías tuhca: “Dihvé, neve ra ihyan che ritahno ye ndudo yahn ne che rahndudo nuhn.”

¹⁷ Cava che cotahno ihyan Dihvo vo Jesucristo ne, va che cahnevan ye ndudo yahn ye.

¹⁸ Nde hua co cahma ihyan che hua chihnevan ye ndudo min, te nan Ndudo yahn Dendiohs a ndirun tuhca:

Ndudo yahn ye ne, a chetuhn numachahte iyehense.

A chihnevan nducoyaca ihyan.

¹⁹ Me ihyan nación yahn Israel ne, a chenahn ye ndudo min, te Moisés menan vihca dirun ye tuhca:

Rahn Dendiohs: “U ne, nedin yahn ihyan nación chenahn che rahco nchuhn che ndere ihyan ye,

dín che co ve ne man, co tan ne man.”

²⁰ Nde tahque numa dirun ihyan profeta Isaías tuhca:

Rahn Dendiohs: “Ihyan nación chenahn che nde hua tumacah ye u ro menan ne,

cahco ró vederihquentiyon yahn van ye, ne cotahno ye u.”

²¹ Me yahn ihyan nación yahn Israel ne, dirun ye ndudo che rahn Dendiohs yahn ye tuhca: “Cuahn dama riyahvé nchuhn, ate rahcotahn ne yahn.”

11

Ihyan nación yahn Israel che ndevahn ye

¹ Co vate ihyan che rahco ye, che a ama yune no chacondah vedame Dendiohs ihyan yahn ye, ihyan nación yahn Israel. Ate hua tihca. A devano cuacó, te u ne, ihyan nación yahn Israel u. Abraham man, Benjamín man, che ihyan ndico yahn.

² Dendiohs ne, hua chacondah vedame ye ihyan che a tendahnun ye nde a rahn me. A devano nchuhn nduhca che covah ihyan profeta Elías, ndirun yahn nan Ndudo yahn Dendiohs. Cahn nunde ye yahn ihyan nación yahn Israel tuhca:

³ “Dihvé, ihyan sih ne, a chihno chihno ye ihyan profeta yahn ne, a chihno ndahtera ye nducuah nan ta yahn ne. A deman u che ametah cahno ye, ne rinuhn ye u che cahno ye u.”

⁴ Ate a devano ne nduhca che ndaconan Dendiohs yahn ye. Rahn ye: “Vate ca te ndache mil ihyan yahn che metah ndeva ye yavenan Baal che redin ihyan sih dendiohs yahn ye.”

⁵ Atihnoqa man ro cuh, te yahn ihyan nación yahn Israel che tendahnun Dendiohs ihyan numacuahn vedeyahino yahn ye.

⁶ Nducote yahn che yahino ye ihyan chahn che tendahnun ye ihyan ne, a ndero ndi che ndiyu cava che dinahn ihyan chahn ley che dirun Moisés. Ndete che yahn che dinahn ye ley min che tendahnun Dendiohs ihyan ne, tuhme nde hua rendotenan ye vedeyahino yahn Dendiohs cava che ndevahn ye.

⁷ Hua nducoyaca ihyan nación yahn Israel chi ndevahn ye nduhca che ndedecadino ye. Atenan ihyan che tendahnun Dendiohs che ndevahn ye. Me ihyan chenahn ne, din cheche Dendiohs chedave yahn ye,

⁸ nduhca che a ndirun nan Ndudo yahn ye tuhca: Din Dendiohs che anduhneca che a ndih chedave yahn ye.

Nde meniyan ne, rendihchero no ye, ate hua renchanan ye, rihnevan no ye, ate hua renahn ye.

⁹ Namin dirun David tuhca:

Dihvé, codin ne che dehtenduh vihco che redin ihyan sih din che denda ye.

¹⁰ Cuacondah vedame ne ihyan cuahn dāma, codin ne castigo ihyan.

¹¹ Co rahco ihyan che din cheche Dendiohs chedave yahn ihyan nación yahn Israel cava che ama yune no conda ye. Ate hua tihca, te che chahcotahn ihyan chahn yahn Dendiohs, chahtendihco ye nunde ne, ndaca yune che ndevahn ihyan nación chenahn. Ndihchero ye che rendevahn ihyan nación chenahn ne, din nun ino ye, ndonun yune ye nevahnecon ye vederihquentiyan yahn Dendiohs.

¹² Nducote cava nunde yahn ihyan nación yahn Israel ama ndahca chahno ihyan nación chenahn, ndevahn ye ne, nde tahque ndahca yahn ye cuahn che ndeva Dendiohs nducoyaca ihyan nación yahn Israel.

¹³ Nchuhn ihyan nación chenahn, u ne, a tendahnun Dendiohs u che co apóstol, cuahndudó ndudo yahn ye van nchuhn. Redín ntiyon yahn ye numacuahn chedave yahn,

¹⁴ te nahn che ndihchero ihyan nación yahn nduhca che rendedevahn Dendiohs nchuhn. A huane din nun ino neve ye, codama ye nduco ne, cotahno ye Dihvo vo Jesucristo, ndevahn ye.

¹⁵ A cava che chacondah vedame Dendiohs ihyan nación yahn Israel che ndahca chahno ihyan nación chenahn, ndo yan Dendiohs nduco ye. Che ndeva ye nducoyaca ihyan nación yahn Israel ne, nde tahque ndahca yahn ihyan nación chenahn, anduhneca ndete che a ndih ye, ne ntuche ye van tenahn.

¹⁶ Cuahn che renevahnecon Dendiohs ama vedino ne, renevahnecon ye nducuahn. Atihnocano tun ihyan ndico che chihco ndata ye ihyan nación yahn Israel. Nducote a ndeva Dendiohs ihyan chahn ne, namin ndeva ye nducoyaca ndata yahn ye.

¹⁷ Che chacondah vedame Dendiohs ama yahn ihyan nación yahn Israel ne, anduhneca ndete che chindudo ye dune ama yahn olivo ndah. Che ndeva ye nchuhn, ihyan nación chenahn ne, anduhneca ndete che chetah ye dune yahn olivo chano, ndahca menun ye nan che chica ye dune yahn olivo ndah me, cava che a nan duto yahn olivo ndah me cuhnde cue yahn.

¹⁸ Ate hua din yade nchuhn cava chemin. Cuenechaco ne te a ihyan ndico yahn ihyan chahn che tihyon yune ye nchuhn che chitahno ne, ndeva Dendiohs nchuhn.

¹⁹ Co rahco nchuhn te yahn che tahque ndah ihyan ne che co ihyan chahn che ndeva Dendiohs nchuhn menun ye, chacondah vedame ye ihyan.

²⁰ Cuaco che ndeva Dendiohs nchuhn menun ye, ate hua din yade ne cava chemin. Tahque ndah ne, cuihco ne cudado. Cuenechaco ne te a yahn che hua chitahno ihyan chahn che chacondah vedame Dendiohs ihyan. Namin cuacondah vedame ye nchuhn, ndete che cuahcotahn ne yahn ye.

²¹ Tihca, te nducote chacondah vedame Dendiohs ihyan chahn, andahre ihyan yahn ye, nde tahque nun cuacondah vedame ye nchuhn, ndete che cuahcotahn ne yahn ye.

²² Condihe nchuhn. Dendiohs ne, nduhca che ndah ye ne, tihca cahnda ye. Chi tan ye nduco ihyan chahn che chahcotahn ye yahn ye, ne din yahino ye nchuhn che dinahn ne yahn ye. Ndete che quendi ne dinahn ne yahn ye ne, quendi ye din yahino ye nchuhn. Ndete che hua ne, namin cuacondah vedame ye nchuhn.

²³ Ihyan chahn ne, ndete che nto ino ye che chahcotahn ye, ndaconan cotahno ye ne, ndeva Dendiohs ihyan, te quenan cuma ye vederihquentiyon che ndeva ye ihyan.

²⁴ Tihca, te nducote ndeva Dendiohs nchuhn, andahre hua ihyan yahn ye nchuhn, nde tahque nun ndeva ye ihyan chahn, te ihyan yahn ye ihyan.

Va che ndevahn nducoyaca ihyan naci6n yahn Israel

²⁵ Dihno, cava che hua din yade ne, duche rino ne ihyan naci6n yahn Israel ne, te cuand6 nchuhn ama ndudo che nde hua devano ihyan ro menan. Ihyan chahn ne, yahn ye din cheche Dendiohs chedave yahn ye, nde conan cotahno ihyan naci6n chenahn che a va cade che cotahno ye.

²⁶ Cuihno min ne, ndedevahn Dendiohs nducoyaca ihyan naci6n yahn Israel nduhca che a ndirun nan Ndudo yahn ye tuhca:

Nchuhn ihyan naci6n yahn Israel, ndata yahn Jacobo, tendahnun ama ihyan naci6n yahn ne, ndedevahn ye nchuhn, din ye che nto ino ne nunde yahn ne.

²⁷ Tuhme nchahco nunde yahn ne, conahn trato che a chihco cade nduco ne.

²⁸ Ihyan naci6n yahn Israel ne, hua dinahn ye vederihquentiyon yahn Dendiohs, chahcotahn ye yahn ndudo ndah yahn Dihvo vo Jesucristo. Nduco chemin ne, ndaca yune che ndevahn ihyan naci6n chenahn. Ate Dendiohs ne, a tendahnun ye ihyan ndico yahn ihyan chahn, ne chemin che yahino ca ye ihyan.

²⁹ Tihca, te Dendiohs ne, nducuahn che rihco cade ye ne, redinahn ye. Vederihquentiyon che recah ye ihyan ne, hua renevih ye. Ihyan che renevin yahn ye ne, hua racondah vedame ye ihyan.

³⁰ Nchuhn ihyan naci6n chenahn ne, chahcotahn ne yahn Dendiohs ro menan, ate man ne, quenan vahino ye nchuhn yahn che rahcotahn ihyan naci6n yahn Israel yahn ye.

³¹ Rahcotahn ye yahn Dendiohs man ro cuh, ate nduhca che quenan vahino Dendiohs nchuhn ne, namin conan vahino ye ihyan chahn.

³² Tihca, te Dendiohs ne, din cheche ye chedave yahn nducoyaca ihyan iyehense, cava che cuahtendihco nducoyaca ye nunde, ndaca yune che conan vahino ye ihyan.

³³ ¡Ama devano Dendiohs! ¡Ama ndahca vederendedecadino yahn ye! ¡Nde hua renan retumacadino vo nducuahn che rihco cade ye man, che redin ye man!

³⁴ Nde ama ihyan hua retumacadino ye che rendedecadino Dendiohs. Nde ama ihyan hua tuno vededevano yahn ye. ¿Dehra che cacuahn ye Dendiohs?

³⁵ Nde ama ihyan ametah dehva yahn ye che cah ye Dendiohs. Ndiyu che quendiho Dendiohs yahn ihyan che redin ye che ndah nduco ye, te che renan vahino ye ihyan.

³⁶ Tihca, te nducuahn dehtenduh che va ne, a yahn Dendiohs, a man ye dendah ye. Ndeva vo yavenan ye cuahn dama. Tihca co.

12

Nduhca che va che cuahtechica ihyan che ritahno ye Dihvo vo Jesucristo

¹ Dihno, nducote quenan vahino Dendiohs nchuhn, nedin yahn ye nchuhn ne, rica nchuhn che numacahn vederihquentiyon yahn Vaco Ndah yahn ye ndahco ne chedave yahn ne tah ye nduhca ama vedino ndah che conan ino ye.

² Hua quendi nchuhn vedeyeno yahn man ne. Tahque ndah ne ne, condahcorun ne vederendecadino yahn ne cava che runecade cuahtechica ne nduhca che nahn Dendiohs.

³ Nducote yahino Dendiohs u, te ye vederihquentiyon u ne, riyahve nchuhn che hua ndedecadino ne che ama devano ne, chuhnan ne vederihquentiyon che chenana cuma ne. Tahque ndah ne, runecade ndedecadino ne, ne codin chahtino ne Dendiohs, codinahn ne tunoca vederihquentiyon che nte ye queri ama ne.

⁴ Ihyan ne, tah ye man, cah ye man, ndutinan ye man ne, a vih vih ntiyon che redin queri ama.

⁵ Atihnoca uvo. Andahre ama yahn uvo che ritahno vo Dihvo vo Jesucristo, ate ama cuan no ndi vo nduco vih. Ate va te va ntiyon che redin queri ama vo man, rendotenan vo vih man.

⁶ Dendiohs ne, te ye ama ama nan vederihquentiyon queri ama vo, ne nahn che runecade dinahn vo. Duh ihyan che quenana cuma ye vederihquentiyon che cuahndudo ye ndudo che te Dendiohs ne, cuahndudo ye anduhneva che cah Dendiohs, hua tihdenan ye che cahma ye.

⁷ Duh ihyan che quenana cuma ye vederihquentiyon chete yaco ne, runecade dinahn ye. Me ihyan che quenana cuma ye vederihquentiyon che cacuahn ye Ndudo yahn Dendiohs ne, runecade cacuahn ye.

⁸ Me ihyan che quenana cuma ye vederihquentiyon che yahve ye ihyan chenhahn ne, yahve ye ihyan nduco ndah. Me ihyan che cah ye vedino ne, cah ye numacuahn chedave yahn ye. Me ihyan che ndinan ye chete yaco ne, cahcantiyon ye nduco cudado. Me ihyan che din ye vedevahino ne, din ye numacuahn chedave yahn ye.

⁹ Cuahtenan cuma nchuhn vedeyahino numacuahn chedave yahn ne. Hua din ne dehtenduh che chihnga; codin ne che ndah.

¹⁰ Codin ne cuande anduhneca ndete che dihno ne vih. Codin yahino ne vih, cuenevahnecon ne vih.

¹¹ Codin ne ntiyon yahn Dihvo vo Jesucristo numa ino ne, hua din dahnde ne.

¹² Numacuahn vedeyeno cuahtenan ino ne che dinahn Dendiohs ndudo yahn ye nduco ne. Codin chahtino ne cuahn che chuhrihn ne. Covah ne cuahn dama.

¹³ Cuenan ne dihno vo che va vederetahn yahn ye. Cuenevahnecon ne ihyan che nda ye ndevaco ne.

¹⁴ Ihyan che redin tan ye nduco ne ne, ndotenan che cahva ne nduco ye ne, cuica ne Dendiohs che din ye che ndah nduco ye.

¹⁵ Cuinduco ne ihyan che yeno ye man, ihyan che ri ndache ye man, cuenevahnecon ne chedave yahn ye.

¹⁶ Ndahca cuahtenan ne nduco vih. Co dama ne nduco ihyan che necun ye. Hua din yade ne man, hua din cun ne man.

¹⁷ Hua dama co ne nduco ihyan che redin tan ye nduco ne. Runecade cuahtenan ne nan nducoyaca ihyan.

¹⁸ Cuihco nchuhn cudado nan nducuahn, cava che hua ndaca yune che co tan ihyan nduco ne.

¹⁹ Dihno che yahino nchuhn, hua cuahtenan ino ne vedetan nduco vih. Tahque ndah ne ne, condahco ne tah Dendiohs cava che techecade ye, te a ihyan min che va che techecade ye nduhca che a ndiran nan Ndudo yahn ye: "U quenana cumá che din castigo ihyan nunde. U ndahco menun yahn ye."

²⁰ Namin a ndirun: "Hua cuahtenan ino nchuhn vedetan nduco ihyan che redin tan ye nduco ne. Tahque ndah ne ne, codin ne che ndah nduco ye.

Ndete che cuico ye ne, çah ne che cheh ye, ndete che yaca ye ne, çah ne che cuh ye, te nduco chemin ne, din ne che co cuihnan ye, ne nto ino ye.”

²¹ Hua cuahnecun ne che denda ne, din vedetan yahn ne. Tahque ndah ne ne, codin ne che ndah çava che hua denda ne.

13

¹ Nducoyaca nchuhn ne, codinahn ne yahn ihyan ndinan man, intiyahn yahn yan vaco ne man, te nducoyaca intiyahn ne, a Dendiohs necah ye vederihquentiyon ihyan, chaconahn ye ihyan nan ntiyon.

² Chemin che ihyan che cuahcotahn ye yahn intiyahn ne, va che co ye castigo, te nde yahn Dendiohs rahcotahn ye, yahn che ihyan min raconahn ye ihyan chahn nan ntiyon.

³ Ihyan che runecade vatechica ye ne, ametah deh cuande che din vah ye intiyahn. Ate ihyan che chendihco ye nunde ne, ihyan chahn che vah ye intiyahn. Ndete che hua nahn cuahtenun ndeh ne yahn intiyahn ne, runecade cuahtechica ne. Tuhme co yeno ye nduco ne,

⁴ te raconahn Dendiohs ihyan nan ntiyon çava che ndah yahn ne. Ate ndete che rahcotahn ne yahn intiyahn ne, tuhme che cuaco, din vah ne ihyan, te a man Dendiohs çah ye vederihquentiyon ihyan, çava che din ye castigo ihyan che chendihco ye nunde.

⁵ Va che dinahn vo yahn intiyahn, ndiyu yahn che vah vo che co vo castigo, ate yahn che a devano vo che tihça nahn Dendiohs.

⁶ Nducote renevahnecun ne Dendiohs ne, va che nedihve ne çade iyo yahn ne che rica intiyahn. Tihça, te a man Dendiohs raconahn ye ihyan chahn nan ntiyon, ne a min chenah ye ro ro.

⁷ Nducoyaca intiyahn che çaca ye çade iyo yahn ne ne, cuenedihve ne. Nducoyaca ihyan ndinan man, intiyahn man ne, cuenevahnecun ne ihyan man, codin yahino ne ihyan man.

⁸ Cuenedihve ne nducuahn che chendihco ne yahn ihyan. Codin yahino ne nducoyaca ihyan, te ihyan che redin yahino ye ne, redinahn ye vederihquentiyon yahn Dendiohs

⁹ che ndirun tuhça: “Hua din duche yehn che a nihnevaque. Hua cahne ihyan. Hua doque. Hua ndere cacueh dame nunde ihyan. Hua din idihye nduco dehtenduh yahn ihyan.” Nducuaahn vederihquentiyon che tuhchan ne, rendo dama nan vederihquentiyon cuh: “Codin yahine nducoyaca ihyan nduhça che yahine man di.”

¹⁰ Ihyan che yahino ye ihyan chenahn ne, hua ndere redin ye nduco ye. Chemin che cuahn che yahino vih vo ne, redinahn vo vederihquentiyon yahn Dendiohs.

¹¹ Avane ne, a devano nchuhn te çahnda ro che vato vo. Cuahteyan ne, te a cochi nino ro che ndedevahn Dendiohs uvo.

¹² A nun cuihno ro cuh che ndere redin ihyan, a nun ndeva Dendiohs uvo. Chemin che nahn che hua din vo dehtenduh che chihnga. Nahn che cuahteyan vo nduhça sandado che a vateyan se, nda se dehtenduh che ndedevahn nduco se sahn.

¹³ Nahn che ama runecade cuahtechico vo nduhça che rahtechica ihyan che renahn ye. Hua cocoh vo man, hua cuahto vo vihco vedecoh man, hua ndere cuahtechico vo, cuahtendihco vo nunde man, hua cuahte çanda vo man, hua din ve vo yahn vih man.

¹⁴ Ndotenan che cuahtechico vo vedeyeno yahn man vo ne, cochahino vo Dihvo vo Jesucristo, runecade cuahtechico vo nduhça che nahn ye.

14

Hua ndahca che ndahchenan vo vih

¹ Me dihno vo che metah conahn ndah ye vederihquentiyon yahn Dendiohs ne, cuenevahnecon ne ihyan. Hua cuhma chende ne nduco ye yahn vederihquentiyon yahn Dendiohs che hua dama renahn ne nduco vih.

² Vate dihno vo che ritahno ye che ndiyu nunde che cheh ye nducuahn nan dehtenduh. Namin vate dihno vo che metah conahn ndah ye vederihquentiyon yahn Dendiohs, ne rahco ye che cuahtendihco ye nunde ndete che cheh ye yute.

³ Dihno vo che hua dehve rahco ye, reh ye nducuahn nan dehtenduh ne, hua ndahca che ndahchenan ye dihno vo che vahino ye cheh ye yute. Namin dihno vo che hua reh ye yute ne, hua ndahca che ndahchenan ye dihno vo che reh ye nducuahn nan dehtenduh, te a nedin yahn Dendiohs ihyan chahn.

⁴ Hua ndahca che cuh nunde ne yahn mozo yahn tama ihyan, te ndete che ndahca quenan mozo me nduco dihve ye, o hua ne, chemin ne, a man dihve ye rano cuande yahn ye. A namin no tun ihyan che ritahno ye Dihvo vo Jesucristo, te a man Dihvo vo nda cuande yahn ye ihyan.

⁵ Namin vate dihno vo che ndihco vih ye ro che tahque renevahnecon ye. Vate tun dihno vo che rahn ye che a dama no nducuahn ro. Queri ama ihyan ne, va che ndedecadino ndah ye cha che ndahca din ye cava che cuhdeman ino ye nan Dendiohs.

⁶ Ihyan che renevahnecon ye ama ro ne, rendeva ye yavenan Dihvo vo Jesucristo. Atihnoqa ihyan chenahn, te andahre hua renevahnecon ye ro min ne, ate namin nduco ye rendeva ye yavenan Dihvo vo. A namin no tun ihyan che hua vahino ye reh ye nducuahn nan dehtenduh, te nducote renecah ye nundihve cuahn Dendiohs cava ne, rendeva ye yavenan Dihvo vo. Atihnoqa ihyan che rahco ye che hua ndahca che cheh ye ama o nan dehtenduh, te nducote renecah ye nundihve cuahn Dendiohs cava dehtenduh che reh ye ne, namin nduco ye rendeva ye yavenan Dihvo vo.

⁷ Ndiyuh chenahn man vo che vato vo, nde huane chenahn man vo che coh vo.

⁸ Che vato vo ne, a Dihvo vo Jesucristo che rihquentiyon ye uvo, ne che coh vo ne, a ihyan min che ndeva ye uvo. Chemin che a vato vo, o coh vo, a yahn ye uvo,

⁹ te a chih ye, ne ndaconan ntuche ye cava che co yahn ye nducoyaco vo, a chenduche vo, o a ndih vo.

¹⁰ Hua ndahca che cua cuando vo dihno vo, ndahchenan vo ihyan, te Dihvo vo Jesucristo ne, va che techecade ye yahn nducoyaco vo,

¹¹ nduhca che a ndirun nan Ndudo yahn Dendiohs tuhca:

Rahn Dihvo vo Dendiohs: “Numacuahn vederihquentiyon yahn rahn ri nchuhn te va che nevahnecon nducoyaca ihyan u, ndeva ye yavenan.”

¹² Nduco tuhca ne, a devano vo che queri ama vo ne, va che necah cuando vo Dendiohs yahn dehtenduh che redin vo.

Hua din vo che co ndache dihno vo

¹³ Nducote a Dendiohs nda cuande yahn ye uvo ne, hua redin yahn che quendi vo cahma nunde vo yahn vih. Tahque ndah ne, ndedecadino vo, te hua ndahca che cava dehtenduh che redin vo, ndaca yune che co ndache dihno vo, cuahtendihco ye nunde.

¹⁴ Nduhca che ritahnó Dihvo vo Jesucristo ne, a devano cuaco te ametah nde ama nan dehtenduh che reh ihyan che din che cuahtendihco ye nunde. Ate ndete che vate ihyan che vahino ye cheh ye ama o nan dehtenduh ne,

tahque ndah hua cheh ye, te ndete che cheh ye ne, chihnga co ino ye, ne nduco chemin condihco ye nunde.

¹⁵ Ndete che cava dehtenduh che reh nchuhn rendaça yune che to ino dihno ne ne, rihco ro ne che hua chenacuma ne vedeyahino. Cuihco ne cudado nan nducuahn che reh ne. Hua ndahca che cava chemin ndaca yune che to ino dihno ne, condihco ye nunde, te namin cava ihyan min che chih Dihvo vo Jesucristo.

¹⁶ Cuihcoman ne queri ama dehtenduh che redin ne, andahre devano ne che ndah, ndete che cava chemin che ndaca yune che chihnga co ino ihyan chenahn.

¹⁷ Tihca, te che nguahco yuhn vo nan Dendiohs ne, ndiyu yahn dehtenduh che reh vo man, rih vo man. Che tahque nahn ye ne, che numacuahn vederihquentiyon yahn Vaco Ndah yahn ye, runecade cuahtenan vo man, ndahca cuahtenan vo nduco vih man, cuahtenan cumo vo vedeyeno man.

¹⁸ Nducoyaco vo che ritahno vo Dihvo vo Jesucristo ne, nahn ye che tihca dinahn vo. Ndete che tihca dinahn vo ne, nedin yahn Dendiohs uvo man, nevahnecon nducoyaca ihyan uvo man.

¹⁹ Din vo cuande, ne din nun ino vo cava che ndahca cuahtenan vo nduco vih man, conan vih vo man, cotahno vo numa ino vo Dihvo vo Jesucristo man.

²⁰ Cuihco nchuhn cudado nan nducuahn che reh ne, cava che hua ndaca yune che to ino dihno vo che ritahno ye Dihvo vo Jesucristo. Cuaco che nducuahn dehtenduh che reh vo ne, hua redin che rahtendihco vo nunde. Ate nahn che cahco vo cudado che hua cava chemin to ino dihno vo, te ndete che tihca ne, cuahtendihco vo nunde.

²¹ Ama nunde ndete che yahn che reh vo yute, o rih vo vino, o redin vo tama nan dehtenduh, ndaca yune che co ndache dihno vo, to ino ye.

²² Uvo che devano cuaco vo che nducuahn dehtenduh che reh vo ne, hua redin che rahtendihco vo nunde ne, hua nahn che cuacotuhn vo ndudo yahn chemin van dihno vo chenahn, te denan chihnga co ino ye. Nahn che man no vo devano vo. Namin Dendiohs ne, a devano ye. ¡Ama ndah ro yahn ihyan che a devano cuaco ye che hua rahtendihco ye nunde cava dehtenduh che reh ye!

²³ Me ihyan che ritahno ye che hua ndahca che cheh ye ama nan dehtenduh, ne reh ye ne, rahtendihco ye nunde yahn che man ye chihnga ri ino ye. Tihca, te nducuahn dehtenduh che redin vo che o rendedecadino vo ne, rahtendihco vo nunde.

15

Cuahtenan cumo vo vedechahtino cava ihyan chenahn

¹ Uvo che a renahn vo vederihquentiyon yahn Dendiohs ne, nahn che din chahtino vo yahn dihno vo che ametah conahn ndah ye, te hua ndahca che din vo dehtenduh che ri yeno man vo, ndete che cava chemin co ran ye.

² Queri ama vo che a renahn vo vederihquentiyon yahn Dendiohs ne, nahn che din vo nducuahn cava che ndah yahn dihno vo che hua ndah renahn ye, nahn che conan vo ihyan cava che conahn ndah ye.

³ Tihca, te Dihvo vo Jesucristo ne, hua nuhn ye che ndah yahn man ye, nduhca che a ndirun nan Ndudo yahn Dendiohs tuhca: “Vedetan yahn ihyan che hua ri rendihche ye ndih ne, andahre ndiyu cava che ndah yahn man, ate u ntuma chihve nducuahn.”

⁴ Nducuahn che a ndirun nan Ndudo yahn Dendiohs nde a rahn me ne, a ndirun cava che cochahtino vo Dihvo vo Jesucristo, necah yan vo chedave yuhn vo, ne cuahtenan ino vo che ndeva ye uvo.

5-6 Dendiohs, Chida Dihvo vo Jesucristo, ihyan min che redin ye che rahtenan cumo vo vedechahtino, renecaḥ yān ye chedave yuhn vo ne, din ye che ndaḥca cuahtenan nchuhn nduco vih, nduhca che nahn Dihvo vo, cava che dama ndeva nducoyaca vo yavenan ye.

Chetuhn ndudo ndah yahn Dihvo vo Jesucristo van ihyan nación chenahn

7 Nduhca che nevahnecun Dihvo vo Jesucristo nchuhn ne, tihca cuenevah-necun ama tama ne vih, cava che cua cuande ihyan chenahn che tihca redin ne, ne ndeva ye yavenan Dendiohs.

8 Cuenechaco nchuhn te Dihvo vo Jesucristo ne, chinan ye ihyan nación yahn Israel, chihco ro ye che dinahn Dendiohs ndudo yahn ye che cah ye ihyan ndico yahn ihyan chahn.

9 Namin tihyon yune ye ihyan nación chenahn che ndeva ye yavenan Dendiohs yahn che quenan vahino ye ihyan. Nducote Dihvo vo Jesucristo ne, chinan ye ihyan nación yahn Israel man, ihyan nación chenahn man ne, a ndero ndi che nahn che nevahnecun ihyan chahn vih. A devano vo te ihyan nación chenahn ne, va che co cuande ye van ihyan yahn Dendiohs, te chemin ne, a ndirun nan Ndudo yahn Dendiohs tuhca:

Ndeva yavenan ne van ihyan nación chenahn,
catá himno, ndonán ndih.

10 Namin ndirun:

Nchuhn ihyan nación chenahn, cuando dama ne nduco ihyan yahn Dendiohs, cuendeva ne nduco vih yavenan ye.

11 Namin ndirun:

Nchuhn ihyan nación chenahn, cuendeva nducoyaca ne yavenan Dihvo vo Dendiohs.

12 Namin dirun ihyan profeta Isaías:

Nan ndata yahn Isaí quendaḥ ama ihyan che cahcantiyon ye nación chenahn,

cochahtino ihyan chahn ihyan.

13 Dendiohs, ihyan min che redin ye che chenano vo ihyan ne, din ye che cotahno ne Dihvo vo Jesucristo, co yeno ne, ne ndaḥca cuahtenan ne, cava che numacuahn vederihquentiyon yahn Vaco Ndah yahn ye cochahtino ne ihyan.

14 Dihno, retumacadinó te ama ndah ihyan nchuhn man, ama chenano cuma ne vededevano man, nde devano cacuahn ne vih.

15 Andahre tihca ne, dirun yahn ne cava che ntiyon yan yahn ne vederihquentiyon yahn Dendiohs, nde ama dito yahvé nchuhn yahn ama o nan. Tihca din, te numacuahn vedeyahino tendahnun Dendiohs u,

16 che din ntiyon yahn Dihvo vo Jesucristo van ihyan nación chenahn, cuahndudó ndudo ndah yahn ye, cava che cotahno ihyan chahn, ne ndeva ye ihyan, cahco vih Vaco Ndah yahn ye ihyan.

17 Ama yeno che ama ndaḥca rinahn ntiyon yahn Dendiohs che redin, yahn che rinan Dihvo vo Jesucristo u.

18 Nde hua cahquinó cahma che a man che redin ntiyon min, te a Dihvo vo Jesucristo che redin ye. A ihyan min che redin ye che rinahn ntiyon che redin, ritahno ihyan nación chenahn. Nan nducuahn che rahndudó man, che redin man ne, a man ye retihyon yune ye u. A yahn chemin no che te cuandé nchuhn.

¹⁹ A ihyan min che redin ye vederihno man, redin ye che quenan cumá vederihquentiyon yahn Vaco Ndah yahn Dendiohs man. Chemin che numachahte, nde yan Jerusalén, nde yahn yahn Ilírico, chacotúhn ndudo ndah yahn Dihvo vo Jesucristo.

²⁰ Nduco tihca ne, din nun inó che quechicá rahndudó ndudo ndah yahn Dihvo vo Jesucristo van ihyan che ametah cahnevan ye nde ama yune, cava che hua condá mendáhn, cuahndudó nan che a nedin tama ca ihyan ntiyon.

²¹ Tihca din, cava che conahn nduhca che a ndirun nan Ndudo yahn Dendiohs tuhca:

Ihyan che hua devano ye ne, cahnevan ye ndudo yahn ihyan min che a va cade che dechuh Dendiohs, ne conahn ye.

Pablo ne, nahn cahn ye yan Roma

²² Nducote rahndudó ndudo yahn Dihvo vo Jesucristo van ihyan che metah cahnevan ye ne, chemin che nde meniyon ametah co chí quendiheró nchuhn.

²³ Ate nducote ama chacotúhn ndudo yahn Dihvo vo Jesucristo numachahte yahn cuahnguh man, nducote a ama ndeh nduyo nahn chí quendihcheró nchuhn man ne,

²⁴ chemin che quenan inó che conán neve ro nduco nchuhn yan vaco ne, ne cuahn che cahn yahn yahn España ne, conan ne u, ndaca che chuhnún yune.

²⁵⁻²⁶ Numanahn min ne, cahn yan Jerusalén, te dihno vo che vate ye yahn yahn Macedonia man, Acaya man ne, a nedin dama ye ama vedino cava dihno vo che metah dehva yahn ye che vate ye yan min, ne va che ngú yahn ye.

²⁷ Dihno vo ihyan nación chenahn chahn ne, ama yeno ye, din dama ye vedino min. Tihca redin yahn che din ye, te a cava ihyan nación yahn Israel che ndaca yune che chitahno ye Dihvo vo Jesucristo, ndevahn ye, ne ndahca che conan ye ihyan chevah van ihyan nación yahn Israel che vate ye yan Jerusalén.

²⁸ Cuahn che a dináhn ntiyon min, necah vedino me tah ihyan chahn ne, va che chuh yan vaco nchuhn, cahn yahn yahn España.

²⁹ A devano cuacó te cuahn che ndá tan ne, numacuahn vederihquentiyon yahn Dihvo vo Jesucristo cuahndudó ndudo yahn ye, ne ama cochihve yahn ne.

³⁰ Dihno, numacuahn vederihquentiyon yahn Dihvo vo Jesucristo man, numacuahn vedeyahino yahn Vaco Ndah yahn Dendiohs man, ricá nchuhn che conan ne u, covah ne numa ino ne,

³¹ cava che ndedevahn Dendiohs u tah ihyan che hua ritahno ye che vate ye estáo yahn Judea. Namin cava che, dihno vo che vate ye yan Jerusalén ne, nevahnecon ye vedino che quendá.

³² Namin cava che cuahnecon ye che numacuahn vedeyeno ndá yan vaco ne, necah yan ne chedave yahn.

³³ Dendiohs, ihyan min che redin ye che ndahca rahtenan vo, conduco ye nducoyaca nchuhn. Tihca co.

16

Renecah Pablo Dendiohs dihno vo

¹ Ricá nchuhn cava cahvo vo Febe, ihyan min che ndi cuande ye van intiyan yaco che vate ye yan Cencrea,

² che nevahnećun ne ihyan nduhća che nahn Dihvo vo Jesucristo che nevahnećun vo ihyan yahn ye. Cuenan ne ihyan nan adecodehno vederećan yahn ye che va, te man ye ne, ndinan ye ama yahn ihyan. Namin chinan ye u.

³ Che cuande yahn ne, cuenećah ne Dendiohs Aquila nduco ihyan ndahta yahn ye Priscila. Ihyan chahn ne, combiero yahn nan ntiyon yahn Dihvo vo Jesucristo,

⁴ nde chihco mendañn ye ihyan cava che ndedevahn ye u. U man, nducoyaca dihno vo naciñn chenahn man ne, renećah nuhn nundihve cuahn ihyan chahn.

⁵ Namin cuenećah ne Dendiohs nducoyaca dihno vo che rendo dama ye ndevaćo ihyan chahn, rendeva ye yavenañn Dihvo vo Jesucristo. Namin cuenećah ne Dendiohs Epeneto, amigo yahn che yahinó. Ihyan min che menañ ndita chitahno ye Dihvo vo Jesucristo van ihyan che vate ye yahn yahn Acaya.

⁶ Namin cuenećah ne Dendiohs María, ihyan min che ama nedin ye ntiyon yahn Dihvo vo Jesucristo van nchuhn.

⁷ Namin cuenećah ne Dendiohs ihyan yahn, Andrónico man, Junias man, ihyan chahn che dama chahtenun ye vacoyahn nducó. Ihyan chahn ne, tahque menañ chitahno ye Dihvo vo Jesucristo che co u, ne van ihyan apóstol ne, ama yahinó dihno vo ihyan.

⁸ Namin cuenećah ne Dendiohs dihno vo Amplias che yahinó ihyan.

⁹ Namin cuenećah ne Dendiohs Urbano, ihyan min che nduco ye rinan ye nuhn nan ntiyon yahn Dihvo vo Jesucristo. Namin cuenećah ne Dendiohs Estaquis che yahinó ihyan.

¹⁰ Namin cuenećah ne Dendiohs Apeles, ihyan min che ndiquendañ ndah ye che ritahno ye Dihvo vo Jesucristo. Namin cuenećah ne Dendiohs ihyan ndevaćo Aristóbulo.

¹¹ Namin cuenećah ne Dendiohs Herodiñn, ihyan van vacó. Namin cuenećah ne Dendiohs ihyan ndevaćo Narciso che ritahno ye Dihvo vo Jesucristo.

¹² Namin cuenećah ne Dendiohs Trifena man, Trifosa man, ihyan chahn che namin redin ye ntiyon yahn Dihvo vo. Namin cuenećah ne Dendiohs cahvo vo Pérsida che yahino vo ihyan. Ihyan min ne, ama nedin ye ntiyon yahn Dihvo vo.

¹³ Namin cuenećah ne Dendiohs dihno vo Rufo che ama ndah redin ye ntiyon yahn Dihvo vo. Namin cuenećah ne Dendiohs chaco ye, ihyan min che rihno ihyan nduhća chacó.

¹⁴ Cuenećah ne Dendiohs Asíncrito man, Flegonte man, Hermas man, Patrobas man, Hermes man, dihno vo chenahn che nduco ye ihyan chahn man.

¹⁵ Namin cuenećah ne Dendiohs Filólogo man, Julia man, Nereo nduco cahve ye man, Olimpás man, dihno vo chenahn che nduco ye ihyan chahn man.

¹⁶ Nduco vedino vedenecun cuenećah ne Dendiohs vih che cuande yahn. Cuendeva ne Dendiohs yahn dihno vo che vate ye nducuahñ van.

¹⁷ Dihno, ricá nchuhn che cahco ne cudado ihyan che redin ye che ndeh cuan ri dihno vo man, che redin ye che rahtendiho ye nunde man, te rahcotañ ihyan chahn yahn Ndudo yahn Dendiohs che a chahn nchuhn. Cuihcomañ ne ihyan chahn,

¹⁸ te ndotenan che redin ye ntiyon yahn Dihvo vo Jesucristo ne, riquendi ye vedeyeno yahn man ye, rihncheh ye ihyan che necun ye nduco ndudo yade.

¹⁹ Yenó çava nchuhn, te ama va ndudo yahn ne che redinahn ne vederihquentiyon yahn Dendiohs. Nahn che cuahteyan ne çava che din ne dehtenduh che ndah, ne cahcoman ne dehtenduh che hua ndah.

²⁰ Dendiohs, ihyan min che redin ye che ndahça rahtenan vo ne, nun din ye che ndahco ndiya nchuhn vederihquentiyon yahn chundah. Dihvo vo Jesucristo din yahino ye nchuhn.

²¹ Cuendeva nchuhn Dendiohs yahn Timoteo, sahn min che rinduco se u nan ntiyon yahn Dendiohs. Namin cuendeva ne Dendiohs yahn ihyan yahn, Lucio man, Jasón man, Sosípater man.

²² U Tercio, che dirún çaca cuh che cuande yahn Pablo ne, namin nté Dendiohs nchuhn numacuahn vedeyahino yahn Dihvo vo Jesucristo.

²³ Cuendeva nchuhn Dendiohs yahn Gayo, ihyan min che renevahnecun ye u nduco nducoyaca dihno vo ndevaco ye. Namin cuendeva ne Dendiohs yahn Erasto, tesorero yahn yan. Namin cuendeva ne Dendiohs yahn dihno vo Cuarto.

²⁴ Dihvo vo Jesucristo din yahino ye nducoyaca nchuhn. Tihça co.

Ndeva Pablo yavenan Dendiohs

²⁵ Man ne, ndeva nducoyaco vo yavenan Dendiohs, ihyan min che co din ye che cotahno nchuhn numa ino ne ndudo ndah yahn Dihvo vo Jesucristo che rahndudó. Ndudo ndah min ne, hua devano ihyan a rahn me,

²⁶ te Dendiohs che va ye cuahn dama, chihquentiyon ye ihyan profeta che dirun ye nde a rahn me, ne cade cah ye, checadino nducoyaca ihyan iyehñse çava che cotahno ye.

²⁷ Nducote ritahno vo Dihvo vo Jesucristo ne, cuahn dama ndeva vo yavenan ama no Dendiohs, ihyan min che ama devano ye. Tihça co.

CAÇA CHE DIRUN SAN PABLO MENAN, DECHUH YE YAHN IHYAN YAHN DENDIOHS CHE VATE YE YAN CORINTO

¹ U Pablo, che tendahnun Dendiohs u che co apóstol yahn Dihvo vo Jesucristo, nduco dihno vo Sóstenes,

² dirun nuhn çaça cuh, dechuh nuhn yahn nchuhn, ihyan yahn Dendiohs che ritahno ne Dihvo vo Jesucristo, vate ne yan Corinto. A tendahnun Dendiohs nchuhn che co ne ihyan ndah yahn ye, ritahno ne Dihvo vo Jesucristo. Numachahte iyehkse ne, a tendahnun ye uvo man, nducoyaca dihno vo man, che rendeva vo nduco ye yavenan Dihvo vo Jesucristo.

³ Chida vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Yahino Dendiohs ihyan yahn ye che cuande yahn Dihvo vo Jesucristo

⁴ Cuahn dama renecah nundihve cuahn Dendiohs çaça nchuhn yahn che yahino ye nchuhn che cuande yahn Dihvo vo Jesucristo.

⁵ Yahino ye nchuhn, ne te ndahva ye vederihquentiyon che cuahndudo ne ndudo yahn ye man, vededevano che chenan cuma ne man.

⁶ Tihca chinahn nduco ne, te a chitahno ne ndudo ndah yahn Dihvo vo Jesucristo.

⁷ Nchuhn nduco nducoyaca ihyan yahn Dendiohs, quendihconahn te ye vederihquentiyon yahn ye nchuhn. A chenan rino ne ro che ndaconan nda tun Dihvo vo Jesucristo.

⁸ Dendiohs ne, din ye che cohahtino ne, quendi ne cotahno ne Dihvo vo Jesucristo, hua cuahtendihco ne nunde nde ro che ndaconan nda tun ye.

⁹ Dendiohs ne, redinah ye ndudo yahn ye, ne man ye tendahnun ye nchuhn çaça che cotahno ne Daya ye Jesucristo, ihyan min che Dihvo vo.

Ihyan che rendo dama ye yaco ne, o ino cuan ndi ye

¹⁰ Dihno, nducote renevahnecon nchuhn Dihvo vo Jesucristo ne, rahn ri nchuhn che ndo yan ne nduco vih, ama cuan co no ne man, ama no vederendedecadino cuahtenan cuma ne man.

¹¹ Dihno, nahn che tihca din nchuhn, te rahn ihyan ndevaco cahvo vo Cloé ri ye u che vate canda ne nduco vih yahn che a vih rahn ama, a vih rahn tama ne.

¹² Nahn ne ne, rahn ne che riquendi ne ndudo che ricuahn Pablo, nahn ne ne, che ricuahn Apolos, nahn ne ne, che ricuahn Pedro, nahn ne ne, che chicuahn Dihvo vo Jesucristo.

¹³ Ama vedetundo che tihca redin ne. Dihvo vo Jesucristo ne, ama no ye. Ndiyu Pablo che quenan yah ye nan cruz çaça che ndedevahn ye nchuhn. Ndiyu Pablo cah nchuhn cuahn che chedenune ne.

¹⁴ Nundihve cuahn Dendiohs che neve ra nchuhn, chehdenune nchuhn. Atenan Crispo man, Gayo man, chehdenune sahn.

¹⁵ Nde hua co cahma ne che u cah ne cuahn che chedenune ne.

¹⁶ Namin chehdenune ihyan ndevaco Estefanas. Co atenan ihyan chahn no che chehdenune,

¹⁷ te dechuh Dihvo vo Jesucristo u, ndiyu che cuehdenune ihyan, ate che cuahndudo ndudo ndah yahn ye. Rahndudo ndudo min numa cuaco. Hua retihdenan vededevano yahn man, çaça che tihca ne, codevano ndah ihyan nduhca che chih Dihvo vo Jesucristo, quenah yah ye nan cruz.

Ndudo yahn Dihvo vo Jesucristo ne, chemin che vederihquentiyon yahn Dendiohs man, vededevano yahn ye man

¹⁸ Ihyan che va che conda ye, din nunde yahn ye ne, rahco ye te ama vedetundo che ritahno vo che yahn che chih Dihvo vo Jesucristo, quenan yah ye nan cruz, co ndevahn vo. Ate uvo che ndedevahn Dendiohs uvo ne, a devano vo te chemin ne, ama vederihquentiyon chahte yahn ye,

¹⁹ nduhca che a ndirun nan Ndudo yahn ye tuhca:

Caḥco ró che hua richihve vederendedecadino yahn ihyan, decuihnó vededevano yahn ye.

²⁰ Anduhneca ndete che hua richihve ndudo yahn sahn devano man, sahn che nda cuande se dehtenduh che ri iyehñse cuh man, te Dendiohs ne, a chihco ro ye che vededevano yahn se ne, ama vedetundo.

²¹ Tihca din ye, te numacuahn vededevano yahn ye chihco cade ye che ihyan iyehñse ne, hua tuno vededevano yahn man ye che cotahno ye ihyan. Tahque ndah ne, chihco cade ye che, nduco ndudo yahn man ye che rahndudo vo, ndedevahn ye ihyan yahn ye, andahre rahco ihyan chenahn te chemin ne, ama vedetundo.

²² Ihyan nación yahn Israel ne, dinoca nahn ndihchero ye vederihno cava che cotahno ye. Ihyan nación chenahn ne, atenan vededevano che dama nduco vededevano yahn man ye ritahno ye.

²³ Ate uvo, ihyan yahn Dendiohs ne, rahndudo vo che, cava che ndevahn ihyan ne, va che cotahno ye ndudo yahn Dihvo vo Jesucristo, ihyan min che quenan yah ye nan cruz. Ihyan nación yahn Israel ne, rahcotahn ye yahn ndudo min, rahtendihco ye nunde. Ihyan nación chenahn ne, rahco ye te ndudo min ne, ama vedetundo.

²⁴ Uvo che a tendahnun Dendiohs van ihyan nación yahn Israel man, van ihyan nación chenahn man ne, a devano vo che ndudo yahn Dihvo vo Jesucristo ne, a vederihquentiyon yahn Dendiohs man, vededevano yahn ye man.

²⁵ Vededevano yahn Dendiohs man, vederihquentiyon yahn ye man ne, tahque chahte che co nducuahn vededevano yahn ihyan iyehñse, andahre rahco ye te ama vedetundo, nde hua richihve.

²⁶ Dihno, cuenecaḥco ne nduhchan ihyan ne ro menan. Atenan neve ne che ihyan devano ne van combiero yahn ne man, neve ne che chenacuma ne vederihquentiyon man, neve ne che ndata yahn ihyan nahn man,

²⁷ ate a tendahnun Dendiohs nchuhn. Ihyan iyehñse ne, rahco ye che tundo ne man, che hua rignon chihve ne man, ate a tendahnun Dendiohs nchuhn cava che ndaḥco ndiya ye vededevano yahn ihyan chahn man, vederihquentiyon yahn ye man.

²⁸ Yade ihyan chahn, ne rahco ye che ndere ihyan nchuhn, nde hua redin cuande ye nchuhn. Ate a tendahnun Dendiohs nchuhn, chihco ro ye che nde hua richihve vederendedecadino yahn ihyan chahn.

²⁹ Tihca din ye cava che nde ama ihyan, hua co din yade ye.

³⁰ A Dendiohs che din ye che ritahno vo Dihvo vo Jesucristo. A cava ihyan min che din ye che chenacuma vo vededevano man, nchahco ye nunde yahn vo man, nedin yahn ye uvo man, ndedevahn ye uvo man.

³¹ Che nahn ne, che dinahn ihyan nduhca che a ndirun nan Ndudo yahn Dendiohs tuhca: "Hua ndaḥca che ndeva man ihyan yavenan ye. Tahque ndah ne, ndeva ye yavenan Dihvo vo Dendiohs."

2

Ndudo yahn che quenan yah Dihvo vo Jesucristo nan cruz

¹ Dihnó, cuahn che ndá cahndudó ndudo yahn Dendiohs, chihnevan ne ne, hua din yadé, te cahndudó numacuahn vedenecon.

² Chihcó cudádo che cahndudó demañ ndudo yahn che quenan yah Dihvo vo Jesucristo nan cruz, ndedevahn ye uvo.

³ Numacuahn ro che quenán yan vāco nchuhn ne, quechicá numacuahn vedino vedenecon. Ama vahinó man, ama ndedecadinó man, yahn ntiyon cahnda che quenán.

⁴ Numacuahn vederihquentiyon yahn Vaco Ndah yahn Dendiohs, nté man, cahndudó man, van nchuhn. Nde tah hua chihchetáhn vededevano yahn man,

⁵ cava che a vederihquentiyon yahn Dendiohs din che cotahno ne, ndiyu vededevano yahn man.

Redin Vaco Ndah yahn Dendiohs che renahn vo vederihquentiyon yahn ye

⁶ Nuhn che rahndudo nuhn Ndudo yahn Dendiohs van nchuhn che a renahn ndah ne man, van ihyan chenahn man ne, hua rahndudo nuhn vededevano yahn man nuhn, te rahndudo nuhn demañ vededevano yahn Dendiohs. Vededevano min ne, yahn Dendiohs, ndiyu yahn ihyan iyehñse. Ndiyu yahn sahn devano man, sahn ndinan man, che vate se man ro cuh. Sahn chahn ne, va che cuihno se.

⁷ Tahque ndah ne, rahndudo nuhn vededevano yahn Dendiohs che cade te ye, checadino vo, che nde hua devano ihyan ro menañ. Nde cuahn che ametañ dendah ye iyehñse ne, chihco cade ye vededevano min nduhca che ndedevahn ye uvo, cuahtenan vo vahchetero numacuahn ro.

⁸ Nde ama sahn che rihquentiyon se iyehñse cuh ne, hua tumacadino se yahn vededevano min. Chemin che nahn yah se Dihvo vo Jesucristo, ihyan min che ama yudo vederihquentiyon quenan cuma ye. Ndete che tumacadino se ne, hua tihca din se.

⁹ Andahre tihca din sahn chahn, ate a chinahn nduhca che ndirun nan Ndudo yahn Dendiohs tuhca:

Dendiohs ne, a chihco cade ye che conan cuma ye vedeyahino nduco ihyan che yahino ye.

Ama chahte vedeyahino yahn ye, che nde hua co tumacadino ihyan nunde.

¹⁰ Ate uvo, ihyan yahn ye ne, din ye che quenun Vaco Ndah yahn ye uvo, tumacadino vo yahn vedeyahino yahn ye. Vaco Ndah yahn Dendiohs ne, devano ndah nducuahn che ri, nde nducuahn che redin ye.

¹¹ Van ihyan iyehñse ne, queri ama ye ne, atenan man ye devano ye che rendedecadino ye. Namin nde ama ihyan hua devano ye che rendedecadino Dendiohs. Atenañ Vaco Ndah yahn ye devano.

¹² Nuhn che rahndudo nuhn Ndudo yahn Dendiohs ne, ndiyu vededevano yahn ihyan iyehñse che te Dendiohs, chenah cuma nuhn. Tahque ndah ne, din ye che quenun Vaco Ndah yahn ye nuhn, din che tumacadino nuhn yahn vedeyahino yahn ye cava nducoyaço vo.

¹³ Ndiyu nduco vededevano che chahn nuhn yahn ihyan, che rahndudo nuhn ndudo yahn vedeyahino yahn Dendiohs. Tahque ndah ne, a Vaco Ndah yahn ye che rete vededevano nuhn che rahndudo nuhn. Tihca rinan Vaco ye nuhn che rahndudo nuhn ndudo che nahn che cadino ihyan.

¹⁴ Ihyan iyehñse ne, hua renewahñecun ye vederihquentiyon yahn Vaco Ndah yahn Dendiohs, te rahco ye te chemin ne, ama vedetundo. Nde hua retumacadino ye yahn, te atenan ihyan che quenun Vaco Ndah yahn Dendiohs ihyan co tumacadino ye.

¹⁵ Ihyan che quenun Vaco Ndah yahn Dendiohs ihyan ne, retumacadino ye yahn nducuahñ dehtenduh, ne nde ama ihyan hua ndahca che ndahchenan ye ihyan.

¹⁶ A ndirun nan Ndudo yahn Dendiohs tuhca: “Ametah nde ama ihyan iyehñse che co tumacadino ye yahn vederendecadino yahn Dihvo vo Dendiohs. Ametah nde ama ye che tuno vededevano yahn ye che cacuahñ ye ihyan.” Ate uvo che nedin yahn Dendiohs uvo ne, ama no vederendecadino yuhn vo nduco Dihvo vo Jesucristo.

3

Ihyan che redin ye ntiyon yahn Dendiohs

¹ Dihno, cuahn che quenán nduco nchuhn ne, anduhñeca ihyan che hua conun Vaco Ndah yahn Dendiohs ihyan man, anduhñeca ihyan nunde man, anduhñeca checahya che queman rico man, tihchan ne, te metah conahn ndah ne ndudo yahn Dihvo vo Jesucristo. Chemin che hua chi chicuahn nchuhn nduhca che redin yahn che cacuahñ ihyan che renahn ndah ye.

² Nduhca che redin ihyan nduco decuah yuno, ricuh ye deman leche yahn che hua ri che cahcacheh ye dehtenduh, tihca din nduco nchuhn ro min, te metah tumacadino ndah ne, ne hua chi chicuahn ndah nchuhn. A devano te nde meniñon ne, ametah tumacadino ndah ne,

³ te dama ri ne nduco ihyan nunde. Redin ve ne yahn vih man, vate canda ne nduco vih man, o ino cuan ndi ne man. Che tihca redin ne ne, riho ro ne che dama vederendecadino yahn ne nduco ihyan nunde.

⁴ A ndero ndi che o ino cuan ndi ne, te nahn ne ne, rahn ne che riquendi ne che ricuahn Pablo, nahn ne ne, rahn ne che riquendi ne che ricuahn Apolos. Vatechica ne nduhca ihyan nunde.

⁵ U nduco Apolos, atenan ntiyon yahn Dihvo vo Dendiohs redin nuhn. Nda nuhn yan vaco nchuhn, cahndudo nuhn ndudo yahn Dihvo vo Jesucristo, chitahno ne. Queri ama nuhn ne, redin nuhn nduhñeva ntiyon che chihco ye tah nuhn.

⁶ Nuhn ne, ihyan redin ntiyon yahn ye nuhn. U, ne anduhñeca ndete che tuhdó ndute ndata, te u menan ndita cahndudó ndudo ndah yahn Dihvo vo Jesucristo, chihñevan ne, ne Apolos ne, anduhñeca ndete che chi se nune van chendata, te quendi ye chicuahn ye nchuhn. Ate a Dendiohs che din ye che chitahno ne.

⁷ Ntiyon yahn nuhn ne, nduhca ntiyon che redin ihyan viyata. Nahn cuan ne, riquendañ yahn ama ihyan che retuhdo ye ndute ndata, ne riquendañ yahn tama ye che ri ye nune van. Ate a Dendiohs che redin ye che rihta. Nducofe tihca ne, tumacadino vo che anduhñeca ndete che hua rigonun chihve ntiyon yahn ama tama ye, che retuhdo ye ndute ndata man, che ri ye nune van man, te atenan Dendiohs che redin ye che rihta.

⁸ Ihyan che retuhdo ye ndute ndata man, ihyan che ri ye nune van man, ama cuan ndi no ntiyon yahn ye nduco vih. Tihca ntiyon che redin nuhn nduco vih. Ate a devano vo te Dendiohs ne, ndahco menun ye yahn queri ama vo tunoca ntiyon che a nedin vo.

⁹ Nuhn ne, dama redin nuhn ntiyon yahn Dendiohs nduco vih, ne nchuhn ne, anduhñeca ndete che chendata yahn ye.

Atiñoca co cahma vo che nchuhn ne, anduhñeca ndete che ama vah che riho Dendiohs.

¹⁰ Numacuahn vedeyahino yahn ye ne, ndahco ye ntiyon tah che có anduhñeca sahn vihcherahto ndah che chihcó name yahn ama vah, ne tama

ye ne, riquendi ye rahto ye. Ate nahn che queri ama ye ne, cahco ye cudado nduhca che rahto ye.

¹¹ Name min ne, anduhneca ndudo yahn Dihvo vo Jesucristo che nde ama ihyan, hua co ndahcorun ye.

¹² Ate anduhneca ndete che ama ndeh nan che co cuahto nduco ye. Anduhneca ndete che co cuahto ye nduco dehtenduh che cocha nduhca diyahnguan man, diyahngua man, tu diyahn man. Namin anduhneca ndete che co dendah ye nduco dehtenduh che hua cocha nduhca irahno man, nduco man, yata cuma man.

¹³ Ate ntiyon yahn queri ama ye ne, va che co ro ndete che quendah ndah, te nda ro che techecade Dendiohs ne, anduhneca ndete che ndihchenan ye nduco ruchiyahn.

¹⁴ Duh ihyan che quendah ndah ntiyon yahn ye, anduhneca ndete che ndahto ye nduco dehtenduh che hua cuco ne, ihyan min ne, ndahco menun Dendiohs yahn ye.

¹⁵ Duh ihyan che hua quendah ndah ntiyon yahn ye ne, andahre ndevahn man ye, anduhneca ama ihyan che ndevahn ye van ruchiyahn ne, ate va che conda ntiyon che nedin ye.

¹⁶ A devano ne te nchuhn ne, anduhneca ndete che ama yaco yahn Dendiohs nan che quenun Vaco Ndah yahn ye.

¹⁷ Duh ihyan che detoh ye ino ihyan yahn Dendiohs ne, din Dendiohs castigo ihyan, te ihyan yahn ye ne, a ndihco vih ye cava ye.

¹⁸ Nde ama nchuhn ne, hua cahnceh man ne nchuhn. Duh nchuhn che ama quenun cuma ne vededevano yahn ihyan iyehnse che rahco ne ne, cuihcoman ne vededevano min, cuiquendi ne vededevano yahn Dendiohs,

¹⁹ te vededevano yahn ihyan iyehnse ne, ama vedetundo nan Dendiohs nduhca che ndirun nan Ndudo yahn ye tuhca: "Rahnecon Dendiohs che rinda ihyan, redin vederendedecadino yahn man ye."

²⁰ Namin a ndirun: "Nan Dihvo vo Dendiohs ne, nde hua richihve vederendedecadino yahn ihyan devano."

²¹ Chemin che hua din yade nchuhn, tendahnun ne che ricuahn queri ama nuhn, quendi ne, te nducuahn vederihquentiyon yahn Dendiohs ne, a chihnde cava che ndah yahn ne.

²² A Dendiohs che dechuh ye Pablo man, Apolos man, Pedro man. A ihyan min che dendah ye iyehnse man, rete ye vedevihche yahn nchuhn man, rihquentiyon ye vederih man, ro cuh man, ro che cochi man. Nducuahn ne, a cava che ndah yahn ne che chihco cade ye.

²³ Avane ne, a yahn Dihvo vo Jesucristo nchuhn, ne ihyan min ne, a Daya Dendiohs ihyan.

4

Ntiyon che chenan cuma ihyan apostol

¹ Hua din yade nchuhn cava nde ama nuhn. Cuedevano ne te queri ama nuhn ne, a ntiyon yahn Dihvo vo Jesucristo redin nuhn, rahndudo nuhn ndudo yahn vederihquentiyon yahn Dendiohs che cade te ye, checadino vo.

² Nducote tihca ne, nahn che queri ama ihyan che va tah ye ntiyon yahn Dendiohs ne, dinahn ye ntiyon min numa cuaco.

³ Che lado yahn ne, nde hua retumacah, a nchuhn, o intiyan, deh rahn ne yahn nduhca che redin ntiyon yahn ye. Nde man, hua co cahma ndete che ndahca, o hua ndahca redin,

⁴ te andahre dave yavenán ne, ate nde man hua devanó ndete che ndah redinán. Atenan Dihvo vo Jesucristo, ihyan min che nda cuande ye ntiyon che redin.

⁵ Chemin che conan rino nchuhn, hua ndahchenan ne tachan redin ihyan ntiyon yahn Dendiohs nde nda ro yahn. Nda ro min ne, a Dihvo vo Jesucristo techecade ye yahn queri ama vo tunoca vederendecadino yuhn vo cuahn che chahtenan vo iyehñse, cahco ro ye ndete che numa cuaco nedin vo ntiyon che chihnde tah vo. Tuhme ndahco menun Dendiohs yuhn vo tunoca ntiyon che nedin vo.

⁶ Dihno, a cava che ndah yahn ne che tihca riyahvé nchuhn. Andahre ndudo che ricuahn ihyan chenahn che redin che o ino cuan ndi nchuhn nduco vih, ate a dirun yahn ne anduhñeca ndete che u nduco Apolos chendihco nuhn nunde nan ndudo yahn nuhn. Tihca dirun yahn ne cava che tumacadino ne che vederihquentiyon che chenana cuma nuhn ne, hua tahque chahte che co che a ndirun yahn nan Ndudo yahn Dendiohs. Namin cava che hua din yade ne cava ntiyon yahn ama, ndahchenan ne ntiyon yahn tama.

⁷ Nde ama ihyan hua rendihche ye nchuhn che tahque ndah ihyan ne che co ihyan chenahn. A Dendiohs che te ye nducuahn che va yahn ne. Nducote a ihyan min che te ye ne, hua redin yahn che din yade ne nduhca ndete che nan vedevano yahn man ne rendaça ne dehtenduh che va yahn ne.

⁸ A ama chenana cuma ne vederihquentiyon yahn Dendiohs, che rahco ne, a va tah ne ndendi ndendita, che rahco ne. Chacondah vedame ne nuhn, ne vate ne, rihquentiyon ne, che rahco ne. ¡Ama ndahca ndete che cuaco niyon che rihquentiyon ne!, cava che nde nuhn ne, ndo dama nuhn nduco ne, cahcantiyon vo nduco vih.

⁹ Ama ndahca ndete che cuaco, te nuhn ihyan apostol ne, hua tihca vate nuhn. Tahque ndah ne, cane rahco che rahñecun Dendiohs che rechuhrihn nuhn nduhca ihyan che nde hua rignonun chihve ye man, nduhca ihyan che ndindah caca nunde yahn ye cava che coh ye man. Cane rahco che ndihco mendañ Dendiohs nuhn nan nducoyaca ihyan iyehñse man, nan angel man, cava che cahn ino ye ndihchero ye nuhn.

¹⁰ Ihyan nunde ne, rendihchero ye nuhn nduhca ihyan tundo che rahn-dudo nuhn ndudo yahn Dihvo vo Jesucristo. Me nchuhn ne, ama devano ne ndudo yahn Dihvo vo Jesucristo, che rahco ne. Nuhn ne, ndi nuhn nduhca ihyan che nde hua rignonun chihve ye. Me nchuhn ne, ama ndinan ne, che rahco ne. Nuhn ne, nde hua retumacah ihyan nuhn. Me nchuhn ne, ama rendeva ihyan yavenan ne.

¹¹ Nde meniyan ne, ama redin tan ihyan nduco nuhn. Ama rechuhrihn nuhn, rih cuico nuhn man, rih yaca nuhn man, metah tino yahn nuhn man, metah vaco nuhn man.

¹² A ndi cuno nuhn che redin man nuhn tama nan ntiyon cava che rendaça che rechuhnun nuhn. Rahva ihyan nduco nuhn, ate numacuahn vedencun rendahconan nuhn yahn ye. Chenan nan ye nuhn, redin tan ye nduco nuhn, ate hua rihcoman nuhn ntiyon che chenana cuma nuhn.

¹³ Rendañchenan ye nuhn, ate riyahve nuhn ihyan nduco ndah. Cuahn dama rendihche ye nuhn nduhca dehtenduh che tahque chihnga.

¹⁴ Tihca dirun yahn nchuhn, ndiyu cava che cahtera vedecuihno yahn ne, ate cava che riyahvé nchuhn nduhca dayá che yahino.

¹⁵ Tihca dirun, te andahre ndiche mil ihyan che ricuahn ye nchuhn ndudo yahn Dihvo vo Jesucristo, ate hua yahino ye nchuhn nduhca che yahino

nchuhn. U ne, anduhneca indihthe yahn ne, te a u che tihyon yuné nchuhn che chitahno ne Dihvo vo Jesucristo.

¹⁶ Chemin che, numacuahn chedave yáhn, riyáhvé nchuhn che quendi ne yune yáhn.

¹⁷ Cava che co dinahn nchuhn ne, dechúh Timoteo che conan se nchuhn. Ama yahinó sahn. Anduhneca daya mán, te u tihyon yuné sahn che chitahno se Dihvo vo Jesucristo. Nde meniyon riquendi se, ndah redín se ntiyon yahn ye. Sahn min ne, nduhca che recah cuande mán dihno vo nduh cuan yaco nan che quechicá, tihca te cuande se nchuhn cava che necahco ne nduhca che ritahnó Dihvo vo Jesucristo, redináhn ndudo yahn ye.

¹⁸ Ama o nchuhn ne, ama redin yade ne, rahco ne che ametah ndaconan chí quendihcheró nchuhn.

¹⁹ Ate ndete che nahn Dihvo vo Jesucristo ne, chí nún quendihcheró nchuhn. Tuhme ndihcheró ndete che cuaco che rahn ihyan yade chahn che vatechica ye numa cuaco, chenan cuma ye vederihquentiyon yahn Dihvo vo Jesucristo.

²⁰ Tihca nahn che dín, te ndiyu ndudo che rahn ihyan rihco ro che rihquentiyon Dendiohs ihyan, te nan ntiyon che redin ye ne, min ndero ndi ndete che cuaco che chenan cuma ye vederihquentiyon.

²¹ Man ne, cuetendáhnun nchuhn cha che ri yeno ne. ¿A nahn ne che chí numacuahn vedeyahino man, vedenecon man, conán nchuhn? ¿O nahn ne che chí numacuahn vedetan, dín castigo nchuhn?

5

Tehecade Pablo ama nunde chihnga

¹ Numachahte va ndudo che ama se van nchuhn ne, quenán se nduco checuma se. Nunde min ne, ama chihnga. Nde van ihyan che hua devano ye che va Dendiohs ne, hua tihca redin ye.

² Ate nde nduco nduh ne, ama redin yade nchuhn. Tahque ndah ne ne, cuahte ran ne. Sahn chemin ca me ne, ametah cuahnecon nchuhn che conduco ca se van ne.

³ Andahre hua quenán nduco nchuhn tan ne, yah ri chedave yáhn cava ne. A tehecadé yahn se anduhneca ndete che quenún van nchuhn.

⁴ Ro che ndo dama nchuhn, ndeva ne yavenan Dihvo vo Jesucristo ne, anduhneca ndete che nducó nchuhn. Ro min ne, numacuahn vederihquentiyon yahn ye ne,

⁵ condahco ne sahn tah chundah cava che co se castigo, andahre ndevahn se ro che nda Dihvo vo.

⁶ Hua ndahca che rahnecon ne che rinduco ca se van ne. A devano ne te nduco tah sihn ya ne, ri ya numacuahn yache. Tihca redin nunde yahn sahn min, te redetohnan vederihquentiyon che chenan cuma nducoyaca ne.

⁷ Nduhca che rihtera ihyan ya ndico, redendah ye pan che hua nduco ya yahn ne, tihca cuihcoman nchuhn nunde che chenan cuma ne ro menan, cuihco ro ne che a ndi vih ne cava Dendiohs. Tihca din ne, te nduhca ama itecuche lihn che chih te, chí te vedino ro yudo ne, tihca chih Dihvo vo Jesucristo, ndedevahn ye uvo.

⁸ Nduhca che rihcoman ihyan pan che ndindah nduco ya yahn ne, tihca nahn che cahcoman vo nducuah nunde yuhn vo, ne runecade cuahtechico vo man, runecade ndedecadino vo man, nduhca che nahn Dendiohs.

⁹ Nan caca che dechúh yahn ne menan ne, a dirún che hua conduco ne ihyan nunde che rahtenan ye nduco ihyan che hua nihnevaco nduco ye.

¹⁰ Ate hua dirún che ama yune no çahcoman ne nducoyaca ihyan chahn man, combiero yahn ye che idihya ye man, che reduco ye man, che rendeva ye yavenan dehtenduh che ndere redin ye dendiohs yahn ye man, te çava che metah ndihchero ne ihyan chahn ne, atenan che ndaca ne iyehñse cuh.

¹¹ Che tihça dirún ne, che hua conduco ne dihno vo ndete che rahtenan ye nduco ihyan che hua nihnevaco nduco ye man, ndete che idihya ye man, ndete che rendeva ye yavenan dehtenduh che ndere redin ye dendiohs yahn ye man, ndete che rahva ye man, ndete che ricoh ye man, ndete che reduco ye man. Nduco dihno vo che tihchan ye ne, nde hua cheh ne dama nduco ye.

¹²⁻¹³ U ne, hua cuande yahn che techecade yahn ihyan che hua ritahno ye Dihvo vo Jesucristo. A man Dendiohs techecade ye yahn ye. Me nchuhn ne, a dihno vo che rinduco ye nchuhn, va che techecade ne yahn ye. Chemin che ametah cuahñecun ne che conduco ca sahn nunde me nchuhn.

6

Hua ndahça che çahn dihno vo, cuhnde çade yahn ye nduco vih nan intiayah yan

¹ Cuahn che va çanda yahn nchuhn nduco vih ne, ndotenan che çahn ne yaco, cuhnde çade yahn ne ne, rahñ ne nan intiayah yan che nde hua ritahno ye Dihvo vo Jesucristo. ¿Taca che ama tundo ne?

² Redin nchuhn anduhñeca ndete che hua devano ne te nda ro yahn ne, nduco nchuhn ihyan yahn Dendiohs, techecade ne yahn ihyan nunde. Nducote tihça va çade ne, tahque nun co techecade ne çanda yahn ne che nde hua vahche.

³ Redin ne anduhñeca ndete che hua devano ne che nde ángel va che techecade ne yahn ye. Tahque nun techecade ne yahn dehtenduh che rahno ri ne man ro cuh.

⁴ Tuhme ne, cuahn che va che cuhnde çade yahn ne nduco vih ne, ndotenan che çahn ne nan intiayah yan che nde hua ritahno ye Dihvo vo Jesucristo ne, çahn ne nan dihno vo, andahre tundo ye, ne techecade ye yahn ne.

⁵ Tihça dirún yahn ne çava che co cuihñan ne. ¿Ametah nde ama ihyan van nchuhn che renahn ye mare tah, che co techecade ye yahn ne nduco vih?

⁶ Rihtera ne vedecuihno yahn ne che rahñ ne, rica nunde ne yahn vih nan intiayah che nde hua ritahno ye Dihvo vo.

⁷ Che rahte çanda ne nduco vih ne, nduco chemin no, ama yahn redenda ne. Tahque ndah che codin chahtino ama tama ne yahn vih, nchahco ne nunde yahn vih.

⁸ Ate hua tihça redin ne, te tahque ndah ne ne, duche rino ne nde van man ne nduco vih, rahtendiho ne nunde.

⁹⁻¹⁰ A devano ne te ihyan nunde ne, hua cuahtenan ye vahchetero nan che rihquentiyon Dendiohs. Cuedevano ne te ihyan che rahtenan ye nduco ihyan che hua nihnevaco nduco ye man, ihyan che redin duche yahn ye che a nihnevaco ye man, ihyan che hua numa cuaco ye, che mahñ ndahta mahñ çahn ye, che rahtenan ye van man nduco vih man, ihyan che rendeva ye yavenan dehtenduh che ndere redin ye dendiohs yahn ye man, ihyan che reduco ye man, ihyan che idihya ye man, ihyan che ricoh ye man, ihyan che rahva ye man ne, nde ama ihyan che tihchan ye ne, hua conan ye vahchetero.

¹¹ Nahñ nchuhn ne, tihchan ne ro menan. Ate man ne, numacuahn vederihquentiyon yahn Vaco Ndah yahn Dendiohs ne, a nchahco ye nunde yahn ne che cuande yahn Dihvo vo Jesucristo. A chedenune ne man, a nedin yahn ye nchuhn man.

Nahn che hua cuahtendihco vo nunde

¹² Va ama ndudo che tuhca: “A dehno che nahn vo ne, co din vo.” Cuaco ndudo min, ate hua redin yahn che tihca din vo. Hua ndahca che quendi vo nunde yuhn vo.

¹³ Va tama ndudo che tuhca: “Dehtenduh che va ne, chihnde cava che chuh vo.” Cuaco ndudo min, ate nda ro yahn ne, ndahco cade Dendiohs nducuah, nde metah rendotenan che chuh vo cava che cuahtenun ico vo. Dendah Dendiohs uvo, ate ndiyu cava che cuahtenan vo nduco ihyan che hua nihnevaco nduco vo, te dendah ye uvo cava che co yahn ye uvo.

¹⁴ Numacuahñ vederihquentiyon ndedetuhche Dendiohs Dihvo vo Jesucristo, ne namin tihca ndedetuhche ye uvo.

¹⁵ A devano nchuhn te queri ama vo ne, a yahn Dihvo vo Jesucristo uvo. Nducote a yahn ye uvo ne, hua ndahca che cuahtenan vo nduco tahn che ndere vatechica te.

¹⁶ A devano ne te ihyan che conan ye nduco ndahta che ndere vatechica te ne, co ye nduco te anduhneca ama no ihyan nduhca che a ndirun nan Ndudo yahn Dendiohs tuhca: “Ihyan che conan cuma ye ama ndahta ne, co ye nduco te anduhneca ama no ihyan.”

¹⁷ Me ihyan che ritahno ye Dihvo vo Jesucristo ne, ndo ye nduco vih anduhneca ama no ihyan, chenán cuma ye nduco vih vederihquentiyon yahn Vaco Ndah yahn Dendiohs.

¹⁸ Nducote tihca ne, condi nchuhn cuahtenan ne nduco ndahta che ndere vatechica te. Adecodehno nunde yahn ihyan ne, rahtendihco ye. Ate che rahtenan ye nduco ihyan che hua nihnevaco nduco ye ne, rahtendihco ye nunde, nde redetoh man ye ihyan.

¹⁹ A devano vo te a din Dendiohs che quenun Vaco Ndah yahn ye uvo, a ndi vih vo anduhneca ama yaco nan che quenun. Hua rihquentiyon man vo uvo,

²⁰ te a yahn Dendiohs uvo. Nde hua tuno vederendecadino yuhn vo nduhva che yahino ye uvo, ndedevahn ye uvo cava man ye. Chemin che nahn che hua detoh man vo uvo man, ndeva vo numacuahñ chedave yuhn vo yavenan ye man.

7

Cah cuande Pablo nduhca che cuahtenan cuma ihyan ndahta yahn ye

¹ Man ne, ndahconan yahn ne che dirun ne yahn. Rahco te ndahca cava ihyan che cuahteman ye.

² Ate cava che hua cuahtendihco ye nunde, ndere cuahtechica ye nduco vih ne, tahque ndah che cahnevaco ye.

³ Nchuhn che a nihnevaco ne ne, cuahtenan cuma ne vih nduhca che redin yahn cava che hua ndaca yune che ndere cuahtechica ama tama ne.

⁴ Nchuhn, ihyan ndahta ne, yahn ne inchahn ne. Nchuhn, ihyan chahn ne, yahn ne ihyan ndahta yahn ne. Chemin che nahn che dinahn ama tama ne yahn vih.

⁵ Hua cuahcotahn ne yahn vih, atenán che nte cade ne che hua cuahtenan ne nduco vih ama o ro cava che covah ne. Cuihno min ne, ndo dama ne nduco vih, te adenán hua cocha ama cha ne che rahñ cuhndeman ne, ne conan ne nduco tama ihyan, condihco ne nunde, dinahn ne che nahn chundah.

⁶ Rahn ri nchuhn che recah yune Dendiohs che cahnevaco ihyan che nahn ye. Ate ihyan che cocha ye, cuahteman ye ne, co cuahteman ye.

⁷ Che lađo yáhn ne, ndahça che cuahteman ihyan nduhça u. Ate hua nducoyaça ye cocha ye. Dendiohs ne, hua đama vederihquentiyon neçađ ye chenán cuma queri ama ihyan.

⁸ Nchuhn, sahn decahya man, ndahta vah man ne, rahcó te ama ndahça ndete che cuahteman ne nduhça u.

⁹ Ate ndete che hua chenán cuma ne vederihquentiyon che cocha ne cuahteman ne ne, tahque ndah che cahnevaco ne, yodemica che chuhrihn ne, ndedecadino ne che nahn cahnevaco ne.

¹⁰ Me nchuhn che nihnevaco ne ne, rete cuandé nchuhn vederihquentiyon yahn Dihvo vo Jesucristo che hua tehche vih ne.

¹¹ Ihyan ndahta ne, hua co tehche ye inchahn ye. Ndete che denán tehche ye inchahn ye ne, atenán che cuhndeman ye, o ndo nduco ye inchahn ye. Hua co cahnevaco ye nduco tama ca ihyan. Namin ihyan चाह्न ne, hua co tehche ye ndahta yahn ye.

¹² Man ne, te cuandé tama vederihquentiyon che hua ntihyon yan Dihvo vo Jesucristo. Dihno vo che nihnevaco ye nduco ndahta che hua ritahno te Dihvo vo Jesucristo ne, ndiyu çava chemin che tehche ye tahn ndete che va te vedeyeno che quendi te nduco ye.

¹³ Namin cahvo vo che nihnevaco ye nduco चाह्न che hua ritahno se ne, ndiyu çava chemin che tehche ye sahn ndete che va se vedeyeno che quendi se nduco ye.

¹⁴ Ihyan चाह्न che hua ritahno ye ne, redin chahtino Dendiohs yahn ye che cuande yahn ihyan ndahta yahn ye che ritahno ye. Ihyan ndahta che hua ritahno ye ne, redin chahtino Dendiohs yahn ye che cuande yahn inchahn ye che ritahno ye. Ndete che hua tihça ne, daya ihyan chahn ne, anduhneca daya ihyan che hua ritahno ye. Ate redin chahtino Dendiohs, rendihche ye daya ihyan chahn anduhneca daya ihyan che ritahno nduh che o ye.

¹⁵ Ndete che ama cha ihyan che hua ritahno ye, nahn tehche ye ihyan che nihnevaco nduco ye che ritahno ye ne, a tehche no man ye vih, nde hua cahnda yahn ihyan che ritahno ye, te Dendiohs ne, hua nahn ye che cahahte canda ihyan chahn nduco vih.

¹⁶ Ndete che tihça nahn ihyan che hua ritahno ye ne, hua redin yahn che cuahcotahn ihyan che ritahno ye, te nchuhn ihyan ndahta ne, nde hua devano ne, ndete che çava ne cotahno inchahn ne, ndevahn ye. Namin nchuhn ihyan चाह्न ne, nde hua devano ne ndete çava ne cotahno ihyan ndahta yahn ne, ndevahn ye.

¹⁷ Andahre hua cocha ndudo yahn nchuhn che cotahno ye, ate va che cuahtenan ne vedeyeno nduhça che ndihco cade Dihvo vo Dendiohs yahn ne man, nduhça che chenán ne ro che ndedevahn ye nchuhn man. Tihça rihquentiyón nduh cuan yaço.

¹⁸ Nchuhn che chenán seña nchuhn ro min ne, hua dehve rahco ne, quendi ne. Me nchuhn che hua chenán seña nchuhn ro min ne, hua cuahnecon ne che conan seña nchuhn.

¹⁹ A chenán, o hua chenán seña uvo ne, hua dehve din yahn chemin, te che nahn ne, che dinahn vo che rihquentiyon Dendiohs.

²⁰ Atanochan uvo ro che ndedevahn ye uvo ne, cuahtenan vo vedeyeno, quendi vo tihça.

²¹ Nchuhn che chenán cuma ne dihve ne, chenán ne vaco ye ro min ne, hua dehve rahco ne, quendi ne, din ne ntihyon yahn ye. Ndete che adenán te yune ye che ndaça ne ne, condaca ne.

²² Cuahn che chitahno ne Dihvo vo Jesucristo ne, nde ro min ne, a ndedevahn ye nchuhn çava man ye. Me nchuhn che rihquentiyon ne nan

ntiyon yahn man ne ro che chitahno ne Dihvo vo ne, a ndo ne anduhneca ihyan redin ntiyon yahn ye.

²³ Ama chahte vedeyahino quenan cuma Dendiohs cava nchuhn, ndedevahn ye nchuhn. Cava nchuhn ne, tahque rigonun chihve vederihquentiyon yahn ye che co vederihquentiyon yahn ihyan.

²⁴ Dihno, nducote tihca ne, quendi nchuhn cuahtenan ne nan Dendiohs nduhca che chenana ne ro che ndedevahn ye nchuhn.

²⁵ Me nchuhn ihyan decahya ne, hua te Dihvo vo Jesucristo, checadino nde ama vederihquentiyon cava ne. Ate u ne, numacuahn vedeyahino ndedevahn Dihvo vo u, ne redin ntiyon yahn ye numa cuaco. Chemin che rahco te cochihve che te cuande nchuhn taca cuahtenan ne.

²⁶ Che lado yahn ne, ndahca che cuahteman nchuhn, hua cahnevaco ne, te ro cuh che vato vo ne, cahnda.

²⁷ Nchuhn che a nihnevaco ne ne, hua tehche ne ndahta yahn ne. Me nchuhn che metah cahnevaco ne ne, hua nuhn ne ndahta.

²⁸ Nchuhn, sahn decahya che cahnevaco ne ne, hua dehve rahco ne, hua nunde chemin. Me nchuhn, tahn decahya che cahnevaco ne ne, hua nunde chemin. Ate adeduhno nchuhn che cahnevaco ne ne, acadeno che yah cuahno ne. Rahn ri nchuhn cava che ndah yahn ne che tahque ndahca yahn ne che hua cahnevaco ne.

²⁹ Dihno, rahn ri nchuhn te caviyan deman ne, conahn che ndihco cade Dendiohs. Man ne, nchuhn che nihnevaco ne ne, hua deman cava ndahta yahn ne ndedecadino ne. Menan vihca condecadino ne nan ntiyon yahn Dendiohs.

³⁰ Nchuhn che ran ne ne, hua deman vederan cuahte ne. Nchuhn che yeno ne ne, hua deman vedeyeno cuahte ne. Nchuhn che ra ne dehtenduh ne, hua cahco ne vedehtatino yahn ne nan dehtenduh chemin chan. Codin ne cuande anduhneca ndete che metah dehva yahn ne.

³¹ Nchuhn che ndah rahno ne, chenana ne iyehense ne, nde hua co yeno ne cava chemin, te nducuahn che va iyehense cuh ne, a nihnde cade yahn che va che cuhno.

³² Nahn che hua denduh ino nchuhn. Sahn che metah cahnevaco se ne, va man ino se, redin se ntiyon yahn Dihvo vo Jesucristo, nahn se che co yeno ye.

³³ Ate sahn che quenana cuma se ndahta yahn se ne, rendedecadino se yahn vederetahn yahn se, nahn se che co yeno ndahta yahn se.

³⁴ Atihnoca rahno ri tahn ndahta. Tahn che hua quenana cuma te inchahn te ne, va man ino te, redin te ntiyon yahn Dihvo vo Jesucristo numa ino te, ndi vih te cava Dendiohs. Ate tahn che quenana cuma te inchahn te ne, rendedecadino te yahn ntiyon yahn te vaco te, nahn te che co yeno inchahn te.

³⁵ Tihca dirun yahn nchuhn cava che ndah yahn ne, ndiyu che rihca tan che cahnevaco ne. Nahn che runecade cuahtenan ne iyehense, va man ino ne, din ne ntiyon yahn Dihvo vo Jesucristo.

³⁶ Che lado yahn ne, rahco che tahque ndah che cuahteman ihyan decahya. Ate nchuhn che vate tahn cahya yahn ne ne, ndete che rahco ne che tahque ndah che cahnevaco nun te che co che cuahtenan te, co ndico te ne, co decahnevaco ne tahn, hua nunde chemin.

³⁷ Me nchuhn che a ndedecadino ne, a chihco ne chedave yahn ne che tahque ndah che hua decahnevaco ne tahn daya ne ne, hua dehve rahco ne, te namin ndahca che tihca din ne.

³⁸ Nducote tihça ne, ihyan che redcahnevaco ye daya ye ne, ndahça redin ye, ne ihyan che hua redcahnevaco ye daya ye ne, nde tahque ndahça redin ye.

³⁹ Ihyan ndahta che nihnevaco ye ne, a ndihco çade Dendiohs che hua tehche ye inçahn ye nde nda ro che coh ye. Ndete che coh inçahn ye ne, co ndaconan cahnevaco ye nduco adecoduhno ihyan che namin ritahno ye Dihvo vo Jesucristo.

⁴⁰ Ate che lađo yahn ne, rahco che tahque ndahça çava ye ndete che metah ndaconan cahnevaco ye. Tihça dirún, te co tihça nahn Vaco Ndah yahn Dendiohs.

8

Vedino che rihco ihyan nan dehtenduh che ndere redin ye dendiohs yahn ye

¹ Mañ ne, te cuandé nchuhn yahn vedino che rihco ihyan nan dehtenduh che ndere redin ye dendiohs yahn ye. Nducoyaco vo ne, devano tumacadino vo yahn dehtenduh. Chemin ne, co din che din yade vo, ate hua co din che ndahça cuahtenan vo nduco vih nan Dendiohs, te atenan che chenano cumo vo vedeyahino nduco vih che ndahça cuahtenan vo nan ye.

² Adecoduhno vo che ama devano vo, che rahco vo ne, rihnech man vo uvo, te nde hua devano vo nduhça che redin yahn.

³ Ate ndete che yahino vo Dendiohs ne, nda cuande ye uvo.

⁴ Me yahn che chuh vo dehtenduh che rihco ihyan nan dehtenduh che ndere redin ye dendiohs yahn ye ne, hua çahnda. A devano vo te dehtenduh che ndere redin ihyan dendiohs yahn ye ne, metah vederihquentiyon yahn, anduhneça ndete che hua dehva. Va ama no Dendiohs.

⁵ Tihça, te andahre ama va dehtenduh che ndere redin ihyan dendiohs yahn ye man, dihve ye man, chenano nan ro man, ndiyahn man,

⁶ ate çava uvo che ritahno vo Dihvo vo Jesucristo ne, va ama no Dendiohs. A ihyan min che Chido vo. A man ye dendah ye nducuahn dehtenduh che va. Dendah ye uvo çava ye. Namin va ama no Dihvo vo Jesucristo. Nduco ye Chida ye dendah ye uvo man, nducuahn dehtenduh che va man.

⁷ Ate hua nducoyaca dihno vo retumacadino ye che metah vederihquentiyon yahn dehtenduh che ndere redin ihyan dendiohs yahn ye. Neve ye ne, nducote nevahneçun ye dehtenduh chemin çan ro menan ne, chenano ca vedevah min ihyan. Chemin che nde meniyo ndete che adenan cheh ye dehtenduh che ndi vedino nan dehtenduh chemin çan ne, cuahtendihco ye nunde, che rahco ye, te metah tumacadino ye te vedino chemin çan hua dehva niyahn.

⁸ Ndete che chuh vo vedino chemin çan ne, ndiyu chemin din che tahque co chihvo vo nan Dendiohs, nde huane che hua chuh vo din che detohnan vo. Devano vo te ndiyu che reh vo redin che renano ino Dendiohs uvo.

⁹ Nchuhn che a devano ne che hua dehva niyahn vedino chemin çan ne, cuihco ne cudado çava dihno ne che metah conahn ndah ye yahn. Hua ndahça che çava ne, detohnan ye chedave yahn ye, cuahtendihco ye nunde.

¹⁰ Ndete che adenan ndihchero ye nchuhn che vate ne yaco nan che vate dehtenduh che ndere redin ihyan dendiohs yahn ye, reh ne ne, nduco ye çahquino ye cheh ye che ndi vedino nan dendiohs chemin çan,

¹¹ ne detohnan ye chedave yahn ye, cuahtendihco ye nunde. Nduco tihça ne, çava nchuhn che devano ne che hua çahnda che cheh ne ne, ndaça yune che tohnan chedave yahn dihno ne che metah conahn ndah ye. Cueneçahco ne te namin çava ihyan min chih Dihvo vo Jesucristo, ndedevahn ye ihyan.

¹² Ndete che hua caḥco nchuhn cuḍado ne, denaḥ tihyon yune ne diḥno ne caḅa che detohnan ye chedave yahn ye, ne maḥ ne cuahtendiḥco ne nunde naḥ Dihvo vo Jesucristo.

¹³ Nducote tiḥca ne, nahn che din vo cuḍado. Ndete che va dehtenduh che raḥco diḥno vo che caḥnda che cheh ye ne, taḥque ndaḥ che hua chuh vo dehtenduh chemin chan, caḅa che hua ndaḅa yune che detohnan ye chedave yahn ye, cuahtendiḥco ye nunde.

9

Vederihquentiyon che chenan cuma iḥyan apóstol

¹ A chitahnó Dihvo vo Jesucristo, ndeváhn. Quenan cumá vederihquentiyon, ndí apóstol yahn ye. Maḥ ndiḥcheró Dihvo vo. A u tihyon yuné nchuhn che chitahno ne iḥyan.

² Andahre vate iḥyan che hua renevahnecun ye u nduhca apóstol, ate nchuhn che cuḅco ne, a devano ne che ndí apóstol, te a u che caḥndudó ndudo ndaḥ yahn Dihvo vo Jesucristo, chitahno ne, ne nduco chemin ndero ndi che quenan cumá vederihquentiyon yahn ye.

³ Tuhca rendahconán yahn iḥyan che rendahchenan ye ntiyon che redín.

⁴ Nuhn ne, chenan cuma nuhn vederihquentiyon, ndí nuhn apóstol, ne quenan cuma che te iḥyan ndiyaco che chuḥnun nuhn.

⁵ Namin co caḥnevaco nuhn nduco ama caḥvo vo, conduco ye nuhn naḥ che vatechica nuhn nduhca che redin diḥno Dihvo vo Jesucristo maḥ, Pedro maḥ, iḥyan apóstol chenaḥn maḥ.

⁶ U nduco Bernabé ne, namin chenan cuma nuhn vederihquentiyon min, nde hua redin fuerza che din nuhn tama naḥ ntiyon caḅa che ndaḅa che chuḥnun nuhn.

⁷ A devano nchuhn te nducoyaca sandado ne, ndiyu naḥ ntiyon yahn maḥ se riquendaḥ che rechuhnun se. Namin iḥyan che rihche ye diḥyo uva ne, reh ye ndute yahn. Atiḥnocano tun iḥyan che redin ye cuḍado chivaḅo, te rih ye leche yahn te.

⁸⁻⁹ Hua raḥco nchuhn che che nahn maḥ che tiḥca dirún yahn ne, te yahn chemin ne, a tihyon yaḥ Moisés ama vederihquentiyon, dirun ye tuhca: “Hua dechiche duto itenine che redendeḥ te trigo caḅa che tiviyato, te ri yahn te nahn cheh te.” Chihquentiyon Dendioḥs che tiḥca, dirun Moisés, ndiyu demaḥ yahn che redin ye cuḍado ite,

¹⁰ te nduco ejemplo min caḥ ye, checadino iḥyan che nducoyaca iḥyan che redin ye ntiyon yahn ye ne, a naḥ ntiyon min quendaḥ che cheh ye. Tiḥca, te iḥyan che ruhn yahn maḥ, iḥyan che reneḅin dave ye trigo maḥ ne, redin ye ntiyon min, chenan ino ye che ndeva ye ndute ndafa.

¹¹ Namin nuhn che redin nuhn ntiyon yahn Dendioḥs, caḥndudo nuhn ndudo ndaḥ yahn Dihvo vo Jesucristo, chitahno ne ne, redin yahn che te ne che chuḥnun nuhn.

¹² Iḥyan chenaḥn ne, nducote recaḥ nchuhn nduhca che redin yahn che rechuhnun ye ne, taḥque ca nuhn, va che te ne, chuḥnun nuhn.

Andahre quenan cuma che conan ne nuhn, te ne che chuḥnun nuhn, ate nde hua chica nuhn nchuhn. Taḥque ndaḥ ne, din chahtino nuhn, te hua nahn denduh nuhn nchuhn caḅa che hua co vaḥche yahn ne che cotahno ne ndudo ndaḥ yahn Dihvo vo Jesucristo.

¹³ A devano nchuhn te iḥyan che redin ye ntiyon chete yaco maḥ, chidocuyan che chénum ye naḥ ta maḥ ne, a naḥ ntiyon min va che quendaḥ che chuḥnun ye.

14 Namin tihça chihco çade Dihvo vo Jesucristo che ihyan che rahndudo ye ndudo ndah yahn ye ne, a ñan ntiyon min quendaḥ che chuhnun ye.

15 Andahre redin yahn che ñan ntiyon min quendaḥ che chuhnún ne, ate nde hua retumacáh yahn chemin, nde huane çava che conan nchuhn u che tihça dirún. Ndihcó che nde ro che cóh ne, nde ama ihyan hua cahnevi ye vedeyeno yáhn che hua ñan ntiyon yahn Dihvo vo Jesucristo quendaḥ che chuhnún.

16 Ndiyu yahn che nahn din yaḍé che rahndudó ndudo ndah yahn ye, te a chemin va che dín. Tihça, te ama vedín ndete che hua dináhn yahn ye.

17 Chemin che rahndudó numacuahn vedeyeno yahn mán, ne nuhnde menun yáhn. Ate ndete che rahndudó andahre hua náhn ne, atanocá nduh rihco ró che ndihco Dendiohs ntiyon min táh.

18 Vedeyeno yáhn ne, che cuahndudó ndudo ndah yahn Dihvo vo Jesucristo, dín tama ñan ntiyon çava che ndaca che chuhnún, te hua náhn che ñan ntiyon yahn ye quendaḥ che chuhnún andahre tihça va çade.

19 Andahre hua va che cochicá nduhça che nahn ama o ihyan, ate tihça redín çava che ndaca yune che tahque co yáhn ihyan, cotahno ye Dihvo vo Jesucristo.

20 Cuahn che renún van ihyan nación yahn Israel, ihyan chahn che renevahnecon ye ley che dirun Moisés ne, ri dama ndudó nduco ye, redináhn dama nduco ye ley min andahre ametah va che dináhn. Tihça redín çava che co yeno ye, ne cotahno ye Dihvo vo Jesucristo.

21 Namin no tun cuahn che renún van ihyan nación chenáhn, che hua renevahnecon ye ley min, ndiyu che hua redináhn vederihquentiyon yahn Dendiohs man, Dihvo vo Jesucristo man, ate ri dama ndudó nduco ihyan chahn çava che co yeno ye, cotahno ye.

22 Cuahn che renún van dihno vo che hua renahn ndah ye vederihquentiyon yahn Dendiohs ne, redin chahtinó yahn ye çava che te yune ye che çah cuande ndáh ihyan. Tihça redín nduco nducoyaça ihyan. Hua rendaḥchenán nde ama ñan che redin ye çava che co yáhn ye, cotahno ye Dihvo vo Jesucristo.

23 Ama rihcó cudado nduhça che quechicá van nducoyaça ihyan, te nahn che co yáhn ye, cotahno ye ndudo ndah yahn Dihvo vo Jesucristo, ndeváhn dama nduco ye.

24 A devano nchuhn nduhça che rano ihyan çade. Yahn ye rano ye nduco vih, ate ama no ye richa ye, ndondaḥ tah ye premio yahn ye. Nduhça ihyan che tahque dito chano ye ne, tihça cuiquendi nchuhn numa ino ne, dinahn ne vederihquentiyon yahn Dihvo vo Jesucristo nde nda ro che ndaḥco menun Dendiohs yahn ne.

25 Nducoyaça sahn che reduce se ne, redin se cudado sahn yahn nducuan dehtenduh che co din che denda se, te nahn se che cocha se çava che ndondaḥ tah se premio yahn se. Premio chemin chan ne, nun rihno. Ate uvo ne, che ndaḥco menun Dendiohs yuhn vo ne, hua cuihno.

26 Nduhça sahn che rano se numa ino se man, nduhça sahn che reduce se numa ino se man ne, tihça redín.

27 Nduhça che ama redin sahn chahn cudado sahn çava che hua denda se ne, tihça ama rihcó cudado ñan nducuan che redín, te cuihno che ama riyahvé ihyan chenáhn che çahco ye cudado ne, hua náhn che denan denda man.

10

Yahve Pablo uvo che hua nevahnecon vo dehtenduh che ndere redin ihyan dendiohs yahn ye

¹ Dihno, nahn che cadino ne che nducoyaca ihyan ndico yuhn vo ne, chahtechica ye nduco vih man man che quendiho nan ro me. Namin chuh ye dama nduco vih mendahn reche Nuniyahn Cuah.

² Tihca chinduco nducoyaca ye Moises, chahtechica ye nduco vih man man me, ne chuh ye nduco vih mendahn nuniyahn me, anduhneca ndete che dama chedenune ye nduco vih.

³ Dama cheh ye nduco vih che cah Dendiohs.

⁴ Namin adecotino che chahtechica ye nduco vih ne, chih ye nune che quenda nan yava me che cah Dendiohs ihyan. Yava min ne, anduhneca Dihvo vo Jesucristo.

⁵ Andahre ama din Dendiohs vederihno nduco ye ne, ate a nahn nducoyaca ye chahcotahn ye yahn ye, ne chemin che din Dendiohs castigo ihyan, chih ye yahn nan che metah duhva.

⁶ Nducuaahn che chahno chi ihyan chahn ne, cochihve yuhn vo ndete che cua cuande vo yahn cava che hua cuahcotahn vo yahn vedeyahino yahn Dendiohs nduhca che din ye.

⁷ Hua quendi nchuhn yune yahn ihyan chahn, te ama yahn ye ne, nevahnecon ye dehtenduh ndere din ye dendiohs yahn ye. A devano vo che tihca din ye, te a ndirun nan Ndudo yahn Dendiohs tuhca: "Ndo dama ye nan chemin ca che ndere din ye dendiohs yahn ye, cheh ye man, chih ye man, chahte vihco ye man."

⁸ Hua cuahtenan nchuhn nduco ihyan che hua nihnevaco nduco ne nduhca che din ama yahn ihyan chahn, ndere chahtechica ye. Din Dendiohs castigo ihyan chahn, chih tenduh ndico ino mil ye che ama ro no.

⁹ Hua cuahcotahn nchuhn yahn Dihvo vo Dendiohs, din ne che co doh ino ye nduco ne nduhca che din ama yahn ihyan chahn. Din Dendiohs castigo ihyan, ne cah cu ihyan, chih ye.

¹⁰ Hua cahma nunde nchuhn yahn Dendiohs nduhca che chahn nunde ihyan chahn. Din Dendiohs castigo ihyan, dechuh ye ama angel, cah ye cah ihyan, chih ye.

¹¹ Nducuaahn dehtenduh che tihchan chahno chi ihyan ndico yuhn vo ne, chihquentiyon Dendiohs che quenan caca cava che, uvo che vato vo man ro cuh che a nun cuihno iyehse ne, cua cuando vo, ne hua ndere din vo.

¹² Nducote cahnda yuhn vo ne, duh nduhn che hua dehva co yahn ne, che rahco ne ne, cuihco ne cudado che hua denan condihco ne nunde.

¹³ Nchuhn ne, retumarande chundah nchuhn nahn cuan, rechuhrihn ne nduhca che rechuhrihn ihyan chahn. Ate Dendiohs ne, redinah ye ndudo yahn ye, ne hua cuahnecon ye che chuhnan chuhrihn ne. Tahque ndah ye ne, conan ye nchuhn ura che retumarande sahn min nchuhn cava che cocha ne.

¹⁴ Dihno che yahino nchuhn, nducote cahnda Dendiohs yuhn vo ne, cuihco ne cudado. Hua ndeva ne yavenan dehtenduh che ndere redin ihyan dendiohs yahn ye.

¹⁵ Nchuhn ne, ihyan renahn ne, ne a devano che conahn ne te cuaco ndudo che tihca dirun.

¹⁶ Cuahn che rendo damo vo nduco vih nduhca che chihco cade Dihvo vo Jesucristo ne, recah vo nundihve cuahn Dendiohs cava vino, rihi vo. Nduco chemin ne, riho ro vo che ama no vederendedecadino yuhn vo, ritahno vo Dihvo vo Jesucristo che chera yun yahn ye, quenah yah ye nan cruz cavo

vo. Namin no tun, ura che rendeh vo pan, reh vo ne, rihco ro vo che ama no vederendedecadino yuhn vo, ritahno vo ihyan min che chihco mendahn ye ihyan, chih ye cava vo.

¹⁷ Andahre yahn ri vo, ate nducote ama no pan reh vo nduco vih ne, ndero ndi che a nto vo nduco vih anduhneca ama no ihyan.

¹⁸ Cuihco nchuhn cudado nduhca che ri van ihyan naci6n yahn Israel. Nduco che reh ye nduco vih dehtenduh che ndi vedino nan ta ne, rihnde ro che ama no vederendedecadino yahn ye.

¹⁹ Me dehtenduh che ndere redin ihyan dendiohs yahn ye ne, cuedevano nchuhn te metah nde ama vederihquentiyon yahn. Atihno6a dehtenduh che rihco ye nan, ri vedino ne, hua cahnda, te hua dehva ri yahn.

²⁰ Ate rahn ri nchuhn che hua nahn che dama co ne nduco ye, te che tihca redin ye ne, a vaco chihnga che rinduco ihyan, ndiyu Dendiohs.

²¹ Nchuhn che renevahnecun ne Dihvo vo Jesucristo, reh ne pan man, rih ne vino man, nduhca che chihco cade ye ne, hua ndahca che dama co ne nduco ihyan che rahte vihco ye, reh ye man, rih ye man, che rendeva ye yavenan vaco chihnga.

²² A devano nchuhn te Dihvo vo Jesucristo ne, ama cahnda ye, ne hua ndahca che cahñ ne vedecahva ihyan. Ama vedin ne ndete che din ye castigo nchuhn.

Nduhca che nahn che cuahtenan cumo vo vedeyahino nduco vih

²³ Cuaco che nducuahn che nahn vo ne, co din vo. Ate hua nducuahn redin yahn che din vo. Hua nducuahn co conan dihno vo che tahque cochahtino ye Dihvo vo Jesucristo.

²⁴ Ndotenan che din vo dehtenduh che ri yeno man vo, tahque ndah ne, din vo dehtenduh che cochihve yahn ihyan chenahn.

²⁵ Adecodenhno che nahn cheh nchuhn ne, co cua ne ndihve. Nde hua ndedecadino ne yahn, nde hua tumerune ne ihyan yahn dehtenduh, a ndi vedino o hua,

²⁶ te iyehñse nduco nducuahn che va ne, a Dihvo vo Dendiohs chihco ye.

²⁷ Namin ndete che ama ihyan che hua ritahno ye Dihvo vo Jesucristo yahve ye nchuhn che cahñ ne, cheh ne nduco ye ne, co cahñ ne ndete che nahn ne. Cocheh ne adecodenhno che cheh ye nduco ne, ne cava che hua chihnga co ino ye ne, nde hua tumerune ne a ndi vedino dehtenduh chemin chan o hua.

²⁸ Atenan che man ye quendah chende ye, cahma ye co ye nchuhn che dehtenduh che chihco ye nan ne ne, a ndi vedino yahn dehtenduh che ndere redin ye dendiohs yahn ye, tuhme che cuaco ne, cava che hua ndedecadino ye ne, hua cheh ne.

²⁹ Hua cheh ne, ndiyu yahn che cahnda yahn ne che cheh ne, ate cava che hua ndedecadino ihyan min.

Ama o nchuhn ne, co rendedecadino ne che co cheh ne adecodenhno che nahn ne, ne rahco ne che nde hua nahn che din ne cudado, andahre chihnga co ino ihyan chenahn.

³⁰ Rahco ne che nde hua redin yahn che ndahchenan ye yahn dehtenduh che reh ne, te reñeh ne nundihve cuahn Dendiohs cava chemin.

³¹ Hua ndahca ndete che tihca ndedecadino ne. Tahque ndah ne, cuihco nchuhn cudado nan nducuahn dehtenduh che redin ne man, nan reh ne man, nan rih ne man, cava che ndaca yune che ndeva ihyan yavenan Dendiohs.

³² Hua çah yune ne che çava dehtenduh che redin ne conda nde ama ihyan, ihyan nación yahn Israel man, ihyan nación chenahn man, ihyan yahn Dendiohs che ritahno ye Dihvo vo Jesucristo man.

³³ Me u ne, a chihco inó che dín, ndiyu dehtenduh che ri yeno mán, ate dehtenduh che conan ino ihyan chenahn çava che ndaça yune che cotahno ye Dihvo vo Jesucristo, ndevahn ye.

11

¹ Nduhça che riquendí yune yahn Dihvo vo Jesucristo ne, tihça cuiquendi nchuhn yune yáhn.

Nduhça che va che nevahneacun ihyan ndahta chete yäco

² Dihno, ama yenó che cuahn ðama reneçahco nchuhn u, ne redinahne ne nducuahn che chicuáhn nchuhn.

³ Namin nahn te cuandé nchuhn tama te o ndudo che náhn che cadino ne. Dendiohs Chida ne, ihyan min che rihquentiyon ye Dihvo vo Jesucristo. Jesucristo ne, ihyan min che rihquentiyon ye ihyan çahn. Ihyan çahn ne, ihyan çahn che rihquentiyon ye ihyan ndahta yahn ye.

⁴ Ihyan çahn ne, cahtera ye vedecuino yahn ye ndete che cuahco ye payon tin ye ura che covah ye o cuahndudo ye Ndudo yahn Dendiohs.

⁵ Me ihyan ndahta ne, cahtera ye vedecuino yahn ye ndete che hua cuahco ye payon tin ye ura che covah ye o cuahndudo ye Ndudo yahn Dendiohs, te ndete che tihça ne, anduhneçá ndete che ndu rah ye tin ye.

⁶ Ndete che hua cuahco ye tin ye ne, tahque ndah che ndu rah ye. Atenan che cuihnan ye ndu rah ye ne, tuhme va che cuahco ye payon.

⁷ Ihyan çahn ne, hua redin yahn che cuahco ye tin ye, te dendah Dendiohs ihyan çava che co ro taça man ye man, taça vederihquentiyon yahn ye man. Me ihyan ndahta ne, dendah Dendiohs ihyan çava che çahco ro ye vederihquentiyon yahn inchahn ye.

⁸ Tihça, te dinoca dendah Dendiohs ihyan çahn, ne adiva dendah ye ihyan ndahta.

⁹ A çava ihyan çahn che dendah ye ihyan ndahta. Ndiyu çava ihyan ndahta quenana cuma che dendah ye ihyan çahn.

¹⁰ Chemin che va che cuahco ihyan ndahta payon tin ye çava che çahco ro ye nan ihyan man, nan ángel man, che nevahneacun ye vederihquentiyon yahn inchahn ye.

¹¹ Andahre tihça ne, ate van uvo che ritahno vo Dihvo vo Jesucristo ne, nde ndahta, nde çahn, rignonun chihve.

¹² Andahre çava ihyan çahn che dendah Dendiohs ihyan ndahta, ate nde ro min ne, a ihyan ndahta che racoyahn ye ihyan çahn.

A Dendiohs che chihco çade ye nducuahn

¹³ A devano man nchuhn te hua ndahça che hua cuahco ihyan ndahta payon tin ye ura che covah ye.

¹⁴ A namin no tun ama vedecuihno che cuahneacun ihyan çahn che co rahno yudo tin ye.

¹⁵ Ate ihyan ndahta che cuaco ne, redin yahn che cuahtenan cuma ye yudo tin ye che rahno, te richihve çava che chendih tin ye.

¹⁶ Me ihyan che çanda tin ye che hua conan ino ye che tihça te cuandé ne, codevano ye te nuhn man, ihyan yahn Dendiohs yahn nducuahn yaco man, hua chenana cuma nuhn costumbre che cuhna chende nuhn.

Ihyan ndiyaco ne, renevih Pablo nunde yahn ye vaçonan ye

17 *Man* ne, dirún yahn nchuhn yahn *ama nan* che hua ndahça redin ne, ne yahn chemin ne, hua co ndevá yavenan ne. Cane cuahn che rendo dama ne ne, ndotenan che cochihve yahn ne ne, deredinda ne,

18 te rahn ihyan ri ye u te cuahn che rendo dama ne yaco ne, ri ro che ndeh cuan ndi ne. Tah ne, ritahnó, ne tah ne, hua ritahnó, ate rahcó te co cuaco nahñ ndudo che rahn ye.

19 Va che ndeh cuan co ne, te min co ro cha nchuhn che ritahno ne numa cuaco Dihvo vo Jesucristo.

20 Cuahn che rendo dama ne, rih ne vino man, reh ne pan man, nduhça che chihquentiyon Dihvo vo Jesucristo ne, nducote ndeh cuan ndi ne ne, ndero ndi che hua numacuahn chedave yahn ne,

21 te ndere vihco no che redin ne. Nahñ nchuhn ne, reh nduh ne dehtenduh che riquenda ne. Nahñ ne ne, hua rendaçã reh ne. Nahñ ne ne, nde ricoh ne.

22 *¡A chuhnan cuahn che tihça redin nchuhn! ¿Ametah ndevaco ne, che cuahtenun ne, cheh ne man, cuh ne man? ¿Dehco che redin duche yahn ne ihyan yahn Dendiohs? ¿Taçã rahco ne che rihtera ne vedecuihno yahn dihno vo che metah dehva yahn ye? Cua nchuhn tah vedecuihno. Che tihça redin ne ne, hua co ndevá yavenan ne.*

Nduhça che chihco çãde Dihvo vo Jesucristo che cheh ihyan pan man, cuh ye vino man

23 Hua tihça chicuáhn nchuhn vederihquentiyon che ndahco Dihvo vo Jesucristo táh. Tuhça vederihquentiyon min: Vino che va che necah ndeh se Dihvo vo Jesucristo, co ye preso ne, ura che cheh vino ye ne, chetah ye pan,

24 necah ye nundihve cuahn Dendiohs. Tuhme ndeh ye, ne rahn ye: “Cocheh nchuhn. Chu ne, yute yáhn. Va che nuhn yah ihyan u çava nchuhn. Tuhça codin ne, cuenecaçco ne u.”

25 Chihno cheh vino ye ne, namin chetah ye *ama vaço* vino, ne rahn ye: “Vino cuh ne, yun yáhn che cora çava che conahn trato ra che ndahco çãde Dendiohs. Queri *ama yune* che tihça cuh ne ne, çahco ro ne che renecaçco ne u.”

26 Ráhn rí nchuhn te nduco tihça ne, çahco ro ne che renecaçco ne Dihvo vo Jesucristo, te nde ro che ndaconan chi tun ye ne, queri *ama yune* che cheh ne pan man, cuh ne vino man, nduhça che chihco çãde ye ne, çahco ro ne che renecaçco ne nduhça che chih ye.

27 Nducote çahnda vederihquentiyon min ne, adecoduhno ihyan che cheh ye pan man, cuh ye vino man, ate hua nduhça che chihco çãde Dihvo vo Jesucristo ne, condihco ye nunde che din duche yahn ye che chih Dihvo vo man, che chera yun yahn ye man.

28 Chemin che nahn che dinoca ndedecadino ihyan taçhan ihyan ye, tuhme nduco vedino vedeneçun cheh ye pan man, cuh ye vino man, nduhça che chihco çãde Dihvo vo.

29 Tihça va che din ye cuðado, te ihyan che ndere cheh ye, ndere cuh ye, che nde hua ndedecadino ye deh cuande ne, rihco yan man ye castigo che co ye yahn che duche rino ye Dihvo vo Jesucristo.

30 A yahn nunde min che nahñ dihno vo van nchuhn ne, ndi ye cah cuno, ne nahñ ye ne, ndi ye tãma te o nan cah, ne nahñ ye ne, a chih ye.

31 Ate ndete che çahco vo cudado yahn vederihquentiyon min ne, hua conan cuma Dihvo vo Dendiohs che din ye castigo uvo.

32 Ate che redin ye castigo uvo man ro cuh ne, che nahn ye che nto ino vo nunde yuhn vo çava che hua conda vo dama nduco ihyan nunde.

³³ Dihno, chemin che cuahn che ndo dama nchuhn, cheh ne pan man, cuh ne vino man, nduhca che chihco cade Dihvo vo Jesucristo ne, cuahtenan rino ne vih.

³⁴ Ndete che cuico ne ne, tahque ndah che cuahte ne, cheh ne ndevaco ne che co che cahñ ne ndiyaco, ndere cheh ne, ne conan cuma Dendiohs che din ye castigo nchuhn. Me yahn dehtenduh chenahn ne, nte cade vo nduco nchuhn cuahn che chí quendihcheró nchuhn.

12

Vederihquentiyon che recqñ Vaco Ndah yahn Dendiohs queri ama ihyan che ritahno ye Dihvo vo Jesucristo

¹ Dihno, nahn che codevano nchuhn yahn ndeh nan vederihquentiyon che rete Vaco Ndah yahn Dendiohs, chenan cumo vo.

² A devano nchuhn te cuahn che metah cotahno ne Dihvo vo Jesucristo ne, ndeva ne yavenañ dehtenduh che nde hua ri rahñ, che ndere redin ihyan dendiohs yahn ye.

³ Nducote nahn che codevano ndah nchuhn ne, chemin che rete cuandé nchuhn che adecoduhno ihyan che cahva ye yahn Dihvo vo Jesucristo ne, ndiyu Vaco Ndah yahn Dendiohs che rihquentiyon ihyan. A namin no tun, adecoduno ihyan che cahma ye che Jesucristo che Dihve ye ne, a Vaco Ndah yahn Dendiohs che rihquentiyon ihyan.

⁴ Van nducoyaco vo ne, ama ndeh nan vederihquentiyon che chenan cumo vo, ate a ama no Vaco Ndah yahn Dendiohs che rete.

⁵ Ama ndeh nan ntiyon che redin nducoyaco vo, ate a ama no Dihvo vo Jesucristo.

⁶ Ama ndeh nan ntiyon chenan cumo vo, ate ama no Dendiohs che redin ye che rinahn nducuahn.

⁷ Queri ama vo ne, rete Dendiohs vederihquentiyon yahn Vaco Ndah yahn ye, chenan cumo vo çava che ndah yahn nducoyaco vo.

⁸ Nahñ vo ne, redin Vaco Ndah yahn ye che rihnde tah vo vederihquentiyon che co cahmo vo numacuahn vededevano.

⁹ Nahñ vo ne, che cotahno vo. Nahñ vo ne, che din vo che ndoyahn ihyan cah.

¹⁰ Nahñ vo ne, che din vo vederihno. Nahñ vo ne, che cuahndudo vo ndudo che te Dendiohs. Nahñ vo ne, che tumacadino vo cha ihyan che quenun Vaco Ndah yahn Dendiohs ihyan, ne cha ye che quenun vaco chihnga ihyan. Nahñ vo ne, che cuahndudo vo tama te o nan devaco. Nahñ vo ne, che co çah cuande vo deh conahn ndudo che cuahndudo ihyan devaco chemin chan.

¹¹ Andahre ama ndeh nan vederihquentiyon chemin chan, ate a ama no Vaco Ndah yahn Dendiohs che rete queri ama vo tunoca che nahn man.

Nducoyaco vo che ritahno vo Dihvo vo Jesucristo ne, ndi vo anduhneca ama no ihyan

¹² Hua ndeh cuañ ndi vo nduco vih, te andahre ama yahn ri vo, ate ndi vo anduhneca ama no ihyan, ndi cuande vo yahn Dihvo vo Jesucristo.

¹³ Tihca, te andahre ihyan nación yahn Israel, o ihyan tama nación uvo, andahre chenan cumo vo dihvo vo, o rihquentiyon man vo uvo ne, ate a ama no Vaco Ndah yahn Dendiohs nedin dama uvo, din che ndo vo anduhneca ama no ihyan, quenun queri ama vo.

¹⁴ Ihyan ne, chenan çah ye man, chenan tah ye man, chenan nducuahn dehtenduh yahn ye man.

15 Andahre che c̄ahma c̄ah ama ihyan: “U ne, hua t̄ah ye u, ne chemin che hua ndi cuandé yahn ye”, ate ndiyu c̄ava chemin che co din vih.

16 Andahre c̄ahma revan ama ihyan: “U ne, hua ndutin̄an ye u, ne chemin che hua ndi cuandé yahn ye”, ate ndiyu c̄ava chemin che co din vih.

17 Ndete che ndutin̄an no ihyan chenān ne, ametah deh nduco che cah-nevan ye. Ndete che revan no ihyan chenān ne, ametah deh nduco che t̄ahno ye.

18 Ate hua tihc̄a, te Dendiohs ne, numa dendah ye ihyan nduhc̄a che nahn m̄an ye.

19 Ndete che dem̄an c̄ah ihyan ne, nde hua cochihve ye.

20 Ate che cūaco ne, andahre ama ndeh n̄an dehtenduh yahn ihyan, ate ama no ye.

21 Hua redin yahn che c̄ahma ndutin̄an ihyan co t̄ah ye: “Hua rendotenán nchuhn.” Namin hua redin yahn che c̄ahma tin ye co c̄ah ye: “Hua rendotenán nchuhn.”

22 Hua redin yahn che tihc̄a, te queri ama ne, rendotenan vih. Nde dehtenduh che rivahn che hua nduh richihve ne, chemin che nde tahque richihve.

23 Dehtenduh che hua nduh rigonun chihve, che rahco vo ne, chemin che tahque ndah redin vo cud̄ado. Namin dehtenduh che hua redin yahn che co ro ne, chemin ne, tahque nduco cud̄ado chenān cumo vo

24 che co dehtenduh chenahn. Tihc̄a chihco cade Dendiohs che tahque din vo cud̄ado dehtenduh yuhn vo che hua nduh rigonun chihve, che rahco vo,

25 c̄ava che, ndotenan che devavih co ne, ama cūan no co, conan vih.

26 Ndete che rechuhrihn ama n̄an dehtenduh yuhn vo ne, rechuhrihn numachahto vo. Namin ndete che yan ama n̄an dehtenduh yuhn vo ne, yan numachahto vo.

27 Namin van nducoyaco vo ne, chenān cumo vo ndeh n̄an vederihquentiyon, ndi vo anduhneca ama no ihyan, ndi cuando vo yahn Dihvo vo Jesucristo.

28 Dendiohs ne, te ye vederihquentiyon yahn queri ama vo. Nahn vo ne, te ye vederihquentiyon che tahque chahte che co vo apóstol. Nahn vo ne, che cuahndudo vo ndudo che te ye. Nahn vo ne, che cacuahn vo Ndudo yahn ye. Namin te ye tama te o n̄an vederihquentiyon nahn vo che hua nduh quenun yan. Nahn vo ne, che co din vo vederihno. Nahn vo ne, che co din vo che ndoyahn ihyan cah. Nahn vo ne, che conan vo chete yaco. Nahn vo ne, che cahcantiyon vo chete yaco. Nahn vo ne, che cuahndudo vo tama te o n̄an devaco.

29 Hua nducoyaco vo va t̄ah vo vederihquentiyon yahn apóstol. Hua nducoyaco vo va t̄ah vo vederihquentiyon che cuahndudo vo ndudo che rete Dendiohs. Hua nducoyaco vo va t̄ah vo vederihquentiyon che cacuahn vo ndudo yahn ye. Hua nducoyaco vo va t̄ah vo vederihquentiyon che din vo vederihno.

30 Hua nducoyaco vo va t̄ah vo vederihquentiyon che co din vo che ndoyahn ihyan cah. Hua nducoyaco vo va t̄ah vo vederihquentiyon che cuahndudo vo tama te o n̄an devaco. Hua nducoyaco vo va t̄ah vo vederihquentiyon che c̄ah cuandé vo deh conahn devaco chemin chan.

31 Ndete che ama nahn cuahtenan cuma nchuhn ama vederihquentiyon chemin chan ne, codin nun ino ne che co cuhnde t̄ah ne vederihquentiyon che tahque cochihve. Ate te cuandé nchuhn tama n̄an che nde tahque nahn che cuahtenan cumo vo.

13

Nahn che cuahtenan cumo vo vedeyahino

¹ Andahre co cuahndudo vo tãma te o nan devaço, andahre devaço yahn ángel, ate ndete che hua chenán cumo vo vedeyahino ne, ndi vo anduhneça tambu man, cu ðan che ndere rahco man.

² Namin andahre rahndudo vo ndudo che rete Dendiohs uvo, andahre ama chenán cumo vo vededevano che nde hua devano ihyan, andahre ama ritahno vo Dendiohs che nde cocha vederihquentiyon che chenán cumo vo che ndacorun ama icoyahn, cuhnde tãma cuan, ate ndete che hua chenán cumo vo vedeyahino ne, nde hua cochihvo vo.

³ Andahre cuihno ndihco vo nducuahñ dehtenduh che va yuhn vo, conan vo ihyan chevah, andahre cañco mendahn vo uvo, cuihno cuco vo, ate ndete che hua chenán cumo vo vedeyahino ne, nde hua cochihve yuhn vo.

⁴ Ndete che chenán cumo vo vedeyahino ne, chahtino vo man, cuno ino vo man, hua din ve vo man, hua din yaðe vo man, hua din cun vo man,

⁵ hua ndere din vo man, hua din idihya vo man, hua ndere co tan vo man, hua cuahtenan ino vo vedecañhva man,

⁶ hua co yeno vo yahn ihyan che rendihco ye nunde man. Tahque ndah ne, cuahtenan cumo vo vedeyahino. Tuhme co yeno vo yahn ndudo cuaço,

⁷ ne yahn nducuahñ dehtenduh ne, nevahñecun vo man, din chahtino vo man, cuahtenan ino vo man.

⁸ Nða ro che cuihno vederihquentiyon che cuahndudo vo ndudo che rete Dendiohs man, che cuahndudo vo tãma te o nan devaço man, che cuahtenan cumo vo vededevano man, ate vedeyahino ne, hua cuihno.

⁹ Va che cuihno nducuahñ vederihquentiyon chemin chan, te hua numa. Hua numa vededevano che chenán cumo vo man, hua numa rahndudo vo ndudo che rete Dendiohs man.

¹⁰ Ate cuahn che ndaño caðe Dendiohs vederihquentiyon che numa ne, cuihno che hua numa.

¹¹ Cuahn che cañya uvo ne, rente vo man, rendedecadino vo man, renahn vo man, nduhça checañya. Ate cuahn che chi ndico vo ne, chihcoman vo nduhça che redin checañya.

¹² Tihça, te man ro cuh ne, anduhneça ndete che ama cheh ro dehtenduh man, hua ndah renahn vo man. Ate nda ro min ne, nduhça che rendihche ndah Dendiohs uvo ne, tihça conahn ndah vo yahn nducuahñ dehtenduh.

¹³ Nducote tihça ne, va che quendi vo ino nan vederihquentiyon. Ama ne, che cotahno vo. Tãma ne, che cuahtenan ino vo. Tãma ne, che cuahtenan cumo vo vedeyahino. Me che cuahtenan cumo vo vedeyahino ne, chemin che tahque rigonun chihve che co vederihquentiyon chenahn.

14

Vederihquentiyon che co cuahndudo vo tãma te o nan devaço

¹ Codin nun ino nchuhn che cuahtenan cuma ne vedeyahino, namin che cuahtenan cuma ne vederihquentiyon yahn Vaco Ndah yahn Dendiohs, menan vihca che cuahndudo ne ndudo che rete ye.

² Chemin che tahque nahn, te cuahn che redin Vaco Ndah yahn Dendiohs che rahndudo ihyan tãma te o nan devaço ne, atenan Dendiohs renahn ye.

³ Ate che rahndudo ye ndudo che rete Dendiohs ne, richihve yahn nducoyaço vo, redin che tahque numa ino vo ritahno vo Dihvo vo Jesucristo man, necañ yan chedave yuhn vo man.

⁴ Che rahndudo ihyan tama te o ñan devaço che hua renahn vo ne, atenan cava man ye richihve. Ate che rahndudo ye ndudo che rete Dendiohs ne, richihve cava nducoyaco vo che ritahno vo Dihvo vo Jesucristo.

⁵ Ama ndahca ndete che nducoyaca nchuhn cuahtenan cuma ne vederihquentiyon che cuahndudo ne tama te o ñan devaço. Ate tahque ndahca ndete che cuahtenan cuma ne vederihquentiyon che cuahndudo ne ndudo che rete Dendiohs, te vederihquentiyon min ne, tahque rigonun chihve che co vederihquentiyon che rahndudo ihyan tama te o ñan devaço, atenan ndete che vate ihyan che te cuande ye uvo deh conahn devaço chemin chan.

⁶ Dihno, nducote tihca ne, hua cochihve yahn nchuhn ndete che chi cuahndudo tama te o ñan devaço che hua conahn ne. Atenan che cuahndudo ndudo che te Dendiohs, o cacuahñ nchuhn Ndudo yahn ye, tuhme cochihve yahn ne.

⁷ Anduhneca cu retive man, arpa man, che ihyan va che tive ye man, cuh ye man ne, ndete che a ndere cuah cuaco, o a ndere cuahco che hua nduco yuhno ne, nde hua cochihve.

⁸ A namin no tun van canda ne, ndete che a ndere cuah cuaco corneta ne, hua conahn sandado yuhno yahn, ne nde ama se hua cuahteyan se che cuhma se.

⁹ A chemin no cuahno co nchuhn ndete che cuahndudo ne deman devaço che hua conahn ne. A ndere cuahndudo ne devan yuhne.

¹⁰ Cuaco te ama ndeh ñan devaço va iyehñse, ne ihyan che rente ye devaço chemin chan ne, renahn ye yahn vih.

¹¹ Ndete che cahmo vo devaço yuhn vo nduco ihyan tama naciòn ne, hua conahn ye. Namin ndete che cahma ye devaço yahn ye nduco vo ne, hua conahn vo.

¹² Tihca hua cochihve yuhn vo che cahmo vo ndudo che hua conahn vo. Ama ndahca che ama nahn cuahtenan cuma nchuhn vederihquentiyon yahn Vaco Ndah yahn Dendiohs, ate codin nun ino ne che cuahtenan cuma ne vederihquentiyon che din che nducoyaca nchuhn, ihyan ndiyaco ne, tahque numa ino ne cotahno ne Dihvo vo Jesucristo.

¹³ Dihno vo che cuahndudo ye tama ñan devaço che hua conahn nchuhn ne, nahn che caca ye Dendiohs che conahn ye, ne co te cuande ye nchuhn yahn ndudo che cuahndudo ye.

¹⁴ Tihca, te ndete che covah vo nduco tama ñan devaço che hua renahn vo ne, anduhneca ndete che vaco vo che revah, ate man vo hua renahn vo.

¹⁵ Nducote tihca ne, nahn che covah vo nduco devaço che hua renahn vo, ate namin nahn che covah vo nduco devaço che renahn vo. Nahn che cato vo nduco devaço che hua renahn vo, ate namin nahn che cato vo nduco devaço che renahn vo.

¹⁶ Ndete che necah vo nundihve cuahn Dendiohs nduco tama ñan devaço che hua renahn ihyan che nduco ye uvo ne, hua necah ihyan chahn nundihve cuahn Dendiohs dama nduco vo, te hua devano ye deh che revah vo.

¹⁷ Cuaco te numa ino vo co necah vo nundihve cuahn Dendiohs nduco tama ñan devaço. Ate nducote hua conahn dihno vo che nduco ye uvo ne, hua co din che tahque numa ino ye quendi ye cotahno ye Dihvo vo Jesucristo.

¹⁸ Nchuhn ne, chenan cuma ne vederihquentiyon che rahndudo ne tama te o ñan devaço. Namin u ne, quenan cumá vederihquentiyon min, ne renecañ nundihve cuahn Dendiohs che tahque yudo vederihquentiyon min yahn che co yahn nducoyaca nchuhn.

¹⁹ Ate cuahn che quenún chete yaco van dihno vo ne, tahque nahn che cuahndudo mare uhn ndudo che co conahn ye che co che cuahndudo ndiche mil ndudo ama devaço che hua conahn ye.

²⁰ Dihno, hua co nchuhn nduhca checahya nan vederendedecadino yahn ne. Co ne nduhca checahya nan dehtenduh che chihnga, hua cuahtendihco ne nunde. Ate nan vederendedecadino yahn ne ne, co ne nduhca ihyan ndico.

²¹ Nan Ndudo yahn Dihvo vo Dendiohs ne, ndirun tuhca: “Dechuh ihyan tama naci6n, cuahndudo ye ndudo yahn nduco devaco yahn man ye, cahnevan ihyan naci6n cuh. Ate nde nduco nduh ne, hua nevahnevan ye u.”

²² Nducote tihca ne, devano vo te vederihquentiyon che cuahndudo ihyan tama nan devaco ne, a cava ihyan che hua ritahno ye che chihco cade Dendiohs, ndiyu cava ihyan che ritahno ye. Ate vederihquentiyon che rahndudo ihyan ndudo che rete Dendiohs ne, a cava ihyan che ritahno ye che chihco cade ye, ndiyu cava ihyan che hua ritahno ye.

²³ Chemin che ndete che ihyan che hua ritahno ye Dihvo vo Jesucristo nda ye chete yaco, ne ura min vari ne rahndudo nducoyaca ne damandahn tama te o nan devaco ne, ndedecadino ye che luco ne.

²⁴ Ate ndete che ura che nda ye rahndudo ne ndudo che rete Dendiohs ne, conahn ye, ne ndo ino ye,

²⁵ tumacadino ye che quendihco ye nunde nan Dendiohs. Tuhme nuacuahn vedenevan nto ino ye nunde yahn ye, ndeva ye yavenan Dendiohs. Cuacotuh ye ndudo che cuaco niyon che quenun Dendiohs van nchuhn.

²⁶ Dihno, tuhme ne, cuahn che ndo dama nchuhn yaco ne, codinahn ne adecochano vederihquentiyon che nte Dendiohs nchuhn, a che cata ne salmo, a che cacuahn ne Ndudo yahn ye, a che cuahndudo ne ndudo che rete ye, a che cuahndudo ne tama te o nan devaco, a che cah cuande ne deh conahn devaco chemin chan. Ate codin ne cuande che nan nducuahn dehtenduh che din ne ne, cochihve yahn nducoyaca ne cava che tahque numa ino ne quendi ne cotahno ne Dihvo vo Jesucristo.

²⁷ Cuahn che cuahndudo nchuhn tama te o nan devaco ne, hua damandahn cuahndudo nducoyaca ne, te ca ama ca ama ne cuahndudo ne. Avane ne, queri ama yune che ndo dama ne ne, co cuahndudo ama o ne, atenan cuahn ne, ino ne. Ate va che cah cuande ama cha nchuhn deh conahn devaco chemin chan.

²⁸ Ate ndete che ametah duh che te cuande ne, tahque ndah che cahma queri ama nchuhn chete chedave yahn ne, cahnevan Dendiohs, che co che cuahndudo ne van ihyan.

²⁹ Namin ihyan che chenah cuma ye vederihquentiyon che rahndudo ye ndudo che rete Dendiohs ne, queri ama yune che ndo dama ye ne, atenan o ino ye co cuahndudo ye, ne combiero yahn ye ne, va che cahcovan ye, din ye cudado vederihquentiyon min.

³⁰ Ndete che denan cah Dendiohs ndudo che cuahndudo tama ye ne, ihyan che a quendihco mendahn rahndudo ye ne, nguan ye cuahndudo ye, cuahnevan ye che cuahndudo combiero yahn ye.

³¹ Hua redin yahn che damandahn cuahndudo nchuhn, te co cuahtenan rino vih ne, cuahndudo ca ama ca ama ne cava che co conahn nducoyaca ihyan ndiyaco, ne cuahtenan ino ye.

³² Co cuahtenan rino vih ne, te andahre vederihquentiyon che chenah cuma ne redin che rahndudo ne, ate co cahcantiyon man ne, ne cuahndudo ne ura che redin yahn.

³³ Tihca, te Dendiohs ne, runecade ye, ne runecade nducuahn vederihquentiyon yahn ye.

Nduhca che va cade nduh cuan yaco nan che rendo dama ihyan yahn Dendiohs ne,

³⁴ hua redin yahn che cuahndudo ihyan ndahta. Tahque ndah ye ne, nevahncun ye nduhca che rihquentiyon ley che dirun Moisés.

³⁵ Ndete che va deh che tumerune ye ne, ndevaco ye tumerune ye inchahn ye, te hua redin yahn che tumerune ye chete yaco.

³⁶ Cuedevano nchuhn, te Ndudo yahn Dendiohs ne, ndiyu nduco nchuhn canan, nde ndiyu deman cava nchuhn che va.

³⁷ Adecochano nchuhn che rahco ne che quenan cuma ne vederihquentiyon che rahndudo ne ndudo che rete Dendiohs, o tama nan vederihquentiyon yahn Vaco Ndah yahn ye ne, ndete che cuaco ne, conahn ne che a Dihvo vo Jesucristo chihquentiyon ye che tihca dirun.

³⁸ Ate adecoduhno ihyan che hua nevahncun ye ne, hua nevahncun nchuhn ihyan.

³⁹ Dihno, man ne, codin nun ino nchuhn che cuahtenan cuma ne vederihquentiyon che cuahndudo ne ndudo che rete Dendiohs. Namin hua cahca tan ne yahn vederihquentiyon che chenana cuma dihno vo che rahndudo ye tama te o nan devaco.

⁴⁰ Nahn che rucacade ne nan nducuah che redin ne. Ca ama ca ama ne cuahndudo ne.

15

Dihvo vo Jesucristo ne, ntuche ye van tenahn

¹ Dihno, namin nahn che ndedecadino nchuhn yahn ndudo ndah yahn Dihvo vo Jesucristo che cahndudo, chihnevan ne. Nevahncun ne ndudo min, ne nde meniyon riquendi ne ritahno ne ihyan.

² Ndete che numa cuaco chitahno ne nduhca che cahndudo man, quendi ne dinahn ne man ne, din ndudo min che ndevahn ne.

³ Dendiohs ne, te ye checadino vederihquentiyon yahn ye che tahque menan vihca, ne cahndudo, chihnevan nchuhn. Vederihquentiyon min ne, che chih Dihvo vo Jesucristo cava nunde yuhn vo nduhca che a ndirun nan Ndudo yahn Dendiohs.

⁴ Chihno ino ro che cheche ye ne, ntuche ye nduhca che a ndirun nan Ndudo yahn Dendiohs.

⁵ Cuahn che a ntuche ye ne, chihnde ro ye nan Pedro. Chihno min ne, chihnde ro ye nan nduh che ndichiana apostol yahn ye.

⁶ Adiva ne, nchuh ca uhn ciento dihno vo che ndi dama ye ne, ndihchero ye ihyan. Nahn ihyan chahn ne, a chih ye, ne nahn ye ne, vate ca ye nde meniyon.

⁷ Tah cuahn adiva ne, ndihchero Jacobo ihyan. Chihno min ne, ndihchero nducoyaca ihyan apostol ihyan.

⁸ Nde nan che chihnonan yahn ne, chihnde ro ye nan. U che nde hua redin yahn che din yahn ye u ne, namin ndihchero ihyan.

⁹ Van nducoyaca ihyan apostol ne, u che tahque hua rignonun chihve. Nde hua redin yahn che co apostol, te din tan nduco ihyan yahn Dendiohs che ritahno ye Dihvo vo Jesucristo.

¹⁰ Ate din yahino Dendiohs u, ne ndedevahn ye u, te ye vederihquentiyon quenana cuma. Ama chichihve che din yahino ye u, te u che tahque din ntiyon yahn ye che co nducoyaca ihyan apostol chenhahn. Ate ndiyu nduco vededevano yahn man che din ntiyon yahn ye, te numacuahn vedeyahino chinan man ye u.

11 Nducote a ntuche Dihvo vo Jesucristo vān tenahn ne, u mān, ihyān apóstol chenahn mān, a ndudo min che rahndudo nducoyāca nuhn. Me nchuhn ne, a chihnevan ne ndudo min, chitahno ne.

Tenahn ne, va che ntuche ye

12 Nducote a ntuche Dihvo vo Jesucristo, chacotuhn nuhn ndudo yahn ne, hua ndahca redin āma o ihyān vān nchuhn che vatechica ye rahndudo ye che tenahn ne, hua ntuche ye.

13 Ndere rāhn ye chemin, te Dihvo vo Jesucristo ne, cuāco niyon che ntuche ye.

14 Andahre tihca rāhn ihyān chahn, ate richihve ndudo che rahndudo nuhn, namin cochihve yahn nchuhn che chitahno ne, te Dihvo vo Jesucristo ne, a ntuche ye.

15 Numa cuāco rahndudo nuhn Ndudo yahn Dendiohs che ndedetuhche ye Dihvo vo Jesucristo. Me ihyān chahn che rāhn ye che hua ntuche tenahn ne, nahn conahn che nde Dihvo vo Jesucristo ne, hua ntuche ye.

16 Ate Dihvo vo Jesucristo ne, cuāco niyon che ntuche ye. Namin quenān cuma che ntuche tenahn.

17 Che rāhn ihyān chahn che metah vederihquentiyon che ntuche tenahn ne, nahn conahn che hua ntuche Dihvo vo Jesucristo mān, hua chichihve yahn ne che chitahno ne ihyān mān, nde hua ndāca ne vederenchahco cava nunde yahn ne mān.

18 Che lādo yahn ihyān chahn ne, tenahn che chitahno ye Dihvo vo Jesucristo ne, āma yune no chihnonān yahn ye.

19 Vān nducoyāca ihyān ne, uvo che tahque ndah ro yuhn vo, te ritahno vo Dihvo vo Jesucristo, ne quenān cuma che ntuche vo.

20 Menān vihca ne, ndedetuhche Dendiohs Dihvo vo Jesucristo. Namin quenān cuma che ndedetuhche ye nducoyāca tenahn che chitahno ye ihyān,

21 te nduhca che cava āma ihyān chihnde vederih ne, tihca cava tama ihyān ne, chihnde cade che ntuche tenahn.

22 Tihca, te che chih Adān ne, quenān cuma che coh nducoyāca ihyān. Namin che ntuche Dihvo vo Jesucristo ne, quenān cuma che ntuche nducoyāca ihyān yahn ye.

23 Ihyān ne, a va cade ro che ntuche ye. Menān vihca ntuche Dihvo vo Jesucristo, ne cuahn che ndaconān chi tun ye ne, tuhme ntuche nducoyāca ihyān yahn ye.

24 Chihno min ne, va che nto iyehñse, decuihno Dihvo vo Jesucristo nducuahn vederihquentiyon che rahcotāhn yahn ye, ne ndāhco ye vederihquentiyon yahn ye tah Dendiohs Chida.

25 Tihca, te Dihvo vo Jesucristo ne, va che quendi ye cahcantiyon ye nde conān ndāhco ndiya Dendiohs nducoyāca ihyān che hua ri rendihche ye ihyān cava che nevahñecun ihyān chahn ihyān.

26 Nde nān che cuihnonān yahn ne, decuihno Dihvo vo Jesucristo vederih.

27 Tihca va che co, te a ndirun nān Ndudo yahn Dendiohs che ndāhco Dendiohs nducuahn vederihquentiyon tah ye. Che tihca ndirun che ndāhco Dendiohs vederihquentiyon tah Dihvo vo Jesucristo ne, nahn conān che mān ye ndinān ye, hua chuhñān Dihvo vo ihyān.

28 Dihvo vo Jesucristo, ihyān min che Daya Dendiohs ne, nuhñde tah ye nducuahn vederihquentiyon, ne nevahñecun ye Chida ye Dendiohs. Cahco ro mān ye che ihyān min che ndāhco ye vederihquentiyon tah ye mān, ihyān min che ndinān ye mān.

²⁹ Me ihyan che redenune ye çava tenahn yahn ye ne, ça ndiyu che chenan ino ye che ntuche ihyan chahn che tihça redin ye? Ndete che hua quenan cuma che ntuche tenahn ne, co nde hua tihça din ye.

³⁰ Ndete che hua va che ntuche tenahn ne, nde hua redin yahn che çahco mendahn nuhn nuhn, din tan ihyan nduco nuhn.

³¹ Dihno, nduhça che çuaco che ama yenó che chitahno nchuhn Dihvo vo Jesucristo ne, tihça ndudo çuaco che ndihco mendahn u, redin tan ihyan nducó.

³² Muhñ yan Efeso ne, anduhneca ndete che van ite tan quenún. Ndete che hua çuaco che va che ntuche tenahn ne, nde hua çahquinó çahco mendahn u tihça. Tahque ndah ne, cochicá vedeyeno yahn man, chéh man, cúh man, te caviyan deman ne, va che coh.

³³ Hua cahnceh man ne nchuhn, ndedecadino ne che hua dehva co yahn ne che dama co ne nduco ihyan nunde, te co nino ne, ne quendi ne yune yahn ye.

³⁴ Condedecadino nchuhn, ne runecade cuahtenan ne, hua cuahtendihco ne nunde. Redin yahn che tihça yahvé nchuhn, te nde van nchuhn ne, vate ca ihyan che hua renahn ye vederihquentiyon yahn Dendiohs, ne chemin ne, ama vedecuihno çava ne.

Nduhça che va che nutuche tenahn

³⁵ Co vate ama o nchuhn che tumerune ne, çtaça ntuche tenahn? ÇTaçá ndo numa ye ne?

³⁶ Ama tundo ihyan che tihça tumerune ye. A devano ye te cuahn che rihcho vo ama ndute ndata ne, riquendah yan, ne rihta, ate man ndute ndata ne, recha.

³⁷ Che rihcho vo trigo, o tama nan ndute ndata ne, cuahn che riquendah ne, ametah dama nduco ndute ndata che chihcho vo.

³⁸ Redin Dendiohs che rihta tunoca ndata yahn nduhça che a ndihco çade ye.

³⁹ Nducuahñ che dendah Dendiohs ne, hua dama nduco vih. Vate ihyan man, vate ite che cun çah te man, vate yahda man, vate yahca man, ne queri ama ne, a vih vih chan.

⁴⁰ Namin che chenan nan ro nduco che va ndiyahn ne, hua dama nduco vih. Ndahchan nduh che o nan, ate queri ama ne, a vih vih chan.

⁴¹ Dave yahn yahn man, dave yahn iyo man, dave yahn iyon man ne, hua dama. Nde iyon ne, hua dama dave yahn nduco vih.

⁴² Atihnocá vederihquentiyon che ntuche tenahn, te cuahn che ntuche ye ne, a ntacorun ye, ametah dama ye nduhchan ye cuahn che chahtenan ye ihyense. Che rehche ihyan ne, ndih ye, ate che ntuche ye ne, ametah ndaconan coh ye.

⁴³ Che rehche ye ne, ndih ye, ate che ntuche ye ne, ama ndahchan ye. Che rehche ye ne, ndih ye, ate che ntuche ye ne, defino ye.

⁴⁴ Che rehche ye ne, ihyan iyehñse ye, ate che ntuche ye ne, ndacorun ye, co ye ihyan yahn vahchetero, cuahtenan cuma ye vederihquentiyon yahn Vaco Ndah yahn Dendiohs. Vate ihyan iyehñse; namin vate ihyan yahn vahchetero.

⁴⁵ Tihça, nduhça che a ndirun nan Ndudo yahn Dendiohs tuhça: “Van ihyan iyehñse ne, menan vihca dendah Dendiohs Adán.” Adivo yahn ihyan min ne, ndá tama ihyan ndinan che a nahn dama nduhça ihyan min, chica ye vahchetero, chihco ye vederihquentiyon che va che ntuche ihyan yahn ye.

⁴⁶ Man ro cuh ne, ihyan iyehñse uvo, ate caviyan deman ne, ndacondá vo ihyan yahn vahchetero.

⁴⁷ Adán me ne, ihyan iyehñse ye, dendah Dendiohs ihyan nduco yuniyahn. Adivé yahn ihyan min ne, ndá Dihvo vo Jesucristo, ihyan min che ch́ca ye vahchetero.

⁴⁸⁻⁴⁹ Nduhçá che ðama vo nduco ihyan che dendah Dendiohs nduco yuniyahn me ne, tihçá ðama co vo nduco ihyan che ch́ca ye vahchetero me.

⁵⁰ Dihno, ráhn rí nchuhn te numanahn che metah ndacorun ihyan iyehñse ne, hua co cuahtenan ye vahchetero nan che rihquentiyon Dendiohs. Hua co ye min nduhchan ye man ro cuh. Ihyan che va che coh ye ne, hua co cuahtenan ye min nan che ametah ndaconan coh ihyan.

⁵¹ Namin nte cuandé nchuhn ama ndudo che cade te Dendiohs checadino vo. Hua nducoyaco vo va che coh vo, ate nducoyaco vo ne, va che ndacorun vo

⁵² venchahteno nduhçá che riya cuah. Tihçá va che co ro min cuahn che cuah corneta nan cuihnonan yahn. Ura che cuah corneta me ne, ntuche tenahn, metah ndaconan coh ye, ne ihyan che vate ca ye ro min ne, ndacorun ye.

⁵³ Va che ndacorun ye, te ihyan ne, hua rengu ye, ne quenán cuma che ndacondá ye ihyan che ngu ye cuahn ðama. Namin ihyan ne, rih ye, ne quenán cuma che ndacondá ye ihyan che metah ndaconan coh ye.

⁵⁴ Cuahn che a ndo vo ihyan che rengu ye, che metah ndaconan coh ye ne, tuhme conahn nduhçá che a ndirun nan Ndudo yahn Dendiohs tuhçá: "Vederih ne, cuihno. Ametah ndaconan coh ihyan."

⁵⁵ Vederihquentiyon min ne, cuihno. Ametah deh cuande che vah vo. Ametah dehva co yuhn vo.

⁵⁶ Che numacuahn vedeyah rih ihyan ne, chihnde çava nunde yahn ye. A ley yahn Dendiohs che dito yahn vederihquentiyon min.

⁵⁷ Nundihve cuahn Dendiohs che dechuh ye Dihvo vo Jesucristo, ndedevahn ye uvo tah vederih.

⁵⁸ Dihno che yahinó nchuhn ne, nducote va che ntuche vo ne, chemin che cuiquendi ne numa ino ne codin ne ntiyon yahn Dihvo vo Jesucristo. A devano ne te ntiyon che redin ne yahn ye ne, cochihve.

16

Vedino che chi ðama çava ihyan yahn Dendiohs che vate ye yan Jerusalén

¹ Me yahn vedino che co ðama çava ihyan yahn Dendiohs ne, codin ðama nchuhn anduhçá che chihquentiyón nduh çan yaco, yahn yahn Galacia.

² Ndate ndate domingo ne, cuihco vih queri ama nchuhn tume nduhva che tuno tah ne, çava che hua nde ro che ndá, nedin ðama ne vedino min.

³ Cuahn che ndá ne, ihyan che tendahnun nchuhn ne, dechúh ihyan yan Jerusalén. Dirún çaca, quenda ye nduco vedino yahn ne, necah ye dihno vo che vate ye min.

⁴ Ndete che va che çahn man ne, çahn nuhn ðama nduco vih.

Nte çade Pablo ti nduh nan che va che çahn ye

⁵ Dinoca çahn quendihcheró dihno vo che vate ye yahn yahn Macedonia, tuhme chí quendihcheró nchuhn.

⁶ Ndete che co ne, conán nduco nchuhn ama o iyo, o ndete che co ne, conán numacuahn ro iche. Tuhme co conan nchuhn u adecotino che va che çahn.

⁷ Tihçá, te hua náhn che atenan ama o ro no conán nduco nchuhn. Ndete che te yune Dendiohs ne, náhn che rahn conán nduco ne.

⁸ Ate conan cá muhn yān Efeso nde ndā vihco yahn Pentecostés,

⁹ te āma va ntiyon yahn Dihvo vo Jesucristo che redin mān, āma yāhn ihyan che rahcotāhn ye mān.

¹⁰ Cuahn che ndā Timoteo ne, cuenevahnecon nchuhn sahn cava che conan se numacuahn vedeyeno, te sahn min ne, redin se ntiyon yahn Dihvo vo Jesucristo nduhcā u.

¹¹ Hua ducherino ne, ndihchero ne sahn. Tahque ndah ne, conan ne sahn cava che va mān ino se ndāca che chuhnun se che conun yune se, te quenan rinó sahn nduco dihno vo chenāhn.

¹² Me dihno vo Apolos ne, āma chica favor sahn che chi se nduco dihno vo chenāhn, quendihchero se nchuhn, ate hua cahnecon se. Atenān cuahn che conun yahn se, chi se.

Renecāh Pāblo Dendiohs dihno vo che vate ye yān Corinto

¹³ Cuiquendi nchuhn numa ino ne cotahno ne Dihvo vo Jesucristo mān, cuahteyān ne mān, cuan dito ne mān.

¹⁴ Nducuahn che din ne ne, codin ne numacuahn vedeyahino.

¹⁵ Dihno, a devano nchuhn te vān ihyan che vate ye yāhn yahn Acaya ne, Estéfanās nduco ihyan ndevāco ye menān ndita chitahno ye ndudo ndah yahn Dihvo vo Jesucristo. Namin a devano ne te redinahñ ihyan chahn vederihquentiyon che rinan ye ihyan yahn Dendiohs.

¹⁶ Cuiquendi nchuhn yune yahn ihyan chahn, codinahñ ne nduhcā che redinahñ nducoyāca ihyan che redin ye ntiyon yahn Dihvo vo Jesucristo mān, rinan ye ihyan yahn ye mān.

¹⁷ Ama yenó che ndā Estéfanās mān, Fortunato mān, Acaico mān, te anduhñecā ndete che nchuhn ndā ne.

¹⁸ Necāh yān ye chedave yāhn mān, nchuhn mān. Nahn che ntumanecun ne nducoyāca ihyan che nduhcā ihyan chahn.

¹⁹ Numacuahn vedeyahino yahn Dihvo vo Jesucristo cuendeva nchuhn Dendiohs yahn nducoyāca dihno vo che vate ye yāhn yahn Asia, Aquila mān, Priscila mān, nduco nducoyāca dihno vo che rendo dama ye vāco ye.

²⁰ Cuendeva ne Dendiohs yahn nducoyāca dihno vo che vate ye muhn. Numacuahn vedino vedenecon cuenecāh ne Dendiohs vih.

²¹ U Pāblo, dirun mān āma o ndudo yahn ne, renté Dendiohs nchuhn.

²² Cochi Dihvo vo Jesucristo. Adecoduhno ihyan che hua din yahino ye ihyan min ne, conda ye, co ye castigo yahn Dendiohs.

²³ Yahñ min ne, din yahino ye nchuhn.

²⁴ Me u ne, āma yahinó nducoyāca nchuhn che ritahno ne ihyan. Tihcā co.

CACA CHE DIRUN SAN PABLO ADIVE, DECHUH YE YAHN IHYAN YAHN DENDIOHS CHE VATE YE YAN CORINTO

¹ U Pabło, che tendahnun Dendiohs u che ndi apóstol yahn Dihvo vo Jesucristo ne, dirún caca cuh nduco dihno vo Timoteo, dechuh nuhn yahn nchuhn, ihyan yahn Dendiohs che vate ne yan Corinto man, numachahte yahn yahn Acaya man.

² Chido vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Nduhca che chuhrihn Pabło

³ Ndeva vo yavanan Dendiohs, Chida Dihvo vo Jesucristo, ihyan min che yahino ye uvo man, renecah yan ye chedave yuhn vo man.

⁴ Cuahn che yah rahno nuhn ne, a ihyan min che renecah yan ye chedave yahn nuhn. Tihca redin ye, cava che, nduhca che renecah yan ye chedave yahn nuhn ne, tihca co necah yan nuhn chedave yahn ihyan che yah rahno ye.

⁵ Co necah yan nuhn chedave yahn ye, te nduhca che ama rechuhrihn man nuhn nah cuan, yahn che ritahno nuhn Dihvo vo Jesucristo ne, tihca rete ndahva ye vedechahtino yahn nuhn, retihyon yune ye nuhn che necah nuhn vedechahtino ihyan chenhahn.

⁶ Nan rechuhrihn nuhn man, nan rendaqa nuhn vedechahtino man, chemin ne, cava che ndaca yune che necah yan ne chedave yahn ne, ndevahn ne. Cuahn che chuhrihn ne nduhca che rechuhrihn nuhn ne, co ndaca ne vedechahtino, cocha ne.

⁷ Hua dehve rahco nuhn, te a devano nuhn te cuahn che rechuhrihn nchuhn nduhca che rechuhrihn nuhn ne, namin rendaqa ne vedechahtino nduhca nuhn.

⁸ Dihno nuhn, man ne, nahn nuhn che cadino nchuhn nduhca che ama chuhrihn nuhn min yahn yahn Asia. Ama yah chahno nuhn nde a dihya nun ino nuhn chi. Co ametah ndevahn nuhn, che rahco nuhn.

⁹ A chihco dama ino nuhn nduhca che rihco dama ino ihyan che a devano ye che va che coh ye. Ate chichihve yahn nuhn cava che ndotenan che cochahtino nuhn man nuhn ne, cochahtino nuhn Dendiohs, ihyan min che rendedetuhche ye tenahn.

¹⁰ A ihyan min che ndedevahn ye nuhn ro min che a vate nuhn tah vederih. Riquendi ye rendedevahn ye nuhn nde meniyan, ne chenan ino nuhn ihyan che ndedevahn ye nuhn caviyan deman.

¹¹ Nahn che covah nchuhn man, covah ama yahn dihno vo man, cava che conan Dendiohs nuhn. Tuhme tumacadino ama yahn ihyan che yahino Dendiohs nuhn, ne necah ye nundihve cuahn ihyan.

Rahn Pabło deh cuande che hua nda nun ye yan Corinto

¹² Yeno nuhn che hua o nan o chende nuhn man, che runecaqe chahtechica nuhn nan ihyan nunde man, menan vihca nan nchuhn man. Chi chahtechica nuhn tihca, te chinan Dendiohs nuhn. Ndiyu nduco vededevano yahn man nuhn che tihca din nuhn, te a Dendiohs che chinan ye nuhn.

¹³⁻¹⁴ Hua o nan o chende nuhn, te nducahn che redirun nuhn yahn ne ne, numa cuaco, ne a man ne conahn ne ura che ndihchenan ne. Nduhca che a renahn ne tah ne, chenan ino nuhn che conan conahn ndah ne, cava

che cuahn che ndaconan chi tun Dihvo vo Jesucristo ne, co yeno nuhn çava nchuhn, ne namin nchuhn ne, co yeno ne çava nuhn.

¹⁵⁻¹⁶ Nducote a devanó che renevahnecon nchuhn u ne, chihco çadé che cuahn che çahn yahn yahn Macedonia ne, dinoca nchuhn, chúh quendiheró nchuhn, çava che cuahn che ndaconán ne, co o yune quendiheró nchuhn. Tuhme conan nchuhn u che çahn yahn yahn Judea.

¹⁷ Andahre hua chi nduhça che chihco çadé, ate hua co çahma nchuhn che o ndudo dín, nde huane che ndi ninó costumbre mín.

¹⁸ A devano cuço Dendiohs te nuhn ne, hua o ndudo redin nuhn nan nchuhn,

¹⁹ te u man, Silas man, Timoteo man, cahndudo nuhn ndudo yahn Dihvo vo Jesucristo, ihyan mín che Daya Dendiohs. Ihyan mín ne, ama ndudo redin no ye, riquendaç cuço nducuahñ che rañ ye.

²⁰ Cuço ndudo yahn ye, te redin ye che rinahn nducuahñ ndudo che chihco çade Dendiohs. Chemin che cuahn che rendeva vo yavenan Dendiohs che cuande yahn vederihquentiyon yahn ihyan mín ne, riñco ro vo che yeno vo che ndaça redinahn ye.

²¹ A Dendiohs che tendahnun ye uvo, ne redin ye che riquendi vo numa ino vo ritahno vo Dihvo vo Jesucristo.

²² Man ye chihco vih ye uvo, nedin yahn ye uvo. Namin dín ye che quenun Vaco Ndaç yahn ye uvo, chihco ro ye che ndeva ye uvo.

²³ Yahn che renan vañinó nchuhn ne, chemin che quenan rino cá che metah chí yan vaço ne. Nde muhn nde nan Dendiohs ne, cuço che rañ.

²⁴ Nuhn ne, ndiyu che nahn çahcantiyon nuhn nchuhn nan che ritahno ne Dihvo vo Jesucristo, te a ritahno ne ihyan numa ino ne. Che redin nuhn ne, che rinan nuhn nchuhn çava che tahque co yeno ne.

2

¹ Chihco ðama inó che hua chi nún yan vaço nchuhn, te a devanó te ndete che chi nún ne, va che dín castigo nchuhn, co ran ne.

² Ndete che dín che co ran ne, nducote a nchuhn che va che din ne che co yenó ne, hua codin ne, yahn che ran ne.

³ Chemin che tahque ndah ne, dirun nó yahn nchuhn çava che, ndotenan che din ne che co ran ne, din ne che co yenó, te a devano cuácó te ndete che co yenó, namin nchuhn ne, co yeno ne.

⁴ Hua náhn che co ran ne, ne chemin che cuahn che dirún yahn ne ne, ama chi ndaçhé che ndedecadinó çava ne, nde chacó, te náhn che tumacadino ne che ama yahinó nchuhn.

Nchahco Pablo yahn ama sañ che nto ino se nunde yahn se

⁵ Me sañ che quendiñco nunde me ne, din se che chi ran vo. Ate che laço yahn ne, anduhneça ndete che nde hua chi ran. A nchuhn no che chi ran ne tah. Tihça rañ, te hua náhn che a ama yune decuihta nduh vo nunde yahn se.

⁶ A ndo ðama nducoyaça nchuhn, din ne castigo sañ, ne nduco chemin ne, a va.

⁷ Man ne, tahque ndah che nchahco nchuhn yahn se, neçañ yan ne chedave yahn se, che co che cuacondaç vedame ne sañ, çava che hua chuñnan cuahn co ndaçhe se.

⁸ Chemin che ricá favor nchuhn che ndaconan ne ndo yan ne nduco se, din yahino ne sañ.

⁹ Dirún yahn nchuhn menan çava che techecađe ne yahn sahn min, te nahn ndihchenán nchuhn ndete che renevahnecun ne che rihquentiyón.

¹⁰ Adecoduhno ihyan che nchahco nchuhn yahn ye ne, namin u ne, nchahcó yahn ye. Me sahn min ne, ndiyu che ama quendihco se nunde nán, ate çava che ndah yahn nchuhn, numacuahn vederihquentiyon yahn Dihvo vo Jesucristo ne, a nchahcó yahn se.

¹¹ Tihça va che din vo, te a devano vo te ama mayon chundah, quechica se rihnceh se, ne hua ndahça che çah yune vo che din duche yahn se uvo.

Ama ndedecadino Pablo, nda ye yan Troas

¹² Cuahn che ndá yan Troas çava che cuahndudó ndudo ndah yahn Dihvo vo Jesucristo ne, andahre ama ndahça çava che din ntiyon yahn ye min,

¹³ ate nducote hua ntacă dihno vo Tito ne, hua chihndeman inó. Chemin che chihcomán dihno vo che vate ye min, ne cuahn yahn yahn Macedonia.

Dendiohs ne, reneçah yan ye chedave yahn ihyan che ritahno ye Dihvo vo Jesucristo

¹⁴ Ndeva vo yavenan Dendiohs, ihyan min che cuahn dama reneçah yan ye chedave yuhn vo yahn che ritahno vo Dihvo vo Jesucristo, ne retihyon yune ye uvo che racotuhn vo ndudo ndah yahn ye numachahte.

¹⁵ Nuhn ne, rahndudo nuhn ndudo ndah yahn Dihvo vo Jesucristo. Ntiyon min ne, anduhneça yade yahn nanda che ama ndah ran. Ama quenan ino Dendiohs, ne retuhn van ihyan che ndevahn ye man, van ihyan che conda ye man.

¹⁶ Ihyan che ritahno ye ndudo min ne, retumacadino ye che ndevahn ye, ne ihyan che hua ritahno ye ne, retumacadino ye che va che conda ye. ¿A devano nchuhn duh che quendañ ndah nan ntiyon min ne?

¹⁷ Quendañ ndah nuhn, te hua retihdenan nuhn vededevano yahn man nuhn nan ndudo yahn Dendiohs, nduhça che redin ama yahn ihyan. A Dendiohs che tendahnun ye nuhn, ne rahndudo nuhn ndudo yahn ye numa çaco, redinahn nuhn che rihquentiyon Dihvo vo Jesucristo.

3

Ndudo ndah yahn Dendiohs che ndahco çade ye, ndahco ye tah Dihvo vo Jesucristo

¹ Che tihça dirún ne, co riquendi nchuhn rendedecadino ne che rendeva man yavenan nuhn, ate hua. Hua rendotenan nuhn che dechuh ihyan çava yahn nchuhn çava che conan ne nuhn, nde huane che dechuh man ne çava yahn ihyan çava che conan ye nuhn, andahre tihça va che din nahn ihyan, ndotenan ye ama çava che çahma nan ihyan çava che ndaca ntiyon din ye.

² Nchuhn ne, anduhneça ama çava che chenana cuma nuhn çava che çahma nan nuhn. Che rendihchero ihyan nchuhn man, che recadino ye yahn ne man ne, retumacadino nducoyaca ye che a Dendiohs che te ye ntiyon che redin nuhn.

³ A ndedevahn Dihvo vo Jesucristo nchuhn, chitahno ne ndudo ndah yahn ye che cahndudo nuhn. Dendiohs, ihyan min che va ye vahchetero ne, numacuahn vederihquentiyon yahn Vaco Ndah yahn ye ndedevahn ye nchuhn, ne vederihquentiyon che ndevahn ne ne, tahque chahte che co vederihquentiyon yahn ley che ndirun nan tu rahno, che ndahco Dendiohs tah Moisés.

⁴ Nduhça che chenana ino nuhn Dendiohs numacuahn vederihquentiyon yahn Dihvo vo Jesucristo ne, a devano çaco nuhn che conahn ntiyon che redin nuhn yahn ye.

⁵ Ndiyu vededevano yahn man nuhn richahtino nuhn, cava che co din nuhn ntiyon yahn ye, te richahtino nuhn che a man ye rinan ye nuhn.

⁶ Tihca, te a ihyan min che rete ye vededevano yahn ye nuhn, cava che co kuhnde tah nuhn vederihquentiyon ra yahn ye, cuahndudo nuhn ndudo ndah yahn Dihvo vo Jesucristo. Ndiyu ley che a ndirun che dito yahn vederihquentiyon min, te Vaco Ndah yahn Dendiohs che dito yahn. Ley che a ndirun ne, atenan che rihco ro che va che conda ihyan nunde, ate Vaco Ndah yahn Dendiohs ne, redin che cuahtenan ihyan vahchetero numacuahn ro.

⁷ Ley che ndirun nan tu rahno, che rihco ro che va che conda ihyan nunde ne, chihco cade Dendiohs che cuihno vederihquentiyon yahn, hua quendi cuahn dama. Andahre ama yudo vederihquentiyon yahn ley min, che nde nan Moisés ama diyahn ro, nde hua ri che ndihchero ihyan naci6n yahn Israel,

⁸ ate nde tahque yudo vederihquentiyon yahn Vaco Ndah yahn Dendiohs.

⁹ Vederihquentiyon yahn ley min, che rihco ro che va che conda ihyan nunde ne, ama yudo, ate tahque yudo vederihquentiyon yahn ndudo ndah yahn Dihvo vo Jesucristo, che rendedevahn ihyan.

¹⁰ Nducote tahque yudo vederihquentiyon yahn ndudo ndah yahn Dihvo vo Jesucristo ne, anduhneca ndete che a chihno vederihquentiyon yahn ley min.

¹¹ Tihca, te ley min che va che cuihno vederihquentiyon yahn ne, andahre ama yudo, ate tahque yudo vederihquentiyon yahn ndudo ndah yahn Dihvo vo Jesucristo, che hua nda ro che cuihno.

¹² Nducote a devano nuhn che tahque yudo vederihquentiyon yahn ndudo ndah yahn Dihvo vo Jesucristo ne, chemin che rahndudo nuhn numa ino nuhn.

¹³ Ametah nde ama nan che tihyon ndeh nuhn nduhca che din Moisés, che chendih ye ama tino nan ye, cava che hua ndihchero ihyan naci6n yahn Israel nduhca che rino rino ravi che diyahn ro nan ye.

¹⁴ Rahndudo nuhn ndudo yahn Dendiohs nduco cudado, cava che conahn ihyan. Ate ihyan naci6n yahn Israel ne, nde meniyon hua renahn ye yahn vederihquentiyon ndico, anduhneca ndete che va che redin vahche yahn ye, te atenan che cotahno ye Dihvo vo Jesucristo, tuhme conahn ye.

¹⁵ Namin nde meniyon cuahn che rahndudo ihyan ndudo che dirun Moisés ne, anduhneca ndete che va che redin vahche yahn ye, hua renahn ye.

¹⁶ Ate cuahn che cotahno ihyan Dihvo vo Jesucristo ne, tuhme conahn ye, cuavi che redin vahche yahn ye.

¹⁷ Dihvo vo Jesucristo ne, anduhneca Vaco Ndah yahn Dendiohs ihyan, ne ihyan che quenun Vaco Ndah yahn Dendiohs ihyan ne, dihn va chedave yahn ye nan ley che dirun Moisés.

¹⁸ Chemin che nducoyaco vo che ritahno vo ihyan min ne, nducote ametah deh che redin vahche yahn vo ne, rihco ro vo che ama yudo vederihquentiyon yahn ye. Ro ro ne, rendo vo nduhca man ye, redin Vaco Ndah yahn Dendiohs che tahque rahtenan cumo vo vederihquentiyon yahn ye.

4

¹ Nducote man Dendiohs yahino ye nuhn, ne chihco ye vederihquentiyon tah nuhn che cuahndudo nuhn ndudo ndah yahn Dihvo vo Jesucristo ne, chemin che riquendi nuhn numa ino nuhn redinahn nuhn.

² Hua chihnga redin nuhn man, hua rihtera nuhn vedecuihno yahn nuhn man, hua rihnceh nuhn man, hua retihdenan nuhn vededevano yahn man nuhn nan Ndudo yahn Dendiohs man. Tahque ndah ne, rahndudo nuhn

demañ ndudo cuaço, ne nduco tihça rihco ro nuhn che runecađe nuhn ñañ Dendiohs.

³ Ate ihyan che va che conda ye ne, a ihyan chahn che hua renahn ye ndudo ndah yahn Dihvo vo Jesucristo che rahndudo nuhn.

⁴ Hua ritahno ye, te a chihñcheh chundah ihyan, din se che hua co conahn ye vederihquentiyon chahte yahn ndudo ndah yahn Dihvo vo Jesucristo, ihyan min che ndihchero ihyan iyehñse ihyan, tumacadino ye taça Dendiohs.

⁵ Hua rahndudo nuhn ça va che nevahñecun ihyan nuhn, te rahndudo nuhn ça va che nevahñecun ye Dihvo vo Jesucristo. Redin nuhn cuande anduhñeca ndete che mozo yahn nchuhn nuhn, yahn che yahino vo Dihvo vo nduco vih.

⁶ Tihça rahndudo nuhn, te Dendiohs, ihyan min che chihquentiyon ye che chiya dave ne, namin din ye che chenahn nuhn yahn vederihquentiyon yahn ye che ndihco ye taħ Dihvo vo Jesucristo.

Nduhça che va che cuahtechica ihyan che ritahno ye Dihvo vo Jesucristo

⁷ Vederihquentiyon chahte che va taħ nuhn, che rahndudo nuhn ndudo ndah yahn Dihvo vo Jesucristo ne, chemin ne, nduhça ama vedecuihca, ate mañ nuhn ne, nde hua rignonun chihve nuhn. Tihça, ça va che co ro che vederihquentiyon min ne, yahn Dendiohs, ndiyu yahn nuhn.

⁸ Rechuhrihn nuhn, ate hua ri doh ino nuhn. Ama rededecadino nuhn, ate hua retehche ino nuhn.

⁹ Ama redin tañ ihyan nduco nuhn, ate hua rihcomañ Dendiohs nuhn. Vate nuhn taħ vederih, ate rendedevahn ye nuhn.

¹⁰ Nduh cuañ ñañ che vatechica nuhn ne, ama rechuhrihn nuhn nduhça che chuhrihn Dihvo vo Jesucristo, ça va che co ro che quenduche ye, rinduco ye nuhn.

¹¹ Numanahn che chenah nuhn iyehñse ne, ama cahnda yahn nuhn, che nahñ cahno ihyan nuhn, yahn che ritahno nuhn Dihvo vo Jesucristo, ne nduco chemin ne, rihnde ro che va ye ça va nuhn.

¹² Cuahn ñama vate nuhn taħ vederih, ate cochihve yahn nchuhn ça va che ndevahn ne.

¹³ Ñañ Ndudo yahn Dendiohs ne, ndirun nduhça che raññ ama ihyan: “Chitahnó Dendiohs, ne chemin che cahndudó ndudo yahn ye.” Riquendi nuhn yune yahn ihyan min, ritahno nuhn Dendiohs. Namin rahndudo nuhn ndudo yahn Dendiohs,

¹⁴ te a devano cuaco nuhn che ndedetuhche ye Dihvo vo Jesucristo vañ tenaħñ, ne ça va Dihvo vo quenah cuma che ndedetuhche ye uvo, nedñ ñama ye uvo ñañ ye.

¹⁵ Nducuahñ che rahno ri nuhn ne, a ça va che ndah yahn nchuhn, ça va che cuhnde ro vedeyahino yahn Dendiohs nduco nuhn, ne ama yahn ihyan necaħ ye nundihve cuahn ihyan mañ, ndeva ye yavenañ ye mañ.

¹⁶ Chemin che hua ri doh ino nuhn. Andahre ama ri cuno nuhn ñañ ntiyon yahn Dendiohs, ate mañ ye reñcaħ dito ye chedave yahn nuhn ro ro.

¹⁷ Hua ri doh ino nuhn, te che rechuhrihn nuhn mañ ro cuh ne, hua ngu cuahn ñama. Tah ra chemin, te tahque ndaħça cuahno nuhn cuahn che cuahñen nuhn vahchetero numacuahn ro.

¹⁸ Nducote tihça ne, hua retumacaħ nuhn dehtenduh che va iyehñse cuh, te hua rengu. Tahque ndah ne, retumacaħ nuhn vederihquentiyon yahn Dendiohs, te chemin ne, hua nda ro che cuihno.

5

¹ Hua reça cudado uvo che rechuh rihn vo man ro cuh, te a devano cuaco vo che cuahn che ndaco vo iyehñse cuh ne, ndeva Dendiohs uvo vahchetero nan che cuahtenan vo cuahn dama.

² Chemin che, numanahn che vato vo iyehñse ne, raħcoran vo che nahn cuahtenan vo vahchetero.

³ Cuahn che ndaco vo iyehñse cuh ne, a va yan nan che cuahtenan vo.

⁴ Numanahn che chenah vo iyehñse cuh ne, raħcoran vo, ndiyu che nahn vo che coh vo, ate che nahn vo che ndacorun vo, cuahtenan vo vahchetero numacuahn ro.

⁵ Yahn che cuahtenan vo vahchetero ne, man Dendiohs tihyon yune ye uvo, din ye che quenun Vaco Ndah yahn ye uvo, rihco ro ye che ndeva ye uvo.

⁶ Chemin che richahtino vo cuahn dama. A devano vo te, numanahn che chenah vo iyehñse ne, hua rendihchero vo Dihvo vo Jesucristo.

⁷ Ate ritahno vo ihyah, riquendi vo yune yahn ye, andahre hua rendihchero vo ihyah.

⁸ Ndichahtino vo ihyah, nde tuno nahn ndaco vo iyehñse cava che cuahtenan vo nan ye.

⁹ Chemin che a cuahtenan ca vo iyehñse, o hua, redin nun ino vo runecade vatechico vo cava che yeno ye nduco vo.

¹⁰ Tihca, te va che ndo dama nducoyaco vo, techecade Dihvo vo Jesucristo yuhn vo. Ro min ndahco menun ye yahn queri amo vo, a ndah, o hua ndah, din vo, chahtenan vo iyehñse.

Vederihquentiyon che ndevahn ihyah

¹¹ Nducote renevahnecun nuhn Dihvo vo Jesucristo ne, chemin che redin nun ino nuhn riyahve nuhn ihyah nunde, cava che cotahno ye ihyah. Dendiohs ne, a devano ndah ye che runecade vatechica nuhn, ne raħco te namin nchuhn ne, a devano ne.

¹² Che dirun tihca ne, co riquendi nchuhn rendedecadino ne che redeva man yavenan nuhn nduhca che rahn ihyah yahn nuhn, ate hua. Che nahn ne, che co yeno nchuhn che runecade vatechica nuhn cava che hua co cuihnan ne, ndahconan ne yahn ihyah che ndere redin yade ye, redin ca ye che runecade ye.

¹³ Nahn cuan ne, co rendedecadino ihyah che luco nuhn, ne nahn cuan ne, rendedecadino ye che runecade nuhn, ate hua dehve din yahn chemin, te redin nuhn ntiyon yahn Dendiohs, cava che ndah yahn nchuhn.

¹⁴ Tihca, te nducote yahino Dihvo vo Jesucristo nuhn ne, chemin che renevahnecun nuhn che rihquentiyon ye. A devano nuhn te, nducote chih ye cava nducoyaca ihyah ne, nducoyaco vo ne, anduhneca ndete che chih vo dama nduco ye.

¹⁵ Tihca chih ye cava che, uvo che ndedevahn ye uvo ne, hua cuahtechico vo vedeyeno yahn man vo. A ihyah min che chih ye, ne ntuche ye cavo vo, ne redin yahn che dinah vo yahn ye.

¹⁶ Chemin che nuhn ne, hua rendaħchenan nuhn nde ama ihyah, taħan ihyah ye. Andahre ro menan ndahchenan nuhn Dihvo vo Jesucristo, ate man ne, ametah tihca redin nuhn.

¹⁷ Tihca, te nducoyaco vo che ritahno vo Dihvo vo Jesucristo ne, a ndahcorun Dendiohs uvo, a ndo vo anduhneca ihyah ra. Nducuahñ vederendecadino chihnga che chenah cumo vo ro menan ne, a chihcoman vo. Man ne, a ndacorun vederendecadino yuhn vo.

¹⁸ A Dendiohs che din ye nducuahn chemin, ndo yan ye nduco vo che cuande yahn Dihvo vo Jesucristo. Avane ne, te ye ntiyon nuhn che cah nuhn, cadino ihyan che a ndo yan ye nduco ye.

¹⁹ Dendiohs ne, dechuh ye Dihvo vo Jesucristo, ne che cuande yahn ihyan min ndedevahn ye ihyan iyehñse, nchahco ye nunde yahn ye. Ndaconan rahn che te ye ntiyon nuhn che cah nuhn, cadino ihyan che ndo yan ye, nchahco ye nunde yahn ye.

²⁰ Dechuh Dihvo vo Jesucristo nuhn, cahndudo nuhn van nchuhn menun Dendiohs, anduhneca ndete che a man ye riyahve ye nchuhn. Chemin che riyahve nuhn nchuhn che cuande yahn Dihvo vo Jesucristo, che ndaca ne che nchahco nunde Dendiohs, ndo yan ye nduco ne.

²¹ Dihvo vo Jesucristo ne, hua quendihco ye nde ama nunde, ate din Dendiohs che nedihve ye nunde yuhn vo, anduhneca ndete che man ye quendihco ye nunde. Tihca din ye cava che, nduco che cotahno vo Dihvo vo ne, ndaco vo vederenchahco, ne runecade cuahtenan vo nduhca che nahn ye.

6

¹ Nducote redin nuhn ntiyon yahn Dendiohs ne, riyahve nuhn nchuhn che hua duche rino ne vedeyahino yahn ye cava ne,

² te nan Ndudo yahn ye ne, rahn ye ri ye ihyan ndico yuhn vo tuhca: Cuañ che nda ro ndah yahn nchuhn ne, chinan nchuhn, ndedevahn nchuhn.

Namin nchuhn ne, a ro cuh che ro ndah yahn ne, a ro cuh che ndevahn ne.

³ Nuhn ne, runecade vatechica nuhn, cava che hua ndaca yune che ndahchenan ihyan ntiyon che redin nuhn.

⁴ Nan nducuahn che redin nuhn ne, rihco ro nuhn che numa cuaco redin nuhn ntiyon yahn Dendiohs. Ama redin chahtino nuhn yahn nducuahn che rechuhriñ nuhn man,

⁵ rahn ihyan nuhn man, rih ye nuhn vacoyahn man, rendo dama ye, redin canda ye nduco nuhn man, ama rechuhriñ nuhn che redin nuhn ntiyon man, hua ri che cuahteyado nuhn man, rih cuico nuhn man. Ate van nducuahn dehtenduh chemin chan ne, rihco ro nuhn che redin nuhn ntiyon yahn Dendiohs.

⁶ Namin rihco ro nuhn che redin nuhn ntiyon yahn ye, yahn che runecade vatechica nuhn man, renahn nuhn ndudo yahn ye man, ama redin chahtino nuhn man, chenan cuma nuhn vedevahino man, quenun Vaco Ndah yahn ye nuhn man, numa cuaco redin yahino nuhn ihyan man,

⁷ chenan cuma nuhn vederihquentiyon yahn ye man, rahndudo nuhn ndudo ndah yahn Dihvo vo Jesucristo man. Nduhca sandado che va che rihñ nduco se man, va che rendedevahn nduco se sahn man ne, tihca nuhn, te a ndo yan Dendiohs nduco nuhn, nedin yahn ye nuhn, ne hua dehva rinda yahn nuhn.

⁸ Nahn ihyan ne, rendeva ye yavenan nuhn, ne nahn ye ne, rendahchenan ye nuhn. Nahn ihyan ne, ndah rahn ye yahn nuhn, ne nahn ye ne, chihnga rahn ye yahn nuhn. Nahn ihyan ne, rahn ye che rente nuhn ndudo cuaco, ne nahn ye ne, rahn ye che rihñcheh nuhn.

⁹ Nahn ihyan ne, yahino ye nuhn, ne nahn ye ne, nde hua retumacah ye nuhn. Nahn cuan ne, vate nuhn tah vederih man, redin tan ihyan nduco nuhn man, ate rendedevahn Dendiohs nuhn.

¹⁰ Andahre ran nuhn nahn cuan, ate hua dehve rahco nuhn. Andahre chevah nuhn, ate anduhneca ndete che redin cuihca nuhn ihyan, ricuahn

nuhn Ndudo yahn Dendiohs ihyan. Andahre metah dehva yahn nuhn muhn iyehse cuh, ate rinan Dendiohs nuhn, ne hua dehva rinda yahn nuhn.

¹¹ Nchuhn dihno nuhn che vate ne yan Corinto, numacuahn chedave yahn nuhn yahve nuhn nchuhn, hua chihco ndeh nuhn nde ama ndudo.

¹² Nuhn ne, yahino nuhn nchuhn, ate man nchuhn ne, ti nan ti ino ne rendihche ne nuhn.

¹³ Nduhca che riyahve ihyan daya ye ne, tihca riyahve nchuhn, cava che din yahino ne nuhn nduhca che yahino man nuhn nchuhn.

Uvo che ritahno vo Dihvo vo Jesucristo ne, ihyan yahn Dendiohs uvo

¹⁴ Hua dama co nchuhn nduco ihyan che hua ritahno ye Dihvo vo Jesucristo, te hua redin yahn che ihyan che ndah ihyan ye ne, dama co ye nduco ihyan che duhtuno ihyan ye. Namin hua redin yahn che ihyan che a ntah ndutinan ye, renevahnecon ye Ndudo yahn Dendiohs ne, dama co ye nduco ihyan che hua renevahnecon ye.

¹⁵ Dihvo vo Jesucristo ne, hua ri dama ndudo yahn ye nduco chundah. Namin ihyan che ritahno ye ihyan ne, hua ri dama ndudo yahn ye nduco ihyan che hua ritahno ye.

¹⁶ Ihyan che rendeva ye yavenan Dendiohs ne, nde hua redin yahn che dama co ye nduco ihyan che rendeva ye yavenan dehtenduh che ndiyu Dendiohs. Dendiohs ne, quenduche ye, ne uvo ihyan yahn ye ne, anduhneca ndete che yaco yahn ye, nduhca che a ndirun nan Ndudo yahn ye tuhca:

Conun van ihyan yahn.

U che Dendiohs yahn ye.

¹⁷⁻¹⁸ Namin ndirun:

Dihvo vo Dendiohs, ihyan min che quenana cuma ye nducuahn vederihquentiyon ne, rahn ye:

“Co din vi nchuhn yahn ihyan nunde, cuihcoman ne ihyan.

Hua din ne dehtenduh che chihnga, cuahtendihco ne nunde.

Tuhme ndeva nchuhn, din yahn nchuhn, ndo ne dayá.”

7

¹ Dihno che yahino nchuhn, nducote tihca nte Dendiohs ndudo yahn ye ne, nahn che cahcoman vo nunde yuhn vo, ne runecade cuahtechico vo, nevahnecon vo ihyan.

Nto ino ihyan ndiyaco nunde yahn ye

² Cuenevahnecon nchuhn nuhn. Hua nedin tan nuhn nduco nde ama ne. Hua nihnceh nuhn nchuhn. Nde ama nchuhn, hua ndinda ne cava nuhn.

³ Che dirun tihca ne, ndiyu che rahn nunde yahn nchuhn, te yahino nuhn nchuhn nduhca che a rahn ri nchuhn menan, andahre va che coh nuhn cava ne.

⁴ Ama renda ca vedehatino man, ama yenó man, ama renecah yan chedave yahn man, cava ne. Andahre rechuhrihn nuhn, ate ama yenó.

⁵ Numacuahn ro che chahtechica nuhn yahn yahn Macedonia ne, nde tah hua chahtetuhno nuhn, te din tan ihyan nduco nuhn. Chuhrihn nuhn, ne ama ndedecadino nuhn nan ntiyon che redin nuhn.

⁶ Ate Dendiohs, ihyan min che renecah yan ye chedave yahn ihyan che ran ye ne, necah yan ye chedave yahn nuhn, yahn che nta Tito.

⁷ Avane ne, nte cuande se nuhn nduhca che nevahnecon nchuhn san man, necah yan ne chedave yahn se man, ama chi ran ne cava nunde yahn ne man, ama rendedecadino ne cava man, ne cava nducuahn chemin ne, nde tahque chi yenó.

⁸ Cuahn che dirún yahn ne menan, dín che chi ran ne ne, nde man nto inó che tihça dín, ate man ne, yenó, te checadinó che chichihve yahn ne, nto ino ne nunde yahn ne.

⁹ Man ne, yenó, ndiyu yahn che dín che chi ran ne, ate yahn che chichihve vederan yahn ne, din che nto ino ne nunde yahn ne. Hua ndere çah ríhn nchuhn nduco che tihça dirún, te nto ino ne nunde yahn ne numacuahn vederan, nduhça che nahn Dendiohs.

¹⁰ Chichihve yahn ne, te cuahn che numacuahn vederan rento ino vo nunde yahn vo ne, rendedevahn Dendiohs uvo. Ate vederan che ametah co quendi vo vedeyeno yahn man vo, cuahtendihco vo nunde ne, nde hua cochihve.

¹¹ Condihche nchuhn nduhça che chichihve che nto ino ne nunde yahn ne nduhça che nahn Dendiohs. Chi yudo yahn ne yahn nunde yahn sahn min, nde dihya ne chi. Runecađe tumacañ ne yahn, ne ndaca ne che nchahco nunde che hua tumacañ ne yahn menan. Namin necaħco ne u çava che conán nchuhn. Din ne castigo sahn, ne nan nducuahn chemin ne, chihnde ro yahn ne che dave yavenan ne yahn nunde min.

¹² Che dirún yahn nchuhn menan ne, che nahn che tumacadino ne nan Dendiohs nduhça che nevahnecon ne nuhn. Che dirún yahn ne ne, menan vihca a çava nchuhn che ndedecadinó, ndiyu deman yahn sahn min che quendihco se nunde, nde huane yahn ihyan che din duche yahn se ihyan.

¹³ Nducote nto ino nchuhn nunde yahn ne ne, chemin che chi yeno nuhn. Avane ne, nducote ndihchero nuhn che ama yeno Tito yahn che necaħ yan nducoyaca nchuhn chedave yahn se ne, chemin che nde tahque chi yeno nuhn.

¹⁴ Hua quendaħ cuihno u che rahn rí sahn che ndah ihyan nchuhn. Nduhça che riquendaħ cuaco nducuahn che renté nduco ne ne, tihça quendaħ cuaco nducuahn che rahn rí sahn yahn ne.

¹⁵ Me Tito ne, nde tahque yahino se nchuhn man ro cuħ, che co ro che quenan se yan vaco ne, te renecaħco se nduhça che nevahnecon ne sahn nduco vedino vedenecon, dinahn ne che chihquentiyon se.

¹⁶ Me u ne, ama yenó, te a devanó che renevahnecon nchuhn nducuahn che rihquentiyón.

8

Nduhça che nahn che çah vo vedino

¹ Dihno nuhn, man ne, nte cuande nuhn nchuhn nduhça che din yahino Dendiohs ihyan yahn ye che vate ye yahn yahn Macedonia, chinan ye ihyan çava che tuno taħ ye che çah ye vedino.

² Ihyan chahn ne, andahre ama rechuhrihn ye che redin tan ihyan nduco ye man, ama chevah ye man, ate ama yeno ye, ne numacuahn chedave yahn ye çah ndahva ye vedino.

³ Man ndihcheró che numacuahn vedeyeno çah ye nde tahque ndahva ca che co che retumacadino vo che co çah ye.

⁴ Ama chica ye favor nuhn, che çah yune nuhn che conda van nduco ye, conan ye dihno vo.

⁵ Nde hua ndedecadino nuhn che tihça din ye, ate nde tahque quendaħnan ye, te che tahque ndah ne, chihco ye chedave yahn ye nduhça che nahn Dendiohs, çava che dinahn ye nducuahn che rihquentiyon Dihvo vo Jesucristo man, çava che nevahnecon ye nuhn man.

⁶ Nducote tihça din ihyan chahn ne, chemin che çah cuande nuhn Tito che ndaconan se yan vaco nchuhn, quendi se din dama se vedino min.

⁷ Nducote ama chenán cuma ne vederihquentiyon che cotahno ne man, che cuahndudo ne man, che devano ne man, checo checunde chenán ne nan ntiyon yahn Dendiohs man, yahino ne nuhn man ne, chemin che ndahca che din nun ino ne, cuahtenan cuma ne vedevahino.

⁸ Ndiyu che rihquentiyón nchuhn, ate ráhn nduco ne cava che cadino ne nduhca che chenán cuma dihno vo chenahn vedevahino man, cava che cuhnde ro ndete che numa cuaco chenán cuma ne vedevahino man.

⁹ A devano nchuhn nduhca che ama yahino Dihvo vo Jesucristo uvo, ne nahn che quendi ne yune yahn ye. Nduhca ama ihyan cuihca che ndo chevah ye, yahn che din ye vedevahino ne, tihca ihyan min, te andahre ama yudo vederihquentiyon yahn ye, ate nducote yahino ye uvo ne, chihcoman ye nducuahn, nda ye muhn iyehñse cuh cava che ndedevahn ye uvo.

¹⁰ Tihca riyahvé nchuhn cava che ndah yahn ne, te a man nchuhn chihndeyan chedave yahn ne nde nduyo chuh me, canan recah ne vedino min.

¹¹ Man ne, nduhca che nduco vedeyeno canan cah ne, tihca nahn che quendi ne dinahn ne tunoca che tuno tah ne, nde conan cah ne.

¹² Tihca, te vedino che recah vo ne, a devano Dendiohs nduhva che co cah vo. Cuahn che recah vo numacuahn chedave yuhn vo ne, renevahñecun ye.

¹³ Che cah nchuhn vedino min dihno vo ne, ndiyu che cah ne nde ndo chevah man ne.

¹⁴ Che nahn ne, che conan ne ihyan cava che ndaca che chuñnun ye man ro cuh. Nda ro che va vederetahn yahn man ne ne, tihca conan ihyan chahn nchuhn. Nduco tihca ne, ndaca che chuñnun ama tama ne cuahn dama.

¹⁵ Va ama ejemplo yahn chemin che ndirun nan Ndudo yahn Dendiohs tuhca: “Ihyan che ndeh din dama ye ne, hua ngava yahn ye, ne ihyan che doh din dama ye ne, hua chicuah nan yahn ye.”

Tito nduco combiero yahn se ne, ndaconan se yan Corinto

¹⁶ Nundihve cuahn Dendiohs che cahñ nun ye chete chedave yahn Tito, che namin rendedecadino se cava che ndah yahn nchuhn nduhca che rendedecadino.

¹⁷ Ndetahno nevahñecun se che yahvé sahn che chi se. Avane ne, nducote a man se ndihco se che chi se ne, cochi se quendihchero se nchuhn numacuahn vedeyeno.

¹⁸ Dechuh nuhn dama nduco se ama dihno vo che ama ndah ráhn ihyan yahn ye nduh cuan yaco, yahn che ama quendah ndah ye che rahndudo ye ndudo ndah yahn Dihvo vo Jesucristo.

¹⁹ Avane ne, a tendahnun ihyan ndiyaco dihno vo min, che conduco ye nuhn nan che vatehica nuhn. Quenan conan ye nuhn, din dama nuhn vedino che a ndanan redin dama nuhn, cava che ndeva ihyan yavenan Dihvo vo man, cava che cahco ro nuhn vedevahino yahn nchuhn man.

²⁰ Nducote hua nahn nuhn che ndere cahma nde ama ihyan che toh man nuhn vedino min ne, chemin che yahve nuhn ihyan ndiyaco che tendahnun ye ama cha dihno vo, cava che conduco ye nuhn.

²¹ Tihca, te nahn nuhn che dave yavenan nuhn nan Dendiohs man, nan nducoyaca ihyan man.

²² Avane ne, dechuh nuhn tama dihno vo nduco Tito. Dihno vo min ne, a rendihche nuhn ihyan che runecade ye cuahn dama nan nducuahn ntiyon yahn Dendiohs. Ihyan min ne, quenan ino ye che conahn ntiyon che chí ye, te a rendihche ndah ye nchuhn.

²³ Te cuandé nchuhn te Tito ne, rinduco se u nan ntiyon che quenán, cochi se, conan se nchuhn menún. Me dihno vo chenahn ne, ihyan ndiyaco dechuh

ye ihyan. Ihyan chahn ne, nducote runecade ye ne, cuhnde ro che ama yudo vederihquentiyon yahn Dihvo vo Jesucristo.

²⁴ Man ne, cuinan nchuhn ihyan chahn, cava che cadino ihyan ndiyaco chenahn nduhca che chenana cuma ne vedeyahino man, cava che hua co cuihnan nuhn che rendeva nuhn yavenan ne man.

9

Vedino cava dihno vo

¹ Yahn vedino che redin dama nuhn cava dihno vo ne, rahco che nde hua rendotenan che dirun yahn ne,

² te a rendihché nchuhn che ama cuno ino ne. Chemin che hua cuihnan renté nduco dihno vo che vate ye yahn yahn Macedonia, yahn nchuhn che vate ne yahn yahn Acaya, che a vateyan ne nde nduyo chuh cava che conan ne. Nducote checadino ye che redin nun ino ne recah ne vedino min ne, a nahn nducoyaca ye ama cah yeno ino ye, canan recah ye.

³ Andahre tihca ne, dechuh dihno vo chahn tan, cava che cuahteyan niyon nchuhn nduhca che a renté yahn ne, ne hua quendaah cuihno che rendonan nchuhn.

⁴ Tihca din, te cuahn che chi ne, denan conduco ama o dihno vo che vate ye yahn yahn Macedonia u, ne nahn che a vateyan nchuhn. Ndete che hua ne, quendaah cuihno nchuhn. Namin quendaah cuihno nuhn che ama rendonan nuhn nchuhn.

⁵ Nducote hua nahn che quendaah cuihno uvo ne, yahvé dihno vo chahn che chi ye, conan ye nchuhn, din dama nduh ne vedino min che a ndihco ne chedave yahn ne che cah ne. Nduco tihca ne, cuahn che nda nuhn ne, hua quenana cuma nuhn che coman caca nuhn nchuhn.

⁶ A devano nchuhn te cuahn che ndahva ndute ndata rihno vo ne, ndahva renevahn vo, ne cuahn che doh rihno vo ne, doh renevahn vo.

⁷ Atihnocano che recah vo vedino. Nahn che cah vo nduhva che ndihco vo che cah vo. Nahn che cah vo numacuahn chedave yuhn vo, hua nduco fuerza, te Dendiohs ne, yahino ye ihyan che nduco vedeyeno recah ye.

⁸ Dendiohs ne, va vederihquentiyon yahn ye che conan ye nchuhn nan nducuahn, cava che hua dehva conda yahn man ne man, cava che va ndahva yahn ne che conan ne ihyan chenahn man.

⁹ Tihca, te nan Ndudo yahn Dendiohs ne, a ndirun tuhca:

Ihyan che redin ye vedevahino nduco ihyan chevah ne, rihan Dendiohs ihyan cuahn dama, ne hua ri doh dehtenduh yahn ye.

¹⁰ A Dendiohs che recah ye ndute ndata che rihno ihyan man, rihquechey ye ihyan man. A ihyan min che din ye che co ndeh ndute ndata yahn nchuhn man, tihdenan ye vedeyahino yahn ne man,

¹¹ cava che co chahte nducuahn ntiyon yahn ne, conan ne ihyan chevah numacuahn chedave yahn ne. Nduco tihca ne, ndeva ihyan yavenan Dendiohs yahn ntiyon che redin nuhn van nchuhn.

¹² Tihca, te vedino che vatechica nuhn redin dama nuhn ne, din che ndaca che chunnun dihno vo man, nde din che ndeva ihyan yavenan Dendiohs man.

¹³ Ihyan che ndonda tah ye vedino min ne, ndeva ye yavenan Dendiohs, ndiyo deman yahn che ama rihan nchuhn ihyan man, ihyan chenahn man, ate yahn che renevahnecon ne ndudo ndah yahn Dihvo vo Jesucristo.

¹⁴ Namin covah ye cava nchuhn numacuahn chedave yahn ye yahn che tihyon yune Dendiohs nchuhn che din ne vedevahino nduco ye.

¹⁵ Nundihve cuahn Dendiohs che ama chahte vedeyahino yahn ye çavo vo, che nde hua retumacadino man vo, dechuh ye Dihvo vo Jesucristo, ndedevahn ye uvo.

10

Vederihquentiyon che quenan cuma Pabło

¹ U Pabło, riyahvé nchuhn numacuahn vedino vedeneacun nduhça che nahn Dihvo vo Jesucristo. Nahn nchuhn ne, rahn ne yahn che ama tan cuahn che yahn quenán, ne cuahn che quenún van nchuhn ne, ama necún.

² Ate riyahvé nchuhn che hua din ne che ndaçá yune che dín castigo nchuhn cuahn che ndá, te va inó che dín castigo ihyan che rahn ye che vatehica nuhn vedeyano yahn man nuhn.

³ Cuäco te ihyan iyehñse nuhn, ate redin nuhn ntiyon yahn Dendiohs nduhça che nahn ye, ndiyu nduhça che nahn man nuhn.

⁴ Nduhça sandádo che chenán cuma se dehtenduh che richihve yahn se nan che ruhn se ne, tihça chenán cuma nuhn vederihquentiyon chahte. Vederihquentiyon min ne, ndiyu yahn ihyan iyehñse, te yahn Dendiohs, ne co ndahco ndiya ihyan che duhtuno ihyan ye.

⁵ Namin ndahco ndiya nuhn ihyan, che numacuahn vedeyade man, vededevano yahn man ye man, rahcotahn ye yahn Dendiohs, ne ndahco nuhn ihyan tah Dihvo vo Jesucristo, çava che dinahn ye yahn ye.

⁶ Cuahn che a ndahça redinahn nchuhn ne, nuhn ne, vate nuhn çava che din nuhn castigo ihyan che rahcotahn ye.

⁷ Nchuhn ne, rihco ne cudádo nde nan ran nde nan rica nuhn, ate hua rendihche ne taça chedave yahn nuhn. Ndete che devano cuäco ne che a yahn Dihvo vo Jesucristo nchuhn ne, cuedevano ne te namin nuhn ne, a yahn ye nuhn.

⁸ Te Dihvo vo Jesucristo vederihquentiyon nuhn, ndiyu çava che din nuhn che conda nchuhn, ate çava che conan nuhn nchuhn che cotahno ne ihyan numa ino ne. Chemin che, andahre ama rendonán vederihquentiyon min ne, hua ri cuihnán.

⁹ Tihça rahn rí nchuhn çava che hua ndedecadino ne che ndere renahn dihyá nchuhn nduco çaca che redechúh yahn ne.

¹⁰ Hua náhn che namin nchuhn tihça ndedecadino ne, te nahn ihyan ne, rahn ye te ama renan inó che çayá ihyan nan çaca che redechúh yahn ye, ate cuahn che quenún van ye ne, hua dito nán nde hua ndahchan ndudo yahn.

¹¹ Ihyan che tihça rahn ye ne, codevano ye te nduhça che yudo rihquentiyon nuhn cuahn che yahn chenán nuhn, redirun nuhn yahn ne ne, atihnoçá yudo çahcantiyon nuhn cuahn che ndá nuhn van ne.

¹² Hua rendeva man nuhn yavenan nuhn nduhça che redin nahn ihyan che rendonan man ye ihyan, te ama vedetundo che redin ye, rendeva man ye yavenan ye, rahco ye che tahque rignon chihve ye che co ihyan chenahn.

¹³ Nuhn ne, hua redin yade nuhn, rechuhn nuhn vederihquentiyon che te Dendiohs nuhn, che dín nuhn ntiyon yahn ye van nchuhn.

¹⁴ Nuhn che ndá nuhn menan ndita, cahndudo nuhn ndudo ndah yahn Dihvo vo Jesucristo, chihnevan nchuhn, ne chemin che redin yahn che quendi nuhn çahcantiyon nuhn nchuhn. Che tihça redin nuhn ne, hua rechuhn nuhn vederihquentiyon che chenán cuma nuhn.

¹⁵ Hua redin yade nuhn, rihquentiyon nuhn nan che nedin tama ca ihyan ntiyon. Che cuäco ne, chenán ino nuhn che cotahno nchuhn Dihvo vo

Jesucristo numa ino ne, ça va che co chahte ntiyon che redin nuhn van nchuhn, ne quendi nuhn nduhça che a cochi nuhn rihquentiyon nuhn.

¹⁶ Tuhme quendi nuhn cuacotuhn nuhn ndudo ndah yahn Dihvo vo Jesucristo yan chenān, ate hua cahnevi nuhn ntiyon che nedin tama ca ihyan.

¹⁷ Duh nchuhn che nahn ndonan man ne nchuhn ne, tahque ndah che ndonan ne Dihvo vo Jesucristo,

¹⁸ te ihyan che rendonan man ye ihyan ne, hua cochihve yahn ye che tihça redin ye. Me ihyan che rendonan Dihvo vo Jesucristo ihyan ne, atenan ihyan chahn che rendeva Dendiohs ihyan.

11

Sahn che redin ca se che apóstol se

¹ Ama ndahça ndete che din chahtino nchuhn che ndonan vederihquentiyon che quenān cumá. Co rahco ne che ama vedetundo che tihça redin.

² Ate hua, te ama yahinó nchuhn nduhça che nahn Dendiohs, cahndudó ndudo ndah yahn Dihvo vo Jesucristo, chitahno ne, ne nahn che dave chedave yahn ne, ndā ne nan ye.

³ Nducote chundah ne, ama mayon se ne, ndo se cu, chihncheh se Eva. Namin nchuhn ne, vahinó ça va ne, te denān hua numa ino ne ritahno ne Dihvo vo Jesucristo, ne çah yune ne che cahnceh se nchuhn, cuacondah vedame ne ihyan.

⁴ Vahinó ça va nchuhn, te denān ndā sahn che cacuahn se tama ndudo menun ndudo yahn Dihvo vo Jesucristo man, cuahndudo se tama ndudo, redin vahn se che ndudo ndah yahn Dendiohs man, conun se nchuhn che nevahnecon ne tama vaco menun Vaco Ndah yahn Dendiohs man, ne a ndah no ino ne cotahno ne nducuahn.

⁵ Ricá nchuhn che din chahtino ne yahn, nan sahn chahn che redin vahn ne apóstol ndah, te nde tah hua rinda nan yahn vederihquentiyon che quenān cumá nan vederihquentiyon yahn se.

⁶ Andahre hua ndahchan ndudo yahn nan che rahndudó, ate nan vederihquentiyon yahn Dihvo vo Jesucristo ne, a devanó ndendi ndendita nduhça che a rendihche man nchuhn.

⁷ Hua dehve ama nunde che din man ntiyon, ndāca che chuhnún cuahn che cahndudó ndudo ndah yahn Dendiohs, chihnevan nchuhn. Tahque ndah ne, quendāh vedechahtinó chuhríhn ça va che ndah yahn ne.

⁸ Cuahn che quenān van nchuhn, dín ntiyon yahn Dendiohs ça va che ndah yahn ne ne, dihno vo che vate ye tama yan chinan ye u ça va che ndāca che chuhnún, ate anduhneçā che ndere chehneví yahn ye, te ndiyu ihyan chahn va che conan ye u ro min.

⁹ Cuahn che chicuah nan yahn ne, nde ama nchuhn hua dendúh nchuhn. Tahque ndah ne, ama o dihno vo che chica ye yahn yahn Macedonia, chinan ye u. Nduco tihça ne, hua dendúh nchuhn ro min. Atihnoça hua dendúh nchuhn caviyan deman.

¹⁰ Nde muhn nde nan Dihvo vo Jesucristo, cuāco ráhn rí nchuhn chemin. Numachahte yahn yahn Acaya, hua quendāh cuihnó nan nde ama ihyan, yahn che tihça ráhn.

¹¹ Ndiyu che hua yahinó nchuhn che hua nahn che conan ne u. A man Dendiohs devano ye che ama yahinó nchuhn.

¹² Quendí dín tihça çava che co cuihnan sahn yade chahn che vatechica se redin ça se che apóstol se, redin ça se che redin se ntiyon nduhça che redin nuhn.

¹³ Sahn chahn ne, ndere vatechica se, rihnceh se ihyan, redin ça se che apóstol yahn Dihvo vo Jesucristo sahn.

¹⁴ Hua çahn ino nchuhn che redin ça se che apóstol se, te a devano vo te namin chundah ne, rendedeche se sahn, co ndaçondã se nde ama ángel diyahn ndete che nahn se.

¹⁵ Chemin che nde hua çahn ino nchuhn, ndihchero ne sahn chahn che redin se ntiyon yahn se, redin ça se che ndudo ndah yahn Dendiohs che rahndudo se. Yahn nducuahh che redin se ne, va che din Dendiohs castigo sahn, nedihve se nunde yahn se.

Nduhça che rechuhrihn Pablo nan ntiyon yahn Dendiohs

¹⁶ Ndaconan ráhn rí nchuhn che hua ndedecadino ne che ama vedetundo che náhn ndeva man yavenan. Ndete che tihça ndedecadino ne ne, codin chahtino ne yáhn.

¹⁷ Che ráhn rí nchuhn che náhn ndeva man yavenan ne, ndiyu Dihvo vo Jesucristo che tihça rihquentiyon ye, te chemin ne, vedetundo yahn man.

¹⁸ Nducote ama yahn sahn che redin yade se che ama ndah ihyan se ne, namin u ne, ndeva man yavenan.

¹⁹ Tihça dín, te nchuhn ne, ama devano ne che rahco ne, nde hua ri cuihnan ne, a ndah no ino ne retuma ino ne sahn che rendeva man se yavenan se.

²⁰ Andahre redin se deçahya yahn se nchuhn man, rendinun rendinahno se nchuhn man, redin yahn se dehtenduh yahn ne man, rinan se yahn nchuhn man, rahh se vaçonan ne man, ate a ndah no ino ne.

²¹ Anduhneça ndete che ama vedecuihno chemin çavá, te nuhn ne, hua rihquino nuhn che ndere dín nuhn nduco nchuhn.

Andahre ama vedetundo, ate namin u ne, co din yadé nduhça che redin sahn chahn.

²² Ndete che redin yade se che sahn nación yahn Israel sahn ne, namin u ne, ihyan nación yahn Israel u. Ndete yahn che rente se devaço hebreo ne, namin u ne, renté devaço min. Ndete yahn che ndata yahn Abraham sahn ne, namin u ne, ndata yahn ye u.

²³ Ndete nan ntiyon yahn Dihvo vo Jesucristo nahn din yade se ne, namin u co dín ama vedetundo, ndo yadé, te tahque ndichihve u nan ntiyon yahn ye man, tahque nedín ntiyon yahn ye man, tahque ndeh yune nenún vaçoyahn man. Ama ndeh yune nahn ihyan u man, ama ndeh yune adeche çahno ihyan u man.

²⁴ Sahn nación yahn Israel ne, uhn yune din se castigo u, chahn se ndico ntiyon cun cuarta u.

²⁵ Ino yune chahn se yahn u. Ama yune ndo dama ihyan, çah ye tu u nde a chíhno ye u, che rahco ye. Numacuahn ro che quechicá nan ntiyon yahn Dihvo vo Jesucristo ne, ino yune cheche nun barço nan che quenún, ama ro ama yan quenún van nuniyahn.

²⁶ Ama chuhrihn nduh çuan nan che quechicá yahn ntiyon che quenán. Ama ndeh yune adeche quenda ico u. Nduh çuan nan che quechicá ne, ama çahnda, yahn che ama vate sahn duco. Ama ndeh yune cuahto dín nan ihyan nación yáhn man, ihyan nación chenahn man, nducó, adeche çahno ye u. Adecotino che quechicá, viyan man, viyata man, nuniyahn man, ama chuhrihn, adeche cóh nahh çuan. Me sahn che redin ça se che ritahno se

Dihvo vo Jesucristo ne, cuahn dāma chenun ino se vedetān, nahn cāhno se u.

²⁷ Ama chi cunó nan ntiyon man, ama quenduché man, ama chih cuicó man, chih yacá man. Nahn cuan ne, adeche coh iché, quechicá van ngo, nde tino yáhn metah.

²⁸ Avāne yahn nducuahñ chemin chan ne, ama rendedecadinó ro ro, cava nducoyāca ihyan che ritahno ye Dihvo vo Jesucristo, te u che redín cudādo ihyan.

²⁹ Nducoyāca diho vo che hua ndah richahtino ye Dihvo vo ne, ama rendedecadinó cava ye. Namin nducoyāca diho vo che redin ihyan che rahtendihco ye nunde ne, ama ri rán cava ye.

³⁰ Ndete che nahn co yenó ne, tahque ndah che co yenó yahn dehtenduh che rihco ro che hua rignonun chíhvé.

³¹ Dendiohs, Chida Dihvo vo Jesucristo, ihyan min che rendeva vo yavenān ye cuahn dāma ne, devano ye te cuāco che ráhn.

³² Cuahn che quenán yan Damasco ne, gobernador che rinan se rey Aretas, va se yan min, ne chih se sandādo yune che nahn din se preso u.

³³ Ate ndedevah ihyan u chete ama cuahte cuahn vedāme chete che ndacoriya chihto yan me, ne nduco tihcā cāhn.

12

Ama vederihno che cāh Dihvo vo Jesucristo, ndihchero Pablo

¹ Hua redin yahn che ndeva mán yavenán, ate va che có nchuhn yahn ama vederihno che te Dihvo vo Jesucristo, ndihcheró.

²⁻³ A ndeh nduyo che ritahnó Dihvo vo Jesucristo, ne man adiva ne, a ri ndiche cun nduyo ne, quenda ye u vahchetero. Hua devanó, a mán, o vacó, atenan Dendiohs devano ye. Ate tanocā nduh ne, quenda ye u vahchetero.

⁴ Min chihneván ama ndeh ndudo che nde hua rentaquinó deh che cāhmá yahn. Avāne ne, cāhnda va che cāhmá.

⁵ Vederihno min che cuāco, redin yahn che ndonán. Ate cava mán ne, nde hua redin yahn che ndo yadé. Atenan yahn che nde hua rignonun chíhvé, atenan yahn chemin che co co yenó.

⁶ Ndete che nahn ndo yadé ne, dehe ndere ndo yadé, te ndudo cuāco che cāhmá. Ate tahque ndah che nde hua cāhmá yahn, cava che hua cava chemin nevahñecun ihyan u, te atenan che cahnevan ye che renté man, cāhco ye cudādo nduhcā che quechicá man.

⁷ Cava che hua ama din yadé che ndihcheró vederihno min ne, cāh yune Dendiohs che dechuh chundah ama cah tan, chetāh u, redin che rechuhríhn cuahn dāma.

⁸ A ino yune ama chicá favor Dihvo vo Jesucristo che cahnevi ye cah min,

⁹ ate ráhn ye ri ye u te nduco che yahino ye u, a va, te tahque rihco ro ye vederihquentiyon yahn ye nduco ihyan che nde hua rignonun chíhve ye. Chemin che ama yenó che rechuhríhn, redin cah, te nduco tihcā ne, tahque rihco ro Dihvo vo vederihquentiyon yahn ye nducó.

¹⁰ Ri yenó yahn nducuahñ che rechuhríhn nan ntiyon yahn Dihvo vo, che ndere riya ihyan u man, che redin tan ye nducó man, che hua rendāca che rechuhnún man, che yah rahnó man, te cuahn che rendó nde ndiyāhñ ne, tahque rihco ro Dihvo vo vederihquentiyon yahn ye nducó.

Pablo ne, ama rendedecadino ye cava ihyan yahn Dendiohs che vate ye yan Corinto

¹¹ Ama vedetundo che rahn yade nduco nchuhn, ate nducote retuma ino ne sahn che rihnceh se nchuhn ne, quenán cuma che tihca din. Nchuhn che redin yahn che ndeva ne yavenan, ndiyu man, te andahre lado yahn nde hua rignonun chihve, ate hua dehva rinda nan yahn nan sahn apóstol chemin chan, che rahco ne che ama ndah se.

¹² Cuahn che quenán van nchuhn ne, nduco rino nduco ndah din vederihno, chihnde ro che apóstol numa cuaco u.

¹³ Nchuhn ne, dama no din yahinó nchuhn nduco dihno vo che vate ye tama yan. Ate ndete che rahco ne che quendihco nunde yahn che hua denduh nchuhn che ndaca che chuhnun ne, codin chahtino ne yahn.

¹⁴ Rahn ri nchuhn te a rihcoyan yahn che ndaconan chi quendihcheró nchuhn co ino yune. Nde hua denduh nchuhn, te rechí cava che ndah yahn ne, ndiyu cava che nahn co yahn dehtenduh che va yahn ne. Tihca, te redin nduhca che redin ihyan che rihcacheh ye daya ye. Ndiyu man ye chenán ino ye che cahcacheh daya ye ihyan.

¹⁵ Andahre cuahn che tahque yahinó nchuhn, ra tin ne, ne ti nan ti ino ne rendihcheró ne u, ate nde nduco nduh ne, vá vedeyeno che quendi conán nchuhn, nde vá vedeyeno che cahco mendahn u cava che ndah yahn ne.

¹⁶ Andahre devano cuaco nducoyaca nchuhn che hua denduh nchuhn cava che ndaca che chuhnun, ate nde nduco nduh ama o ne ne, renuhn ino ne, rahn ne che nducote ama mayon u ne, chihnceh nchuhn.

¹⁷ Namin a devano nchuhn che ndiyu che chihnceh nchuhn che dechuh ama o dihno vo, chendihcheró ye nchuhn.

¹⁸ A dechuh Tito nduco tama dihno vo, chendihcheró se nchuhn, ne a devano ne te hua chihnceh se nchuhn. Namin a devano ne te nde ama nuhn hua nihnceh nuhn nchuhn, te dama vederendecadino yahn nuhn man, runecade vatechica nuhn man.

¹⁹ Dihno che yahinó nchuhn, che tihca dirun yahn ne ne, co rahco ne che rahn nan man nuhn. Ate hua, te nde muhn nde nan Dendiohs, nducuahn che redin nuhn ne, redin nuhn numacuahn vederihquentiyon yahn Dihvo vo Jesucristo, cava che tahque numa ino ne cotahno ne ihyan.

²⁰ Tihca din, te nahn che runecade chenán nchuhn cuahn che nda, cava che co yenó cava ne, ne hua ndaca yune che din castigo nchuhn, co ran. Vahinó cava nchuhn, te denan cuahn che nda, ntaca nchuhn che vate canda ne man, redin ve ne yahn vih man, tan ne nduco vih man, redin yade ne man, redin vi ne man, retumacah ne cuando nduco vih man, rih nunde ama tama ne yahn vih man, ndeh cuan ndi ne nduco vih man.

²¹ Namin vahinó, te denan cuahn che dechuh tun Dendiohs u van nchuhn ne, co cuhnán cava ne. Co nde va che cuaco cava ama yahn nchuhn che metah nto ino ne nunde che chenán cuma ne nde ro menan, metah cahcoman ne che chihnga redin ne man, che ndere rahtenan ne nduco ihyan che hua nihnevaco ne nduco ye man, che ama idihya ne man.

13

Rahn Pablo che cahñ tun ye yan Corinto

¹ Man co ino yune che ndaconan chi quendihcheró nchuhn. Nducoyaca ne che va nunde yahn ne ne, dinoca ndahco cuaco o ino ihyan, tuhme co ne castigo.

² Cuahn che ndá chi o yune ne, a ráhn nduco nchuhn te cuahn che chí tama yune ne, dín castigo nducoyaca nchuhn che a chendihco ne nunde nde a ráhn me, nde nducoyaca nchuhn che cade rahtendihco ne nunde. Man ndaconan dirún yahn ne che a ráhn cava che hua conan ne.

³ Nducote nahn nchuhn che cahco ró che quenán nan ntiyon yahn Dihvo vo Jesucristo ne, cuahn che ndá tan ne, tumacadino ne. Dihvo vo Jesucristo ne, hua dehve vah ye nchuhn, te yudo vederihquentiyon yahn ye.

⁴ Andahre quenán yah ye nan cruz, chih ye nduhca ama ihyan che nde hua rignonun chihve ye, ate ndedetuhche Dendiohs ihyan, ndahco ye vederihquentiyon tah ye. Atihnoca nuhn, andahre rahco ihyan che nde hua rignonun chihve nuhn, ate ritahno nuhn ihyan min, ne chemin che te Dendiohs vederihquentiyon, chenán cuma nuhn cava che ndah yahn ne.

⁵ Cuenedecadino nchuhn cava man ne, a ritahno ne Dihvo vo Jesucristo, o hua. Ndete che numa cuaco ritahno ne ihyan ne, quenun Vaco Ndah yahn ye nchuhn, ne ndete che hua ne, hua.

⁶ Quenán inó che codevano nchuhn te nuhn ne, ritahno nuhn ihyan min numa cuaco, quenun Vaco Ndah yahn ye nuhn.

⁷ Rica nuhn Dendiohs cava nchuhn che hua cuahtendihco ne nunde, ne hua conan cuma che dín nuhn castigo nchuhn, cuhnde ro che quenun Vaco Ndah yahn ye nuhn. Andahre ndahchenan ihyan nuhn, cahma ye che hua quenun Vaco Ndah yahn ye nuhn, ate tihca redin nuhn, te tahque nahn nuhn che runecade cuahtechica ne, che co che quendah yavenan nuhn.

⁸ Tihca, te nuhn ne, ndotenan che cahca tan nuhn yahn ihyan che redinahn ye Ndudo yahn Dendiohs ne, va che ndeva nuhn yavenan ye.

⁹ Vedeyeno yahn nuhn ne, che cotahno nchuhn Dihvo vo Jesucristo numa ino ne. Dehve dín yahn che ndahchenan ihyan nuhn. Namin revah nuhn cava ne, che nde tahque numa ino ne cotahno ne ihyan.

¹⁰ Chemin che numanahn che ametah chí ne, dirún caca cuh, dechúh yahn ne, cava che nto ino ne nunde yahn ne, ne hua conan cuma che dín castigo nchuhn cuahn che ndá tan. Tihca, te hua náhn che vederihquentiyon che te Dihvo vo Jesucristo u, cochihve deman cava che dín castigo nchuhn. Tahque ndah ne, náhn che cochihve cava che quendi cotahno ne ihyan numa ino ne.

¹¹ Dihno, man ne, Dendiohs conduco ye nchuhn. Runecade cuahtenan ne man, cuenecah yan ama tama ne chedave yahn vih man, ama no ndudo codin ne nduco vih man, ndahca cuahtenan ne nduco vih man, ne Dendiohs, ihyan min che yahino ye uvó man, redin ye che rahte dihn chedave yahn vo man ne, conduco ye nchuhn.

¹² Cuenecah ama tama ne Dendiohs vih numacuahn vedino vedenecon.

¹³ Cuendeva ne Dendiohs yahn nducoyaca diho vo che vate ye muhn.

¹⁴ Dendiohs man, Dihvo vo Jesucristo man, dín yahino ye nchuhn. Conun Vaco Ndah yahn Dendiohs nchuhn. Tihca co.

CAÇA CHE DIRUN SAN PABLO, DECHUH YE YAHN IHYAN YAHN DENDIOHS CHE VATE YE YAN GALACIA

¹ U Pablo ne, ndiyu ihyan iyehñse che chihco ye vederihquentiyon tãh che co apóstol, te a Dihvo vo Jesucristo man, Dendiohs Chida, ihyan min che ndedetuhche ye Dihvo vo van tenahn man.

² Nchuhn che ritahno ne Dihvo vo Jesucristo, che vate ne yahn yahn Galacia, u nduco nducoyaça dihno vo che chenah ye muhn nducó, dirún nuhn çaça cuh, dechuh nuhn yahn ne.

³ Dendiohs Chida man, Dihvo vo Jesucristo man, din yahino ye nchuhn, din ye che ndahça cuahtenan ne.

⁴ A Dihvo vo Jesucristo che chihco mendahn ye ihyan chih ye çaça nunde yuhn vo, ndedevahn ye uvo van ihyan nunde nduhça che nahn Chido vo Dendiohs,

⁵ ihyan min che va che ndeva nducoyaça ihyan yavenan ye numacuahn ro. Tihça co.

Va ama nan no ndudo çaça che ndevahn ihyan

⁶ Ama rahñ inó che nduco nun racondah vedame nchuhn Dendiohs, ihyan min che tendahnun ye uvo, dechuh ye Dihvo vo Jesucristo che yahino ye uvo. Man ne, riquendi ne tama nan ndudo.

⁷ Ndiyu che va tama nan ndudo ndah, ate che tahque ri ne, vate ihyan che redetohnan ye inó nchuhn, nahn ndacorun ye ndudo ndah yahn Dihvo vo Jesucristo.

⁸ Adecoduhno ihyan che cuahndudo ye tama nan ndudo che ndiyu ndudo che rahndudo nuhn, rihnevan nchuhn ne, ihyan min ne, va che conda ye, andahre u o ama ángel che çaça ye vahchetero.

⁹ Nduhça che chicuáhn nchuhn ro menan ne, man ne, ndaconan ntihton yan tama yune. Adecoduhno ihyan che cuahndudo ye tama nan ndudo che ndiyu ndudo che a chitahno nchuhn ne, ihyan min ne, va che conda ye.

¹⁰ U ne, hua rinúhn che co yeno ihyan iyehñse nducó, te che rinúhn ne, che co yeno Dendiohs. Ndete che núhn che co yeno ihyan iyehñse nducó ne, nde hua co conán nan ntihton yahn Dihvo vo Jesucristo.

¹¹ Dihno, nahn che codevano nchuhn te ndudo ndah che cahndudó, chihnevan ne ne, ndiyu vededevano yahn ihyan iyehñse,

¹² te nde ama ihyan iyehñse ne, hua chicuahn ye u. Che rahndudó ne, man Dihvo vo Jesucristo te ye, checadinó.

¹³ A checadino nchuhn nduhça ihyan u ro menan cuahn che chitahnó ðama nduco ihyan nación yahn Israel. Din tán nduco ihyan yahn Dendiohs, rihcó che decuihnó ihyan.

¹⁴ Nduhça che ritahno ihyan nación yahn Israel ne, u che tahque quendahnán che co nducoyaça combiero yahn, te numa inó quendí costum-bre yahn ihyan ndico yahn.

¹⁵ Ate Dendiohs ne, tendahnun ye u numacuahn vedeyahino yahn ye, ne chihco vih ye u nde ro che metah cuhndeyán.

¹⁶ Nda ro che nahn ye ne, dechuh ye Daya ye nan, te cuande ye ndudo yahn ye u çaça che cuahndudó van ihyan nación chenahn. Cuahn che tihça chi ne, hua cháhn chiqueruné nde ama ihyan,

¹⁷ nde hua cháhn yān Jerusalén chendihcheró ihyan che tahque menān ndi ye apóstol che co u. Tahque ndah ne, cháhn yāhn yahn Arabia. Chihno min ne, ndaconán yān Damasco.

¹⁸ Nde chihno ino nduyo ne, tuhme cháhn yān Jerusalén che ndihcheró Pedro, ne quenán nduco ye ntihton ro.

¹⁹ Atenān ihyan min nduco Jacobo, dihno Dihvo vo Jesucristo, ndihcheró ihyan. Hua ndihcheró ihyan apóstol chenāhn.

²⁰ Nde nān Dendiohs ne, ndudo cuaço che dirún yahn nchuhn.

²¹ Adiva ne, cháhn yāhn yahn Siria mān, yāhn yahn Cilicia mān.

²² Tahn min ne, dihno vo che ritahno ye Dihvo vo Jesucristo, che vate ye estado yahn Judea ne, hua rendihche ye u.

²³ Che devano ye yāhn ne, atenān che rente ihyan che a u che din tán ro menān me nduco ihyan che ritahno ye Dihvo vo mān, che rahndudó ndudo che rihcó che decuihnó ro menān me mān,

²⁴ ne rendeva ye yavenān Dendiohs cāvá.

2

Pq̄blo ne, nevahnecon ihyan apóstol chenāhn ihyan

¹ Chihno ndichecon nduyo ne, cháhn tāmā yune yān Jerusalén nduco Bernabé, ne quendá Tito.

² Cháhn, te checadinó te tihcā nahn Dendiohs. Min ndo dāma demān ihyan che ndinān ye yahn yāco, ne necāh cuandé ihyan yahn ndudo ndah che rahndudó vān ihyan nación chenāhn. Tihcā dín, te nahn cadinó deh cāhma ye yahn ntiyon yāhn, a cochihve o hua.

³ Nde Tito che nduco se u, andahre sahn tāmā nación se, ate hua din ye fuerza che conan seña sahn.

⁴ Ama o sahn che redin cā se che ritahno se Dihvo vo Jesucristo ne, cuāhn ndeh chēndā se min, rāno se nuhn, nahn cua cuande se nuhn dehco che vatēmān ino nuhn, ritahno nuhn Dihvo vo Jesucristo, te nahn se che ndaconan quendi nuhn ley che dirun Moisés, din che denduh ino nuhn.

⁵ Ate nde tah hua tumacāh nuhn yahn sahn chahn, te rendedecadino nuhn cāva nchuhn, ne hua cāh yune nuhn che tihdenan se costumbre ndico nān ndudo ndah yahn Dihvo vo Jesucristo.

⁶ Me ihyan ndinān chahn ne, a ndinān ye o hua, chemin ne, nde hua cuande yāhn, te Dendiohs ne, dāma no rendihche ye nducoyāca ihyan. Ihyan chahn ne, metah nde āma nān ndudo che quendudonān devano ye che va che cacuahñ ye u.

⁷ Tahque ndah ne, tumacadino ye che mān Dendiohs nahn ye ntiyon u che cuahndudó ndudo ndah yahn Dihvo vo Jesucristo vān ihyan nación chenāhn nduhcā che nahn ye Pedro che cuahndudo ye vān ihyan nación yahn Israel.

⁸ Nduhcā che cāh dito Dendiohs Pedro nān ntiyon vān ihyan nación yahn Israel ne, tihcā cāh dito ye u nān ntiyon vān ihyan nación chenāhn.

⁹ Jacobo mān, Pedro mān, Juān mān, ihyan chahn che ndinān ye, nducote tumacadino ye te numacuahn vedeyahino nte Dendiohs vederihquentiyon u ne, nevahnecon ye nuhn, u nduco Bernabé, ne nte cāde ye che quendi nuhn cuahndudo nuhn vān ihyan nación chenāhn, ne mān ye ne, quendi ye cuahndudo ye vān ihyan nación yahn Israel.

¹⁰ Atenān che chica ye nuhn ne, che din nuhn cuande cāva ihyan chevāh che vate ye min. Chemin ne, numacuahn vedeyeno dināhn.

Pablo ne, yǎhve ye Pedro min yǎn Antioquía

11 Adive cuahn che chahn Pedro yǎn Antioquía ne, tumacadinó che hua runecade ye, ne quenan cuma che yǎhvé ihyán.

12 A menǎn ne, reh ye dama nduco ihyán nacióń chenǎhn. Ate cuahn che ndǎ ama o sahn che dechuh Jacobo ne, din vih ye, ametah cheh ye dama nduco ihyán chahn, te vah ye ihyán che riquendi ye redinahn ye ley che dirun Moisés.

13 Nduco chemin ne, chihco ro ye che o nan o chende ye, ne nducoyaca ihyán nacióń yahn Israel che rendo dama ye min, nde Bernabé ne, dama chi ye nduco ye.

14 Che tihca din ye ne, chihnde ro yahn ye che hua runecade riquendi ye ndudo ndah yahn Dihvo vo Jesucristo. Chemin che ráhn rí Pedro nan nducoyaca ihyán ndiyaco: “Di, che sahn nacióń yahn Israel di, a metah ro che dama ri nduco dihno vo ihyán nacióń chenǎhn, chihcoman costumbre yahn ihyán nacióń yehn. Man ne, ztaça che nahn din fuerza dihno vo ihyán nacióń chenǎhn che dinahn ye costumbre yahn ihyán nacióń yehn?”

Ihyán nacióń yahn Israel man, ihyán nacióń chenǎhn man, che ritahno ye Dihvo vo Jesucristo ne, ndevahn ye

15 Nuhn ne, ihyán nacióń yahn Israel nuhn, ndiyu ihyán nunde nuhn nduhca ihyán nacióń chenǎhn.

16 Ate devano nuhn che atenan che cotahno vo Dihvo vo Jesucristo che ndeva Dendiohs uvo, ndiyu che dinahn vo ley che dirun Moisés. Chemin che nah nuhn ne, cava che ndeva Dendiohs nuhn ne, ndotenan che dinahn nuhn che rihquentiyon ley min ne, chitahno nuhn Dihvo vo Jesucristo. Tihca din nuhn, te andahre dinahn ihyán che rihquentiyon ley min, ate hua cava chemin ndeva Dendiohs ihyán.

17 Man che a chitahno nuhn Dihvo vo Jesucristo, che nahn nuhn che ndeva Dendiohs nuhn ne, ndete che quendaḥ ro yahn nuhn che ihyán nunde nuhn nduhca ihyán nacióń chenǎhn ne, za cahquino vo cahmo vo che Dihvo vo quendiḥco ye nunde ne? Hua.

18 Ama te a chihcoman nuhn ley che dirun Moisés ne, ndete che ndaconan nuhn dinahn nuhn che rihquentiyon ne, nduco chemin cahco ro nuhn che ihyán nunde nuhn.

19 Cuaco che tihca, te u ne, a nan ley min tumacadinó che hua ndaca vederenchahco che dinahn vederihquentiyon yahn man, che tahque ndah cochantinó Dendiohs man.

20 Anduhneca ndete che quenan yǎh dama nduco Dihvo vo Jesucristo, ihyán min che Daya Dendiohs. A ihyán min che rihquentiyon ye u, ndiyu man. A yahino ye u, ne chihco mendaḥn ye ihyán chih ye cava. Man ne, nducuahn che redin ne, a yahn che ritahnó ihyán.

21 Ndiyu che duche rinó vedeyahino yahn Dendiohs, ate hua co ndeva ye ihyán cuande yahn che dinahn ye ley che dirun Moisés, ne chemin che quenan cuma che chih Dihvo vo Jesucristo.

3

Che ritahno vo Dihvo vo Jesucristo ne, hua redotenan vo ley che dirun Moisés

1 Nchuhn dihnó che vate ne yǎn Galacia, a te cuande ndah nuhn nchuhn ndudo yahn Dihvo vo Jesucristo, ihyán min che quenan yǎh ye. Ate man ne,

ama tundo ndaconda ne, chitahno ne yahn ihyan che chihnceh ye nchuhn, chihcoman ne che redinahn ne ndudo cuaco.

² Nahn che cuahte nchuhn ndedecadino ne. ¿A te Dendiohs Vaco Ndah yahn ye nchuhn yahn che dinahn ne ley che dirun Moisés, o te ye yahn che chitahno ne ndudo ndah yahn Dihvo vo Jesucristo?

³ Hua co nchuhn chevah ca tundo. A quenun Vaco Ndah yahn Dendiohs nchuhn yahn che chitahno ne, ne hua ndahca che ndevanan ne richahtino ne ley min.

⁴ Ndete che cahcoman nchuhn ndudo ndah yahn Dihvo vo Jesucristo ne, nde ama nan dehtenduh che a din Dendiohs nduco ne, hua cochihve yahn ne. Ate quenun ino che cochihve yahn nchuhn.

⁵ Cuahn che redin Dendiohs che renun Vaco Ndah yahn ye nchuhn, rinahn vederihno van ne ne, ndiyu cava che redinahn ne ley che dirun Moisés, te cava che ritahno ne Dihvo vo Jesucristo.

⁶ Cua cuande ne nduhca che chinahn nduco Abraham. Ihyan min ne, chitahno ye Dendiohs, ne cava chemin no che nedin yahn Dendiohs ihyan.

⁷ Cuedevano nchuhn te nducoyaca ihyan che ritahno ye Dendiohs ne, riquendi ye yune yahn Abraham.

⁸ Nde a rahn ne ne, a ndirun nan Ndudo yahn Dendiohs te ihyan naci6n chenahn che cotahno ye ne, nedin yahn Dendiohs ihyan. Ndudo ndah min ne, a ndudo che cah Dendiohs Abraham, rahn ye tuhca: “Vedeyahino che quenun cumá ndoque ne, a namin che ndah yahn ihyan nducuah naci6n.”

⁹ Nducote tihca ne, nducoyaca ihyan che ritahno ye ne, nedin yahn Dendiohs ihyan nduhca che nedin yahn ye Abraham yahn che chitahno ye.

¹⁰ Me nducoyaca ihyan che richahtino ye che ndevahn ye nduco che dinahn ye ley che dirun Moisés ne, va che conda ye, te nde ama ihyan hua cocha ye dinahn ye ley min. Va che conda ye, te a ndirun nan Ndudo yahn Dendiohs tuhca: “Nducoyaca ihyan che hua dinahn ye nducuah che ndirun nan ley ne, va che conda ye.”

¹¹ Nducote tihca ne, a ndero ndi che nde ama ihyan hua tuno ye nan Dendiohs nduco che dinahn ye ley min. A namin no tun ndirun nan Ndudo yahn Dendiohs tuhca: “A ihyan che ritahno ye che ndedevahn Dendiohs ihyan, ndeva ye ihyan.”

¹² Ate hua tihca ley che dirun Moisés, te chemin ne, rihquentiyon che dinahn ihyan ndiyu che cotahno ye. Chemin ne, a ndirun nan ley min tuhca: “Ihyan che dinahn ye nducuah che rihquentiyon ley cuh ne, ndevahn ye.”

¹³ Dihvo vo Jesucristo ne, a ndedevahn ye uvo, metah che conda vo nduhca che rihquentiyon ley min. Man ye chuhrihn ye menun vo, chi ye ye castigo che va che co vo. Chinahn nduco ye nduhca che a ndirun nan Ndudo yahn Dendiohs tuhca: “Nducoyaca ihyan che a ndinda ye ne, renan yah ye.”

¹⁴ Nduco tihca ndedevahn ye uvo cava che din ye che conahn ndudo che necah Dendiohs Abraham cava che ndah yahn ihyan naci6n chenahn. Namin nduco tihca ne, nducoyaco vo che ritahno vo ne, conun Vaco Ndah yahn Dendiohs uvo nduhca che a cah ye ndudo yahn ye.

¹⁵ Dihno, cua cuande nchuhn ejemplo cuh che ntihton yan: Cuahn che redendah ihyan ama cava, redin ye firma, rihco ye ne, nde ama ihyan hua co cahca tan ye yahn, nde hua co ndedendah ye nduhca che nahn ye.

¹⁶ Me ndudo yahn Dendiohs che cah ye Abraham nduco ndata yahn ye ne, che ndirun che ndata yahn ye ne, conahn che ama no ihyan nan ndata yahn ye, ndiyu nducoyaca ye. Ihyan min ne, a Dihvo vo Jesucristo.

17 Cuedevano nchuhn te Dendiohs ne, çah ye ndudo yahn ye Abraham, ne çah dito ye. Me ley che dirun Moisés chihno cun ciento ndico ndiche nduyo adiva ne, hua co che çahca tan yahn ndudo min.

18 Che çah Dendiohs ndudo yahn ye Abraham che din ye che ndah nduco nducoyaça ihyan ne, conahn nduco ye yahn che tihça chi yeno Dendiohs ndiyu yahn che dinahn ye ley min.

19 Nducote tihça ne, co vate ihyan che ndedecadino ye: “¿Dehra cochihve ley che dirun Moisés tuhme ne?” Cuedevano nchuhn te chihnde adiva atenan çava che chihco ro nunde yahn ihyan nde nda ro che nan ndata yahn Abraham quenda ihyan min che a nente çade Dendiohs nduco Abraham yahn ye. Dechuh Dendiohs ángel, ndahco ye ley min taħ Moisés çava ihyan yan.

20 A ndero ndi che chichihve Moisés yahn Dendiohs man, çava ihyan yan man. Namin a ndero ndi che Dendiohs che çah ye ndudo yahn ye Abraham ne, a ihyan min no tun che ndahco ye ley yahn ye taħ Moisés.

21 Andahre tihça, ate ley yahn ye che ndahco ye taħ Moisés ne, ndiyu che rendahco çade ye ndudo che çah ye Abraham, te hua nedin yahn ye ihyan, ndevahn ye nduco che dinahn ye ley min.

22 Tahque ndah ne, rihco ro ley min che va che conda nducoyaça ihyan, din nunde yahn ye. Tihça rihco ro ley min çava che ihyan che cotahno ye Dihvo vo Jesucristo ne, ndeva Dendiohs ihyan, nduhça che a necah ye ndudo yahn ye.

23 Numanahn che metah nda Dihvo vo Jesucristo, cotahno vo ihyan ne, chihco rino ley min uvo.

24 Anduhneça ndete che din ley min cuñado uvo, tihyon yune uvo çava che cotahno vo ihyan min, nedin yahn Dendiohs uvo.

25-26 Ate man che a nedin daya Dendiohs uvo yahn che ritahno vo Dihvo vo Jesucristo ne, ametah rendotenan vo ley min.

27 Nducoyaço vo che chedenune vo, nevahnecon vo Dihvo vo Jesucristo ne, ndo vo ihyan yahn ye.

28 Man ne, nde hua redin yahn che ndahchenan vih vo. Dehve din yahn atanochan ihyan yahn ye, a ihyan nación yahn Israel ye, o ihyan tama nación ye, a redin ye ntiyon yahn ihyan, o redin ye ntiyon yahn man ye, a ndahta ye, o çahn ye. Hua dehve din yahn tačan vo, te che ndichahtino vo Dihvo vo Jesucristo ne, a ðama no nducoyaço vo.

29 Nducote a yahn Dihvo vo Jesucristo uvo ne, riquendi vo yune yahn Abraham, ne ndeva Dendiohs uvo nduhça che a necah ye ndudo yahn ye.

4

1 Cua cuande nchuhn tama ejemplo: Ama sahn dihn che va che ndonda taħ se vedecuihca yahn chida se ne, numanahn che lihn ca se ne, rendihche ihyan sahn anduhneça mozo, andahre sahn min co yahn se nducuahn.

2 Va ihyan che redin ye cuñado sahn man, rendihche ye çava se man, nde nda ro che ndahco chida se dehtenduh yahn ye taħ se.

3 Atihnoça uvo, te ro che metah cotahno vo Dihvo vo Jesucristo ne, anduhneça cheçahya uvo, riquendi vo costumbre yahn ihyan ndico yuhn vo.

4 Ate cuahn che tuno ro che a ndihco çade Dendiohs ne, dechuh ye Daya ye. Ihyan min ne, ndo ye ihyan iyehense, chihndeyan ye, ne dinahn ye ley che dirun Moisés,

5 çava che nduco tihça ndedevahn ye uvo yahn vederihquentiyon yahn ley min, ne nedin daya Dendiohs uvo.

⁶ Mān che a nedin ḍaya Dendiohs uvo ne, dechuh ye Vaco Dihvo vo Jesucristo, ihyan min che Ḍaya ye, conun chete chedave yuhn vo, ne covāh tuhca: “Ndiḥ che Chidá.”

⁷ Nducote tihca ne, a ndero ndi che ndiyu ihyan vane uvo. A ndevahn vo, nedin ḍaya Dendiohs uvo, ne ndeva ye uvo yahn che ritahno vo Dihvo vo Jesucristo.

Pablo ne, rendedecadino ye cava ihyan che ritahno ye Dihvo vo Jesucristo

⁸ Ro menān me ne, vatechica vane nchuhn nan Dendiohs, nde hua devano ne che va ye, rendeva ne yavenān dehtenduh che ndere redin ne dendiohs yahn ne.

⁹ Ate mān che a nevahnecon ne Dendiohs, nedin yahn ye nchuhn ne, ḷtaça che ndaconan ne dinahn ne costumbre chemin chan che nde hua cochihve?

¹⁰ Nchuhn ne, renevahnecon ne dehtenduh vihco mān, rihco vih ne iyo mān, nduyo mān, che raḥco ne che caḥnda.

¹¹ Rendedecadinó che a chinda ntiyon che dín van ne, chicuáhn ndudo ndah yahn Dihvo vo Jesucristo nchuhn.

¹² Dihno, nducote ḍama chi vo nduco vih ro menān me ne, ricá nchuhn che quendi ne yune yáhn, caḥcomān ne costumbre ndico nduhca che a chihcomān. Quenan inó che dinahn ne che ricá nduhca che din ne ro menān me.

¹³ A devano nchuhn te yahn che chi cáh, che quenān yan vāco ne, ne chemin che ndāca yune che caḥndudó ndudo ndah yahn Dihvo vo Jesucristo, chihnevan ne.

¹⁴ Andahre ndāca yune che ndaḥchenan nchuhn u yahn che cáh, ate hua din ne, nde hua chacondāh vedāme ne u. Tahque ndah ne, nevahnecon ne u, ndihche ne u anduhneca ndete che ama ángel yahn Dendiohs u mān, anduhneca mān Dihvo vo Jesucristo u mān.

¹⁵ ḷA chinān nchuhn vedeyahino che chahtenan cuma ne nducó ro menān me ne? Ama ndedecadino ne yahn cah che quenān ndutinān, nde a rino ne che tico ne ndutinān ne, te ne u.

¹⁶ Mān ne, ḷa racondāh vedāme nchuhn u yahn che riyahvé nchuhn che cuahtechica ne nduhca che nahñ Dendiohs ne?

¹⁷ Sañn che tihca rinun se nchuhn ne, ndiyu che yahino se nchuhn, te yahn che nahñ se che cuacondāh vedāme ne nuhn, nevahnecon ne sañn.

¹⁸ Codin nun ino nchuhn, codin ne che ndah cuahn ḍama, ndiyu demān cuahn che quenún van ne.

¹⁹ Ḍayá che yahinó nchuhn, ama rechuhríhn che rendedecadinó cava nchuhn, ne quendi chuhríhn nde ndā ro che conan dinahn ne ndudo yahn Dihvo vo Jesucristo nduhca che redin yahn.

²⁰ Ama náhn ndete che a quenún van nchuhn, ne cacuáhn nchuhn nduco rino nduco ndah cava che conahn ne, te ama rendedecadinó cava ne.

Ejemplo yahn Agar nduco Sara

²¹ Nchuhn che nahñ nevahnecon ne ley che dirun Moisés, ḷa renahn ne nducuahn che rihquentiyan ne?

²² Nan ley min ne, ndirun che Abraham ne, ndāca o ḍaya ye. Ama se ne, chacoyahn tañ decahya yahn ye che ndere quenān ye nduco te, ne tama se ne, chacoyahn ihyan ndahta yahn ye.

²³ Tañ decahya yahn ye ne, ndāca ḍaya te yahn che din chihyo ye tañn. Ate ihyan ndahta yahn ye ne, ndāca ḍaya ye yahn che a tihca necañ Dendiohs ndudo yahn ye.

²⁴⁻²⁵ Che tihça chi ne, covahn ama ejemplo che tuhça conahn: Nduh che o ihyan ndahta chahn ne, anduhneça o ndudo che chihco Dendiohs. Agar, tañh decahya che ndere quenan te nduco Abraham ne, anduhneça ley che çah Dendiohs Moisés min Cuete Sinai, nación yahn Arabia. Ihyan yan Jerusalén man, ihyan chenahn man, che renevahneçun ca ley min ne, anduhneça sahn decuah deman che chacoyahn tañh min, che rihquentiyon ihyan sahn.

²⁶ Ate uvo che ritahno vo Dihvo vo Jesucristo ne, hua tihchan vo, te quenan cuma che cuahtenan vo vahchetero.

²⁷ Tihça, te a ndirun nan Ndudo yahn Dendiohs tuhça:
Di che hua rendaça daye, che nde hua devene deh che renan yah chete ndahta che racoyahn ye,
co yene, nde tuno cuah yene,
te tahque yahn daya ndahta deman
che co ndahta che va inchahn ye.

²⁸ Dihno, uvo ne, anduhneça Isaac, daya Sara, ihyan min che a neça Dendiohs ndudo yahn ye che va che cuhndeyan ye.

²⁹ Cudevano ne te ro menan me ne, sahn che chacoyahn tañh decahya che ndere quenan te nduco Abraham ne, din tañ se nduco sahn daya Sara, sahn min che çah Vaco Ndah yahn Dendiohs fuerza chaco se che ndaca ye sahn. Atihnoça man ro cuh, te ihyan che renevahneçun ca ye ley che dirun Moisés ne, redin tañ ye nduco uvo che ritahno vo Dihvo vo Jesucristo.

³⁰ Ate dehve din yahn chemin, te a ndirun nan Ndudo yahn Dendiohs tuhça: “Cuacondah vedame tañh decahya me nduco sahn daya te.” Atihnoça ihyan che renevahneçun ca ye ley che dirun Moisés, te hua co cuande ye van ihyan yahn Dendiohs.

³¹ Dihno, nducote tihça ne, cudevano ne te uvo ne, anduhneça daya Sara, ndiyu nduhça daya tañh decahya me.

5

¹ Dihvo vo Jesucristo ne, a ndedevahn ye uvo. Man ne, ametah nahn che çah rihñ man vo uvo, quendi vo costumbre ndico che nevahneçun vo ro menan.

² U Pablo ne, riyahvé nchuhn. Cuihcovan ne che çahmá. Ndete che cuahneçun ne che conan seña nchuhn ne, nde hua cochihve yahn ne che chitahno ne Dihvo vo Jesucristo.

³ Namin ráhn rí nchuhn tama yune te ihyan che cuahneçun ye che conan seña ihyan ne, quenan cuma che dinahn ye nducuahñ che rihquentiyon ley che dirun Moisés.

⁴ Duh nchuhn che rañco ne che ndeva Dendiohs nchuhn yahn che redinahn ne ley min ne, a chacondah vedame ne Dihvo vo Jesucristo man, a denda ne, te metah yahino Dendiohs nchuhn man.

⁵ Uvo, nducote ritahno vo Dihvo vo Jesucristo man, nducote quenun Vaco Ndah yahn Dendiohs uvo man ne, chenani ino vo che ndeva Dendiohs uvo.

⁶ Che ritahno vo Dihvo vo Jesucristo ne, hua rignon chihve a chenani seña uvo, o hua. Che rignon chihve ne, che cotahno vo ihyan min man, cuahtenan cumo vo vedeyahino man.

⁷ Ro menan me ne, ama ndaħça dinahn nchuhn vederihquentiyon yahn Dihvo vo Jesucristo. Man ne, ¿duh rinun nchuhn che cuacotañh ne?

⁸ Dendiohs, ihyan min che tendahnun ye nchuhn ne, a ndero ndi che ndiyu ihyan min din ye che ndacorune vederendecadino yahn ne.

⁹ Cudevano nchuhn te ndudo yahn sahn min che rinun se nchuhn ne, anduhneça tahsiñn ya che rendih van nducuahñ ya che.

¹⁰ U ne, quenan inó Dihvo vo Jesucristo che din ye che quendi nchuhn ndudo che chicuáhn nchuhn. Me adecoduhno sahn min che rinun se nchuhn ne, va che din Dendiohs castigo sahn.

¹¹ Dihno, u ne, hua rihquentiyón ihyan che conan seña ihyan, quendi ye ley che dirun Moisés, te ndete che tihca redín ne, ihyan nación yáhn nde hua din tán ye nduco man, nde hua co tán ye che rahndudó che quenan yah Dihvo vo Jesucristo nan cruz çava nducoyaco vo man.

¹² Sahn che vatechica se rinun se nchuhn che conan seña nchuhn ne, tahque ndahca che ama yune no cahca nduh se sahn.

¹³ Me nchuhn dihnó ne, a din Dihvo vo Jesucristo che vatemán ino ne. Ametah va che cah rihn ne nchuhn, dinahn ne che rihquentiyon ley ndico me. Ate hua ndedecadino ne che nducote a vatemán ino ne ne, co cuahtechica ne vedeyeno yahn man ne, cuahtendiho ne nunde. Tahque ndah ne, numacuahn vedeyahino cuinan ama tama ne vih,

¹⁴ te vederihquentiyon yahn Dendiohs che menan vyhca ne, tuhca: “Codin yahine nducoyaca ihyan nduhca che yahine man di.”

¹⁵ Ate ndete che van man nchuhn condinun condinahn ne vih ne, cuihco ne cudado, te denan co ndache nducoyaca ne, ne din vi ama tama ne yahn vih.

Vaco Ndah yahn Dendiohs ne, rihca tán che quendi vo vedeyeno yahn man vo

¹⁶ Ráhn rí nchuhn che dinahn ne vederihquentiyon yahn Vaco Ndah yahn Dendiohs ça va che hua ndaca yune che cuahtechica ne vedeyeno yahn man ne, cuahtendiho ne nunde,

¹⁷ te nduco chemin ne, recah ndache ne Vaco Ndah yahn Dendiohs. Chemin che hua ndahca che cuahtechica ne vedeyeno yahn man ne, cuahtendiho ne nunde.

¹⁸ Ndete che recah yune ne che rihquentiyon Vaco Ndah yahn Dendiohs nchuhn ne, ametah quenana cuma che dinahn ne vederihquentiyon yahn ley che dirun Moisés.

¹⁹ A ndero ndi ihyan che vatechica ye vedeyeno yahn man ye, rahtendiho ye nunde, te ndere rahtechica ye nduco ihyan che hua nihnevaco nduco ye man, redin ye dehtenduh che chihnga man, metah vedecuihno nan ye man,

²⁰ rendeva ye yavenan dehtenduh che ndere redin ye dendiohs yahn ye man, redin cuah ye man, rendihche tán ye vih man, rahte canda ye nduco vih man, redin dihta ye man, ri tán ye man, redin cheche chedave yahn ye nduco ihyan chenahn man, rihco canda ye van ihyan man,

²¹ redin ve ye man, rihno ye vih man, rahtechica coh ye man, a cudado che reh no ye vate ye man, a ndeh nan ca nunde chemin chan rahtendiho ye man. Ndaconan riyahvé nchuhn te nducoyaca ihyan chemin chan ne, hua nedin yahn Dendiohs ihyan.

²² Ate ihyan che recah yune ye che rihquentiyon Vaco Ndah yahn Dendiohs ihyan ne, tuhchan ye: Chenan cuma ye vedeyahino man, vedeyeno man, ndahca chenana ye nduco ihyan chenahn man, chahtino ye man, ndah ihyan ye man, redinahn ye ndudo yahn ye man,

²³ necun ye man, hua riquendi ye vedeyeno yahn man ye, rahtendiho ye nunde man. Ihyan chahn ne, rihquentiyon Vaco Ndah yahn Dendiohs ihyan, ne ametah quenana cuma che dinahn ye ley che dirun Moisés.

²⁴ Ihyan chahn ne, a yahn Dihvo vo Jesucristo ihyan, ne ametah riquendi ye vedeyeno yahn man ye, rahtendiho ye nunde.

²⁵ Nducote a ndacorun Vaco Ndah yahn Dendiohs vederendedecadino yuhn vo, ndo vo anduhneca ihyan ra ne, nahn che nan nducuahn che redin vo ne, din vo nduhca che nahn.

²⁶ Hua din yahn che din cun vo man, din ve vo man, ndaca yune che co tan ama tama vo nduco vih.

6

Nduhca che nahn che cuahtechico vo

¹ Dihno, ndete che ama cha ihyan van nchuhn denan condihco ye nunde ne, nchuhn che redinahn ne vederihquentiyon yahn Vaco Ndah yahn Dendiohs, coyahve ne ihyan nduco rino nduco ndah cava che nto ino ye nunde min, ndaca ye vederenchahco. Nahn che ama ndah cahco ama tama ne cuidado, te denan nduco ne condihco ne nunde.

² Cuinan ama tama ne vih, te tihca rihquentiyon Dihvo vo Jesucristo.

³ Ndete che rahco ama cha nchuhn che ama rigonun chihve ne cuahn che hua cuaco ne, rihneheh man ne nchuhn.

⁴ Quenan cuma che ndedecadino queri ama ne yahn dehtenduh che redin ne, hua rendotenan che cua cuande ne ihyan chenhahn. Me ndete che runecade ne ne, va deh cuande che co yeno ne.

⁵ Tihca, te queri ama ihyan ne, cah rihn man nunde yahn ye ihyan.

⁶ Ihyan che rahn ye ndudo ndah yahn Dihvo vo Jesucristo ne, nahn che dama co ye nduco ihyan ricuahn yahn ye, din ye dehtenduh che runecade.

⁷ Hua co nchuhn chevah ca tundo, ndedecadino ne che co cahneheh ne Dendiohs, te tuno ca nunde yahn ihyan ne, a tihca va che nedihve ye.

⁸ Ndete che cuahtechica ye vedeyeno yahn man ye, cuahtendihco ye nunde ne, va che conda ye. Ate ndete che dinahn ye vederihquentiyon yahn Vaco Ndah yahn Dendiohs ne, cuahtenan ye vahchetero numacuahn ro.

⁹⁻¹⁰ Chemin che quenan cuma che numacuahn chedave yuhn vo din vo che ndah nduco nducoyaca ihyan, menan vihca nduco ihyan che dama ritahno vo nduco ye Dihvo vo Jesucristo, te ndete che tihca din vo cuahn dama ne, ndeva Dendiohs uvo.

¹¹ Condihche nchuhn nduhca che a ndero ndi che ama rahte letra redirun man yahn ne.

¹² Sahn che redin se fuerza nchuhn che conan seña nchuhn ne, tihca redin se, te nahn se che quendah yavenan se nan ihyan naci6n yahn Israel man, hua nahn se che din tan ye nduco se yahn che rahndudo se che quenan yah Dihvo vo Jesucristo cavo vo man.

¹³ Sahn chahn ne, chenan seña sahn, ate hua redinahn se nducuahn che rihquentiyon ley che dirun Moisés. Che nahn se che conan seña nchuhn ne, atenan cava che din yade se che sahn chahn chihquentiyon se che conan seña nchuhn. A chemin che vedeyeno yahn se.

¹⁴ Ate u ne, atenan che chih Dihvo vo Jesucristo, quenan yah ye nan cruz, ndedevahn ye u ne, a chemin no che vedeyeno yahn, te nduco chemin chihcoman che quechicá vedeyeno yahn man, quendihco nunde.

¹⁵ Uvo che ritahno vo Dihvo vo Jesucristo ne, hua dehve din yahn a chenan seña uvo, o hua. Che rigonun chihve ne, che ndacorun vo vederendedecadino yuhn vo, ndo vo anduhneca ihyan ra.

¹⁶ Nducoyaca ihyan che redinahn ye vederihquentiyon cuh man, ihyan chenhahn che namin ndi cuande ye van ihyan yahn Dendiohs man ne, ricá Dendiohs che din yahino ye ihyan, din ye che ndahca cuahtenan ye.

¹⁷ Che cuahn ca ne, ametah nahn che denduh nde ama nchuhn u nduco vedetundo yahn ne che ritahno ne yahn sahn chahn. Cuedevano nchuhn te

che chenan muhn chenan min yato u ne, a yahn che redin ntiyon yahn Dihvo vo Jesucristo.

¹⁸ Dihno, Dihvo vo Jesucristo din yahino ye nducoyaca nchuhn. Tihca co.

CAÇA CHE DIRUN SAN PABLO, DECHUH YE YAHN IHYAN YAHN DENDIOHS CHE VATE YE YAN EFESO

¹ U Pablo, apóstol yahn Dihvo vo Jesucristo che tendahnun Dendiohs u, dirún çaça cuh, dechuh yahn nchuhn ihyan yahn Dendiohs che vate ne yan Efeso, ritahno ne numa ino ne Dihvo vo.

² Chido vo Dendiohs man, Dihvo vo Jesucristo man, din yahino ye nchuhn, din ye che ndahça cuahtenan ne.

Redin Dendiohs che ndah nduco ihyan che ritahno ye Dihvo vo Jesucristo

³ Ndeva vo yavenan Dendiohs yuhn vo, Chida Dihvo vo Jesucristo, ihyan min che din ye nducuahn che ndah çaça chedave yuhn vo. Din ye che ritahno vo Dihvo vo, ne man ne, anduhneca ndete che vate vo vahchetero.

⁴ Nde ro che ametah cuhnde iyehñse ne, a tendahnun ye uvo çaça che co vo ihyan yahn ye man, çaça che hua cuahtendihco vo nde ama nunde nan ye man.

⁵ Numacuahn vedeyahino chihco çade ye che cotahno vo Dihvo vo Jesucristo, nedin daya ye uvo nduhça che nahn man ye.

⁶ Tihça din ye çaça che ndeva vo yavenan ye yahn vedeyahino chahte yahn ye. Nedin yahn ye uvo, te ama yahino ye uvo che cuande yahn Daya ye che yahino ye,

⁷ ihyan min che chera yun yahn ye çaça che ndevahn vo. Man ne, a nchahco Dendiohs nunde yuhn vo, te ama yahino ye uvo.

⁸ Te ndahva ye vededevano chahte uvo,

⁹ din ye che chenahn vo taça che nahn man ye, che nde hua tumacadino ihyan ro menan. Tihça din ye nduhça che a chihco çade man ye.

¹⁰ Nducote ndedevahn Dihvo vo Jesucristo ihyan yahn ye ne, chihco çade Dendiohs che ndo dama nducoyaça nducondi ihyan chahn. Nda ro yahn ne, a vahchetero, o muhn iyehñse cuh, adecotino che chenah ye, va che ndo dama ye.

¹¹ Dendiohs che redin ye nducuahn ataneca che nahn man ye ne, a tendahnun ye nuhn çaça che cotahno nuhn Dihvo vo Jesucristo, ndevahn nuhn.

¹² Tihça din ye, te nahn ye che ndeva ihyan yavenan ye che cuande yahn nuhn che tahque menan chitahno nuhn Dihvo vo Jesucristo.

¹³ Namin nchuhn che chihcovan ne ndudo ndah, ndudo cuaco che rendedevahn ihyan, a chitahno ne Dihvo vo Jesucristo, ndevahn ne. A chitahno ne ihyan, ne chemin che Vaco Ndah yahn Dendiohs che necah ye ndudo yahn ye che va che chi muhn iyehñse cuh ne, a chihco vih nchuhn.

¹⁴ Quenun Vaco Ndah yahn ye queri ama vo çaça che co devano vo che va che conahn che ndevahn vo. Chemin che ndeva vo yavenan Dendiohs, ihyan min che ama yudo vederihquentiyon yahn ye.

Chica Pablo che din Dendiohs che conahn ndah ihyan che ritahno ye Dihvo vo Jesucristo

¹⁵ Nducote tihça va che co man, nducote a checadino che riquendi nchuhn ritahno ne Dihvo vo Jesucristo man, redin yahino ne nducoyaça ihyan yahn ye man,

¹⁶ riquendi reneçah nundihve cuahn Dendiohs çaça ne queri ama yune che revah.

¹⁷ Ricá Dendiohs yahn Dihvo vo Jesucristo, Dendiohs Chida che ama yudo vederihquentiyon yahn ye, che din ye che conun Vaco Ndah yahn ye nchuhn, din che cuahtenan cuma ne vededeveno, conahn ne ndudo ndah yahn ye.

¹⁸ Ricá ihyan che din ye che codevano ne che tendahnun ye nchuhn cava che ndeva ye nchuhn man, nduhca che, numacuahn vederihquentiyon yahn ye, ndedevahn ye ihyan yahn ye man,

¹⁹ rendahcorun ye vederendedecadino yuhn vo, redin ye che rendo vo anduhneca ihyan ra man. A numacuahn vederihquentiyon min,

²⁰ ndedetuhche ye Dihvo vo Jesucristo van tenahn, chihco ndah ye ihyan lado tah cuaco ye vahchetero,

²¹ cava che cahcantiyon ye nducoyaca ihyan che chenan cuma ye vederihquentiyon man, nde nducoyaca angel man. Cahcantiyon ye cuahn dama, ro kuh man, ro che cochi man.

²² Ndahco Dendiohs nducuahn vederihquentiyon tah ye, ne chaconahn ye ihyan che conan ye yahn nducoyaca ihyan yahn ye.

²³ Van nducoyaca ihyan chahn ne, anduhneca ndete che ri numa man ye. Ihyan min ne, rihquentiyon ye numachahte.

2

Ndedevahn Dendiohs ihyan yahn ye

¹ Ro menan me ne, anduhneca ndete che a ndih vo, nedin nunde yuhn vo. Ate man ne, ndo van Dendiohs nduco vo, nedin yahn ye uvo.

² Ro min ne, din vo nducuahn che hua ndah, dinahn vo nduhca che nahn chundah, sahn min che nde meniyan rihquentiyon se vaco chihnga man, ihyan che rahcotahn ye yahn Dendiohs man.

³ Anduhnecan ihyan chahn, tihchan nducoyaco vo ro menan, te chahtechico vo vedeyeno yahn man vo, chahtendihco vo nunde. Chemin che a vate mendahn vo ro min che co vo castigo yah yahn Dendiohs.

⁴ Ate Dendiohs, nducote ama chahte vedevahino quenan cuma ye ne, ama yahino ye uvo.

⁵ Andahre anduhneca ndete che a ndih vo, din nunde yuhn vo, ate nducote chitahno vo Dihvo vo Jesucristo ne, ndo van Dendiohs nduco vo, nedin yahn ye uvo. Man ne, anduhneca ndete che a ndedetuhche ye uvo, ametah rahtechico vo vedeyeno yahn man vo, rahtendihco vo nunde. A ndedevahn ye uvo numacuahn vedevahino yahn ye.

⁶ Ndedetuhche ye Dihvo vo, chihco ndah ye ihyan vahchetero, ne anduhneca ndete che tihca din ye nduco vo, nedin dama ye uvo nduco ye.

⁷ Tihca din ye cava che cahco ro ye numacuahn ro che ama yahino ye uvo che cuande yahn Dihvo vo Jesucristo.

⁸ Din ye che chitahno vo ihyan min, ndedevahn ye uvo numacuahn vedevahino yahn ye. A yahn vedevahino yahn man ye din ye che chitahno vo, ndiyu yahn vederendedecadino yahn man vo man,

⁹ ndiyu yahn che rigonun chihve dehtenduh che nedin vo man. A tihca va cade cava che hua din yade nde ama ihyan.

¹⁰ A Dendiohs che chihco cade ye tachan ihyan uvo. Nde ro che ametah cotahno vo, a ndihco cade ye yune che quendi vo. A ihyan min che din ye che chitahno vo Dihvo vo Jesucristo.

Ndo van Dendiohs nduco ihyan che ritahno ye Dihvo vo Jesucristo

¹¹ Nducote tihca din Dendiohs nduco vo ne, cuahtenan ino nchuhn te ro menan me ne, vatechica vane ne, hua ndi cuande ne van ihyan naci6n yahn Israel che chenan seña che raconahn man ye ihyan.

¹² Ro min ne, anduhneca ndete che ametah Dihvo vo Jesucristo cava nchuhn man, hua ndi cuande ne van ihyan naci6n yahn Israel man, nde hua cava ne che nente cade Dendiohs ndudo yahn ye man. A ndere vate ne iyehñse, nde hua devano ne yahn che rendedevahn Dendiohs ihyan, nde hua devano ne che va ye.

¹³ Ro min ne, ama yahn chenán ne che cotahno ne Dendiohs. Ate man che chitahno ne Dihvo vo Jesucristo, ihyan min che chera yun yahn ye cavo vo ne, nedin yahn Dendiohs nchuhn,

¹⁴ te din Dihvo vo che ndo yan ye nduco vo. Avane ne, nuhn ihyan naci6n yahn Israel man, nchuhn ihyan tama naci6n man, din ye che ndo yan vo nduco vih,

¹⁵ chihnovi ye vedetan yuhn vo. Chihco mendahn ye ihyan, chih ye, ne nduco chemin ne, chihnovi ye vederihquentiyon yahn ley che dirun Moisés, nedin ye ama can no uvo nduco vih.

¹⁶ Quenan yah ye nan cruz, ne nduco chemin ne, chihnovi ye vedetan yuhn vo, nedin dama ye uvo nduco vih. Din ye che ndo yan Dendiohs nduco vo.

¹⁷ Tihca nda Dihvo vo Jesucristo, cahndudo ye ndudo ndah che ndo yan Dendiohs nduco vo, nuhn ihyan naci6n yahn Israel che a nedin yahn Dendiohs nuhn man, nchuhn ihyan tama naci6n che metah nedin yahn ye nchuhn man.

¹⁸ Nducote ritahno nducoyaco vo ihyan min ne, a ihyan naci6n yahn Israel uvo, o ihyan tama naci6n, dehve din yahn, te a ndo yan Dendiohs Chida nduco vo, din Vaco Ndah yahn ye.

¹⁹ Chemin che andahre ihyan tama naci6n nchuhn, ate a ndi cuande ne van ihyan yahn Dendiohs, a nedin daya ye nchuhn.

²⁰ Nchuhn ne, anduhneca ama yaco che nti nan ama name che chihco ihyan profeta man, ihyan ap6stol man. Dihvo vo Jesucristo ne, anduhneca tu che tahque richihve yahn.

²¹ Tunoca che ritahno ihyan Dihvo vo ne, anduhneca queri ama tu che ndahto che ndi ama yaco che ndi vih cava Dendiohs.

²² Namin nchuhn che ritahno ne Dihvo vo Jesucristo ne, ndo dama ne nduco ihyan yahn ye, ndi ne anduhneca ama yaco yahn Dendiohs nan che quenun Vaco Ndah yahn ye.

3

Cah Dendiohs ntiyon Pablo che cuahndudo ye ndudo ndah yahn Dihvo vo Jesucristo van ihyan naci6n chenahn

¹ A ndi cuande nchuhn van ihyan yahn Dendiohs. Chemin che, u Pablo, che quenun vacoyahn yahn che rahndudo ndudo yahn Dihvo vo Jesucristo, rihnevan nchuhn, ricá Dendiohs cava ne.

² Co a devano nchuhn che chihco Dendiohs tah ntiyon che cuahndud6 ndudo nduhca che yahino ye nchuhn.

³ Dendiohs ne, din ye che checadin6 ama ndudo ra, dirun tah yahn nchuhn.

⁴ Cuahn che ndihchenan ne ne, tumacadino ne te a chenahn ndudo ra yahn Dihvo vo Jesucristo.

⁵ Ndudo min ne, hua cah Dendiohs, checadino ihyan che chahte ye a rahn me. Ate man ne, numacuahn vederihquentiyon yahn Vaco Ndah yahn ye, recah ye, recadino ihyan ap6stol yahn ye man, ihyan che rahndudo ye ndudo yahn ye man.

⁶ Ndudo min ne, tuhca conahn: Che ihyan naci6n yahn Israel man, ihyan naci6n chenahn man, ndevahn ye dama nduco vih. Cotahno ye ndudo ndah

yahn Dihvo vo Jesucristo, ne ndedevahn Dendiohs ihyan nduhça che a nente çade ye.

⁷ Yahino Dendiohs u, ne numacuahn vederihquentiyon yahn ye, tendahnun ye u che co apóstol yahn ye, ndahco ye ndudo ndah min tãh çava che cuahndudó.

⁸ Andahre van nducoyaca ihyan yahn ye, u che tahque hua rignonun chihvé, ate ndahco ye ntiyon ndah cuh tãh çava che cuahndudó van ihyan naciön chenahn nduhça che ama chahte vedeyahino yahn Dihvo vo Jesucristo çava ye, che nde hua renan retumacadino vo.

⁹ Chihquentiyon Dendiohs che çah cuandé nducoyaca ihyan nduhça che rendedevahn ye ihyan. A ihyan min che dendah ye nducuahn che va, ne nde a rahñ me, atenañ man ye devano ye nduhça che redin ye.

¹⁰ Ate man ne, ndahco ye ndudo yahn vededevano chahte yahn ye tãh ihyan yahn ye çava che cuahndudo ye, cadino nde ángel che vate ye vahchetero.

¹¹ Nde ro che ametah cuhnde iyehñse ne, a tihça ndihco çade Dendiohs che dechuh ye Dihvo vo Jesucristo, ndedevahn ye ihyan che nevahnecun ye ihyan. Man ne, a chinahn.

¹² Nducote ritahno vo Dihvo vo Jesucristo, ndi cuande vo van ihyan yahn ye ne, co ndã vo nan Dendiohs, hua dehve rahco vo.

¹³ Chemin che nahñ che quendi nchuhn cotahno ne numa ino ne, hua dihya nun ino ne co che rechuhríñ che cuande yahn ne. Tahque ndah ne, co yeno ne che tihça rahno rí çava ne.

Nduhça che yahino Dihvo vo Jesucristo ihyan yahn ye

¹⁴ Yahn che a ndevahn nchuhn ne, chemin che revãh nan Dendiohs Chida Dihvo vo Jesucristo,

¹⁵ ihyan min che nedin daya ye nducoyaca ihyan yahn ye che chenahñ ye vahchetero man, muhn iyehñse cuh man.

¹⁶ A ihyan min che Chido vo. Ricá ihyan che numacuahn vederihquentiyon chahte yahn ye, din ye che conun Vaco Ndah yahn ye nchuhn, cotahno ne numa ino ne.

¹⁷ Ricá che conan Dihvo vo Jesucristo nduco ne, tunoca che ritahno ne. Namin ricá che quendi nchuhn numa ino ne, cuahtenan cuma ne vedeyahino,

¹⁸ çava che co conahn ndah ne nduco nducoyaca ihyan yahn Dendiohs nduhça che ama yahino Dihvo vo Jesucristo uvo.

¹⁹ Náññ che tumacadio ne vedeyahino chahte yahn ye che nde metah conan conahn vo. Nduco tihça ne, numa ino ne ndahco ne chedave yahn ne tãh Dendiohs.

²⁰ Man ne, ndeva vo yavenañ Dendiohs, ihyan min che ama yudo vederihquentiyon yahn ye, ihyan min che rí redin ye nde tahque ndeh ca che co che rico vo man, che rendedecadino vo man. A vederihquentiyon yahn ye che chenahñ cumo vo, ne chemin che redin che rinahn.

²¹ Nducoyaca ihyan che ritahno vo Dihvo vo Jesucristo ne, nducote ritahno ye ihyan ne, ndahça che ndeva ye yavenañ Dendiohs numacuahn ro. Tihça co.

4

Din Vaco Ndah yahn Dendiohs che ama ndudo ndi no vo, ritahno vo Dihvo vo Jesucristo

1 Nducote a ndedevahn Dihvo vo Jesucristo nchuhn, chemin che u Pablo, che quenún vacoyahn yahn che rahndudó ndudo yahn ye, náhn che cuahtechica ne nduhça che redin yahn che cuahtechica ihyan che tendah nun Dendiohs.

2 Cuahtechica ne nduco vedino vedeneacun, codin chahtino ne yahn vih numacuahn vedeyahino.

3 A Vaco Ndah yahn Dendiohs din che ama no ndudo ri nchuhn nduco vih. Man ne, codin nun ino ne, cuiquendi ne ndahça cuahtenan ne nduco vih.

4 Ama no ndudo ndi vo nduco vih, ritahno vo Dihvo vo Jesucristo. A ama no Vaco Ndah yahn Dendiohs che quenun queri ama vo. A tendahnun Dendiohs nducoyaco vo. Dama ndichahntino vo ihyan che ndedevahn ye uvo.

5 A ama no Dihvo vo Jesucristo. Dama ritahno nducoyaco vo ihyan. A ihyan min no cah vo ihyan, che chedenune vo.

6 Va ama no Dendiohs, Chida nducoyaco vo. A ihyan min che rihquentiyon ye nducoyaco vo. Va ye çavo vo. Rinduco ye uvo.

7 Andahre dama ritahno vo Dihvo vo Jesucristo, ate a vih vih vederihquentiyon che chenan cuma queri amo vo, te numacuahn vedeyahino te ye vederihquentiyon yahn ye uvo tunoca che nahn man ye.

8 Che tihça co ne, a ndirun nan Ndudo yahn Dendiohs tuhça: Cuahn che conahn ye vahchetero ne, quenda ye ama yahn ihyan che ndedevahn ye ihyan man, çah ye vederihquentiyon, cuahtenan cuma ihyan yahn ye man.

9 Yahn che ndirun che conahn ye vahchetero ne, conahn vo che dinoca nda ye muhn iyehñse cuh, tuhme ndaça ye.

10 Ihyan che nda ye muhn iyehñse cuh ne, a ihyan min no che conahn ye vahchetero, nuhnde tah ye vederihquentiyon çava che çahcantiyon ye numachahte.

11 A man ye çah ye ntiyon che din queri ama ihyan yahn ye. Nahn ye ne, ndonda tah ye ntiyon che co ye apóstol. Nahn ye ne, che çah ye, checadino ihyan vederihquentiyon yahn Dendiohs. Nahn ye ne, che cuahtechica ye cuahndudo ye ndudo ndah yahn Dihvo vo Jesucristo. Nahn ye ne, che din ye cudado ihyan yahn Dendiohs. Nahn ye ne, che cacuahn ye Ndudo yahn Dendiohs.

12 Tihça chaconahn Dihvo vo Jesucristo ihyan ndinan yahn yaco çava che conan ye uvo che dinahn vo ntiyon che va tah vo man, conahn ndah vo Ndudo yahn Dendiohs man,

13 nde cande cotahno nducoyaco vo ihyan min che Daya Dendiohs, conan conahn vo ndudo yahn ye. Nduhça cheçahya che rahn, ri numa vededevano yahn ne, tihça nahn che quendi vo cuahn vo ndudo yahn ye, nde conan conahn vo yahn.

14 Hua co vo nduhça cheçahya che ritahno adecodehno che rente ihyan. Hua co vo nduhça yata cuma che riquenda yuhne adecotino che nahn. Hua cotahno vo adecodehno ndudo che rente ihyan che cochi ye nahn cahñcheh ye uvo.

15 Tahque ndah ne, quendi vo numacuahn vedeyahino, cotahno vo ndudo cuaco yahn Dendiohs. Nduco tihça ne, ca rino ca rino co vo nduhça Dihvo vo Jesucristo, ihyan min che ndinan ye yuhn vo, ndi ye tin yahn nducoyaca ihyan yahn ye.

16 Nduhça che rihquentiyon tin vo numacuahn vo ne, tihça rihquentiyon ye deh che din queri ama vo. Cuahn che redinahn vo yahn ye ne, rinan ama tama vo vih çava che tahque ndahça conahn ntiyon che redin queri amo vo man, tahque chenan cumo vo vedeyahino nduco vih man.

17 Man ne, nduhça che nahn Dihvo vo Jesucristo, ráhn rí nchuhn che ametah quendi ne cuahtechica ne nduhça che vatechica ihyan che hua ritahno ye Dendiohs, rendedecadino ye dehtenduh che hua cochihve.

18 Ihyan chahn ne, hua ndahça vederendedecadino yahn ye, nde hua devano ye che rendedevahn Dendiohs ihyan, te redin vedetundo yahn ye che cheche chedave yahn ye.

19 Ihyan chahn ne, ametah devano ye deh che vedecuihno, ne ndihco mendahn ye ihyan, redin ye numa ino ye nducuahn dehtenduh che chihnga.

20-21 Ndete che cuäco che chitahno ne Dihvo vo Jesucristo, chahn ne ndudo cuäco yahn ye ne, tuhme a devano ne te hua tihça chihco çade ye.

22 Man ne, cuihcoman nchuhn vedeyeno yahn man ne che quendi ne ro menan. Chemin ne, numacuahn vederihnceh din che rinda ne.

23 Çondahcorun ne vederendedecadino yahn ne.

24 Co ne anduhneça ihyan ra che redin ye nducuahn che ndah nduhça che redin Dendiohs.

25 Nducote nahn Dendiohs che co vo ihyan ndah nduhça man ye man, dama ritahno vo Dihvo vo Jesucristo man, chemin che cuente nchuhn deman ndudo cuäco nduco nducoyaca ihyan, ametah çahma ne ndudo cuahnde.

26 Condi ne ndere co tan ne, cuahtendihco ne nunde. Ndete che va deh che din che co tan ne ne, codin nun ino ne, condo yan ne çava che hua tan ne numa ro.

27 Hua cuahnecun ne che ndaçä yune che cahnceh chundah nchuhn.

28 Ndete che vate ama o nchuhn che duco ne ro menan ne, tahque ndah cuihcoman ne vededuco, ne codin ne ntiyon che runeçade çava che co conan ne ihyan chevah.

29 Hua nte ne ndudo chihnga. Tahque ndah ne, cuente ne deman ndudo ndah nduhça che redin yahn çava che conahn ihyan yahn vedeyahino yahn Dendiohs, neçah yan chedave yahn ye.

30 Hua çah yune ne che din ndudo yahn ne che co ran Vaco Ndah yahn Dendiohs che quenun nchuhn, rihco ro che a nchuhn che ndedevahn ye nda ro yahn.

31 Hua cuahtenun ino ne vedetan. Hua chihnga çahma ne. Hua cuah çanda ne nduco ihyan.

32 Tahque ndah codin yahino ne vih. Ndete che va dehca che redinda ne ne, cuenchahco ama çama ne yahn vih nduhça che nchahco Dendiohs yahn ne che cuande yahn Dihvo vo Jesucristo.

5

Nduhça che va che cuahtechica ihyan yahn Dendiohs

1 Nducote yahino Dendiohs nchuhn, nedin yahn ye nchuhn ne, codin nun ino ne che co ne nduhça man ye.

2 Cuahtenan cuma ne vedeyahino nduhça che quenan cuma Dihvo vo Jesucristo nduco vo. Nduhça ama itecuche lihñ che chihno ihyan ite, chi te vedino nan Dendiohs, din che quenan ino ye ne, tihça ihyan min, te chihco mendahn ye ihyan, chih ye çavo vo.

3 Nducote ihyan yahn Dendiohs nchuhn ne, hua ndere cuahtenan nchuhn nduco ihyan che hua nihneçaco ne nduco ye. Hua cuahtendihco ne nde ama nunde chemin chan. Hua cuahtenan cuma ne vede idihya, ndere din yahn ne dehtenduh.

4 Hua nte ne ndudo nine man, nde ama ndudo che din che co cuihnan ne man, te hua ndahça. Tahque ndah cueneçah ne nundihve cuahn Dendiohs.

⁵ Ihyan che idihya ye ne, dāma ri ye nduco ihyan che rendeva ye yavenan dehtenduh che redin ye dendiohs yahn ye. Codevano cuāco ne te ihyan chahn man, ihyan che ndere rahtenan ye nduco ihyan che hua nihnevaco nduco ye man, ihyan che rahtendihco ye adecochano nunde chemin chan man, nde Dihvo vo Jesucristo, nde Dendiohs, hua nda cuande ye ihyan.

⁶ Cuihco nchuhn cudado che hua cahnceh nde ama ihyan nchuhn nduco ndudo tundo yahn ye, conun ye nchuhn che cuahtendihco ne nunde chemin chan, te din Dendiohs castigo yah nducoyaca ihyan che rahcotahn ye ndudo yahn ye, rahtendihco ye nunde.

⁷ Hua dāma co nchuhn nduco ye,

⁸ te ro menan me ne, tundo nchuhn, ate man ne, a chitahno ne Dihvo vo Jesucristo, ndonun cuāco vederendedecadino yahn ne. Cuahtechica ne nduhca che vatechica ihyan devano,

⁹ te ihyan devano ne, runecade ye, ne redin ye nducuahn dehtenduh che ndah man, riquendi ye nducuahn dehtenduh che cuāco man.

¹⁰ Codin nun ino ne, codin ne dehtenduh che nahn Dihvo vo Jesucristo.

¹¹ Hua dāma co nchuhn nduco ihyan tundo che ndere chenān ye iyehñse, nde hua devano ye che va Dendiohs. Tahque ndah ne, coyahve ne ihyan che hua ndahca che ndere vatechica ye, rahtendihco ye nunde.

¹² Tihca va che yahve ne ihyan. Andahre nde tuno ri cuihnan vo yahn dehtenduh che chihnga che redin ye cuahn ndeh,

¹³ ate quenān cuma che yahvo vo ihyan. Cah cuande vo Ndudo yahn Dendiohs ihyan, te co din che nto ino ye nunde yahn ye, nchahco Dendiohs yahn ye.

¹⁴ A tihca va che co, te va ama ndudo che tuhca:

Nchuhn che ndih i ne, nedin nunde yahn ne nduhca ihyan che quiyado ye, o ndih ye,

cuentuche ne, cuah ne Dihvo vo Jesucristo, ne ndedevahn ye nchuhn.

¹⁵ Nducote hua ndahca che dāma co nchuhn nduco ihyan nunde ne, cuihco ne cudado, ne runecade cuahtechica ne. Hua ndacondā ne ihyan tundo. Tahque ndah ne, cuahtechica ne nduhca ihyan che renahn ye Ndudo yahn Dendiohs.

¹⁶ Codin ne ntiyon yahn Dendiohs numa ino ne, hua denda ne ura yahn ne, te ro che vato vo ne, cahnda.

¹⁷ Chemin che nahn che conahn ndah ne vederihquentiyon yahn Dihvo vo Jesucristo, hua co ne nduhca ihyan tundo.

¹⁸ Hua cocoh nchuhn, te ihyan coh ne, redin ye dehtenduh che chihnga. Tahque ndah ne, cah yune ne che conun Vaco Ndah yahn Dendiohs nchuhn.

¹⁹ Cuendo dāma nchuhn nduco vih, cuihte ne ama o salmo man, himno man, cuendeva ne yavenan Dihvo vo Jesucristo numacuahn chedave yahn ne.

²⁰ Cuahn dāma cuenecah ne nundihve cuahn Dendiohs Chida yahn nducuahn dehtenduh che cuande yahn Dihvo vo Jesucristo.

Nduhca che va che din yahino vih ihyan che ritahno ye Dihvo vo Jesucristo

²¹ Nducote renevahnecun nchuhn Dihvo vo Jesucristo ne, cuenevahnecun ama tama ne vih, codinahn ne yahn vih.

²² Nchuhn ihyan ndahna ne, codinahn ne yahn inchahn ne, te tihca nahn Dihvo vo.

²³ Tihca, te ihyan chahn ne, inchahn ne che rihquentiyon ye nchuhn nduhca che rihquentiyon Dihvo vo Jesucristo ihyan yahn ye che ndedevahn ye ihyan.

²⁴ Nduhca che redinahn ihyan yahn Dihvo vo Jesucristo che rihquentiyon ye ne, tihca va che dinahn nchuhn nducuahñ che rihquentiyon inchaññ ne.

²⁵ Nchuhn ihyan chahn ne, codin yahino ne ihyan ndahta yahn ne nduhca che yahino Dihvo vo Jesucristo uvo ihyan yahn ye, chihco mendahn ye ihyan, chih ye

²⁶ cava che nchahco Dendiohs yuhn vo. Tihca din ye cava che ndo dave chedave yuhn vo man, chedenune vo nduhca che va cade nan Ndudo yahn Dendiohs man,

²⁷ co vo ihyan ndah yahn ye man, hua cuahtendihco vo nde ama nunde, nda vo numacuahn vederihquentiyon yahn ye nan ye man.

²⁸ Tihca va che din yahino nchuhn ihyan ndahta yahn ne. Codin yahino ne ihyan anduhneca man ne. Cuahn che redin yahino ne ihyan ne, anduhneca ndete che yahino man ne nchuhn.

²⁹ A tihca, te nde ama ihyan ne, hua rendihche tan man ye ihyan. Tahque ndah ne, redin man ye cudado ihyan, yahino ye ihyan nduhca che redin Dihvo vo Jesucristo nduco uvo ihyan yahn ye.

³⁰ Redin ye cudado uvo man, yahino ye uvo man, anduhneca ndete che uvo che yufe yahn ye man, ine yahn ye man.

³¹ Cuaco che tihca dirun, te atihnoqa ndirun nan Ndudo yahn Dendiohs: "Ihyan chahn che rihnevaco ye ne, va che cahcoman ye chida ye man, chaco ye man, cava che conan cuma ye ihyan ndahta yahn ye, ne van nduh che o ye ne, anduhneca ndete che ama no ye."

³² Che tihca ndirun ne, ama ejemplo nduhca che Dihvo vo Jesucristo nduco ihyan yahn ye ndo ye anduhneca ndete che ama no ihyan. Chemin ne, ama vededevano chahte yahn Dendiohs che cade te ye, checadino vo.

³³ Man ne, ndaconan rihquentiyon nchuhn che din yahino ne ihyan ndahta yahn ne nduhca che yahino man ne nchuhn. Me nchuhn, ihyan ndahta ne, cuenevahñecun ne inchaññ ne.

6

¹ Me nchuhn decahya ne, codinahn ne yahn indihñe yahn ne, te tihca che ndahca man, tihca nahn Dihvo vo Jesucristo man.

² Dendiohs ne, cah ye ndudo yahn ye che din ye che ndah nduco ihyan che dinahn ye vederihquentiyon yahn ye che tahque yudo. Vederihquentiyon min ne, tuhca: "Cuendeva yavenan chide man, cheque man,

³ cava che rahn conen iyehñse man, ndahca conen man."

⁴ Me nchuhn che vate daya ne ne, hua din tan ne nduco, din ne che co tan. Tahque ndah ne, cotave ne nduco cudado, cuicuahn ne ndudo yahn Dihvo vo Jesucristo.

⁵ Nchuhn che vate dihve ne, codinahn ne yahn ye numacuahn chedave yahn ne man, numacuahn vedeneñcun man, te tihca nahn Dihvo vo Jesucristo.

⁶ Codin ne ntiyon yahn ye numa ino ne, cuahn che chenahñ ye nan ne man, cuahn che amefahñ ye man. Nducote rihquentiyon Dihvo vo Jesucristo nchuhn ne, codinahn ne numacuahn chedave yahn ne nducuahñ che nahn Dendiohs.

⁷ Numacuahn vedeyeno codin ne ntiyon yahn ye. Codin ne cuande anduhneca ndete che ntiyon yahn Dihvo vo Jesucristo redin ne.

⁸ A devano man nchuhn te nducoyaco vo, a vate dihvo vo, o ametahñ ye, ndahco menun Dihvo vo Jesucristo yuhn vo tunoca ntiyon ndah che din vo, chahtenan vo iyehñse.

⁹ Nchuhn che chenahñ cuma ne ihyan redin ntiyon ne, namin codin ne che ndah nduco ye. Hua cahcantiyon ne ihyan nduco vedetan, te a devano man

ne te ama no Dihve ne Jesucristo, va ye vahchetero, chenan cuma ne nduco vih. Ihyan min ne, dama yahino ye nducoyaco vo.

Vederihquentiyon yahn Dendiohs che chenan cuma ihyan yahn ye

¹⁰ Dihno, man ne, cuenech dito ne chedave yahn ne numacuahn vederihquentiyon chahte yahn Dihvo vo Jesucristo.

¹¹ Nduhca sandado che nda se deh che ndedevahn nduco se sahn, tihca cuahtenan cuma nchuhn vederihquentiyon yahn Dendiohs cava che quendi ne numa ino ne, hua dinahn ne che cahnceh chundah nchuhn.

¹² A sahn min che rinun se uvo, ndiyu ihyan iyehse. A sahn min nduco nducoyaca vaco chihnga che vatechica van yuhne, rihquentiyon se ihyan nunde muhn iyehse.

¹³ Chemin che cuahtenan cuma nchuhn vederihquentiyon yahn Dendiohs cava che cocha ne ro che tumarande se nchuhn, ne quendi ne cotahno ne numa ino ne.

¹⁴ Nduhca sahn redin ntiyon che necah chiche se chete se nduco ima man, nduhca sandado che chenun ticua se coraza che rendedevahn nduco se sahn man, tihca cuahteyan nchuhn. Quendi ne cotahno ne ndudo cuaco yahn Dihvo vo Jesucristo man, runecade cuahtechica ne nduhca che nahn Dendiohs man.

¹⁵ Nduhca sandado che chenun cah zapato yahn se, vatendi yan se ne, tihca cuahteyan nchuhn cava che cahne, cuahndudo ne ndudo ndah yahn Dihvo vo Jesucristo che rendedevahn ihyan, redin che ndahca rahtenan ye.

¹⁶ Nduhca che quenan cuma che quenda sandado escudo che ndedevahn nduco se sahn ne, tihca quenan cuma che quendi ne cotahno ne Dihvo vo Jesucristo, cava che cocha ne cahco vane ne nducuahn vederihnceh yahn chundah che rinun se nchuhn.

¹⁷ Nduhca sandado che rahtenun tin se casco man, nda se espada man, tihca quendi ne cotahno ne Dihvo vo Jesucristo, ihyan min che ndedevahn ye nchuhn. Namin cuenevahnecon ne Ndudo yahn Dendiohs che redin Vaco Ndah yahn ye che renahn ne.

¹⁸ Numacuahn vederihquentiyon yahn Vaco Ndah yahn Dendiohs covah nchuhn cuahn dama. Cuiquendi ne cuahteyan ne. Covah ne cava nducoyaca ihyan yahn Dendiohs.

¹⁹ Namin covah ne cava u. Cuica ne Dendiohs che din ye che cuahndudo numa ino ndudo ndah yahn Dihvo vo Jesucristo che cade te ye, checadino vo.

²⁰ A dechuh ye u che cuahndudo ndudo ndah min, ne chemin che quenun vacoyahn. Covah nchuhn cava che conan ye u che cuahndudo numa ino ndudo min nduhca che redin yahn.

Chica Pablo che conan Dendiohs ihyan yahn ye

²¹ Dihno vo Tiquico che yahino vo sahn, che rinan se nuhn numa ino se nan ntiyon yahn Dihvo vo Jesucristo ne, a chihco cade, ne a dechuh sahn, quendihchero se nchuhn. Quenan nte cuande se nchuhn yahn ntiyon che redin man, nduhca che quenán man.

²² Dechuh sahn cava che checadino ne taca chenan nuhn man, cava che necah yan se chedave yahn ne man.

²³ Dihno che ritahno ne Dihvo vo Jesucristo, din Dendiohs Chida man, Dihvo vo Jesucristo man, che ndahca cuahtenan ne, cuahtenan cuma ne vedeyahino nduco vih.

²⁴ Dendiohs din yahino ye nducoyaca nchuhn che yahino ne Dihvo vo Jesucristo cuahn dama. Tihca co.

CACA CHE DIRUN SAN PABLO, DECHUH YE YAHN IHYAN YAHN DENDIOHS CHE VATE YE YAN FILIPOS

¹ Nducoyaca nchuhn che ritahno ne Dihvo vo Jesucristo, nedin yahn Dendiohs nchuhn, nduco ihyan ndinan yahn yaco man, ihyan che redin ye ntiyon ndiyaco man, che vate ne yan Filipo ne, u Pablo nduco Timoteo, che redin nuhn ntiyon yahn Dihvo vo Jesucristo, dirun nuhn caca cuh, dechuh nuhn yahn ne.

² Chida vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Revah Pablo cava ihyan che ritahno ye Dihvo vo Jesucristo

³ Queri ama yune che renecahco nchuhn ne, renecah nundihve cuahn Dendiohs.

⁴ Cuahn che revah ne, numacuahn vedeyeno ricá Dendiohs cava ne,

⁵ te, nde ro menan nde meniyon, ama rinan ne u che quechicá rahndudó ndudo ndah yahn Dihvo vo Jesucristo.

⁶ A devano cuacó te Dendiohs, ihyan min che din ye che ndo ne ihyan ra ne, quendi ye conan ye nchuhn nde nda ro che ndaconan chi tun Dihvo vo Jesucristo.

⁷ Redin yahn che ntiyon yan nducoyaca nchuhn cuahn che revah, te ama yahino nchuhn yahn che rinduco ne u nan nducuahn che numacuahn vedeyahino rete yune Dendiohs che rahno ri. Rinduco ne u cuahn che renun vacoyahn man, cuahn che rahndudó ndudo ndah yahn Dihvo vo Jesucristo man, cuahn che rahn nan intiyaahn, rahn nan ndudo min man.

⁸ A man Dendiohs devano ye che nduhca che ama yahino Dihvo vo Jesucristo nducoyaco vo ne, tihca ama yahino nducoyaca nchuhn.

⁹ Ricá Dendiohs che din ye che numacuahn vededevano man, numacuahn vederendecadino che ndahca man, tahque quendi ne cuahtenan cuma ne vedeyahino,

¹⁰ cava che tumacadino ne quendi ne dehtenduh che tahque ndah, ne dave yavenan ne, hua chendihco ne nunde cuahn che ndaconan chi Dihvo vo Jesucristo.

¹¹ Nduco tihca ne, conan Dihvo vo Jesucristo nchuhn che runecade cuahtenan ne cuahn dama, ne cava nchuhn ne, ndeva ihyan chenahn yavenan Dendiohs.

Rahn Pablo te vedeyeno yahn ye che quenan ye iyehse ne, che ritahno ye Dihvo vo Jesucristo

¹² Dihno, cuedevano ne te nducuahn che rahno ri ne, ndotenan che to nan nan ntiyon yahn Dihvo vo Jesucristo ne, redin che tahque retuhn ndudo ndah yahn ye.

¹³ Nducoyaca sandado che redin se cudado palacio yahn emperador, nde nducoyaca ihyan chenahn ne, a devano ye che quenun vacoyahn, yahn che redin ntiyon yahn Dihvo vo Jesucristo.

¹⁴ Namin a yahn che quenun vacoyahn ne, a nahn nducoyaca dihno vo ne, ndotenan che dihya nun ino ye co ne, nde tahque richahino ye Dihvo vo Jesucristo, rahndudo ye numa ino ye Ndudo yahn Dendiohs.

15 A devano nchuhn te nahñ dihno vo ne, rahndudo ye ndudo ndah yahn Dihvo vo Jesucristo, te nahñ ye che cotuhn. Me nahñ se ne, ve se man, çanda tin se man,

16 Ne rahndudo se te nahñ se che conahn vederendedecadino yahn man se. Sahn chahn ne, o nan o chende se, ne rendededecuan se çanda, te nahñ se che tahque chuhríhn, ndedecadinó man che quenún vaçoyahn.

17 Ate dihno vo chenahn ne, rahndudo ye, te yahino ye u, ne retumacadino ye che cahñecun Dendiohs che quenún vaçoyahn çava che çahma nán ndudo ndah yahn Dihvo vo Jesucristo.

18 Sahn chahn ne, andahre o nan o chende se, ate hua dehve din yahn, te nducote rahndudo se ndudo ndah yahn Dihvo vo Jesucristo ne, ri yenó.

Nde tahque co yeno cá,

19 te nducote revah nchuhn çavá man, rinan Vaco Dihvo vo Jesucristo u man ne, a devanó te ndedevahn Dendiohs u van nducuahñ che rechuhríhn.

20 Tihça, te quenán inó che hua co cuihnán, ne cuahn dama quendí cuahndudó ndudo yahn Dihvo vo Jesucristo numa inó. A conan cá iyehñse, o çahno ihyan u, ate nahñ quendí çahco ró che ama yudo vederihquentiyon yahn ye.

21 Che lađo yáhn, numanahn che quenán iyehñse ne, che ritahnó Dihvo vo Jesucristo, chemin che vedeyeno yáhn. Me ndete che çahno ihyan u ne, tahque ndah ro yáhn.

22 Ndete che conan cá iyehñse ne, co quendí cochihvé nan ntiyon yahn Dihvo vo Jesucristo. Nde hua devanó cha che tahque ndah che çacá Dendiohs.

23 Nde hua rentaquinó cha che tahque ndah. Che lađo yáhn ne, tahque ndah che cóh, te tuhme ndeva Dihvo vo Jesucristo u.

24 Ate che lađo yahn nchuhn ne, tahque nahñ che conan cá iyehñse, te tuhme co quendí conán nchuhn.

25 Nducote a devanó te chemin che tahque nahñ ne, vá vedeyeno che quendí conán çava che conán nchuhn, ne numacuahn vedeyeno quendi ne cotahno ne Dihvo vo Jesucristo.

26 Ndaconán chí quendihcheró nchuhn, ne ama ndeva ne yavenan Dihvo vo Jesucristo che ndedevahn ye u.

27 Codin nchuhn cuande, ne runecađe cuahtenan ne, te nducote ritahno ne ndudo ndah yahn Dihvo vo Jesucristo ne, tihça redin yahn che din ne. Nduco tihça ne, a chí quendihcheró nchuhn, o hua, ate nahñ che, adecotino che quenán ne, cadinó che ama cuan ndi no ne, ama ndudo ri no ne, riquendi ne numa ino ne rahndudo ne ndudo ndah yahn Dihvo vo Jesucristo.

28 Hua din vah ne sahn che rendihche tañ se nchuhn nan ntiyon min, te nduco chemin ne, rihnde ro te sahn chahn ne, conda se, ne nchuhn ne, ndedevahn Dendiohs nchuhn.

29 Tihça, te ama ndah ro yahn nchuhn, rete yune Dendiohs che ndiyu demañ che ritahno ne Dihvo vo Jesucristo, ate namin che rechuhríhn ne çava ye.

30 Uvo ne, dama ri vo nduco vih, numa ino vo redin vo ntiyon yahn Dihvo vo Jesucristo. Nchuhn ne, a ndihche ne nduhça che chuhríhn nan ntiyon yahn ye ro menan. Man ne, a devano ne nduhça che riquendí rechuhríhn.

2

Dihvo vo Jesucristo ne, chica ye vahchetero, ndo ye nduhça ihyan iyehñse

¹ Ndete che ndichahtino nchuhn Dihvo vo Jesucristo man, ndete che numacuahn vedeyahino renecah yan ye chedave yahn ne man, ndete che quenun Vaco ye nchuhn man, ndete che chenana cuma ne vedeyahino man, vedeyahino man ne,

² tuhme codin nun ino ne, ndahca cuahtenan ama tama ne man, ama no vederendecadino cuahtenan cuma ne nduco vih man, ama no ndudo co ne nduco vih man, codin yahino ama tama ne vih man, cava che nde tahque co yeno cava ne.

³ Nan nducuaahn che redin nchuhn ne, hua din yade ne man, hua din ne nde ama nan dehtenduh cava vedeyeno yahn man ne man. Tahque ndah ne ne, cuenevahnecun ama tama ne vih, hua ndahco ndiya ne vih.

⁴ Ndotenan che din vi ne ne, cuinan ama tama ne vih.

⁵ Cua cuande nchuhn yahn Dihvo vo Jesucristo, cuiquendi ne yune yahn ye.

⁶ Ihyan min ne, dama ye nduco Dendiohs. Ate hua quendañnan ye, chinan ye nduhca che ndinan Dendiohs.

⁷ Tahque ndah ne, ndahco ndiya man ye ihyan, ndo ye nduhca ama mozo, chihndeyan ye nduhca che rahteyan ihyan iyehñse.

⁸ Numacuahn ro che quenana ye iyehñse ne, ama necun ye man, ama dinahn ye man, nde chihco mendahn ye ihyan, chih ye nan cruz nduhca che rih sahn che chendihco nunde rahte.

⁹ Chemin che chihco ndah Dendiohs ihyan lado tah cuaco ye, ne cah ye vederihquentiyon che tahque yudo ihyan,

¹⁰ cava che nducoyaca nducondi ihyan, ihyan che chenana ye vahchetero man, ihyan che vate ye numachahte iyehñse man ne, ndeva ye yavenan ye.

¹¹ Namin ndeva nducoyaca ihyan yavenan Dendiohs Chida, nevahnecun ye Dihvo vo Jesucristo, ne cahma ye che a ihyan min che Dihve ye.

Ihyan nunde ne, ra cuande ye nduhca che runecade vatechica ihyan che ritahno ye Dihvo vo Jesucristo

¹² Dihnó che yahinó nchuhn, nduhca che dinahn nchuhn che chihquentiyón numacuahn ro che quenán yan vaco ne ne, tahque nahn che dinahn ne man che yahn quenán. Numacuahn vedino vedeneñcun quendi ne codinahn ne vederihquentiyon ndah yahn Dendiohs nde nda ro che ndeva ye nchuhn.

¹³ A ihyan min che redin ye che devano nchuhn dehtenduh che ndah che nahn ye che din ne, ne rinan ye nchuhn che redinahn ne.

¹⁴ Nducuaahn che redin ne ne, codin ne numacuahn vedeyeno, hua quenana ca cahma nunde ne,

¹⁵ cava che dave yavenan ne nan nducoyaca ihyan, te daya Dendiohs nchuhn, ne nahn che runecade cuahtechica ne, cua cuande ihyan nunde. Nduhca iyon che chenana nan ro che diyahn ro nan che ama man ne, tihchan nchuhn van ihyan nunde,

¹⁶ te numa ino ne riquendi ne ritahno ne ndudo ndah yahn Dihvo vo Jesucristo che din che ndevahn ihyan. Nduco tihca ne, co yeno cava nchuhn cuahn che ndaconan chi Dihvo vo Jesucristo, te a devano che hua chinda ntiyon che din che cahndudó ndudo yahn ye.

¹⁷ Andahre va che cohnan ntiyon min, ate hua dehve din yahn, te a tihyon yuné nchuhn che chitahno ne Dihvo vo Jesucristo, ne ama co yeno.

¹⁸ Namin nchuhn ne, conduco ne u, co yeno ne.

Timoteo nduco Epafrodito

¹⁹ Ndete che nahn Dihvo vo Jesucristo ne, nun dechuh Timoteo, quendi-chero se nchuhn, te nahn cadinó taqa chenana ne cava che co yeno.

²⁰ Dechúh sahn min, te metah nde tama se che ndedecadino se nduhca che rendedecadinó, cuahcoran se cava nchuhn,

²¹ te nducoyaca sahn chenahn ne, rendedecadino se cava che ndah yahn man se, nde hua rahcoran se cava ntiyon yahn Dihvo vo Jesucristo.

²² Nchuhn ne, a devano ne nduhca che richihve Timoteo, rinan se u nan ntiyon che rahndudó ndudo ndah yahn Dihvo vo Jesucristo. Rinan se u nduhca che rinan ihyan indihthe yahn ye.

²³ Chemin che va inó che dechúh sahn ndetahno cadinó taça cuhnde cade yahn.

²⁴ Quenan inó Dihvo vo Jesucristo che cuahnecon ye che namin u ne, nun chí quendihcheró nchuhn.

²⁵ Rahcó te namin va che dechúh dihno vo Epafrodito che rinduco se u, rinan se u nan ntiyon. Sahn min ne, a man nchuhn dechuh ne sahn che rinan se u nan vederetahn yahn.

²⁶ Ama nahn nahn se, conan se nduco nchuhn. Ama nahn nahn se, te devano se che checadino nchuhn che chi cah se, ne hua nahn se che co ran ne cava se.

²⁷ Cuaco che ama chi cah se, a ura che coh se. Ate quenan vahino Dendiohs sahn man, quenan vahino ye u man, din ye che ndoyahn se cava che hua nde tahque co ran.

²⁸ Cava che metah ndedecadino nchuhn cava se ne, chemin che tahque nahn che nahn se, ne co yeno ne, ndaconan ndihchero ne sahn. Nduco tihca ne, nuhnde man inó, co yenó.

²⁹ Nducote dama ritahno vo nduco se Dihvo vo Jesucristo ne, cuenevahnecon ne sahn numacuahn vedeyeno. Codin yahino ne nducoyaca ihyan che rihco mendañ ye ihyan, redin ye ntiyon yahn Dihvo vo Jesucristo nduhca che redin se.

³⁰ Sahn min ne, a ura che coh se nan ntiyon yahn Dihvo vo Jesucristo, chihco mendañ se sahn che rinan se u, redinahn se ntiyon che dechuh ne sahn.

3

Nahn che runecade cuahtechico vo

¹ Dihnó, cuahte ne vedeyeno che ritahno ne Dihvo vo Jesucristo. U ne, hua renduh inó andahre a dirún yahn ne ama nan no, te cochihve yahn ne.

² Cuihco nchuhn cudado, te ama yahn se vatechica se, redetohnan se nan ntiyon yahn Dihvo vo Jesucristo. Sahn chahn ne, a nduhca yahna tihchan se. Ndere recah rihñ se ihyan, rihquentiyon se che conan seña ihyan, ricuahn se che nduco chemin ndevahn ye.

³ Cuihco nchuhn cudado, te a uvo che a nedin yahn Dendiohs uvo, ndiyu sahn chahn. A uvo che rendeva vo yavenañ ye numa ino vo. Yeno vo che a yahn Dihvo vo Jesucristo uvo, ne hua ndichahntino vo che ndedevahn man vo uvo.

⁴ Ndete che cava dehtenduh che redin vo man, tachan ihyan uvo man, che ndevahn vo ne, tuhme u che tahque menañ vihca cochahtinó che ndevahn, ndiyu sahn chahn.

⁵ Chihno nine ro che chihndeyán ne, chaconahn ihyan seña u. U ne, ihyan nación yahn Israel, ndata yahn Benjamín. Ihyan devaco hebreo u nduhca indihthe yahn. Nan vederihquentiyon yahn Dendiohs ne, fariseo u.

⁶ Ama din cudadó vederihquentiyon min. Ro menan ne, ama din tán nduco ihyan che ritahno ye Dihvo vo Jesucristo. Ama dináhn vederihquentiyon min, nde ama ihyan hua co cahma nunde ye yáhn.

⁷ Nducuahn dehtenduh chemin chan ne, ama rignonun chihve che lado yáhn che rahcó ro menan, ate chihcomán nducuahn, chitahnó Dihvo vo Jesucristo.

⁸ Van nducuahn dehtenduh che co nguahco yáhn ne, tahque rignonun chihve che ritahnó Dihvo vo Jesucristo. A chihco vané nducuahn dehtenduh, redin cuandé anduhneca ndete che iyaca, cava che quendí yune yahn Dihvo vo Jesucristo,

⁹ ne nedin yahn ye u. Hua richahtinó che ndeváhn nduco che dináhn ley che dirun Moisés, te man ne, nduco che ritahnó Dihvo vo Jesucristo ne, nedin yahn Dendiohs u nduhca che redin yahn ye nducoyaca ihyan che ritahno ye.

¹⁰ Ama yudo vederihquentiyon yahn Dihvo vo Jesucristo che ntuche ye van tenahn. Nahn quendí yune yahn ye, conan cumá vederihquentiyon min. Nahn chuhrihn nduhca che chuhrihn ye, nde cóh nduhca che chih ye.

¹¹ Quenan inó che quendí dináhn yahn ye cava che ndedetuhche ye u van tenahn.

Nahn che quendi vo numa ino vo cotahno vo Dihvo vo Jesucristo

¹² Hua ráhn che a va táh nducuahn, nde huane che ama runecade u, ate riquendí yune yahn Dihvo vo Jesucristo, quenan inó che conahn nducuahn, te a nedin yahn ye u.

¹³ Dihno, nduhca che a ráhn rí nchuhn ne, metah tuno táh nducuahn. Nde metah retumacáh yahn dehtenduh che a chihcomán cava che quendí numa inó yune yahn Dihvo vo Jesucristo.

¹⁴ Nduhca sahn che rano se cade ne, tihca riquendí yune yahn Dihvo vo Jesucristo che ritahnó ihyan, nde nda ro che ndeva Dendiohs u, conán vahchetero.

¹⁵ Nducoyaco vo che a ndah renahn vo vederihquentiyon yahn Dihvo vo Jesucristo ne, tihca nahn che ndedecadino vo. Ndete che hua tihca rendedecadino nchuhn ne, din Dendiohs che conahn ne nduhca che nahn.

¹⁶ Atanoca nduh, a renahn vo nduhca che redin yahn, o hua, ate nahn che quendi vo numa ino vo yune yahn Dihvo vo Jesucristo, hua cahcoman vo.

¹⁷ Dihno, cuiquendi nchuhn yune yáhn. Namin cua cuande ne yahn dihno vo che runecade vatechica ye nduhca che chicuahn nuhn nchuhn.

¹⁸ A ama ndeh yune rete cudadó nchuhn yahn sahn che vatechica se rihnceh se. Riquendí riyahvé nchuhn, nde ama ri ndaché, te ama yahn se che rendihche tan se Dihvo vo Jesucristo, redetohnan se vederihquentiyon yahn ye che chih ye nan cruz.

¹⁹ Sahn chahn ne, ndere vatechica se vedeyeno yahn man se a chemin che rivahn dendiohs yahn se. Ndotenan che co cuihnan se ne, numacuahn vedeyade vatechica se, rahtendihco se nunde. Ate nda ro yahn ne, decuihno Dendiohs sahn.

²⁰ Me uvo ne, ndi cuande vo vahchetero, ne chenan rino vo che min caca Dihvo vo Jesucristo, ihyan min che ndedevahn ye uvo, ndaconan chi ye.

²¹ Uvo ne, ihyan vederih uvo, ate ihyan min ne, rihquentiyon ye nducuahn dehtenduh, ne numacuahn vederihquentiyon yudo yahn ye, ndacorun ye uvo, ndo vo nduhca man ye.

4

Cuahte yeno vo che ritahno vo Dihvo vo Jesucristo

¹ Dihnó che yahinó nchuhn, ama yenó çava ne, ne ama nahn chí quendi-hcheró nchuhn. A çava nchuhn che quendah yavenán nan Dendiohs. Nducote chenan rino vo che ndaconan chí Dihvo vo Jesucristo ne, cuiquendi nchuhn numa ino ne cochahtino ne ihyan.

² Evodia nduco Sintique, nducote ritahno te Dihvo vo Jesucristo ne, riyahvé tahh che nchahco te yahn vih, nedin ndah te ndudo nduco vih.

³ Me ndih dihnó che ama ndah rinan ne u nan ntiyon yahn Dihvo vo Jesucristo, nahn che conan ne cahvo vo chahn çava che nedin ndah te ndudo nduco vih, te chinan te u, chacotuhn nuhn ndudo ndah yahn Dihvo vo Jesucristo. Namin Clemente man, yahn ca dihnó vo man, chinan ye u nan ntiyon min. Nducoyaca ihyan chahn ne, a ndaconahn çaca Dendiohs ihyan çava che cuahtenan ye vahchetero.

⁴ Cuahn ðama cuahte yeno nchuhn yahn che ritahno ne Dihvo vo Jesucristo.

⁵ Codin yahino ne nducoyaca ihyan, cua cuande ye che chenan cuma ne vedeyahino. A devano ne te a nun ndahconan chí tun Dihvo vo Jesucristo.

⁶ Hua co ran ne yahn dehtenduh che rahno ne. Cuica ne Dendiohs che conan ye nchuhn nan nducuahn. Namin cuahn che covah ne ne, cuenecah ne nundihve cuahn ihyan.

⁷ Ndete che tihça din ne ne, din Dendiohs che ama cuahteman ino ne. Andahre nde ama ihyan hua conan conahn ye yahn, ate din ye che ama cuahteman ino ne. Cuahteman chedave yahn ne man, vederendedecadino yahn ne man, cochahtino ne Dihvo vo Jesucristo.

Ndedecadino vo yahn dehtenduh che ndah

⁸ Dihnó, cuendedecadino nchuhn yahn dehtenduh che ndah man, che runecade man, dehtenduh che cuahtenan ino ihyan, ne ndah çahma ye yahn man, dehtenduh che din che ndeva ihyan yavenan Dendiohs man.

⁹ Cuiquendi ne nducuahn che chicuáhn nchuhn man, nducuahn che ca cuande ne nan renté man, dehtenduh che dín man. Ndete che tihça din ne ne, conduco Dendiohs nchuhn, din ye che cuahteman ino ne nan ye.

Ihyan yan Filipos ne, dechuh ye vedino yahn Pablo

¹⁰ Nducote ritahnó Dihvo vo Jesucristo ne, ama ri yenó che renta tin nchuhn u. A devanó che hua ndinan nchuhn u, ate yahn che yahn chenan ne ne, hua chí che chinan ne u.

¹¹ Ndiyu che rahh nundé che ama va vederetahn yahn che tihça rahh, te a ndi ninó che renán vedeyeno nduco adecodehno che rendaçá.

¹² A devanó yahn vedechevah, te a nchuhrihn man. Namin a devanó taça cuahn che ama va dehtenduh, te nahn cuan ne, va yahn. Chemin che hua ra cudado u, a va, o metah yahn, andahre nde metah deh che chéh.

¹³ Nan nducuahn che rahno rí ne, nde hua ra cudado u, te a Dihvo vo Jesucristo che rinan ye u, rete ye vedechahtino yahn.

¹⁴ Andahre hua nduh rendotenan ne, ama ndahça din nchuhn che chinan ne u man che rechuhrihn.

¹⁵ Nchuhn ihyan yan Filipos, a devano ne te ro menan cuahn che ndaçá nación yahn ne Macedonia, che canan cháhn चाहनुदुदो ndudo ndah yahn Dihvo vo Jesucristo ne, atenan nchuhn che chinán ne u, dechuh ne vedino yahn, yahn che yeno ne che chinán nchuhn, chitahno ne Dihvo vo Jesucristo.

¹⁶ Avane ne, cuahn che metah ndaçá nación yahn ne, numanahn che quenán cá yan Tesalónica ne, a nde ro min canan ne, dechuh ne o ino yune vedino yahn, chinan ne u.

¹⁷ Ndiyu deman che conda tãh vedino yahn nchuhn che tihça dirún yahn ne. Che tahque nahn ne, che din ne che ndah çaça che ndãhco menun Dendiohs yahn ne.

¹⁸ Nduco vedino che dechuh nchuhn nduco dihno vo Epafrodito ne, nde rengava ca yãhn. Dendiohs ne, ama renan ino ye che tihça din ne, te anduhneça ndete che çah ne ama vedino ndah ihyan.

¹⁹ Ihyan min ne, numacuahn vederihquentiyon chahte yahn ye, conan ye nchuhn nan nducuahn vederetãhn yahn ne, te ritahno ne Dihvo vo Jesucristo.

²⁰ ¡Ndeva vo yavenan Chido vo Dendiohs cuahn ðama! Tihça co.

²¹ Numacuahn vedeyahino yahn Dihvo vo Jesucristo, cuenecãh nchuhn Dendiohs nducoyaca ihyan yahn Dendiohs che vate ye tan. Cuendeva ne Dendiohs yahn dihno vo che chenani ye muhn nducó.

²² Cuendeva ne Dendiohs yahn nducoyaca ihyan yahn ye che chenani ye muhn, menan vihca ihyan che chenani ye ndevaco emperador.

²³ Din yahino Dihvo vo Jesucristo nducoyaca nchuhn. Tihça co.

CACA CHE DIRUN SAN PABLO, DECHUH YE YAHN IHYAN YAHN DENDIOHS CHE VATE YE YAN COLOSAS

¹ U Pablo, che chaconahn Dendiohs u che co apóstol yahn Dihvo vo Jesucristo, nduco dihno vo Timoteo,

² dirun nuhn caca cuh, dechuh nuhn yahn nchuhn, ihyan yahn Dendiohs che ritahno ne numa ino ne Dihvo vo Jesucristo. Chido vo Dendiohs din yahino ye nchuhn, din ye che ndahca cuahtenan ne.

Revah Pablo cava ihyan che ritahno ye Dihvo vo Jesucristo

³ Cuahn dama che revah nuhn ne, renecah nuhn nundihve cuahn Dendiohs, Chida Dihvo vo Jesucristo, cava nchuhn,

⁴ te recadino nuhn nduhca che ritahno ne Dihvo vo Jesucristo man, nduhca che redin yahino ne nducoyaca ihyan yahn Dendiohs man,

⁵ nduhca che chenani ino ne che ndeva ye nchuhn, cuahtenan ne vahchetero man. Nchuhn ne, a chichahtino ne che cuahtenan ne vahchetero nde ro che chihnevan ne ndudo ndah yahn Dihvo vo Jesucristo.

⁶ Ndudo min ne, chetuhn van nchuhn, ne retuhn numachahte iyehense. Ama ri yahn ihyan che ritahno ye, ne redin ndudo me che ndah nduco ye, nduhca che din nduco nchuhn nde ro che chihnevan ne, ne chenahn ndah ne yahn vedeyahino yahn Dendiohs.

⁷ Ndudo min ne, a dihno vo Epafra che yahino vo sahn, chicuahn se nchuhn. Sahn min ne, combiero yahn nuhn nan ntiyon yahn Dihvo vo Jesucristo, ne numacuahn chedave yahn se rahndudo se ndudo yahn Dihvo vo van nchuhn.

⁸ A sahn min nte cuande se nuhn che quenun Vaco Ndah yahn Dendiohs nchuhn, chenani cuma ne vedeyahino.

⁹⁻¹⁰ Chemin che nde ro che checadino nuhn ne, hua reguan nuhn rica nuhn Dendiohs che conan ye nchuhn, din ye che conahn ndah ne vederihquentiyan yahn ye man, vederihquentiyan yahn Vaco Ndah yahn ye man. Rica nuhn ihyan che din ye che runecade cuahtechica ne nduhca che redin yahn che cuahtechica ihyan yahn Dihvo vo Jesucristo, din ne nducuahn che ndah nduhca che renan ino ye.

¹¹ Namin rica nuhn ihyan che numacuahn vederihquentiyan yudo yahn ye din ye che numacuahn vedeyeno cochahtino ne ihyan, quendañ ne vedechahtino nan nducuahn.

¹² A Chido vo Dendiohs che nedin yahn ye uvo cava che cuahtenan vo vahchetero dama nduco ihyan yahn ye, ne nahn che cuenecah ne nundihve cuahn ihyan,

¹³ te ndedevahn ye uvo tah chundah, ne ndahco ye uvo tah Daya ye, ihyan min che ama yahino ye cava che dinahn vo che rihquentiyan ye.

¹⁴ A Daya ye che chihco mendañ ye ihyan, chera yun yahn ye, chih ye cava che ndaco vo vederenchahco.

Vederihquentiyan yahn Dihvo vo Jesucristo

¹⁵ Dihvo vo Jesucristo ne, a va ye nde ro che metah cuhnde iyehense, quenani cuma ye vederihquentiyan yahn Dendiohs, ihyan min che hua ro ye.

¹⁶ Nduco ye Dendiohs dendah ye nducuahn dehtenduh che va vahchetero man, iyehanse man, dehtenduh che ro man, che hua ro man, ángel man, vaco chihnga man. A cava man ye dendah ye nducuahn.

¹⁷ Ihyan min ne, va ye nde ro che metah cuhnde iyehanse, ne nducuahn dehtenduh ne, hua dehva ri yahn, te a man ye redin ye cudado.

¹⁸ Avane ne, a ihyan min che quenán cuma ye vederihquentiyon che tahque chahte, ne ntuche ye menan vih van tenahn cava che conan ye nan nducuahn.

¹⁹ Tihca, te numacuahn vedeyeno ndahco Dendiohs nducuahn vederihquentiyon yahn ye tah ihyan min.

²⁰ Cava Dihvo vo Jesucristo, ihyan min che chihco mendahn ye ihyan, chera yun yahn ye, chih ye nan cruz ne, ndo ino Dendiohs nduco nducuahn dehtenduh che va iyehanse man, vahchetero man.

²¹ Ro menan me ne, ama yahn chenán nchuhn nan Dendiohs, chahcotahn ne vederihquentiyon yahn ye, chahtechica ne vedeyeno yahn man ne, chahtendihco ne nunde.

²² Ate man che ndo Dihvo vo Jesucristo nduhca ihyan iyehanse, chih ye ne, ndo yan Dendiohs nduco ne, nchahco ye yahn ne, nedin yahn ye nchuhn.

²³ Ate nahn che quendi ne cotahno ne numa ino ne. Hua o ndedecadino ne. Ama cuiquendi no ne cohahtino ne ndudo ndah yahn Dihvo vo Jesucristo che chihnevan ne. Ndudo min ne, rahndudo ihyan, retuhn numachahte iyehanse, ne namin u Pablo rinducó ihyan rahndudó.

Pablo ne, nda cuande yahn ye redin ye cudado ihyan che ritahno ye Dihvo vo Jesucristo

²⁴ Man ne, ama yenó che riquendí redin ntiyon yahn Dihvo vo Jesucristo, rechuhrihn cava che ndah yahn nchuhn, ihyan yahn ye.

²⁵ A chaconahn Dendiohs u nan ntiyon che cuahndudó ndendi ndendita ndudo yahn ye van nducoyaca nchuhn che ritahno ne Dihvo vo Jesucristo,

²⁶ te cuandé nchuhn ndudo yahn ye che chihnde nde a rahn me. Ndudo min ne, nde hua devano ihyan yahn, ate man ne, cade cah ye, checadino ihyan yahn ye.

²⁷ Quenan cuma ye vedeyeno che cah ye, checadino ihyan chahn. Ama yudo ndudo min, ne retuhn van ihyan nación chenahn. Ndudo min ne, che rinduco Dihvo vo Jesucristo nchuhn, ihyan yahn ye, ne cohahtino ne ihyan, ndevahn ne.

²⁸ Rahndudo nuhn ndudo yahn Dihvo vo, ne numacuahn vededevano riyahve nuhn man, ricuahn nuhn man, nducoyaca ihyan, cava che cotahno ye Dihvo vo, conahn ndah ye Ndudo yahn Dendiohs, ne ndeva ye ihyan.

²⁹ Numacuahn vederihquentiyon yahn Dihvo vo Jesucristo che te ye u ne, redin ntiyon min numacuahn chedave yahn cava che conahn.

2

¹ Nahn che codevano nchuhn te ama rendedecadinó cava ne man, cava dihno vo che vate ye yan Laodicea man, cava ama yahn ca dihno vo che metah ndihchero ye u man.

² Nahn che nchuhn man, ihyan chahn man, necah yan ne chedave yahn ne, ama ndudo co no ne, din yahino ne vih. Ndudo che cade te Dendiohs, checadino vo ne, a ndudo yahn Dihvo vo Jesucristo, ne nahn che conahn ndah ne, cohahtino ne ihyan,

³ te vededevano yahn Dendiohs ne, ama yudo, ne a ihyan min che quenán cuma ye nducuahn.

⁴ Tihça dirún yahn nchuhn çava che tumacadino ne, ne hua co cahnceh nde ama ihyan nchuhn nduco ndudo yade yahn ye,

⁵ te andahre yahn quenán yahn nchuhn, ate rendedecadinó çava ne, ne ama yenó che riquendi ne numa ino ne nduhça che redin yahn, ritahno ne Dihvo vo Jesucristo.

⁶ Nducote chitahno nchuhn Dihvo vo Jesucristo ne, nahn che quendi ne yune yahn ye, cochahtino ne ihyan.

⁷ Numacuahn chedave yahn ne cochahtino ne Dihvo vo, hua çahcoman ne ihyan. Yahn chemin ne, a çahn nchuhn, ne nahn che quendi ne dinahn ne. Namin nahn che necah ne nundihve cuahn Dendiohs cuahn dama.

Rendacorun vederendecadino yahn ihyan cuahn che ritahno ye Dihvo vo Jesucristo

⁸ Cuihco nchuhn cudado yahn sahn che vatechica se ricuahn se vededevano yahn man se. Condi ne cuahnecon ne che cahnceh se nchuhn, te sahn çahn ne, ndotenan che cacuahn se ndudo yahn Dihvo vo Jesucristo ne, ricuahn se costumbre yahn ihyan iyehne man, vededevano yahn se man.

⁹ Hua çahcovan nchuhn che ricuahn sahn çahn, te a Dihvo vo Jesucristo che quenán cuma ye nducuahn vederihquentiyon yahn Dendiohs,

¹⁰ ne nducote ritahno ne ihyan ne, hua rendotenan ne tama nan vederihquentiyon. Tahque yudo vederihquentiyon yahn ye che co vederihquentiyon yahn nducoyaca ángel man, vaco chihnga man.

¹¹ Cuahn che chitahno ne Dihvo vo Jesucristo ne, chacondah vedame ne costumbre che renan seña ihyan. Namin chihcoman ne vedeyeno yahn man ne, ne chichahtino ne Dihvo vo, nedin yahn ye nchuhn.

¹² Cuahn che chedenune nchuhn, nevahnecon ne Dihvo vo Jesucristo ne, anduhneça ndete che chih ne dama nduco ye, chihcoman ne che rah-tendihco ne nunde. Man ne, nduhça che numacuahn vederihquentiyon chahte ndedetuhche Dendiohs Dihvo vo van tenahn ne, tihça ndahcorun ye nchuhn, ndo ne ihyan ra yahn che chitahno ne ihyan.

¹³ Ro menan me ne, ama yahn çenan nchuhn nan Dendiohs, nedin nunde yahn ne. Avane ne, ihyan tama nación nchuhn, hua ndi cuande ne van ihyan yahn ye. Ate man ne, a ndedevahn ye nchuhn, chitahno ne Dihvo vo Jesucristo, nchahco ye nunde yahn ne.

¹⁴ Nchahco ye nducuahn nunde yahn ne che chahtendihco ne, chahcotahn ne vederihquentiyon yahn ye. Ndedevahn ye nchuhn, dechuh ye Dihvo vo Jesucristo, quenán yah ye nan cruz, nedihve ye nunde yahn ne.

¹⁵ Dihvo vo Jesucristo ne, chih ye nan cruz, ne nduco chemin ne, ndahco ndiya ye vaco chihnga nan nducoyaca ihyan, chehnevi ye vederihquentiyon yahn.

Nahn che ndedecadino vo yahn vederihquentiyon yahn Dendiohs

¹⁶ Chemin che hua ndahça che ndahçenan ihyan nchuhn nan che reh ne man, nan che rih ne man, yahn che hua rahte vihco ne cuahn che renuhnde iyo man, yahn che hua redin ne dehtenduh vihco man, yahn che hua rahtetuhno ne ro sabado man.

¹⁷ Hua nduh rignonun chihve dehtenduh chemin çan che riquendi ihyan. Vederihquentiyon che tahque rignonun chihve ne, che ndedevahn Dendiohs uvo che ritahno vo Dihvo vo Jesucristo.

¹⁸ Hua cuahnecon ne che cahnceh ihyan nchuhn, conun ye nchuhn che quendi ne yune yahn ye, din ça ne che necun ne, te ihyan çahn ne, rendeva ye yavenan ángel man, rente ye deman yahn dehtenduh che nde

hua rendihche ye man, redin yade ye, ndere rendonan man ye ihyan che ama devano ye man,

¹⁹ hua riquendi ye vederihquentiyon yahn Dihvo vo Jesucristo, ihyan min che ndinan ye yuhn vo man. A Dihvo vo Jesucristo che ndi ye tin yahn nducoyaco vo che yahn Dendiohs uvo, ne redin ye che ama cuan no ndi vo nduco vih, rinan ye uvo che cotahno ndah vo nduhca che nahn Dendiohs.

²⁰ Nducote anduhneca ndete che a chih nchuhn nduco Dihvo vo Jesucristo, chihcoman ne vededevano yahn ihyan iyehne ne,

²¹ hua redin yahn che dinahn ne che rahn sahn chahn tuhca: "Hua toh ne chu, hua toh ne cha, hua cheh ne chu, hua cheh ne cha, te cahnda."

²² Nducuah dehtenduh chemin chan che rihco yudo se yahn ne, deman vederihquentiyon yahn ihyan, nde hua regu.

²³ Vederihquentiyon che tihca rihco yudo se ne, rivahn che ama devano se, rinan se ihyan chenahn cava che tahque cotahno ye Dendiohs man, cava che tahque cuahtenan cuma ye vedenecun man, cava che tahque cah rihn man ye ihyan man, ate hua richihve cava che cahco tan che cuahtechica ye vedeyeno yahn man ye, cuahtendihco ye nunde.

3

¹ Man che a ndedevahn Dihvo vo Jesucristo nchuhn ne, anduhneca ndete che a ntuche ne nduco ye van tenahn. Chemin che nahn che codin nun ino ne cava che co cuahtenan ne vahchetero nan che va ye lado tah cuaco Dendiohs.

² Ndotenan che ndedecadino ne, nahn yahn ne dehtenduh che va muhn iyehne ne, codin nun ino ne cava che co cuahtenan ne vahchetero.

³ Cuenecahco ne te anduhneca ndete che a chih ne dama nduco Dihvo vo, ne man che ritahno ne ihyan ne, nedin yahn Dendiohs nchuhn.

⁴ A yahn che ritahno vo Dihvo vo Jesucristo che va che cuahtenan vo vahchetero, ne cuahn che ndaconan chi tun ye numacuahn vederihquentiyon chahte yahn ye ne, nedin dama ye uvo nan ye.

Nduhca che nahn che cuahtechico vo

⁵ Nducote tihca ne, cuihcoman nchuhn che rahtechica ne vedeyeno yahn man ne, rahtendihco ne nunde. Hua ndere cuahtenan ne nduco ihyan che hua nihnevaco ne nduco ye man, hua din ne dehtenduh che chihnga man, nde hua din yahino ne tume, te nunde min ne, a dama nduco nunde che redeva ihyan yavenahn dehtenduh che ndere redin ye dendiohs yahn ye.

⁶ Ihyan che rahcotahn ye yahn Dendiohs, rahtendihco ye nunde che tuhchan ne, va che din Dendiohs castigo yah ihyan.

⁷ Ro menan me ne, namin nduco nchuhn chahtendihco ne nducuahn nunde che tuhchan.

⁸ Ate man ne, nahn che cahcoman ne. Namin nahn che cahcoman ne che ri tan ne man, che rahtenun ino ne vedetan man, che redin tan ne man, che ra ne canda ihyan man, che rahn ne ndudo chihnga man.

⁹ Hua cahnceh ne vih, te nchuhn ne, a chihcoman ne vedeyeno yahn man ne che chahtechica ne ro menan, chahtendihco ne nunde.

¹⁰ Man ne, a ndedevahn Dendiohs nchuhn, ndahcorun ye vederendecadino yahn ne, din ye che ndo ne anduhneca ihyan ra. Ro ro rinan ye nchuhn cava che nde tahque runecade cuahtechica ne, nde conan conahn ne vederihquentiyon yahn ye, ndo ne ihyan nduhca che nahn ye.

¹¹ Dehve din yahn, a ihyan nacion yahn Israel uvo, o ihyan tama nacion, a chenana seña uvo, o hua, a redin vo ntiyon yahn ihyan, o redin vo ntiyon yahn man vo, te che ritahno vo Dihvo vo Jesucristo ne, a dama no nducoyaco vo.

Che richihve yuhn vo ne, che ritahno vo ihyan min, ndi cuando vo van ihyan yahn ye.

¹² Numacuahn vedeyahino tendahnun Dendiohs nchuhn, nedin yahn ye nchuhn. Chemin che nahn che cuahtenan cuma ne vedeyahino man, vedevahino man, vedenecun man, vedechahtino man.

¹³ Codin chahtino ama tama ne yahn vih, ne ndete che din tan ama cha nchuhn nduco vih ne, cuenchahco ne yahn vih. Dihvo vo Jesucristo ne, a nchahco ye yahn nchuhn, ne nahn che quendi ne yune yahn ye, nchahco ne yahn vih.

¹⁴ Nan nducuahn ne, codin yahino ne vih cava che ndahca cuahtenan ne nduco vih, ne ama no ndudo co nducoyaca ne.

¹⁵ Dendiohs din ye che cuahtenan chedave yahn ne, te a cava chemin che tendahnun ye nchuhn, ama cuan co no ne nduco vih. Nahn che necah ne nundihve cuahn ihyan yahn nducuahn che din ye nduco ne.

¹⁶ Cuahtenun ino ne ndudo ndah yahn Dihvo vo Jesucristo cuahn dama, hua cahcoman ne. Numacuahn vededevano cuicuahn vih ne man, cuenecah ne vedechahtino vih ne man, cuahndudo ne salmo man, cuita ne himno man, cuah ne Dendiohs chete chedave yahn ne, cuenecah ne nundihve cuahn ihyan man.

¹⁷ Nan nducuahn che redin ne man, che rente ne man, cuenecahco ne te va Dihvo vo Jesucristo. Namin cuenecah ne nundihve cuahn Dendiohs che cuande yahn ihyan min.

¹⁸ Nchuhn ihyan ndahta, codinahn ne yahn inchaahn ne, te nducote ritahno ne Dihvo vo Jesucristo ne, quenan cuma che tihca din ne.

¹⁹ Nchuhn ihyan chaahn, codin yahino ne ihyan ndahta yahn ne, hua co tan ne nduco ye.

²⁰ Nchuhn decayha, codinahn ne nducuahn che rihquentiyon indihthe yahn ne, te chemin che renan ino Dihvo vo.

²¹ Nchuhn che vate daya ne, hua ndere din tan ne nduco daya ne cava che hua co ndache.

²² Nchuhn che redin ne ntiyon yahn ihyan, codinahn ne yahn patron yahn ne numacuahn chedave yahn ne. Ndahca codin ne ntiyon yahn ye cuahn dama, ndiyu deman cuahn che rendihchero ye nchuhn, te nducote ritahno ne Dendiohs ne, tihca nahn che din ne.

²³ Nducuahn ntiyon che redin ne ne, codin ne nduco vedeyeno, cuenecahco ne te va Dihvo vo Jesucristo.

²⁴ Cuedevano ne te ndete che tihca dinahn ne ne, redinahn ne vederihquentiyon yahn Dihvo vo Jesucristo, ne man ye ndahco menun ye yahn ne, ndeva ye nchuhn, cuahtenan ne vahchetero.

²⁵ Namin cuedevano ne te ihyan che duhtuno ihyan ye ne, va che co ye castigo yahn nunde yahn ye. Ndahco menun Dendiohs yahn ye tunoca che nedin ye. Hua dehve rahco ne, te Dendiohs ne, dama no rendihche ye nducoyaca ihyan.

4

¹ Nchuhn che chenan cuma ne mozo yahn ne, cuihquentiyon ne ihyan nduhca che redin yahn, hua din tan ne nduco ye. Cuenecahco ne te namin nchuhn ne, va Dihve ne Jesucristo vahchetero.

² Nducoyaca nchuhn ne, cuahteyan ne cuahn dama, covah ne man, cuenecah ne nundihve cuahn Dendiohs man.

³ Cuya ne Dendiohs che din ye che ndaca yune che cuahndudo nuhn ndudo ndah yahn Dihvo vo Jesucristo, ndudo min che hua devano ihyan ro menan. A yahn che rahndudó ndudo min che quenun vacoyahn.

⁴ Cuica ne Dendiohs che conan ye u che cuahndudó nduhcá che redin yahn cava che conahn ihyan.

⁵ Nan nducuahn che redin nchuhn van ihyan che hua ritahno ye Dihvo vo Jesucristo ne, nahn che nduco rino nduco ndah cava che ndaca yune che yahve ne ihyan, ne cotahno ye.

⁶ Nan ndudo yahn ne ne, nahn che runecade ne. Namin nahn che devano ne tacá ndahconan ne yahn dehtenduh che tumerune queri ama ihyan.

Renecah Pablo Dendiohs ihyan

⁷ Dihno vo Tiquico che yahino vo sahn ne, ama ndah redinahn se, rinan se u nan ntiyon yahn Dihvo vo Jesucristo. Sahn min nte cuande se nchuhn nduhcá che quenán muhn.

⁸ Dechuh sahn tan cava che nte cuande se nchuhn nduhcá che chenah nuhn muhn man, cava che necah yan se chedave yahn ne man.

⁹ Dihno vo Onésimo, sahn yan vaco ne, che yahino vo sahn man, che ndahca redinahn se nan ntiyon yahn Dihvo vo man ne, namin nduco se cuenchi se tan. Sahn sih nte cuande se nchuhn yahn dehtenduh che ri muhn.

¹⁰ Aristarco che dama quenun se vacoyahn nducó ne, dechuh se Dendiohs yahn nchuhn. Namin Marcos sahn vih Bernabé ne, dechuh se Dendiohs yahn ne. Sahn min ne, a nté nduco nchuhn yahn se. Cuenevahnecon ne sahn ndete che denan chi se tan.

¹¹ Namin Jesús che namin duche se Justo ne, dechuh se Dendiohs yahn nchuhn. Van ihyan nación yahn Israel che ritahno ye Dihvo vo Jesucristo ne, atenan sahn chahn che rinan se u nan ntiyon yahn Dendiohs, rendacá vedechahtino chahte.

¹² Epafra, tama sahn yan vaco ne, che redin se ntiyon yahn Dihvo vo Jesucristo ne, dechuh se Dendiohs yahn nchuhn. Sahn min ne, cuahn dama ama rica se Dendiohs che din ye che quendi nchuhn cotahno ne numa ino ne man, dinahn ne nducuahn vederihquentiyon yahn ye man.

¹³ U devano cuacó nduhcá che ama rendedecadino se cava nchuhn man, dihno vo che vate ye yan Laodicea man, yan Hierápolis man.

¹⁴ Doctor Lucas che yahino vo ihyan man, Demas man ne, dechuh ye Dendiohs yahn ne.

¹⁵ Cuenechah nchuhn Dendiohs dihno vo che vate ye yan Laodicea man, Ninfas man, dihno vo che rendo dama ye vaco ye, rendeva ye yavenan Dendiohs man.

¹⁶ Cuihno ndihchenan nchuhn caca cuh tan ne, cuedechuh ne yan Laodicea, ndihchenan dihvo vo che vate ye min. Namin condihchenan ne caca che dechuh yahn ihyan chahn.

¹⁷ Cahma ne co ne Arquipo che ndahca dinahn ye ntiyon che ndihco Dihvo vo Jesucristo tah ye.

¹⁸ Nan che rente nuhn Dendiohs nchuhn nan caca cuh ne, man dirún. Cuenechaco ne te u ne, vacoyahn quenún. Dendiohs din yahino ye nchuhn. Tihca co.

CACA CHE DIRUN SAN PABLO MENAN, DECHUH YE YAHN IHYAN YAHN DENDIOHS CHE VATE YE YAN TESALONICA

¹ Nchuhn, ihyan yahn Dendiohs Chida man, yahn Dihvo vo Jesucristo man, che vate ne yan Tesalónica, u Pablo nduco Silas nduco Timoteo, dirun nuhn yahn ne. Chido vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Nduhca che chitahno ihyan yan Tesalónica

² Cuahn dāma reneçah nuhn nundihve cuahn Dendiohs çava nducoyaca nchuhn, revah nuhn çava ne.

³ Cuahn dāma rentihyon yan nuhn nan Chido vo Dendiohs yahn ntiyon che redin nchuhn man, nduhca che ritahno ne Dihvo vo Jesucristo, yahino ne ihyan man, nduhca che rechuhrihn ne numacuahn vedeneçun, ndichahtino ne ihyan man.

⁴ Dihno nuhn, Dendiohs ne, yahino ye nchuhn. Devano nuhn te man ye tendahnun ye nchuhn.

⁵ Cahndudo nuhn ndudo yahn Dihvo vo Jesucristo numa ino nuhn, chihnevan nchuhn, ne numacuahn vederihquentiyon din Vaco Ndah yahn Dendiohs che chitahno ne. A devano nchuhn nduhca che chahtechica nuhn van ne çava che ndah yahn ne.

⁶ Quendi nchuhn nduhca che chicuahn Dihvo vo Jesucristo man, nduhca che chicuahn nuhn man. Andahre ama chuhrihn ne, ate din Vaco Ndah yahn Dendiohs che nevahneçun ne ndudo yahn Dihvo vo Jesucristo numacuahn vedeyeno.

⁷ Ama yahn ihyan, yahn yahn Macedonia man, Acaya man, chihco ye cudado nduhca che chitahno nchuhn Dihvo vo Jesucristo, ne namin chitahno ye ihyan.

⁸ Tihca chi che chetuhn ndudo yahn Dihvo vo van nchuhn. Ndiyu deman yahn yahn Macedonia man, Acaya man, te numachahte devano ihyan nduhca che redinahn nchuhn ndudo yahn Dendiohs. Nde nuhn, metah deh cuande che çahma nuhn,

⁹ te nde man ihyan chahn rente cuande ye nuhn nduhca che nevahneçun nchuhn nuhn, chihcoman ne dehtenduh che redin ihyan dendiohs yahn ye, ne chitahno ne Dendiohs, ihyan min che quenduche ye, ndeva ne yavenan ye.

¹⁰ Rente ye yahn Dihvo vo Jesucristo, Daya Dendiohs, ihyan min che ndedetuhche Dendiohs ihyan van tenahn, ihyan min che ndedevahn ye uvo yahn castigo yah che va che cuahno co ihyan nunde. Namin rente ye nduhca che çenan rino nchuhn che çava ye vahchetero, ndaconan chi tun ye.

2

Nduhca che cahndudo Pablo Ndudo yahn Dendiohs

¹ Dihno nuhn, a man nchuhn devano ne te chichihve ntiyon che din nuhn van ne.

² Andahre ama chuhrihn nuhn ro menan, din tan ihyan yan Filipos nduco nuhn, ate Dendiohs ne, chinan ye nuhn, ne numa ino nuhn cahndudo nuhn ndudo ndah yahn ye van nchuhn.

³ A devano cuaco nuhn te ndudo ndah che rahndudo nuhn. Hua ndere rahndudo nuhn dehtenduh ndudo cava che cahnceh nuhn ihyan.

⁴ Tendahnun Dendiohs nuhn, ne chihquentiyon ye che cuahndudo nuhn ndudo ndah yahn ye. Nducuahn chemin che rahndudo nuhn. Hua retumacah nuhn andahre hua renan ino ihyan, te Dendiohs ne, tihca nahn ye. A ihyan min che rendihche ye chedave yahn nuhn.

⁵ Hua nte yade nuhn nduco nchuhn cava che te ne tume nuhn. A devano man nchuhn chemin, nde Dendiohs ne, a devano ye.

⁶ Andahre nuhn ne, nduhca intiyanh che dechuh Dihvo vo Jesucristo, ate hua renunh nuhn che ndeva ihyan yavenan nuhn.

⁷ Tahque ndah ne, chahtechica nuhn numacuahn vedenehun. Chahtenan nuhn van nchuhn, din yahino nuhn nchuhn nduhca che yahino ihyan ndahta daya ye che retave ye nduco cudado.

⁸ Ama yahino nuhn nchuhn. Chemin che chicuahn nuhn ndudo ndah yahn Dendiohs nchuhn, nde man nuhn, chihco mendahn nuhn cava ne.

⁹ Dihno nuhn, namin a devano nchuhn nduhca che chuhrihn nuhn, din nuhn ntiyon nde ro nde rahn cava che ndaca che chuhnun nuhn. Tihca din nuhn numacuahn ro che chahtenan nuhn yan vaco nchuhn, cahndudo nuhn ndudo ndah yahn Dendiohs, te hua nahn denduh nuhn nde ama cha nchuhn.

¹⁰ Nduco cudado chahtenan nuhn van nchuhn, nde ama nunde hua chahtendihco nuhn. A man nchuhn a devano ne, nde Dendiohs ne, a devano ye.

¹¹ Namin a devano nchuhn te necah yan nuhn chedave yahn ne nduhca che renecah yan ihyan chedave yahn daya ye.

¹² Tihca din nuhn, chicuahn nuhn nchuhn nduhca che va che cuahtechica nchuhn nduco cudado, te nchuhn ne, ihyan yahn Dendiohs, ihyan min che ama yudo vederihquentiyon yahn ye.

¹³ Cuahn che cahndudo nuhn ndudo yahn Dendiohs, chihnevan nchuhn ne, nevahnehun ne, te chenahn ne che chemin che vederihquentiyon yahn Dendiohs, ndiyo yahn ihyan iyehense. A ndudo min che redin che ndah nduco nchuhn che chitahno ne. Chemin che cuahn dama renecah nuhn nundihve cuahn Dendiohs.

¹⁴ Dihno, nduhca che redin ihyan naciön yahn Israel che rechuhrihn ihyan che ritahno ye Dihvo vo Jesucristo che vate ye estado yahn Judea, tihca rechuhrihn nchuhn, redin ihyan yan vaco ne.

¹⁵ A ihyan naciön yahn Israel chahn che chihno ye Dihvo vo Jesucristo. A ihyan ndico yahn ihyan chahn che chihno ye ihyan profeta a rahn me. Man ne, a ihyan chahn tun che redecano ye nuhn. Hua redinah ye che rihquentiyon Dendiohs. Nde ama ihyan hua ri rendihche ye.

¹⁶ Rihca tan ye che cuahndudo nuhn, cahnevan ihyan naciön chenahn cava che ndedevahn Dendiohs ihyan nduhca che ndedevahn ye uvo. Nduco tihca din chahte nduh ye nunde yahn ye. Ate man che cuaco ne, a vate ye vedeyah, ri ye castigo yahn Dendiohs.

Nahn cahñ Pablo tama yune, quendihchero ye ihyan yan Tesalónica

¹⁷ Dihno, cuahn che ndaca nuhn van nchuhn ne, ama chi ran nuhn. Andahre yahn chenah nuhn, ate ama renecahco nuhn nchuhn, ama nahn ndaconan chi nuhn quendihchero nuhn nchuhn.

¹⁸ U Pablo ne, ama ndeh yune nahn chí man, ama nahn che chi nuhn man. Ate queri ama yune ne, din vahche chundah.

¹⁹ Ama yeno nuhn che chitahno nchuhn Dihvo vo Jesucristo. Cuahn che naconan chi tun ye ne, ama co yeno nuhn, te ro min ne, co ro ntiyon che din nuhn van nchuhn.

²⁰ A cava nchuhn che ama yeno nuhn.

3

¹ Ro che ama ndedecadino nuhn cava nchuhn ne, chihco dama ino nuhn che cuahtenan nuhn deman nuhn yan Atenas,

² ne dechuh nuhn dihno vo Timoteo cava che necah yan se chedave yahn nchuhn. Sahn min ne, nduco se nuhn, redin se ntiyon yahn Dendiohs, rahndudo se ndudo ndah yahn Dihvo vo Jesucristo.

³ Dechuh nuhn sahn, te hua nahn nuhn che co ran nchuhn yahn dehtendu che rechuhrihn ne. A devano man ne te va che chuhrihn vo.

⁴ Cuahn che chenac ca nuhn nduco nchuhn ne, a rente nuhn nduco ne te va che chuhrihn vo. Man ne, a chinahn ndudo min. A rendihche ne.

⁵ Nducote ametah chichá che rendedecadinó cava nchuhn ne, dechuh che tumeruné ndete che riquendi nchuhn ritahno ne Dihvo vo Jesucristo. Ndedecadinó te co a detohnan chundah ntiyon che din nuhn, din se che chihcoman ne che chitahno ne.

⁶ Ate man ne, a ndaconan Timoteo, ne nte cuande se nuhn nduhca che riquendi nchuhn ritahno ne man, nduhca che chenac cuma ne vedeyahino man. Namin nte cuande se nuhn che renecahco nchuhn nuhn numacuahn vedeyahino, nahn ndihchero ne nuhn nduhca che nahn ndihchero man nuhn nchuhn.

⁷ Dihno, chemin che andahre ama rechuhrihn nuhn, ate ama yeno nuhn man che checadino nuhn nduhca che riquendi nchuhn ritahno ne Dihvo vo Jesucristo.

⁸ Ama vedechahtino cava nuhn che tihca riquendi nchuhn ritahno ne Dihvo vo.

⁹ Nde hua rentaquino nuhn taça necah nuhn nundihve cuahn Dendiohs yahn vo che ama yeno nuhn cava nchuhn.

¹⁰ Nde ro nde rahn revah nuhn che nahn ndihchero nuhn nchuhn, cacuahn ca nuhn nchuhn che quendi ne cotahno ne numa ino ne.

¹¹ Ama nahn nuhn che man Chido vo Dendiohs man, Dihvo vo Jesucristo man, te yune ye che chi nuhn quendihchero nuhn nchuhn.

¹² Nahn nuhn che din Dihvo vo che conahn ndah ne vederihquentiyon yahn ye, din yahino vih ne man, din yahino ne nducoyaca ihyan man, nduhca che yahino man nuhn nchuhn.

¹³ Namin nahn nuhn che din ye che quendi nchuhn cotahno ne ihyan numa ino ne, cava che nda ro che nda ye nduco ihyan yahn ye ne, dave yavenan ne nan Chido vo Dendiohs.

4

Nduhca che nahn Dendiohs che cuahtenan ihyan

¹ Dihno, man ne, va ama nan che rihquentiyon nuhn nchuhn numacuahn vederihquentiyon yahn Dihvo vo Jesucristo. Nchuhn ne, a ca cuande ne yahn nuhn nduhca che nahn Dendiohs che cuahtenan vo iyehense, ne tihca chenac ne nduco vih. Ate nahn nuhn che nde tahque ndahca cuahtenan ne.

² A devano nchuhn nduhca che chicuahn nuhn nchuhn numacuahn vederihquentiyon yahn Dihvo vo Jesucristo.

³ Nahn Dendiohs che dave yavenan nchuhn nan ye. Hua ndere cuahtenan ne nduco ihyan che hua nihnevaco ne nduco ye.

⁴ Queri ama nchuhn, cuahtenan cuma ne ndahta yahn ne nduco vedino vedenećun.

⁵ Hua ndere cuahtechica nchuhn vedeyeno yahn mań ne, nduhca che vatechica ihyan che nde hua devano ye che va Dendiohs.

⁶ Hua tihca cuahtechica nchuhn, cuahtendiho ne nunde nań ihyan, te Dihvo vo Dendiohs ne, din ye castigo ihyan yahn nunde che tuhchan, nduhca che a te cuande nuhn nchuhn.

⁷ Dendiohs ne, a tendahnun ye uvo, ne nahn ye che dave yavenań vo nań ye. Hua nahn ye che ndere cuahtechico vo.

⁸ Adecoduhno ihyan che hua redinahn ye che tihca rihquentiyon nuhn ne, hua rahcotahn ye vederihquentiyon yahn ndere ihyan, te rahcotahn ye vederihquentiyon yahn Dendiohs, ihyan min che rete ye Vaco Ndah yahn ye uvo.

⁹ Me nduhca che va che din yahino nchuhn vih ne, nde hua redin fuerza che dirun nuhn yahn ne, te a mań Dendiohs chicuahn ye nchuhn che din yahino vih ne.

¹⁰ Dihno, a redin yahino nchuhn nducoyaća ihyan che ritahno ye Dihvo vo Jesucristo che vate ye yań yahn Macedonia, ne ama nahn nuhn che tihca quendi ne.

¹¹ Ndahca cuahtenan nchuhn. Hua conda mendahn ne nań dehtenduh che redin ihyan. Codin ne ntiyon nduhca che a te cuande nuhn nchuhn,

¹² caća che ndahca chuhnun ne, ne nevahnećun nducoyaća ihyan nchuhn. Va che ndań tun Dihvo vo Jesucristo.

¹³ Dihno, nahn nuhn che codevano nchuhn yahn dihno vo che rendaća ye iyehñse cuh. Hua co rań nchuhn caća ye, nduhca che redin ihyan che hua devano ye che va che ntuche teñań, ne cuahn che rih ama ihyan yahn ye ne, rahco ye te ama yune no chihnonan yahn ye.

¹⁴ Uvo ne, a devano vo te chih Dihvo vo Jesucristo, ne ntuche ye. Namin a devano vo te nducoyaća teñań che chitahno ye ihyan cuahn che chahte ye iyehñse ne, va che ndedetuhche Dendiohs ihyan.

¹⁵ Chemin che numacuahn vederihquentiyon yahn Dihvo vo Jesucristo rete cuande nuhn nchuhn, te ro che ndań tun ye ne, nducoyaća vo che chenac va vo iyehñse, hua quendańnań vo yahn dihno vo che a ndih ye.

¹⁶ Ndań ro min ne, mań Dihvo vo Jesucristo caća ye vahchetero. Ura min ne, cuah ama ndudo nań ro numacuahn vederihquentiyon. Namin cuah ama ańgel ndinań. Namin cuah corneta yahn Dendiohs. Tuhme menań vihca va che ntuche nducoyaća teñań che chitahno ye Dihvo vo Jesucristo.

¹⁷ Cuihno min ne, nducoyaća vo che chenac va vo iyehñse, ndedecuan Dendiohs uvo dama nduco ihyan chahn vań mań, ne ntań nun vih vo nduco Dihvo vo Jesucristo nań ro. Tuhme cuahtenan vo nduco Dihvo vo numacuahn ro.

¹⁸ Nducote a tihca va caće che va che conahn ne, cuente nchuhn yahn chemin nduco vih, cuenećań yań ne chedave yahn ama tama ne.

5

¹ Dihno, hua co co nuhn nchuhn deh ro, o deh nduyo che tihca conahn,

² te a devano cuaco mań nchuhn te adenań techecaće Dendiohs yahn ihyan, nde hua duh devano deh ura.

³ Cuahn che tahque ndahca vate ihyan, che nde tah hua rendedecadino ye ne, a denań ndań venećuino min nań ye nduhca che ra yah chete ndahta che a ndań ura che cuacoyań ye, ne hua co ndevahn ye yahn vedeyah min.

⁴ Ate nchuhn dihno, nducote a chitahno ne Dihvo vo Jesucristo ne, a vateyań ne adecodehno ura che conahn.

⁵ Uvo ne, a ndedevahn Dendiohs uvo. Ate ihyan chenahn ne, cahnda yahn ye.

⁶ Chemin che nahn che cuahteyan vo cava che hua co man vo nduhca ihyan chahn.

⁷ Nahn ye ne, vateyado ye, ne nahn ye vatechica coh ye.

⁸ Ate uvo ne, a chitahno vo Dihvo vo Jesucristo, ne nahn che runecade cuahtechico vo. Nduhca sandado che va deh nduco che ndedevahn se sahn ne, tihca uvo, te ritahno vo Dihvo vo Jesucristo, ne cuahtenan cumo vo vedeyahino, ndichahntino vo che ndedevahn ye uvo.

⁹ Dendiohs ne, tendahnun ye uvo, din ye che chitahno vo Dihvo vo Jesucristo cava che ndedevahn ye uvo yahn castigo yah che va che co ihyan nunde.

¹⁰ A cava uvo che chih Dihvo vo, ne ro che nda ye ne, a ndih vo, o chenduche vo, va che cuahtenan vo dama nduco ye.

¹¹ Chemin che cuiquendi nchuhn cuenecah yan ne chedave yahn ama tama ne.

Riyahve Pablo ihyan che ritahno ye Dihvo vo Jesucristo

¹² Dihno, nahn nuhn che nevahnecon nchuhn ihyan che rahndudo ye ndudo yahn Dihvo vo Jesucristo, riyahve ye nchuhn, te ihyan chahn ne, chenan cuma ye vederihquentiyon.

¹³ Va che din yahino ne ihyan cava ntiyon che redin ye.

Ndahca cuahtenan ama tama ne nduco vih.

¹⁴ Dihno, nahn nuhn che yahve nchuhn dihno vo che hua nahn din ye ntiyon man, cuenecah yan ne chedave yahn ihyan che ran ye man, cuenan ne ihyan che hua ndah ritahno ye man, codin chahtino ne yahn nducoyaca ye man.

¹⁵ Cuihco nchuhn cudado. Hua dama co ne nduco ihyan che redin tan ye nduco ne. Tahque ndah ne, codin nun ino ne, codin ne che ndah nduco vih man, nduco nducoyaca ihyan man.

¹⁶⁻¹⁷ Cuahn dama cuenecah yan nchuhn chedave yahn ne man, covah ne man.

¹⁸ Adehno che cuahno co nchuhn ne, cuenecah ne nundihve cuahn Dendiohs. Tihca nahn Dendiohs che dinahn nchuhn. Chemin che dechuh ye Daya ye Jesucristo.

¹⁹ Hua cuahcotahn nchuhn vederihquentiyon yahn Vaco Dendiohs.

²⁰ Cuenevahnecon ne ndudo che recah Dendiohs che rente ihyan nduco ne.

²¹ Cuihco nchuhn cudado yahn ndudo che rihnevan ne. Cha che ndah ne, codinahn ne.

²² Hua nevahnecon ne nde ama nan dehtenduh che chihnga.

²³ Dendiohs, ihyan min che redin ye che rahte dih chedave yahn ihyan, man ye nchahco ye nunde yahn nchuhn, nedin dave ye chedave yahn ne. Nda ro che nda Dihvo vo Jesucristo ne, ndeva ye nchuhn.

²⁴ A ihyan min che tendahnun ye nchuhn. Va che dinahn ye nducuahn, te redinahn ye ndudo yahn ye.

²⁵ Dihno, covah nchuhn cava nuhn.

²⁶ Cuenecah nchuhn Dendiohs nducoyaca dihno vo numacuahn vedenecon.

²⁷ Numacuahn vederihquentiyon yahn Dihvo vo Jesucristo rihquentiyon che cuahndudo nchuhn caca cuh, cahnevan nducoyaca dihno vo.

²⁸ Dihvo vo Jesucristo din yahino ye nchuhn. Tihca co.

CAÇA CHE DIRUN SAN PABLO ADIVE, DEHÇUH YE YAHN IHYAN YAHN DENDIOHS CHE VATE YE YAN TESALONICA

¹ Nchuhn, ihyan yahn Chido vo Dendiohs man, yahn Dihvo vo Jesucristo man, che vate ne yan Tesalónica, u Pablo nduco Silas nduco Timoteo, dirun nuhn yahn ne.

² Chido vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Va che techecade Dendiohs yahn nducoyaca ihyan nunde

³ Dihno, numacuahn ro renecah nuhn nundihve cuahn Dendiohs cava nchuhn. A tihca va che necah nuhn nundihve cuahn ihyan, te queri ama ro ne, nde tahque ritahno ne Dihvo vo Jesucristo man, nde tahque yahino vih ne man.

⁴ Chemin che adecotino che renda nuhn van ihyan che ritahno ye Dihvo vo ne, rente nuhn numacuahn vedeyeno nduhca che riguendi nchuhn ritahno ne Dihvo vo numacuahn chedave yahn ne, andahre ama ndeh nan dehtenduh che rahno ri ne man, rechuhrihn ne man.

⁵ Hua cua ne cudado, te Dendiohs yuhn vo retechecade ye numa cuaco. Cuahn che cuihno techecade ye ne, ndeva ye nchuhn, cuahtenan ne nan che rihquentiyon ye. A va che cuahtenan ne min, te yahn chemin che rechuhrihn ne.

⁶ Va che din Dendiohs castigo ihyan che redin ye che rechuhrihn nchuhn.

⁷ Cuahn che caça Dihvo vo Jesucristo vahchetero nduco angel yahn ye, cuhnde ro ye numacuahn vederihquentiyon yahn ye van ruchiyahn che caça nan ro ne, cahnevi Dendiohs nducuahn che rechuhrihn vo.

⁸ Nda ro min ne, nducoyaca ihyan che hua chitahno ye Dendiohs, hua dinahn ye ndudo ndah yahn Dihvo vo Jesucristo ne, din Dihvo vo castigo ihyan.

⁹ ¡Ama chahte vederihquentiyon yahn Dihvo vo! ¡Ama yudo nan va ye! Ihyan che ndinda ye ne, ama yahn nan va Dihvo vo, min va che cuahtenan ye, co ye castigo numacuahn ro.

¹⁰ Cuahn che ndaconan chi Dihvo vo ne, ndeva ihyan yahn ye yavenan ye, ne ama ndah ro yahn ye, te a chitahno ye ihyan. Namin ama ndah ro yahn nchuhn, te a chitahno ne ndudo yahn ye che cahndudo nuhn.

¹¹ Yahn che tihca va che conahn ne, chemin che revah nuhn cava nchuhn ro ro, rica nuhn Dendiohs yuhn vo cava che ndahca quendi nchuhn, ne hua nto ino ye che a tendahnun ye nchuhn. Namin rica nuhn ihyan che numacuahn vederihquentiyon yahn ye din ye che conahn nduco nchuhn nducuahn che ndah man, conahn nducuahn ntiyon che nahn din ne yahn che ritahno ne Dihvo vo Jesucristo man.

¹² Nduco tihca ne, ndeva ihyan yavenan Dihvo vo. Namin ndeva ye yavenan nchuhn yahn che Chido vo Dendiohs man, Dihvo vo Jesucristo man, yahino ye nchuhn.

2

Va che nda ama sahn ndinda

¹ Dihno, nducote va che ndaconan chi tun Dihvo vo Jesucristo, nedin dama ye nducoyaco vo, conduco vo ihyan ne, va ama ndudo che co nuhn nchuhn.

² Hua cuahnecun nchuhn che cahnceh nde ama ihyan nchuhn. Andahre cahma ama vaco che a nda Dihvo vo Jesucristo man, andahre cuahndudo ihyan che a nda ye man, andahre dechuh ihyan ndudo yahn ne che a nda ye man, din ca ye che nuhn dirun nuhn yahn ne, ate nde hua cotahno ne, nde hua dihya ne co.

³ Hua tumecah ne yahn nde ama ihyan che tihca nahn cahnceh ye nchuhn. Numanahn che metah nda ro min ne, va che necuan ihyan, co tan ye nduco Dendiohs. Namin va che nda ama sahn ndinda.

⁴ Sahn min ne, co tan se nduco nducuahn che rendeva ihyan yavenan, redin vahn ye Dendiohs. Nde conda se chete yaco chahte yahn Dendiohs, ndere cuahndudo se che sahn min che Dendiohs.

⁵ Cuenecahco nchuhn. Ro menan me cuahn che quenán nduco nchuhn ne, a rahn ri nchuhn che tihca va che co.

⁶ A devano nchuhn duh che redin vahche yahn sahn min man ro cuh, cava che hua co chi se nde nda ro yahn se.

⁷ Vederihquentiyon chihnga che va cuahn ndeh ne, a va iyehense cuh. Man ne, adeche cuavi cha che redin vahche yahn,

⁸ tuhme nda sahn ndinda me. Ate cuahn che nda Dihvo vo Jesucristo ne, decuihno ye sahn.

⁹ Sahn ndinda me ne, quenán cuma se vederihquentiyon chahte yahn chundah, ne ama ndeh nan vederihno din se numacuahn vederihncheh.

¹⁰ Cahnceh se nducoyaca ihyan che va che conda ye, che hua chitahno ye ndudo cuaco cava che ndevahn ye.

¹¹ Chemin che cuahnecun Dendiohs che cotahno ye vederihncheh min.

¹² Tihca va che conda nducoyaca ye, te hua nahn cotahno ye ndudo cuaco, ne tahque ndah ye ne, riquendi ye dehtenduh che chihnga.

Tendahnun Dendiohs ihyan che ndeva ye

¹³ Me nchuhn dihnó, yahino Dihvo vo Jesucristo nchuhn. Chemin che renecah nuhn nundihve cuahn Dendiohs cava ne, te nde ro menan ne, tendahnun ye nchuhn cava che ndedevahn ye nchuhn. Nedin dave ye chedave yahn ne numacuahn vederihquentiyon yahn Vaco Ndah yahn ye, din ye che chitahno ne ndudo cuaco.

¹⁴ Te yune Dendiohs che chitahno nchuhn ndudo che cahndudo nuhn, te a tendahnun ye nchuhn cava che ndedevahn ye nchuhn, ne cuahtenan cuma nduco ne vederihquentiyon chahte yahn Dihvo vo Jesucristo.

¹⁵ Dihno, quendi nchuhn cotahno ne numacuahn chedave yahn ne che chicuahn nuhn nchuhn man, che dirun nuhn yahn ne man.

¹⁶ A Dendiohs che yahino ye uvo, ne renecah yan ye chedave yuhn vo numacuahn ro, redin ye che chenan ino vo ihyan.

¹⁷ Dihvo vo Jesucristo man, Chido vo Dendiohs man, necah yan ye chedave yahn nchuhn, din ye che cotahno ne numa ino ne, cava che runecade nducuahn nan ndudo che rente ne man, nan ntiyon che redin ne man.

3

Nahn Pablo che covah ihyan

¹ Dihno, covah nchuhn cava nuhn. Cuihca ne Dendiohs che din ye che nun cotuh ndudo yahn Dihvo vo Jesucristo numachahte, ne nevahnecon ihyan nduhca che nevahnecon ne.

² Nducote vate ihyan che duhtuno ihyan ye, che hua ritahno ye Dihvo vo ne, cuihca ne Dendiohs che hua cuahnecun ye che din tan ye nduco nuhn.

³ Dihvo vo Dendiohs ne, redinahn ye ndudo yahn ye. Din ye che quendi nchuhn, cotahno ne numa ino ne. Din ye cudado nchuhn cava che hua dehva cuahno co ne.

⁴ Ndichahtino nuhn Dihvo vo Dendiohs che quendi nchuhn dinahn ne nducuah che te cuande nuhn nchuhn.

⁵ Dihvo vo Jesucristo din ye che quendi nchuhn cotahno ne ihyan numacuahn chedave yahn ne man, din ye che tumacadino ne che yahino Dendiohs nchuhn man.

Ihyan che ritahno ye Dihvo vo Jesucristo ne, va che din ye ntiyon

⁶ Dihno, numacuahn vederihquentiyon yahn Dihvo vo Jesucristo, rihquentiyon nuhn che cahcoman nchuhn dihno vo che hua nahn din ye ntiyon man, che hua nahn dinahn ye nduhca che chicuah nuhn nchuhn man.

⁷ A man nchuhn devano ne te va che quendi ne nduhca che din nuhn cuahn che chahtenan nuhn nduco nchuhn, din nuhn ntiyon.

⁸ Hua ndere cheh nuhn yahn nchuhn. Nde ro nde rahn ama chuhrihn nuhn din nuhn ntiyon cava che hua denduh nuhn nde ama cha nchuhn.

⁹ Andahre nchuhn va che te ne che cheh nuhn, ate din man nuhn ntiyon, ndaca che chuhnun nuhn, te nahn nuhn che cua cuande nchuhn, ne tihca quendi ne din ne ntiyon.

¹⁰ Ro min ne, tuhca chicuah nuhn nchuhn: "Duh che hua nahn din ntiyon ne, hua ndahca che cheh."

¹¹ A checadino nuhn te van nchuhn ne, vate ama o ihyan che hua nahn din ye ntiyon. Ndere vatechica ihyan chahn rendaichenan ye dehtenduh che redin ihyan.

¹² Numacuahn vederihquentiyon yahn Dihvo vo Jesucristo rihquentiyon nuhn che cuahte tahn ihyan chahn, din ye ntiyon, ndaca che chuhnun ye.

¹³ Dihno, cuiquendi ne codin ne che ndah; hua cua dahno ne.

¹⁴ Ndete che vate ihyan che hua nahn dinahn ye che rihquentiyon nuhn ne, cuihco nchuhn cudado cha ihyan che tihca redin ye, ne cuihcoman ne ihyan cava che co cuihnan ye.

¹⁵ Hua ndihche tan nchuhn ihyan. Cuiyahve ne ihyan nduco ndah, te dihno ne ihyan.

¹⁶ Man ne, Dihvo vo Jesucristo, ihyan min che redin ye che rahte dihn chedave yahn ihyan, man ye din ye che ndahca cuahtenan nducoyaca nchuhn, conduco ye nchuhn numacuahn ro.

¹⁷ U Pablo, dirun caca cuh, dechuh yahn nchuhn, nte Dendiohs nchuhn. Cuihco nchuhn cudado. Tuhca rahconahn che duché nan nducuah caca che redechuh.

¹⁸ Dihvo vo Jesucristo din yahino ye nducoyaca nchuhn. Tihca co.

CACA CHE DIRUN SAN PABLO MENAN, DECHUH YE YAHN TIMOTEO

¹ Dendiohs, ihyan min che ndedevahn ye uvo ne, tendahnun ye u Pablo, che co apóstol yahn Dihvo vo Jesucristo, ihyan min che ndichahtino vo ihyan.

² Timoteo, dechúh caca cuh yehn. Di ne, nduhca daya man di, te riquendi u, ritehne numa cuaco Dihvo vo Jesucristo. Chido vo Dendiohs nduco Dihvo vo Jesucristo, din yahino ye di, din ye che nduhca conen.

Recqh Pablo cudado Timoteo

³ Cuahn che metah cahn yahn yahn Macedonia ne, ráhn ndoque che conen yan Efeso cava che cahcantiyen che gnan ihyan cacuahn ye dehtenduh che hua cuaco,

⁴ cahcoman ye che ricuahn ye ndame nan cuento man, taça cochi ndata yahn ye man, te dehtenduh chemin chan ne, deman che rahteruhn chende ihyan, ate hua cochihve yuhn vo cava che cotahno vo Dendiohs man, cuahtenan vo nduhca che nahn ye man.

⁵ Nducote dave yavenan vo man, redinahn vo ndudo yahn Dendiohs man, ritahno vo Dihvo vo Jesucristo numacuahn chedave yuhn vo man, chemin che nahn Dendiohs che cuahtenan cumo vo vedeyahino.

⁶ Ate vate sahn che hua redinahn se, ne a ndere dera derahn se.

⁷ Ama rahn ama ri no se ricuahn ye ley che dirun Moisés, ate nde che rente man se, hua renahn se.

⁸ Devano vo te ley min ne, ndah, ne va nan che cochihve.

⁹ Chihnde ndiyu cava ihyan che ndah ihyan ye nan Dendiohs, ate cava sahn nunde man, sahn che duhtuno ihyan se man, sahn che hua renevah-necun se Dendiohs man, sah rihno ihyan man, sahn che rihno se chida se man, sahn che rihno se chaco se man,

¹⁰ sahn che ndere rahtenan se nduco ndahta che ndiyu ndahta yahn se man, sahn che ndere rahtenan se van man se nduco vih man, sahn che reduco se ihyan man, sahn rihneh man, sahn che ndere recqh se ndudo yahn se che hua cuaco man, sahn che rahtendihco se ndeh nan ca nunde man.

¹¹ Dendiohs, ihyan min che rendeva vo yavenan ye, a ndudo ndah yahn ye che rihco yudo yahn nducuahn nunde chemin chan. A ndudo min che va tah che rahndudó.

Renecqh Pablo nundihve cuahn Dihvo vo Jesucristo

¹² Renecqh nundihve cuahn Dihvo vo Jesucristo, te nde a rahn me a devano ye che dinahn, ne chaconahn ye u nan ntiyon yahn ye man, rinan ye u man.

¹³ Tihca din ye nduco, andahre ro menan ne, din duche yahn vederihquen-tiyan yahn ye, ne chi tán nduco ye, din tán nduco ihyan che ritahno ye ihyan. Ro min ne, van vedetundo yahn che tihca din, te metah cotahnó ihyan. Ate quenan vahino Dendiohs u,

¹⁴ ne andahre ama chahte vedetan yahn, ate nde tahque chahte vedeyahino yahn ye, din che chitahnó Dihvo vo Jesucristo.

¹⁵ Ndahca che cotahno nducoyaca ihyan ndudo cuaco cuh yahn Dihvo vo Jesucristo, nduhca che nda ye muhn iyehse cuh cava che ndedevahn ye ihyan nunde. Van ihyan chahn ne, u che tahque quendihcó nunde.

¹⁶ Ate quenan vahino Dendiohs u, ne nchahco Dihvo vo Jesucristo nunde yahn, chihco ro ye che ama chahtino ye. Tihca din ye cava che cua

cuande ihyan nunde chenahn, ne namin cotahno ye ihyan, cuahtenan ye vahchetero numacuahn ro.

¹⁷ Va ama no Dendiohs. Ihyan min ne, hua ro ye. Hua nda ro che coh ye. Ama va vededevano yahn ye. Ndahca che ndeva vo yavenan ye cuahn dama. Tihca co.

¹⁸ Dayá Timoteo, nduhca che rahn ama o dihno vo numacuahn vederihquentiyon yahn Dendiohs, namin rihquentiyón di che nduhca sandado che yahino se ntiyon che nda se, ruhn se numa ino se, tihca quendi dinehn ntiyon che va tah.

¹⁹ Cotehne Dihvo vo Jesucristo numacuahn chedave yehn. Codinehn Ndudo yahn Dendiohs. Chenun van ama o se che hua nahn dinahn se, ne chihcoman se che ritahno se.

²⁰ Tihca din Himeneo man, Alejandro man. Sahn chahn ne, a ndahcó sahn tah chundah cava che tuma cuahn se.

2

Nduhca che va che covah ihyan

¹ Menan vihca rihquentiyón che covah nchuhn cava nducoyaca ihyan iyehnse, cuenecah ne nundihve cuahn Dendiohs cava ye.

² Covah ne cava nducoyaca ihyan ndinan man, intiyahn man, cava che cahco dihn ye numachahte, ne ndahca cuahtenan vo nan Dendiohs man, nan ihyan man.

³ Dendiohs, ihyan min che rendedevahn ye uvo ne, renan ino ye che tihca din vo.

⁴ Ihyan min ne, nahn ye che codevano nducoyaca ihyan ndudo cuaco, ne ndevahn ye.

⁵ Va ama no Dendiohs. Namin va ama no ihyan che rahn nan ye ihyan iyehnse nan ye. Ihyan min che Dihvo vo Jesucristo.

⁶ Dihvo vo ne, cahneacun ye che chihno ihyan nunde ihyan. Nduco tihca ne, nedihve ye nunde yahn ihyan iyehnse. Nda ro che nahn Dendiohs ne, din ye che chetuhn ndudo yahn che tihca chi.

⁷ Chemin che tendahnun ye u cava che co apóstol, cuahndudó ndudo cuaco min, cacuahn ihyan nación chenahn, ne cotahno ye. Nducote ritahnó Dihvo vo Jesucristo, cuaco che rahn.

⁸ Nahn che numachahte covah ihyan chahn numacuahn chedave yahn ye, cuahtenan cuma ye vedeyahino nduco vih.

⁹ Namin ihyan ndahta ne, nahn che runecade cuahtenun ye tino yahn ye. Hua ndedecuco ye tin ye. Hua ndedecuco ye ihyan nduco tu diyahn, o diyahnguan. Hua cuahtenun ye tino diyahn.

¹⁰ Tahque ndahca che runecade cuahtenan ye, din ye ntiyon che cochihve nduhca che redin ndahta che ritahno ye Dendiohs numa cuaco.

¹¹ Ihyan ndahta ne, va che cahcovan ye Ndudo yahn Dendiohs numacuahn vedenehun.

¹² Rihquentiyón che dihn cuahte chende ye. Hua cacuahn ye, nde hua cahcantiyon ye ihyan chahn.

¹³ Tihca chihco cade Dendiohs. Menan ne, dendah ye Adán. Adiva ne, dendah ye Eva.

¹⁴ Ndiyu Adán menan vihca quendihco ye nunde, te dinoca ihyan ndahta min, yahn che cah yune ye che chihncheh chundah ihyan.

¹⁵ Chemin che cahnda va yahn nducoyaca ihyan ndahta, nda ro che cuacoyahn ye. Ate ndete che quendi ye cotahno ye Dihvo vo Jesucristo,

din yahino ye ihyān mān, dave yavenān ye nān Dendiohs mān, runecāde cuahtechica ye mān ne, hua dehva co yahn ye.

3

Nduhca che va che cuahtechica ihyān ndinān yahn yāco

¹ Cuāco te ihyān che conan ye ntiyon ndinān ne, conan ye ntiyon ndah.

² Chemin che ihyān che conān ye yahn ihyān che ritahno ye Dihvo vo Jesucristo ne, nahn che āma no ndahta conan cuma ye, nahn che runecāde conan ye cava che nde āma ihyān hua cāhma nunde ye yahn ye mān, hua ricoh ye mān, conan ye numacuahn vedino vedenecon mān, nevahnecun ye nducoyāca ihyān mān, ndahca cacuahn ye Ndudo yahn Dendiohs mān.

³ Ntiyon cuh ne, hua co conan nde āma sāhngoh, nde āma sāhn che doh ino se mān, nde āma sāhn che ndichahtino se tume mān. Atenān ihyān che necun ye mān, chahtino ye mān, co conan ye ntiyon cuh.

⁴ Nahn āma ihyān che ndahca rihquentiyon ye vāco ye mān, redinahn dāya ye yahn ye mān, renevahnecun ihyān mān.

⁵ Nahn āma ihyān che tihca ye, te ndete che hua devano ye cāhcantiyon ye vāco mān ye ne, hua co cāhcantiyon ye ihyān yahn Dendiohs.

⁶ Nahn āma ihyān che a rāhn ritahno ye Dihvo vo Jesucristo, te ndete āma ihyān che cade canān ritahno ye ne, denān din yāde ye, ne co ye castigo yahn Dendiohs nduhca che chahno chī chundah.

⁷ Namin nahn āma ihyān che, nde ihyān che hua ritahno ye, nevahnecun ye ihyān cava che hua cora nde āma nān vedecuihno yahn ye, din chundah.

Nduhca che va che cuahtechica ihyān che cuahtenan ye ntiyon yahn yāco

⁸ Tihca ihyān che cuahtenan ye ntiyon yahn yāco, nahn che runecāde ye, che hua o nān o chende ye mān, che hua ricoh ye mān, che hua ndichahtino ye tume mān.

⁹ Nahn ihyān che riquendi ye ndudo yahn Dihvo vo Jesucristo numacuahn chedave yahn ye.

¹⁰ Nahn che a rendihche ndah ihyān ndiyāco ihyān. Ndete che ametah deh che redin vāhche yahn ye ne, tuhme co cuahtenan ye ntiyon cuh.

¹¹ Ndahta yahn ihyān chahn ne, namin nahn che runecāde ye mān, redinahn ye ndudo yahn ye mān, hua ricoh ye mān, hua nte ye cuendo mān.

¹² Āma ihyān che conan ye ntiyon yahn yāco ne, nahn che āma no ndahta conan cuma ye mān, ndahca rihquentiyon ye vāco ye mān, dāya ye mān.

¹³ Ihyān che ndahca quenda ye ntiyon yahn yāco ne, rendeva ihyān yavenān ye mān, nde tahque richahtino ye che ritahno ye Dihvo vo Jesucristo mān.

Nduhca che va che cuahtenan ihyān che ritahno ye Dihvo vo Jesucristo

¹⁴ Rendecadinó che a nun chí quendihcheró di. Numanahmin ne, dechúh cāca cuh yehn,

¹⁵ te ndete che denān hua co chī nún ne, cochihve yehn cava che codevene nduhca che va che cuahtechico vo vān ihyān yahn Dendiohs, ihyān min che quenduche ye. Ihyān chahn ne, nduhca yāco yahn Dendiohs tihchan ye, te Dendiohs ne, nduco ye ihyān. Ihyān chahn che va tāj ye Ndudo yahn Dendiohs, redin ye cudādo.

¹⁶ Cuāco niyon te ndudo che ritahno vo, che cade te Dendiohs, checadino vo ne, āma yudo. Tuhca conahn ndudo min:

Dendiohs ne, nda ye mūhn iyehmse cuh, ndaconda ye ihyān. Chihco ro Vaco Ndah yahn ye che metah nde āma nunde yahn ye. Cuāco ndudo cuh, te nde ángel ndihchero ye ihyān.

Chetuhn ndudo yahn ye numachahte iyehñse, ne ihyan yahn nducuahñ
nación, chitahño ye ihyan.
Chihño min ne, numacuahñ vederihquentiyon conahn ye vahchetero.

4

Ihyan che cahcomañ ye che ritahño ye Dihvo vo Jesucristo

¹ Vaco Dendiohs ne, rete cuande numa cuäco te adive ne, cuahte dihño
vo che cahcomañ ye che ritahño ye Dihvo vo Jesucristo, quendi ye vaco che
rihncheh mañ, che ricuahñ chundah mañ.

² Cahcovan ye ndudo yahn ihyan cuando che o ñan o chende ye, che metah
vederendedecadino yahn ye anduhñeçã ndete che a ndih chedave yahn ye,
nedin ama cu che nto ruchiyahn.

³ Ihyan chemin chan chahn ne, ndere cahca tañ ye che cahnevaco ihyan
mañ, cahco cahnda ye che cheh ihyan ama o ñan dehtenduh mañ, andahre
mañ Dendiohs chihco ye nducuahñ çava che ihyan che ritahño ye ihyan
mañ, che quendi ye ndudo cuäco yahn ye mañ, neçah ye nundihve cuahn
ihyan, ne cheh ye.

⁴ Cuäco te nducuahñ dehtenduh che chihco Dendiohs ne, ndah, ne ndo-
tenan che ndahchenan vo ne, tahque ndah che neçah vo nundihve cuahn
ihyan, ne chuh vo,

⁵ te nducuahñ dehtenduh che reh vo ne, ri vihco nduco ndudo yahn
Dendiohs mañ, nduco ndudo che revah vo mañ.

Ama sahn che ndahçã redin se ntiyon yahn Dihvo vo Jesucristo

⁶ Ndete che tihçã cacuehn dihño vo ne, ndahçã din ntiyon yahn Dihvo vo
Jesucristo, ne cochahtine ndudo ndah che chehn.

⁷ Hua tumecah yahn dehtenduh cuando che rente ihyan, te chemin ne,
anduhñeçã cuando yahn ndahta. Tahque ndah che quendi nevahñecon
Dendiohs.

⁸ Richihve che rahn ihyan che ndo çane ye çava che ndahçã duche ye. Ate
nde tahque richihve che cuahn ye nevahñecon ye Dendiohs, te chemin che
cochihve yahn ye numanahn che chenän ye iyehñse, nde cochihve yahn ye
çava che tuno ye vahchetero.

⁹ A chu che vedechahtino yuhn vo. Nahn che cotahño nducoyaça ihyan.

¹⁰ A çava chu che redin vo ntiyon mañ, che rechuhrihn vo vedetañ yahn
ihyan mañ, ndihco vo vedechahtino yuhn vo tah Dendiohs, ihyan min che
quenduche ye. A ihyan min che rendedevahn ye nducoyaça ihyan, menañ
vihca ihyan che ritahño ye ihyan.

¹¹ Cuihquentiyen mañ, cuicuehn mañ, dehtenduh che tuhchan.

¹² Andahre sahn yuno di, ate cochique nduco ndah çava che nevahñecon
nducoyaça ihyan di. Cuihque cudado ñan ndudo yehn mañ, ñan nducuahñ
che redin mañ. Codin yahine nducoyaça ihyan mañ, cuiñehne Dendiohs
numa ine mañ, ndahçã conen ñan Dendiohs mañ. Nduco tihçã ne, çah yeno
ihyan che ritahño ye Dihvo vo Jesucristo, ne quendi ye yune yehn.

¹³ Numanahn che ndã ne, cuahndode ndudo yahn Dendiohs cuahn ðama,
cueneçah yan chedave yahn dihño vo, cuicuehn ihyan.

¹⁴ Hua cahcomañ vederihquentiyon che te Dendiohs di ro che din ye che
checadino intiyahn yaço ntiyon che conen. Ihyan chahn ne, nahn tah ye di,
chica ye Dendiohs cave.

¹⁵ Cuiquenda ntiyon yehn numa ine çava che ndihchero nducoyaça ihyan
che ndahçã redinehn.

¹⁶ Cuihque man cudado di. Namin cuihque cudado che ricuehn. Cuiquendi numa ine nducuahñ che ráhn ndoque. Ndete che tihça din ne, ndevahn di man, ihyan che rihnevan ye che rahndode man.

5

Nduhça che va che cuahtechico vo van ihyan che ritahno ye Dihvo vo Jesucristo

¹ Hua cahve nduco nde ama ihyan ndico. Tahque ndah ne, coyahve ihyan nduhça che riyahve chide. Sahn decahya ne, coyahve sahn nduhça che riyahve dihne.

² Indihthe ndahta ne, coyahve ihyan nduhça che riyahve cheque. Tahñ decahya ne, coyahve tahñ nduhça che riyahve quehve, cuenevahnecon tahñ.

³ Ihyan ndiyaco ne, va che conan ye ihyan ndahta vah che metah duhva yahn ye.

⁴ Ihyan ndahta vah che vate daya ye man, daya ino ye man ne, a ihyan chahn yahn ye va che ndihche ye çava ye, te a chuhrihn ye tave ye ihyan. Tihça renan ino Dendiohs che din ihyan.

⁵ Ihyan ndahta vah che metah duhva yahn ye ne, a Dendiohs che vedechahtino yahn ye, ne hua renguan ye revah ye nde ro nde ráhn.

⁶ Ate ihyan ndahta vah che vatechica ye vedeyeno yahn man ye ne, anduhneça ndete che a ndih ye nan Dendiohs.

⁷ Cuicuehn ihyan nducuahñ dehtenduh che tuhchan çava che hua ndaca yune che çahma nunde ihyan yahn ye.

⁸ Ndete che vate ihyan che hua rinan ye ihyan yahn ye che chenun vaco ye man, ihyan chenahn man ne, redetohnan ye che ritahno ye Dihvo vo Jesucristo, ne nde tahque duhtuno ihyan rendaconda ye che co ihyan che hua ritahno ye.

⁹ Ndahta vah che ama no inchahn ye nenan cuma ye man, ndahta vah che a ri ye ino raco nduyo, o tahque a ndico ye man, atenan ihyan chahn co co cuande ye van ndahta vah che redin ye ntiyon yahn yaco.

¹⁰ Avane ne, nahn che runecañe ndahte ye man, ntave ye daya ye man, nenevahñecun ye ihyan vaco ye man, ndinan ye ihyan yahn Dendiohs numacuahn vedeneñcun man, nedin yahino ye ihyan che rechuhrihn ye man, nedin ye nducuahñ che ndah man.

¹¹ Ate hua co cuande ndahta vah che decahya te, te denan nda ro che nahn cahnevaco tun te, ne çahcoman te ntiyon yahn Dihvo vo Jesucristo che quenan te,

¹² denda te ndudo yahn te, condihco te nunde.

¹³ Avane ne, ndete che cuahtechica te nduh vah nduh vah co te nduhça ihyan che metah ntiyon yahn ye, ne cuanan nte te cuendo man, conda van te nduh cuan nan che hua ra cuande yahn te man, çahma te dehtenduh che hua ndahça man.

¹⁴ Chemin che nahn che cahnevaco tun tahñ ndahta vah che decahya te, ndaca daya te man, din te cudado vaco te man, çava che hua ndaca yune che chihnga çahma ihyan.

¹⁵ Tihça ráhn ndoque, te ama o ndahta vah ne, a chihcoman te che ritahno te Dihvo vo Jesucristo, ne redinahñ te che rihquentiyon chundah.

¹⁶ Dihno vo man, cahvo vo man, che chenah nda ndahta vah ndevaco ye ne, va che conan ye ihyan çava che hua ndaca yune che ihyan ndiyaco conan ye ihyan. Nduco tihça ne, tuno yahn ihyan ndiyaco che conan ye ndahta vah che metah duhva yahn ye.

¹⁷ Intiyahn yaco che ndahca rihquentiyon ye, menan vihca ihyan che rahndudo ye Ndudo yahn Dendiohs man, ricuahn ye man ne, va che ndahva conan ihyan ndiyaco ihyan.

¹⁸ Tihca va che co, te ndirun nan Ndudo yahn Dendiohs tuhca: "Hua dechiche duto itenine che redendeñ te trigo cava che tiviyato, te ri yahn te, nahn cheh te." Namin ndirun tama cuan: "Ihyan redin ntiyon ne, va che nevhive yahn ye."

¹⁹ Hua tumacah yahn ihyan che caca nunde ye yahn intiyahn yaco cuahn che metah o ino ihyan che cahma ye che cuaco.

²⁰ Ate ndete che va ama ihyan chahn che quendihco ye nunde, tuhme coyahve ihyan nan nducoyaca dihno vo cava che dihya nun ino combiero yahn ye co, ne cahco ye cudado.

²¹ Nan Dendiohs man, nan Dihvo vo Jesucristo man, nan angel yahn ye man, rihquentiyon di che dineñ nducuahñ dehtenduh che tuhchan quendihconahn, hua cuacandih nunde yahn nde ama ihyan.

²² Hua aderene nehn ntiyon yahn yaco adecoduhno ihyan cuahn che metah ndihche ndah ihyan, te denan ndere din ye, ne nde di condihque nunde che cuande yahn ye. Cuihque cudado cava che dave yavenan nan Dendiohs.

²³ Hua deman cuahn nune iche coh. Cuih tah vino cava vacochendereh yehn yahn che cuahn dama ri cah.

²⁴ Van ihyan che rahque che co cuahtenan ye ntiyon yahn yaco ne, nahn ye ne, nde metah cuhnde cade yahn ye, ne a ndero ndi che chendihco ye nunde. Nahn tun ye ne, hua duh devano che chendihco ye nunde, ate va ro che cuhnde ro nunde yahn ye.

²⁵ A namin no tun, ndete che ndah redin ihyan chahn ne, a ndero ndi. Me ndete che chihnga redin ye ne, andahre hua devano ihyan ne, ate va ro che cadino ye.

6

¹ Queri ama dihno vo che va dihve ye ne, nahn che ama nevahnecon ye ihyan cava che hua chihnga cahma ihyan yahn Dendiohs man, yahn ndudo yahn Dihvo vo Jesucristo man.

² Me ndete che dihve dihno vo chahn ritahno ye Dihvo vo Jesucristo ne, nahn che nde tahque nevahnecon ye ihyan man, tahque ndah din ye ntiyon yahn ye man, te ntiyon che redin ye ne, cochihve yahn dihno ye che yahino ye. Vederihquentiyon cuh cacuehn man, coyahve ihyan che dinahn ye man.

Nahn che cuahte vo vedeyeno nduco che rete Dendiohs uvo

³ Ndete che vate ihyan che hua ricuahn ye tihca man, che hua ricuahn ye ndudo cuaco man, che hua renan ino ye ndudo ndah yahn Dihvo vo Jesucristo che ritahno vo man ne,

⁴ ihyan chahn ne, cun ye man, yade ye man, nde tah hua renahn ye. Ama ruhñ chende ye nduco ihyan yahn dehtenduh che nde hua redin yahn che cuhma chende ye. A chemin no che vedeyeno yahn ye. Nduco tihca ama redendecuan ye canda man, vedeve man, redin ye che retahn nan ihyan vih man, recah ye nunde vih man,

⁵ rahtenun ino ye vedetan nduco vih man. Ihyan che ametah va cuaco vederendecadino yahn ye man, che hua devano ye ndudo cuaco man, che rahco ye che ritahno vo Dihvo vo Jesucristo cava che ndaca vo vedecuihca man, atenan ihyan chahn che dama ri ye nduco vih. Nahn che din vi vo yahn ihyan chemin chan.

⁶ Cuāco te che ritahno vo Dihvo vo Jesucristo ne, chemin che tahque richihve yuhn vo ndete che vato vo vedeyeno nduco che rete Dendiohs uvo.

⁷ Nduhca che hua dehva nda vo che nda vo muhn iyehense cuh ne, tihca hua dehva ndiqunda vo che ndaco vo muhn.

⁸ Nduco che ndaca che chuh vo man, tino che cuahtenun vo man, a nduco chemin cuahtenan vo vedeyeno.

⁹ Ate ihyan che nahn cuahtenan cuma ye vedecuihca ne, rendaça yune che retumarande chundah ihyan man, riya ye muhn min nan che cahnda yahn ye man. Van vedetundo yahn ye rih ye vederahn ihyan, renuhn ye ama ndeh nan dehtenduh che redin che rechuhrihn ye man, rinda ye man.

¹⁰ Tihca, te vedeyahino cava tume ne, chemin che redin che rihquino ihyan redin ye nducuahh dehtenduh che chihnga. A chemin tun redin nduco nahh dihno vo che rihcoman ye che ritahno ye Dihvo vo Jesucristo, renuhn man ye vedeyah cava chedave yahn ye.

Nduhca che va che quendi vo Dihvo vo Jesucristo

¹¹ Me di che redin ntiyon yahn Dendiohs ne, codin vih yahn nducuahh dehtenduh che chemin chan, codin nducuahh che ndah. Cuiquendi cuenevahnecon Dendiohs man, cuitehne Dihvo vo Jesucristo man, codin yahine ihyan man, conan come vedechahtino man, vedenecon man.

¹² Nduhca che ruhn sandado numa ino se che hua nahn denda se ne, tihca cuitehne Dihvo vo Jesucristo numa ine, te chemin che cochihve yehn cava che hua denda che conen vahchetero numacuahn ro. A cava chemin che tendahnun Dendiohs di, ne cahndode nduhca che ritehne Dihvo vo Jesucristo, chihnevan ama yahn ihyan.

¹³ Man ne, nan Dendiohs, ihyan min che dendah ye iyehense man, che va tah ye nducuahh dehtenduh man, nan Dihvo vo Jesucristo, ihyan min che cah ye ndudo cuaco yahn ye numa ino ye nan Poncio Pilato man, rihquentiyon di

¹⁴ che dinehn nduco cudado ntiyon che va tah. Condiccate detohnen nde tah. Cuiquendi nde nda Dihvo vo Jesucristo,

¹⁵ te nda ro che ndihco cade Dendiohs ne, dechuh ye ihyan. ¡Ama yudo vederihquentiyon yahn Dendiohs, ametah nde tama nduhca ye! ¡Ama nahn che ndeva nducoyaca ihyan yavenan ye! A ihyan min rihquentiyon ye nducoyaca ihyan ndinan man, nducoyaca rey man.

¹⁶ Ama no ihyan min che hua nda ro che cuihno ye. Ama yudo nan va ye, nde ama ihyan hua co cahh nda ye. Nde ama ihyan hua ntihchero ye ihyan, nde hua co ndihchero ye ihyan. Ama yudo vederihquentiyon yahn ye; hua nda ro che cuihno. Va che ndeva nducoyaca ihyan yavenan ye. Tihca co.

¹⁷ Cah cuende dihno vo che cuihca ye che hua din cun ye man, che hua din yade ye man, che hua cochahtino ye vedecuihca yahn ye man, te chemin ne, hua rengu numacuahn ro. Tahque ndah ne, cochahtino ye Dendiohs, ihyan min che quenduche ye man, che rete ndahva ye nducuahh dehtenduh che rendotenan vo man.

¹⁸ Cah cuende ihyan che din ye che ndah man, din ye vedevahino man,

¹⁹ te chemin che cochihve yahn ye nan Dendiohs anduhneca ama vedecuihca che cuhnde ndah yahn ye, ne cuahtenan ye vahchetero numacuahn ro.

Pablo ne, chihno yahve ye Timoteo

²⁰ Timoteo, condihche. Codin cudado ntiyon che ndihco Dendiohs tah. Hua tumecah yahn ndudo ndeh che rente ihyan che hua renevahnecon ye Dendiohs man, vederihquentiyon che hua cochihve, che redin vahche nan Ndudo yahn Dendiohs man.

²¹Vate ihyan che riquendi ye dehtenduh chemin chan, ne a ndihcoman ye che ritahno ye Dihvo vo Jesucristo.

Chu che dirun yehn. Dendiohs din yahino ye di. Tihca co.

ÇAÇA CHE DIRUN SAN PABLO ADIVE, DECHUH YE YAHN TIMOTEO

¹ Dendiohs ne, tendahnun ye u Pablo che co apóstol yahn Dihvo vo Jesucristo, ne chihco ye ntiyon tãh che cuahndudó ndudo yahn ye che çah ye nde ro menan. Ndudo min che vedevihche yahn chedave yahn ihyan che ritahno ye Dihvo vo Jesucristo.

² Timoteo, dayá che yahinó, dirún çaça cuh, dechúh yehn. Dendiohs Chida man, Dihvo vo Jesucristo man, din yahino ye di, din ye che ndahça conen.

Rente Pablo yahn Dihvo vo Jesucristo

³ Dendiohs che rendevá yavenan ye numa inó nduhça che din ihyan ndico yáhn, nde ro nde rahñ reváh, recáh nundihve cuahn ihyan cave.

⁴ Renecahcó che ama chi ran ro che chihcoman vih vo, ne chemin che nahn chí ndihcheró di çaça che co yeno chedave yáhn.

⁵ Quenun inó che ritehne Dihvo vo Jesucristo numacuahn chedave yehn nduhça che chitahno checohn Loida nduco cheque Eunice.

⁶ Man ne, rihquentiyón di che quendi numa ine vederihquentiyon che te Dendiohs di ro che nahn tãh di, cováh cave.

⁷ Vaco Ndah yahn Dendiohs che te ye uvo ne, redin che cuahtenan cuma vo vederihquentiyon man, vedeyahino man, runecåde cuahtechica vo man, hua vah vo man.

⁸ Chemin che condi cocuihnan che rahndode ndudo yahn Dihvo vo Jesucristo. Namin hua cocuihnan che rindoque u che quenún vacoyahn çaça ndudo yahn ye. Tahque ndah çah ine chuhrihn çaça ndudo ndah yahn ye, codin chahtine Dendiohs che rinan ye uvo.

⁹ A ihyan min che ndedevahn ye uvo, ne tendahnun ye uvo çaça che din dave ye chedave yuhn vo. Tihça din ye, ndiyu yahn che ndah ihyan uvo, ate din ye yahn che tihça nahn man ye. Nde cuahn che metah dendah ye iyehñse, a nde ro min yahino ye uvo che ritahno vo Dihvo vo Jesucristo.

¹⁰ Chihco ro ye vedeyahino min cuahn che ndá Dihvo vo Jesucristo, decuihno ye vederihquentiyon yahn vederih, ndedevahn ye ihyan che ritahno ye ndudo ndah yahn ye.

¹¹ Chaconahn Dendiohs u che co apóstol çaça che cahndudó man, cacuáhn man, ndudo cuh van ihyan nación chenahn.

¹² Chemin che rechuhrihn. Ate hua ricuihnán, te ritahnó Dihvo vo Jesucristo, ne a devano cuacó te va vederihquentiyon yahn ye che din ye cudado chedave yáhn che a ndihcó tãh ye nde ndá ro che a ndihco çade Dendiohs.

¹³ Conun ine ndudo ndah che chicuáhn di. Quendi cotehne Dihvo vo Jesucristo, codin yahine ihyan.

¹⁴ Nduco vederihquentiyon yahn Vaco Ndah yahn Dendiohs che quenun queri amo vo, ndahça cuiquenda vederihquentiyon che ndihco Dendiohs tah.

¹⁵ A devene che ama yahn ihyan yahn yahn Asia, chihcoman ye u. Van ihyan chahn ne, nduco Figelo man, Hermógenes man.

¹⁶ Dihvo vo Dendiohs din yahino ye Onesíforo nduco ihyan ndevaco ye, te hua chicuihnán ye çavá, ne tahque ndah ne, ama ndeh yune chinan ye u cuahn che quenún vacoyahn.

¹⁷ Cuahn che quenán yan Roma ne, chahn ye chinuhn ye u nde nan che ntãça ye u.

¹⁸ Namin a devene che ama chinan ye uvo min yan Efeso. Dihvo vo Dendiohs din yahino ye ihyan nda ro che chihco cade ye.

2

Nduhca che va che din ihyan ntiyon yahn Dihvo vo Jesucristo

¹ Di daya, cochahtine vedeyahino yahn Dendiohs che rete ye uvo che ritahno Dihvo vo Jesucristo.

² Ndudo che chicuahn di nan ama yahn ihyan, cuihquentiyen ihyan che redinah ye che co cacuahn ye ihyan chenahn.

³ Nduhca ama sandado ndah che hua dehve rahco se che rechuhrihn se ne, tihca quendi nan ntiyon yahn Dihvo vo Jesucristo.

⁴ Nde ama sandado hua redin se tama nan ntiyon, te nahn che conan yan se deh che cahcantiyon sahn ndinan yahn se.

⁵ Namin sahn reduce. Hua co din se ganar ndete che hua dinahn se.

⁶ Namin tun ihyan redin ntiyon yahn viyata. Redin yahn che nevahn ye ndute ndata yahn ye, te a din ye ntiyon.

⁷ Cuihque cudado che rahn ndoque, ne Dihvo vo Dendiohs te ye vededevano yehn, conahn nducuahn.

⁸ Cuenecahque Dihvo vo Jesucristo, ihyan min che ntuche ye van tenahn, ihyan min che ndata yahn rey David. A yahn ihyan min ndudo ndah che rahndudó.

⁹ A cava che racotuhn ndudo min che rechuhrihn, quenun vacoyahn, nde nchiche cadena u nduhca che rechiche ama sahn rihno ihyan. Ate ndudo yahn Dendiohs ne, hua co cahca tan ihyan, te riquendi retuhn.

¹⁰ Chemin che andahre redin tan ihyan nduco, ate richa rechuhrihn nducuahn cava che, ihyan che a ndetendahnun Dendiohs ne, cotahno ye Dihvo vo Jesucristo, ne numacuahn ro cuahenan ye vahchetero nan che ama yudo.

¹¹ Va ama ndudo che tuhca ndirun che cochahtino vo:

Andahre cahno ihyan uvo che ritahno vo Dihvo vo Jesucristo ne, ate hua dehve din yahn, te cuahenan vo vahchetero nduco ye.

¹² Andahre chuhrihn vo, ate hua dehve din yahn, te cahcantiyon vo nduco ye.

Ndete che cocuihnan vo cava ye ne, namin cocuihnan ye cavo vo.

¹³ Andahre cahcoman vo ihyan, ate man ye hua cahcoman ye uvo, te redinahn ye ndudo yahn ye.

¹⁴ Cahme nduco ihyan ndiyaco cava che nta tin ye ndudo cuh. Cuihquentiyen ihyan nan Dihvo vo Dendiohs che nguan ye cuahtecuhma chende ye nduco vih. Chemin ne, hua deh cuahno cochihve, te tahque ndah ne, redin che reto ino ihyan che rihnevan ye.

¹⁵ Nduhca ama sahn che ndah redin se ntiyan, che metah deh cuande che cocuihnan se ne, tihca numa cuaco man, numa ine man, cacuehn ndudo cava che nevahnecun Dendiohs ntiyon che redin.

¹⁶ Hua tumacah yahn ndudo ndeh che hua cochihve, te ihyan che ndere rente ye ndudo chemin chan ne, nde tahque redecuihta ye nunde yahn ye.

¹⁷ Nduhca ama cah che nun rendih, tihchan ndudo yahn ihyan chahn, te nun retuhn. Tihca redin Himeneo man, Fileto man,

¹⁸ te a chihcoman se ndudo cuaco. Rahndudo se te a chuh yahn che rentuche ihyan van tenahn, redin se che reto ino ihyan che ritahno ye Dihvo vo Jesucristo.

19 Ate hua dehve rahco vo, te ndudo che ndihco cade Dendiohs ne, hua nda ro che cuihno. Man ye redinahn ye ndudo min nduhca che a ndirun: "Dihvo vo Dendiohs ne, a rendihche ye ihyan yahn ye, ne ihyan che ritahno ye Dihvo vo Jesucristo ne, va che cahcoman ye nducuahn nunde."

20 Ama vah chahte ne, van dehtenduh che retoh ihyan ne, va dehtenduh che ndahchan che ndinah nduco diyahnguan man, diyahngua man. Namin va dehtenduh che ndere cuahn che ndindah nduco yahn man, yahn man. Dehtenduh che ndahchan me ne, retoh ye nan ntiyon ndah, ne dehtenduh che chihnga chan me ne, retoh ye nan ntiyon ndere.

21 Nduhca dehtenduh che ndahchan me che retoh ye nan ntiyon ndah ne, tihca uvo ndete che cahcoman vo nducuahn nunde, te Dihvo vo Jesucristo ne, cahco vih ye uvo cava che cochivo vo nan ntiyon yahn ye.

22 Chemin che cuihcoman nducuahn nunde che rendedecadino sahn yuno, ne quendi conen runecade nan Dendiohs man, cuitehme Dihvo vo Jesucristo man, codin yahine ihyan man, ndahca conen van ihyan man, nduhca ihyan che rah ye Dihvo vo Jesucristo numacuahn chedave yahn ye, renevahnecun ye ihyan.

23 Hua tumecah yahn ndudo ndeh che rente ihyan che nine ye, te a devene che chemin che redin che redin tan ye nduco vih.

24 Ihyan che redin ye ntiyon yahn Dihvo vo Jesucristo ne, hua ndahca che cuhma chende ye nduco ihyan. Tahque ndah ne, ndahca cuahtenan ye nduco nducoyaca ihyan man, ndahca cacuahn ye Ndudo yahn Dendiohs man, din chahtino ye yahn ihyan man,

25 nduco ndah yahve ye ihyan che hua nahn nevahncun ye man. ¿A huane cah yune Dendiohs che nto ino ihyan chahn nunde yahn ye, ne cotahno ye ndudo cuaco?,

26 cava che nane ndutinan ye, ne ndevahn ye tah chundah che ndico chiche se ihyan, redinahn ye che nahn se.

3

Nduhca che cuahtehica ihyan caviyan deman

1 Codevene te caviyan deman, cuahn che nda nino ro che nto iyehse ne, ihyan che ritahno ye Dihvo vo Jesucristo ne, yah cuahno ye,

2 te ihyan che hua ritahno ye ne, ama duhtuno ihyan ndaconda ye. Yahino man ye ihyan man, yahino ye tume man, yade ye man, cun ye man, hua nevahncun ye indihche yahn ye man, hua ntumanecun ye man, ducherino ye Dendiohs man, chihnga chan chedave yahn ye man,

3 hua cuahtenan cuma ye vedeyahino man, vedevahino man, cuahnde chende ye man, hua cocha ye cahcoman ye nunde yahn ye man, cuahtenan cuma ye vedetan man, hua din ye nde ama nan che ndah man,

4 o nan o chende ye man, doh ino ye man, ndedecadino ye che metah nde tama ihyan nduh chan ye man. Ndotenan che necahco ye Dendiohs ne, tahque ndah ye quendi ye vedeyeno yahn man ye.

5 Din ca ye che nevahncun ye Dendiohs, ate nduco che chihnga redin ye ne, co ro che nde hua cuaco. Cuihque cudado nduco ihyan chahn.

6 Van ihyan chahn ne, nduco sahn che renda se vaco ihyan numacuahn vederihncheh, rinun se ihyan ndahta che cuno ino ye man, che ri luco ino ye yahn nducuahn nunde yahn ye man, che ama ndeh nan dehtenduh nahn ye man, ne quenda se ihyan lado yahn se.

7 Ndahta chahn ne, cuahn dama nahn cuahn ye, ate hua nda ro che conahn ye ndudo cuaco.

⁸ Nduhca che chahcotahn sahn cuah Janes man, Jambres man, yahn Moisés ne, tihchan sahn chahn, te cuahcotahn se yahn ndudo cuaco. Avane ne, hua va cuaco vederendedecadino yahn se, redin ca se che ritahno se Dendiohs.

⁹ Ate nduhca che hua chicha vedecuah yahn sahn che o chahn che chahcotahn se yahn Moisés ne, tihca hua ngu vededevano yahn sahn chahn, te cadino ihyan che hua cochihve, ne cahcoman ye.

Pablo ne, chihno yahve ye Timoteo

¹⁰ Me di ne, a devene ndah ndudo che ricuahn man, nduhca che quechica man, ntiyon che nahn che conahn man, nduhca che ritahnó man, nduhca che ndichahtinó man, nduhca che redin yahinó man, nduhca che din chahtinó

¹¹ che din tan ihyan nducó man, chuhríhn man, min yan Antioquia man, Iconio man, Listra man. Namin a devene nduhca che ndedevahn Dihvo vo Dendiohs u yahn nducuah che chahno chí.

¹² A devano cuaco vo che nducoyaca ihyan che ritahno ye Dihvo vo Jesucristo, che nahn quendi ye vederihquentiyon yahn ye numa cuaco ne, din tan ihyan nduco ye.

¹³ Sahn nunde man, sahn rihnceh man, nde tahque duhtuno ihyan ndaconda se, quendi se cahnceh se ihyan man, cuahnecun se cahnceh ihyan sahn man.

¹⁴ Me di ne, cuiquendi numa ine ndudo che chehn man, che nevahnecon man. Cuenecahque taca ihyan che chucuahn ye di.

¹⁵ Namin cuenecahque te nde ro che lihn di chehn Ndudo yahn Dendiohs, ndudo min che redin che ritahno vo Dihvo vo Jesucristo, ne ndevahn vo.

¹⁶⁻¹⁷ Ndudo min ne, a man Dendiohs chihco ye, ne cochihve cava che cacuahn vo ihyan yahn ye man, yahvo vo ihyan man. Nduco tihca ne, ndahca cuahtenan ye nan Dendiohs, ne ndaca ye vederihquentiyon, din ye nducuah che ndah.

4

¹ Nan Dendiohs man, nan Dihvo vo Jesucristo man, ihyan min che chi ye numacuahn vederihquentiyon yahn ye techecade ye yahn nducoyaca ihyan, ihyan che chenduche ye man, ihyan che ndih ye man, rihquentiyón di

² che cuahndode ndudo yahn Dendiohs cuahn dama. Andahre hua nahn cahnevan ihyan o nahn cahnevan ye, ate di ne, cuiquendi cuahndode numa ine. Numacuahn vedechahntino yehn cuicuehn ihyan, codin che conahn ye Ndudo yahn Dendiohs. Coyahve ihyan che cotahno ye man, hua ndere din ye man.

³ Tihca codin, te cochi ro cuahn che metah quenda ino ihyan, cahnevan ye ndudo ndah. Tahque ndah ye ne, nuhn ye ama yahn sahn che cacuahn se ihyan ndudo che ri yeno man.

⁴ Cuacondah vedame ye ndudo cuaco, ne cotahno ye dehtenduh cuento.

⁵ Me di ne, cuiquendi numa ine, codin chahtine che rechuhrihn. Cuahndode ndudo yahn Dendiohs, codinehn ntiyon che quenen.

⁶ Tihca riyahvé di, te u ne, a nun va che cahno ihyan u, ndaca muhn iyehse cuh.

⁷ Nduhca ama sandado che cuhn se nde chinahn ntiyon ndah che nda se, nduhca ama sahn reduce che chano se nde din se ganar, tihca quendi numa inó chitahnó Dihvo vo Jesucristo,

⁸ ihyan min che retechecade ye numa cuaco. Man ne, a nihneva ndah ye vedino cuande yahn che dave chedave yahn, ne te ye u ro che techecade ye. Namin cah ye nducoyaca ihyan che ndichahtino ye che ndaconan chi tun ye.

⁹ Codin nun ine, chi ndihchero u,

¹⁰ te Crescente ne, riquendi se nan ntiyon yahn Dendiohs, cuahn se yan Galacia, ne Tito ne, cuahn se yan Dalmacia. Me Demas ne, tahque renan ino se cochica se vedeyeno yahn man se, ne chihcoman se u, cuahn se yan Tesalónica.

¹¹ A deman Lucas quenan ye nducó. Cuahn che chi ne, cuiquenda Juan Marcos. Nahn sahn, te richihve se nan ntiyon.

¹² Tiquico ne, dechuh sahn yan Efeso.

¹³ Cuahn che choh yan Troas ne, cuiquenda cuyano tu che rendiche che chaconahn ndevaco Carpo. Namin cuiquenda libro chahn, menan vihca caça che ndirun.

¹⁴ Alejandro, sahn vihchecu me ne, ama din tan se nducó. Man Dihvo vo Jesucristo techecade ye yahn se yahn che tihca din se.

¹⁵ Cuihque cudado sahn, te ama rihca tan se ndudo che rahndudo vo.

¹⁶ Cuahn che chahn menan, ndedevahn u nan ihyan ndinan ne, nde ama dihno vo hua chinan ye u, te chihcoman nducoyaca ye u. Dendiohs nchahco ye cava ye che tihca din ye.

¹⁷ Andahre chihcoman ihyan chahn u, ate Dihvo vo Jesucristo chinduco ye u, ne chinan ye u nde chihno dinahn cahndudó ndudo yahn ye, chihnevan ama yahn ihyan nación chenahn. Tihca ndedevahn ye u tah vederih.

¹⁸ A devanó che quendi ye ndedevahn ye u nduh cuan nan che cahnda cavá, nde ndeva ye u, conán vahchetero nan che rihquentiyan ye. ¡Ndeva vo yavenan ye cuahn dama! Tihca co.

¹⁹ Cuenecah Dendiohs Priscila nduco Aquila man, ihyan ndevaco Onesíforo man, che cuande yahn.

²⁰ Erasto ne, quenan se yan Corinto, ne Trófimo ne, chi cah se, ne chaconahn sahn yan Mileto.

²¹ Codin nun ine cochi numanahn che metah cuanan ro iche. Eubulo man, Pudente man, Lino man, Claudia man, nducoyaca dihno vo chenahn man, dechuh ye Dendiohs yehn.

²² Dihvo vo Jesucristo conduco ye di, din yahino ye nducoyaca nchuhn. Tihca co.

CACA CHE DIRUN SAN PABLO, DECHUH YE YAHN TITO

¹ U Pablo, apóstol yahn Dihvo vo Jesucristo ne, chaconahn Dendiohs u nan ntiyon yahn ye che cacuahn ihyan che tendahnun ye, cava che cotahno ndah ye Dihvo vo man, conahn ye ndudo cuaco che redin che runecade rahtechico vo man,

² cohahtino ye che cuahtenan ye vahchetero numacuahn ro man. Dendiohs ne, hua rihncheh ye, ne nde ro che metah cuhnde iyehne ne, cah ye ndudo yahn ye che cuahtenan vo vahchetero numacuahn ro.

³ A ihyan min che ndedevahn ye uvo, ne man che nda ro yahn ne, chihco ye ntiyon tah che cuahndudó ndudo yahn ye.

⁴ Tito, di ne, anduhneca daya man, te chitehne ndudo yahn Dihvo vo Jesucristo che chicuahn di. Dirun caca cuh, dechuh yehne, ne quenán inó che Chido vo Dendiohs man, Dihvo vo Jesucristo, ihyan min che ndedevahn ye uvo man, din yahino ye di, din ye che ndahca conen.

Ntiyon che din Tito yahn yahn Creta

⁵ Chaconahn di yahn yahn Creta cava che cahcoyan dehtenduh che renda ca, cuaconehtn intiyahn yaco nducuahñ yan nduhca che chihquentiyón di.

⁶ A devene te ihyan che cuahtenan ye ntiyon min ne, nahn che runecade ye man, che ama no ndahta quenán cuma ye man. Me daya ye ne, nahn che ritahno man, che runecade man, che redinahñ man, che metah deh che cahma nunde ihyan yahn man.

⁷ Tihca, te ihyan che conan ye ndiyaco ne, nducote ihyan chahn che cuhnde tah ye ntiyon yahn Dendiohs ne, hua co conan nde ama ihyan che yade ye man, cun ye man, che doh ino ye man, che ricoh ye man, che canda tin ye man, che idihya ye cava tume man.

⁸ Ihyan che ndah ihyan ye man, runecade ye man, dave yavenan ye man, chahtino ye man, che renevahnecun ye ihyan vaco ye man, atenan ihyan che tihchan ye co cuahtenan ye.

⁹ Namin nahn che ndahca quendi ye ndudo cuaco che chahn ye, cava che quenán yahn ye cacuahn ye man, ndahco ndiya ye ihyan che rahcotahn ye man.

¹⁰ Tihca, te ama vate sahn che rahcotahn se man, rente se ndudo nine man, rihncheh se ihyan man. Van sahn chahn ne, sahn nación yahn Israel che tahque redenduh se.

¹¹ A sahn chahn va che ndahco ndiya nchuhn, te cava che ndaca se tume ne, rihncheh se ama yahn diho vo nduco nducoyaca ihyan ndevaco ye, ricuahn se ndudo che hua redin yahn che cacuahn se.

¹² Ama sahn devano van sahn chahn ne, rahñ se tuhca: "Ihyan che vate ye yahn yahn Creta ne, cuahnde chende ye man, ite ye man, cane chete ye man, dahnde ye man."

¹³ Nducuahñ chemin ne, cuaco, ne chemin che hua nahn nda chende coyahve ihyan, cava che numa cuaco cotahno ye Dihvo vo Jesucristo,

¹⁴ ne cahcoman ye dehtenduh cuento che dera derahn ihyan nación yahn Israel man, ndudo che rihquentiyon sahn che rahcotahn se ndudo yahn Dihvo vo Jesucristo man.

¹⁵ Ihyan che ndahca vederendedecadino yahn ye ne, hua rendahchenan ye nde ama nan dehtenduh. Ate ihyan nunde che hua ritahno ye Dihvo vo

Jesucristo ne, rendahchenan ye nducuahn dehtenduh che ndah, te chihnga ihyan ye man, chihnga vederendedecadino yahn ye man.

¹⁶ Redin ca ye che ritahno ye Dendiohs, ate hua cuaco. Chihnga ihyan ye man, chihnga redin ye man, rahcotahn ye yahn Dendiohs man, nde hua renda yahn ye che din ye dehtenduh che ndah man.

2

Ndudo ndah che va che cacuahn vo

¹ Me di ne, cuihque cudado nan ndudo yehn cava che hua detohnen ndudo ndah yahn Dihvo vo Jesucristo.

² Coyahve ihyan chahn che runecade cuahtenan ye man, che ndahca ndedecadino ye man, che cotahno ye Dihvo vo Jesucristo numa cuaco man, che cuahtenan cuma ye vedeyahino man, vedechahtino man.

³ Indihthe ndahta ne, coyahve ihyan che runecade cuahtenan ye man, che hua cuahtechica ye nte ye cuendo man, che hua cocoh ye man. Va che cah cuande ye nducuahn che ndah,

⁴ tihyon yune ye tahn decahya, cava che din yahino te inchahn te man, daya te man,

⁵ ndahca ndedecadino te man, runecade cuahtenan te man, cuahtenun tahn te vaco te, din te cudado man, cuahtenan te numacuahn vedino vedenehun man, dinahn te yahn inchahn te man. Nduco tihca ne, hua ndaca yune che chihnga cahma ihyan yahn Ndudo yahn Dendiohs.

⁶ Namin sahn decahya ne, coyahve sahn che runecade cuahtechica se.

⁷ Runecade cochique man cava che cua cuande ihyan yahn nducuahn che redin, ne quendi ye yune yehn. Runecade cuicuehn man, numa cuaco man.

⁸ Nahn che nduco ndah cahme cava che nde ama ihyan, hua ndaca yune che chihnga cahma ye yuhn vo. Nduco tihca ne, co cuihnan adecoduhno ihyan che hua ri rendihche ye uvo, ne hua conan yahn ye che cahma nunde ye yuhn vo.

⁹ Coyahve ihyan che chenan ye vaco dihve ye che nevahnecon ye ihyan man, che hua cuahcotahn ye yahn ye man, che hua cahma tahn ye nduco ye man,

¹⁰ che hua duco ye man. Nahn che runecade ye nan nducuahn, cava che cua cuande ihyan, ne tumacadino ye che Ndudo yahn Dendiohs, ihyan min che ndedevahn ye uvo ne, ndah.

¹¹ Tihca nahn che din ye, te Dendiohs ne, chihco ro ye che yahino ye nducoaca ihyan iyehhse, ndedevahn ye ihyan.

¹² Tihyon yune ye uvo cava che ametah cuahtechico vo vedeyeno yahn man vo, cuahtendihco vo nunde man, che runecade cuahtechico vo nduhca che nahn ye man.

¹³ Namin te cuande ye uvo che cochahtino vo nde nda ro che conahn ndudo yahn ye che te ye uvo, ne ama co yeno vo. Ro min ne, numacuahn vederihquentiyon yudo nda Dendiohs yuhn vo Jesucristo, ihyan min che ndedevahn ye uvo.

¹⁴ A ihyan min che chihco mendahn ye ihyan chih ye, cava che ndedevahn ye uvo, nchahco ye nunde yuhn vo. Nedin yahn ye uvo, tihyon yune ye uvo cava che numa ino vo din vo che ndah.

¹⁵ Numacuahn vederihquentiyon cuicuehn ndudo che tuhchan, coyahve ihyan cava che dinahn ye. Hua ndahca che ndahco ndiya nde ama ihyan di.

3

Nduhca che va che cuahtechica ihyan che ritahno ye Dihvo vo Jesucristo

¹ Coyahve ihyan che nevahnecon ye intiyahn man, ihyan ndinan man, dinahn ye man, din ye dehtenduh che ndah man,

² hua chihnga cahma ye yahn nde ama ihyan man, hua canda tin ye man, cuahtenan cuma ye vedeyahino man, vedenecon man, nduco nducoyaca ihyan.

³ Tihca nahn che dinahn ye, te hua ndahca che quendi ye nduhca che chahtechico vo ro menan me. Tahn min ne, nine vederendedecadino yuhn vo man, chahcotahn vo man, vatechica vane vo yahn Dendiohs man, chi luco ino vo chahtechico vo vedeyeno yahn man vo man, chihnga din vo man, chahtenan cumo vo vedeve man, ndihche tan ihyan uvo man, ndihche tan man vo ihyan man.

⁴⁻⁵ Ate chihco ro Dendiohs che yahino ye ihyan iyehense, ne ndedevahn ye uvo. Andahre hua din vo nde ama nan dehtenduh che ndah, ate nducote man ye quenan vahino ye uvo ne, ndedevahn ye uvo, din ye che ndahcorun Vaco Ndah yahn ye vederendedecadino yuhn vo, ndo vo ihyan ra.

⁶ Numacuahn vedeyahino din ye che quenun Vaco Ndah yahn ye uvo numacuahn vederihquentiyon che cuande yahn Dihvo vo Jesucristo, ihyan min che ndedevahn ye uvo.

⁷ Numacuahn vedeyahino nedin yahn ye uvo cava che cuahtenan vo vahhetero numacuahn ro nduhca che ndichahtino vo.

⁸ Ndudo che tuhchan ne, cuaco man, ndah man, ne cochihve yahn nducoyaca ihyan. Nahn che numa ine cah cuende ihyan che ritahno ye Dendiohs, cava che din ye che ndah.

⁹ Coyahve ihyan che nine ye; hua cuahnecon che cuahtecuhma chende ye nduco vih yahn taca cochi ndata yahn ye man, yahn ley che dirun Moisés man, te che tihca redin ye ne, nde tah hua cochihve yahn ye.

¹⁰ Ihyan che conun ye ihyan ndiyaco che o cuan co ye ne, coyahve ihyan ama o yune. Me ndete che hua cahcovan ye che cahme ne, ametah cuahnecon che conduco ye nchuhn.

¹¹ A devene te ihyan che tihca redin ye ne, a ndinda ye, nedin nunde yahn ye.

¹² Cuahn che dechuh Artemas o Tiquico tan ne, codin nun ine cahn yan Nicópolis, ndihchero u, te a chihco che min conan ro iche.

¹³ Cuinen nduhva che tuno tah abogado Zenas man, Apolos man, cah ndahva nducuahn che cochihve yahn se che cuahtenun yune se cava che hua cacuahnan yahn se.

¹⁴ Namin cah cuende dihno vo che din ye che ndah, conan ye ihyan che va vederetahn yahn ye, cahco ro ye che richihve ye.

¹⁵ Nducoyaca dihno vo che chenun ye muhn nduco ne, dechuh ye Dendiohs yehn. Nducoyaca dihno vo man, cahvo vo man, che chenun ye tan ne, cuenecah Dendiohs ihyan che cuande yahn nuhn. Dendiohs din yahino ye nducoyaca nchuhn. Tihca co.

ÇAÇA CHE DIRUN SAN PABLO, DECHUH YE YAHN FILEMÓN

¹ Filemón, dihno nuhn che yahino nuhn ndih, che namin redin ne ntiyon yahn Dendioh, u Pablo che quenún vacoyahn yahn che redín ntiyon yahn Dihvo vo Jesucristo man, dihno vo Timoteo man ne, dirun nuhn çaça cuh, dechuh nuhn yahn nchuhn, ndih man,

² cahve nuhn Apia che yahino nuhn ihyan man, Arquipo che rinduco se nuhn nan ntiyon yahn Dihvo vo man, nducoyaca dihno vo man, cahvo vo man, che rendo dama ye ndevaco ne.

³ Chido vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

⁴ Cuahn dama reváh çaça ne, renecháh nundihve cuahn Dendiohs yuhn vo,

⁵ te checadinó che numacuahn vedeyahino ritahno ne Dihvo vo Jesucristo man, redin yahino ne nducoyaca ihyan yahn ye man.

⁶ Namin reváh çaça ihyan che quendi ye yune yahn ne, chitahno ye, çaça che conahn ndah ye nduhca che redin yahino Dendiohs uvo yahn che ritahno vo Dihvo vo Jesucristo.

⁷ Dihno, ama yenó man, rendacá vedechahino man, yahn che ama quenán cuma ne vedeyahino. A çaça ndih che renecháh yan ihyan yahn Dendiohs chedave yahn ye.

⁸ Chemin che, andahre apóstol yahn Dihvo vo Jesucristo u man, andahre quenán cumá vederihquentiyon che cahcantiyón ndih man ne,

⁹ ate tahque ndah che numacuahn vedeyahino ricá favor ndih. Condihche ne. U Pablo ne, a indihite u. Avane ne, quenún vacoyahn yahn che ritahnó Dihvo vo Jesucristo.

¹⁰ Onésimo ne, a nduhca dayá rihno sahn yahn che ama richihve se yahn muhn vacoyahn. Man ne, ricá favor ndih che nchahco ne yahn se.

¹¹ A rahn me ne, hua ndahca din se chihcoman se ntiyon yahn ne, ate man ne, ama richihve se yahn, ne namin cochihve se nan ne.

¹² Andahre ama yahinó sahn, ate ndedechuh sahn ndevaco ne. Cuendeva ne sahn, codin ne cuande anduhneca ndete che u ndeva ne.

¹³ Numanahn che quenún vacoyahn çaça ndudo ndah yahn Dihvo vo Jesucristo ne, náhn che conan se nducó muhn çaça che cochihve se yahn menun ne.

¹⁴ Ate nducote metah cahmá nduco ne ne, hua chaconáhn sahn muhn. Tahque ndahca che man ne cahma ne che conan se, te náhn che nducuañ favor che din ne nducó ne, a nan vedeyeno yahn man ne.

¹⁵ Rahcó te co chica se ndevaco ne çaça che cuahn che ndaconan se ne, conan se cuahn dama,

¹⁶ ne nevahnecon ne sahn nduhca ama dihno ne che yahino ne, ndiyu demán nduhca ama sahn decahya yahn ne. U ne, ama yahinó sahn, ate rahcó te ndih ne, nde tahque yahino ne sahn yahn che ndah ihyan se man, yahn che ritahno se Dihvo vo Jesucristo man.

¹⁷ Chemin che ndete che rihno ne u nduhca combiero yahn ne ne, cuenevahnecon ne sahn, codin ne cuande anduhneca ndete che u nevahnecon ne.

¹⁸ Ndete che va deh che nedinda se yahn ne o quendihco se ne, conahn çaça ne cuande yahn.

¹⁹ U Pablo dirún çaça cuh. U nedihvé yahn ne, andahre man ne quendihco ne yáhn yahn che tihyon yuné ndih che chitahno ne Dihvo vo Jesucristo, ndevahn ne.

²⁰ Tihça dihnó. Çaça Dihvo vo Jesucristo, ihyan min che ritahno vo ihyan ne, redin yahn che dinahn ne che ricá ndih, neçaḥ yan ne chedave yáhn.

²¹ Dirún yahn ne, te quenán inó ndih che dinahn ne ndiyu deman favor che ricá, te nde tahque chuhnan ca din ne favor nducó.

²² Namin ricá ndih che çaḥcoyan ne nan che conán, te quenán inó che cuahnecun Dendiohs che chí quendihcheró nchuhn nduhça che rica ne ihyan.

²³ Dihno vo Epafra che nduco se u quenun se vaçoyahn yahn che ritahno se Dihvo vo Jesucristo ne, dechuh se Dendiohs yahn ne.

²⁴ Me Marcos man, Aristarco man, Demas man, Lucas man, ihyan chuhn che rínan ye u nan ntiyon yahn Dihvo vo ne, namin dechuh ye Dendiohs yahn ne.

²⁵ Dihvo vo Jesucristo din yahino ye nchuhn. Tihça co.

CACA CHE NDONDA TAH IHYAN CHE RENTE YE DEVACÓ HEBREO

Dechuh Dendiohs Daya ye, cah ye, checadino ihyan iyehñse ndudo yahn ye

1 Ro menan me ne, ama ndeh yune man, ama nuhn ino Dendiohs man, cah cuande ye ndudo yahn ye ihyan profeta cava che cuahndudo ye, cahnevan ihyan ndico yuhn vo.

2 Man adiva ne, dechuh ye Daya ye, ndahco ye nducuahn dehtenduh tah ye. A nduco ihyan min dendah ye iyehñse. Dechuh ye ihyan, te nduco ihyan min te ye ndudo yahn ye, checadino vo.

3 Nduhca yahn che rendihco dave yahn ne, tihca rihco ro ihyan min vederihquentiyon yahn Chida ye. Ihyan min nduco Chida ye ne, dama no ye. Ihyan min ne, numacuahn vederihquentiyon yahn ye, redin ye cudado iyehñse. A ihyan min che nedihve ye yahn nunde yuhn vo, ndaco vo vederenchahco. Tuhme chihnde ye vahchetero lado tah cuaco Dendiohs.

Daya Dendiohs ne, tahque ndinan ye che co nducoyaca angel

4 Daya Dendiohs ne, tahque ndinan ye che co nducoyaca angel, te tahque yudo vederihquentiyon ndahco Dendiohs tah ye.

5 Tihca, te Dendiohs ne, nde menahn hua rahn ye ri ye nde ama angel:
Di che Dayá.

Man ro cuh chihco ró che Dayá di.

Nde hua rahn ye yahn nde ama angel:

Dayá ihyan.

U che Chida ye.

6 Ate cuahn che dechuh ye Daya ye che menan iyehñse ne, rahn ye:

Nchuhn, nducoyaca angel yahn, cuendeva ne yavenan ye.

7 Me yahn angel ne, tuhca rahn ye:

Din che co nchuhn nduhca vaco man, ruchiyahn man.

8 Ate yahn Daya ye ne, rahn ye:

Di Dendiohs, vederihquentiyon yehn ne, hua nda ro che cuihno.

Numa cuaco rihquentiyen.

9 Renan ine nducuahn che ndah, ne racondah vedame nducuahn che chihnga.

Chemin che u Dendiohs yehn, redin che tahque ri yene che co nducoyaca combiero yehn.

10 Namin rahn ye:

Di Dihve ihyan iyehñse, nde ro menan me ne, dendah iyehñse man, nan ro man.

11 Chemin ne, va che cuihno, ate di ne, conen cuahn dama.

Nducuahn dehtenduh chemin chan ne, va che co ndico nduhca che ri ndico tino.

12 Din anduhca che nehn nduco dehtenduh chemin chan, cahnevi anduhneca ndete che ama tino, ne ndacorun.

Ate man di, hua nda ro che ndacoron, nde hua nda ro che coh.

13 Nde menahn hua rahn Dendiohs ri ye nde ama angel:

Cuihnde lado tah cuaco numanahn che ndahco ndiyá ihyan che hua ri rendihche ye di, cava che nevahnecon ye di.

¹⁴ Nducoyaca ángel ne, vaco che redin ye ntiyon yahn Dendiohs. Redechuh ye ihyan cava che conan ye ihyan iyehñse che quenan cuma che ndevahn ye.

2

Hua ndahca che cahcoman vo Ndudo yahn Dendiohs

¹ Nducote tahque yudo vederihquentiyon yahn Dihvo vo Jesucristo che co ángel ne, chemin che quenan cuma che cuahtenun ino vo ndudo che a chihnevan vo cava che hua cahcoman vo.

² Tihca, te nducote a chinahn ndudo yahn Dendiohs che dechuh ye nduco ángel a rahn me, ne ihyan che chahcotahn ye yahn ndudo min, chendihco ye nunde, a chi ye castigo che redin yahn che co ye ne,

³ namin uvo ne, hua co ndevahn vo ndete che hua tumacah vo yahn ndudo ndah yahn vederenchahco che rete Dendiohs uvo. Ndudo min ne, a Dihvo vo Jesucristo menan vih cahndudo ye, ne nuhn che chihnevan nuhn ndudo min ne, tumacadino nuhn che cuaco.

⁴ Avane ne, ama ndeh nan vederihno din Dendiohs, chihco ro ye che cuaco, nde din ye che chenana cuma vo vederihquentiyon yahn Vaco Ndah yahn ye tunoca che nahn man ye.

Dihvo vo Jesucristo ne, nda ye muhn iyehñse cuh, ndaconda ye ihyan

⁵ Vederihquentiyon cuh che rendahtonun yan che va che cuhnde ne, hua chihco Dendiohs tah ángel.

⁶ Hua, te ama cuan nan Ndudo yahn ye dirun ama ihyan tuhca: Dendiohs, nde hua rigonun chihve ihyan iyehñse cava che necahco ne ihyan. Nde hua rigonun chihve ye cava che din ne cudado ihyan.

⁷ Numanahn min ne, tahque doh vederihquentiyon cah ne ihyan che co ángel.

Van nducuahn dehtenduh che dendah ne ne, tahque cah ne vededevano ihyan.

Cah ne vederihquentiyon ihyan cava che cahcantiyon ye nducuahn dehtenduh che dendah ne.

⁸ Ndahco ne nducuahn dehtenduh tah ye.

Nducote ndahco Dendiohs nducuahn dehtenduh tah ihyan ne, nducuahn va che cahcantiyon ye. Man ro cuh ne, ametah nevahnecun nducuahn dehtenduh ihyan.

⁹ Ate Dihvo vo Jesucristo che cuaco ne, nducote chih ye ne, renevahnecun nducuahn dehtenduh ihyan, rendeva yavenan ye. Numacuahn vedeyahino cahnevan Dendiohs che chih ye cava nducoyaca ihyan iyehñse.

¹⁰ Nducuahn dehtenduh ne, yahn Dendiohs. Man ye dendah ye, ne nahn ndeva ye nducoyaca daya ye vahchetero. Chemin che quenana cuma che cah yune ye che chuhrihn Dihvo vo Jesucristo, dinahn ye nducuahn, ndedevahn ye ihyan yahn ye.

¹¹ Ihyan che redevahn ye man, ihyan min che redevahn ye ihyan man ne, daya Dendiohs nducoyaca ye. Chemin che Dihvo vo Jesucristo, ihyan min che Daya Dendiohs ne, hua ri cuihnan ye che redin dihno ye ihyan,

¹² nduhca che a ndirun nan Ndudo yahn Dendiohs tuhca:

Nté yahn ne nduco dihnó.

Catá himno, ndeva yavenan ne van nducoyaca ihyan yahn ne.

¹³ Namin ndirun:

U ne, richahtinó Dendiohs.

Namin ndirun:

Muhn quenún nduco dayá che te Dendiohs u.

¹⁴ Nducoyaca ihyan che dihno ye vih ne, dama ndata yahn ye. Chemin che Dihvo vo Jesucristo ne, ndo ye nduhca ihyan iyehense cava che chi chih ye, ndahco ndiya ye chundah, sahn min che redin se che rinda ihyan,

¹⁵ ne ndedevahn ye nducoyaca ihyan che hua va man chedave yahn ye cuahn dama, vah ye vederih.

¹⁶ A devano vo te Dihvo vo Jesucristo ne, nda ye cava che ndedevahn ye ihyan che ndata yahn Abraham, ndiyu cava che ndedevahn ye angel.

¹⁷ Chemin che quenan cuma che ndo ye dama nduhca ihyan iyehense, tumacadino man ye nducuahn vederihn cava che tahque conan cuma ye vedevahino nduco vo, ne cochahtino vo ihyan. Redin ye cudado uvo, rahn nan ye uvo nan Dendiohs, nde chihco mendahn ye ihyan, chih ye cava che nchahco ye nunde yuhn vo.

¹⁸ Nducote chuhrihn man ye, tumarande chundah ihyan ne, tahque nun rendedevahn ye ihyan che retumarande se ihyan.

3

Vederihquentiyon che quenan cuma Dihvo vo Jesucristo ne, tahque yudo che co vederihquentiyon che quenan cuma Moisés

¹ Dihno che a tendahnun Dendiohs nchuhn, nducote a nedin yahn ye nchuhn ne, cuiquendi ne yune yahn Dihvo vo Jesucristo, ihyan min che dechuh ye ihyan cava che din ye cudado uvo, tihyon yune ye uvo che cotahno vo ihyan.

² Nduhca che dinahn Moisés yahn Dendiohs van nducoyaca ihyan yahn ye ne, tihca dinahn Dihvo vo Jesucristo, ihyan min che ndahco Dendiohs vederihquentiyon tah ye.

³ Dihvo vo Jesucristo ne, redin yahn che tahque rendeva vo yavenan ye che co Moisés. Tihca, te ihyan che rihno ye ama vah ne, ihyan min che ndeva vo yavenan ye, ndiyu vah me.

⁴ Queri ama vah ne, va ihyan che dendah ye. Namin nducuahn che va iyehne ne, a Dendiohs che dendah ye.

⁵ Cuaco te Moisés ne, din ye ntiyon yahn Dendiohs, dinahn ye van nducoyaca ihyan yahn ye. Ntiyon che quenan cuma ye ne, che cuahndudo ye ndudo yahn Dendiohs tunoca che rech ye ihyan.

⁶ Namin Dihvo vo Jesucristo ne, dinahn ye, ate nde tahque yudo vederihquentiyon quenan cuma ye, te nducote ihyan min che Daya Dendiohs ne, ndinan ye van nducoyaca ihyan yahn ye. Uvo ne, a ihyan yahn Dendiohs uvo, ndete che quendi vo numacuahn vedeyeno cochahtino vo ihyan nde nda ro che ndeva ye uvo.

Ihyan che cuahtenan ye nan Dendiohs

⁷ Nducote tihca ne, ndahca che dinahn vo ndudo che, numacuahn vederihquentiyon yahn Vaco Ndah yahn Dendiohs, a ndirun tuhca:

Man che cahnevan nchuhn ndudo yahn,

⁸ hua din cheche ne chedave yahn ne nduhca che din ihyan ndico yahn ne che chahcotahn ye yahn,

ducherino ye u cuahn che chahtechica ye yahn nan che metah duhva.

⁹ Ihyan ndico yahn nchuhn ne, hua chitahno ye u, andahre ndihchero ye vederihno che din nduco ye chete o raco nduyo.

¹⁰ Chemin che chi tan nduco ye,

ne ndedecadinó: “Ihyan sih ne, hua richahtino ye u numacuahn chedave yahn ye,

nde hua redinahn ye che rihquentiyón.”

¹¹ Chemin che chi tǎn nduco ye, ne numacuahn vedeyudo chihco dǎma inó che hua ndǎ ro che ndevá ihyan, cuahtenan ye nducó.

¹² Dihnó, cuihco nducoyaca nchuhn cudado. Hua din cheche ne chedave yahn ne, çahcomǎn ne che ritahno ne Dendiohs, ihyan min che va ye vahchetero.

¹³ Tahque ndah ne, coyahve ama tama ne vih ro ro, numanahn che chenah ne iyehñse, çava che nde ama ne hua cahñcheh mǎn ne nchuhn, din cheche ne chedave yahn ne, cuahtendihco ne nunde.

¹⁴ Tihça, te ndǎ ro che chi Dihvo vo Jesucristo ne, ndeva ye uvo ndete che quendi vo numa ino vo cochahtino vo ihyan, nduhça che richahtino vo ihyan nde ro che canǎn chitahno vo ihyan.

¹⁵ Nahn che çahcovan vo nduhça che yahve Dendiohs uvo tuhça: Mǎn che cahnevan nchuhn ndudo yáhn, hua din cheche ne chedave yahn ne nduhça che din ihyan ndico yahn ne che chahcotáhn ye yáhn.

¹⁶ Nducoyaca ihyan che ndetendǎh Moisés nación yahn Egipto ne, a ihyan chahn che chihnevan ye ndudo yahn Dendiohs, ne chahcotáhn ye.

¹⁷ Ihyan che chahtendihco ye nunde, ne chih ye yáhn nǎn che metah duhva ne, a ihyan chahn che chi tǎn Dendiohs nduco ye.

¹⁸ Ihyan che hua dinahn ye yahn Dendiohs ne, a ihyan chahn che, numacuahn vedeyudo, chihco dǎma ino Dendiohs che hua ndǎ ro che ndeva ye ihyan, cuahtenan ye nduco ye.

¹⁹ A devano vo te hua chi tuno ihyan chahn nǎn Dendiohs, yahn che hua chitahno ye ihyan.

4

¹ Chemin che numanahn che rete ca Dendiohs ndudo yahn ye che ndeva ye uvo ne, nahn che çahco vo cudado, denǎn vate ama o vo che hua tuno vo nǎn ye.

² Çah Dendiohs ndudo ndah yahn ye ihyan ndico chahn, ne namin te ye uvo. Ate ihyan chahn ne, nde hua chichihve che chihnevan ye, yahn che hua chitahno ye.

³ A uvo che chitahno vo che ndeva Dendiohs uvo, cuahtenan vo nduco ye, te ráhn ye yahn ihyan chahn tuhça:

Chemin che chi tǎn nduco ihyan sih, ne numacuahn vedeyudo chihco dǎma inó che hua ndǎ ro che ndevá ihyan, cuahtenan ye nducó.

Cuahn che chihno ntiyon yahn Dendiohs che dendah ye iyehñse ne, a va yan ye che ndeva ye ihyan çava che cuahtenan ye nduco ye.

⁴ Cuaco chemin, te ama cuǎn nǎn Ndudo yahn ye ndirun yahn ro sǎbado tuhça:

Ro sǎbado ne, nducote a nihno ntiyon yahn Dendiohs che dendah ye iyehñse ne, chihnde tuhno ye.

⁵ Namin tama cuǎn nǎn Ndudo yahn ye ndirun tuhça:

Hua ndǎ ro che ndevá ihyan sih, cuahtenan ye nducó.

⁶ Nducote tihça ne, a ndero ndi che a va yan Dendiohs che ndeva ye tama te o ihyan, cuahtenan ye nduco ye. Ihyan chahn che chihnevan ye ndudo ndah yahn Dendiohs menǎn ne, hua tuno ye nǎn ye yahn che chahcotáhn ye.

⁷ Chemin che chihno ama ndeh nduyo ne, ndaconan yahve Dendiohs ihyan tama yune. Yahn chemin ne, a dirún. Din ye che dirun David tuhça:

Mǎn che cahnevan nchuhn ndudo yahn Dendiohs ne, hua din cheche ne chedave yahn ne.

⁸ Nan che ndeva Dendiohs ihyan, cuahtenan ye nduco vih ne, ndiyu yahn nan che nda Josué nduco ihyan ndico chahn, te ndete che a min ne, ametah ndaconan rahn Dendiohs che ndeva ye ihyan.

⁹ Devano vo te coman va che ndeva Dendiohs ihyan yahn ye,

¹⁰ te ihyan che ndeva ye ne, cuahte tuhno ye nduhca che chihnde tuhno man ye ro che chihno ntiyon yahn ye che dendah ye iyehñse.

¹¹ Chemin che nahn che din nun ino vo cava che ndeva Dendiohs uvo. Condi dama co ama o vo nduco ihyan ndico chahn che hua chitahno ye.

¹² Tihca, te Ndudo yahn Dendiohs ne, yudo vederihquentiyon yahn, redin che renda ihyan nan ye. Tahque nun ca renda chete chedave yahn ihyan che co ama espada che o can yahn, ne rihco ro vederendedecadino yahn ye.

¹³ A Dendiohs che techecade ye yahn ihyan. A ihyan min che dendah ye nducuahn, ne metah nde ama nan dehtenduh che co conun ndeh nan ye. A nan ye va nducuahn.

Dihvo vo Jesucristo ne, nda cuande ye ihyan yahn ye

¹⁴ A Dihvo vo Jesucristo Daya Dendiohs, che nda cuande ye uvo. Ihyan min ne, conahn ye vahchetero, rahn nan ye uvo nan Dendiohs. Chemin che nahn che quendi vo numa ino vo cotahno vo ihyan.

¹⁵ Dihvo vo Jesucristo ne, tumarande chundah ihyan nan nducuahn, ate hua quendihco ye nde ama nunde. Chemin che, nducote man ye chuhrihn ye ne, a devano ye nduhca che rechuhrihn vo, ne renan vahino ye uvo.

¹⁶ Man ne, nahn che dehve rahco vo, covah vo nan Dendiohs yuhn vo, ihyan min che yahino ye uvo, cava che numacuahn vedeyahino man, vedevahino man, conan ye uvo cuahn che yah rahno vo.

5

¹ Queri ama chidocuyan ndinan ne, retendahnun Dendiohs ihyan van ihyan iyehñse cava che cahma nan ye ihyan nan Dendiohs man, rihno ye ite che co te vedino cava nunde yahn ye man.

² Chidocuyan chahn ne, nducote ihyan nunde ye nduhca ihyan chenahn ne, chemin che riquendañ ye vedechahtino cava ihyan tundo man, ihyan che redinda ye man.

³ Va che cahno ye ite che co te vedino cava nunde yahn ihyan yan, ne nducote namin ihyan nunde ye ne, quenan cuma che cahno ye ite che co te vedino cava nunde yahn man ye.

⁴ Nde ama ihyan ne, hua co tendahnun man ye vederihquentiyon min, conan cuma ye. Atenan man Dendiohs retendahnun ye ihyan che recañ ye vederihquentiyon min nduhca che cah ye Aaron.

⁵ Athinoca Dihvo vo Jesucristo. Hua tendahnun man ye vederihquentiyon min, quenan cuma ye. Tahque ndah ne, a man Dendiohs tendahnun ye ihyan. Rahn ye ri ye ihyan:

Di che Dayá.

Man ro cuh chihco ró che Dayá di.

⁶ Namin rahn ye ri ye ihyan nduhca che ndirun nan Ndudo yahn ye tuhca: A tendahnun di che co chidocuyan ndinan, cuhnde tah vederihquentiyon nduhca che quenan cuma Melquisedec, ne hua nda ro che cuhno vederihquentiyon yehn.

⁷ Cuahn che quechica Dihvo vo Jesucristo muhn iyehñse ne, covah ye numa ino ye, nde chaco ye, ne Dendiohs, ihyan min che va vederihquentiyon yahn ye che ndedevahn ye ihyan tah vederih ne, chihcovan ye yahn che ndeva Dihvo vo yavenan ye.

⁸ Andahre Daya Dendiohs ihyan ne, ate chi nino ye dinahn ye van nducuahñ che chuhrihn ye.

⁹ Cuahn che chenah dinahn ye nducuahñ ne, chihco mendahn ye ihyan, chih ye çava che, nducoyaca ihyan che cotahno ye ihyan ne, ndevahn ye, ne cuahatenan ye vahchetero numacuahñ ro.

¹⁰ Tihça, te a tendahnun Dendiohs ihyan che co ye chidocuyan ndinan, cuhnde tañ ye vederihquentiyon nduhça che quenah cuma Melquisedec.

Cahnda che cahcomañ vo che ritahno vo Dihvo vo Jesucristo

¹¹ Ama va ca dehtenduh che nahñ te cuandé nchuhn, ate ama vahche che dín che conahn ne yahñ che hua rihco ne che conahn ne.

¹²⁻¹³ Ametah ro che ritahno nchuhn Dihvo vo Jesucristo, ate ndotenan che man ne cacuahñ ne ne, rendotenan ne che ndaconan cacuahñ ihyan nchuhn dehtenduh che nde hua vahche nan vederihquentiyon yahñ Dendiohs. Nduhça decuah yuno che hua ri che cheh dehtenduh, te demañ leche rih ne, tiñhan nchuhn. Hua renahn ne vederihquentiyon yahñ Dendiohs, nde hua retumacadino ne taça che cuahtechica ne runecade.

¹⁴ Ihyan che ndah renahn ye vederihquentiyon yahñ Dendiohs ne, a ihyan chahn che devano tendahnun ye dehtenduh. Riquendi ye cha che ndah, ne rihcomañ ye cha che hua ndah.

6

¹ Nducote tihça ne, quendi vo cuahn ndah vo vederihquentiyon yahñ Dendiohs çava che conahn ndah vo. Dehtenduh che chahn vo cuahn che cade chitahno vo Dihvo vo Jesucristo ne, ndiyu dechemin dechemin cuahn vo cuahn ðama, te ama va ca vederihquentiyon yahñ ye che nahñ che cuahn vo. Hua demañ yahñ nduhça che rento ino ihyan nunde yahñ ye che redin che rinda ye man, nduhça che ritahno ihyan Dendiohs man,

² nduhça che redenune ihyan man, nduhça che renahn tañ ye ihyan, revah ye çava ye man, nduhça che ntuche tenahn man, nduhça che techecade Dendiohs yahñ ihyan nunde, din ye castigo ihyan cuahn ðama man. Hua demañ dehtenduh chemin chan che va che cuahn vo,

³ te ama va ca vederihquentiyon yahñ Dendiohs che cacuahñ nchuhn ndete che cuahñecun ye.

⁴⁻⁶ Ihyan che a chenahn ye vederihquentiyon yahñ Dendiohs man, ndudo ndah yahñ ye man ne, tumacadino ye vedeyahino yahñ ye man, vederihquentiyon yahñ Vaco Ndah yahñ ye man, vederihquentiyon che cuahatenan ihyan vahchetero man. Ndete che cuacondah vedame ye Dendiohs ne, ama yune denda ye, te anduhñeca che ndaconan nahñ yahñ ye Dihvo vo Jesucristo, din duche yahñ ye ihyan nan nducoyaca ihyan.

⁷ Nduhça ama yahñ nan che ndahça ran co ne, ndete che ndah ri chendata yahñ ihyan ne, nedin yahñ Dendiohs yahñ min.

⁸ Ate ndete che demañ chano yan ri ne, din dine ye, nde cahco vih ye çava che cuco.

Richahtino vo Dihvo vo Jesucristo cuahn ðama

⁹ Dihno che yahino nchuhn, a dirun yahñ ne nduhça che rahno ihyan che racondah vedame ye Dendiohs, ate a devano cuaco che a ndedevahn ye nchuhn, redin ye che runecade vatechica ne.

¹⁰ Dendiohs ne, ndah ye, ne ra cuande ye nduhça che din yahino ne ihyan yahñ ye, chinan ne ihyan, nde rinan ca ne ihyan.

¹¹ Nahñ che quendi nchuhn numa ino ne nduhça che a cochi ne, nde nda ro che chenah ino vo cuahn che ndeva Dendiohs nchuhn.

¹² Hua nahn che din dahnde nchuhn. Tahque ndah ne ne, cuiquendi ne yune yahn ihyan che chitahno ye Dendiohs, ndichahtino ye che ndedevahn ye ihyan nduhca che a necah ye ndudo yahn ye.

¹³ Cuahn che cah Dendiohs ndudo yahn ye Abraham ne, cah ye numacuahn vederihquentiyon yahn man ye, te ametah tama ca ihyan che tahque yudo vederihquentiyon yahn ye che co man ye.

¹⁴ Rahn ye ri ye Abraham: “Cuaco rahn ri di che ama din che ndah ndoque, ama din che co yahn ndata yehn.”

¹⁵ Abraham ne, quenan rino ye numacuahn vedechahtino nde chinahn ndudo che cah Dendiohs ihyan.

¹⁶ Ihyan iyehanse ne, cuahn che cah ye ndudo yahn ye ne, rendahconun yan ye Dendiohs, te ihyan min che tahque yudo vederihquentiyon yahn ye. Cuahn che tihca cah ye ndudo yahn ye ne, nde nan che cahma ye, metah.

¹⁷ Namin Dendiohs, cuahn che cah ye ndudo yahn ye Abraham ne, cah ye numacuahn vederihquentiyon yahn man ye, chihco ro ye cava ihyan yahn ye che dinahn ye.

¹⁸ Tihca cah Dendiohs ndudo yahn ye numacuahn vedeyudo, ne co cochahtino vo ihyan, te redinahn ye ndudo yahn ye. Nducoyaco vo che a ndahco vo chedave yuhn vo tah ye che ndedevahn ye uvo ne, hua dehve rahco vo, te ndedevahn ye uvo nduhca che a necah ye ndudo yahn ye.

¹⁹⁻²⁰ Quenan cuma che ndevahn chedave yuhn vo, ametah che ndedecadino vo. A chitahno vo Dihvo vo Jesucristo, ihyan min che va ye vahchetero, rahn nan ye uvo nan Dendiohs cava che co conda vo min. Ihyan min ne, anduhneca ama chidocuyan ndinan che va tah ye vederihquentiyon nduhca che quenan cuma Melquisedec che hua nda ro che cuihno.

7

Va tah Dihvo vo Jesucristo vederihquentiyon nduhca che quenan cuma Melquisedec

¹ Melquisedec ne, rey yahn yan Salem, namin chi ye ama chidocuyan ndinan yahn Dendiohs, ihyan min che ama yudo vederihquentiyon yahn ye. Cuahn che ndaconan Abraham che chahn ye, cuhn ye nduco ino cun rey chahn, decuihno ye ihyan ne, chahn Melquisedec, chendi yune ye ihyan, ne chica ye che conan Dendiohs ihyan.

² Me Abraham ne, ndahco ye neve dehtenduh che ndaca ye van canda me tah ihyan min. Nan che ndiche dehtenduh ne, cah ye ama ihyan. Che duche rey min, Melquisedec ne, tuhca conahn: “Rey ndah.” Namin dihn va nan che chihquentiyon ye, te yan yahn ye, Salem ne, tuhca conahn: “Yan nan che dihn va.”

³ Ihyan min ne, anduhneca ndete che co man ye, te hua duh devano duh che chaco ye man, duh che chida ye man, nde hua duh devano ti chica ndata yahn ye. Hua duh devano ticuahn chihndeyan ye man, ticuahn chih ye man, ndete che chihno vederihquentiyon yahn ye man. Atihnoça Dihvo vo Jesucristo, Daya Dendiohs, te ndi ye anduhneca chidocuyan ndinan, ne hua cuihno vederihquentiyon yahn ye.

⁴ A ndero ndi te ama yudo vederihquentiyon quenan cuma Melquisedec, te nde ihyan ndico yuhn vo Abraham nevahnecon ye ihyan, ne ndeh nan dehtenduh che chihnevi ye yahn rey chahn, ndahco ye tah ye.

⁵ Nduhca che rihquentiyon ley che dirun Moisés ne, va che cah ihyan nación yahn Israel ama dehtenduh nan che ndiche queri ama nan dehtenduh yahn ye che va, ndonda tah chidocuyan che ndata yahn Leví. Tihca va che din ye, te ndata yahn Abraham ihyan nduco vih.

⁶ Ate Melquisedec ne, andahre hua ndata yahn Levi ihyan ne, ndonda tah ye dehtenduh che cah Abraham, ihyan min che cah Dendiohs ndudo yahn ye ihyan. A Melquisedec che chica ye che conan Dendiohs Abraham,

⁷ ne a devano vo te ihyan che rica ye Dendiohs cava ihyan chenahn ne, tahque yudo vederihquentiyon quenan cuma ye.

⁸ A ndero ndi che tahque yudo vederihquentiyon che quenan cuma Melquisedec che co vederihquentiyon che chahtenan cuma chidocuyan che ndata yahn Levi. Ihyan chahn ne, chihno chih ye, ate Melquisedec ne, a ndirun yahn ye nan Ndudo yahn Dendiohs anduhneca ndete che va ca ye.

⁹⁻¹⁰ Levi nduco nducoyaca chidocuyan che ndata yahn ye ne, anduhneca ndete che nduco ye Abraham, ndeva ye yavenan Melquisedec, te andahre ametah ye ro min, ate Abraham che chihco ndata ye ihyan.

¹¹ Chidocuyan che ndata yahn Levi, che namin ndata yahn Aaron ne, ihyan chahn che chihnde tah ye ley che dirun Moisés, chicuahn ye ihyan nación yahn Israel. Ate nducote hua ndevahn ihyan nduco vederihquentiyon che chahtenan cuma chidocuyan che ndata yahn Levi ne, quenan cuma che dechuh Dendiohs Dihvo vo Jesucristo, nuhnde tah ye vederihquentiyon nduhca che quenan cuma Melquisedec.

¹² Che ndacorun Dendiohs vederihquentiyon yahn chidocuyan ne, nde ley yahn ye va che ndahco cade ye.

¹³ Tihca, te Dihvo vo Jesucristo ne, ndiyu ndata yahn chidocuyan ihyan.

¹⁴ A devano cuaco vo te nan ndata yahn Judá cochi ndata yahn ye. Namin a devano vo nduhca che chihquentiyon Moisés che atenan nan ndata yahn Levi quendah chidocuyan.

¹⁵ Nducote nuhnde tah Dihvo vo Jesucristo vederihquentiyon nduhca che quenan cuma Melquisedec ne, a ndero ndi che a ndahco cade Dendiohs ley che dirun Moisés,

¹⁶ te nuhnde tah ye vederihquentiyon min, ndiyu yahn che ndata yahn chidocuyan ihyan, ate yahn che quenan cuma ye vederihquentiyon che hua nda ro che cuihno.

¹⁷ Tihca, te a yahn ihyan min che ndirun nan Ndudo yahn Dendiohs tuhca: A tendahnun di che co chidocuyan ndinan, cuhnde tah vederihquentiyon nduhca che quenan cuma Melquisedec,

ne hua nda ro che cuihno vederihquentiyon yehn.

¹⁸ Nduco tihca, ndahco cade Dendiohs ley che dirun Moisés, te hua cochihve ¹⁹ cava che ndevahn ihyan. Menun ley min ne, nda Dihvo vo Jesucristo che tahque ndah vederihquentiyon yahn ye. Ihyan min cochahtino vo ihyan cava che tuno vo nan Dendiohs.

²⁰ Avane ne, cuahn che dechuh Dendiohs Dihvo vo Jesucristo ne, numacuahn vedeyudo cah ye ndudo yahn ye che co ye nduhca chidocuyan ndinan.

²¹ Yahn chidocuyan chenahn chahn ne, hua tihca cah ye ndudo yahn ye. Cuahn che ndahco ye vederihquentiyon min tah Dihvo vo ne, cah ye ndudo yahn ye che ndirun tuhca:

Dihvo vo Dendiohs ne, numacuahn vedeyudo cah ye ndudo yahn ye, ne va che conahn.

Rahn ye ri ye Daya ye: “A tendahnun di che co chidocuyan ndinan, cuhnde tah vederihquentiyon nduhca che quenan cuma Melquisedec, ne hua nda ro che cuihno vederihquentiyon yehn.”

²² Nducote a Dihvo vo Jesucristo che nuhnde tah ye vederihquentiyon min ne, conahn ndudo che chihco cade Dendiohs cava vo. Ndudo min ne, tahque ndah che co ley che chihnde a rahn me.

²³ Chidocuyan chahn ne, yahn ye chahtenan ye nan ntiyon, te nducote ihyan iyehñse ye ne, ca rih ye ca rendacorun ye.

²⁴ Ate Dihvo vo Jesucristo ne, cuhnde tah ye vederihquentiyon min cuahn dama, te hua nda ro che coh ye.

²⁵ Chemin che ihyan che tuno ye nan Dendiohs ça va ye ne, ndedevahn ye ihyan, ne ametah conda ye, te va ye cuahn dama, rahn nan ye ihyan nan Dendiohs.

²⁶ Ama chidocuyan nduhca ihyan min che rendotenan vo. Ihyan min ne, ndah ye, ne metah nde ama nunde yahn ye. Hua dama ri ye nduco ihyan nunde. Ndeva Dendiohs yavenan ye, ndeva ye ihyan vahchetero.

²⁷ Chidocuyan ndinan chenahn chahn ne, rendotenan ye che cahno ye ite cuahn dama, co te vedino ça va nunde yahn man ye man, nunde yahn ihyan man. Ate Dihvo vo Jesucristo ne, chihco mendahn ye ihyan, chih ye, ne nduco chemin ama yune no nedihye ye nunde yahn ihyan iyehñse.

²⁸ Chidocuyan ndinan chenahn chahn che chihnde tah ye ley che dirun Moisés ne, ihyan nunde ye. Ate cuahn che ndahco cade Dendiohs ley min ne, numacuahn vedeyudo ndahco ye vederihquentiyon tah Daya ye, ihyan min che hua nda ro che condihco ye nunde.

8

Nuhnde tah Dihvo vo Jesucristo vederihquentiyon ra che ndahco cade Dendiohs

¹ Dihvo vo Jesucristo ne, ndi ye nduhca ama chidocuyan che tahque ndinan, rahn nan ye uvo, va ye vahchetero lado tah cuaco Dendiohs. Ndudo cuh che tahque menan vihca van nducuahn che a dirun nan ça ca cuh.

² Chidocuyan che tahque ndinan che chahte ye iyehñse ne, chahtenun ye chete yaco che dendah ihyan. Ate Dihvo vo Jesucristo ne, va ye vahchetero. Min ne, ndiyu ihyan iyehñse dendah ye.

³ Chidocuyan chahn ne, chenan cuma ye ntiyon che rihco ye ndeh nan vedino nan ta. Ate Dihvo vo Jesucristo ne, chihco mendahn ye ihyan, chi ye vedino ça vo.

⁴ Ndete che muhn iyehñse quenan Dihvo vo ne, nde hua conan ye nan ntiyon che redin chidocuyan che rihco ye vedino nan ta nduhca che rihquentiyon ley che dirun Moisés, te a ihyan chahn che nda cuande yahn ye ntiyon min.

⁵ Ihyan chahn ne, redin ye ntiyon chete yaco che ndedendah ihyan menun vahchetero nan che va Dendiohs. Devano vo che menun, te cuahn che canan Moisés dendah ye yaco me ne, rahn Dendiohs, ri ye ihyan: “Cuihque cudadó, ne cuendendah nducuahn nduhca che nahme di tingüete me.”

⁶ Chidocuyan chahn ne, muhn iyehñse cuh che va ntiyon yahn ye. Ate Dihvo vo Jesucristo che ndi ye anduhneca chidocuyan che rahn nan ye uvo nan Dendiohs ne, tahque chahte vederihquentiyon yahn ye che co vederihquentiyon yahn ihyan chahn, te tahque ndah vederihquentiyon che ndahco cade Dendiohs che co vederihquentiyon ndico me man, tahque ndah ndudo che te ye uvo che co ndudo che cah ye ihyan ndico yuhn vo man.

⁷ Vederihquentiyon ndico me ne, hua quendah ndah, ne chemin che ndaconan ndahco cade ye.

⁸ Nducote ndihchero Dihvo vo Dendiohs che hua redinahn ihyan vederihquentiyon ndico me ne, rahn ye:

Caviyan deman ne, ndahco cade ndudo yahn nduco ihyan nación yahn Israel man, ihyan nación yahn Judá man.

⁹ Ndaḥco caḁé ndudo che cāḥ iḥyan ndico yahn ye cuahn che chinán iḥyan, ndetendāḥ iḥyan nación yahn Egipto.

Iḥyan chahn ne, hua dinahn ye vederihquentiyon che cāḥ iḥyan, ne chemin che chacondāḥ vedamé iḥyan.

¹⁰ Nda ro yahn ne, ndaḥco caḁé ndudo yāḥn nduco iḥyan nación yahn Israel. Dín che conahn ye vederihquentiyon yāḥn, ne hua conān ye.

Tuhme nedin yāḥn iḥyan, ne ndeva ye yavenán.

¹¹ Nda ro min ne, hua rendotenan che cacuahn vih ye van diḥno ye man, van combiero yahn ye man, çava che tumacadino ye vederihquentiyon yāḥn,

te tumacadino nducoyaça iḥyan, nde iḥyan ndico man, nde checahya man.

¹² Nchacó yahn ye, ne ametah ndaconan conun inó nunde yahn ye.

¹³ Nducote raḥn Dendiohs che a ndaḥco caḁe ye vederihquentiyon yahn ye ne, a devano vo che a chuh ro yahn vederihquentiyon ndico me, a chihcomān ye.

9

¹ Iḥyan ndico yuhn vo ne, chihnde taḥ ye vederihquentiyon ndico nan che ndiḥco caḁe Dendiohs nduhça che quenān cuma che ndeva iḥyan yavenān ye. Namin chihnde taḥ ye ama yaço che dendah ye.

² Nan derenda chete yaço me ne, duche Nan Ta Yudo. Min va candelero man, mesa nan che retave paḥn che ri vedino man.

³ Mendahn chete yaço ne, quendiḥco ama tino chahte numa chahno. Cuahn candevah vedame tino me ne, duche Nan Ta Che Tahque Yudo.

⁴ Min va ama nan ta diyahnguan nan che riche cuhn. Namin va ama yave che ndacotuma diyahnguan. Chete ne, chenun tu rahno nan che ndirin vederihquentiyon yahn Dendiohs man, quenun ama jarro che ndinda nduco diyahnguan nan che chenun paḥn che duche maná man. Namin quenun nducodí che neve, che quenān cuma Aarón.

⁵ Menān yave me ne, a min che nan ta nan che rihnde vedino çava nunde yahn iḥyan. Min vatendi o ángel che ndindah ye, ne chendāḥ reche ye. Ama quendiḥco yudo min, te min riya Dendiohs. Conahn nan vo muhn che rente vo yahn nan ta me.

⁶ Tiḥça va yan nducuahn chete yaco me, ne chidocuyan chahn ne, renda ye cuahn daḁa nan ta nan derenda me, redinahn ye ntiyon che chenān cuma ye.

⁷ Ate Nan Ta che Tahque Yudo me ne, atenan chidocuyan che tahque ndinan me renda ye ama yune no che ama nduyo. Querí ama yune che condā ye ne, va che quenda ye yun yahn ite çava che co vedino yahn nunde yahn man ye man, nunde yahn nducoyaça iḥyan man.

⁸ Nduco chemin ne, rete Vaco Ndaḥ yahn Dendiohs, recadino vo te numanahn che va ca vederihquentiyon ndico me ne, nduhça che quendiḥco tino mendahn chete yaço, ne hua co condā adecoduhno iḥyan Nan Ta Che Tahque Yudo me ne, tiḥça hua co tuno iḥyan vahchetero.

⁹ Yahn tino che quendiḥco chete yaço ne, a ndero ndi che rihco vih iḥyan nan Dendiohs ro min cuahn che va ca vederihquentiyon ndico me. Nde ama nan dehtenduh vedino che recaḥ iḥyan Dendiohs ro min ne, hua co din che cuahtemaḥ ino ye.

¹⁰ Vederihquentiyon min ne, chihnde çava che co devano iḥyan dehtenduh che co cheh ye man, cuh ye man, taça che nano ye taḥ ye man, dehtenduh yahn ye man, ne chengu nde dechuh Dendiohs Diḥvo vo Jesucristo, ndaḥco caḁe ye.

¹¹ Cuahn che nda Dihvo vo ne, ndi ye nduhca ama chidocuyan che tahque ndinan, nda ye vederihquentiyon ra che tahque ndah. Chihno min ne, conahn ye vahchetero. Chidocuyan che tahque ndinan chahn che chihnde tah ye vederihquentiyon ndico me ne, din ye ntiyon chete yaco che ihyan dendah ye. Ate Dihvo vo Jesucristo ne, vahchetero va Ye.

¹² Chidocuyan che tahque ndinan chahn ne, nduyo nduyo rendotenan ye yun yahn chivato man, itenine cahya man, cava che co vedino yahn nunde yahn ihyan. Ate Dihvo vo Jesucristo ne, chihco mendahn ye ihyan, ne nduco yun yahn man ye nedihve ye nunde yuhn vo. Ama yune no ndedevahn ye uvo, conahn ye vahchetero nan Dendiohs.

¹³ Nan vederihquentiyon ndico me ne, richihve yun yahn chivato man, itenine man iya yahn itenine che ndihquiyahn ye ite man, cava che co vedino, ne cuhdeman ino ihyan che cahnda yahn ye che conda ye chete yaco.

¹⁴ Ate nde tahque richihve yun yahn Dihvo vo Jesucristo, ihyan min che metah nde ama nunde yahn ye. Ihyan min ne, numacuahn vederihquentiyon yahn Vaco Ndah yahn Dendiohs, chihco mendahn ye ihyan, chih ye cava che ndaco vo vederenchahco yahn nunde yuhn vo, ndevahn vo. Man ne, hua dehve rahco vo, redinahn vo vederihquentiyon yahn Dendiohs, ihyan min che va ye vahchetero.

¹⁵ Nducote chih Dihvo vo Jesucristo, chera yun yahn ye ne, va tah ye vederihquentiyon ra, rahn nan ye uvo nan Dendiohs. Chemin che ihyan che a tendahnun Dendiohs ne, cuahtenan ye vahchetero numacuahn ro nduhca che cah Dendiohs ndudo yahn ye. Nducote chih Dihvo vo ne, ndedevahn ye uvo, te cava ihyan min nchahco Dendiohs nunde yuhn vo che hua dinahn vo vederihquentiyon yahn ye che chihnde ro man.

¹⁶ Testamento che rihco ihyan ne, ndete che nuhnde cuaco che a chih ye ne, conahn.

¹⁷ Ate ndete che va ca ye ne, hua co conahn.

¹⁸ Vederihquentiyon che rihco cade Dendiohs ne, va che cora yun cava che conahn.

¹⁹ Chemin che cuahn che chihno cahndudo Moises vederihquentiyon che cah Dendiohs ihyan, chihnevan nducoyaca ihyan yan ne, chetah ye ama tihve yudo yahn itecuche che necah cuah nduco ama ticua yata che duche hisopo, ne decahnda ye nduco yun yahn itenine cahya man, yun yahn chivato man, che ndihchetahn nduco nune. Tuhme cahnan ye yun me nan libro che ndirun vederihquentiyon min man, chinun ye van nducoyaca ihyan man,

²⁰ ne rahn ye: "Nduco yun cuh, conahn vederihquentiyon yahn Dendiohs che te ye uvo."

²¹ Namin cahnan ye yun me chete yaco man, nan dehtenduh che va min man.

²² Nan vederihquentiyon yahn Dendiohs che dirun Moises ne, a nahn nducuahn dehtenduh va che co vihco nduco yun yahn ite. Namin va che coh ite, cora yun yahn te cava che nchahco Dendiohs nunde yahn ihyan.

Cih Dihvo vo Jesucristo cava nunde yuhn vo

²³ Yaco nan che chihnde vederihquentiyon ndico min ne, chihnde menun vahchetero. Ndeucuahn dehtenduh che va chete yaco min ne, rendotenan yun yahn ite cava che co vihco. Ate cava che tuno vo vahchetero nan va Dendiohs ne, hua cochihve yun yahn ite.

²⁴ Chidocuyan ndinan chahn ne, atenan chete yaco min chihnde vederihquentiyon yahn ye. Ate tahque yudo vederihquentiyon yahn Dihvo vo Jesucristo, te vahchetero va ye, rahn van ye uvo nan Dendiohs.

²⁵ Chidocuyan chahn ne, nduyo nduyo renda ye Nan Ta Che Tahque Yudo, ne rendotenan ye yun yahn ite cava che co vedino. Ate Dihvo vo Jesucristo ne, ama yune no chih ye, chera yun yahn ye cava nunde yuhn vo.

²⁶ Nde nan canan iyehense ne, ama yahn ite quenan cuma che chihno ihyan ndico yuhn vo, chi te vedino. Ate nda ro che ndahco cade Dendiohs vederihquentiyon yahn ye ne, nda Dihvo vo Jesucristo, chihco mendahn ye ihyan, chih ye ama yune no, cava che nchahco Dendiohs nunde yuhn vo.

²⁷ Nducoyaca ihyan iyehense ne, a nihnde cade che va che coh ye. Adiva ne, va che techecade Dendiohs yahn ye.

²⁸ Dihvo vo Jesucristo ne, chih ye ama yune no, nedihve ye nunde yahn ama yahn ihyan. Nda ro yahn ne, ndaconan chi tun ye, ndiyu cava che coh ye tama yune cava nunde, ate cava che ndeva ye ihyan che numa ino ye chenan rino ye ihyan.

10

¹ Vederihquentiyon che ndahco cade Dendiohs ne, tahque ndah che co vederihquentiyon che chihnde tah Moisés. Nan vederihquentiyon ndico me ne, hua tuno ihyan nan Dendiohs, andahre nduyo nduyo recah ye vedino cava nunde yahn ye.

² Ndete che ndaca ihyan chahn vederenchahco cava nunde yahn ye ama yune no ne, ametah rendotenan che ndaconan cah ye vedino. Ate hua nchahco Dendiohs nunde yahn ye ama yune no, ne chemin che hua rihndeman ino ye, redin nunde yahn ye.

³ Nduyo nduyo che recah ye vedino ne, renecahco ye che chendihco ye nunde,

⁴ te yun yahn itenine man, yun yahn chivato man ne, hua co din che ama yune no ndaca ihyan vederenchahco cava nunde yahn ye.

⁵ Chemin che cuahn che nda Dihvo vo Jesucristo iyehense ne, rahñ ye ri ye Dendiohs:

Hua renan ino ne che rihno ihyan ite, ri te vedino nan ne.

Tahque ndah ne ne, din ne che ndó nduhca ama ihyan iyehense, cahco mendahn u coh, nedihvé nunde yahn ihyan.

⁶ Hua renan ino ne che rihno ye ite, rihquiyahn ye ite, ri te vedino cava che nchahco ne nunde yahn ye.

⁷ Dendiohs yahn, nducote hua renan ino ne dehtenduh vedino chemin chan ne, a ndá muhn iyehense cava che dinahn che rihquentiyon ne nduhca che a ndirun yahn nan Ndudo yahn ne.

⁸ Dinoca rahñ Dihvo vo Jesucristo che hua renan ino Dendiohs dehtenduh vedino che recah ihyan cava nunde yahn ye andahre nan vederihquentiyon ndico a nihnde cade che va che cah ye.

⁹ Tuhme rahñ ye: “A ndá muhn iyehense cava che dinahn che rihquentiyon ne.” Nduco che tihca rahñ ye ne, chihco ro ye che a nuhnde cade vederihquentiyon ndico me, te chihco mendahn ye ihyan menun vedino che recah ihyan ro man.

¹⁰ Nan vederihquentiyon che ndahco cade Dendiohs ne, nchahco ye nunde yuhn vo yahn che chihco mendahn Dihvo vo Jesucristo ihyan, chih ye ama yune no, ndedevahn ye uvo.

¹¹ Nan vederihquentiyon ndico me ne, va che cahco chidocuyan chahn vedino ro ro, ate vedino chemin chan ne, hua redin che ndaca ihyan vederenchahco cava nunde yahn ye ama yune no.

¹² Ate Dihvo vo Jesucristo ne, chih ye, nedihve ye nunde yuhn vo ama yune no. Chihno min ne, conahn ye vahchetero, chihnde ye lado tah cuaco Dendiohs.

¹³ Min quenan rino ye nde nda ro che ndahco ndiya Dendiohs ihyan che hua ri rendihche ye ihyan, nevahnecon ye ihyan.

¹⁴ Ihyan min ne, ama yune no ndedevahn ye ihyan yahn ye, chihco mendahn ye ihyan, chih ye cava ye.

¹⁵ Cuaco chemin, te namin din Vaco Ndah yahn Dendiohs che dirun ihyan profeta tuhca:

¹⁶ Rahn Dihvo vo Dendiohs: "Nda ro yahn ne, ndahco cade ndudo yahn nduco ihyan yahn.

Din che conahn ye vederihquentiyon yahn, ne hua conan ye."

¹⁷ Namin rahn ye:

Nchahco yahn ye, ne ametah ndaconan conun ino nunde yahn ye.

¹⁸ Cuahn che a nchahco Dendiohs nunde yahn ihyan ne, ametah rendotenan che cah ca ye vedino.

Nahn che cochahtino vo Dendiohs

¹⁹ Dihno, nan vederihquentiyon ndico me ne, nde ama ihyan yan hua co nda ye Nan Ta Che Tahque Yudo. Ate nan vederihquentiyon ra ne, nducote a chih Dihvo vo Jesucristo, chera yun yahn ye, nedihve ye nunde yuhn vo ne, hua dehve rahco vo, co tuno vo vahchetero nan Dendiohs.

²⁰ Nan vederihquentiyon ndico me ne, quendihco tino me chete yaco cava che hua chuh ihyan, nda ye Nan Ta Che Tahque Yudo me. Ate nan vederihquentiyon ra che va tah Dihvo vo Jesucristo ne, co tuno vo vahchetero nan Dendiohs, te chihco mendahn ye ihyan, chih ye cava vo.

²¹ Nducote ndi Dihvo vo Jesucristo nduhca ama chidocuyan che tahque ndinan, rahn nan ye uvo ihyan yahn Dendiohs ne,

²² chemin che ndahco vo chedave yuhn vo tah Dendiohs. Hua dehve rahco vo, te ritahno vo Dihvo vo Jesucristo numa ino vo. A ndaco vo vederenchahco cava nunde yuhn vo. A chedenune vo, ne man ne, anduhneca ndete che a ndo dave vo nduco nune dave.

²³ Quendi vo numa ino vo cochahtino vo che ndeva Dendiohs uvo, te dinahn ye ndudo yahn ye che te ye uvo.

²⁴ Nahn che necah yan ama tamo vo chedave yahn vih cava che quendi vo din yahino vih vo man, din vo che ndah man.

²⁵ Hua cahcoman vo che rendo damo vo nduco vih nduhca che redin nahn dihno vo che rihcoman ye. Tahque ndah ne, quendi vo nde tahque numa ino vo necah yan ama tamo vo chedave yahn vih, te a cochi niño ro che ndaconan chi Dihvo vo Jesucristo.

²⁶ Ndete che a chenahn vo ndudo ndah yahn Dendiohs, ne cuahcotahn vo ne, tuhme ametah nchahco ye yuhn vo. Ndete che cuahcotahn vo ne, metah nguahco yuhn vo che chih Dihvo vo Jesucristo.

²⁷ Hua co cuahteman ino vo, te va che cuhnde cade yuhn vo, co vo castigo yah van ruchiyahn dama nduco ihyan che hua ri rendihche ye Dendiohs.

²⁸ Nducoyaca ihyan che rahcotahn ye yahn vederihquentiyon che dirun Moisés ne, ndete che ndahco cuaco o ino ihyan nunde yahn ye ne, va che cahno ihyan yan ihyan, ametah vederenchahco cava ye.

²⁹ Ihyan che a chenahn ye Ndudo yahn Dendiohs ne, ndete che cuacondah vedame ye Daya Dendiohs man, ndete che duche rino ye vederihquentiyon yahn Dendiohs che chih Daya ye, chera yun yahn ye cava che ndedevahn ye ihyan iyehse man, ndete che cuahcotahn ye yahn Vaco Ndah yahn

Dendiohs, ihyan min che yahino ye ihyan man ne, tuhme tahque chahte castigo va che co ye che co ihyan chahn.

³⁰ Ihyan che tihca redin ye ne, hua co ndevahn ye, te rahn Dendiohs: “U din castigo ihyan nunde, ndahco menun yahn ye.” Namin rahn ye: “Ihyan yahn ne, u che Dihve ye. U techecade yahn ye.”

³¹ ¡Ama cahnda yuhn vo che cuahtendihco vo nunde nan Dendiohs, ihyan min che va ye vahchetero!

³² Cuenecahco nchuhn cuahn che cade chihnevan ne ndudo ndah yahn Dihvo vo Jesucristo, chitahno ne ihyan. Ama quenda ne vedechantino che ama din tan ihyan nduco ne.

³³ Nahn cuan ne, din duche yahn ye nchuhn, chahn ye nchuhn nan nducoyaca ihyan. Nahn cuan ne, ama chi ran ne che chahn ihyan combiero yahn ne che nduco ne man,

³⁴ din ne vedevahino nduco combiero yahn ne che chahtenun ye vacoyahn man. Din chahtino ne, nde hua chi ran ne yahn che chehnevinan ihyan dehtenduh yahn ne, te a devano ne che nuhnde menun yahn ne vahchetero dehtenduh che nde tahque ndah, che ngu cuahn dama.

³⁵ Chemin che nahn che quendi ne cochahtino ne. A devano ne che ndahco menun ndahva Dendiohs yahn ne.

³⁶ Nahn che cuahtenan cuma ne vedechantino cava che dinahn ne vederihquentiyon yahn ye, ne ndeva ye nchuhn nduhca che te ye ndudo yahn ye.

³⁷ Nan Ndudo yahn ye ne, a ndirun tuhca:

A nun cuahn nda ihyan min che a va cade che chi ye. Ametah condah ye.

³⁸ Ihyan che ritahno ye u ne, nedin yahn ihyan.

Va che quendi ye cochahtino ye u, te ndete che cahcoman ye u ne, cuacondah vedame ihyan.

³⁹ Uvo ne, ritahno vo Dendiohs, ne chemin che ndichahtino vo che ndeva ye uvo. Hua dama co vo nduco ihyan che racondah vedame ye Dendiohs, ne rinda ye.

11

Nduhca che ritahno ihyan Dendiohs

¹ Che ritahno vo che ndeva Dendiohs uvo ne, chenan ino vo che va che conahn. Andahre condah conahn, ate nducote ritahno vo ihyan ne, a devano vo te va che conahn.

² Tihca, te ihyan ndico yuhn vo ne, nedin yahn Dendiohs ihyan yahn che chitahno ye ihyan.

³ Nducote ritahno vo Dendiohs ne, a devano vo te man ye dendah ye iyehne. Andahre metah dehva ro menan, ate chihquentiyon no ye, ne chihnde ro.

⁴ Abel ne, chitahno se Dendiohs, ne chemin che cah se ihyan ama vedino che tahque ndah che co che cah Cain. Nducote chitahno se ihyan ne, nedin yahn ye sahn, nevahnecun ye vedino yahn se. Sahn min ne, a ndih se, ate nducote chitahno se Dendiohs ne, nde meniyan retihyon yune se uvo che cotahno vo Dendiohs nduhca che chitahno se.

⁵ Enoc ne, chitahno ye Dendiohs, ne chemin che ndeva ye ihyan vahchetero dequenduche ye. Ametah ndaca ndihchero ihyan iyehne ihyan. Nan Ndudo yahn Dendiohs ne, a ndirun yahn Enoc, che cuahn che quenan ye iyehne ne, ndahca quenan ye nan Dendiohs, ne nedin yahn Dendiohs ihyan.

⁶ Cava che tuno vo nan Dendiohs ne, va che cotahno vo ihyan, te ihyan che ritahno ye che va ye man, che rah ye ihyan man ne, atenan ihyan chahn che rendeva ye ihyan.

⁷ Noé ne, chitahno ye Dendiohs, ne chemin che dinahn ye, dendah ye arca me cuahn che cahn Dendiohs chi ye ihyan che va che ndedetoh ye iyehñse. Chete arca me quenun ye nduco ihyan yahn ye, ndevahn ye. Nducote chitahno ye ndudo min yahn dehtenduh che coman cochi che co ne, chihco ro ye che ihyan nunde ne, a ndinda ye yahn che hua chitahno ye. Namin nducote chitahno ye ne, nedin yahn Dendiohs ihyan.

⁸ Abraham ne, nducote chitahno ye Dendiohs ne, dinahn ye cuahn che yahve ye ihyan che cahn ye yahn yahn nan che cah ye ihyan. Andahre nde hua devano ye ti quenda Dendiohs ihyan, ate chihcoman ye yan vaco ye, cuahn ye.

⁹ Nducote chitahno ye Dendiohs ne, quenun ye yahn min, andahre tama nación. Quenun ye vah tino nduhca ihyan chenun ye yune. Tihca quendi Isaac man, Jacobo man, che namin nduco ye cah Dendiohs ndudo yahn ye ihyan.

¹⁰ Tihca din Abraham, te quenun rino ye che ndeva Dendiohs ihyan vahchetero, nan che ama ndahca, nan che man Dendiohs dendah ye.

¹¹ Namin ihyan ndahta yahn ye Sara ne, chitahno ye Dendiohs, ne andahre indihnte cuahn ye, ate chichahtino ye che conahn ndudo yahn Dendiohs, ne chemin che ndaca ama daya ye nduhca che cah Dendiohs ndudo yahn ye ihyan.

¹² Min quendinan che ama chi yahn ndata yahn Abraham, andahre a indihnte cuahn ye ro min. Nduhca che ndeh iyon che chenan nan ro man, nduhca che ndeh yahndute che chetave chihco nuniyahn man, che nde hua cocha vo din ducho vo ne, tihca ama chi yahn ndata yahn ye.

¹³ Nducoyaca ihyan ndico chahn ne, chih ye. Numanahn che chahtenan ca ye iyehñse ne, hua chenan chinahn nduco ye nducuahn dehtenduh che cah Dendiohs ndudo yahn ye ihyan. Ate chichahtino ye che va che conahn nducuahn, ne chi yeno ye, te a devano ye te ndiyu iyehñse cuh va che cuahtenan ye cuahn dama. Redin ye cuande che anduhñeca ihyan chenun yune ye, te a devano ye che neve ro no cuahtenan ye iyehñse, tuhme ndeva Dendiohs ihyan.

¹⁴ Nducote redin ye cuande che anduhñeca ihyan chenun yune ye ne, rihco ro ye che chenan ino ye che cuahtenan ye vahchetero.

¹⁵ Ndete che ndedecadino ye yahn yan vaco ye che chihcoman ye ne, a ndaconan ca ye.

¹⁶ Ate hua tihca din ye, te tahque ndah ye ne, chahtenan ino ye che nda ye vahchetero. Chemin che nedin yahn Dendiohs ihyan numa ino ye, ne chihco yan ye vahchetero cava ye.

¹⁷⁻¹⁸ Cuahn che ndihchenan Dendiohs Abraham ne, nducote chitahno Abraham ihyan ne, dinahn ye yahn ye, ne quenda ye daya ye Isaac cava che cahn ye sahn, co se vedino nduhca che chihquentiyon ye. Ama ndiyahn ra sahn min yahn ye, ate a chihquino ye che cahn ye sahn, andahre a necah Dendiohs ndudo yahn ye ihyan che a sahn min cahco ndata se ndata yahn ye.

¹⁹ A devano ye te Dendiohs ne, nde tenahn ri rendedetuhche ye. Che lado yahn Abraham ne, anduhñeca ndete che ntuche se van tenahn, te a va che coh se che rahco ye.

²⁰ Isaac ne, chitahno ye Dendiohs, ne chemin che chica ye ihyan che conan ye daya ye Jacob man, Esau man, din ye che ndahca cuahtenan se.

21 Jacob ne, chitahno ye Dendiohs, ne chemin che cuahn che a nda nino ro che coh ye ne, chica ye ihyan che conan ye queri ama daya José, din ye che ndahca cuahtenan se. Chihno min ne, quendih ndudo ye indahco yahn ye, ndeva ye yavenan Dendiohs.

22 José ne, chitahno ye Dendiohs, ne chemin che, cuahn che nda nino ro che coh ye ne, rahn ye ri ye ihyan nación yahn ye Israel, che adiva ne, va che ndaca ye nación yahn Egipto. Namin chihquentiyon ye ihyan chahn che nda ro min ne, ndiquenda ye ine yahn ye.

23 Indihite yahn Moisés ne, chitahno ye Dendiohs, ne chemin che cuahn che chihndeyan Moisés ne, tihyon ndeh ye sahn ino iyo. Chichahtino ye Dendiohs che ndedevahn ye sahn cava che hua cahno sandado sahn nduhca che ndihquentiyon rey yahn Egipto, te ndihchero ye che ama ndahca se.

24 Moisés ne, chitahno ye Dendiohs, ne chemin che cuahn che a chi mahñ ihyan ye ne, tehche ino ye tahn daya rey me che din daya te ihyan.

25 Ndotenan che quendi ye vedeyeno yahn man ye numanahn che quenan ye iyehñse, condihco ye nunde ne, quenan ino ye, ndo nduco ye ihyan yahn Dendiohs, chuhrihn ye nduco vih.

26 Tahque ndah ye ne, chihcoman ye nducuahñ vedecuihca che va nación yahn Egipto, ne numacuahn vedeyeno chuhrihn ye, din tan ihyan nduco ye nduhca che din tan ihyan nduco Dihvo vo Jesucristo. Tihca din ye, te chichahtino ye Dendiohs che ndahco menun ye yahn ye.

27 Nducote chitahno ye Dendiohs ne, andahre ama tan rey me, ate nde hua din vah ye ihyan, chica ye nación yahn Egipto. Tihca din ye, te din chahtino ye Dendiohs, ihyan min che va ye vahchetero.

28 Nducote chitahno ye Dendiohs ne, din ye vihco ro yudo, ne chihquentiyon ye ihyan nación yahn Israel che cahnan ye yun yahn itecuche cahya nan yahn yahn chendevah vaco ye, cava che, cuahn che dechuh Dendiohs ángel me ne, ndihchero ye, ne hua cahno ye daya ye che menañ.

29 Ihyan nación yahn Israel ne, chitahno ye Dendiohs, ne chemin che chi chuh ye mendahn Nuniyahñ Cuah anduhñeca che chuh ye nan yahn cuma. Ate cuahn che chuh sandado yahn Egipto che ndah se ihyan chahn ne, chendih nune sahn, chanorine se.

30 Adiva ne, nducote chitahno ihyan chahn Dendiohs ne, chihno ndache ro che chacondotonan ye chete yahn yan Jericó ne, ndora.

31 Rahab, ama ndahta che ndere quechica te ro menañ ne, chitahno te Dendiohs, ne nevahñecun te sandado yahn nación yahn Israel che vatechica se rendihchero ndudo se. Chemin che ndevahn te, hua chih te dama nduco ihyan che chahcotahn ye yahn Dendiohs.

32 Ama yahn ca ihyan che chitahno ye Dendiohs, co nte vo yahn ye. Ate cava che hua nduh condah yuhn vo ne, atenan tama te o ye ntihyon yan ihyan, nduhca Gedeón man, Barac man, Sansón man, Jefe man, David man, Samuel man, ihyan profeta chenahn man.

33 Ihyan chahn ne, nducote chitahno ye Dendiohs ne, nahñ ye ne, ndahco ndiya ye ndeh nación. Nahñ ye ne, ndahca chihquentiyon ye. Nahñ ye ne, chinan Dendiohs ihyan nduhca che cah ye ndudo yahn ye ihyan. Nahñ ye ne, cuahn che tahn nun ye León ne, ndedevahn Dendiohs ihyan, hua cheh te ihyan.

34 Nahñ ye ne, ndedevahn Dendiohs ihyan van ruchiyahn, ne hua chiche ye. Nahñ ye ne, ndedevahn Dendiohs ihyan tin espada, ne hua dehva chi yahn ye. Nahñ ye ne, andahre hua dito ye, cah dito Dendiohs ihyan. Nahñ

ye ne, chinan Dendiohs ihyan van çanda, ne ndahco ndiya ye sahn che ruhn se nduco ye.

³⁵ Namin nahñ ihyan ndahta, ndedetuhche Dendiohs tenahn yahn ye.

Nahn ye, andahre çah rihñ sahn nunde ihyan, chihno se ihyan, ate hua chacondah vedame ye Dendiohs, te chenani ino ye che ndeva ye ihyan, cuahtenan ye vahchetero.

³⁶ Nahn ye ne, din duche yahn se ihyan man, chahn se ihyan man, chiquiyahito se cadena ihyan man, chih se ihyan vacoyahn man.

³⁷ Nahn ye ne, chihno se ihyan nduco tu. Nahn ye ne, chihca mahñ se ihyan. Nahn ye ne, tumarande se ihyan. Nahñ ye ne, chihno se ihyan nduco espada. Nahn ye ne, chahtechica muhn chahtechica min ye, atenan dima itecuche man, chivato man, chahtenun ye. Chahtechica ye vedevah vedecheh, din tan ihyan nduco ye.

³⁸ Rahtenan muhn rahtenan min ye, yahn nan che metah duhva man, van icoyahn man, iveyava man, dutyahn man. Nducoyaca ihyan chahn ne, che çava ihyan nunde ne, nde hua redin yahn che tihca chuhrihn ye, chahtechica ye.

³⁹ Nducoyaca ihyan chahn ne, andahre nedin yahn Dendiohs ihyan yahn che chitahno ye ihyan, ate metah conan conahn nduco ye nducuahñ che necah ye ndudo yahn ye ihyan,

⁴⁰ te a ndihco çade ye che cuahtenan rino ihyan chahn nde nda ro che dama ndeva ye uvo nduco ye vahchetero.

12

Cohahtino vo Dihvo vo Jesucristo

¹ Nducote ama yahn ihyan chahn chitahno ye Dendiohs, chihco ro ye van vo nduhca che chitahno ye ne, chemin che nahñ che nuhn ino vo, çahcoman vo che rahtechico vo vedeyeno yahn man vo, rahtendihco vo nunde, ne nduhca sahn che numa ino se rano se çade, nde nan che quendahnñan se, tuno se nan yahn çade ne, tihca quendi vo numacuahn vedechahtino, dinahn vo che nahñ Dendiohs.

² Nahn che cohahtino vo Dihvo vo Jesucristo, ihyan min che tihyon yune ye uvo che chitahno vo Dendiohs man, din ye che tuno vo nan ye man. Ihyan min ne, chihco mendahn ye ihyan, quenani yah ye nan cruz. Hua tumacah ye andahre ama chuhrihn ye, ne numacuahn vedecuihno chih ye, te a devano ye te cuihno min ne, ama co yeno ye. Man ne, va ye vahchetero, lado tah cuaco Dendiohs.

³ Condecadino nchuhn nduhca che ama chuhrihn Dihvo vo Jesucristo, din tan ihyan nunde nduco ye çava che quendi ne yune yahn ye, ne hua co doh ino ne man, çava che hua çahcoman ne man.

⁴ Dehve rahco ne, andahre ama rechuhrihn ne, redin tan ihyan nunde nduco ne, ate vate ca dihno vo che nde tahque rechuhrihn ye, nde rihno ihyan nunde ihyan.

⁵ A devano ne nduhca che rahñ Dendiohs, ndirun nan Ndudo yahn ye tuhca:

Dayá, u che Dihve nchuhn, redin castigo nchuhn çava che ndah yahn ne. Cuenevahñecun ne. Hua co ndache ne.

⁶ A devano ne te ihyan che a nedin dayá ihyan, che yahinó ihyan ne, a ihyan chahn che redin castigo ihyan çava che ndah yahn ye.

⁷ Codin chahtino ne yahn che redin Dendiohs castigo nchuhn, te rendihche ye nchuhn nduhca daya ye, ne a çava che ndah yahn ne che tihca redin ye. A devano vo te nducoyaca ihyan redin ye castigo daya ye çava che ndah yahn.

8 Ihyan che hua redin Dendiohs castigo ihyan nduhca che redin ye castigo nducoyaca çava ye çava che ndah yahn ne, ihyan chahn che hua redin yahn ye ihyan.

9 Cuahn che tave indihthe yuhn vo uvo ne, din ye castigo uvo çava che ndah yuhn vo. Nducote nevahnecon vo ihyan ne, nde tahque redin yahn che nevahnecon vo Chido vo che va ye vahchetero, che redin ye castigo uvo çava che ndahca cuahtenan vo.

10 Cuahn che cheçahya uvo ne, din indihthe yuhn vo castigo uvo çava che ndah yuhn vo anduhneva che tuno vederendedecadino yahn ye. Ate tahque ndah ro yuhn vo che redin Dendiohs castigo uvo, te nahn ye che ndah ihyan co vo nduhca che ndah man ye.

11 Cuahn che redin Dendiohs castigo uvo ne, hua renan ino vo, te ama rechuhrihn vo. Ate cuahn che tuma cuahn vo castigo yahn ye ne, ama cochihve yuhn vo çava che runecaçe cuahtechico vo, cuahte dihn chedave yuhn vo.

Ama çahnda che cuahcotahn vo yahn Ndudo yahn Dendiohs

12 Nducote ama richihve castigo che redin Dendiohs uvo ne, chemin che cueneçah yan nchuhn chedave yahn ne, hua co ran ne.

13 Codin ne cuande, ne numa ino ne runecaçe cuahtechica ne çava che cua cuande ihyan che ndaçe ino ye, ne necah yan ye chedave yahn ye, quendi ye yune yahn ne.

14 Codin nchuhn cuande, ne runecaçe cuahtechica ne, hua cuahte çanda ne nduco ihyan. Tihca, te ihyan che hua runecaçe ye ne, hua tuno ye nan Dihvo vo Dendiohs.

15 Nducoyaca nchuhn ne, cuihco ne cudado çava che quendi Dendiohs din yahino ye nchuhn. Hua ndihche tan ne vih, detohnan ne chedave yahn man ne man, ihyan chenahn man.

16 Hua cuahtenan nde ama nchuhn nduco ihyan che hua nihnevaço nduco ne. Nde hua tehche tah ne che ndah yahn ne, nduhca che din Esaú, che nduco tahsihn comida चाहcorun se ndudo ndah che va che çahco chida se çava se yahn che sahn menan se.

17 A devano ne te cuahn che nda ro che çahco chida se ndudo ndah çava se ne, hua ndaça se andahre ama chaco se, te a ntihcue se.

18 Ihyan ndico yuhn vo ne, ndere chuhrihn ye, chahn ye tingüete me, quenan ye canedihya. Min ne, ama chiche man, ama chi man man, ama chi yudo man.

19 Chihnevan ye che tive corneta man, che nte Dendiohs nduco ye man, ne nducote ama yudo ndudo yahn ye ne, chica ye favor ihyan che metah quendi ye çahma ye.

20 Dihya ihyan chahn chi yahn che ama chihco yudo Dendiohs tingüete me, te chihquentiyon ye che andahre ama ite che çahn nda te min ne, va che çahn ihyan ite nduco tu, o nduco lanza.

21 Ama yudo chi min, che nde man Moisés ne, ama dihya ye chi, nde tuno rendoh ye che vah ye.

22 Ate uvo ne, tahque ndah ro yuhn vo, te ndotenan che cuhn vo tingüete me ne, tuno vo vahchetero nan va Dendiohs, ihyan min che ama yudo vederihquentiyon yahn ye. Min chenah çade mil ángel, rendeva ye yavenan ye numacuahn vedeyeno.

23 Uvo ne, a ndi cuande vo vahchetero, ne va che ndo damo vo nduco nducoyaca ihyan yahn Dendiohs che vate ye min. Uvo ne, ndichahtino vo Dendiohs, ihyan min che techecaçe ye yahn nducoyaca ihyan nunde.

²⁴ Namin ndichahtino vo Dihvo vo Jesucristo, ihyan min che a va tah ye vederihquentiyon ra, rahñ nan ye uvo nan Dendiohs. Ihyan min ne, chihco mendahn ye ihyan, chera yun yahn ye çava che nchahco Dendiohs nunde yuhn vo. A devano vo te namin chera yun yahn Abel, ate hua chichihve çava nde ama ihyan.

²⁵ Cuihco nchuhn cudado, ne hua cuahcotahn ne yahn Dendiohs, ihyan min che va ye vahchetero, che riyahve ye nchuhn. Nducote hua ndevahn ihyan ndico yuhn vo che chahcotahn ye yahn ye ro che yahve ye ihyan tingüete me ne, tahque uvo ne, hua ndevahn vo ndete che cuacondah vedamo vo ihyan.

²⁶ Ro min che yahve ye ihyan chahn ne, nde yahn nuhn. Tahque man ne, nde tahque yudo, te rahñ ye: “Tama yune ne, ndiyu demañ yahn ñin che nuhn, te namin nde nducuahñ che chenani ro ñin che nuhn.”

²⁷ Nducote rahñ ye che “tama yune” ne, a devano vo te ndedetoh ye nducuahñ dehtenduh che va che cuihno, ne nuhnde demañ dehtenduh che a nihnde çade che hua cuihno.

²⁸ Chemin che necah vo nundihve cuahn Dendiohs, te vederihquentiyon che te ye uvo ne, hua nda ro che cuihno. Ndeva vo yavenañ ye numacuahn chedave yuhn vo nduhça che renan ino ye.

²⁹ Tihça, te Dendiohs yuhn vo ne, ama yudo vederihquentiyon yahn ye nduhça yahñ che redin che rendo iya dehtenduh.

13

Nduhça che nahn Dendiohs che cuahtechico vo

¹ Cuiquendi nchuhn ñin yahino ne ama tama ne vih.

² Cuenevahñecun ne ihyan chenun yune che nda ye ndevaco ne, te van ihyan che renevahñecun ye ihyan chenun yune ndevaco ye ne, chahte ihyan che nevahñecun ye nde ángel andahre nde hua tumacadino ye.

³ Conan vahino ne ihyan che chenun ye vacoyahn anduhñeca ndete che man ne chenun ne vacoyahn. Conan vahino ne ihyan che rechuhrihñ ye, redin tan ihyan nduco ye, te namin nchuhn ne, iyehñse vate ne.

⁴ Nducoyaca nchuhn che nihnevaco ne ne, hua ndere cuahtechica ne nduco ihyan che hua nihnevaco nduco ne, te Dendiohs ne, ñin ye castigo nduco ye man, nducoyaca ihyan che redin duhe yahn ye che a nihnevaco ye man.

⁵ Hua cuahcorañ nchuhn çava tume. Cuahtenan ne vedeyeno nduco che a va yahn ne, te rahñ Dendiohs: “Hua çahcomañ nchuhn, nde hua cuacondah vedamé nchuhn.”

⁶ Chemin che nahn che cochahtino vo ihyan nduhça che chichahtino ihyan ndico yuhn vo che dirun ye tuhça:

Dihvé Dendiohs ne, a ihyan min che rinan ye u.

Chemin che hua dehve rahco, andahre ñin tan ihyan nduco.

⁷ Condihe ne ihyan ndinan yahn ne che cahndudo ye Ndudo yahn Dendiohs, chihñevan ne. Cuihco nchuhn cudado nduhça che vatechica ye, ne cuiquendi ne yune yahn ye, cuitahno ne Dihvo vo Jesucristo nduhça che ritahno ye.

⁸ Dihvo vo Jesucristo ne, ama no vederihquentiyon yahn ye. Numacuahn ro, nde nan che canañ, nde meniyan, nde ro che cochi ne, hua ndacorun.

⁹ Hua quendi nchuhn dehtenduh costumbre che ricuahn ihyan. Tahque ndah che cochahtino ne Dendiohs, ihyan min che yahino ye nchuhn, che co che quendi ne ama ndeh nan costumbre nan dehtenduh che reh ne, te

costumbre chemin chan ne, hua richihve nde çava man ihyan che riquendi ye.

¹⁰ Nan vederihquentiyon ndico me ne, rihco chidocuyan chahn vedino nan ta, ne nan ntiyon min riquenda che reh ye. Ate man che ndahco çade Dendiohs vederihquentiyon min ne, tahque ndah ro yuhn vo che co ihyan chahn, te Dihvo vo Jesucristo ne, chi ye nduhça ama vedino nan Dendiohs, chih ye çava nunde yuhn vo.

¹¹ Nan vederihquentiyon ndico me ne, renda chidocuyan che tahque ndinan Nan Ta che Tahque Yudo, nda ye yun yahn ite che ri vedino çava che nchahco Dendiohs nunde yahn ihyan. Me yute yahn te ne, riquiyahn ye ama lado, cuahn chihto yan.

¹² Namin Dihvo vo Jesucristo ne, cuahn chihto yan nahn yah sandado ihyan, chih ye. Min chera yun yahn ye çava che nchahco Dendiohs nunde yuhn vo, nedin yahn ye uvo.

¹³ Chemin che cochahtino vo Dihvo vo Jesucristo, quendi vo yune yahn ye, andahre ndahchenan ihyan uvo, nduhça che chahn man ye.

¹⁴ A devano vo te ndiyu muhn iyehñse cuahtenan vo cuahn dama, te chenan ino vo che ndeva Dendioh uvo, cuahtenan vo vahchetero nu-macuahn ro.

¹⁵ Nducote tihça ne, cochahtino vo Dihvo vo Jesucristo, ndeva vo yavenan Dendiohs cuahn dama, cahnevan ihyan chenahn. Chemin ne, anduhneça ama vedino che çah vo Dendiohs.

¹⁶ Codin nchuhn che ndah man, codin ne vedevahino nduco ihyan che va vederetahn yahn ye man, te chemin che renan ino Dendiohs.

¹⁷ Cuenevahñecun nchuhn ihyan ndinan yahn yaço, codinahn ne yahn ye, te ihyan chahn che nda cuande ye nchuhn, ne va che neça cuande ye Dendiohs çava ne. Runeca cuachtenan nchuhn çava che hua cuih ne vederan ihyan chahn, ne co yeno ye çava ne, te ndete che hua runeca cuachtenan ne ne, nde hua cochihve che redin ne.

¹⁸ Covah nchuhn çava nuhn. A devano nuhn te runeca vatechica nuhn, ne nahn quendi nuhn din nuhn che ndah.

¹⁹ Nde tahque nahn che covah nchuhn çava che cuahñecun Dendiohs che hua condah ndaconan chi quendiheró nchuhn.

²⁰ A Dendiohs che redin ye che rahte dihn chedave yuhn vo man, che ndedetuhche ye Dihvo vo Jesucristo man, ihyan min che ndah redin ye cudado uvo nduhça che redin ihyan cudado itecuche yahn ye. Dihvo vo ne, chihco mendañ ye ihyan, chih ye, chera yun yahn ye, din ye che chinahn vederihquentiyon ra che hua nda ro che cuihno.

²¹ Chemin che din Dendiohs che cuahtenan cuma nchuhn vederihquentiyon yahn Dihvo vo Jesucristo çava che runeca cuachtenan ne, din ne che ndah nduhça che nahn ye. Ndeva vo yavenan Dihvo vo cuahn dama. Tihça co.

²² Dihno, dirun tah yahn ne, ne ricá nchuhn che din chahtino ne che riyahvé nchuhn.

²³ Reté, checadino nchuhn te dihno vo Timoteo ne, a ndiquenda se vacoyahn. Ndete che nda nun se muhn ne, quenda sahn cuahn che chi quendiheró nchuhn.

²⁴ Cueneçah ne Dendiohs nducoyaca ihyan ndinan yahn yaço man, nducoyaca dihno vo chenahn man. Cueneva ne Dendiohs yahn dihno vo che vate ye nación yahn Italia.

²⁵ Dendiohs din yahino ye nducoyaca nchuhn. Tihça co.

ÇAÇA CHE DIRUN SANTIAGO

¹ U Santiago che redín ntiyon yahn Dendiohs man, Dihvo vo Jesucristo man, renté Dendiohs nducoyaca nchuhn, nduh che ndichio ndata yahn Israel, che chetuhn ne numachahte iyehñse.

Vededeveno che rete Dendiohs

²⁻³ Dihno, cuahn che chuhrihn nchuhn adecodehno yahn che ritahno ne Dihvo vo Jesucristo ne, ndahca che co yeno ne, te a devano ne te cochihve yahn ne cava che nde tahque cuahtenan cuma ne vedechahtino.

⁴ Codin ne cuande, ne hua ndeh ndedecadino ne cava che conahn ndah ne, ne runecade cuahtenan ne.

⁵ Nchuhn che metah conahn ne ne, cuica ne Dendiohs che din ye che conahn ne, ne din ye che conahn ndah ne, te ihyan min ne, ama chahtino ye, ne numa ino ye redinah ye, recah ndahva ye adecodehno che rica ihyan.

⁶ Ate nahn che cochahtino ne che te Dendiohs vededeveno che caça ne. Hua o ndedecadino ne, te ihyan che o rendedecadino ye ne, nduhca yan yahn nune che riquenda yuhne muhn min ne, tihchan ye.

⁷⁻⁸ Cuedeveno nchuhn te ndete che tihchan ne ne, hua te Dihvo vo Dendiohs nde ama nan dehtenduh che caça ne.

⁹ Nchuhn dihnó che chevah ne, cuahte ne vedeyeno yahn che ndedevahn Dendiohs nchuhn.

¹⁰⁻¹¹ Namin nchuhn che cuihca ne ne, cuahte ne vedeyeno che a devano ne che hua co cochahtino ne vedecuihca yahn ne cava che ndevahn ne. Condihe ne nanda. Andahre ama ndahchan, ate cuahn che riquendah yahn ne, rih di, ne retih. Atihnoça ihyan cuihca, te namin va che coh ye, cahcoman ye ntiyon yahn ye.

Vederededecadino yahn ihyan che hua ndahca

¹² Ama ndah ro yahn ihyan che yahino ye Dendiohs, che redin chahtino ye cuahn che rendedecadino ye che din ye dehtenduh che hua ndah, cuahtendihco ye nunde, te adive ne, nduhca che cah Dendiohs ndudo yahn ye ne, ndeva ye ihyan, cuahtenan ye vahchetero.

¹³ Cuedeveno nchuhn te cuahn che rendedecadino ne che din ne dehtenduh che hua ndah, cuahtendihco ne nunde ne, ndiyu Dendiohs che returamande ye nchuhn, te ihyan min ne, nde hua renda yahn ye che din ye dehtenduh che hua ndah, nde huane che tumarande ye nde ama ihyan, tihyon yune ye ihyan che cuahtendihco ye nunde.

¹⁴ Che cuaco ne, cuahn che renda yahn ihyan che din ye dehtenduh che hua ndah ne, a man ye rendedecadino ye chemin.

¹⁵ Tuhme ndete che dinahn ye, cuahtendihco ye nunde ne, va che co ye castigo nda ro yahn.

¹⁶ Dihno che yahino nchuhn, hua cahncheh man ne nchuhn.

¹⁷ Cuedeveno ne te a Dendiohs, ihyan min che va ye vahchetero, che dendah ye yahn man, iyo man, iyon man ne, redin ye nducuahn che ndah nduco vo, rete ye nducuahn che ndah che rendonda tah vo. Numacuahn ro ne, redin ye che ndah. Hua nda ro che din ye che hua ndah.

¹⁸ Nducote chitahno vo Ndudo ndah yahn ye ne, menan vihca nedin yahn ye uvo nduhca che nahn man ye, chihco ro ye che ndeva ca ye ama yahn ihyan.

Nduhca che redin yahn che cotahno vo Dendiohs

¹⁹ Dihno che yahino nchuhn, nducote tihca ne, nahn che ndah cua cuande queri ama ne ndudo yahn ye che rihnevan ne. Hua ndere condā mendahn ne, nte ne man, nde hua ndere co tan ne man,

²⁰ te cuahn che ri tan ihyan ne, hua redin ye dehtenduh che ndahca nan Dendiohs.

²¹ Chemin che hua nahn che quendi nchuhn dehtenduh che chihnga che redin a nahn nducoyaca ihyan, rahtendiho ye nunde. Tahque ndah ne ne, numacuahn vedino vedenecon cuiquendi ne Ndudo yahn Dendiohs che a chitahno ne cava che ndevahn ne.

²² Cuihcovan ne Ndudo yahn Dendiohs, ne codinahn ne, te ndete che hua ne, cahnceh man ne nchuhn.

²³ Tihca, te ihyan che rihnevan ye, ne hua redinahn ye ne, ihyan chahn ne, nduhca ihyan che rendihchenun ye yavenan ye nan tuyuno,

²⁴ ne ndetahno che ravi ye ne, a rihan no ye tacā yavenan ye.

²⁵ Ate ihyan che riquendi ye rihnevan ye nduco cudado, ne redinahn ye ne, redin Dendiohs che yeno ye nan nducuaahn che redin ye. Tihca, te Ndudo yahn ye ne, ndah, ne redin che ihyan che redinahn ye ne, vatemān ino ye nan ye.

²⁶ Ihyan che rahco ye che ritahno ye Dendiohs, ate hua rihco ye cudado nan che rente ye ne, rihnceh man ye ihyan.

²⁷ Ihyan che rendihche Chido vo Dendiohs che numa cuaco ritahno ye ihyan ne, redin ye vedevahino nduco chechahya devah man, ndahta vah man, nan vederetahn yahn ye, ne hua ndere rahtechica ye nduhca che redin ihyan nunde.

2

Nahn che dama no nevahnecon vo nducoyaca ihyan

¹ Dihno, nducote ritahno ne Dihvo vo Jesucristo, ihyan min che ama yudo vederihquentiyon yahn ye ne, hua ndahca che ndahchenan ne nde ama ihyan.

²⁻³ Dama no cuendevahnecon ne nducoyaca ihyan che renda ye van ne. Cuahn che nda ama ihyan che quenun ye tino ndah man, chenun tah chinetah diyahnguan man ne, cuendevahnecon ne ihyan, dechuh ne ihyan, cuhnde ye dama nduco ihyan chenahn. Namin cuahn che nda ama ihyan chevah ne, cuendevahnecon ne ihyan, dechuh ne ihyan, cuhnde ye dama nduco ihyan chenahn,

⁴ te ndete che ti nan ti ino ne, dechuh ne ihyan, cuandi ye cuahn chihto, o cuhnde ye ndiyahn yahn che chevah ye ne, tuhme a rendauchenan ne ihyan. Ndete che tahque redevahnecon ne ihyan cuihca che co ihyan chevah ne, hua ndahca vederendedecadino yahn ne.

⁵ Dihno che yahino nchuhn, cudevano ne te namin van ihyan chevah ne, a tendahnun Dendiohs ihyan cava che ndahca cuahno ye, cotahno ye Dihvo vo Jesucristo man, cava che nedin yahn ye ihyan, ndeva ye ihyan vahchetero nduhca che cah ye ndudo yahn ye man. Min cuahtenan ye nduco ihyan che yahino ye Dendiohs.

⁶ Ate ndete che ndahchenan nchuhn ihyan chevah ne, din ne che co cuihnan ye. Cuadedevano ne te nde hua redin yahn che tahque nevahnecon ne ihyan cuihca che co ihyan chevah, te a ihyan cuihca che rendinun rendinahno ye nchuhn, ne cuahn che rahtendiho ne yahn ye ne, rica nunde ye yahn ne nan intiyahn.

⁷ Namin a ihyan chahn che rendauchenan ye Dihvo vo Jesucristo, ihyan min che redevahnecon ne ihyan, ritahno ne ihyan.

⁸ Ama ndahça che numa cuăco dinahn queri ama nchuhn vederihquentiyon chahte yahn Dendiohs. Ama nan vederihquentiyon min ne, ndirun tuhça: “Codin yahine nducoyaca ihyan nduhça che yahino man di.”

⁹ Ate ndete che rendahchenan ne ihyan ne, rahcotahn ne vederihquentiyon yahn Dendiohs, rahtendihco ne nunde nan ye.

¹⁰ Cuedevano ne te adecoduhno ihyan che redinahn ye a nahn nducuahn vederihquentiyon yahn Dendiohs ate nduco ama nan no che cuahcotahn ye ne, condihco ye nunde nan nducuahn.

¹¹ Tihça, te vederihquentiyon yahn Dendiohs ne, a man ye chihco çade ye nducuahn. Chihquentiyon ye che hua din duche yahn ihyan che a nihnevaco ye man, che hua çahno ye vih man. Chemin che andahre hua din duche yahn ihyan che a nihnevaco ye, ate ndete che çahno ye vih ne, cuahtendihco ye nunde anduhneca ndete che chahcotahn ye nducuahn.

¹² A Ndudo yahn Dendiohs che redin che vateman ino vo nan ye. Nducote quenan cuma che techecade ye yuhn vo nduhça che a ndihco çade ye nan Ndudo min ne, chemin che cuihco nchuhn cudado nan ndudo yahn ne man, nan nducuahn che redin ne man.

¹³ Runecade chuahtenan nchuhn. Cuedevano ne te ihyan che hua devano conan vahino ye ne, techecade Dendiohs yahn ye, ne co ye castigo yahn queri ama nunde yahn ye. Ate ihyan che va vedevahino nan ye ne, ametah che ndedecadino ye ro che cuhnde çade yahn ye.

¹⁴ Dihno, cuendedecadino ne yahn nahn ihyan che rahñ ye che ritahno ye Dihvo vo Jesucristo ate hua redin ye dehtenduh che ndah. ¿A co ndevahn ye nduhça che tihça dendudo no rahñ ye che ritahno ye?

¹⁵ Cuahn che tahn nun nchuhn ama dihno vo, o ama cahvo vo che metah tino yahn ye man, metah deh che cheh ye man ne,

¹⁶ nahn che conan ne ihyan. Co cahma ne co ne ihyan: “Dendiohs conduco ye ndih. Codin ne cudado ndih yahn iche man, ndah cocheh ne man.” Ate ndete che hua conan ne ihyan ne, nde hua cochihve yahn ne, te dendudo no che ritahno ne Dihvo vo Jesucristo.

¹⁷ Adecoduhno ihyan che rahñ ye che ritahno ye Dihvo vo Jesucristo ate metah vedevahino nan ye ne, nde hua cuăco che rahñ ye.

¹⁸ Co vate nchuhn che rahñ ne ri ne vih: “Di ne, rahñ che ritehne, ne u ne, ritahno man, redin dehtenduh che ndah man. Cuihco ro taça che ritehne, te hua ro che redin dehtenduh che ndah. U ne, rihco ró che ritahnó, te redin dehtenduh che ndah.

¹⁹ Di ne, ritehne che va ama no Dendiohs. Ndahça chemin, ate ndete che dendudo no ne, nde hua cochihve yehn. Namin chundah ne, devano se che va Dendiohs, nde tuno rendoh se che vah se.”

²⁰ Duh nchuhn che tihça dendudo no che rahñ ne che ritahno ne ne, hua renahn ne. Cuedevano ne te ihyan che rahñ ye che ritahno ye, ne hua redin ye dehtenduh che ndah ne, nde hua cuăco che rahñ ye.

²¹ Ihyan ndico yuhn vo Abraham ne, hua dendudo no che chitahno ye, te dinahn ye cuahn che chihquentiyon Dendiohs che çahno ye daya ye Isaac, co se vedino, ne chemin che nedin yahn Dendiohs ihyan.

²² Cua cuande nchuhn nduhça che ndiyu dendudo no chitahno Abraham, te dinahn ye, ne nduco chemin chihco ro ye che numa cuăco chitahno ye.

²³ Nduco che tihça din ye ne, chihco ro ye che cuăco che ndirun yahn ye nan Ndudo yahn Dendiohs tuhça: “Abraham ne, chitahno ye Dendiohs, ne chemin che nedin yahn Dendiohs ihyan.” A ihyan min che din Dendiohs amigo yahn ye ihyan.

²⁴ Tuhme ne, cuedevano nchuhn te ihyan che numa cuăco ritahno ye, redin ye dehtenduh che ndah ne, a ihyan chahn che rene din yahn Dendiohs

ihyan.

²⁵ Rahab, tahn che ndere quechica ro menan me ne, chihco ro te che tihca numa cuaco chitahno te, te chinan te sandado che vatechica se rendihchero ndudo se, chih ndeh te sahn ndevaco te numanahn che ndedechuh te sahn cuahn ndeh, ne chemin che nedin yahn Dendiohs tahn.

²⁶ Ihyan che hua chenun ico ye ne, a ndih ye. Atihnoca ihyan che dendudo rahn ye che ritahno ye Dendiohs ate hua redin ye dehtenduh che ndah, te anduhneca ndete a ndih ye.

3

Nahn che cahco vo cudado nan nducuahn che rente vo

¹ Dihno, hua ndahca che ama yahn nchuhn tendahnun man ne ntiyon che cacuahn ne Ndudo yahn Dendiohs, te a devano ne che cahnda ntiyon min, ne nuhn che ricuahn nuhn ne, tahque va che ndacarune Dendiohs nuhn che co ihyan chenahn.

² Nducoyaco vo ne, a cade no che ama redinda vo. Ndete che va ama ihyan che renahn nda chende ye ne, ihyan min ne, runecade ye nan nducuahn che rente ye man, nan nducuahn che redin ye man.

³ Cuahn che tihyon vo freno chende caballo ne, dinahn te yuhn vo, cahñ te cuahn nan che nahn vo.

⁴ A namin no tun barco. Andahre ama rahte man, ama dito yuhne che raconda man, ate nduco indu lihn che quenan cuahn dahn barco me ne, co ndahconduto sahn che ricahca se adecotino cuahn che nahn se.

⁵ Atihnoca ihyan nan che rente ye, te nduco ndudo yahn ye ne, ama ndeh nan dehtenduh co detohnan ye. Nduco ama cuhdiyahn lihn ne, co cua yahn icoyahn rahte, ne cuihno cuco.

⁶ Atihnoca ihyan che hua renahn nda chende ye nan che rente ye. Ndudo yahn ye ne, anduhca man ruchiyahn yahn infierno, te numacuahn ro che chenah ye iyehñse redetohnan ye ama ndeh nan dehtenduh, nde redinda man ye ihyan.

⁷ Ihyan ne, ri rihquentiyon ye nducoyaca nan ite chano man, ite che chenun te nuniyahn man, yahda man, cu man,

⁸ ate hua ri rihquentiyon man ye ihyan nan che rente ye, te hua renahn nda chende ye. Ndudo yahn ye ne, anduhneca vehde cu.

⁹ Vate dihno vo che rendeva ye numacuahn vedeyeno yavenan Chido vo Dendiohs, ate cuahn che ri tan ye ne, rahva yah ye yahn adecoduhno ihyan, nde hua renda tin ye che a Dendiohs che dendah ye nducoyaca ihyan nduhca man ye.

¹⁰ Ihyan chahn ne, hua ama no vederendedecadino yahn ye. Cuahn che nahn ye ne, revah ye cava ihyan, ne cuahn che nahn ye ne, rahva yah ye yahn ihyan. Dihno, a condi nchuhn dama co ne nduco ihyan che tihchan ye, te hua ndahca che tihca redin ye.

¹¹ ¿Ti rendihche nchuhn che dama riquendañ nune ndah nduco nune dine ne?

¹² Dihno, a devano nchuhn te ndiyu nan yahn higo che ri ndute yahn yahn olivo. Namin a devano ne te ndiyu nan dihyo uva che ri ndute yahn yahn higo. A namin no tun hua dama riquendañ nune dine nduco nune ndah.

Vededeivano che cochihve

¹³ Nchuhn che devano ne man, che renahn ne man ne, nahn che runecade cuahtechica ne man, nahn che cuahtenan cuma ne vedeneñun man, te ihyan che richihve vededeivano yahn ye ne, chenah cuma ye vedeneñun.

¹⁴ Me nchuhn che redin ve ne yahn vih man, rahcoran ne cava man no ne man ne, nde hua cochihve che din yade ne yahn che devano ne, te ducherino ne ndudo ndah yahn Dendiohs.

¹⁵ Vededeveno yahn ihyan che tihchan ye ne, ndiyu Dendiohs che recah ye, te chemin ne, vededeveno yahn ihyan nunde che recah chundah.

¹⁶ Tihca, te ihyan che redin ve ye yahn vih man, rahcoran ye cava man no ye man ne, ama canda tin ye, rahtendihco nducuahn nan nunde.

¹⁷ Ate hua tihchan ihyan che chenan cuma ye vededeveno che recah Dendiohs, te ihyan chahn ne, runecade vate ye man, dihn nan ye man, cuno ino ye man, renahn ye man, chenan cuma ye vedeyahino man, redin ye dehtenduh che ndah man, ama no vederendedecadino yahn ye man, hua rihcheh ye man.

¹⁸ Cuedeveno nchuhn te ihyan che nduco ndah riyahve ye che ndo yan ihyan nduco vih ne, retihyon yune ye ihyan chahn che runecade cuahtenan ye nduco vih.

4

Hua ndahca che dama co vo nduco ihyan nunde

¹ Nducote rahtechica nchuhn vedeyeno yahn man ne, rahtendihco ne nunde ne, chemin che rahte canda ne nduco vih.

² Ama redin ve ne, nahn yahn ne dehtenduh che va yahn ihyan, ne cuahn che hua renda ne nduco ndah ne, ruhn ne nduco ye, nde rihno ne ihyan. Ama nahn yahn ne dehtenduh, ate hua renda ne, te hua rica ne Dendiohs.

³ Me ndete che rica ne ne, nde hua rete Dendiohs, te ndotenan che caca ne che cochihve yahn ne ne, rica ne dehtenduh cava che cuahtechica ne vedeyeno yahn man ne, cuahtendihco ne nunde.

⁴ Nchuhn che ducherino ne Dendiohs, cuedeveno ne te che cuahtechico vo vedeyeno yahn man vo ne, racondah vedamo vo Dendiohs. Adecoduhno ihyan che nahn cochica ye vedeyeno yahn man ye ne, racondah vedame ye Dendiohs.

⁵ Ndiyu ndere ndirun nan Ndudo yahn Dendiohs tuhca: "Redin Dendiohs che quenun Vaco Ndah yahn ye uvo, te yahino ye uvo, ne nahn ye che a man no ye din yahino vo ihyan."

⁶ Andahre vahche ri yuhn vo che dinahn vo che rihquentiyon Dendiohs, ate numacuahn vedeyahino yahn ye rinan ye uvo che dinahn vo, nduhca che a ndirun tama cuan nan Ndudo yahn ye tuhca: "Dendiohs ne, rendaico ndiya ye ihyan che yade ye, ate numacuahn vedeyahino rinan ye ihyan che necun ye."

⁷ Chemin che condahco ne chedave yahn ne tah Dendiohs. Hua dinahn ne yahn chundah, ne dihya se co, cahcoman se nchuhn.

⁸ Cuah ne Dendiohs, ne conduco ye nchuhn. Nchuhn ihyan nunde man, nchuhn che tah ritahno ne Dendiohs, ne tah rahtechica ne vedeyeno yahn man ne man ne, cuihcoman ne nunde yahn ne.

⁹ Ndotenan che ama cuahte yeno ne ne, cuendedecadino ne, ne cuahte ran ne cava nunde yahn ne, cuento ino ne.

¹⁰ Cuendaico ndiya man ne nchuhn nan Dihvo vo Dendiohs, cuihcoman ne vedeyade yahn ne, ne ndeva ye nchuhn.

Hua ndahca che ndahchenan vo ihyan chenahn

¹¹ Dihno, hua ndahca che cahma yah nchuhn yahn vih. Adecoduhno ihyan che ra cuande ye tama ca ihyan, rahn yah ye yahn ye, o rendaichenan ye ihyan ne, nduco chemin ne, ducherino ye vederihquentiyon yahn Dendiohs, ne rahco ye che tahque richihve vededeveno yahn man ye. Ihyan che

ducherino ye vederihquentiyon yahn Dendiohs ne, ndotenan che dinahn ye ne, rahcotahn ye.

¹² A Dendiohs che chihco ye vederihquentiyon che va che dinahn vo, ne a ihyan min va che techecade ye yuhn vo. Ihyan min ne, co decuihno ye ihyan man, co ndedevahn ye ihyan man. Ate nchuhn ne, metah nde ama vederihquentiyon cava che ndahchenan ne vih.

Nde hua devano vo deh che cuahno co vo caviyan deman

¹³ Nchuhn che rihco cade man ne dehtenduh che din ne queri ama ro, cuihco ne cudado. ¿Taca che rihco cade ne ama ro che cahn ne tama yan, cuahtenan ne ama nduyo, din ne ntiyon?,

¹⁴ te nde hua devano ne ndete che vate ca ne nda ro min. Condihchero ne yan. Ri ro menan lihn, ne venchahte rento. Tihchan uvo, te neve ro ra chenan vo iyehnse.

¹⁵ Tahque ndah ne, cochahtino vo Dihvo vo Dendiohs, ne cahma vo: “Ndete che Dendiohs te ye vedevihche yuhn vo ne, din vo chu caviyan, ne din vo cha deman.”

¹⁶ Ate hua tihca redin nchuhn. Tahque ndah ne ne, numacuahn vedeyade rihco cade man ne dehtenduh che din ne queri ama ro. Cuedevano ne te hua ndahca che tihca redin yade ne.

¹⁷ Adecoduhno ihyan che devano ye taca che din ye che ndah ate hua redin ye ne, rendihco ye nunde nan Dendiohs.

5

Riyahve ye ihyan cuihca

¹ Nchuhn ihyan cuihca che duhtuno ihyan ne, cuihcovan ne. Cuendecadino ne, ne cuahte ran ne yahn castigo che va che co ne.

² Nducuahn vedecuihca yahn ne ne, hua cochihe cava che ndevahn ne. Codin ne cuande anduhneca ndete che a ncha man, anduhneca ndete che a nchah ndah tino ndah yahn ne man.

³ Diyahnguan yahn ne man, diyahngua yahn ne man ne, anduhneca ndete che a nihno nchah dache. Man ro cuh che a nun nto iyehnse ne, ama nedin dama ne vedecuihca, ate man vedecuihca yahn ne nuhn nchuhn che chendihco ne nunde, ne co ne castigo yahn anduhneca ndete che cuihno cuco nchuhn.

⁴ Nchuhn ne, chendihco ne nunde che nde hua renehive ne yahn ihyan chevah che redin ye ntiyon yahn ne. Ate Dendiohs, ihyan min che ama yudo vederihquentiyon yahn ye ne, nda cuande ye ihyan chahn, ne a devano ye nduhca che recah rihn ne ihyan, reduco ne yahn ye.

⁵ Nchuhn ne, ama ndahca chenan ne iyehnse cuh, vate ne vedeyeno ro ro. Nduhca ite ndata che ri dun te, che cudado reh no te nde nda ro che cahnno ihyan ite ne, tihchan nchuhn, te vatechica ne vedeyeno yahn man ne, redecuihta ne nunde yahn ne nde nda ro che co ne castigo.

⁶ Nchuhn ne, rendinun rendinahno ne ihyan che ndah ihyan ye, nde rihno ne ihyan. Nde hua retahn vahche ne, te ihyan chahn ne, necun ye, nde hua rendahconan ye yahn ne.

Nahn che cochahtino vo Dihvo vo Jesucristo, covah vo cuahn dqama

⁷ Dihno, van nducuahn che rechuhrihn nchuhn ne, quenda ne vedechahntino nde nda ro che ndaconan chi Dihvo vo Jesucristo. Codin chahtino ne nduhca che redin chahtino ihyan che a nino ye chendata yahn ye, ne chenan ino ye che co yahn.

⁸ Codin chahtino ne mañ, cuenecañ yan ne chedave yahn ne mañ, te metah condah Dihvo vo.

⁹ Dihno, hua cañma nunde ama tama ne yahn vih, cava che hua co ne castigo, te Dihvo vo, ihyan min che techecade ye yuhn vo ne, a nun ndaconan chi ye.

¹⁰ Dihno, cuendedecadino ne yahn ihyan profeta che cañdudo ye ndudo yahn Dihvo vo Dendiohs a rañn me. Cua cuande ne nduhca che quendañ ye vedechahtino vañ nducuahn che chuhrihn ye, ne cuiquendi ne yune yahn ye.

¹¹ A devano vo te ama ndah ro yahn ihyan chahn che din chahtino ye. Nchuhn ne, a devano ne nduhca che chichahtino Job Dihvo vo Dendiohs. Namin a devano ne nduhca che din yahino Dendiohs ihyan, din ye che ndah nduco ye. Chemin che ndahca che cua cuande ne yahn vedechahtino yahn ihyan chahn, quendi ne yune yahn ye.

¹² Dihno, nañ nducuahn ne, ama nahn che din ne cudado nañ che rente ne. Cuahn che cañ ne ndudo yahn ne ne, hua ndere cañma ne: "Nde muhn nde nañ Dendiohs." Hua ndere tihyon yan ne dehtenduh numacuahn vedeyudo. Codin ne cudado che hua chuhnan ne, ne cuahtendihco ne nunde, cava che hua quenan cuma che din Dendiohs castigo nchuhn. Tahque ndah ne ne, ama o no cañma ne. Nañ nducuahn che rente cade ne ne, ndete che cañma ne: "Taca hua" ne, a chemin no cañma ne. Ndete che: "Hua" ne, a chemin no tun cañma ne. Hua chuhnan ne che cañma ne.

¹³ Cuahn che rechuhrihn nchuhn ne, covah ne. Cuahn che yeno ne ne, cuita ne, cuendeva ne yavenañ Dendiohs.

¹⁴ Cuahn che cañ ne ne, covahve ne intiyahn yaco cava che covah ye cava ne, cuacotañme ye aceite nchuhn, cuah ye Dihvo vo Jesucristo che din ye che ndoyahn ne.

¹⁵ Cuahn che covah ne ne, nahn che cotahno ne che conahn che caça ne, ne din Dendiohs che ndoyahn ne, nchahco ye nunde yahn ne.

¹⁶ Conaca ne che nchahco nunde vih, ne covah ne cava che din Dendiohs che ndoyahn ne. Cuedevano ne te ihyan che ndah ihyan ye nañ Dendiohs ne, redinahn Dendiohs deh che rica ye numa ino ye.

¹⁷ Cuenecañco ne ihyan profeta Elias. Ihyan min ne, ihyan iyehñse nduhca uvo. Ate cuahn che chica ye Dendiohs che hua cuan co ne, hua chan chete ino nduyo quenan mañ.

¹⁸ Chihno min ne, covah tun ye, chica Dendiohs che cuan co, ne chan, ne ndaconan chi chendata.

¹⁹⁻²⁰ Dihno, ndete che vate dihno vo che cuacondañ vedame ye Ndudo ndah yahn Dendiohs, cuahtendihco ye nunde ne, cuedevano ne te ndete che yahve ne ihyan, din ne che ndonun yune ye, ndaconan quendi ye vederihquentiyon yahn Dendiohs ne, nchahco Dendiohs nducuahn nunde yahn ye, ndedevahn ye ihyan.

ÇAÇA CHE DIRUN SAN PEDRO MENAN

¹ U Pedro, apóstol yahn Dihvo vo Jesucristo, dechúh çaça cuh yahn nchuhn che vate ne yan vaco ihyan, yahn yahn Ponto man, Galacia man, Capadocia man, Asia man, Bitinia man.

² Man Dendiohs Chida tendahnun ye nchuhn, chihco vih Vaco Ndah yahn ye nchuhn, çaça che nevahnecon ne Dihvo vo Jesucristo, ndevahn ne yahn che chera yun yahn ye çaça ne.

Ricá Dendiohs che ama din yahino ye nchuhn, din ye che ama ndahca cuahtenan ne.

³ Ndeva vo yavenan Dendiohs, Chida Dihvo vo Jesucristo, te ama din yahino ye uvo, ne din ye che ndo vo anduhneca ihyan ra, ntihton cuaco ye vederendecadino yuhn vo. Cuahn che ndedetuhche ye Dihvo vo Jesucristo van tenahn ne, ndahcorun ye nducuahñ çaça che ndah yuhn vo. Man ne, ndichahtino vo che ndeva ye uvo, ne metah nde ama nan dehtenduh che co din che hua conahn.

⁴ A va cade che cuahtenan vo vahchetero numacuahn ro, ne chemin ne, anduhneca ama vedecuihca che hua nda ro che cuihno. A man Dendiohs din ye che conahn.

⁵ Nchuhn ne, ritahno ne Dendiohs, ne numacuahn vederihquentiyon yahn ye redin ye cudado nchuhn çaça che ndeva ye nchuhn nda ro che cuihno iehñse.

⁶ Chemin che vate nchuhn vedeyeno andahre ama ndeh nan dehtenduh che rahno ri ne man ro cuh. Che rechuhrihn ne ne, neve ro no chemin.

⁷ Ate va che chuhrihn ne çaça che cuhnde ro che numa cuaco ritahno ne Dendiohs. Ndete che numa cuaco ritahno ne ihyan ne, ndeva ye nchuhn, quendah yavenan ne ro che nda Dihvo vo Jesucristo. Diyahnguan ne, hua rengu cuahn dama, ate retive ihyan yahn, rendedevihne ye, rendihchenan ye ndete che ndah. Me nchuhn che ritahno ne Dendiohs ne, tahque redin yahn che ndihchenan ye ndete che numa cuaco ritahno ne.

⁸ Dihvo vo Jesucristo ne, andahre hua rendihchero nchuhn ihyan, ate yahino ne ihyan, ritahno ne ihyan, ne chemin che ama yeno ne.

⁹ Nducote ritahno ne ihyan ne, quenan cuma che cuahtenan ne vahchetero numacuahn ro.

¹⁰ Ihyan profeta che chahte ye a rahñ me ne, cahndudo ye che ndedevahn Dendiohs nchuhn, ne ama ndiquendi ye nduco cudado, nahn cadino ndah ye yahn.

¹¹ Vaco Dihvo vo Jesucristo ne, quenun ihyan chahn, din che cahndudo ye yahn dehtenduh che va che chuhrihn Dihvo vo man, yahn vederihquentiyon chahte che ndonda tah ye cuihno min man. Hua chenán chenahn ihyan chahn, ne chemin che ndiquendi ye, nahn cadino ye duh ihyan min man, ticuahn conahn man.

¹² Cah Dendiohs, checadino ihyan chahn che ndudo che cahndudo ye ne, ndiyu çaça che ndah yahn man ye, te che ndah yuhn vo. Man ne, ihyan che rahndudo ye ndudo ndah yahn Dihvo vo Jesucristo ne, numacuahn vederihquentiyon yahn Vaco Ndah yahn Dendiohs che dechuh ye ne, a cahndudo ye ndudo min che dirun ihyan profeta chahn, chihnevan nchuhn. Yahn ndudo min ne, nde ángel che vate ye vahchetero, nahn tumacadino ye.

Nahn Dendiohs che runecade cuahtechica ihyan yahn ye

¹³ Nducote nedin yahn Dendiohs nchuhn ne, nahn che cuahteyan nchuhn man, nahn che runecade cuahtechica ne man, nahn che quendi ne numa ino

ne cochahtino ne che ndeva Dendiohs nchuhn ro che nda Dihvo vo Jesucristo man.

¹⁴ Codinahn ne yahn Dendiohs, ne hua quendi ne cuahtechica ne nduhca che a chahtechica ne ro menan cuahn che metah cahnevan ne Ndudo yahn ye.

¹⁵ Tahque ndah ne, runecade cuahtechica ne, te Dendiohs che nedin yahn ye nchuhn, ndiyu ndere ihyan. Tihca nahn che din ne,

¹⁶ te nan Ndudo yahn Dendiohs ndirun tuhca: “Hua ndere cuahtechica nchuhn, cuahtendiho ne nunde, te u ne, ndiyu ihyan nunde u.”

¹⁷ Dendiohs ne, numa cuaco retechecade ye tunoca che nedin ihyan. Nducote renevahnecon ne ihyan, rahn ne te Chida ne ihyan cuahn che revah ne ne, nahn che quendi ne nevahnecon ne ihyan numacuahn ro che cuahtenan ne iyehkse.

¹⁸ A devano ne te ro menan me ne, quendi ne costumbre che nde hua cochihve, che chihco ihyan ndico yahn ne, ate a ndedevahn Dendiohs nchuhn yahn nducuahn chemin. A ndevahn ne, ndiyu nduco dehtenduh che riho nduhca diyahnguan o diyahngua,

¹⁹ te ndevahn ne nduco yun yahn Dihvo vo Jesucristo, ihyan min che chihco mendahn ye ihyan nduhca ama itecuche lihne che hua dehva niyahn te, chi te vedino cava nunde yahn ihyan.

²⁰ Nde ro che metah cuhnde iyehkse ne, a va cade che tihca cuahno co Dihvo vo, ne chinahn nde man ro cuh cava che ndah yahn nchuhn.

²¹ A cava Dihvo vo Jesucristo che ritahno nchuhn Dendiohs, ihyan min che ndedetuhche ye Dihvo vo van tenahn, ne ndahco ye vederihquentiyon chahte tah ye. Man ne, a Dendiohs che vedechahtino yahn ne, chenan ino ne che ndeva ye nchuhn.

²² Din Vaco Ndah yahn Dendiohs che nevahnecon nchuhn Ndudo yahn Dendiohs, ndo ne ihyan runecade. Numa cuaco redin yahino vih ne, ne nahn che quendi ne numa ino ne din yahino vih ne.

²³ A Dendiohs din ye che ndo ne ihyan ra, anduhneca ndete che quenuma ra chahteyan ne. A nduco Ndudo yahn ye chihco vih ye nchuhn cava che cuahtenan ne vahchetero numacuahn ro, ne Ndudo yahn ye ne, hua nda ro che cuihno.

²⁴ Nan Ndudo yahn Dendiohs a ndirun tuhca:
Nducoyaca ihyan iyehkse ne, anduhneca chano, te hua rengu ye,
ne vederihquentiyon yahn ye ne, anduhneca nanda, te riho.
Chano ne, retih, ne nanda ne, ra;

²⁵ ate Ndudo yahn Dihvo vo Dendiohs ne, hua nda ro che cuihno. Ndudo min ne, a Ndudo Ndah yahn Dihvo vo Jesucristo che cahndudo ihyan, chihnevan nchuhn.

2

¹ Chemin che nahn che hua ndere cuahtechica nchuhn, din ne dehtenduh che chihnga. Hua cahnceh ne man, hua din o nan o chende ne man, hua din ve ne man, hua nte ne ndudo cuahnde man.

² Nduhca decuah yuno che ama nahn cuh leche cava che cuihta ne, tihca codin nun ino nchuhn, cahcovan ne Ndudo yahn Dendiohs, te nahn che conahn ndah ne man, cochahtino ne man, cava che ndevahn ne.

³ Tihca, te a tumacadino ne che Dihvo vo Dendiohs ne, ama quenana cuma ye vedeyahino cava ne.

⁴ Cuinevahnecon nchuhn Dihvo vo Jesucristo, ihyan min che redin ye che cuahtenan ne vahchetero numacuahn ro. Anduhneca ama tu che chacondah vedame sahn vihcherahto ro menan, ne adive tumacadino se che

tu min che tahque cochihve çava name yahn vah che rihno se ne, tihça ihyan min, te a chihco vih Dendiohs ihyan çava che ndeva ihyan iyehñse yaveñan ye.

⁵ Nduhça che retendahnun sahn vihcherahto tu che rahto se ama yaco ne, tihça çah yune nchuhn che nedin dama Dendiohs nchuhn çava che conun Vaco Ndah yahn ye nchuhn, ne ndo ne anduhneca chidocuyan ndah, din ne ntiyon yahn ye numacuahn vederihquentiyon yahn Dihvo vo Jesucristo.

⁶ Nan Ndudo yahn Dendiohs ne, a ndirun tuhça:

U ne, chihco vih ama ihyan che co ye anduhneca ama tu ndah che tendahnun sahn vihcherahto che co esquina yahn name yahn yaco van ihyan naciön yahn Israel.

Nducoyaca ihyan che cotahno ye ihyan min ne, quendañ yaveñan ye.

⁷ Nchuhn che ritahno ne ihyan min ne, ama yahino ne ihyan, ate ihyan che hua ritahno ye ihyan ne, conahn nduco ye nduhça che a ndirun nan Ndudo yahn Dendiohs tuhça:

Ihyan min ne, conahn nduco ye nduhça che chinahn nduco tu che chahcondah vedame sahn vihcherahto menañ, te tu min che tahque chichihve adive.

⁸ Namin ndirun nan Ndudo yahn ye tama cuan tuhça:

Ihyan min ne, co ye nduhça ama tu che renda çah ihyan man, che redin che rendave ye man.

Tihça, te ihyan che hua chitahno ye ndudo ndah yahn Dihvo vo Jesucristo ne, a chinda ye nduhça che a nihnde cade yahn ye.

Ihyan yahn Dendiohs

⁹ Nchuhn ne, a ndihco vih Dendiohs nchuhn, a ndo ne anduhneca ihyan naciön yahn Israel. A ndo ne anduhneca chidocuyan, rendeva ne yaveñan Dihvo vo Jesucristo, ihyan min che ndinañ ye yahn ne. A tendahnun Dendiohs nchuhn che co ne ihyan yahn ye çava che cuahndudo ne yahn vederihno rahte che din ye nduco ne. Ro menañ me ne, anduhneca ndete che ntude ndutiñan ne, ate din ye che chenahn ne ndudo ndah yahn ye.

¹⁰ Ro menañ me ne, hua ndi cuande ne van ihyan yahn ye, ate man ne, a nedin yahn ye nchuhn. Ro menañ me ne, vatemañ ne, metah duñ che quenañ vahino nchuhn, ate man ne, renañ vahino ye nchuhn.

¹¹ Dihno che yahino nchuhn, che vate ne yan vaco ihyan, ricá nchuhn che hua ndere cuahtechica ne, cuahtendiho ne nunde, te chemin redin che rinda ihyan.

¹² Runecade cuahtechica ne van ihyan che hua renevahnecun ye Dendiohs çava che nduco tihça ne, andahre rañ ye yahn nchuhn che duhtuno ihyan ne, ate ndihchero ye che runecade vatechica ne, ne ndeva ye yaveñan Dendiohs nda ro che techecade ye yahn nducoyaca ihyan.

¹³ Çava che quendañ yaveñan Dihvo vo Jesucristo ne, codinahn ne yahn ihyan ndinañ che rihquentiyon ye muñ iyehñse, emperador che tahque yudo vederihquentiyon yahn ye man,

¹⁴ sahn ndinañ che rinan se ihyan man. Sahn chahn ne, redechuh ye çava che din se castigo sahn che chendiho nunde, ne redin se cudado ihyan che ndah ihyan ye.

¹⁵ Tihça nahn che din nchuhn, te nahn Dendiohs che runecade cuahtechica ne çava che nduco tihça ne, nde nan che çahma ihyan tundo metah.

¹⁶ Man ne, metah rihquentiyon nunde yahn ne nchuhn, te a ndevahn Dendiohs nchuhn. Chemin che nahn che runecade cuahtechica ne. Hua ndedecadino ne che nducote a ndevahn Dendiohs nchuhn ne, co

ndere cuahtechica ne, cuahtendihco ne nunde. Tahque ndah ne, runecade cuahtechica ne nduhca che rihquentiyon Dendiohs.

¹⁷ Cuenevahnecon ne Dendiohs. Cuenevahnecon ne emperador Cuenevahnecon ne queri ama ihyan. Cuahtenan cuma ne vedeyahino van man ne nduco vih che ritahno ne Dihvo vo Jesucristo.

Nduhca che va che chuhrihn ihyan che ritahno ye Dihvo vo Jesucristo

¹⁸ Nchuhn che redin ne ntiyon yahn ihyan ne, numacuahn vedenecon codinahn ne yahn ihyan che redin nduco ne ntiyon, a ndah ihyan ye, o duhtuno ihyan ye.

¹⁹ Andahre rechuhrihn ne, ndere redin tan ihyan nduco ne, ate ndete redin chahtino ne yahn che renevahnecon ne Dendiohs ne, quendañ yavenañ ne.

²⁰ Tihca, te ndete che quendañ ne vedechahtino cuahn che co nchuhn castigo yahn che chendihco ne nunde ne, nde hua cochihve yahn ne. Ate ndete che quendañ ne vedechahtino cuahn che ndere redin ihyan castigo nchuhn yahn dehtenduh che ndah che redin ne ne, tuhme che cuaco quendañ yavenañ ne nan Dendiohs.

²¹ Tihca va che din chahtino nchuhn, te a cava chemin che tendahnun Dendiohs nchuhn. Dihvo vo Jesucristo ne, chuhrihn ye cava nchuhn, ne tihyon yune ye nchuhn che quendi ne yune yahn ye.

²² Ihyan min ne, hua ndere quechica ye, quendihco ye nunde, nde hua chihñcheh ye nde ama ihyan.

²³ Cuahn che rahva ihyan nduco ye ne, hua ndahconan ye ndudo tan. Cuahn che redin tan ihyan nduco ye ne, quendañ ye vedechahtino, ne ndahco ye nducuahn che redin ye tah Dendiohs, ihyan min che retechecade ye numa cuaco.

²⁴ A man Dihvo vo Jesucristo chuhrihn ye, quenah yah ye nan cruz, nedihve ye nunde yuhn vo, cava che cahcoman vo nunde yuhn vo, ne runecade cuahtechico vo. Chih ye cava che ndedevahn ye uvo,

²⁵ te ro menañ me ne, vatechica vane vo anduhneca itecuche che chinda te, ate man ne, nevahnecon vo Dihvo vo Jesucristo, ihyan min che redin ye cudado uvo nduhca ihyan che redin ye cudado itecuche yahn ye.

3

Nduhca che va che cuahtenan ihyan che nihnevaco ye nduco vih

¹⁻² Nchuhn ihyan ndahta che nihnevaco ne ne, cuenevahnecon ne inchahn ne. Nduco tihca ne, andahre hua rihcovan inchahn ne ndudo ndah yahn Dihvo vo Jesucristo, ate tumacadino ye che runecade ne man, necun ne man, ne nevahnecon ye ndudo min, nde hua ndotenan che yahve ne ihyan.

³ Ndiyu demañ che ama ndedecuco ne tin ne man, ndedecuco ne nchuhn nduco diyahnguan man, cuahtenan ne tino che ama ndahchan man.

⁴ Che tahque nahn ne, che cuahtenan cuma ne vedenecon, te chemin che ama richihve nan Dendiohs.

⁵ Ihyan ndahta che chahte ye a rahn me, che ndah ihyan ye man, che chichahtino ye Dendiohs man ne, tihca chahtenan cuma ye vedenecon, ne dinahn ye yahn inchahn ye.

⁶ Nduhca Sara che nevahnecon ye inchahn ye Abraham, ne rahn ye che dihve ye ihyan. Me nchuhn ne, quendi ne yune yahn ye ndete che runecade ne man, cochahino ne Dendiohs, ndahco ne nducuahn tah ye man.

⁷ Namin nchuhn ihyan chahn che nihnevaco ne ne, cuahtenan cuma ne ihyan ndahta yahn ne nduco vedino vedenecon, te a devano ne te hua dama

fuerza yahn ye nduco ne. Tihc̄a va che din ne, te namin ndeva Dendiohs ihyan chahn dama nduco ne. Ndete che hua dinahn ne tihc̄a ne, nde hua nguahco yahn che revah ne.

Ihyan che ritahno ye Dihvo vo Jesucristo ne, ndere redin tan ihyan nduco ye yahn che redin ye dehtenduh che ndah

⁸ Man ne, rahn rí nducoyaca nchuhn che ama no vederendedecadino cuahtenan cuma ne nduco vih. Cuenevahneceun ne vih numacuahn vedino vedeneceun. Codin yahino ama tama ne vih.

⁹ Hua dama co ne nduco ihyan che redin tan ye nduco ne. Hua dama co ne nduco ihyan che retahn nan ye nchuhn. Tahque ndah ne, codin ne che ndah nduco ye, te cuahn che tendahnun Dendiohs nchuhn ne, nte ye ndudo yahn ye che din ye che ndah nduco ne.

¹⁰ Tihc̄a, te nan Ndudo yahn Dendiohs ne, a ndirun tuhca:

Ihyan che nahn ye che ndahca cuahtenan ye iyehñse ne, nahn che hua ndere cahma ye ndudo tan man, ndudo cuahnde man.

¹¹ Nahn che cahcoman ye nducuahn che chihnga, ne din ye che ndah man, nahn che ndahca cuahtenan ye nduco ihyan chenahn, hua cuahte canda ye man.

¹² Tihc̄a, te Dihvo vo Dendiohs ne, nda cuande ye ihyan che ndah ihyan ye, ne rihcovan ye che revah ye.

Ate ihyan che duhtuno ihyan ye ne, redin ye castigo ihyan.

¹³ Ndete che din nchuhn che ndah ne, nde ama ihyan hua ndahco ndiya ye nchuhn.

¹⁴ Andahre din tan ihyan nduco ne yahn che redin ne che ndah, ate ndah ro yahn ne. Hua cua ne cudado, hua din vah ne nde ama ihyan.

¹⁵ Cuende va ne yavenan Dihvo vo Jesucristo numacuahn chedave yahn ne, codinahn ne yahn ye. Cuahteyan nchuhn cava che numacuahn vedino vedeneceun cah cuande ne adecoduhno ihyan che tumerune ye nchuhn yahn che chenano ne che ndeva Dendiohs nchuhn.

¹⁶ Hua cuahtenun ino nchuhn vedetan nduco nde ama ihyan, cava che ihyan che chihnga rahn ye yahn nchuhn ne, tumacadino ye che runecade vatechica ne, ritahno ne Dihvo vo Jesucristo, ne co cuihnan ye che tihca rahn ye.

¹⁷ Tahque ndah che chuhrihn vo, din tan ihyan nduco vo yahn che din vo dehtenduh che ndah ndete che tihca nahn Dendiohs, che co che chuhrihn vo, din tan ihyan nduco vo yahn che din vo dehtenduh che hua ndah.

¹⁸ Tihc̄a, te nde man Dihvo vo Jesucristo chih ye, nedihve ye ama yune no nducuahn nunde yuhn vo. Ihyan min ne, metah nde ama nunde yahn ye, ate chih ye cava che, uvo che chendihco vo nunde ne, ndo yan Dendiohs nduco vo, ne nedin yahn ye uvo. Ihyan iyehñse ne, chihno ye ihyan, ate ndeva Dendiohs ihyan.

¹⁹ Numanahn che metah ntuche ye ne, chahn ye cahndudo ye ndudo yahn ye, chihnevan vaco tenahn che chenano rino ye che co ye castigo.

²⁰ Ihyan chahn che chahcotahn ye yahn Dendiohs a rahn me, ro che quenano Noé iyehñse. Ro min numanahn che chindah arca me ne, numacuahn vedechahtino quenano rino Dendiohs che nto ino ye nunde yahn ye. Ate hua nto ino ye, ne atenan nine ihyan che ndevahn ye van nune.

²¹ Nune min ne, ama ejemplo yahn che rededenune ihyan man ro cuh. Nduhca che ndevahn neve ihyan chahn nan nune ne, tihca ndevahn ihyan che rededenune ye man ro cuh. Ihyan ne, redenune ye, ndiyu cava che ndere ndo dave ye, te redenunde ye yahn che a ndaca ye vederenchahco,

ne nduco tihça rah ye Dendiohs, richahtino ye ihyan. Ihyan che redenune ye ne, ndevahn ye yahn che ntuche Dihvo vo Jesucristo,

²² Ihyan min che conda ye vahchetero, ne va ye lado tah cuaco Dendiohs, rihquentiyon ye ángel man, nducuahn vederihquentiyon che va iyehñse man.

4

Nahn che din yahino ama tama vo vih

¹ Nducote chuhrihn Dihvo vo Jesucristo, quenan yah ye nan cruz ne, codin nchuhn cuande anduhneça ndete che a man nchuhn chih ne, çava che nduco tihça ne, metah che quendi ne cuahtendihco ne nunde.

² Tahque ndah ne, numacuahn ro che cuahtenan ca ne iyehñse ne, cuahtechica ne nduhça che nahn Dendiohs, ndiyu nduhça che nahn man ne.

³ A co ngua nchuhn nduhça che chahtechica ne ro menan me. Dama chi ne nduco ihyan che hua ritahno ye Dendiohs, chahtechica ne vedeyeno yahn man ne, chahtendihco ne nunde. Chicoh ne man, chahte ne vihco vedecoh man, chihnga din ne, ndeva ne yavenan dehtenduh che ndere redin ihyan dendiohs yahn ye man.

⁴ Ihyan chahn ne, ri yudo yahn ye che ametah dama ri ne nduco ye, ndere cuahtechica ne, ne chemin che chihnga rahn ye yahn ne.

⁵ Ate va che cuhnde çade yahn ye nan Dihvo vo Jesucristo, ihyan min che a va yan ye che techecade ye yahn nducoyaça ihyan, ihyan che chenduche ye man, tenahn man.

⁶ Chemin che tenahn chahn ne, namin cahndudo ihyan ndudo ndah yahn Dihvo vo Jesucristo, chihnevan ye, çava che andahre va che cuhnde çade yahn ye nduhça nducoyaça ihyan chenahn, a metah va che conda ye, te co ndeva Dendiohs ihyan, cuahtenan ye vahchetero numacuahn ro.

⁷ A cochi nino ro che nto iyehñse. Chemin che nahn che runecade cuahtechica nchuhn man, covah ne man.

⁸ Che tahque nahn ne, che cuahtenan cuma ne vedeyahino nduco vih, te ndete che tihça din ne ne, andahre ama ndeh yune cuahtendihco ne nunde nan vih ne, co nchahco ama tama ne yahn vih.

⁹ Numacuahn chedave yahn ne cuenevahñecun ama tama ne vih ndevaco ne.

¹⁰ Ama ndeh nan vederihquentiyon nte Dendiohs nchuhn, ne nahn che runecade conan cuma queri ama nchuhn vederihquentiyon che nte ye nchuhn, codin ne che cochihve çava che ndah yahn ihyan chenahn.

¹¹ Nchuhn che chenah cuma ne vederihquentiyon che cuahndudo ne Ndudo yahn Dendiohs ne, cuahndudo ne Ndudo yahn ye nduhça che redin yahn. Nchuhn che chenah cuma ne vederihquentiyon che conan ne ihyan chenahn ne, cuinan ne ihyan numacuahn vederihquentiyon yahn Dendiohs. Nan nducuahn ntiyon che redin ne yahn che ritahno ne Dihvo vo Jesucristo ne, codin nun ino ne che quendah yavenan Dendiohs. Dihvo vo ne, quenah cuma ye vederihquentiyon chahte numacuahn ro, ne redin yahn che ndeva vo yavenan ye cuahn dama. Tihça co.

Nahn che cuahtenan cumo vo vedechahtino

¹² Dihno che yahino nchuhn, hua çahn ino ne yahn che ama rechuhrihn ne, rendihchenan Dendiohs nchuhn, ndedecadino ne deh cuande che tihça rahno ne.

¹³ Tahque ndah ne, cueneçah yan ne chedave yahn ne cuahn che rechuhrihn ne nduhça che chuhrihn Dihvo vo Jesucristo, te ndete che

tihça din ne ne, namin co yeno ne cuahn che ndaconan ye numacuahn vederihquentiyon chahte yahn ye.

¹⁴ Ndete che din tan ihyan nduco ne yahn che ritahno ne Dihvo vo ne, ama ndah ro yahn ne, te a ndero ndi che quenun Vaco Dendiohs nchuhn numacuahn vederihquentiyon yahn.

¹⁵⁻¹⁶ Ndete che chuhrihn ne, din tan ihyan nduco ne yahn che ritahno ne Dihvo vo ne, hua co cuihnan ne. Tahque ndah ne, cuiquendi ne cochahtino ne ihyan cava che quendañ yavenan Dendiohs. Ate hua cahno ne ihyan man, hua duco ne man, hua cuahtendihco ne tama nan nunde man, hua conda mendahn ne nan dehtenduh che redin ihyan man, te hua ndahça che tihça din ne, co ne castigo, chuhrihn ne.

¹⁷ A cochi nino ro che cuhnde cade yahn nducoyaca ihyan iyehñse. Nducote cuanan nduco uvo ihyan yahn Dendiohs ne, nde tahque chuhrihn ihyan che hua rihcovan ye ndudo ndah yahn ye.

¹⁸ Tihça, nduhça che a ndirun nan Ndudo yahn Dendiohs tuhça: Nducote ihyan che ndah ihyan ye a conunde co ndevahn ye ne, ihyan che duhtuno ihyan ye ne, a va che conda ye.

¹⁹ Chemin che ndete che rechuhrihn ne, redin tan ihyan nduco ne yahn che runecade vatechica ne nduhça che nahn Dendiohs ne, cuiquendi ne runecade cuahtechica ne, condahco ne nducuañ tah Dendiohs, ihyan min che dendah ye iyehñse man, redinahn ye ndudo yahn ye man.

5

Ihyan ndinan yahn yaco ne, va che din ye cudado ihyan yahn Dendiohs

¹ Nchuhn, ihyan ndinan che nda cuande ne ihyan ndiyaco, riyahvé nchuhn, te namin u ne, quenun cumá vederihquentiyon min, ne ndihchero man che quenun yah Dihvo vo Jesucristo man, che ndonda tah ye vederihquentiyon chahte nduhça che conan cuma ye ro che ndaconan chi tun ye man.

² Nduhça ihyan che redin ye cudado itecuche yahn ye ne, tihça codin nchuhn cudado ihyan yahn Dendiohs che nda cuande ne. Codin ne ntiyon min numacuahn vedeyeno, ndiyu nduco fuerza, nde huane cava tume.

³ Hua condinun condinahno ne ihyan chahn che nda cuande ne. Tahque ndah ne, runecade cuahtechica ne, cotihyon yune ne ihyan cava che tihça quendi ye.

⁴ Nduco tihça ne, cuahn che nda Dihvo vo Jesucristo, ihyan min che ndinan ye yahn ihyan yahn Dendiohs, redin ye cudado ihyan ne, ndeva ye nchuhn, quendañ yavenan ne, cuahtenan ne nduco ye numacuahn ro.

⁵ Namin nchuhn sahn decahya, cuenevahñecun ne ihyan ndinan che nda cuande ye ihyan ndiyaco. Nducoyaca nchuhn che ritahno ne Dihvo vo Jesucristo, numacuahn vedino vedeneñcun codinahn ama tama ne yahn vih, te a ndirun nan Ndudo yahn Dendiohs tuhça:

Dendiohs ne, rendahco ndiya ye ihyan che yade ye, ate numacuahn vedeyahino rinan ye ihyan che necun ye.

⁶ Chemin che condahco ndiya man ne nchuhn nan Dendiohs, ihyan min che ama yudo vederihquentiyon quenun cuma ye, cava che ndeva ye nchuhn nda ro che cuhnde cade yahn ihyan iyehñse.

⁷ Hua cua nchuhn cudado. Tahque ndah ne condahco ne nducuañ tah Dendiohs, te ihyan min ne, redin ye cudado nchuhn.

⁸ Cuahteyan nchuhn, te chundah, sahn min che hua ri rendihche se nchuhn ne, quechica se numachahte, rinuhn se ihyan che co din se che

conda ye. Sahn min ne, nde tahque duhtuno se che co ama yahyan tan che rinuhn te ihyan che cheh te.

⁹ Cuiquendi ne numa ino ne cochahtino ne Dihvo vo Jesucristo, ne hua tumacah ne yahn se, te a devano ne te numa chahte iyehanse recah rihn se ihyan yahn Dendiohs.

¹⁰ Cuihno che a nchuhrihn nchuhn neve ro ne, Dendiohs, ihyan min che quenan cuma ye vedeyahino chahte, ne a tendahnun ye nchuhn cava che cotahno ne Dihvo vo Jesucristo, cuahtenan ne vahchetero numacuahn ro ne, man ye cah dito ye nchuhn, din ye che quendah ndah ne, quendi ne numa ino ne yune yahn ye.

¹¹ Ihyan min ne, quenan cuma ye vederihquentiyon chahte numacuahn ro, ne redin yahn che ndeva vo yavenan ye cuahn dama. Tihca co.

¹² Dirun neve ndudo yahn nchuhn, dechuh caca cuh nduco dihno vo Silvano, sahn min che quenan ino che co cochahtino nchuhn che cahma se. Che dirun yahn ne ne, riyahve nchuhn numa cuaco yahn vedeyahino che quenan cuma Dendiohs nduco ne. Cochahtino ne ihyan min.

¹³ Ihyan ndiyaco che vate ye yan che rahn ihyan Babilonia yahn, che tendahnun Dendiohs ihyan nduhca nchuhn ne, dechuh ye Dendiohs yahn ne. Marcos, sahn min che nduhca dayá rihnó sahn, namin dechuh se Dendiohs yahn ne.

¹⁴ Numacuahn vedeyahino cuenecah ama tama nchuhn Dendiohs vih che cuande yahn.

Rica Dendiohs che din ye che ndahca cuahtenan nducoyaca nchuhn che ritahno ne Dihvo vo Jesucristo. Tihca co.

ÇAÇA CHE DIRUN SAN PEDRO ADIVE

¹ U Simón Pedro, apóstol yahn Dihvo vo Jesucristo, dechúh çaça cuh yahn nchuhn che numa çaço din Dendiohs yuhn vo man, Dihvo vo Jesucristo man, che chitahno ne nduhça nuhn. Che chitahno ne ne, ama ndahça çaça ne.

² Ricá Dendiohs che ama din yahino ye nchuhn, din ye che ama ndahça cuahtenan ne. Ricá ihyan che din ye che, nduco vededevano yahn ye man, yahn Dihvo vo Jesucristo man, che chenan cuma ne ne, tumacadino ne che a ihyan min che redin ye che ndah nduco ne.

Nduhça che nahn che cuahtechica ihyan yahn Dendiohs

³ Numacuahn vederihquentiyon yahn Dendiohs din Dihvo vo nducuahn che nahn çaça che runecáde co cuahtechico vo iyehñse man, co cuahtenan vo vahchetero numacuahn ro man. Din ye che checadino vo yahn Dendiohs, ihyan min che numacuahn vederihquentiyon chahte yahn ye tendahnun ye uvo,

⁴ ne çaç ye ndudo yahn ye che ama rigonun chihve çavo vo. Che dinahn nchuhn ndudo min ne, ndevahn ne, metah che quendí ne vedeyeno yahn man ne, cuahtendihco ne nunde, ne ndo ne ihyan ndah nduhça man ye.

⁵⁻⁷ Chemin che nducote ritahno ne ne, nahn che runecáde cuahtechica ne man, nahn che tahque chahte co vededevano yahn ne man, nahn che din cheche ino ne çaça che hua ndere cuahtechica ne, cuahtendihco ne nunde man, nahn che cuahtenan cuma ne vedechahtino man, vedeyahino man, nahn che din yahino ama tama ne vih man.

⁸ Me ndete che tihça din nchuhn numacuahn chedave yahn ne ne, nde tahque conahn ndah ne vederihquentiyon yahn Dihvo vo Jesucristo.

⁹ Me ndete che hua tihça din ne ne, anduhñeça ndete che ve ndutinan man, anduhñeça ndete che a chinan ne che a nchahco Dihvo vo Jesucristo nunde che chahtendihco ne ro menan man.

¹⁰ Dihno, chemin che nde tahque redin yahn che cuahtenan ino ne che a tendahnun Dendiohs nchuhn, nedin yahn ye nchuhn, te ndete che tihça din ne ne, hua nda ro che conda ne,

¹¹ ne numacuahn vedeyeno ndeva ye nchuhn, cuahtenan ne numacuahn ro nan che rihquentiyon Dihvo vo Jesucristo, ihyan min che ndedevahn ye uvo.

¹² Chemin che andahre a devano nchuhn dehtenduh chemin chan, ne riquendi ne numa ino ne Ndudo yahn Dendiohs che va tah ne, ate quendí ntihyon yan yahn.

¹³ Rahco che redin yahn che quendí yahvé nchuhn numanahn che quenán iyehñse,

¹⁴ te a te Dihvo vo Jesucristo, checadino che a nun va che cóh.

¹⁵ Namin redirún yahn ne çaça che cuahn che ndaca iyehñse cuh ne, hua conan ne dehtenduh che tuhchan, ntihyon yan ne adecodehno ura.

Vederihquentiyon chahte che ndondq tah Dihvo vo Jesucristo

¹⁶ Yahn vederihquentiyon chahte yahn Dihvo vo Jesucristo man, yahn che va che ndaconan chi tun ye man, che a chicuahn nuhn nchuhn ne, ndiyu ndere cuento che ndedecadino man nuhn çaça che cahñchey nuhn ihyan, te man nuhn ndihchero nuhn vederihquentiyon chahte yahn ye.

¹⁷ Cuahn che ndeva Dendiohs Chida yavenan ye, chihco ro ye vederihquentiyon chahte che ndahco ye tah ye ne, rahn ye numacuahn vederihquentiyon yahn ye: "Ihyan cuh che Dayá. Yahinó ihyan. Ama yenó cava ye."

¹⁸ Nduco nuhn ihyan cuahn che chahn ye tin ico me nan che ndo diyahn ye, ne a man nuhn chihnevan nuhn ndudo min che rahn Dendiohs nde vahchetero.

¹⁹ Chemin che nde tahque richahtino nuhn ndudo che dirun ihyan profeta che chahte ye a rahn me. Nchuhn ne, ndahca redin ne che rihcovan ne ndudo min, te anduhca ama yahn che riche, rendihco dave nan che man nde nda ro che ndaconan chi tun Dihvo vo Jesucristo. Tahn min ne, anduhneca cuahn che a cochi ri dave, cuahn che quendañ yuhdo chahte, ne ama co yeno nchuhn.

²⁰ Menan vihca cuedevano nchuhn te nde ama ihyan ne, hua co conahn ye nduco vederendecadino yahn man ye Ndudo yahn Dendiohs che dirun ihyan profeta yahn dehtenduh che va che co,

²¹ te man ihyan profeta chahn ne, hua cahndudo ye nduco vederendecadino yahn man ye. A Vaco Ndah yahn Dendiohs din che cahndudo ye.

2

Sahn rihncheh

¹ Van ihyan nación yahn Israel ne, namin chahte sahn rihncheh che redin ca se che profeta se. Namin van nchuhn ne quendañ sahn che numacuahn vederihncheh cacuahn se ndudo che din che conda ihyan. Cuacondañ vedame se Dihvo vo Jesucristo, ihyan min che chih ye cava nunde yahn nducoyaco vo, nde cava nunde yahn sahn chahn, ne yahn chemin che a denan co se castigo.

² Ama yahn ihyan dama co ye nduco se, ndere cuahtechica ye, cuahtendihco ye nunde, ne chemin din che ndaca yune che chihnga cahma ihyan yahn ndudo ndah yahn Dihvo vo.

³ Nducote ama idihya se, nahn yahn se tume ne, numacuahn vederihncheh cuahndudo se, tico se tume yahn ne. Nde a rahn me ne, a va cade che din Dendiohs castigo sahn.

⁴ Va che co se castigo, te nde yahn ángel che chahtendihco ye nunde, hua nchahco Dendiohs yahn ye, dechuh ye ihyan van ruchiyahn, quechiche cadena ihyan, cuahtenun ye van man van rahn nde nda ro che techecade ye yahn ihyan iyehñse.

⁵ Atihnoca hua nchahco Dendiohs yahn ihyan nunde che chahte ye a rahn me. Din ye che chan co nahn nde chito nune iyehñse, ne chihno chih nducoyaca ye. Noé, ihyan min che cahndudo ye che runecade cuahtechica ihyan nduhca che nahn Dendiohs, atenan ihyan min nduco te ndache ihyan ndedevahn Dendiohs.

⁶ Atihnoca decuihno Dendiohs ihyan nunde che vate ye yan Sodoma man, yan Gomorra man, din ye che chiche yan chahn nde chihno ndo iya, cava che cah ye, checadino ihyan nunde che cuahte ye adiva che namin va che co ye castigo.

⁷⁻⁸ Ate ndedevahn ye Lot, ama ihyan che runecade ye, che ama chi ran ye yahn che ndere chahtechica ihyan chahn chahtendihco ye nunde, te quenan ye yan vaco ye, ne ndihchero ye man, chihnevan ye man, che tihca redin ye.

⁹ Nduco tihca a retumacadino vo che Dihvo vo Dendiohs ne, rendedevahn ye ihyan che ndah ihyan ye van dehtenduh che rechuhrihn ye, ne redin ye

castigo ihyan che duhtuno ihyan ye nde nda ro che techecađe ye yahn ihyan iyehñse.

¹⁰ Din ye castigo ihyan chahn, menañ vihca ihyan che ndere vatechica ye, rahtendiho ye nunde man, ihyan che reducherino ye vederihquentiyon yahn ye man.

Sahn rihñcheh chahn ne, ama duhtuno se, ne hua vahino se ducherino se vederihquentiyon chahte che chenán cuma vaco chihnga,

¹¹ andahre ángel che nde tahque chahte vederihquentiyon chenán cuma ye, hua rihquino ye ndahco ndiya ye vederihquentiyon min nan Dihvo vo Dendiohs.

¹² Nduhneca ite chano che, nde hua rendedecadino te redin te dehtenduh, vate no te cava che cahno ihyan ite ne, tihchan sahn chahn, te andahre nde hua renahn se yahn vederihquentiyon min, ate ducherino se. Chemin che va che cuahno co se nduhca ite chano chahn,

¹³ chuhrihn se, din nunde yahn se yahn che cah rihn se ihyan chenahn. Vedeyeno yahn sahn chahn ne, che cuahtendiho se nunde nan nducoyaca ihyan. Nduhca dehtenduh che ama chihnga che cahva rino vo ne, tihchan sahn chahn. Ama rihtera se vedecuihno, rinduco se nchuhn cuahn che rahtevihco ne, nde yeno ri se che rihñcheh se nchuhn.

¹⁴ Nducoyaca ndahta che rendihchero se ne, nahn yahn se tahn, cuahn dama rahtendiho se nunde. Rihñcheh se ihyan tundo che metah conahn ndah ye ndudo yahn Dendiohs. Ama mayon se cava che tico se tume yahn ihyan. Sahn chahn ne, a ndinda se.

¹⁵ A ndinda se, te chacondah vedame se ndudo ndah yahn Dendiohs, riquendi se yune yahn profeta Balaam daya Beor, sahn min che cava che ndaca se tume ne, din se che chihnga.

¹⁶ Sahn min ne, chihca tan Dendiohs nunde che va ino se che din se, din ye che nte ama burro nduco se, yahve te sahn nduhca che rente ihyan, ne hua din se.

¹⁷ Sahn chahn ne, nde hua richihve se. Nduhca ama pozo che diya man, nduhca man cuma che rechuh dama, riquenda yuhne man, tihchan se. A ndinda se, a va yan nan man nan rahn nan che cuahtenun se, co se castigo cuahn dama.

¹⁸ Sahn chahn ne, numacuahn vedeyade rahndudo se ndudo che nde hua cochihve. Rihñcheh se ihyan che a cade ndevahn ye che rahtendiho ye nunde, rinun se ihyan che ndere cuahtechica ye vedeyeno yahn man ye.

¹⁹ Rahn se te ndete che tihca din ye ne, cuahteman ino ye, cahcantiyon man ye ihyan, ate hua cuaco chemin, te nde man se hua vateman ino se, rihquentiyon nunde yahn se sahn. Tihca, te adecodenhno nunde che chenán cuma ihyan ne, a nunde min rihquentiyon ihyan.

²⁰ Ihyan che a ndevahn Dihvo vo Jesucristo ihyan yahn nunde che chahtendiho ye ne, ndete che cahcoman ye che nevahñecun ye ihyan min, ndaconan cuahtendiho ye nunde ne, tahque vedin ye che co ro menan,

²¹ te tahque ndahca cava ye ndete che nde hua checadino ye ndudo ndah yahn Dendiohs che co che a checadino ye, ne chihcoman ye.

²² Ihyan chahn ne, a chinahn nduco ye ndudo che rente ihyan tuhca: "Yahna ne, rihno renda che te, ne rendaconan te rencheh tun te. Me cu che ne, rihno rine te, ne rendatonun tun te van nchete."

3

¹ Dihnó che yahinó nchuhn, çaca cuh a co o yune che redirún yahn nchuhn, rentihyon yán yahn nchuhn yahn dehtenduh che a devano ne çava che ndedecadino ndah ne yahn.

² Cuenecahco ne ndudo che dirun ihyan profeta ndah che chahte ye a rahn me man, ndudo che chihquentiyon Dihvo vo Jesucristo che dinahn vo man. Ndudo min ne, cahndudo ihyan apóstol, chihnevan ne cuahn che chahn ye yan vaço ne.

³ Menan vihca nahn che codevano nchuhn te cuahn che a cochi nino ro che cuihno iyehñse ne, cuahte sahn che ndere cuahtechica se vedeyeno yahn man se. Sahn chahn ne, ducherino se,

⁴ ne çahma se: “¿Taca che chi tun Dihve nchuhn Jesucristo? Çah ye ndudo yahn ihyan ndico che chi tun ye, ate nde hua cuaçco chemin, te a chihno chih nducoyaca ye, ne iyehñse ne, anduhñeca nde ro che chihnde.”

⁵ Tihca çahma sahn chahn, te ducherino se. Anduhñeca ndete che hua devano se che nde menan me ne, nduco ndudo che rahn Dendiohs ne, chihnde çade nan ro man, iyehñse man. Chihco vih ye yahn van nune man, chihco çade ye che ran co çava che ndaca cue yahn man.

⁶ Ihyan nunde che chahte ye a rahn me ne, decuihno Dendiohs ihyan, din ye che chito nune iyehñse.

⁷ Nan ro man, iyehñse man ne, va che cuco nduhça che a ndihco çade Dendiohs, nda ro che techeca de ye yahn ihyan nunde, din ye castigo ihyan.

⁸ Dihnó che yahinó nchuhn, cuedevano ne te nan Dihvo vo Dendiohs ne, ama ro ne, anduhñeca ama mil nduyo, ne ama mil nduyo ne, anduhñeca ama ro.

⁹ Ihyan min ne, nahn ye che nto ino ihyan nunde yahn ye çava che hua co ye castigo, ne chemin che redin chahtino ca ye. Ndiyu che chinan ye ndudo che çah ye nduhça che rendedecadino ama o ihyan.

¹⁰ Dihvo vo Jesucristo ne, ndaconan chi tun ye ro che nde hua rendedecadino ihyan. Nduhça che a denan renda sahn duco ura che nde hua vate ihyan cudado ne, tihca ro min, te a denan nda Dihvo vo. Nda ro min ne, ama yudo co anduhñeca ndete che ama dito cune, ne iyehñse man, nducuahn che va man, nducuahn che chenan nan ro man ne, cuihno cuco.

¹¹ Nducote tihca va che cuihno nducuahn ne, nahn che ama runeca de cuahtechica nchuhn nduhça che nahn Dendiohs,

¹² nde nda ro che techeca de ye yahn ihyan iyehñse. A ro min che chenan rino ne, chenan ino ne che nun conahn. Ro min ne, nduhça che a rahn ri nchuhn ne, nan ro nduco nducuahn che chenan ne, cuihno cuco.

¹³ Nduhça che a çah Dendiohs ndudo yahn ye ne, chenan ino vo che nedin ra ye nan ro man, iyehñse man, nan che atenan ihyan che ndah ihyan ye cuahtenan ye.

¹⁴⁻¹⁵ Dihnó che yahinó nchuhn, chemin che numanahn che chenan rino ne che conahn dehtenduh chemin chan ne, codin nun ino ne, runeca de cuahtechica ne, ne vatemán ino ne cuahn che nda Dihvo vo Jesucristo. Cuedevano ne te nducote quenán cuma ca ye vedechahtino nduco vo ne, a ndero ndi che ndedevahn ye uvo. Yahn chemin ne, dihno vo Pablo che yahino vo ihyan ne, a dirun ye yahn nchuhn, numacuahn vededevano che çah Dendiohs ihyan,

¹⁶ ntihyon yan ye yahn chemin nan nducuahn çaca che dechuh ye. Nahn cuan ne, vañche, ne chemin che ihyan tundo che hua ndah renahn ye ne, a vih rahn, ne a vih renahn ye. Atihnoça redin ye nan nducuahn Ndudo yahn Dendiohs, redinda man ye ihyan.

¹⁷ Dihnó che yahinó nchuhn, chemin che nducote a devano ne chemin ne, codin ne cudado çava che hua cotahno ne vederihñcheh yahn sahn nunde

chahn, cahcoman ne che riquendi ne yune yahn Dihvo vo Jesucristo numa ino ne.

¹⁸ Tahque ndah ne, codin nun ino ne cava che nde tahque conahn ndah ne yahn vedeyahino yahn Dihvo vo Jesucristo, ihyan min che ndedevahn ye uvo. Ndahca che ndeva vo yavenan ye cuahn dama. Tihca co.

CAÇA CHE DIRUN SAN JUAN MENAN

¹ Dihvo vo Jesucristo ne, a va ye nde ro che metah cuhnde iyehense. Ihyan min ne, anduhneca Ndudo yahn Dendiohs che dechuh ye çava che ndedevahn ye uvo, cuahtenan vo vahchetero numacuahn ro. Nuhn ne, ndihchero nuhn ihyan man, chihnevan nuhn ndudo yahn ye man, dama cheh dama chih nuhn nduco ye man.

² Ihyan min ne, quechica ye iyehense cuh, ne nuhn ne, chinduco nuhn ihyan. Rahndudo nuhn ndudo yahn ye, rihnevan nchuhn, te a devano nuhn che cuaco. Ihyan min ne, a nduco ye Dendiohs Chida, ate nda ye iyehense cuh çava che ndedevahn ye uvo, cuahtenan vo vahchetero numacuahn ro.

³ Ndaconan rete cuande ndah nchuhn che chinduco nuhn ihyan min man, chihnevan nuhn ndudo yahn ye man, te nahn che conduco ne nuhn, cotahno vo Dendiohs Chida man, ihyan min che Daya ye man.

⁴ Condihchenan ndah ne che dirun yahn ne çava che numacuahn vedeyeno quendi ne cotahno ne ihyan.

Dendiohs ne, ndiyu ihyan nunde ye

⁵ Dendiohs ne, nduhca ama ndah dave yahn ne, tihca ama ndah ihyan ye, metah nde ama nunde yahn ye. Ndudo cuh ne, man Dihvo vo Jesucristo chicuahn ye nuhn, ne rete cuande nuhn nchuhn.

⁶ Ihyan che rahn ye che ritahno ye Dendiohs ate rahtechica ye vedeyeno yahn man ye, rahtendiho ye nunde ne, a ndero ndi che ndere rahn ye, te hua runecade rahtechica ye.

⁷ Ate ndete che runecade vatechico vo nduhca che nahn Dendiohs ne, ndahca cuahtenan vo nduco vih, ne nchahco ye nducuahn nunde yuhn vo, yahn che chih Daya ye, Dihvo vo Jesucristo, chera yun yahn ye çavo vo.

⁸ Ndete che çahmo vo che metah nunde yuhn vo ne, rihnceh man vo uvo, nde hua cuaco che rahn vo.

⁹ Ndete che ntuma ino vo nunde yuhn vo ne, nchahco Dendiohs yuhn vo, te ihyan min ne, runecade ye, ne redinahn ye ndudo yahn ye.

¹⁰ Ate ndete che çahmo vo che hua chendiho vo nunde ne, duche rino vo Dendiohs, te anduhneca ndete che çahmo vo che ndere rahn ye. Ndete che tihca ne, a ndero ndi che nde hua ritahno vo Ndudo yahn ye.

2

Dihvo vo Jesucristo ne, rahn nan ye uvo

¹ Dayá, dirun çaca cuh yahn ne çava che ndedecadino ne, ne hua ndere cuahtechica ne, cuahtendiho ne nunde. Ate ndete che va duh che quendihco nunde ne, va Dihvo vo Jesucristo, ne va tah ye vederihquentiyon che rahn nan ye uvo nan Dendiohs Chida. Ihyan min ne, metah nde ama nunde yahn ye,

² ne chihco mendahn ye ihyan, chih ye çava nunde yuhn vo man, nunde yahn nducoyaca ihyan iyehense man. Nduco tihca ndo yan Dendiohs nduco nducoyaco vo.

³ Ndete che redinahn vo vederihquentiyon yahn ye ne, a devano cuaco vo che ritahno vo ihyan.

⁴ Duh ihyan che rahn ye che ritahno ye ihyan ate hua redinahn ye vederihquentiyon yahn ye ne, ndere rahn ye.

⁵ Ate ndete che redinahn vo vederihquentiyon yahn Dihvo vo ne, a devano cuaco vo che yahino vo Dendiohs numacuahn chedave yuhn vo man, che nedin yahn ye uvo man.

⁶ Duh ihyan che rahn ye che a nedin yahn Dendiohs ihyan ne, nahn che runecađe cochica ye nduhca che quechica Dihvo vo Jesucristo.

Nahn che din yahino vo vih

⁷ Dihno, dirun yahn ne, rentihyon yan vederihquentiyon che chihnde nde a rahn me, chidevano ne nde ro che chitahno ne Dihvo vo Jesucristo.

⁸ Vederihquentiyon min, nducote dinahn Dihvo vo Jesucristo man, redinahn man ne man ne, ndahca che rentihyon yan yahn ne. Tihca, te ca retuhn Ndudo Ndah yahn Dendiohs ne, ca rihno vedetundo yahn ihyan.

⁹ Duh ihyan che rahn ye che a chenahn ye vederihquentiyon yahn Dendiohs, ate rendihche tan ye ihyan chenahn ne, ihyan min ne, riquendi ye vedetundo yahn ye, metah conahn ye.

¹⁰ Ihyan che redin yahino ye ihyan chenahn ne, a chenahn ye vederihquentiyon yahn Dendiohs, ne riquendi ye. A runecađe vederendedecadino yahn ye, ne hua rahtendihco ye nunde.

¹¹ Me ihyan che rendihche tan ye ihyan chenahn ne, riquendi ye vedetundo yahn ye, nto ye nduhca ama ihyan nan ve, nde hua devano ye ti nda ti tuno ye.

¹² Dayá, dirun yahn ne, te a nchahco Dendiohs nunde yahn ne che cuande yahn Dihvo vo Jesucristo.

¹³ Nchuhn ihyan ndico, dirun yahn ne, te nde a rahn me ne, a chitahno ne Dihvo vo Jesucristo, ihyan min che a va ye nde cuahn che metah cuhnde iyehense. Nchuhn ihyan decahya, dirun yahn ne, te hua riquendi ne vederihquentiyon yahn chundah.

Dayá, dirun yahn ne, te a nedin yahn Dendiohs Chida nchuhn.

¹⁴ Nchuhn ihyan ndico, dirun yahn ne, te a chitahno ne Dihvo vo Jesucristo, ihyan min che a va ye nde ro che metah cuhnde iyehense. Nchuhn ihyan decahya, dirun yahn ne, te ama yune no chihcoman ne vedeyeno yahn man ne man, ritahno ne Ndudo yahn Dendiohs numacuahn chedave yahn ne man, rahcotahn ne vederihquentiyon yahn chundah man.

¹⁵ Hua dama co nchuhn nduco ihyan nunde, quendi ne vedeyeno yahn man ne, cuahtendihco ne nunde, te ihyan che riquendi ye vedeyeno yahn man ye ne, hua yahino ye Dendiohs Chida.

¹⁶ Tihca, te che ndere rahtechica ihyan, rahtendihco ye nunde man, che idihya ye man, che redin yade ye man ne, nducuahn nunde chemin chan ne, a nan vederendedecadino yahn ihyan riquendah, ndiyu Dendiohs che rihquentiyon ye chemin.

¹⁷ Nducoyaca ihyan che rahtechica ye vedeyeno yahn man ye, rahtendihco ye nunde ne, renda ro che rihno ye. Ate ihyan che redinahn ye vederihquentiyon yahn Dendiohs ne, cuahtenan ye vahchetero numacuahn ro.

Sahn che rendihche tan se Dihvo vo Jesucristo

¹⁸ Dayá, a cochi nino ro che nto iyehense. Nchuhn ne, a devano ne te a va cade che nda sahn duhtuno ihyan me che rendihche tan se Dihvo vo. Ama yahn se che nduhca se sahn min ne, a nda se. Chemin che a devano vo te a cochi nino ro che nto iyehense.

¹⁹ Sahn chemin chan ne, a van dihno vo quendah se, ate hua chitahno se Dihvo vo nduhca che ritahno vo. Tihca, te ndete che chitahno se numa cuaco ne, hua din vih se. Ate ndiquendah nducoyaca se van vo, chihco ro se che a devavih ndi se.

²⁰ Ate nchuhn ne, hua dama ri ne nduco sahn chahn, te din Dihvo vo Jesucristo che quenun Vaco Ndah yahn Dendiohs nchuhn, tumacadino ne ndudo ndah yahn ye.

²¹ Dirún yahn ne, te a chenahn ne ndudo min, ne a devano ne cha che cuaco, ne cha che hua cuaco.

²² Sahn che rahñ se che ndiyu Dihvo vo Jesucristo che tendahnun Dendiohs cava che ndedevahn ye uvo ne, cuahn de chende se. Sahn che rendihche tan se Dihvo vo Jesucristo, Daya Dendiohs ne, racondah vedame se vederihquentiyon yahn ye man, vederihquentiyon yahn Dendiohs Chida man.

²³ Ihyan che racondah vedame ye Dihvo vo Jesucristo, Daya Dendiohs ne, namin racondah vedame ye Dendiohs Chida. Ihyan che ritahno ye Dihvo vo Jesucristo, Daya Dendiohs ne, din yahn Dendiohs Chida ihyan.

²⁴ Chemin che nahn che quendi nchuhn numacuahn chedave yahn ne ndudo yahn Dihvo vo Jesucristo che chitahno ne a rahñ me. Ndete che quendi ne ne, tuhme Dendiohs Chida man, Dihvo vo Jesucristo, Daya ye man ne, ndeva ye nchuhn.

²⁵ Tihca, te Dihvo vo ne, te ye ndudo yahn ye che ndeva ye uvo, cuahtenan vo vahchetero numacuahn ro.

²⁶ Nducote vate sahn che rihñcheh se ne, chemin che tihca dirún yahn nchuhn.

²⁷ Nducote din Dihvo vo Jesucristo che quenun Vaco Ndah yahn Dendiohs nchuhn ne, hua rendotenan ne nde ama ihyan che cacuahn ye nchuhn. Man Vaco Ndah yahn Dendiohs redin che ri devano nchuhn deman nducuahn dehtenduh che cuaco. Nduhca che a ca cuande ne yahn Vaco Ndah yahn Dendiohs ne, cuiquendi ne, cochahtino ne Dihvo vo.

²⁸ Daya, cuiquendi ne cochahtino ne Dihvo vo cava che hua dehva rahco ne, nde hua co cuihnan ne, ndihchero ne ihyan cuahn che ndaconan chi tun ye.

²⁹ Nducote a devano ne che ama ndah ihyan Dihvo vo Jesucristo ne, cuedevano ne te nducoyaca ihyan che redin ye che ndah ne, a nedin yahn ye ihyan.

3

A nedin daya Dendiohs uvo

¹ Condihe nchuhn nduhca che ama yahino Dendiohs Chida uvo, nedin daya ye uvo. Ihyan nunde ne, nducote hua retumacadino ye taca Dendiohs ne, namin hua retumacadino ye che a nedin daya ye uvo.

² Dihno che yahino nchuhn, a nedin daya Dendiohs uvo, nde metah tumacadino vo nduhca che ama ndah ro yuhn vo cuahn che ndeva ye uvo. Ate a devano vo te cuahn che ndaconan chi tun Dihvo vo Jesucristo ne, ndo vo nduhca man ye, ndihchero vo ihyan.

³ Nducoyaca ihyan che chenano ye che ndihchero ye ihyan ne, rihcoman ye vedeyeno yahn man ye, ne rendo ye ihyan ndah nduhca Dihvo vo Jesucristo.

⁴ Ate nducoyaca ihyan che rahtendihco ye nunde ne, rahcotahn ye vederihquentiyon yahn Dendiohs. A vederihquentiyon min che rihco ro nunde yahn ihyan.

⁵ Nchuhn ne, a devano ne te Dihvo vo Jesucristo ne, ndiyu ihyan nunde ye. Namin a devano ne te nda ye muhn iyehñse cuh, chihco mendahn ye ihyan, chih ye cava nunde yuhn vo.

⁶ Nducoyaca ihyan che richahtino ye ihyan min ne, hua ndere rahtechica ye vedeyeno yahn man ye, rahtendihco ye nunde, ne ihyan che ndere

rahtechica ye vedeyeno yahn man ye, rahtendihco ye nunde ne, nde hua ritahno ye ihyan, andahre tihca rahñ ye.

⁷Dayá, cuihco nchuhn cudado che hua cahnceh nde ama ihyan nchuhn. Cuedevano ne te ihyan che runecade rahtechica ye ne, ndah ihyan ye nduhca Dihvo vo Jesucristo,

⁸ne ihyan che ndere rahtechica ye vedeyeno yahn man ye, rahtendihco ye nunde ne, riguendi ye vederihquentiyon yahn chundah, te a sahn min che canan quendihco se nunde. Ate Dihvo vo Jesucristo ne, nda ye muhn iyehñse cuh cava che decuihno ye vederihquentiyon yahn se.

⁹Nde ama ihyan che a nedin daya Dendiohs ne, hua riguendi ye rechica ye vedeyeno yahn man ye, rendihco ye nunde, te a ndahcorun ye vederendecadino yahn ye. Hua co quendi ye condihco ye nunde, te a nedin daya Dendiohs ihyan, ndo ye ihyan ra.

¹⁰A ndero ndi ihyan che a nedin daya Dendiohs ihyan. Namin a ndero ndi ihyan che a nedin yahn chundah ihyan. Tihca, te nducoyaca ihyan che hua redin ye che ndah man, nducoyaca ihyan che hua yahino ye ihyan chenahn man ne, hua yahn Dendiohs ihyan.

Nahn che din yahino ama tama vo vih

¹¹Nahn che din yahino ama tama vo vih. Vederihquentiyon min ne, a devano nchuhn nde ro che chitahno ne Dihvo vo Jesucristo.

¹²Hua ndahca che quendi vo yune yahn Caín, sahn min che dinahn se yahn chundah, chihno se dihno se. A devano vo te Caín ne, duhtuno ihyan se, ne chemin che chihno se dihno se che ndah ihyan ye.

¹³Dihnó, hua dehva rahco nchuhn cuahn che rendihche tan ihyan nunde nchuhn.

¹⁴A ndedevahn Dendiohs uvo van ihyan nunde che va che co ye castigo yah, din nunde yahn ye. A devano vo te cuahtenan vo vahchetero numacuahn ro, te redin yahino ama tama vo vih. Ihyan che hua redin yahino ye vih ne, metah ndedevahn Dendiohs ihyan, ne va che co ye castigo.

¹⁵Nducoyaca ihyan che rendihche tan ye ihyan chenahn ne, dama ri ye nduco sahn rihno ihyan, ne a devano vo te nducoyaca sahn rihno ihyan, hua chenah ino se che ndeva Dendiohs sahn, cuahtenan se vahchetero numacuahn ro.

¹⁶A devano vo nduhca che yahino Dihvo vo Jesucristo uvo, chihco mendahn ye ihyan, chih ye cavo vo. Nahn che tihca din yahino ama tama vo vih, andahre nde cahco mendahn vo uvo, coh vo cava vih.

¹⁷Ndete che va che rechuhn vo ate hua conan vahino vo dihno vo che va vederetahn yahn ye, conan vo ihyan ne, a ndero ndi che nde hua yahino vo Dendiohs.

¹⁸Dayá, nde hua cochihve che dendudo cahmo vo che redin yahino vo vih. Tahque ndah ne, din yahino vo vih numa cuaco, conan vih vo nan vederetahn yuhn vo.

Nduhca che redin chahtino vo Dendiohs

¹⁹Ndete che tihca din yahino ama tama vo vih ne, a devano vo che redinahn vo ndudo ndah yahn Dendiohs, ne vateman ino vo.

²⁰Ndete che va deh cuande che hua vateman ino vo ne, va Dendiohs che devano ye nducuahn, ne co din ye che cuahteman ino vo.

²¹Dihnó che yahinó nchuhn, ndete che vateman ino vo ne, cochahtino vo Dendiohs,

²²ne dinahn ye nducuahn che caco vo ihyan, te redinahn vo vederihquentiyon yahn ye, redin vo dehtenduh che renan ino ye.

²³ Nan nducuahñ vederihquentiyon yahn ye ne, nahn ye che cotahno vo Daya ye, Dihvo vo Jesucristo, ne ðin yahino ama tama vo vih nduhça che chihquentiyon Dihvo vo.

²⁴ Nducoyaco vo che redinahñ vo vederihquentiyon yahn Dendiohs ne, richahtino vo ihyan, ne rinduco ye uvo. A devano vo che rinduco ye uvo, te ðin ye che quenun Vaco Ndah yahn ye uvo.

4

Vaco Ndah yahn Dendiohs man, vaco chihnga man

¹ Dihno che yahino nchuhn, hua ndetahn cotahno ne yahn sahn che rahn se che quenun Vaco Ndah yahn Dendiohs sahn. Çah yune ne che nte se, ne cuicarune ne sahn çava che cadino ne ndete che chenacuma se vederihquentiyon yahn Vaco Ndah yahn Dendiohs, o vederihquentiyon yahn vaco chihnga. Tihça codin ne, te ama yahn se vatechica se rihñcheh se, rahn se te ndudo yahn Dendiohs che rahndudo se.

² Co cadino ne duh ihyan che quenacuma ye vederihquentiyon yahn Vaco Ndah yahn Dendiohs, te va che çahma ye che Dihvo vo Jesucristo ne, ndo ye nduhça ihyan, nda ye muhn iyehñse.

³ Ate nducoyaca sahn che hua tihça çahma se ne, hua chenacuma se vederihquentiyon yahn Vaco Ndah yahn Dendiohs. Sahn chahn ne, chenun vaco chihnga sahn, chenacuma se vederihquentiyon yahn sahn min che rendihche tan se Dihvo vo. A devano vo te sahn min ne, va che cochica se muhn iyehñse, ne yahn sahn che vatechica se, chenacuma se vederihquentiyon yahn se.

⁴ Daya, a nedin yahn Dendiohs nchuhn, ne a ndahco ndiya ne sahn chahn che vatechica se rihñcheh se, te vederihquentiyon yahn Vaco Ndah yahn Dendiohs che quenun nchuhn ne, tahque yudo che co vederihquentiyon yahn chundah.

⁵ Sahn chahn ne, sahn nunde se, ne chemin che rente se dehtenduh che chihnga, rihcovan ihyan nunde.

⁶ Ate nuhn ne, a yahn Dendiohs nuhn, ne ihyan yahn ye ne, rihcovan ye che rahndudo nuhn, ne ihyan che hua yahn ye ne, hua rihcovan ye. Nduco chemin ne, co devano vo cha sahn che quenun Vaco Ndah yahn Dendiohs sahn, ne cha sahn che quenun vaco chihnga sahn.

Yahino Dendiohs uvo

⁷ Dihno che yahino nchuhn, quenacuma che ðin yahino ama tama vo vih, te redin Dendiohs che chenacumo vo vedeyahino. Adecoduhno ihyan che quenacuma ye vedeyahino ne, ritahno ye Dendiohs, ne a yahn ye ihyan.

⁸ Ihyan che hua chenacuma ye vedeyahino ne, hua yahn Dendiohs ihyan, te ihyan yahn Dendiohs ne, redin Dendiohs che chenacuma ye vedeyahino.

⁹ Chihco ro Dendiohs che yahino ye uvo, te andahre ama ndiyahn ra Daya ye, ate dechuh ye ihyan muhn iyehñse, çava che ndedevahn ye uvo, ne cuahtenan vo vahçetero numacuahñ ro.

¹⁰ Yahino vo Dendiohs, ate tahque chahte vedeyahino yahn man ye che co vedeyahino yuhn vo, te dechuh ye Daya ye, chihco mendahn ye ihyan, chih ye çava nunde yuhn vo. A tihça ndo yan Dendiohs nduco nducoyaco vo.

¹¹ Dihno che yahino nchuhn, nducote tihça ðin yahino Dendiohs uvo ne, quenacuma che ðin yahino ama tama vo vih.

¹² Nde ama ihyan hua ntihe ye Dendiohs. Ate ndete che ðin yahino ama tama vo vih ne, nedin yahn Dendiohs uvo, conduco ye uvo, ne cuahtenan cumo vo vedeyahino yahn ye.

¹³ A devano vo te a yahn Dendiohs uvo, rinduco ye uvo, te a din ye che quenun Vaco Ndah yahn ye uvo.

¹⁴ Nuhn ne, a devano cuaco nuhn, ne rahndudo nuhn ndudo yahn che a dechuh Dendiohs Chida Daya ye, cava che ndedevahn ye ihyan iyehense.

¹⁵ Adecoduhno ihyan che cahma ye numacuahn chedave yahn ye che Dihvo vo Jesucristo ne, Daya Dendiohs ihyan ne, nedin yahn Dendiohs ihyan, ne conduco ye ihyan.

¹⁶ A devano cuaco vo che yahino Dendiohs uvo. Ihyan min ne, quenun cuma ye vedeyahino, ne nducoyaca ihyan che chenun cuma ye vedeyahino ne, nedin yahn Dendiohs ihyan, rinduco ye ihyan.

¹⁷ Tihca cuahtenan cumo vo vedeyahino cava che hua dehva rahco vo nda ro che techecade Dendiohs yahn ihyan. Hua dehva rahco vo nda ro min, te numanahn che chenun vo iyehense ne, quendi vo yune yahn Dihvo vo Jesucristo, cuahtenan cumo vo vedeyahino nduhca man ye.

¹⁸ Ihyan che chenun cuma ye vedeyahino ne, vateman ino ye nan Dendiohs. Ate ihyan che hua vateman ino ye ne, vahino ye che co ye castigo, te hua chenun cuma ye vedeyahino.

¹⁹ Uvo ne, yahino vo Dendiohs yahn che menan vihca din yahino man ye uvo.

²⁰ Ihyan che rahn ye che yahino ye Dendiohs ate rendihche tan ye ihyan chenahn ne, hua cuaco che rahn ye, te ndete che hua yahino ye ihyan che dama chenun ye iyehense nduco vih ne, hua co din yahino ye Dendiohs che nde hua rendihche ye ihyan.

²¹ Man Dendiohs chihquentiyon ye che din yahino vo ihyan man, din yahino ama tama vo vih man.

5

Ihyan che ritahno ye Dihvo vo Jesucristo ne, rihcoman ye vedeyeno yahn man ye

¹ Nducoyaca ihyan che ritahno ye che Dendiohs dechuh ye Dihvo vo Jesucristo cava che ndedevahn ye ihyan iyehense ne, ihyan chahn ne, a nedin daya Dendiohs ihyan. Ihyan che yahino ye Dendiohs Chida ne, namin yahino ye nducoyaca ihyan che a nedin daya ye.

² Cuahn che yahino vo Dendiohs, redinahn vo vederihquentiyon yahn ye ne, namin yahino vo nducoyaca ihyan che a nedin daya ye.

³ Cuahn che yahino vo Dendiohs ne, redinahn vo vederihquentiyon yahn ye. Vederihquentiyon yahn ye ne, nde hua vahche cava che dinahn vo.

⁴ Nducoyaca ihyan che a nedin daya Dendiohs ihyan ne, rihcoman ye vedeyeno yahn ye che redin che rahtendihco ye nunde. Uvo ne, nducote ritahno vo Dihvo vo Jesucristo ne, rihcoman vo vedeyeno yahn vo che redin che rahtendihco vo nunde.

⁵ Ihyan che ritahno ye che Dihvo vo Jesucristo che Daya Dendiohs ne, atenan ihyan chahn che ri rihcoman ye vedeyeno yahn ye che redin che rahtendihco ye nunde.

Dihvo vo Jesucristo ne, ihyan min che Daya Dendiohs

⁶ A devano vo te Dihvo vo Jesucristo ne, Daya Dendiohs ihyan, te tihca rahn Dendiohs cuahn che chedenune ye man, tihca chihco ro man ye cuahn che chih ye, chera yun yahn ye man, tihca rete Vaco Ndah yahn Dendiohs che recadino vo man, ne a devano vo te Vaco Ndah yahn Dendiohs ne, hua rihneh.

⁷ Vahchetero ne, Dendiohs Chida man, Daya ye che dechuh ye nduco ndudo yahn ye man, Vaco Ndah yahn ye man, rete ye, recadino vo che cuaco chemin. Ihyan chahn ne, ama no vederihquentiyon chenan cuma ye.

⁸ Muhn iyehñse cuh ne, a devano vo te Dihvo vo Jesucristo ne, Daya Dendiohs ihyan, te tihca rahn Dendiohs cuahn che chedenune ye man, tihca chihco ro man ye cuahn che chih ye, chera yun yahn ye man, tihca rete Vaco Ndah yahn Dendiohs che recadino vo man.

⁹ Ritahno vo ndudo che rente ihyan yahn Dihvo vo Jesucristo, che ihyan min che Daya Dendiohs. Ate nde tahque nun ritahno vo ndudo che rete man Dendiohs che ihyan min che Daya ye.

¹⁰ Ihyan che ritahno ye Dihvo vo Jesucristo ne, a devano cuaco ye che ihyan min che Daya Dendiohs. Ihyan che hua ritahno ye ne, ducherino ye Dendiohs, te andahre rahn Dendiohs che ihyan min che Daya ye, ate hua ritahno ye.

¹¹ Rahn Dendiohs ndiyu deman che a ihyan min che Daya ye, ate namin rahn ye te ihyan che ritahno ye ihyan ne, ndevahn ye, ne cuahtenan ye vahchetero numacuahn ro.

¹² Ihyan che ritahno ye Dihvo vo Jesucristo, Daya Dendiohs ne, cuahtenan ye vahchetero numacuahn ro. Ate ihyan che hua ritahno ye ihyan ne, nde hua ndaca vahchetero cuahtenan ye.

¹³ Tihca dirun yahn nchuhn che ritahno ne Dihvo vo Jesucristo, Daya Dendiohs, cava che codevano cuaco ne te cuahtenan ne vahchetero numacuahn ro.

¹⁴ Richahtino vo Dendiohs, ne a devano vo te nducuahn che caco vo ihyan nduhneva che renan ino ye ne, te ye uvo.

¹⁵ Nducote a devano vo che te ye dehtenduh che caco vo ihyan ne, din vo cuande anduhneca ndete che a va tah vo dehtenduh che rico vo.

¹⁶ Ndete che cadino nchuhn che rendihco ama cha dihno ne nunde che hua din che conda ye ne, covah ne cava ye, ne nchahco Dendiohs yahn ye. Ate cuihco ne cudado che ndiyu nunde che din che conda ye, te va nunde che redin che rinda ihyan, ne hua rihquentiyon che covah ne cava ihyan che rahtendihco ye nunde chemin chan.

¹⁷ Nducuahñ dehtenduh che chihnga che redin ihyan ne, nunde. Ate va nunde che hua redin che conda ye.

¹⁸ A devano vo te nducoyaca ihyan che a nedin daya Dendiohs ihyan ne, hua ndere rahtechica ye, rahtendihco ye nunde, te Dihvo vo Jesucristo, Daya Dendiohs ne, redin ye cudado ihyan chahn, ne hua co cahcantiyon chundah ihyan.

¹⁹ A devano vo che yahn Dendiohs uvo, ne nducoyaca ihyan nunde ne, vate ye tah chundah.

²⁰ Namin a devano vo che Dihvo vo Jesucristo, Daya Dendiohs ne, nda ye iyehñse, chicuahn ye uvo, tihyon yune ye uvo che cotahno vo ama no Dendiohs, ihyan min che va ye vahchetero. Uvo ne, ndichahtino vo ihyan. Namin ndichahtino vo Daya ye, che man ye dechuh ye. Chemin che cuahtenan vo vahchetero numacuahn ro.

²¹ Dayá, cuihco nchuhn cudado, condi ne cotahno ne dehtenduh che ndere redin ihyan dendiohs yahn ye. Tihca co.

CAÇA CHE DIRUN SAN JUAN YAHN AMA IHYAN NDAHTA CHE RITAHNO YE DIHVO VO JESUCRISTO

¹ Cahvé che a tendahnun Dendiohs ndih, u indihthe Juan dirún çaça cuh, dechúh yahn ne man, yahn daya ne man. Yahinó nchuhn numacuahn chedave yáhn. Nducoyaça dihno vo che ritahno vo Ndudo yahn Dendiohs nduco ye ne, namin yahino ye nchuhn.

² Yahinó nchuhn yahn che ritahno vo nduco vih Ndudo yahn Dendiohs, riquendi vo cuahn dama.

³ Dendiohs Chida man, Daya ye Dihvo vo Jesucristo man, numacuahn vedevahino din yahino ye nchuhn, din ye che ndahça cuahtenan ne.

⁴ Ama yenó che ntacá ama o daya ne. Ihyan chahn ne, runecađe vatechica ye nduhça che rihquentiyon Dendiohs Chida che dinahn vo.

⁵ Cahvé, numacuahn vedenecon dirún yahn ne che din yahino ama tama vo vih. Vederihquentiyon cuh ne, a devano vo nde a rahn me.

⁶ Ndete che redinahn vo vederihquentiyon yahn Dendiohs ne, chenan cuma vo vedeyahino. A devano nchuhn che rihquentiyon ye nde a rahn me che din yahino ama tama vo vih.

Sahn rihncheh

⁷ Ama yahn sahn che rendihche tan se Dihvo vo Jesucristo, vatechica se rihncheh se. Sahn chahn ne, hua ritahno se che ndo ye nduhça ihyan, nda ye muhn iyehense cuh.

⁸ Cuihco nchuhn cudado, ne hua tumacah ne yahn se. Cuiquendi ne cotahno ne numa ino ne nde nda ro che ndeva Dendiohs nchuhn nduhça che chenan ino ne.

⁹ Adecoduhno ihyan che rihco vane ye vederihquentiyon yahn Dihvo vo Jesucristo, Daya Dendiohs, riquendi ye vederendedecadino yahn ihyan iyehense ne, hua rene din yahn Dendiohs ihyan. Ate adecoduhno ihyan che riquendi ye redinahn ye vederihquentiyon yahn Dihvo vo ne, rene din yahn ye ihyan. Namin rene din yahn Dendiohs Chida ihyan.

¹⁰ Ndete che nda ama se che hua ricuahn se vederihquentiyon yahn Dihvo vo ne, hua nevahnecon ne sahn ndevaco ne, nde hua necah ne Dendiohs sahn,

¹¹ te ihyan che reneçah ye Dendiohs sahn ne, dama ri ye nduco se, rahtendihco ye nunde.

¹² Ama va dehtenduh che te cuandé nchuhn, ate tahque ndah chí nte man nduco nchuhn che co che dirún yahn ne, çaça che tahque co yeno ne.

¹³ Coh ne, che namin a tendahnun Dendiohs ihyan ne, dechuh daya ye Dendiohs yahn ne.

CACA CHE DIRUN SAN JUAN YAHN DIHNO VO GAYO

¹ Gayo che yahinó ndih numacuahn chedave yáhn, u indihthe Juán dirún caca cuh, dechúh yahn ne.

² Dihno che yahinó ndih, ricá Dendiohs che din ye che ndahca conan ne, ne quendi ye te ye vedevihche yahn ne nduhca che rihan ye ndih che ritahno ne numa ino ne.

³ Nda ama o dihno vo, ne rente ye yahn ne che riquendi ne numa ino ne redinahn ne Ndudo ndah yahn Dendiohs, ne chemin che ama chi yenó.

⁴ Cuahn che recadinó che riquendi dayá numa ino ye redinahn ye Ndudo yahn Dendiohs ne, chemin redin che tahque ri yenó nan nducuah.

⁵ Dihno che yahinó ndih, ama ndahca che rihan ne dihno vo, menan vihca dihno vo che chenun yune ye, te nducote ritahno ne Dihvo vo Jesucristo ne, tihca redin yahn che redin ne.

⁶ Cuahn che renda ihyan chahn muhn ndiyaco ne, rente ye nduhca che redin yahino ne ihyan, rihan ne ihyan. Ama ndahca che quendi ne conan ne dihno vo che chenun yune ye nduhca che redin yahn nan Dendiohs,

⁷ te ihyan chahn ne, vatechica ye rahndudo ye ndudo yahn Dihvo vo Jesucristo, ne hua nahn ye che van ihyan che hua ritahno ye Dendiohs quenda che chuhnun ye.

⁸ Chemin che uvo conda cuande yuhn vo ihyan chahn, conan vo ihyan, ndaca che chuhnun ye. Nahn che conan vo ihyan cava che conduco vo ihyan nan ntiyon che racotuhn ye Ndudo yahn Dendiohs.

Diótfefes ne, hua runecade se

⁹ U ne, dirún yahn ihyan ndiyaco, ate Diótfefes ne, hua nahn se che cahcantiyon nuhn, te man se nahn cahcantiyon se.

¹⁰ Chemin che ndete che cah min ne, ndacaruné sahn deh cuande che ndere rahn se yahn nuhn. Avane ne, dihno vo che vatechica ye rahndudo ye Ndudo yahn Dendiohs ne, cuahn che renda ye min ne, hua renevahnecun se ihyan, nde rihca tan se che nevahnecun ihyan chenahn ihyan. Me ndete che vate ihyan che nevahnecun ye ihyan ndevaco ye ne, rendetenda no se ihyan ndiyaco.

¹¹ Dihno che yahinó ndih, condi ne quendi ne yune yahn ihyan che chihnga redin ye. A devano vo te ihyan che chihnga redin ye ne, hua yahn Dendiohs ihyan, ne ihyan che redin ye che ndah ne, a yahn Dendiohs ihyan.

Demetrio ne, runecade ye

¹² Nducoyaca dihno vo ne, rente ye che ama runecade dihno vo Demetrio, ne a ndero ndi che runecade ye. Namin nuhn ne, a devano cuaco nuhn che runecade ye, ne nchuhn ne, a devano ne che deman ndudo cuaco rente nuhn.

¹³⁻¹⁴ Ama va che te cuandé ndih ate ndotenan che dirún yahn ne ne, tahque ndah che nte man nduco ne, te a nun chí quendihcheró ndih.

¹⁵ Dendiohs conduco ye ndih. Cuendeva ne Dendiohs yahn dihno vo che vate ye muhn. Cuenecah ne Dendiohs che cuande yáhn queri ama dihno vo che vate ye tan.

CACA CHE DIRUN SAN JUDAS

¹ U Judas, dihno Jacobo, che redín ntiyon yahn Dihvo vo Jesucristo ne, dirún caca cuh, dechúh yahn nchuhn che yahino Dendiohs Chida nchuhn, tendahnun ye nchuhn, redin ye cudado nchuhn cava che ndeva Dihvo vo Jesucristo nchuhn.

² Ricá Dendiohs che ama din yahino ye nchuhn, din ye che ndahca cuahtenan ne.

Sahn rihncheh

³ Dihno che yahino nchuhn, ama nahn dirún yahn ne nduhca che ndedevahn Dihvo vo Jesucristo nchuhn man, u man, ate man ne, quenán cuma che dirún yahn ne, riyahvé nchuhn che cahca tan ne che nahn ndacorun ihyan vederihquentiyon che ama yune no ndahco Dendiohs tah ihyan yahn ye, che va che cotahno vo Dihvo vo Jesucristo.

⁴ Riyahvé nchuhn, te a checadino te ama o sahn che a ndirun yahn se che va che conda se ne, numacuahn vedemayon nda se van nchuhn. Sahn chahn ne, ama duhtuno ihyan se. Ricuahn se te ihyan che renevahnecun ye ndudo ndah yahn Dendiohs ne, co cuahtechica ye vedeyeno yahn man ye, cuahtendihco ye nunde. Che tihca redin se ne, racondah vedame se Dihvo vo Dendiohs, ihyan min che ndinan ye yuhn vo man, Dihvo vo Jesucristo man.

⁵ Hua dama co nchuhn nduco se. Va ama nan che ntiyon yan yahn ne andahre a devano ne yahn. Cuenecahco ne te Dendiohs ne, andahre ndetendah ye ihyan naci6n yahn Israel naci6n yahn Egipto, ate din ye castigo van ihyan chahn, decuihno ye ihyan che hua chitahno ye.

⁶ Namin cuenecahco ne nduhca che chahno chi 6ngel che hua dinahn ye ntiyon che chenán cuma ye, chahtechica vane ye. Ihyan chahn ne, va che co ye castigo cuahn dama. Nduhca che chihquentiyon Dendiohs ne, nchiche cadena ihyan, chenun ye van man van rahn, chenán rino ye nde nda ro cuahn che numacuahn vedeyudo cuhnde cade yahn ihyan iyehense.

⁷ Namin cuenecahco ne nduhca che chahno chi ihyan yan Sodoma man, Gomorra man, ihyan yan che nino min man. Ihyan chahn ne, dama chi ye nduco 6ngel chahn, ndere chahtechica ye, chahtendihco ye nunde. Chahtenan ye nduco ndahta che hua nihnevaco nduco ye man, chahtenan ye van man ye nduco vih man. Ihyan chahn ne, din Dendiohs castigo ihyan, ne va che cuahtenun ye van ruchiyahn cuahn dama. Che tihca chahno ye ne, cochihve yahn ihyan chenhán cava che hua quendi ye yune min.

⁸ Namin sahn chahn ne, redin se dehtenduh che chihnga. Recadino se dehtenduh van yahnde yahn se, ne chemin che ndere vatechica se nduco ndahta man, rahcotahn se vederihquentiyon yahn Dendiohs man, ducherino se vederihquentiyon che chenán cuma vaco chihnga man.

⁹ Nde Miguel, 6ngel che tahque ndinan ye ne, hua chuhan ye, te cuahn che chih Moisés ne, andahre chihca tan ye che hua quenda chundah ihyan, cuhn chende ye nduco se, ate hua chihquino ye din dine ye sahn. Tahque ndah ye ne, rahn ye ri ye sahn tuhca: "Dihvo vo Dendiohs din ye castigo di."

¹⁰ Ate sahn chahn ne, rahva se yahn vederihquentiyon min che nde hua renahn se yahn. Riquendi ve nan se yune chihnga anduhneca ite chano che redin te dehtenduh nde hua rendedecadino te yahn. Chemin che va che conda se.

11 ¡Ama vedin se!, te riquendi se yune yahn Cain man, yahn che nahn yahn se tume ne, rahtendihco se nunde nduhca che din Balaam man. Va che co se castigo nduhca che chahno Coré che decuihno Dendiohs sahn, din nunde yahn se.

12 Sahn chahn ne, rihtera se vedecuihno cuahn che rendo dama se nduco nchuhn ro che rahte vihco ne numacuahn vedeyahino che ritahno ne Dihvo vo Jesucristo. Reh se man, rih se man, redin se anduhneca ndete che vihco vedecoh. Redin se cuande cava man se, nde hua cuande yahn se cava ihyan chenhahn. Anduhneca man cuma che rechuh dama, riquenda yuhne ne, tihchan se, te nde hua richihve se. A ndinda se anduhneca yahn ndata che hua ri ndute yahn che ca tihve duto, ne nihno ntih.

13 Sahn chahn ne, anduhneca yan yahn nuniyahn cuahn che ama rano yuhne tan, te vatechica se muhn min, rihtera se vedecuihno yahn se. Nduhca iyon che hua quenun yune yahn, tihchan se, te nde hua devano se ti nda ti tuno se. Ate a va yan castigo che din Dendiohs sahn, cuahtenun se van man van rahn numacuahn ro.

14 Enoc, ihyan min che a ri ndache ihyan nan ndata yahn Adán ne, cah Dendiohs, checadino ye van yahnde yahn ye, ne namin cahndudo ye yahn sahn chahn. Rahn ye: “Ndihcheró Dihvo vo che nda ye nduco ama ndeh mil ángel yahn ye,

15 cava che techeca de ye yahn nducoyaca ihyan iyehense, ne din ye castigo sahn nunde yahn nducuahn dehtenduh nunde che chendihco se man, ndudo tan che necahn se yahn ye man.”

16 Sahn nunde chahn ne, rahn nunde se yahn nducuahn man, rendahchenan se man, vatechica se vedeyeno yahn man se, rahtendihco se nunde man, numacuahn vedeyade rendonan man se sahn man, rendonan se ihyan cava che dinahn ye dehtenduh che nahn se man.

Riyahve ye ihyan che ritahno ye Dihvo vo Jesucristo

17 Dihno che yahino nchuhn, cuenecahco ne ndudo che rente ihyan apóstol yahn Dihvo vo Jesucristo, chihnevan ne.

18 Rahn ye: “Cuahn che a cochi nino ro che nto iyehense ne, quendah sahn che ducherino se yune yahn Dendiohs, quendi se vedeyeno yahn man se, cuahtendihco se nunde.”

19 Sahn chahn ne, hua quenun Vaco Ndah yahn Dendiohs sahn man, riquendi se yune chihnga yahn man se man, redin se che rahte canda ihyan nduco vih man.

20 Me nchuhn, dihnó che yahino nchuhn ne, cuiquendi ne numa ino ne cotahno ne Dihvo vo Jesucristo man, covah ne numacuahn vederihquentiyon yahn Vaco Ndah yahn Dendiohs man,

21 cuahtenun ino ne che yahino Dendiohs nchuhn man, cuahteyan ne nde nda ro che numacuahn vedeyahino ndeva Dihvo vo Jesucristo nchuhn, cuahtenan ne vahchetero numacuahn ro man.

22 Ihyan che a vate ye che cahcoman ye yune yahn Dendiohs, quendi ye yune yahn sahn chahn ne, coyahve nchuhn ihyan, cuentihyon yune ne ihyan, ndaconan cotahno ye.

23 Nduhca che rehnevi ihyan dehtenduh van ruchiyahn cava che hua cuco ne, tihca cuenedevahn nchuhn ihyan chahn, te cahnda yahn ye. Namin conan vahino ne ihyan che vatechica ye vedeyeno yahn man ye, rahtendihco ye nunde. Ate cuihco ne cudado che hua dama co ne nduco ye. Codin vi ne yahn nunde che rahtendihco ye.

24-25 Ama no Dendiohs yuhn vo, ihyan min che ndedevahn ye uvo. Numacuahn vederihquentiyon yahn ye redin ye cudado nchuhn cava che hua cahcoman ne yune yahn ye, ne dave yavenan ne ndeva ye nchuhn. Nda ro

min ne, ama co yeno ne. Ihyan min che quenān cuma ye vederihquentiyon numacuahn ro. Ndahca che ndeva ihyan yavenān ye che cuande yahn Dihvo vo Jesucristo. Tihca co.

NDUDO CHE CAH DIHVO VO JESUCRISTO, CHECADINO SAN JUAN YAHN DEHTENDUH CHE VA CHE CONAHN

¹ Nan libro cuh ne, ndirun ndudo che cah cuande Dendiohs Dihvo vo Jesucristo yahn dehtenduh che a nun va che conahn cava che cah ye che cadino ihyan che ritahno ye ihyan. U Juan, che redin ntiyon yahn Dihvo vo ne, dechuh ye angel yahn ye, te ye che checadino yahn.

² Dirun yahn nducuahn dehtenduh che Dendiohs man, Dihvo vo Jesucristo man, te ye che checadino man, ndihcheró man.

³ Che dirun nan libro cuh ne, a Dendiohs te ye checadino, ne ndah ro yahn ihyan che rahndudo ye man, ihyan che rihnevan ye man, rendevahnevan ye man, te a cochi nino ro che conahn.

San Juan ne, dirun ye yahn ihyan yahn nduh che ndache yaco

⁴ U Juan ne, dirun yahn nchuhn ihyan yahn nduh che ndache yaco che vate ne yahn yahn Asia. Dendiohs, ihyan min che va ye numacuahn ro man, va che chi ye man, nduco Vaco Ndah yahn ye che ama yudo vederihquentiyon yahn, che rinduco ihyan nan che rihquentiyon ye ne, din yahino ye nchuhn, din ye che ndahca cuahtenan ne.

⁵ Namin Dihvo vo Jesucristo, ihyan min che cuaco nducuahn che rente ye man, che menan vihca ntuche ye van tenan man, che tahque yudo vederihquentiyon yahn ye che co nducoyaca rey che vate ye iyehse man, din yahino ye nchuhn, din ye che ndahca cuahtenan ne. Ihyan min ne, yahino ye uvo, ne chih ye, chera yun yahn ye cavo vo. Man ne, anduhneca ndete che nedin dave ye uvo nduco yun yahn ye che nchahco ye nunde yuhn vo.

⁶ Te ye vederihquentiyon uvo, ne man ne, a ndi vo anduhneca rey man, anduhneca chidocuyan man, cava che din vo ntiyon yahn Chida ye, ihyan min che Dendiohs yahn ye. Nahn che dinahn nducoyaca ihyan che rihquentiyon ye, ndeva ye yavenan ye cuahn dama. Cuaco. Tihca co.

⁷ Condihche nchuhn. Dihvo vo Jesucristo ne, va che chi ye van man. Nducoyaca ihyan iyehse ne, ndihchero ye ihyan, nde sahn che chihno se ihyan, ne nducoyaca ye cuaco ye cuahn che ndihchero ye ihyan. Cuaco. Tihca co.

⁸ Dihvo vo, ihyan min che ama quenan cuma ye vederihquentiyon ne, tuhca rahn ye: “U che va numacuahn ro, nde nan canan nde nan cuhnonan. U che va che chi.”

⁹ U Juan, che dihno nchuhn che namin rechuhrin nduco ne man, chenan vo nan ntiyon yahn Dendiohs man, chenan cumo vo vedechahtino che rete Dihvo vo Jesucristo uvo man, quenán preso nan yahn che duce Patmos, yahn che cahndudó ndudo ndah yahn Dendiohs man, che cahndudó yahn Dihvo vo Jesucristo man.

¹⁰ Ama ro yahn Dihvo vo ne, quenun Vaco Ndah yahn Dendiohs u, ne chihneván ama ndudo cuahn vedamé, che ama dito rahn, nduhca che rah trompeta.

¹¹ Rahn tuhca:

—U che va numacuahn ro, nde nan canan, nde nan cuhnonan. Cuediron nan ama libro dehtenduh che ndihchero, ne cuedechoh yahn ihyan yahn

Dendiohs, nduh che ndache yaco, yahn yahn Asia, yan Efeso man, Esmirna man, Pérgamo man, Tiatira man, Sardis man, Filadelfia man, Laodicea man.

¹² Ndaconán che nahn ndihcheró duh che rahn nducó, ne cuahn che ndaconán ne, ndihcheró ndache candelero diyahnguan.

¹³ Mendahn nan che vatendi candelero chahn ne, ndihcheró ama ihyan che nduhca ihyan min che rinduco ye nducoyaca ihyan. Tino yahn ye ne, riya nde cah ye, ne numa yaco ticua ye quenun ama cinturón diyahnguan.

¹⁴ Yudo tin ye ne, cua nduhca cuche man, nduhca ihve man, ne ndutenan ye ne, nduhca ruchiyahn.

¹⁵ Cah ye ne, riya nduhca cu cuan che ca riche riche, ne ndudo ye ne, ama yudo, nduhca che rahco ndin ama ndeh ico.

¹⁶ Tah cuaco ye ne, chenan ndache iyon. Chende ye ne, riquendah ama espada che ama cuiyon, ne can nduh che o lado. Vaconan ye ne, ama yudo ro nduhca che ro nan yahn cuahn che ama ihno.

¹⁷ Cuahn che ndihcheró ihyan ne, chendavá nan ye, ne chih tahn. Ate nahn tah ye u nduco tah cuaco ye, ne rahn ye ri ye u:

—Hua te vah. U che vá cuahn dama, nde nan canan, nde nan cuihnonan.

¹⁸ U che chíh, ate man ne, vá cuahn dama. U che rihquentiyón vederih man, nan chenun tenahn man.

¹⁹ Codiron yahn dehtenduh che rendihchero che va man ro cuh man, che cuhnde adiva man.

²⁰ Tuhca conahn yahn ndache iyon che chenan tah cuaco: iyon chahn ne, sahn che rahndudo se ndudo yahn Dendiohs nduh che ndache yaco, ne candelero che ndache ne, conahn nduh che ndache yaco.

2

¹ Codiron yahn sahn che rahndudo se ndudo yahn Dendiohs, che quenan se yaco che va min yan Efeso: “Tuhca rahn Ihyan che chenan ndache iyon tah cuaco ye, ne quechica ye mendahn nan che vatendi nduh che ndache candelero diyahnguan:

² U devanó nducuahn che redin nchuhn man, devanó nduhca che rechuhrihn ne, redin ne ntiyon man, che quenán cuma ne vedechahtino man, che ama canderino ne ihyan che duhtuno ihyan ye man. Namin devanó che a cah cuihno ne sahn che redin ca se che apóstol se, tumacadino ne che sahn rihnceh se.

³ Quendah ne vedechahtino, chuhrihn ne man, ama nedin ne ntiyon yahn yahn che ritahno ne u man.

⁴ Ate va ama nan che hua renan inó che redin ne, yahn che ametah chenan cuma ne vedeyahino nduhca ro menan.

⁵ Cuenecahco ne nduhca che ama yahn denda ne. Cuento ino ne nunde yahn ne, ne cuiquendi ne nduhca che a cochi ne ro menan. Ndete che hua ne, co tán nduco ne, ne cah nún, ne cahneví candelero yahn ne nan che va.

⁶ Ndahca redin nchuhn che hua renan ino ne che redin sahn Nicolaita. Chemin ne, namin u ne, hua renan inó.

⁷ Nducoyaca nchuhn, ihyan ndiyaco, cuendedecadino ndah ne che tihca rahn Vaco Dendiohs ri nchuhn. Duh nchuhn che cocha ne ne, té ndutiyade che va vahchetero, cheh ne. Chemin ne, din che cuahtenan ne numacuahn ro nan Dendiohs.”

⁸ Namin codiron yahn sahn che rahndudo se ndudo yahn Dendiohs che quenán se yaco che va yan Esmirna: “Tuhca rahn Ihyan che va ye cuahn dama, nde nan canan, nde nan cuihnonan, ihyan min che chíh ye, ne ndaconan ntuche ye:

⁹ U devanó nducuahñ che redin nchuhn man, che rechuhrihn ne man, che chevah ne man, ate nan Dendiohs ne cuihca ne. Namin devanó nduhca che chihnga rahñ ama o se yahn ne. Sahn chahn ne, rahñ se te ihyan nacióñ yahn Israel sahn, ate che cuaco ne, lado yahn chundah ndi cuande se.

¹⁰ Hua dihya ne co yahn che va che chuhrihn ne, te chundah ne, din se che cuih ihyan neve nchuhn vacoyahn, cava che tumarande se nchuhn, chuhrihn ne chete che ndiche ro. Ate cuiquendi ne codinahñ ne ndudo yahn nde ro che ndaca ne iyehñse, ne u ndahco menun yahn ne, din che cuahtenan ne vahchetero numacuahn ro.

¹¹ Nchuhn, ihyan ndiyaco, cuendedecadino ndah ne che tihca rahñ Vaco Dendiohs ri nchuhn. Nchuhn che cocha ne ne, hua deh va co yahn ne ro che co ihyan castigo cava nunde yahn ye.”

¹² Namin codiron yahn sahn che rahndudo se ndudo yahn Dendiohs che quenán se yaco che va yan Pérgamo: “Tuhca rahñ Ihyan che nda ye espada cuiyon che can nduh che o lado me:

¹³ U devanó nducuahñ che redin nchuhn, devanó che yan nan che chenán ne ne, chundah rihquentiyon se. Andahre tihca ne, riquendi ne nan ntiyon yahn. Hua rihcomán ne che ritahno ne u, andahre ndihchero ne nduhca che chih Antipas. Ihyan min ne, devano cuaco ye ndudo yahn, ne quendi ye nan ntiyon yahn cuahn che quenán ye iyehñse. Chihno se ihyan van nchuhn min nan che rihquentiyon chundah.

¹⁴ Ate va ama o nan dehtenduh che hua renan inó che redin ne. Hua renan inó che retuma ino ne min yan Pérgamo neve sahn che riquendi se ricuahñ se ndudo yahn Balaam, sahn min che chinun se Balac cava che din se che cuahtendihco ihyan nacióñ yahn Israel nunde, cheh ye dehtenduh che rihco ihyan nan che rivahn dendiohs yahn ye man, che cuahtendihco ye nunde che ndere cuahtenan ye nduco ihyan che hua nihnevaco nduco ye man.

¹⁵ Namin retuma ino ne neve sahn che riquendi se che rahñ sahn Nicolaita. Chemin che tán nduco ne.

¹⁶ Cuento ino ne, ne cuihco yudo ne che ametah quendi se, te ndete hua ne, cahn yan yahn ne, ne cuhma nduco sahn chahn, cuahn sahn nduco espada che riquendah chendé.

¹⁷ Nchuhn ihyan ndiyaco, cuendedecadino ndah ne che tihca rahñ Vaco Dendiohs ri nchuhn. Ihyan che cocha ye quendah ye ne, cah maná, cheh ye. Pan min ne, quenun ndeh. Namin cah ama tu cua, ne nan tu me ne, ndirun che duche ama ihyan, che nde ama ihyan hua devano ye, atenán ihyan che ndonda tah ye tu me.”

¹⁸ Namin codiron yahn sahn che rahndudo se ndudo yahn Dendiohs che quenán se yaco che va yan Tiatira: “Tuhca rahñ Daya Dendiohs, ihyan min che nduhca ro ruchiyahn ro ndutinán ye, ne cah ye ne, riya nduhca cu cuan che ca riche riche:

¹⁹ U devanó nducuahñ che redin nchuhn. Devanó che quenán cuma ne vedeyahino man, ritahno ne man, ntiyon che redin ne man, che quenán cuma ne vedechañno man. Devanó te nde tahque numa ino ne redin ne ntiyon man che co cuahn che canán ne.

²⁰ Ate va ama nan che redin ne che hua renan inó. Hua renan inó che a ndah no ino ne che redin tahn che duche te Jezabel, che ndere rahñ te che rahndudo te ndudo yahn Dendiohs. Ate nduco ndudo che ricuahñ te ne, rihñcheh te ihyan che redin ye ntiyon yahn, cava che cuahtenan ye nduco ndahta che ndiyu ndahta yahn ye man, cheh ye dehtenduh che rihco ihyan nan che redin vahñ ye dendiohs yahn ye man.

²¹ U ne, recah cá ro quenán te iyehñse, çava che nto ino te nunde yahn te, ate hua rento ino te, ne riquendi te ndere rechica te.

²² Man ne, dín che cotah ama cah tahn, condite te nan yundo. Namin dín che ama chuhrihn sahn che redin chihyo se tahn, rahtenan se nduco te, ndete che hua ngua se che dama ri se nduco te.

²³ Namin dín che coh daya te çava che cadino nducoyaça ihyán yahn Dendiohs yahn nducuahn yaço, che u ne, recadinó che rendedecadino ihyán, ne queri ama nchuhn ne, ndahco menún yahn ne tuno ca ntiyon che nedin ne.

²⁴ Ate combiero yahn nchuhn che vate ye yan min che hua riquendi ye che ricuahn tahn min man, che hua riquendi ye vederihquentiyon chahte yahn chundah che rahtechica ihyán vedeyeno yahn man ye, rahtendihco ye nunde man ne, rahn ri nchuhn te hua dín che chuhrihn ye.

²⁵ Ntiyon che va tah nchuhn ne, codin ne cudado nde ro che ndaconan chi tún.

²⁶ Ihyán che cocha ye quendañ ye man, quendi ye dinahn ye che rihquentiyón nde ro che ndá man ne, cah vederihquentiyon ihyán che cahcantiyon ye ndeh nación.

²⁷ Nduhça vederihquentiyon che te Chidá u ne, tihça vederihquentiyon che cuahtenan cuma ye. Chemin ne, anduhñeca ama cu che cahcantiyon nduco ye nación chahn, ne co ndeh ye ndete che nahn ye, anduhñeca ndete che chite yahn.

²⁸ Namin cah yuhdo chahte che riquendañ cuahn che a co dave, ndonda tah ye.

²⁹ Nchuhn ihyán ndiyaco, cuendedecadino ndah ne che tihça rahn Vaco Dendiohs ri nchuhn.”

3

¹ Namin codiron yahn sahn che rahndudo se ndudo yahn Dendiohs che quenán se yaço che va yan Sardis: “Tuhça rahn Ihyán che quenán cuma ye vederihquentiyon chahte yahn Vaco Dendiohs man, nduh che ndache iyon man: U devanó nducuahn che redin nchuhn. Devanó che anduhñeca ndete che a ndih ne nan Dendiohs andahre quenduche ne nan ihyán iyehñse.

² Cuenuhn ino ne, ne cuenecañ dito ne dehtenduh che va ca che a nahn cuihno denda ne. Tihça, te rendihché che nducuahn che redin ne ne, hua ndahça nan Dendiohs yahn.

³ Cuento ino ne nunde yahn ne, cuenecañco ne nducuahn che chahn ne, ne cuiquendi ne. Ndete che hua nuhn ino ne ne, adenán ndá tan nduhça che renda sahn duco, che nde hua devano ne deh ura, ne dín castigo nchuhn.

⁴ Andahre tihça ne, retuma ino ne min yan Sardis te neve ihyán che metah detoh ye chedave yahn ye. Ihyán chahn ne, conduco ye u, cuahtenun ye tino cua. Tihça redin yahn, te dave yavenan ye.

⁵ Ihyán che cocha ye quendañ ye ne, cuahtenun ye tino cua, ne hua ntiñé che duche ye nan libro che rihquentiyon che cuahtenan ihyán vahchetero cuahn dama. Tahque ndah ne, ndevá ihyán nan Chidá man, nan ángel yahn ye man.

⁶ Nchuhn ihyán ndiyaco, cuendedecadino ndah ne che tihça rahn Vaco Dendiohs ri nchuhn.”

⁷ Namin codiron yahn sahn che rahndudo se ndudo yahn Dendiohs che quenán se yaço che va yan Filadelfia: “Cuihcovan nchuhn yahn Ihyán che dave ye nan Dendiohs man, cuaco nducuahn ndudo yahn ye man, ihyán min che quenán cuma ye llave yahn rey David. Cuahn che nahne ye ne, nde ama

ihyan hua co necahde ye, ne cuahn che necahde ye ne, nde ama ihyan hua co nahne ye. Rahn ye tuhca:

8 U devano nducuahn che redin nchuhn. Chacondah chendevah cava ne, ne nde ama ihyan hua co necahde ye. Andahre hua nduh rignon chihve ne ne, ate retumacah ne yahn ndudo yahn, ne hua racondah vedame ne u.

9 Rahn ri nchuhn che ndahco ndiyá sahn rihnceh che ndi cuande se lado yahn chundah, ndere rahn se che sahn nación yahn Israel se. Din che cahntihya se nan nchuhn cava che codevano se che yahinó nchuhn.

10 Redinahn nchuhn che rihquentiyón yahn che chenan cuma ne vedechantino. Chemin che ndedevahn nchuhn yahn castigo che va che co nducoyaca ihyan iyehanse.

11 A nun chí. Codin ne cudado ntiyon che chenan ne cava che nde ama ihyan hua ndahco ndiya ye nchuhn, detohnan ye ntiyon yahn ne, din ye che hua nuhnde menun yahn ne.

12 Ihyan che cocha ye quendah ye ne, ama ndah ro yahn ye. U din che conan ye nan che rihquentiyon Dendiohs yahn, ne hua nda ro che ndiquendah ye min. Nan ye ne, cuaconahn che duche Dendiohs yahn man, che duche yan yahn ye, Jerusalén ra man, che chi nde vahchetero nde nan va ye. Namin dirún che duché quenuma ra.

13 Nchuhn ihyan ndiyaco, cuendedecadino ndah ne che tihca rahn Vaco Dendiohs ri nchuhn.”

14 Namin codiron yahn sahn che rahndudo se ndudo yahn Dendiohs che quenan se yaco che va yan Laodicea: “Tuhca rahn Ihyan che devano cuaco ye man, che rahn ye ndudo cuaco man, ihyan min che nduco Dendiohs dendah ye nducuahn:

15 U devano nduhchan nchuhn nan ntiyon yahn; nde huane ihno ne, nde huane iche ra ne. Tahque ndah ne ndete che cuiquendi ne numa ino ne, o ama yune no cuihcoman ne.

16 Ate nducote vatemán ino ne ne, tahque ndah che cuacondah vedame nchuhn.

17 Nchuhn ne, rahn ne che ama va yahn ne, che ama ndahca rahno ne, che nde ama vederetahn yahn ne metah. Me nde hua retumacadino ne che ama ndache chenan ne man, ama chevah ne man. Anduhneca ndete ve nan ne man, anduhneca ndete che devane ne man.

18 Chemin che riyahvé nchuhn che dinahn ne ndudo yahn. Chemin ne, anduhneca diyahnguan ndah cava ne, cava che co niyon ne nduhca ihyan cuihca. Che dinahn ne ndudo yahn, quendi ne yune yahn ne, anduhneca che cuahtenun ne tino cua, ne ametah cora vedecuihno yahn ne che anduhneca ndete che devane ne. Namin cochihve yahn ne nduhca ico che cuih ne ndutinán ne cava che co ro nan ne.

19 U ne, riyahvé man, redin castigo man, nducoyaca ihyan che yahinó ihyan. Chemin che codin nun ino nchuhn, ne cuento ino ne nunde yahn ne.

20 Condiheche nchuhn. U ne, riyahvé ihyan. Ihyan che rihcovan ye ndudo yahn, ne renevahnecon ye u ne, conducó ihyan, dama chéh dama cúh nduco ye.

21 Ihyan che dinahn ye nde nan cuihnonan ne, cah yuné che nduco ye cuhnde ye nan che vá rihquentiyón, nduhca che dinahn man, ne vá dama nduco Chidá nan che rihquentiyon ye.

22 Nchuhn ihyan ndiyaco, cuendedecadino ndah ne che tihca rahn Vaco Dendiohs ri nchuhn.”

4

Rendeva ihyan yavenan Dendiohs vahchetero

¹ Chihno min ne, ndihcheró van yahnde yáhn ama chendevah che quen-dah vahchetero. Tuhme ángel che ráhn ye nducó menan me ne, ráhn tun ye. Ama yudo ndudo ye anduhneca ama trompeta cuahn che retive ihyan. Ráhn ye:

—Cochi muhn, ne nahmé di dehtenduh che va che co.

² Ndetahno din Vaco Ndah yahn Dendiohs che anduhneca ndete che vahchetero quenún, ne ndihcheró ama ihyan che va ye nan che rihquenti-yon ye.

³ Me ihyan min ne, ama diyahn ro ye anduhneca tu diyahn che duche jaspe man, cornalina man. Netahn cuaco nan va ye ne, quendihco ama che deca ro curecuhnde deca ro, ne ama diyahn ro nduhca che ro tu che duche esmeralda.

⁴ Numa ndive chihito nan che va ihyan ndinan me ne, vate ndico cun indih-te nan che rihquenti-yon ye. Ihyan chahn ne, chenun ye tino cua, ne chenun tin ye corona diyahnguan.

⁵ Nan che va ihyan ndinan me ne, ama riya cuah man, ama rine dave man, ama yudo ri man. Cuaco nan che rendihchero ihyan ndinan me ne, riche ndache yahn, ne checadinó te chemin che Vaco Ndah yahn Dendiohs.

⁶ Ndiyahn cuahn menan nan che va ye ne, deca ro tuyuno deca ro. Ama chahte anduhneca ama vine.

Netahn cuaco nan che va ihyan ndinan me ne, vate cun che deca ro ite deca ro, ne ama ndeh ndutinan chenah cuahn menan man, cuahn vedame man.

⁷ Ama ne, deca ro león deca ro, tama ne, deca ro itenine deca ro, tama ne, deca ro nan ihyan deca ro nan, ne tama ne, deca ro ihya che quendihco te devan yuhne deca ro.

⁸ Queri ama che deca ro ite deca ro me ne, chenah an reche, ne ama ndeh ndutinan chenah cuahn vedame man, cuahn menan man, man reche man. Nde ro nde ráhn hua reguan rendeva yavenan ihyan ndinan me, ráhn tuhca: Dihve nuhn Dendiohs, ndih che quenah cuma ne vederihquenti-yon che tahque chahte, ama ndah ne, ametah nde ama nunde yahn ne. Va ne numacuahn ro; hua nda ro che cuihno vederihquenti-yon yahn ne.

⁹ Queri ama yune che rendeva che deca ro ite deca ro me yavenan ihyan ndinan me che va ye numacuahn ro man, renecah nundihve cuahn ihyan man ne,

¹⁰ nduh che ndico cun indih-te chahn ne, rehntihya ye nan ihyan min, rendeva ye yavenan ye. Numacuahn vedene-cun rihntave queri ama ye corona yahn ye nan ye, ne ráhn ye:

¹¹ Dihve nuhn Dendiohs, redin yahn che ndeva nducoyaca ihyan yavenan ne,

te quenah cuma ne vederihquenti-yon chahte, dendah ne nducuahn che va. Ndete che hua ndih ne, nde metah dehva.

5

Dihvo vo Jesucristo ne, ndonda tah ye caca che chenah ndache sello

¹ Namin ndihcheró che ihyan ndinan me ne, nda ye ama caca ndechetive tah cuaco ye. Caca me ne, ndirun cuahn chete man, cuahn vedame man, ne ntude chiche, chenah ndache sello.

² Namin ndihcheró ama ángel che ama detino ye, ne chihneván che numa dito tumerune ye:

—¿A va ihyan che quenan cuma ye vederihquentiyon che ndeh ye sello, ntaḥ ye çaca cuh ne?

³⁻⁴ Ate numachahte iyehñse mañ, vahchetero mañ, vañ tenahn mañ ne, hua quendaḥ nde ama ihyan che quenan cuma ye vederihquentiyon che ndeh ye sello chahn, ndihchenan ye çaca me, ne chemin che ama chi rañ, nde chaco ura min.

⁵ Tuhme rañn ama cha indihthe chahn ri ye u:

—Ametah cueque. Nga ihyan che tahque yudo vederihquentiyon quenan cuma ye vañ ndata yahn Judá mañ, David mañ. A chicha ye dinahn ye ntiyon che quenan cuma ye, ne co ndeh ye nduh che ndache sello, ntaḥ ye çaca tih.

⁶ Tuhme ndihcheró ama itecuche lihn che a ndero ndi che a nihno ihyan ite ro menañ, ndi te vedino, nti te nino nañ va ihyan ndinañ me, mendahn nañ che chenun nduh che cun che deca ro ite deca ro me mañ, nduh che ndico cun indihthe chahn mañ. Chenan ndache diñhe te mañ, ndache ndutinañ te mañ. Checadinó te itecuche lihn me ne, a Dihvo vo Jesucristo. Che chenana ndache diñhe te ne, conahn che ama yudo vederihquentiyon quenan cuma ye. Che chenana ndache ndutinañ te ne, conahn che Vaco Ndah yahn Dendiohs che rañn numachahte iyehñse ne, quenun ihyan.

⁷ Tuhme chahn ye, ne ndondaḥ taḥ ye çaca me che nda ihyan ndinañ me taḥ cuaco ye.

⁸ Ura che chetaḥ ye çaca me ne, cuahn nduh che cun che deca ro ite deca ro me, ne chehntihya nañ ye. Namin nduh che ndico cun indihthe chahn ne, cuahn ye chehntihya ye nañ ye, nda queri ama ye ama arpa mañ, ama cu diyahnguan che richenun cuhn mañ. Checadinó te yahme cuhn me ne, chemin ndudo che revañ ihyan yahn Dendiohs.

⁹ Tuhme canañ rita nduh che cun che deca ro ite deca ro me mañ, indihthe chahn mañ, ama himno ra che tuhca:

Ndih ne, redin yahn che ndondaḥ taḥ ne çaca me, ndeh ne sello yahn, te chihno ihyan iyehñse ndih, ne chera yun yahn ne çava che ndedevahn ne ihyan queri ama nación mañ, queri ama nañ ndata yahn ye numachahte iyehñse mañ, queri ama nañ devaco mañ, nedin yahn Dendiohs ihyan.

¹⁰ Ihyan chahn ne, din ne che chi ye ihyan yahn Dendiohs mañ, chi ye anduhneca chidocuyan che cuahtenan ye nañ ntiyon yahn ye mañ.

Ihyan chahn ne, çahcantiyon ye ihyan iyehñse.

¹¹ Tuhme ndihcheró che ama yahn ángel ndito ye ntaḥn cuaco nañ che va ihyan ndinañ me mañ, nañ che chenun nduh che cun che deca ro ite deca ro me mañ, nduh che ndico cun indihthe chahn mañ, ne chihneván

¹² che ama dito rañn ye tuhca:

Ihyan tih che chih ye nduhca ama itecuche lihn che ndi te vedino ne, redin yahn che ndeva nducoyaca ihyan yavenañ ye, te quenan cuma ye vederihquentiyon chahte mañ, va taḥ ye nducuahn che va mañ, nducuahn vededevano mañ.

¹³ Tuhme nducoyaca ihyan che vate ye vahchetero mañ, ihyan che vate ye iyehñse mañ, tenahn mañ, nducoyaca nañ ite che vate te iyehñse mañ, vañ nuniyahn mañ, nde nducuahn dehtenduh che va ne, rañn tuhca:

Dendiohs che va ne rihquentiyon ne mañ, Dihve nuhn che chih ne nduhca ama itecuche lihn che chi te vedino mañ,

ndeva nuhn yavenañ nchuhn cuahn dama, te ama yudo vederihquentiyon chenana cuma ne.

¹⁴ Namin nduh che cun che deca ro ite deca ro me ne, rañn:

—¡Tihca!

Tuhme nduh che ndico cun indihthe chahn ne, chehntihya ye, ndeva ye yavenan Dendiohs, ihyan min che va ye numacuahn ro.

6

Dihvo vo Jesucristo ne, ndeh ye sello che chenán nan caca me

¹ Chihno min ne, Dihvo vo, ihyan min che chih ye nduhca ama itecuche lihn che chi te vedino ne, ndihcheró che ndeh ye ama sello chahn, ne chihneván che yahve ama cha che decá ro ite decá ro me u. Ama yudo ndudo nduhca che rine dave, ne rahn:

—jCochi condihchero!

² Tuhme ndihcheró ama caballo cua, ne ihyan che quendudo ye ite ne, ndonda tah ye ama corona, ne cuahn ye ndahco ndiya ye ihyan iyehñse, nda ye ama nducoruhnde nduco yave.

³ Cuahn che ndeh Dihvo vo tama sello ne, chihneván che yahve tama che decá ro ite decá ro me u:

—jCochi condihchero!

⁴ Tuhme ndihcheró ama caballo cuah, ne ihyan che quendudo ye ite ne, ndonda tah ye vederihquentiyon che din ye che cuahtecuhma ihyan iyehñse, cahno ye vih. Namin ndonda tah ye ama espada chahte.

⁵ Cuahn che ndeh Dihvo vo tama sello nan che chi ino ne, yahve tama che decá ro ite decá ro me u:

—jCochi condihchero!

Tuhme ndihcheró ama caballo cuan, ne ihyan che quendudo ye ite ne, nda ye ama icade.

⁶ Chihneván ama ndudo che chica nan che chenanduh che cun che decá ro ite decá ro me che rahn tuhca:

—Codin che cuhnde cuico nde atenan ama kilo trigo o ino kilo cebada ndaca ihyan yahn che din ye ntiyon ama ro. Ate hua decuihne yahn olivo man, dihyo uva man, cava che ndaca aceite man, vino man.

⁷ Cuahn che ndeh Dihvo vo tama sello nan che a chi cun ne, yahve tama che decá ro ite decá ro me u:

—jCochi condihchero!

⁸ Tuhme ndihcheró ama caballo cuan, ne checadinó te ihyan che quendudo ye ite ne, a ihyan min che vederih. Cuahn vedame ye ne, cuahn tama ihyan, ihyan min che duche ye Nan Che Chenán Rinó Tenahn. Ihyan chahn ne, ndonda tah ye vederihquentiyon che din ye che cuhnde canda man, cuhnde cuico man, cuhnde cah man, cahno ite tan ihyan man, ne coh a nahn man va ihyan iyehñse.

⁹ Namin min va ama nan ta, ne cuahn che ndeh ye tama sello nan che a chi uhn ne, man nan ta me ne, ndihcheró nducoyaca ihyan che chihno ihyan iyehñse ihyan yahn che chitahno ye Ndudo yahn Dendiohs man, cahndudo ye man.

¹⁰ Ihyan chahn ne, numa dito ye rahn ye:

—Dihve nuhn Dendiohs, ndih che ama ndah ne, ne redinahn ne ndudo yahn ne, zticuahn techecade ne yahn nuhn, din ne castigo ihyan iyehñse che chihno ye nuhn ne?

¹¹ Tuhme ndonda tah ihyan chahn tino cua che cuahtenun ye, ne rahn Dendiohs ri ye ihyan che cuahte tuhno ca ye nde conan nda nducoyaca ihyan che namin ritahno ye Dihvo vo Jesucristo, redin ye ntiyon yahn ye, che a vade che cahno ihyan iyehñse ihyan nduhca che chihno ye ihyan chahn.

¹² Cuahn che ndeh Dihvo vo tama sello nan che chi an ne, ndihcheró che ama nuhn yahn. Yahn ne, ama chi cuan, nduhca che ro tino cuan ro. Iyo ne, ama chi cuah nduhca che ro yun ro.

¹³ Iyon ne, chera numachahte iyehñse nduhcá che ra higo cuahn che rano yuhne ñan.

¹⁴ Dehtenduh che chenan ñan ro ne, chihno anduhnecá che nedihno chi. Ico ñan, yahn cuma che vate ñan nuniyahn ñan ne, chihno ndahchetahn.

¹⁵ Tuhme nducoyaca ihyan che chenan cuma ye vederihquentiyon ñan, ihyan ndinan ñan, ihyan ñahn ñan, ihyan cuihca ñan, ihyan ndinan yahn sandado ñan, ihyan che redin ye ntiyon yahn ihyan ñan, ihyan che redin ye ntiyon yahn ñan ye ñan, nducoyaca ihyan chahn ne, chahtenun ndeh ye chete iviyava ñan, tinduh rendah tu ñan.

¹⁶ Nde ama ñahn ye che ico ñan, yava ñan, cora ndudo ihyan cava che chendih ihyan, ne Dendiohs, ihyan min che va ye rihquentiyon ye ñan, Dihvo vo, ihyan min che chih ye nduhcá ama itecuche lihn che chi te vedino, ihyan min che quenan cuma che din ye castigo ihyan chahn numacuahn vedetan ñan ne, hua ndihchero ye ihyan,

¹⁷ te a ndá ro che co ye castigo yah, ne nde ama ye hua cocha ye.

7

Ihyan nación yahn Israel che ndeva Dendiohs

¹ Chihno min ne, ndihcheró cun ángel che vatendi ye ñahn cuaco iyehñse. Ihyan chahn ne, nda ye vederihquentiyon che hua cuahnecun ye che cuano yuhne numachahte iyehñse, ndiyahn ñan, ñan yahn ñan, ñan nuniyahn ñan.

² Namin ndihcheró tama ángel che nda ye, cochi ye cuahn ñan che riquendah yahn, nda ye sello yahn Dendiohs, ihyan min che va ye vahchetero. Rahn ángel me numa dito ye ri ye nduh che cun combiero yahn ye che vatendi ye iyehñse, ihyan chahn che nda ye vederihquentiyon che din ye che chuhrihn ihyan iyehñse:

³ —Codin nchuhn cudado che hua cuano yuhne ñan ndiyahn ñan, ñan yahn ñan, ñan nuniyahn ñan, numanahn che metañ ñahn vo sello chata nducoyaca ihyan yahn Dendiohs yuhn vo.

⁴ Tuhme chihneván nduhva yahn ihyan nación yahn Israel che chenan sello ihyan, ne ri ye ama ciento quenan o raco cun mil ihyan chahn.

⁵ Ñan ndata yahn Judá ne, ndichio mil ye, ñan ndata yahn Rubén ne, ndichio mil ye, ñan ndata yahn Gad ne, ndichio mil ye,

⁶ ñan ndata yahn Aser ne, ndichio mil ye, ñan ndata yahn Neftalí ne, ndichio mil ye, ñan ndata yahn Manasés ne, ndichio mil ye,

⁷ ñan ndata yahn Simeón ne, ndichio mil ye, ñan ndata yahn Leví ne, ndichio mil ye, ñan ndata yahn Isacar ne, ndichio mil ye,

⁸ ñan ndata yahn Zabulón ne, ndichio mil ye, ñan ndata yahn José ne, ndichio mil ye, ne ñan ndata yahn Benjamín ne, ndichio mil ye.

Ama yahn ihyan chenun ye tino cua

⁹ Chihno min ne, ndihcheró ama yahn ihyan che chica ye numachahte iyehñse, queri ama nación ñan, queri ama ñan ndata yahn ye ñan, queri ama ñan devaco ñan. Nto dama nducoyaca ye, vatendi ye cuahn menan ñan che va Dendiohs ñan, ñan che nti Dihvo vo, ihyan min che chih ye nduhcá ama itecuche lihn che chi te vedino ñan Dendiohs ñan. Ama yahn ihyan chahn che nde ama ihyan hua co cah duche ye ihyan. Chenun ye tino cua, chetah ñah queri ama ye yata iyon.

¹⁰ Rahn nducoyaca ye numa dito tuhca:

Ndih Dendiohs yahn nuhn che va ne rihquentiyon ne ñan,

ndih Dihve nuhn che chih ne cava nuhn nduhca ama itecuche lihn che chi te vedino man,

rendeva nuhn yavenan nchuhn che ndedevahn ne nuhn.

¹¹ Namin nducoyaca angel vatendi ye ntañ cuaco nan va ihyan ndinan me man, nan che chenun nduh che cun che deca ro ite deca ro me man, nduh che ndico cun indihthe chahn man, ne chehntihya ye, ndeva ye yavenan Dendiohs.

¹² Rahn ye:

—¡Tihca! Redin yahn che ndeva nducoyaca nuhn yavenan ne, nte nuhn nundihve cuahn ndih numacuahn ro, te quenán cuma ne vederihquentiyon chahte man, nducuahn vededevano man, ne hua nda ro che cuihno.

¹³ Tuhme tumerune ama cha indihthe chahn u:

—Ihyan sih che chenun ye tino cua ne, za devene duh ihyan ye man, ti chica ye man ne?

¹⁴ Ndahconán yahn ye:

—Hua devanó, ate rahcó te a devano man ne.

Tuhme rahn ye ri ye u:

—A ihyan sih che chuh ye vedeyah che chihnde iyehñse. Chitahno ye Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs. A ndevahn ye. Anduhñeca ndete che nano ye tino yahn ye, ndo cua nduco yun yahn Dihvo vo.

¹⁵ Chemin che chenun ye muhn vahchetero, rendeva ye yavenan Dendiohs nde ro nde rahn. Dendiohs ne, conduco ye ihyan, din ye cudado ihyan.

¹⁶ Ametah chuhrihn ye, nuhn ye che cheh ye man, che cuh ye man, ametah chuhrihn ye, cuahtenun ye van yan man, van ihno man,

¹⁷ Te nduhca che redin ihyan cudado itecuche yahn ye, riquenda ye ite, rih te nune ne, tihca din Dihvo vo Jesucristo cudado ihyan chahn, ndeva ye ihyan, cuahtenan ye vahchetero numacuahn ro. Ihyan chahn ne, din Dendiohs che ama co yeno ye, ametah ndaconan cadino ye deh che vederan man, deh che cuaco ye man.

8

Ndeh Dihvo vo Jesucristo tama sello nan chi ndache

¹ Cuahn che ndeh Dihvo vo tama sello nan che chi ndache ne, co tenduh mahñ ura ama chi dihn vahchetero.

² Chihno min ne, ndache angel chahn che vatendi yan ye nan Dendiohs ne, ndihcheró che ndonda tah ye ama trompeta queri ama ye.

³⁻⁴ Tuhme nda tama angel, nda ye ama cu diyahnguan che richenun cuhn, ne cuahn ye nan ta diyahnguan me che va nan Dendiohs. Ndonga tah ye ama ndeh cuhn cava che cahquiyahn ye, ne ca yahme yahn ura che revah ihyan yahn Dendiohs.

⁵ Cuahn che chihno chiche cuhn me ne, chetañ angel me nducoyahn nan ta, chih ye chete cu che richenun cuhn me, ne chihñtera ye numachahte iyehñse. Ndetahno nuhn yahn man, chiya cuah man, chine dave man, ama yudo chi man.

Tive angel chahn trompeta

⁶ Tuhme chahteyan angel chahn cava che tive ye trompeta yahn ye.

⁷ Cuahn che tive ama ye ne, chera yun man, yahn man, yun man, numachahte iyehñse, ne chihno chiche a nahn mahñ yahn man, a nahn mahñ yahn rahte man, nducuahn chano man.

⁸ Cuahn che tive tama ángel ne, ama che deca ro ico deca ro, ama riche, chendahnun chete nuniyahn, ne a nahn mahñ nuniyahn ndacondá yun.

⁹ Namin barco che vatechica nan nuniyahn ne, a nahn mahñ va chihno ndeh, ne a nahn mahñ va ite che chenun te van nuniyahn chihno chih te.

¹⁰⁻¹¹ Cuahn che tive tama ángel nan che a chi ino ye ne, ama iyon ndico che duche Ajenjo, ama riche, chica nan ro, chera van nune che va iyehñse, ne a nahn mahñ va ico man, vaco nune man, ndacondá nune ya. Ama yahn ihyan chih ye, din nune ya me.

¹² Cuahn che tive tama ángel nan che a chi cun ye ne, chihno a nahn mahñ dave yahn yahn man, dave yahn iyo man, dave yahn iyon man, ne a nahn mahñ yahn ne, chiya dah man, a nahn mahñ yan ne, hua quendihco dave iyo man.

¹³ Tuhme ndihcheró ama ángel che quechica ye devan yuhne nan mahñ nan ro, ne chihneván che rahn ye numa dito ye:

—Chevah ihyan iyehñse, jama yah rí cava ye cuahn che tive te ino ángel chahn trompeta yahn ye!

9

¹ Cuahn che tive tama ángel nan che a chi uhn ye ne, ndihcheró ama ihyan che deca ro iyon deca ro ye, chica ye nan ro, chiya ye ndiyahn. Ndondá tah ye ama llave yahn infierno.

² Ndetahno che nahne ye ne, quendah yahme nduhca che riquendah nan ama hornó chahte, ne ama chi man numachahte.

³ Van yahme me ne, quendah yahcadahn che chenan cuma te vederihquentiyon nduhca vederihquentiyon che chenan cuma itedahn.

⁴ Din Dendiohs che hua cheh te chano man, yata yahn yahn man, atenan ihyan che hua chenan sello yahn Dendiohs chata ye va che din tan te nduco ye.

⁵ Cahñecun Dendiohs che cah te ihyan chahn chete che uhn iyo, ate hua cahñecun ye che cahno te ihyan. Ama rendih run yahn te nduhca che rendih run yahn itedahn.

⁶ Checadinó te cuahn che conahn chemin ne, ama nahn ihyan che coh ye, ate metah vederih cava ye ro min, te va che co ye castigo.

⁷ Yahcadahn chahn ne, ama vateyan te nduhca che rahteyan caballo che rahn te van canda. Tin te ne, chenan ama nan che deca ro corona diyahnguan deca ro. Nan te ne, deca ro nan ihyan deca ro.

⁸ Yudo tin te ne, ama rahno nduhca yudo tin ndahta. Dihyon te ne, nduhca dihyon León.

⁹ Date yahn te ne, nduhca cu che renun ticua sandado che rendedevahn sahn tihca. Cuahn che ra te ne, ama yudo rahco reche te nduhca che rahco carro che rinda yuhdo van canda.

¹⁰ Nducodahn te ne, chendudo yan yahn nduhca itedahn, ne va vederihquentiyon yahn cava che cah te ihyan chete che uhn iyo.

¹¹ Angel yahn infierno che ndinan ye yahn te. Devaco hebreo ne, duche ye Abadón, ne devaco griego ne, duche ye Apolión. Tihca duche ye, te ihyan min che redecuinho ye ihyan.

¹² Nduco chemin ne, a chuh ama nan vedeyah, ate renda ca te o.

¹³ Cuahn che tive tama ángel nan che a chi an ye ne, chihneván ama ndudo che chica nan ta diyahnguan me, van nduh che cun dihne te che ninetave me,

¹⁴ ne rahn ri ángel che cade tive ye trompeta me:

—Cuentate nduh che cun ángel che nchiche ye chihto ico chahte che duche Eufrates.

¹⁵ Angel chahn ne, chenán rino ye nde ndá ura min che ntáte ye, te chenán cuma ye ntiyon che ndá ura min ne, va che cahno ye a nahn man va ihyán iyehñse.

¹⁶ Chihneván nduh va yahn sandado yahn ye che chendudo se yuhdo, ne ri se o ciento millón.

¹⁷ Ndiheró che chenun se cu che duche coraza. Color yahn ne, cuah man, cue nan ro man, cuan man. Caballo yahn se ne, nduhca nan león tihchan nan te. Chende te ne, riquenda yahn man, yahme man, azufre man.

¹⁸ Nduco yahn man, yahme man, azufre man, che riquendah chende te ne, chihno te a nahn man va ihyán iyehñse.

¹⁹ Caballo chahn ne, chenán cuma te vederihquentiyon che cahno te ihyán nduco chende te man, nducodahn te man. Nducodahn te ne, nduhca cu tihca, ne nduco chemin ne, renuhn yah te ihyán.

²⁰ Ihyán che ndevahn ye che hua chihno te ihyán ne, hua nto ino ye nunde yahn ye, quendi ye rendeva ye yavenan vaco chihnga man, dehtenduh che redendah man ye, redin ye dendiohs yahn ye man. Dehtenduh chemichan ne, redindah ye nduco diyahnguan man, diyahngua man, cu cuan man, tu man, yahn man, ne ndere chenán ndutinan, ate hua roñan, ndere chenán revan, te hua rihnevan, ndere chenán cah, te hua rica.

²¹ Ihyán chahn ne, hua nahn cahcoman ye yune chihnga yahn ye. Tahque ndah ye ne, quendi ye rihno ye vih man, reduco ye man, redin cuah ye man, ndere rahtenan ye nduco ihyán che hua nihnevaco nduco ye man.

10

Ama ángel nda ye ama caça lihn

¹ Chihno min ne, ndihcheró tama ángel che detino ye chica ye vahchetero, chiya ye ndiyahn. Quendihco ama man ntahn cuaco chihto nan ye man, quendihco ama curecuhnde nihno tin ye man. Nan ye ne, ama diyahn ro nduhca yahn che quenán nan ro. Cah ye ne, nduhca che ro ruchiyahn tihca ro.

² Nda ye ama caça lihn nentah ye. Chihno ye cah cuaco ye nan nuniyahn, ne cah cueh ye ne, chihno ye ndiyahn.

³ Tuhme cah ye numa dito ye, ne ndudo ye ne, nduhca ndudo león cuahn che retuhche te. Cuahn che cah ye ne, chihneván ndache yune ndudo che ama yudo chenun nduhca che rine dave.

⁴ Chihno min ne, a va yan che dirún deh conahn ndudo chahn, ate ndaconan chihneván tama ndudo che chica vahchetero che rahn nducó: —Conun ine nduh che ndache ndudo che chihneven, ne hua diron.

⁵ Tuhme ángel me che nihno cah ye nan nuniyahn man, ndiyahn man ne, ndihcheró che chenihyon ye tah cuaco ye nan ro, ne chihneván che rahn ye:

⁶ —Nde muhn nde nan Dendiohs, ihyán min che va ye cuahn dama man, ihyán min che dendah ye nan ro man, iyehñse man, nuniyahn man, nducuahn che va man, a nun cuahn conahn

⁷ ndudo yahn ye che cah ye checadino ihyán profeta yahn ye, che nde hua devano ihyán ro menan. Cuahn che tive tama ángel nan che a co ndache ye ne, conahn.

⁸ Tuhme ndudo che a chihneván menan che chica vahchetero ne, ndaconan rahn nducó:

—Cochi, cotah caça che nda ángel che nti ye nan nuniyahn man, ndiyahn man.

⁹ Tuhme cháhn nān ángel chicá caca me ihyan, ne rañn ye ri ye u:

—Nga, cocheh. Ura che cheh ne, ama yade chihn nduhca che rihñ nedih yahn, ate cuihno cheh ne, ndacondā ya.

¹⁰ Chéh caca me, ne chinahn nduhca che rañn ángel me ri ye u.

¹¹ Tuhme chihneván tama ndudo che rañn ri u:

—Va ca ndudo che diron yahn dehtenduh che va che cuahno co ama yahn ihyan, queri ama nación man, ndata yahn ye man, devaco yahn ye man, yahn che va che cuahno co ihyan ndinān man.

11

O ihyan che cuahndudo ye ndudo yahn Dendiohs

¹ Chihno min ne, ndonda tāh ama nducocade, ne chihneván che rañn Dendiohs ri ye u:

—Cuedecade yaco chahte yahn man, nan ta man. Namin codin doche ihyan che chenun ye chete, rendeva ye yavenān.

² Ate hua decade cuahn chevah, te min ne, a ndonda tāh sahn tama nación, ne condinun condināhno se yan yahn chete che o raco o iyo.

³ Cuedevene te dechuh o ihyan che chenun ye tino cuan, cuahndudo ye ndudo yahn chete che ama mil quendudo o ciento ino raco ro.

⁴ Nan Ndudo yahn Dendiohs nan che ndirun yahn o yahn olivo man, o candelero man, che vatendi nan Dendiohs, ihyan min che rihquentiyon ye iyehñse ne, checadinó te chemin ne, a yahn ihyan che o chahn che cuahndudo ye ndudo yahn Dendiohs.

⁵ Ndete che vate ihyan che nahn din tan ye nduco ihyan chahn ne, quendañ ruchiyañ chende ye, ne cuihno cuco ye. Nducoyaca ihyan che din tan ye nduco ihyan chahn ne, va che coh ye.

⁶ Cuahtenan cuma ihyan chahn vederihquentiyon cava che din ye che hua cuan co numanahn che cuahndudo ye man, che din ye che nune ne, ndacondā yun man, che din ye che cuhnde nducuahn nan vedeyah iyehñse adehno ura che nahn ye man.

⁷ Ate cuahn che a dinahn ye ntiyon che cuahtenan cuma ye ne, quendañ ama ite tan nan infierno, cuhma te nduco ye, ne cahno te ihyan.

⁸ Cotave ye cuan yune viyan, yan chahte me nan che quenān yah Dihvo vo Jesucristo. Nahn cuan ne, rañn ihyan te yan min ne, a nahn dama nduco Egipto man, nduco Sodoma man.

⁹ Nducoyaca ihyan, queri ama nación man, ndata yahn ye man, devaco yahn ye man ne, ndihchero ye tenāñ chahn chete che ino ro quenān man, ne hua cuahñecun ye che cueheche ye.

¹⁰ Ihyan iyehñse ne, ama co yeno ye cuahn che coh ihyan chahn, nde tuno dechuh ama tama ye vedino yahn vih. Ama co yeno ye che coh ihyan chahn, te ama chuhrihn ye yahn vederihquentiyon che cuahtenan cuma ye.

¹¹ Ate cuihno ino ro quenān man ne, ndedetuhche Dendiohs ihyan, ne nducoyaca ihyan che ndihchero ye ne, ama dihya ye co.

¹² Cahnēvan ihyan chahn ama ndudo che caca nan ro, ama dito cahma nduco ye:

—Cochi nchuhn.

Tuhme nducoyaca ihyan che hua ri rendihche ye ihyan chahn ne, ndihchero ye che ndā ye vahchetero van man.

¹³ A ura min no ama nuhn yahn, ne ama ndeh cuan cora vah viyan, coh ndache mil ihyan. Ihyan che hua coh ye ne, ama dihya ye co, nde tuno ndeva ye yavenān Dendiohs, ihyan min che va ye vahchetero.

14 Nduco chemin ne, co o yune che cuhnde vedeyah, ate renda ca tama.

Nan che chi ndache ángel che tive ye trompeta

15 Cuahn che tive tama ángel nan che a chi ndache ye ne, chihneván che ama yudo chenun ndudo yahn ama yahn ihyan vahchetero che rahn tuhca: Nducuahn vederihquentiyon che va iyehñse ne, a ndonda tah Dihvo vo Dendiohs man, Dihvo vo Jesucristo, ihyan min che dechuh ye, ndedevahn ye ihyan iyehñse man.

Dihvo vo Dendiohs cahcantiyon ye numacuahn ro.

16 Tuhme nduh che ndico cun indihche chahn ne, chehntihya ye, ndeva ye yavenan Dendiohs,

17 ne rahn ye:

Dihve nuhn Dendiohs che ama chahte vederihquentiyon quenan cuma ne man, che va ne numacuahn ro man,

rente nuhn nundihve cuahn ndih

yahn che chihco ro ne vederihquentiyon chahte yahn ne man,

canan rihquentiyon ne numa dito ne man.

18 Chi tan ihyan iyehñse,

ate a nda ro che cuhnde cade yahn nducoyaca ye man, tenahn man,

din ne castigo ihyan che hua ri rendihche ye ndih man,

decuihno ne ihyan che redetohnan ye iyehñse man.

A nda ro che ndeva ne ihyan profeta yahn ne man,

nducoyaca ihyan yahn ne, a chahte o hua chahte vederihquentiyon chenán cuma ye man.

19 Tuhme vahchetero nan che va Dendiohs ne, ndihcheró yave nan che quenun ndah ndudo che cah ye che ndedevahn ye ihyan yahn ye. Ura min ama nuhn yahn man, ama chiya cuah man, ama chine dave man, ama chera yun man.

12

Ihyan ndahta che cuhn ite tan nduco ye

1 Van yahnde yahn ne, ndihcheró che chinahn ama vederihno nan ro. Chihnde ro ama ihyan ndahta che deca ro dave yahn yahn deca ro tino yahn ye man, che quenun tin ye ama corona che chenán ndichio iyon man, ne cuahn ndiya cah ye ne, quenán iyo.

2 Ihyan min ne, rah ye che a ra yah chete ye, te nda ura che cuacoyahn ye.

3 Tuhme chihnde ro ama ite tan che ama yu ca te. Ite min ne, cuah te, ne chenán ndache tin te man, ndiche dihne te man. Queri ama tin te ne, quenun ama corona.

4 A nahn mahñ va iyon che chendihco nan ro chihtera te nde ndiyahn nduco nducodahn te. Chandi yan te nan ihyan ndahta me cava che cheh te daya ye ndetahn che cuhndeyan.

5 Ihyan ndahta me ne, chacoyahn ye ama decuah chahn che a va cade che cahcantiyon numachahte iyehñse. Ama chahte vederihquentiyon conan cuma, nde ama ihyan hua co ndahco ndiya ye. Ate hua chi cheh te decuah me, te ndeva Dendiohs, chaconahn ye nan vederihquentiyan yahn ye.

6 Tuhme chano ihyan ndahta me, cuahn ye conan ye ama cuan yahn nan che metah duhva nan che a ndihcoyan Dendiohs. Min cahcacheh ye ihyan chete che ama mil quendudo o ciento ino raco ro.

7 Adiva ne, Miguel nduco ángel che rihquentiyon ye ne, cuhn ye nduco ite tan me man, ángel yahn te man.

8 Hua chicha te, ne ametah chi chahtenan te vahchetero nduco vih.

⁹ Tahque ndah ne, chacondah ye ite nduco ihyan yahn te nde ndiyahn. Ite tan me ne, a chemin che chundah, sahn min che ndaconda se cu ro menan me man, sahn min che quechica numachahte iyehanse, rihnceh se ihyan man.

¹⁰ Tuhme chihneván ama ndudo vahchetero che ama dito rahn:

—A chihco ro Dendiohs yuhn vo vederihquentiyon chahte che quenan cuma ye, a ndero ndi che a ndedevahn ye ihyan yahn ye. Dechuh ye Dihvo vo Jesucristo, cava che ndedevahn ye ihyan iyehanse, ne a nda ro che ndonda tah ihyan min vederihquentiyon, cuanan cahcantiyon ye. Tihca, te a denda chundah, sahn min che ricanunde se yahn dihno vo nan Dendiohs nde ro nde rahn.

¹¹ Dihno vo chahn ne, ndahco ndiya ye vederihquentiyon yahn se, te chi chahtino ye Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs, quendi ye cahndudo ye Ndudo Ndah yahn ye, nde hua din vah ye sahn andahre va che coh ye.

¹² Chemin che nchuhn che vate ne vahchetero ne, cuahte ne vedeyeno. Me nchuhn che vate ne iyehanse man, che vatechica ne nan nuniyahn man ne, iyah ri cava ne!, te nducote denda chundah ne, numacuahn vedetan cochi se van nchuhn, ne a devano se te cuihno te neve ro me, a cuihno vederihquentiyon yahn se.

¹³ Cuahn che chendah ite tan me nde ndiyahn ne, quendah te ihyan ndahta me.

¹⁴ Ate ihyan ndahta me ne, din Dendiohs che quenan reche ye nduhca reche ihya, nduco tihca ndevahn ye, ne quendihco yaco ye, cuahn ye yahn nan che metah dehva. Min cahcaceh Dendiohs ihyan chete che ino nduyo quenan mahn.

¹⁵ Ite tan me ne, tendah te nune chende te cava che ndo ama ico, canerine ihyan ndahta me.

¹⁶ Ate hua dehva chi yahn ye, te chehchenun yahn min, ne chera nun nune me.

¹⁷ Nduco chemin ne, ama chi tan ite min nduco ndahta me, ne cuahn te, din tan te nduco ndata yahn ye, ihyan chahn che redinahn ye vederihquentiyon yahn Dendiohs, ritahno ye Dihvo vo Jesucristo.

13

O ite tan

¹ Van yahnde yahn ne, anduhneca ndete che chandi chihto nuniyahn. Min ndihcheró ama ite tan che chenah ndache tin te man, ndiche dihne te man. Queri ama dihne te ne, quenan ama corona, ne queri ama tin te ne, quenan ama ndudo che chihnga rahn yahn Dendiohs.

² Ite min ne, deca ro yahyan de ca ro te. Cah te ne, nduhca cah oso, ne chende te ne, nduhca chende león. Ite tan che quendah te ihyan ndahta me ne, ndaco te vederihquentiyon che quenan cuma te tah ite che deca ro yahyan deca ro me cava che cahcantiyon te menun te.

³ Ite che deca ro yahyan deca ro me ne, ama tin te ne, ama yah, adeche coh te. Ate ndoyahn te, ne ama rahn ino ihyan iyehanse, ne chinduco ye ite.

⁴ Ihyan iyehanse ne, ndeva ye yavenan ite ndinan me yahn che ndaco te vederihquentiyon yahn te tah ite che tama me. Namin ndeva ye yavenan ite che ndonda tah te vederihquentiyon me, ne rahn ye yahn te:

—Metah nde ama ihyan nduhca te. Nde ama ye hua co ndahco ndiya ye vederihquentiyon yahn te.

⁵ Namin ndonda tãh te vederihquentiyon che ndonan man te ite man, chihnga cahma te yahn Dendiohs man, ne cahncun Dendiohs che cahcantiyon te chete che o raco o iyo.

⁶ Chihnga rahn te yahn Dendiohs man, ndahchenan te vahchetero nan che va ye man, ihyan yahn ye che chenun ye min man.

⁷ Namin cahncun ye che cuhma te nduco ihyan yahn ye nde ndahco ndiya te ihyan, ne nuhnde tãh te vederihquentiyon che cahcantiyon te nducoyaca ihyan iyehñse, queri ama naciòn man, queri ama ndata yahn ye man, devaco yahn ye man.

⁸ Nan libro yahn Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs ne, nde ro che metañ cuhnde iyehñse ne, chenana caça ihyan che chenana cuma che cuahtenan ye vahchetero numacuahn ro, ne nducoyaca ihyan che hua chenana che duche ye nan libro me ne, ndeva ye yavenan ite min.

⁹ Nducoyaca nchuhn, cuendecadino ndah ne yahn ndudo che cahma.

¹⁰ Cuedevano ne te nducoyaca ihyan che din ye preso ihyan chenahn ne, namin va che co ye preso, ne ihyan che cahno ye ihyan ne, namin nduco vederih min va che coh ye. Chemin che ihyan yahn Dendiohs ne, nahn che cuahtenan cuma ye vedechahntino man, nahn che quendi ye cotahno ye Dihvo vo Jesucristo man.

¹¹ Chihno min ne, ndihcheró tama ite tan che quendañ ro te ndiyahn. Ité min ne, chenana o diñne te che deca ro diñne itecuche lihn deca ro, ne numacuahn vedetan rah ta te.

¹² Quenan cuma te vederihquentiyon yahn ite che chi yah tin me, ne redinahn te yahn te, nde redin te fuerza ihyan iyehñse che ndeva ye yavenan ite min.

¹³ Redin te vederihno rahte nde redin te che ra yahn che rica nan ro, rendihchero ihyan.

¹⁴ Ite ndinan me, ite min che ndoyahn te che ndaca yah tin te nduco espada ne, cah yune te che din ite che tama me vederihno, ne nduco chemin chihñcheh te ihyan iyehñse, chinun te ihyan che ntave ye ite ndinan me.

¹⁵ Cuahn che a ntave ye ite che ndinan me ne, ndonda tãh ite che tama me vederihquentiyon che din te che conun ico man, che co cahma man, ne cahcantiyon te che coh ihyan che hua ndeva ye yavenan.

¹⁶ Chihquentiyon te che ihyan che rinduco ye ite, nde checahya nde checune, ihyan cuihca man, ihyan chevah man, ihyan che redin ye ntiyon yahn ihyan man, ihyan che redin ye ntiyon yahn man ye man, che conan cade yahn ite ndinan yahn te tãh cuaco ye o chata ye.

¹⁷⁻¹⁸ Nde ama ihyan hua co cua ye, nde hua co ndihcue ye, ndete che hua quenan cade yahn te ihyan. Cade min ne, número an ciento quenan ino raco an, ne nahn che ndecadino nchuhn nduco cudadado cava che conahn ne deh conahn.

14

Ihyan che ama ciento quenan o raco cun mil chahn ne, chita ye ama himno ra, ndeva ye yavenan Dendiohs

¹ Chihno min ne, ndihcheró Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs, nti ye tingüete che duche Sion, ne nduco ye ihyan che ama ciento quenan o raco cun mil chahn che chenana cade chata ye che duché Dihvo vo man, Chido vo Dendiohs man.

² Chihneván che ri ihyan arpa, ne ama yudo chenun che ca nahn nahn rahco man, nduhca che rine dave man.

³ Tuhme canan rita ihyan chahn ama himno ra nan va Dendiohs, min nan che chenun nduh che cun che deca ro ite deca ro me man, nduh che ndico cun indihthe chahn man. Nde ama ihyan hua co conun ino ye himno min, atenan ihyan che ama ciento quenan o raco cun mil chahn che ndedevahn Dendiohs ihyan van ihyan iyenhse.

⁴ Ihyan che ama ciento quenan o raco cun mil chahn ne, hua chahtenan cuma ye ndahta. A ihyan chahn menan vihca che ndihco vih Dendiohs ihyan cava che din ye ntiyon yahn ye man, ntiyon yahn Dihvo vo Jesucristo man. Rinduco ye Dihvo vo nan ntiyon yahn ye adecotino che quechica ye.

⁵ Ihyan chahn ne, hua nte ye nde ama ndudo cuendo, dave yavenan ye nan Dendiohs.

Ino ángel

⁶ Chihno min ne, ndihcheró ama ángel che quechica ye devan yuhne mendahn nan ro, nda ye vederihquentiyon che cuahndudo ye Ndudo Ndah yahn Dihvo vo Jesucristo, cahnevan nducoyaca ihyan iyehense, queri ama nación man, ndata yahn ye man, devaco yahn ye man.

⁷ Rahn ángel me numa dito ye:

—Cuenevahnecon nchuhn Dendiohs, ihyan min che dendah ye nan ro man, iyehense man, nuniyahn man, vaco nune man. Cuendeva ne yavenan ye, te a nda ro che techecade ye.

⁸ Tuhme quenda yahn tama ángel, ne rahn ye:

—Ihyan yan Babilonia che ama chi nan chi chahte ne, a denda ye. Ihyan chahn ne, ndere chahtechica ye, chahtendihco ye nunde, nde tihyon yune ye ihyan numachahte iyehense che dama chi ye nduco ye. Ate man ne, a denda ye.

⁹ Quenda yahn tama ángel nan che chi ino ye, ne ama dito rahn ye:

—Ihyan che ndeva ye yavenan ite tan che ndinan me man, che ndeva ye yavenan che ntave ye che conan menun te man, che cuahnecon ye che conan cade yahn te tah ye o chata ye man ne,

¹⁰ numacuahn vedetan din Dendiohs castigo ihyan, cuahtenun ye van ruchiyahn che riche nduco azufre. Nan Dihvo vo Jesucristo, ihyan min che chih ye nduhca ama itecuche lihn che chi te vedino man, nan ángel yahn Dendiohs man ne, va che co ihyan chahn castigo yah.

¹¹ Cuahn dama cuahtenun ye min van ruchiyahn, chuhrihn ye nde ro nde rahn.

¹² Chemin che ihyan yahn Dendiohs, ihyan chahn che renevahnecon ye vederihquentiyan yahn ye man, riquendi ritahno ye Dihvo vo Jesucristo man ne, nahn che cuahtenan cuma ye vedechahtino.

¹³ Tuhme chihneván ama ndudo che chica vahchetero che rahn ri u:

—Codiron tuhca: “Ama ndah ro yahn tenahn che chitahno ye Dihvo vo Jesucristo cuahn che chahtenan ye iyehense.” Namin codiron ndudo cuh che rahn Vaco Ndah yahn Dendiohs: “Man ne, cuahte tuhno ye, a quenan nan che din ye ntiyon yahn Dendiohs, chahtenan ye iyehense. Nducote runecade chahtenan ye min ne, man ne, ama ndah ro yahn ye.”

Nda ro che cuhnde cade yahn nducoyaca ihyan

¹⁴ Tuhme ndihcheró ama man cua, ne menan man me ne, va ihyan min che rinduco ye nducoyaca ihyan. Quenun tin ye ama corona diyahnguan, ne nda ye ama hoz che ama can.

¹⁵ Ura min chica tama ángel vahchetero nan va Dendiohs, ne numa dito ye rahn ye ri ye ihyan min:

—A nda ro che ndevahn ne ndute ndata che va iyehanse. Cuica ne trigo, cuenedin dama ne, te a va yan.

¹⁶ Tuhme ihyan che va ye nan man me ne, chica ye trigo nduco hoz yahn ye, nedin dama ye.

¹⁷ Chihno min ne, chica tama angel vahchetero nan va Dendiohs, ne namin nda ye ama hoz che ama can.

¹⁸ Tuhme angel che redin ye cudado yahn nata me ne, chica ye min, ne numa dito ye rahn ye ri ye angel che nda ye hoz me:

—Cotah hoz yehn, ne cuique ndute yahn dihyo uva che va iyehanse, te a nine.

¹⁹ Dinahn angel me, ne chica ye duhndo uva nduco hoz yahn ye, chih ye chete tanque nan che va che cuhno. Checadinó te che cuhno uva chahn ne, conahn nduhca che din Dendiohs castigo yah ihyan nunde.

²⁰ Ndiheró che chihno uva chahn cuahn chihto yan Jerusalén. Cuahn che ndo ya tanque me ne, deman yun ndiquendah, chetuhn ntahn cuaco chihto tanque me tenduh ino ciento kilometro, ne che yano ne, rehche ama caballo van yun me rahn nde nan freno yahn te.

15

Ndache angel che chenán cuma ye vederihquentiyon che din ye castigo ihyan iyehanse

¹ Chihno min ne, ndihcheró che chinahn tama vederihno chahte. Chihnde ro ndache angel che chenán cuma ye vederihquentiyon che din ye castigo ihyan iyehanse. Nduco chemin ne, cuihnónan vedeyah che numacuahn vedetan cah Dendiohs ihyan.

² Tuhme ndihcheró nan che deca ro tuyuno deca ro me che chahte nduhca ama vine. Ama diyahn ro nduhca ruchiyahn. Chihto min ne, vatendi ihyan che hua nevahnecun ye ite tan me man, che nentave ihyan yahn te menun te man, che hua cahnecon ye che conan cade yahn te ihyan man. Nda queri ama ye arpa che a necah Dendiohs ihyan,

³ ne rita ye himno che dirun Moisés, ihyan min che din ye ntiyon yahn Dendiohs man, dirun Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs man. Himno me ne, tuhca:

Dihve nuhn Dendiohs, ndih che ama chahte vederihquentiyon quenán cuma ne,

¡ama ndahca nducuahn che din ne!

A ndih che rihquentiyon ne nducuahn nación.

¡Ama runecade ne nan vederihquentiyon yahn ne!

⁴ Dihve nuhn, nducoyaca ihyan renevahnecun ye ndih, rendeva ye yavenan ne.

Atenan ndih che ndah, te ndiyu ihyan nunde ndih.

Ihyan nducuahn nación nda ye nan ne, ndeva ye yavenan ne,

te a ndero ndi che ama runecade ne nan vederihquentiyon yahn ne.

⁵ Chihno min ne, min vahchetero ndihcheró che nane vah tino nan che riyá Dendiohs ro menan.

⁶ Namin ndihcheró che quendah ndache angel, nda queri ama ye vederihquentiyon che din ye che chuhrihn ihyan ro che cuihno iyehanse. Chenun ye tino cua che tuno diyahn ro man, chenun ticua ye cinturón diyahnguan man.

⁷ Tuhme ama cha che deca ro ite deca ro me, cah ama cuh diyahnguan queri ama ye. Nduh che ndache cuh chahn ne, chenun ama nan nune, ne nduco chemin ne, numacuahn vedetan din Dendiohs castigo ihyan iyehanse.

⁸ Ura min ama chito yahme nan che quenun Dendiohs, ne nduco chemin chihnde ro che ama yudo vederihquentiyon yahn ye. Nde ama ihyan hua co nda ye min nde cuihno co ihyan iyehmse castigo yah, din angel che ndache chahn.

16

Ndache angel nda ye ama cuh queri ama ye

¹ Tuhme chihneván ndudo che ama yudo chenun vahchetero che rahñ ri nduh che ndache angel chahn:

—Cuahn ca ama ca ama nchuhn, ndahco ya ne nune che chenun cuh yahn ne min iyehmse.

² Cuahn che cuahn ama ye, ndahco ya ye cuh yahn ye ne, nducoyaca ihyan che chenán cade yahn ite tan me ihyan man, che rendeva ye yavenan che nentave ihyan yahn te menun te man ne, quendañ ama yute che ama yah ihyan.

³ Cuahn che cuahn tama angel nan che chi o ye ne, ndahco ya ye cuh yahn ye nan nuniyahn, ne ndaconda yun nduhca yun yahn tenahn, chih nducoyaca nan ite che chenun te.

⁴ Cuahn che cuahn tama angel nan che chi ino ye, ndahco ya ye cuh yahn iyehmse ne, nducuahn ico man, vaco nune man, ndaconda yun.

⁵ Tuhme angel che va tah ye vederihquentiyon che din ye cudado nune ne, ndeva ye yavenan Dendiohs, ne chihneván che tuhca rahñ ye:

—Dihvé Dendiohs che va ne numacuahn ro, ndiyu ihyan nunde ndih. Redin yahn che din ne castigo ihyan sih tihca, cuh ye yun,

⁶ te a ihyan sih che chihno ye ihyan yahn ne man, profeta yahn ne man, chihera ye yun yahn ye.

⁷ Namin chihneván tama ndudo che chica nan ta min vahchetero che rahñ: —Dihve nuhn Dendiohs che ama yudo vederihquentiyon che quenán cuma ne, cuaco rahñ ye, te numa cuaco techeca de ne yahn ihyan sih.

⁸ Cuahn tama angel nan che chi cun ye, ndahco ya ye cuh yahn ye nan yahn che quendiho nan ro, ne quenán cuma yahn me vederihquentiyon che cahcayahn ihyan iyehmse.

⁹ Ama chiche nducoyaca ye, ate nde nduco nduh hua nto ino ye nunde yahn ye, nde hua ndeva ye yavenan Dendiohs, ihyan min che va tah ye vederihquentiyon che din ye castigo ihyan. Tahque ndah ye ne, chihnga rahñ ihyan chahn yahn ye.

¹⁰ Cuahn tama angel nan che chi uhn ye, ndahco ya ye cuh yahn ye nan che va ite tan me rihquentiyon te, ne chi man mumachahte nan che rihquentiyon te. Nducoyaca ihyan ne, nde tuno racondi ye, recañ dihyon ye chihya ye, te ama retañ yah ihyan.

¹¹ Rahva ye yahn Dendiohs yahn che rechuhrihn ye che ra yah ihyan man, che chenán yute ihyan man. Nde tah hua nda yahn ye che nfo ino ye nunde yahn ye.

¹² Cuahn tama angel nan che chi an ye, ndahco ya ye cuh yahn ye chete ico chahte che duche Eufrates, ne tihnan ico me, ndo ama yune cava che chuh ama yahn rey che chica ye cuahn nan che riquenda yahn.

¹³ Tuhme ndihcheró ite tan che ndinan me man, ite tan che quendañ van nune man, ite tan che quendañ ro ndiyahn, che redin ca te che rahndudo te Ndudo yahn Dendiohs man. Chende queri ama ite chahn ne, quendañ ama vaco chihnga che deca ro yahva deca ro.

14-16 Vaco chihnga chahn ne, redin vederihno, ne rahn numachahte iyehmse che rene din dama nducoyaca rey ama cuan che duche Armegeadon che devaco hebreo, cava che cuhma ye ro che techecade Dendiohs, ihyan min che ama chahte vederihquentiyon quenan cuma ye.

Tuhme chihneván ndudo che rahn Dihvo vo Jesucristo tuhca:

—Cuihco nchuhn cudado che cahma nduco ne. U ne, adenan nda nduhca che renda sahn duco ura che hua vateyan ihyan. Ama ndah ro yahn nchuhn ndete che vateyan ne ro min man, ndete che dave yavenan ne man.

17 Cuahn tama angel nan che chi ndache ye, ndahco ya ye cuh yahn ye devan yuhne, ne chihneván ama ndudo che chica vahchetero nan va ihyan ndinan me. Ama dito rahn tuhca:

—A chinahn vedeyah che nda nduh che ndache angel chahn.

18 Tuhme chiya cuah man, chine dave man, ama yudo chi man, ama nuhn yahn man. Nde tahque ca dito ca nuhn che co cuahn che nuhn ro che vate ihyan iyehmse.

19 Yan che nduhca yan Babilonia che ama chi nan chi chahte ne, ndah, chi ino ndi. Namin nducuahn yan rahte numachahte iyehmse ne, chihno ndora. Tuhme numacuahn vedetan din Dendiohs castigo yah yan min che nduhca Babilonia.

20 Nducuahn ico rahte che vate iyehmse man, che vate chete nuniyahn man ne, chihno ndora.

21 Namin chera yun van ihyan iyehmse. Ama rahte, i tenduh o raco kilo queri ama. Tuhme ama chihnga rahn ye yahn Dendiohs yahn castigo yah che chera yun me.

17

Tahn che ama ndere quechica me

1 Chihno min ne, ndihcheró ama cha angel che nda ye nduh che ndache cuh chahn, ne rahn ye ri ye u:

—Cochi ndihcheró castigo che co tahn che ama ndere quechica me che va te nan nuniyahn.

2 Rey che vate se iyehmse ne, ndere chahtenan se nduco te, ne nducoyaca ihyan iyehmse ne, quendi ye yune chihnga yahn te.

3 Tuhme din Vaco Dendiohs che chihno che quenda ama angel u ama cuan yahn nan che metah duhva. Min ndihcheró tahn ndere quechica me, quendudo te ama ite tan che cuah te man, che chenán ndudo che chihnga rahn yahn Dendiohs numachahte te man. Chenan ndache tin te man, ndiche dihne te man.

4 Tahn ndere quechica me, quenun te ama tino morado man, cuah man, ne necuco te diyahnguan man, tu diyahn man, perla man. Nda te ama vaso diyahnguan ndito dehtenduh che chihnga, rihco ro nunde yahn te che ndere quechica te.

5 Nan chata te ne, quenán che duche te che nde ama ihyan hua renahn ye, ndrún tuhca: “Yan che nduhca yan Babilonia che ama chi nan chi chahte. Yan che chihnde nducuahn nunde chihnga, quendi yan chenahn.”

6 Checadinó che ndehdame te yun yahn ihyan yahn Dendiohs che cahndudo ye Ndudo yahn Dihvo vo Jesucristo, ne ama cuahn inó chi yahn chemin.

7 Tuhme rahn angel me ri ye u:

—Hua cahn ine co. Té che cadine deh conahn yahn tahn min man, ite che quendudo te man, deh conahn yahn ndache tin te man, ndiche dihne te man.

8 Ite min ne, quenán te iyehmse ro menan, ne chih te. Ate ntuche te, ne a nun va che caca te nan che quenun chiche te, nda tun te iyehmse numanahn

che ametah din Dendiohs castigo ite, conun te van ruchiyahn cuahn dama. Nducoyaca ihyan che hua chenän caca ye nan lista yahn Dendiohs nde ro che metah cuhnde iyehñse ne, ama cahn ino ye che ndaconan ndihchero ye ite, te quenän te iyehñse ro menän, ne chih te, ate ndaconan ntuche te.

⁹ Codiron chu cava ihyan che ndedecadino ye nduco cudado: Che ndache tin ite min ne, conahn che ndache ico nan che va van min che quenän che duche chata tahn min.

¹⁰ Namin che ndache tin te ne, conahn che ndache rey. Uhn rey chahn ne, a chih se, tama se nan che chi an se ne, rihquentiyon ca se, ne tama se nan che co ndache se ne, metah condä tah se vederihquentiyon. Cuahn che condä tah se vederihquentiyon ne, hua rahn conan se.

¹¹ Me ite tan me che chih te, ne ntuche te, ite min che va che co te castigo van ruchiyahn ne, conahn tama rey nan che co nine se che cuhnde tah se ntiyon che chahtenan sahn che ndache chahn.

¹² Me che ndiche dihne te ne, conahn che ndiche rey che comän cuahte se, cuahtenan cuma se vederihquentiyon ama ura dama nduco ite tan me.

¹³ Sahn chahn ne, co dama ndudo yahn se nduco vih, conan se ite tan me.

¹⁴ Cuahtecuhma se nduco Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs. Ate ndahco ndiya ye sahn, te ihyan min ne, tahque yudo vederihquentiyon yahn ye che co nducoyaca rey man, ihyan yudo ihyan rahte man. Ihyan che nduco ye ihyan ne, a tendahnun Dendiohs ihyan, nedin yahn ye ihyan. Ihyan chahn ne, redinahn ye ndudo yahn ye.

¹⁵ Namin rahn ängel me ri ye u:

—Nuniyahn nan che va tahn che ndere quechica me ne, conahn ihyan numachahte iyehñse, nducuahn nación man, ndata yahn ye man, devaco yahn ye man.

¹⁶ Nduh che ndiche rey che conahn yahn dihne ite tan me ne, condinun condinahn se van min che nduhca Babilonia, cahnevi se nducuahn dehtenduh che va, cuihno ndahtera se, cahquiyahn se.

¹⁷ Tihca din se, te man Dendiohs cahma nun ye chete chedave se che dinahn se che nahn ye. Chemin che codama ndudo yahn se nduco vih, conan se ite tan me nde che conahn nduhca che rahn Dendiohs.

¹⁸ Ndahta ndere quechica me ne, conahn yan min che nduhca yan Babilonia che ama chi nan chi chahte man, nan che rendahco ndiya nducoyaca rey yahn numachahte iyehñse man.

18

Chihnonan yahn yan che nduhca yan Babilonia

¹ Chihno min ne, ndihcheró tama ängel che numacuahn vederihquentiyon chica ye vahchetero, ne ama quendihco dave numachahte iyehñse ura che chiya ye.

² Ama dito rahn ye tuhca:

—A chihnonan yahn yan min che nduhca yan Babilonia che ama chi nan chi chahte. Man ne, min nedin vaco vaco chihnga man, rahte yahda chihnga man.

³ Tihca chahno chi, te ihyan yan min ntiyon yune ye ihyan yahn nducuahn nación che ndere cuahtechica ye, cuahtendihco ye nunde. Namin nducoyaca rey yahn numachahte iyehñse ne, dama chi ye nduco ihyan yan min, ne van nunde yahn ihyan chahn ne, chi cuihca nducoyaca sahn rendihcue.

⁴ Tuhme chihnevän tama ndudo che chica vahchetero che rahn tuhca:

—Nducoyaca nchuhn ihyan yáhn, cuendiquendah ne yan min cava che hua dama co ne nduco ihyan yan min man, cava che hua nduco ne co ne castigo che co ihyan chahn man,

⁵ te ihyan chahn ne, a decuihta nduh ye nunde yahn ye, ne a nda ro che din castigo ihyan.

⁶ Man ne, va che chuhrihn ye nduhca che cah rihn ye ihyan chenahn, nde condudonan ca chuhrihn ye, nedihve ye nunde yahn ye. Nde tahque chuhrihn man ye che co che din ye che chuhrihn ihyan chenahn.

⁷ Va che ama chuhrihn ye, co ye castigo yah, yahn che numacuahn vedeyade chahte ye iyehense, ne numa ino ye ndere chahtechica ye, chahtendiho ye nunde. Ihyan chahn ne, ndedecadino ye che ametah duhva nduhchan ye. Hua dehva co yahn ye, nde hua vatemān ye, che rahco ye.

⁸ Chemin che ndo dama nducuahn castigo che co ye. Chuhrihn ye man, ndihche ye cuico man. Cuihno coh ye, nde cuihno cuco yan vaco ye. Tihca va che cuahno co ye, te a Dihvo vo Dendiohs che din ye castigo ihyan, ne ihyan min ne, ama chahte vederihquentiyon yahn ye.

⁹ Nducoyaca rey yahn numachahte iyehense che dama chi ye nduco ihyan chahn, chahtendiho ye nunde ne, ndihchero ye che cuihnonan yahn ihyan chahn, cuihno cuco yan vaco ye, ne ama condache ye, nde cuaco ye.

¹⁰ Nde hua nahn ndedecadino ye yahn castigo me, che vah ye, ne cahma ye:

—¡Ama yah ri nuhn cava nchuhn! Yan vaco ne che nduhca yan Babilonia, ama chi nan chi chahte ro menan, ate man ne, ama yune no chihno ndo iya, din Dendiohs castigo.

¹¹ Namin nducoyaca sahn rendihcue ne, condache se, nde cuaco se cava yan min, te ametah ndaca duh che cua dehtenduh yahn se:

¹² diyahnguan man, diyahngua man, tu diyahn man, perla man, nducuahn nan tino ndah, tino morado man, tino cuah man, nducuahn nan yahn che ndah ran man, yahn ndah man, dehtenduh che ndindah nduco marfil man, cu man, cu cuan man, tu che duche marmol man,

¹³ canela man, ndute dan man, cuhn man, yunedan che duche mirra man, nunedan man, vino man, aceite man, yune pan man, trigo man, ite dito man, itecuche man, caballo man, carro man, nde ihyan che rendihcue se man.

¹⁴ Ndedecadino se: “¡Tiya ihyan che ama chenān cuma vedecuihca me! ¡Tiya ihyan che ama renan ino dehtenduh che ndah me!”

¹⁵ Nducoyaca sahn che chi cuihca se yan min, ndihcue se dehtenduh ne, nde hua nahn ndedecadino se yahn castigo che chi ihyan chahn, che vah se. Ama condache se, nde cuaco se,

¹⁶ ne cahma se:

—¡Ama ri ndache nuhn cava yan min! Ro menan me ne, ama chi nan chi chahte, ama chihnde vedecuihca. Nduhca ama ndahta che ama nendeva ca te nduco tino ndah, tino morado man, tino cuah man, che nenecuco te diyahnguan man, tu diyahn man, perla man ne, tihca yan min.

¹⁷ Ate man ne, ama yune no chihnonan yahn vedecuihca me.

Nducoyaca sahn ricahca barco man, sahn ndinan yahn se man, ihyan che nda se chede man, nducoyaca sahn chenahn che redin se nuyon nan nuniyahn man, chan yahn se,

¹⁸ ndihchero se ura che riche. Necahco yah se, ne rahn se numa dito se:

—Ro menan me, ¡ama chi nan chi chahte yan cah! ¡Nde ama yan nduhca!

¹⁹ Chih se yune yahn van yudo tin se, raco se man, rah ran se man, ne rahn se numa dito se:

—Ro menan me ne, jama chi nan chi chahte yan cah! Min chi cuihca nducoyaca sahn che va barco yahn se, techecan se dehtenduh nan nuniyahn. Ate man ne, ama yune no chihnonan yahn. jAma yah ri nuhn cava!

²⁰ Me nchuhn, che chenun ne vahchetero man, nchuhn ihyan apóstol man, nchuhn che rahndudo ne Ndudo yahn Dendiohs man, nchuhn ihyan yahn Dendiohs man, cuahte yeno ne, te techecade Dendiohs yahn ne, din ye castigo ihyan yan min.

²¹ Tuhme ama ángel che ama dito ye ne, chetah ye ama tu nduhca ama tu yudo, chihnun ye van nuniyahn, ne rahn ye:

—Tihca cuahno co yan che nduhca yan Babilonia che ama chi nan chi chahte, ne ametah ndaconan ndihchero ihyan.

²² Ametah ndaconan cuahco arpa man, flauta man, trompeta man, yan min. Ametah ndaconan cuahte ihyan redin ntiyon, nde metah ndaconan cuahco molino.

²³ Ametah ndaconan co ro yahn, ametah ndaconan cuahte vihco ihyan che rihnevaco ye. Andahre ro menan me ama chi cuihca sahn rendihcue yan min man, andahre ama chihnceh ihyan yan min ihyan nación chenhahn, ntihyon yune ye ihyan che ndere cuahtechica ye, cuahtendihco ye nunde, ate man ne, a chihnonan yahn.

²⁴ Ihyan yan min ne, ndehdame ye yun yahn ihyan che cahndudo ye Ndudo yahn Dendiohs man, ihyan yahn Dendiohs man, che chih ye yan min, numachahte iyehse man.

19

¹ Chihno min ne, chihneván che ama dito rahn ama yahn ihyan che chenun ye vahchetero:

—Ndeva vo yavenan Dendiohs yuhn vo, te ama chahte vederihquentiyon yahn ye, ne ndedevahn ye uvo.

² Retechede ye numa cuaco, ne din ye castigo ihyan yan che nduhca yan Babilonia che ama chi nan chi chahte. Ihyan chahn ne, retihyon yune ye nducoyaca ihyan iyehse che ndere cuahtechica ye, cuahtendihco ye nunde. Ate man ne, din Dendiohs castigo ihyan, yahn che chihno ye ihyan yahn ye.

³ Ndaconan rahn ihyan chahn che chenun ye vahchetero:

—Ndeva vo yavenan Dendiohs, te yan min ne, cuco cuahn dama.

⁴ Tuhme nduh che ndico cun indihche chahn man, nduh che cun che deca ro ite deca ro me man, chehtihya ye, ndeva ye yavenan Dendiohs che va ye nan che rihquentiyon ye, ne rahn ye:

—jTihca co! jNdeva nuhn yavenan ne!

⁵ Ura min chihneván ama ndudo che chica nan va ye, che rahn tuhca:

—Nducoyaca nchuhn, nde ihyan ndinan man, nde ihyan chenhahn man, che renevahnecun ne Dendiohs yuhn vo, redin ne ntiyon yahn ye ne, cuendeva ne yavenan ye.

Dihvo vo Jesucristo ne, ndeva ye ihyan yahn ye

⁶ Chihno min ne, chihneván ama ndudo che ama yudo chenun, nduhca cuahn che ama rahco ico man, ama rine dave man. Ndudo min ne, ndudo yahn ama yahn ihyan che rahn ye tuhca:

—Ndeva vo yavenan Dihvo vo Dendiohs, ihyan min che ama chahte vederihquentiyon yahn ye, te a canan rihquentiyon ye numacuahn vedeyudo.

⁷⁻⁸ Ndeva vo yavenan ye numacuahn vedeyeno, te Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs ne, a nda ro che ndeva ye ihyan yahn ye. Ihyan chahn ne, anduhneca ama tahn che neneva ca te tino cua che nde tuno diyahn ro, che

a va yan te che cahnevaco te. Tihca, te a vate yan ye, chenun ye tino cua cava che ndeva Dihvo vo ihyan. Che chenun ye tino cua ne, conahn che a ihyan yahn Dendiohs ihyan, a dave yavenan ye.

⁹ Tuhme rahn angel me ri ye u:

—Codiron tuhca: “Ama ndah ro yahn ihyan che ndeva Dihvo vo Jesucristo ihyan.”

Namin rahn ye ri ye u:

—Nducuahndehnduh che rahn ri di ne, a man Dendiohs chihquentiyon ye.

¹⁰ Tuhme chehntihya nan angel me cava che ndeva yavenan ye. Ate rahn ye ri ye u:

—Hua din tihca, te u ne, anduhneca nchuhn che redin ne ntiyon yahn Dendiohs, riquendi ne numa ino ne, ritahno ne ndudo yahn Dihvo vo Jesucristo. ¡Cuendeva yavenan Dendiohs!

Cuedevano nchuhn te ihyan che rahndudo ye ndudo yahn Dihvo vo Jesucristo ne, ndiyu che cuande yahn man ye che rahndudo ye, te a man Dendiohs che rihquentiyon ye ihyan.

Ihyan che quendudo ye caballo cua

¹¹ Chihno min ne, ndihcheró che quendah vahchetero, ne chihnde ro ama caballo cua. Ihyan che quendudo ye ite ne, duche ye Ihyan Che Redinahndehnduh Ye Ndudo Yahn Ye man, Ihyan Che Numa Cuaco Quechica Ye man. Ihyan min ne, retechecade ye numa cuaco, rendahco ndiya ye ihyan che rendihche tan ye Dendiohs.

¹² Ndutinan ye ne, ama riya nduhca ruchiyahn. Ama ndeh corona chendudo tin ye, ne chata ye ne, ndirun che duche ye che atenan man ye renahn ye.

¹³ Quenun ye ama tino che ama chenun yun, ne duche ye Ndudo yahn Dendiohs.

¹⁴ Nda ye ama yahn angel che cuhma ye. Ihyan chahn ne, chenun ye ama nan tino ndah che cua cuhe, chendudo ye caballo cua.

¹⁵ Ihyan ndinan me ne, quetah chende ye ama spada che ama can, ne nduco chemin ne, ndahco ndiya ye ihyan yahn nducuahndehnduh nacion. Cahcantiyon ye ihyan numacuahn vedeyudo, ne din ye castigo yah ihyan numacuahn vedetan nduhca che nahn Dendiohs, ihyan min che ama chahte vederihquentiyon yahn ye.

¹⁶ Nan tino yahn ye man, nan dihma ye man, ndirun tuhca: “Rey che tahque yudo vederihquentiyon yahn ye che co nducoyaca rey man, ihyan yudo ihyan rahte man.”

¹⁷ Tuhme ndihcheró ama angel che nti ye nan quendihco yahn. Ama dito cah ye yahn nducoyaca yahda che reh te yute:

—Menchi nchuhn, cuendo dama ne, te numacuahn vedeyudo din Dendioh castigo ihyan iyehense.

¹⁸ Cheh ne yute yahn rey man, sahn ndinan man, sahn tan man, caballo man, sahn che chendudo se ite man, sahn cuihca man, sahn chevah man, nde che cahya nde che cune.

¹⁹ Tuhme ndihcheró ite tan che ndinan me. Nduco te nducoyaca rey yahn numachahte iyehense man, sandado yahn se man, vateyan se cava che cuhma se nduco ihyan ndinan che quendudo ye caballo cua me man, nduco ihyan yahn ye man.

²⁰ Denda ite tan me, ne chi te preso nduco sahn rihneh che chinan se ite, din se vederihno numacuahn vederihquentiyon yahn te, chihneh se ihyan che cahnecon ye che quenandehnduh yahn te ihyan man, ndeva ye

yavenan che nentave me man. Tuhme chacondahnun ye ite tan me nduco sahn rihncheh me van ruchiyahn che riche nduco azufre.

²¹ Me nducoyaca sahn che nduco te ne, chih se nduco espada che quetah chende ihyan ndinan che quendudo caballo me, ne ndo dama nducoyaca yahda chahn, cheh te sahn.

20

¹ Chihno min ne, ndihcheró ama ángel che chica ye vahchetero, nda ye llave yahn nan che chenan rino tenahn man, ama cadena chahte man.

²⁻³ Chiquiyahto ye ite tan me, ntihyon chiche ye ite infierno, ne chaconahn ye sello chendevah. Min conun chiche te nde cuihno ama mil nduyo cava che metah cochica te, cahnceh te ihyan iyehnse. Tuno ro min ne, ndiquendah te, cochica te neve ro. Ité tan me ne, chemin che chundah, sahn min che ndaconda se cu ro menan.

⁴ Tuhme ndihcheró ama yahn ihyan che vate ye nan che rihquentiyon ye. Ihyan chahn ne, ndonda tah ye vederihquentiyon cava che techecade ye. Namin ndihcheró ihyan che chihno se ihyan iyehnse, chihca yan se dando ye, yahn che cahndudo ye ndudo yahn Dihvo vo Jesucristo man, Ndudo yahn Dendiohs man. Ihyan chahn ne, hua ndeva ye yavenan ite che nentave me, nde hua cahnecon ye che quenan cade yahn ite che ndinan me ihyan. Namin ndihcheró che ntuche ye, ne chinan ye Dihvo vo Jesucristo, chihquentiyon ye chete che ama mil nduyo.

⁵ A ihyan chahn che ntuche ye menan vihca. Me tenahn chenahn ne, hua ntuche ye ro min, te nde chihno nduh che ama mil nduyo.

⁶ ¡Ama ndah ro yahn ihyan chahn che ntuche ye nda ro min! ¡A yahn Dendiohs ihyan! Ametah che co ye castigo che co ihyan nunde. Co ye nduhca chidocuyan yahn Dendiohs man, Dihvo vo Jesucristo man, cahcantiyon ye nduco Dihvo vo chete che ama mil nduyo.

⁷ Chihno nduh che ama mil nduyo ne, ntate sahn chundah,

⁸ ne quechica se iyehnse, chihncheh se ihyan yahn nducuahn nación. Ama nan ye ne, Gog, ne tama nan ye ne, Magog, ne nedin dama se ihyan, cava che cuhma ye. Ama yahn ye nduhca che ndeh yahndute che va chihto nuniyahn,

⁹ chica ye numachahte iyehnse, teche ndive ye nan vate ihyan yahn Dendiohs, yan che yah ino ye. Ate din Dendiohs che chera yahn che chica nan ro, ne chihno chiche ye.

¹⁰ Me sahn chundah me che chihncheh se ihyan iyehnse ne, chacondahnun Dendiohs sahn van ruchiyahn che riche nduco azufre, nan che chacondahnun ye ite tan me nduco sahn rihncheh che rinan se ite. Min va che chuhrihn se nde ro nde rahn numacuahn ro.

Techecade Dendiohs yahn ihyan nunde

¹¹ Tuhme ndihcheró Dendiohs che va ye nan che retechecade ye. Ama yudo vederihquentiyon quenan cuma ye man, numa cuaco retechecade ye man. Numacuahn vederihquentiyon yahn ye ndahco ndiya ye nducuahn vederihquentiyon che va vahchetero man, iyehnse man.

¹² Namin ndihcheró nducoyaca tenahn, ihyan yudo ihyan rahte man, ihyan chenahn man, vatendi ye nan ye. Tuhme nahne ye nducuahn libro nan che chenan caca nducuahn che nedin ihyan. Namin nahne ye tama libro nan che chenan caca nducoyaca ihyan che va che cuahtenan ye vahchetero. Ura min techecade ye yahn tenahn chahn anduhneva che chenan caca yahn ye.

¹³ Min nduco nducoyaca nducondi tenahn, nde ihyan che chih ye van nuniyahn. Chica ye nan che chahtenan rino ye, ndo dama ye min.

14-15 Chihno techecade ye ne, decuihno ye nan che chahtenan rino tenahn man, vederih man, chehnevi ye vederihquentiyon yahn. Me nducoyaca nducondi ihyan che hua chenana caca ye nan libro che va che cuahtenan ye vahchetero ne, dechuh ye ihyan van ruchiyaahn nan che co ye castigo cuahn dama.

21

Nedin ra Dendiohs vahchetero man, iyejnse man

1 Chihno min ne, ndihcheró vahchetero man, iyejnse man, che a nedin ra Dendiohs. Vahchetero man, iyejnse man, che va ro menan me ne, ametah, nde nuniyaahn ametah.

2 U Juan ne, ndihcheró yan ra che namin duche Jerusalén, yan yahn Dendiohs, che chica vahchetero nan Dendiohs, cochahn cuahn iyejnse. Ama ndahca ro nduhca che ro ama fahn rihnevaco che neneva ca te.

3 Namin chihneván ama ndudo che chica vahchetero. Ama dito rahn tuhca:

—Condihche, man ne, nduco man Dendiohs ihyan iyejnse, nedin yahn ye ihyan, ne ihyan chahn ne, nevahnecon ye ihyan.

4 Dendiohs din ye che ametah vederih nan ihyan chahn man, ametah co ran man, ametah cuaco ye man, ametah chuhrihn ye man. Nducuahn vedeyah che chuh ye ro menan ne, a chihno.

5 Tuhme Dendiohs, ihyan min che va ye rihquentiyon ye ne, rahn ye:

—Condihche, u ne, nedin rá nducuahn dehtenduh che va.

Namin rahn ye ri ye u:

—Codiron ndudo che chihneven, te cuaco, ne redin yahn che cohahtino ihyan.

6-7 Rahn ye tama yune ri ye u:

—Nducuahn ndudo che chihcocadé ne, a chinahn. U ne, vá numacuahn ro. U dendáh nducuahn che va. Hua nda ro che cuihno vederihquentiyon yahn. Ihyan che renda yahn ye che nevahnecon ye u, ne hua ndacadaama ye u che Dendiohs yahn ye ne, numacuahn vedeyeno ndevá ihyan, nedin dayá ihyan, cuahtenan ye vahchetero numacuahn ro. Chemin ne, anduhneca ama vedecuihca cava ye.

8 Me ihyan che hua rihquino ye cotahno ye u man, ihyan che hua richahtino ye u man, ihyan che chihnga ihyan ye man, ihyan rihno ihyan man, ihyan che ndere rahtechica ye nduco ihyan che hua nihnevaco nduco ye man, ihyan che redin cuah ye man, ihyan che rendeva ye yavenan dehtenduh che redendah man ihyan, redin ye dendiohs yahn ye man, ihyan rihneh man, nducoyaca ihyan chahn ne, va che co ye castigo cuahn dama, cuahtenan ye van ruchiyaahn che riche nduco azufre.

Yan Jerusalén ra

9 Tuhme ndihcheró ama cha ángel che ndache chahn che nda ye nduh che ndache cuh che chenun vedeyah cava ihyan iyejnse nan che cuihnonan yahn, ne rahn ye ri ye u:

—Cochi ndihchero ihyan yahn Dihvo vo Jesucristo, ihyan min che chih ye nduhca ama itecuche lihn che chi te vedino nan Dendiohs.

10 Tuhme din Vaco Dendiohs che chihnó che quenda ángel me u ama tin ico yaco. Min nahme ye u yan yahn Dendiohs che ama yudo, yan min che duche Jerusalén che chica vahchetero nan Dendiohs.

11 Ama diyahn ro, rihco ro vederihquentiyon yahn Dendiohs. Nduhca che ro tu yuhno che duche jaspé tihca ro.

12 Ntahn cuaco yan me ne, ndahto ama chete yaco che chenan ndichio chendevah yahn, ne quenán ama ángel queri ama chendevah chahn, redin ye cudado. Queri ama chendevah chahn ne, quenán che duche queri ama ndata yahn ihyán nación yahn Israel.

13 Nduh che cun lado chete me ne, chenan ino chendevah queri ama lado.

14 Name yahn chete me ne, ndavíh nduco ndichio tu rahte, ne nan queri ama tu chahn ne, quenán che duche queri ama ihyán apóstol yahn Dihvo vo Jesucristo.

15 Ángel me ne, nda ye ama cade diyahnguan cava che decade ye yan me, chete yahn man, chendevah yahn man.

16 Yan me ne, dama no nduh che cun lado, o mil quenán o ciento kilómetro queri ama lado. Che chahn ama lado ne, ti va che yaco.

17 Chete me ne, ri ino raco ndiche cun metro che yaco.

18 Chete me ne, ndahto nduco tu che duche jaspe. Viyan me ne, deman diyahnguan, nde tuno diyahn ro nduhca tu yuhno.

19 Nduh che ndichio tu rahte che ndi name yahn chete me ne, nenecuco nduco nducuahn nan tu diyahn. Ama ne, nenecuco nduco jaspe; tama ne, nduco zafiro; tama ne, nduco ágata; tama ne, nduco esmeralda;

20 tama ne, nduco ónice; tama ne, nduco cornalina; tama ne, nduco crisólito; tama ne, nduco berilo; tama ne, nduco topacio; tama ne, nduco crisoprasa; tama ne, nduco jacinto; tama ne, nduco amatista.

21 Nduh che ndichio chendevah chahn ne, ndindah nduco perla; queri ama ne, ndindah nduco ama perla. Yune viyan me ne, deman diyahnguan, nde tuno diyahn ro nduhca tu yuhno.

22 Metah nde ama yaco viyan me, te Dihvo vo Dendiohs, ihyán min che ama yudo vederihquentiyon yahn ye ne, quenun ye min. Namin min quenun Dihvo vo Jesucristo.

23 Yan me ne, hua rendotenan yahn man, iyo man, cava che cuhnde ro dave, te nduco vederihquentiyon yahn Dendiohs man, Dihvo vo Jesucristo man, quendihco dave numachahte.

24 Quendihco dave numachahte, ne ihyán yahn nducuahn nación che ndevahn ye ne, chenun ye min, nde rey che ama yudo vederihquentiyon chahtenan cuma ye, nduco ye, chenun ye min.

25 Yan min ne, hua nda ro che co man, ne chendevah yahn ne, chendah cuahn dama.

26 Ihyán yahn nducuahn nación che ama chahte vederihquentiyon chahtenan cuma ne, nduco ye, chenun ye min.

27 Ate nde ama nan dehtenduh che chihnga hua co condá min, nde hua co condá nde ama ihyán nunde, ihyán che chihnga redin ye man, ihyán rihneh man. Ihyán che ndedevahn Dihvo vo Jesucristo, ihyán chahn che chenan cava ye nan libro che cuahtenan ye vahchetero ne, atengan ihyán chahn che chenun ye min.

22

1 Tuhme ángel me ne, nahme ye u ama ico che deman nune dave che redin che rahtenun ico ihyán. Riquendah nan va Dendiohs nduco Dihvo vo Jesucristo,

2 rechuh mendahn yune viyan. Nduh che o lado chihto ico me ne, vatendi yahn che redin che rahtenun ico ihyán. Nduh iyo nduh iyo ri ndute yahn, ne yata yahn ne, richihve cava che co ico ihyán nducuahn nación.

³ Viyan me ne, metah nde ama nan dehtenduh che chihnga che chihco cade Dendiohs che va che conda. Dendiohs man, Dihvo vo Jesucristo man, min cuahte ye cahcantiyon ye, ne ndeva ihyan yahn ye yavenan ye.

⁴ Cuahtenan ihyan chahn nan Dendiohs, ne conan che duche ye chata queri ama ihyan chahn.

⁵ Min ne, ametah nda ro che co man; ametah ndotenan ihyan yahn che quendihco nan ro man, linterna man, te man Dihvo vo Dendiohs din ye che condihco dave. Ihyan chahn ne, cahcantiyon ye cuahn dama.

A nun ndaconan chi tun Dihvo vo Jesucristo

⁶ Tuhme rahn angel me ri ye u:

—Cuaco nducuahh che ndihchero man, chihneven man, ne redin yahn che cochahtino ihyan. Dihvo vo Dendiohs, ihyan min che recah ye ndudo yahn ye che rahndudo ihyan ne, a man ye dechuh ye angel yahn ye, cah ye, checadino ihyan yahn ye yahn dehtenduh che a nun va che conahn.

⁷ Rahn Dihvo vo Jesucristo tuhca: “¡A nun va che ndaconan chí! ¡Ndah ro yahn ihyan che tumacah ye yahn ndudo yahn Dendiohs che va che diron!”

⁸ U Juan, chihneván man, ndihcheró man, dehtenduh chetuhchan. Chihno min ne, chehntihya nan angel, nahn ndeva yavenan ye.

⁹ Ate rahn ye ri ye u:

—Hua ndeva yavenan, te u ne, atenan redin ntiyon yahn Dendiohs nduhca di man, nduhca ihyan chenahn che rahndudo ye ndudo yahn ye man, nduhca nducoyaca ihyan che tumacah ye yahn ndudo che va che diron man. Dendiohs, ihyan min cuendeva yavenan ye.

¹⁰ Namin rahn angel me ri ye u:

—Hua cahcondeh nde ama nan dehtenduh. Codiron nducuahh, te a nun va che conahn.

¹¹ Numanahn min ne, dehve din yahn che quendi ihyan nunde yune yahn ye. Ate ihyan yahn Dendiohs ne, quendi ye din ye che ndah, hua cahcoman ye che ritahno ye ihyan.

¹² Rahn Dihvo vo Jesucristo tuhca: “¡A nun va che ndaconán chí! Ndahco menún yahn queri ama ihyan tuno ca ntiyon che nedin ye.

¹³ U che vá numacuahh ro. U dendah nducuahh che va. Hua nda ro che cuihno vederihquentiyon yahn.”

¹⁴ ¡Ama ndah ro ihyan che ndaca ye vederenchahco cava nunde yahn ye!, te nduco tihca ne, co cuahtenan ye yan me man, cheh ye ndute yahn yahn che redin che rahtenun ico ihyan man.

¹⁵ Ate ihyan che hua ritahno ye man, ihyan che redin cuah ye man, ihyan che ndere rahtenan ye nduco ihyan che hua nihnevaco nduco ye man, ihyan che rihno vih ye man, ihyan che rendeva ye yavenan dehtenduh che redendah ihyan che redin ye dendiohs yahn ye man, ihyan rihnceh man, nde ama ihyan chahn hua co conda ye viyan me.

¹⁶ Namin rahn Dihvo vo:

—U Jesucristo, dechuh angel yahn, cah ye ndudo chetuhchan, checadino ihyan yahn nducuahh yaco. A u che tahque chahte vederihquentiyon yahn van nducoyaca ihyan, ndata yahn David. U ne, anduhneca yuhdo chahte che riquendah vatayan.

¹⁷ Nahn Vaco Ndah yahn Dendiohs man, ihyan yahn Dihvo vo Jesucristo man, ihyan che cahnevan ye ndudo chetuhchan man, che ndaconan chi tun Dihvo vo.

Me ihyan che nahn cuahtenan ye vahchetero ne, atenan che nevahnecon ye Dihvo vo Jesucristo conahn nduco ye.

¹⁸ Nducoyaca nchuhn che cahnevan ne ndudo yahn Dendiohs che ndirun nan libro cuh ne, u reté cudado nchuhn: Ndete che va duh ihyan che tihdenan ye nan ndudo che ndirun ne, tahque chahte castigo va che co ye, tihdenan Dendiohs castigo che a chenacaca nan libro cuh.

¹⁹ Ndete che va duh ihyan che cahnevi ye nan ndudo che ndirun ne, cahnevi Dendiohs che duche ye nan libro che cuahtenan ye vahchetero, ne hua co condá ye min, nde hua conahn nduco ye dehtenduh che ndah che ndirun yahn nan libro cuh.

²⁰ U che te cuandé nchuhn yahn dehtenduh chetuhchan ne, ráhn rí nchuhn:

—A nun ndaconan chí.

Dihve nuhn Jesucristo, ¡tihca co! ¡Cochi tun ne!

²¹ Dihvo vo Jesucristo din yahino ye nducoyaca nchuhn, din ye che ndah nduco ne. Tihca co.